


Diosun Jesúswen  
taexun yuba bena  
yiniki



New Testament in Kashinawa (PE:cbs:Kashinawa)

**Diosun Jesúswen taexun yuba bena yiniki  
New Testament in Kashinawa (PE:cbs:Kashinawa)**

copyright © 2008 Wycliffe Bible Translators, Inc.

Language: Kashinawa

Translation by: Wycliffe Bible Translators, Inc.

Kashinawa [cbs], Peru

**Copyright Information**

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

    You must give Attribution to the work.

    You do not sell this work for a profit.

    You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Kashinawa

**© 2008, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

    You include the above copyright and source information.

    You do not sell this work for a profit.

    You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-27

---

PDF generated using Haiola and XeLaTeX on 21 Feb 2024 from source files dated 29 Jan 2022  
ec39fa26-606c-54f5-9a2c-44cb9c94119f

## Contents

Mateo . . . . .	1
Marcos . . . . .	68
Lucas . . . . .	107
Juan . . . . .	176
Hechos . . . . .	223
Romanos . . . . .	286
1 Corintios . . . . .	319
2 Corintios . . . . .	348
Gálatas . . . . .	367
Efesios . . . . .	377
Filipenses . . . . .	387
Colosenses . . . . .	394
1 Tesalonicenses . . . . .	401
2 Tesalonicenses . . . . .	407
1 Timoteo . . . . .	411
2 Timoteo . . . . .	420
Tito . . . . .	426
Filemón . . . . .	430
Hebreos . . . . .	432
Santiago . . . . .	455
1 Pedro . . . . .	464
2 Pedro . . . . .	473
1 Juan . . . . .	478
2 Juan . . . . .	485
3 Juan . . . . .	486
Judas . . . . .	488
Apocalipsis . . . . .	491

## KAKAPE MATEON JATU KENEXUNIKIAKI MATEO

*Jesúsun xenipabu eska tanakubidanpaunibukiaki, na janchadan  
(Lc 3.23-38)*

- <sup>1</sup> Abrahamnen baba inun Davidin baba Jesucriston xenipabukidi matu yuinun ninkaidakanwen.
- <sup>2</sup> Abrahamnen bake betsadan, Isaac inikiaki.  
Isaacun bake betsadan, Jacob inikiaki.  
Jacobun bakebudan, Judá inun jawen betsabu inibukiaki.
- <sup>3</sup> Judán bakebudan, Fares inun Zérah inibukiaki, jatun ewan kenadan, Tamardan.  
Faresin bake betsadan, Hesrón inikiaki.  
Hesrónen bake betsadan, Aram inikiaki.
- <sup>4</sup> Aramin bake betsadan, Aminadab inikiaki.  
Aminadabin bake betsadan, Nahasón inikiaki.  
Nahasónen bake betsadan, Salmón inikiaki.
- <sup>5</sup> Salmónen Rahab ainwantan bakewa jatun bake betsadan, Booz inikiaki.  
Boozin Rut ainwantan bakewa jatun bake betsadan, Obed inikiaki.  
Obedin bake betsadan, Jesé inikiaki.
- <sup>6</sup> Jesén bake betsadan, xanen ibu David inikiaki. Janua Urías mawaken Davidin Uríasin ain bixun bakewa jawen bake betsada Salomón inikiaki.
- <sup>7</sup> Salomónen bake betsadan, Roboam inikiaki.  
Roboamin bake betsadan, Abías inikiaki.  
Abíasin bake betsadan, Asá inikiaki.
- <sup>8</sup> Asán bake betsadan, Josafat inikiaki.  
Josafatin bake betsadan, Joram inikiaki.  
Joramin bake betsadan, Ozías inikiaki.
- <sup>9</sup> Ozíasin bake betsadan, Jotam inikiaki.  
Jotamin bake betsadan, Acaz inikiaki.  
Acazin bake betsadan, Ezequías inikiaki.
- <sup>10</sup> Ezequíasin bake betsadan, Manasés inikiaki.  
Manasésin bake betsadan, Amón inikiaki.  
Amónen bake betsadan, Josás inikiaki.
- <sup>11</sup> Januxun nawabun Israelnabu jatu dayamakatsi achixun Babilonia anu jatu iyunibu  
Josásin bakebudan, Jeconías inun jawen betsabu inibukiaki.
- <sup>12</sup> Janua Babilonia anu jiweabun Jeconíasin bake betsadan, Salatiel inikiaki.  
Salatielin bake betsadan, Zorobabel inikiaki.
- <sup>13</sup> Zorobabelin bake betsadan, Abiud inikiaki.  
Abiudin bake betsadan, Eliaquim inikiaki.  
Eliaquimnen bake betsadan, Azor inikiaki.
- <sup>14</sup> Azorin bake betsadan, Sadoc inikiaki.  
Sadocin bake betsadan, Aquim inikiaki.  
Aquimin bake betsadan, Eliud inikiaki.
- <sup>15</sup> Eliudin bake betsadan, Eleazar inikiaki.  
Eleazarin bake betsadan, Matán inikiaki.  
Matánen bake betsadan, Jacob inikiaki.
- <sup>16</sup> Jacobun bake betsadan, Marían bene José inikiaki.

Janua Marían bake betsadan, Jesús inikiaki, kenakin Mesías Cristo nun amisdan.

<sup>17</sup> Janua Abraham anua jatun ibuwen pakea 14 xenipabu jiweku-bidanaibutian janua David kainikiaki. Jaska inun, David anuadi ana jatun ibuwen pakea 14 xenipabu jiweabutian nawabun jatu achitan dayamanun, iwanan, Babilonia anu jatu iyunibukiaki. Janua jatu iyunibu anuadi ana jatun ibuwen pakea 14 xenipabu jiweabu anudi Mesías Cristo kainikiaki.

*Jaskatan Jesús kainikiaki, na janchadan  
(Lc 2.1-7)*

<sup>18</sup> Jesucristo kain eskanikiaki. Matu yuinun ninkakanwen. Janua María ainwankatsi ikin jawen epa Josén yukaima bimadiamaken Diosun Yushin Pepatun juni bake naneima Marían unanyan, <sup>19</sup> janua María ma tuya jawenabun ninkatan José yuiabu María ana ainwankatsi ikamabia juni pepakin jaska yuda dasibi bebun Maríakidi chanikin dake wakatsi ikama jabe yubakaima june jenexanun, iwanan, <sup>20</sup> shinankubaini uxa namaya Diosun nai tsuman yuikin: “Joséen, miadan, min Davidin babaki. Mia yuinun ninkaidawe. Diosun Yushin Pepatun María bake naneimawen taea jawen datei jawa dakeama ainwanxanwen. <sup>21</sup> Ja juni bake kaintan ewatan jawenabu Dioski pechia chakabumisbu jau jatun ana Dios chibanunbun jatu medabewaxanaiwen taexun kenakin: ‘Jesús’, waxanwen”, aka Josén jaska ninkatan shinanikiaki.

<sup>22-23</sup> Jaska Jesús kaintan bebunkidi jaskanunbadiai jawen jancha yuixuniaka Isaías Diosun yuikin:

“Uian. Junin chutadiama chipashan bake bima  
juni bake kaian kenakin: ‘Dios nukube jiweaki’,  
axankanikiki, hebreo janchawen, ‘Emanuel’, wakinan”,  
aka ninkatan keneniken jabias jaska dasibi bebunkidi inunbadiai chanini  
Diosun xabakabi jatu unanmaniki, jaska jawen jancha yuixunika kenemani  
keska menekinan.

<sup>24-25</sup> José uxa bestentan jaska nai tsuman yuixu jawen jancha chibankin  
Josén María bikin ainwantan jabe dadatamebiaxun chutadiamaken jawen  
bake kaian Josén kenakin: “Jesúski”, anikiaki, nai tsuman yuima keska  
wakinan.

## 2

*Chaikea bishi unanikabun Jesús uinun ika benibukiaki, na janchadan*

<sup>1-2</sup> Herodes Judea anu xanen ibuaya Belén anua Jesús kainken janua bishi unanikabun bishi bena taxnia uintan chaikea badi juai estekidia bekubidani Herodesin maewan Jerusalén anu jikitushitan jatu yukabaunkin:

—¿Judiobun xanen ibu bena kainmadan, janimen? jawen unanti bishi bena taxnia bechitan kenwanun ika nun juaidan— ikin jatu yuka keyubaunaibun <sup>3</sup> janua Jerusalén anuabun dasibi ninkai dateaibun xanen ibu Herodesin ninkadiatan shinain: “Ea binuxanimenkain”, ika datekin <sup>4</sup> tapinun ixun Diosbe nukunabu janchaxunika xanen ibubu inun Diosun jancha kenenibu yusinanamisbu jatu kenaxun yukakin: “Diosun Katua Mesíasdan, ¿jania kainxanimenkain?” jatu wa yuinametan <sup>5-6</sup> jatun xanen ibu yuikin:

—Jawen jancha yuixunika Miqueas Diosun yuini ninkawe:  
‘Belénmaan, Judea mae pakea anu min mae jatiumabiaken  
mia anua xanen ibu kayabi kainxanikiki,  
enabu Israelbu mekexanaidan’, akin yuia keneniki—  
akabu

<sup>7</sup> Herodesin ninkatan jatu nichian buaibun janua badi juai estekidia bishi unanikabu beshianbu jabudi june kenaxun jatu yukakin: “¿Jatian bishi bena taxnia man bechibidanimamen?” jatu wa natian ma bechibidanimaxun Herodes yuiabu <sup>8</sup> ninkatan jatu bepadankin yuikin:

—Belén anu buxun yuka ikin ja bake bechitan kenwantan eadi yui betankanwen, eadi kaxun en kenwain kanunan— jatu wa

<sup>9-10</sup> ninkabaini Belénkidi bukin bishi bena uinmabu ana taxnia chaxakaini jatu be bun kai uin benimajaidabainkin chibanaibun janu ja bake jiwea mamaki niti ikaya <sup>11</sup> ja jiwe anu jikikain ja bake jawen ewa Maríabe bechitushitan kenwain ja be bun danti iki beti itan benitan ja bau bekanxu bepenxun oro mane inun ja kuaxunti ininipa inun jawen puxati dau ininipa inankuintan <sup>12</sup> jaska watan bua uxa namaibun Diosun nai tsuman jatu yuikin: “Xanen ibu Herodes anu ana chintunbainyamakanwen”, jatu wa jawaida bestentan bai betsawen inun bunibukiaki.

### *Egipto anu José Jesúspaxawanikiaki, na janchadan*

<sup>13</sup> Bishi unanikabu ma inun buabun jabiatiandi José uxa namaya Diosun nai tsuman yuikin: “Joséen, jawaida bestenwen. Xanen ibu Herodesin bakeishta detenun, iwanan, jatu benamayuikiki. Jawaida bestentan ja bake jawen ewabe iyukin Egipto anu jatu paxawaditanwen. ‘Iwewe’, iwanan, en mia yuidiama jabiadi jiweyuxanwen”, aka <sup>14-15</sup> jawaida bestentan meshu medan ja bakeishta jawen ewabe paxawakin chajaida iyukin atimas Egipto anu jikimaima xanen ibu Herodes mawadiamaken jadia dayai jiweyunikiaki. Jawen jancha yuixunika Oseas Diosun yuikin: “Egipto anua en juni bake en kenaxanaii”, aka ninkatan keneniken jaska dasibi bebunkidi inunbadiai chanini Diosun xabakabi jatu amaniki.

### *Herodesin juni bake mishtin jau detetanunbun jatu yununikiaki, na janchadan*

<sup>16</sup> Janua Herodes bishi unanikabun padanbainshinabu ana beabumaken Herodesin unantan sinatajaidakin jaska bishi unanikabun yuibainshina juni bake badi dabeyadiabuma inun badi dabeyabu jau dasibi jatu detekin tenantanunbun jawenabu soldadobu yunua Belén inun ja dapi jiwebaunabu anu buxun detekin tenankin keyunibukiaki. <sup>17-18</sup> Bebunkidi jawen jancha yuixunika Jeremías Diosun yuikin:

“Jerusalén kema mae betsá Ramá anua  
Jacobun ain Raquelin baba ainbuaibu  
jatun bakebu jatu deten keyunshinabu manui  
sain ikaibu ninkakin tsuan jatu nesewatidubuma iki kaikiki”,  
aka ninkatan keneniki. Jaska kenení nakushkin soldadobun jatun bakebu deten keyunibukiaki.

### *Nazaret anu Jesús iyunibukiaki, na janchadan*

<sup>19-20</sup> Janua Herodes ma mawashinken Egipto anua José uxa namaya Diosun nai tsuma ana juxun yuikin: “Joséen, janun bestenwen. Jabun ja bake detenun ika ikimabudan, ma mawashinabuki. Janu Israelbun maiwan anu ja bake jawen ewabe ana jawendi iyudiwe”, aka

<sup>21</sup> José bestentan María jawen bake Jesúsbe iyui Israelbun maiwan anu jikia <sup>22-23</sup> januxun betsabun yuikin: “Herodesin bake Arquelao xanen ibuikiki”, akabu José ninkatan datei Judea anu kadiama janua ana uxa namaya Diosun nai tsuman nemakin yuia bestentan Judea anu ana kama Galilea mai pakea anu mae betsá jatiuma Nazaret anu jikitán janu jiweyunibukiaki. Ja mae anu iyukinan, bebunkidi Diosun jancha yuixunikabun

Jesúskidi kenekin: ‘Nazaret anuaki’, axanaibu jakidi kenenibu menekin jadi iyuimaxun jiwetanibukiaki.

### 3

*Janu tsua jiweamanu Nashimanika Juan jiwenikiaki, na janchadan  
(Mr 1.1-8; Lc 3.1-9, 15-17; Jn 1.19-28)*

<sup>1-5</sup> Bebunkidijaida jawen jancha yuixunika Isaías Diosun yuimakin: “Janu tsua jiweabumanuxun beaibu jui kushipawen chanikin jatu yuikin: ‘Nukun Xanen Ibu nai anua matuki bayui ma kemaikiki. Matun juintinin shinan pewadikanwen, bai kayatapia keska wakinan’”, ani keska wakin Nashimanika Juan junixun Judea anu tsua janu jiweabumanu camello dani sanpu tima sawea inun bichi nanexeketi sawea inun jawen piti pe bexmas chanpu inun ni medanua buna bata aki jiwexun jadixun jatu yusinkin taewai bana ninkatan Jerusalén anua inun Judea anua inun Jordán jene kexa jiweabun ninkanun ika bebidan bebidanaibu jatu yusinkin: “Dios nenu xanen ibui ma kemaikiki. Dioskidi shinanma man chakabumis jenedikanwen”, jatu wakubainai <sup>6</sup> jabun ikunwankin jatun chakabu Juanki chanikin jatun chakabu jenekatsi ikin shinan betsa waibu jawen unanti wakin Jordán jene anu Juanen jatu nashimapakeaya

<sup>7-8</sup> janua Juanen jau ea nashimanun ika saduceobu inun fariseobu bebidan bebidanaibu jatu yuikin: “Matudan man padananbuki, dunun jatu pimis keskabudan. Man jaska keska matuki Dios sinatakin matu kupijaidaxanaiwen taea matun shinan betsa wakanwen. Jaskatan matun chakabu man ma bextekea xabakabi man ea uinmaya en matu nashimaxanaii. <sup>9</sup> Jamen matumebi ibubis kenkin man shinamis: ‘Nukun xenipabu Abraham Ðiosbe jaibunameniwen taea nun jawen bababu nuku kupiama ixanikiki’, ikin, ana shinanyamakanwen. Jakia Abrahamnen bababu dasibi matu yamawakin keyutan na mishki manibauna Diosun damiwakin Abrahamnen bababu benawaxuntiduki. <sup>10</sup> Jaskaken matu yuinun ninkakanwen. Ji tibi bimi pepa jayama dedatan man kuamis keska wakin bestibu Diosun matu kupixanikiki. Jamen tsuabuda Abrahamnen baba kayabibun jawen yusian jau chibankubainunbunwen. Jakia man jaska wamaken matu kupinun, iwanan, duewen matu deda keska watan chi anu matu udenun, ixun manaikiki”, <sup>11</sup> iwanan, “Eanan, jawen unanmati wakin jenewen besti en matu nashimakubainaii. Jakia juni betsadan, kushipajaida ea binuan chipu juxanikiki. Jawen tsumapan jawen daya axunmis keska wakin en jawen jawaumajaidatun ean medabewakin en duawatidumakan, jawen bichi tae mexpun tsitsaukain en pekaxuntidumadan. Jakia matu pepawakin Diosun Yushin Pepa matu inantan bika matu tenemakin matun chakabu yamawaxanikiki, chiwen jawada chakabu bechipaiama kua keska wakinan. <sup>12</sup> Ja inun, xekiwan bimi ta keyuxun pepa adutan jawen xepa kuamisbu keska wakin dasibi jawenabuma danankin jawa chi nukaisma anu udenxun kuanun, iwanan, manayubainikiki”, akin Nashimanika Juanen jatu yuikubainikiaki.

*Juanen Jesús nashimanikiaki, na janchadan  
(Mr 1.9-11; Lc 3.21-22)*

<sup>13</sup> Janua Galilea anua Jesús ewatan Juanen jau ea nashimanun ika Jordán Jene kexa anu kaxun Juan yuka <sup>14</sup> nemanun, iwanan, yuikin:

—Mian ea binuxun min ea nashimatibia ¿jaskai eanu min juxumen?— aka

<sup>15</sup> Jesúsun yuikin:

—Ea jaska wama ea nashimawe, Diosun nuku yununiwen taexunan— aka

—Jaskakenan, peki— ikain, Juanen Jesús nashimakin <sup>16</sup> meneaya nexekei mapekekainaya nai baxnei Diosun Yushin Pepa deiwan itsakidan jamamaki butuai Jesúsun uiyanan <sup>17</sup> yudabu ninkamai nai anua jui taxnikin yuikin: “Nadan, en bakeki. En bechipajaidai, en Katuadan”, anikiaki.

## 4

*Diablo Satanásan padanpaia Jesúsun ninkama inikiaki, na janchadan  
(Mr 1.12-13; Lc 4.1-13)*

<sup>1</sup> Jabiatiandi jau diablo Satanásan unanti wanun, iwanan, janu tsua jiwe-abumanu Diosun Yushin Pepatun Jesús nimakin iyua <sup>2</sup> jadia 40 xaba inun 40 meshu Jesúsun jawa piama bunijaidaya <sup>3</sup> diablo Satanás jaki nukutan unanti wanun ixun yuikin:

—Jaska min Diosun bakemenkain? Min buniaidan, na mishki mania damiwakin misi watan piwe— aka

<sup>4</sup> Jesúsun kemakin:

—Jaska Diosun jancha kenenibudan, ninkawe. “Piti besti pidan, yudabu pei jiwtidubumaki. Jakia Diosun jancha yuini ninkatan chibain yudabu pei jiwtidubuki”, aniwen taexun ja jaska min ea yunuaidan, en akamaki— aka

<sup>5</sup> januxun Jerusalén anudi iyuxun Templo jiwe keyatapa mamaki mape-matan jabe nixun <sup>6</sup> Satanásan ana yuikin:

—Jaska Diosun jancha kenenibudan,

miandi ninkawe:

‘Jau mia mekenunbun

jawen nai tsumabu Diosun yunuxanikiki.

Mishkiki min jutekepanan

min kawanai mia mekesuxankananikiki’,

aniwen taea jaska min Diosun bake kayamenkain mia uinun nenua ea uinmai main ishchuwe— aka

<sup>7</sup> ana Satanás nemakin Jesúsun yuikin:

—Jaska kenenibu min dama ea yuiai chanimabiaken ana betsa entsedi mia yuinun ninkawe: “Matun mekenika yushin Dios unanti wayamakanwen”, iwanan, kenekin yusindianiwen taexun min ea ana yunuaidan, en ikamaki, ishchuidan— aka

<sup>8</sup> jawen jenekin mati keyatapajaida anudi Jesús iyuxun mai jidabi anu maewan jawendua tibi inun jawen xanen ibubu diablo Satanásan jawaida uinmakin jawen damiwati kushipawen uinmakin keyutan <sup>9</sup> Jesús yuikin:

—Eki mesei danti ixun kenwankin min ea xanen ibu waya na dasibi en mia uinmaxudan, en mia jatu xanen ibu wamakubainxanai— akaya

<sup>10</sup> ana nemakin Jesúsun yuikin:

—Jaska Diosun jancha kenenibu ana ninkawe: “Matun mekenika yushin Dios besti duawakin kenwankubainxankanwen, yushin betsaki meseamadan”, aniwen taexun ja min jaska yuiaidan, en mia akamaki. Satanásan, kadiwe— aka

<sup>11</sup> januxun Satanásan jeneyubainaya Diosun nai tsumabu bexun Jesús medabewakin duawanibukiaki.

*Galilea anuxun Jesúsun jatu yusin taewanikiaki, na janchadan  
(Mr 1.14-15; Lc 4.14-15)*

<sup>12</sup> Janua xanen ibu Herodesin Nashimanika Juan jatu bichimashina ban-abimabu Jesúsun ninkatan Galilea mai pakea anu chintunkaini <sup>13</sup> Nazaret anu kai bashikuama janua mai pakea dabe anu Jacobun bake Zabulón inun Neftalí jatun bababu xukuabu namakis ian kexa mae betsa Cafarnaúm anu

ka janus jiwekidankidanpauniki. <sup>14-16</sup> Januxun jawen jancha yuixunika Isaías Diosun yuikin:

“Zabulón maewan anu inun Neftalí maewan pakea anu ianenwan kexxa anu Jordán jene kexxa betsaudi Galilea anu janu nawabu nukunabuma jiwebaunabu anuxun bin ewapa chaxajaida keska ea jawa unanbuman uinxankanikiki. Ja inun, meshu medan punu nuka mawa keska jiweabu jatu medabewai bin dekua chaxajaida keska ixanikiki”, aka ninkatankeneniki. Jaska yuini keskai Jesús Cafarnaúm anu jiwekidankidanpauniki.

<sup>17</sup> Januxun Jesúsun yusinkin taewakin jatu yuikin:

—Nukun Xanen Ibu nai anua matuki bayui ma kemaikiki. Man Dioskidi chakabumis jenetan shinan betsa watan janu bekanwen— jatu wakubainiki.

*Baka nexenikabu dabe inun dabe Jesúsun jatu katunikiaki, na janchadan  
(Mr 1.16-20; Lc 5.1-11)*

<sup>18</sup> Janua Galilea ianenwan kexxa Jesúsun ketankubainkin baka nexenika dabe Simón, jawen kena betsa Pedro, inun jawen betsa Andrésin jatun xaxunxun jisin punteaibu jatu bechitan <sup>19</sup> kenatan jatu yuikin:

—Ea chibankubainkanwen. Ana baka nexeama jakia man baka nexemis keska wakin yudabu en matu ichawamaxanaii, jau ea ikunwanxanunbunan— jatu wa <sup>20</sup> januxun jatun xaxu inun jatun jisin jatun jaibu betsa yunu keyutan jawaida jenebaini Jesúsbe buaibun <sup>21</sup> janua jatube ana ketanbaini kakin Santiago inun jawen betsa Juan jatun epa Zebedeo betan xaxu namaki tsauxun jatun jisin kekekin junuaibu bechitan Santiago inun Juanki nukuxun jatu yuidiakin: “Ea chibankubainkanwen”, jatu wa <sup>22</sup> jawaida jatun xaxu jatun epaki jenebainkin Simón inun Andrésbetan Jesús chibankainbukiaki.

*Yuda ichapabu Jesúsun jatu yusinikiaki, na janchadan  
(Lc 6.17-19)*

<sup>23</sup> Janua Galilea anuxun yusinkubaunkin mae tibi jatun ichati jiwe anuxun kakape Dios xanen ibui ma kemaikidi jatu yusinkin isin betsa betsapa teneaibu jatu xuxawakin kayawakubainaya <sup>24</sup> janua Siria mai pakea jidabi anuxun Jesúsun jatu xuxawai kakaibu ninkatan isin betsa betsapa teneaibu inun, yushin chakabuyabu inun, yuda chakabu saki saki ikaibu inun, yuda babubu nuitapaibu jatu iwebidanbidanaibu Jesúsun jatu xuxawakin kayawapakeaya <sup>25</sup> Galilea anuabu inun, Decápolis anuabu inun, Jerusalén anuabu inun, Judea anuabu inun, Jordán jene kexxa betsaudi este badi juaikidia bei jatuki dasitan yudan kaian ichapabun Jesús chibankin uinkubainbukiaki.

## 5

*Mati anuxun Jesúsun jatu yusinikiaki, na janchadan  
(Lc 6.20-23)*

<sup>1</sup> Jatibu jachun buaibu uinkin mati anu mapekea makenku anu tsauken janua jawen tsumabudi ja dapi tsauabun ja yudan kaianendi chibankain ninkai maniabun <sup>2</sup> Jesúsun jatu yusinkin taewakin yuikin:

<sup>3</sup> —Benimatidubukidi matu yuinun ninkakanwen. Tsuabuda kenkubainsbuma Dios xanen ibukin jatu duawaxanaiwen taea benimapaketi shinain benimakubainkanikiki, manaidan.

<sup>4</sup> —Ja inun, tsuabunda jatun uinti nishma kaxakatsis ikaibuwen taexun Diosun jatu shinan chankanwan benimapaketi shinain benimakubainkanikiki.

**5** —Ja inun, tsuabuda shinan pepaya keinsbuma Diosun mae pepa jatu yubani jatu yunuxanai shinain benimakubainkanikiki.

**6** —Ja inun, tsuabuda jawada pepa besti bechipai chakayamai jawen nuijaidaiwen manakukin Diosun jatu yaniwama keska waxanaiwen taea benimapaketi shinain benimakubainkanikiki.

**7** —Ja inun, tsuabuda nukipabuwen Dios nuidiaxanaiwen taea benimapaketi shinain benimakubainkanikiki.

**8** —Ja inun, tsuabuda shinan xunpin pepa jaya jabun Dios uin jiwe-anaibuwen taea benimapaketi shinain benimakubainkanikiki.

**9** —Ja inun, tsuabuda duapa unanuma jatube jiwekatsi yuda betsabu sinataibu jatu daewamisbu Diosun jawen bakebu wakin jatu kenamiswen taea benimapaketi shinain benimakubainkanikiki.

**10** —Ja inun, tsuabunda Diosun jancha shinankin chibainbu jatu ichakawabiabu chintuinsbumawen taea Dios xanen ibuai anu janus xukukatsi ikin shinain benimakubainkanikiki— iwanan,

**11** jaki chiti ikabudi yuikin:

—Ja inun, tsuabunda man ea chibainbuwen taexun matu usankin ichakawakin matukidi chanichakakin matu danainbu matun benimapaketi shinain man benimapakediaxanai. **12** Janua Diosun jancha yuixunikabu ichakawanibu keska wakin matudi ichakawaibu nai anuxun Diosun matu duawaxanaiwen taea jawa dateama shinan chankankubainxankanwen— itan,

*Jesús ikunwainbu tewe keskabu inun xaba keskabukidi Jesúsun jatuyusiniki-aki, na janchadan*

*(Mr 9.50; Lc 14.34-35)*

**13** —Jamen matudan, jawawenda Dios benimawati yudan kaian man yus-intidudan, Diosun jau jatu mekexanun man jawen meketi tewe bata keskaki. Tewewenan, jawen nami chaputimawatiki. Man ma nami teweya wabia ja teve payukui jawen bata keyu kaken tsuan ana mekekin bata watidumaki. Man jaska keskaibu teve batauma jemaintin putabu jaki paimisbu keska man itidubuki, uindaxankanwen.

**14** —Jamen betsadan, ekidi man jatu yusinxanaidan, man xaba keskaki. Janu mae betsaa mati mamaki jiwe junetidubuma keska wakin en matu yusiainwen juneama jatu xabakabi yusinkubainxankanwen. **15** Ja inun, bin dekutan bau naman junekin tsauinsbumaki. Jakia janu dasibibun uiainbu chaxamis anu manaundi tsautiki. **16** Bin chaxamis keskai jawa juneama medabenain jiwekubainxankanwen, matun jancha ninkakin man pepaibu shinankin jabundi jau Epa Dios kenwanxanunbunan— iwanan,

*Moisés inun Diosun jancha yuixunikabun yusinibukidi Jesúsun jatuhinan- manikiaki, na janchadan*

**17** ana jatu yusinkin:

—Eanan, Diosun jancha yuixunikabubetan jaska Moisin yusinikidi ne-manun ika en juamaki. Jaska ekidi shinanyamakanwen. Jatun jancha bextenun ika en juama jakia Diosun jancha chanima kayabi xabakabi matu yusinun ika en juniki. **18** Chanima nai anua inun mai keyudiamaken Diosun jancha yuixunikabubetan jaska Moisin jatu yusini jancha chanimadan, ean en matu yuiaidan, jawa tsuan nemakin inun jawa betsa wama jancha tibi menepakexanikiki. **19** Jakia tsuabunda yusian betsa bikama mae-waxun jawenabu jatu yusianyan Dios jatuwen benimama ixanikiki. Jamen tsuabunda Diosun jancha ninka kayabitau jawenabu jabias jancha betsa maewama yusiainbu Dios jatuwen benimajaidaxanikiki. **20** Jaskawen taea

Dios benimawakatsi iki fariseobu inun Diosun jancha kenenibu yusinanamisbu jiwekubainaibu keska ikama pe jiwekin Dios benimawakin man jatu binuama nai anu Dios xanen ibuai anu matudi man jikitidubumaki—iwanan,

*Sinatamisukidi Jesúsun jatu yusinikiaki, na janchadan  
(Lc 12.57-59)*

<sup>21</sup> ana jatu yuikin:

—Moisin nukun xenipabu yusinkin: “Sinatakin juni betsaa deteyamakanwen. Jaskabiaken juni betsaki sinatakin man detekken xanen ibubu ichaxun jaska jadi unantan jau kupixanunbunwen”, axun keneniki. <sup>22</sup> Jawen jancha chanimaki. Ana jabisdi matu yusinun ninkakanwen. Tsuada yuda betsaki sinatakin detektsi ikin man shinankubainaiwen taexun Diosun matu kupixanikiki, matun shinan chakabuwenan. Ja inun, tsuada yuda betsaki sinatakin ichakin: “Min unainsmapaki”, ikubainmisbu jau xanen ibubun kupixanunbunwen. Jamen ana yuda betsaki sinata chakayamakin chitekin: “Min jawa unanmajaidaki”, ikubainmisbu chi jawa nukaisma anu Diosun udenkatsi manakubainikiki.

<sup>23</sup> Jaskaken januxun Dios kenwanti chi tapu anu matun inankuin man buai jaki kematan uatian kanekin yuda betsaa man chakabuwashina shinantan <sup>24</sup> jawen Dios daewati man buai jabianu janayutan kaxun daewakin ana jaki nukutan ana jabe janchai pekanwen. Jaska watani ana juxun jawada man Dios inankatsis ikaiwen man ana kenwantidubuki.

<sup>25</sup> Jaska inun, yuda betsaa man dibijaidawen taexun ja man dibiatun nawa xanen ibu anu matu iyuaya jau xanen ibun jawen policiabu matu bichimayamanun ja man dibia jawawenda daewakanwen. <sup>26</sup> Man daewabainama matu bichiabu man paka keyuama chanima man jaskatan kaintidumaki. Jabisaki wakin ea jaibuwatan Epa Dios daewadiakubainkanwen, matun chakabuwen jau matu kupiyamaxanunan—iwanan,

*Kemutimakidi Jesúsun jatu yusinikiaki, na janchadan*

<sup>27</sup> ana jatu yuikin:

—Jaska inun, betsadan, Moisin nukun xenipabu ana yusinkin: “Juni betsaa ain chutanyamakanwen”, axun keneniki. <sup>28</sup> Jawen jancha chanimaki. Ana jabisdi matu yusinun ninkakanwen. Tsuanda ainbu kawanai uin jawen kemukin chutakatsis ikin shinainan, ma chuta keskaki.

<sup>29</sup> Jaskawen taea min bedu betsawen jawada uin min kemuai bedu betsaa tseka keskatan jawada shinankin min chakabuwai jawaida jenekubainkanwen. Min bedu dabeyadan, janu chi nukaisma anu matu puta pemajaidaki. Jakia bedu bestichai keskaya Diosbe jiwei kai peki. <sup>30</sup> Ja inun, min meken betsawen min chakabuwai min meken betsaa mextekeaa keskatan jawada min mekenen min chakabuwai jawaida jenediakubainkanwen. Min meken dabeyadan, janu chi nukaisma anu mia puta pemajaidaki. Jakia meken bestichai keskaya Diosbe jiwei kai peki—iwanan,

*Ainbu jenetimakidi Jesúsun jatu yusinikiaki, na janchadan  
(Mt 19.9; Mr 10.11-12; Lc 16.18)*

<sup>31</sup> ana jatu yuikin:

—Moisin nukun xenipabu ana yusinkin: “Tsuanda matun ain jenekatsi ikin jawen taexun ainbu jeneti kene jau inankubainxanunbunwen”, axun keneniki. <sup>32</sup> Janua juni betsaa jawen ain juni betsabe chutanameamabiaken jenekatsis ikin jawen ain jawamabiaken jenebainadan, janua ainbu jaska shinanmabiaken ja junin ma putabaina januxun ja junin chakabuwen taea

janu ainbu jawen benen chakabumaikiki, bene betsaa benayatikidi shinamakinan. Janu ainbu jawen benen ma jenebainima juni betsan ja ainbu jabe biakanantan jabe chutanamei pebiaidan, juni betsan ainbe chutanamei keskaikiki.

*Jawada tibi datan akin jamen jakidi yubakatimakidi Jesúsun jatu yusinikiaki, na janchadan*

<sup>33</sup> —Jaska inun, betsadan, Moisin nukun xenipabu ana yusinkin: “Jawadakidi yubakakin yuikin: ‘En yubakai en akamaken jau Diosun ea kupixanunwen’, ikama padanma Dios benimawakin axunkubainxankanwen”, axun matu kenexuniki. <sup>34</sup> Jaska yusinbianiken eanan, en matu betsaa yusiaiin. Jawada betsaa tibi datan aki yubakayamakubainxankanwen. Eskaidan, nai datan akin shinain jawen yubakayamaxankawanen, Diosdi jadi jiwea inun jaki tsaudiakidan. <sup>35</sup> Maudi shinain jawendi yubakayamaxankawanen, na maikidan, Diosun jawen tae kenyankidan. Ja inun, maewan Jerusalén shinain jawendi yubakayamaxankawanen, janudi xanen ibujaida jiweakidan. <sup>36</sup> Ja inun, matumebi matun buxkakidi datan akin shinain jawendi yubakayamaxankawanen, man jaska waxun matun bu meshupa bestichai maewakin man juxupawatidumakidan. <sup>37</sup> Jaskaken man yubakatiduma shinankin chanima yuikinan: “Jaa, en atiduki”, ikasmai: “Jamaki. En atidumaki”, iki janchakin besti yuikubainxankanwen—iwanan,

*Kupinamei manakunantimakidi Jesúsun jatu yusinikiaki, na janchadan  
(Lc 6.29-30)*

<sup>38</sup> ana jatu yusinkin:

—Moisin nukun xenipabu ana yusinkin: “Miki sinatakin mia detekin min bedu kasmai min xeta kasmai jadatuda matu chakabuwabu xanen ibu min yuia jabianudi manakukin jau mia jatu kupixunxanunwen”, axun keneniki. <sup>39</sup> Jawen jancha peki. Ana jibia keskadi ja binua matu yusinun ninkakanwen. Tsuada miki sinatakin yusiudi mia ispais aka jabebis sinatakin kupiyamakanwen. “Uke betsadi ea awe”, ika dabekexunai keskakin shi-nankubainxankanwen. <sup>40</sup> Ja inun, min tsuada dibia xanen ibu anu mia iyua pakaxun min bixanun min sanpu jau biyunun xanen ibun mia yunua inanyuwe. “Pakaxun jau bixanun dakukuti biantidubumaki”, akin Moisin yunubianiken xanen ibun mia yunua min dakukutidi yaushiyamawe. <sup>41</sup> Ja inun, tsuada xanen ibukin yunukin kilómetro bestichai anu jawen mabu mia bumaya buxunkin janu mia yuia binumabain ana kilómetro betsaa anu man buxuntiduki, sinatamadan. <sup>42</sup> Ja inun, yuda betsaa nuitapai jawa jayama min mabu biyukatsi mia yuka yaushiamma inanyukubainxankanwen—iwanan,

*Matuki sinataibu ana dananma jatuwen nuitikidi Jesúsun jatu yusinikiaki, na janchadan*

<sup>43</sup> ana jatu yuikin:

—Jaska inun, betsadan, matun yusinanbun Diosun jancha matu yusinkin yuikin: “Matunabuwen besti nuikubainkanwen, nawabu matuki sinatamisbu bechipaimadan”, akin matu yusinmisbuki. <sup>44</sup> Jakia eanan, jancha betsawen en matu yusiaiin. Matuki sinataibu jatuki sinatama jatuwen nuikubainxankanwen. Ja inun, matu ichaibu inun matu ichakawaibu jatu dananma medabewakin jau Diosun jatu duawanun yukaxunkubainxankanwen. <sup>45</sup> Jakia jaska matun Epa nai anuatu yuda pepabu inun yuda chakabubuwen nuikin jatu badi chaxamaxunmis inun ui imaxunmis keska wakin matudi yuda dasibibuwen nuikin man jatu medabewakubainaiwen taexun jabun uinkin man Diosun

bakebu unanxankanikiki. <sup>46</sup> Jamen gobierno pei bixunikabu chakabubiai duanamemisbu keskakin tsuabunda matu duawaibu jatube besti man duanameaya matuwen Epa Dios benimamaki, jawa manakuti pepa matu inanmadan. <sup>47</sup> Ja inun, ikunwain betsabu bechitan jabube besti janchakin yuda betsabu danain ikunwanbuma jabiaskadiamisbuwen taexun pepakin man jatu binuamaki. <sup>48</sup> Jaskaken matun Epa Dios pepa nuikipa keskai matudi pepai dasibibube nuidiakubainxankanwen— iwanan,

## 6

### *Jaskai pepatikidi Jesúsun jatu yusinikiaki, na janchadan*

<sup>1</sup> ana jatu yuikin:

—Yuda betsabu man medabewai jau matu uin bestikin kenwanun bun jaskayamakubainxankanwen. Jakia yudabun bedubi besti man jatu medabewakin duawamiskenan, Epa Dios nai anuatur jawa ana betsa matu manakuama ixanikiki, kenwanmadan. <sup>2</sup> Jaskaken nuitapaibu man medabewaidan, tsua jatu banabimakin xabakabi jatu uinmakin pawayamakubainxankanwen. Jakia jabu bepadamemisbun nuitapaibu jatu medabewakin jau yudabun ea kenwanun bun, iwanan, ichati jiwe anuxun inun bai namakixun jawada jatu inankin xabakabi wamisbudan, yudabun manakuti ma jayabuki. Jaskawen taexun chanima kenmisbu Diosun ana jatu kenwanma ixankanikiki. <sup>3</sup> Nuitapaibu medabewakin tsua yuiyamakubainxankanwen, min jaibujaida yuikin unanmamadan. <sup>4</sup> June pepa aki pepakubainxankanwen. Jawada june man jatu axummis matun Epa Diosun unankin ana manakuti pepa matu tibi inanxanikiki— iwanan,

### *Dios dayuikin yukatikidi Jesúsun jatu yusinikiaki, ja janchadan*

(Lc 11.2-4)

<sup>5</sup> ana jatu yuikin:

—Ja inun, betsadan, ja jatunmebi kenmisbun ichati jiwe anu kasmai jemaintin anu nixun jau ea ninkakin kenwanun bun ika jui kushipawen Dios kenwanmisbuki. Jaska waibu Diosun bechipaimama yudabun besti jatu bechipaimisbuwen taea matudan, jaskayamakubainxankanwen. <sup>6</sup> Jakia matunan, Dios dayukatsis iki janu tsua niama anu ka june jabe jan-chakubainxankanwen. Man jaskai Epa Diosun dasibi june unainwen taexun ninkatan pepawen matu manakuxanikiki.

<sup>7</sup> Ja inun, matu Diosbe janchaidan, jau Diosun ea ninkanun, ika jabias jancha jawenchains yuiyamakubainxankanwen, jaska Dios ikunwanbuman amisbu keska wamadan, jamen janchawainan. <sup>8</sup> Jawa man jayama man yukakatsis ikai man yukadiama matun Epa Diosun unainwen taexun jas shinankin jawenchains yukayamaxankanwen. <sup>9</sup> Eska watiki, dayuikinan:

—Nukun Epa nai anuatuun, min kena medibidan,  
mia duawakin jau mia kenwankubainun bunwen.

<sup>10</sup> Nai anuxun min yunua jaska chibanmisbu keska wakin  
nenuxundi dasibibundi jau min shinan besti chibankubainun bunwen.

<sup>11</sup> Ja inun, nuku mekekin na jabiatian nun piyunun  
jaska min shinainwen piti nuku inanwen.

<sup>12</sup> Ja inun, nuku chakabuwaibu jatu jakimawakin  
jatun chakabu nun ana jaska shinanmawen taexun  
nun mia chakabuwai buaxuntan ana jaskakidi nuku shinanmayamawe.

<sup>13</sup> Nuku mekekin jawen chakabuti tibi nuku kainmaxunyamawe.  
Ja inun, jawada chakabu tibi nuku nemaxundiakubainwen, atiki—  
atan

**14** ana jatu yusinkin:

—Yuda betsan matu chakabuwashina jaki sinatabiatan jawaida jabe daekubainkanwen, ana jas shinanmadan. Man jaskaibu matun chakabudi Diosun matu buaxuntan ana shinanma idiaxanikiki. **15** Jamen yuda betsabun matu ichakawabu ja shinankin man pewamaken matun Epa Dio-sun matun chakabudi buama ixanikiki.

*Jaskai samaketikidi Jesúsun jatu yusinikiaki, na janchadan*

**16** —Matu samakeidan, besu atimapatan iyamakubainkanwen, jabu bepadamei kenmisbu samakei amua mapumisbu keskamadan. Jabu bepadamei kenmisbu jatun besu atimapa uinkin ma samakeaibu jau ea unanunbun ika jaska mapumisbuki. Chanima yudabun uinkin jatu kenwainbu jawen besti jatun manakuti bimisbuki. **17-18** Jakia Dios shinain man samakeai jau tsuan matu unanyamanun bechukitan buexekei pekubainxankanwen. Samakei man jaskai matun Epa Diosun dasibi june unaintun man ikai uinkubainkin kenwankin matu manakuxanikiki— iwanan,

*Dios jiwxuni pepatikidi Jesúsun jatu yusinikiaki, na janchadan*

(Lc 11.34-36; 12.22-34; 16.13)

**19** ana jatu yuikin:

—Na mai anuxun juni ichapabu jiwxun mabuwen kemukin ichawamisbuki. Jakia matunan, mabuwen kemukin ichawayamaxankanwen. Jawada bikin man ichawa jawen masanen pesa pesa akin inun nakaxan pidiatiduki, matu benunkinan. Ja inun, junibù yumetsubun matun jiwe anu jikiton matun mabu dasibi man adu pewabiaken matu bianbaintidubuki.

**20** Jaskaken yuda betsabu ikaibu keskakin kemukin mabu ichawama Epa Dios besti benimawakubainxankanwen. Man jaskakubainmisbuwen taexun Diosun matu manakukin jawada jawen masanen pesa pesa aisma inun juni yumetsubun mia bianbaintidubumawen matu duawaxanikiki, jiwekuinmakinan. **21** Tsuabuda jawen jiweti mabuwen kasmai Dioskidi shinain man Dios jiwxunaidan, jabiadidi matun shinanen man nuijai jayaki, nai anu kasmai mai anudan.

**22** —Ja inun, matun yuda anudan, matun bedudan, bin chaxa keskaki. Jaskakidi matu yusinun ninkakanwen. Matun beduwen man uinmiski. Matun shinanwen matun yuda pepa jaya kemuama man xabakabi meke pewaki. **23** Jakia bedu chakabuya jaska shinan chakabu jaya kemukin uinchakakin man kanemiski. Ja inun, Diosun shinain unanbiakin tsuanda shinan pewama kanei chakabujaidamisbuki. Matudan, jaskayamaxankanwen.

**24** —Ja inun, jadatuda dayadun jawen xanen ibu dabe dayaxunkin ja dabe medabewatidumaki, betsa bechipaikin chibankin betsa bechipaima danankin ninkamadan. Jabiaskadi wakin pei inun Diosdi chibankin ja dabe jaska waxun man duawatidumaki— iwanan,

*Diosun ikunwainbu dasibi mekemiskiaki, na janchadan*

**25** ana jatu yuikin:

—Eska bestiwen taea matunmebi man jamapaiwen dabanan imisbukidi matu yusinun ninkakanwen. Jiwe bestia pepakunkainun ika piti pi inun tadi sawenun ika jawen dabanan iyamakubainxankanwen. Jiwea jayaidan, pitiwen besti nun itidubumaki. Yuda jayaidan, tadi sawe bestinun ika nun itidubumadiki. Jaskaken ja dabewen taea nun jiwenun Diosun nuku jiwea inanma iniki. **26** Uinkanwen, peiyabukididan. Nai anu peiyabunyan, jabun jawa banama inun jawa bimi tsekatan jabun piti aduti jayamabiaken matun Epa Dios nai anuatu jatu pimakubainmiski. Jaskaken Diosun matu

bechipaikin peiyabu matu binumakubainmiski, medabewakinan. <sup>27</sup> Ja inun, tsuabuda ibubis nuikin jawen mabu inun jawen piti shinainwen taexun jawen jiwea ana chaipawatidumajaidaki.

<sup>28</sup> ¿Jaskai tadiwen taea shinain man jawen dabanan imisbumen? Uinkanwen. Ja jua yumei ewamisbukidi shinankanwen. Jua dayakin tadi timaisbumabia jua jawendua tuemisbuki. <sup>29</sup> Jua jaskabiamisken nukun xenipabu xanen ibu Salomón mabujaidayatun jawen tadi jawendua kadujaida sawexun jawenduakin jua binuama iniki. <sup>30</sup> Jakia ni maxu juaya sepashinxun kuamisbuki. Diosun jua jawenduawamistun ja jua binumakin Dios matuwen nuikin matu tadi sawematiduki, man ikun bexmas wabiayadan. <sup>31-32</sup> Jaskaken yuda dasibibu mai jidabi anuabu piti inun tadiwen kemukin benakubaunmisbuki. Jakia matudan, man betsaki. Matun Epa Dios nai anuaturun matu unainwen taea ja piti inun tadi man bikatsis imisdan, ana jas shinain jawen dabanan iyamakubainxankanwen. <sup>33</sup> Jakia jawada Diosun bechipaiai chibankin ja dukun Dios xanen ibuwakin shinankubainxankanwen. Man jaska wai ja kachu jawen jiwei piti inun tadi man jayakunkainxanaii, Diosun matu medabewadan. <sup>34</sup> Jaskaken meshukidi min jawada waxanaiwen dabanan iki dateyamakubainxankanwen. Jakia xaba tibi jawanda mia itimaska wai taxnikunkainmis shinankanwen—iwanan,

## 7

*Jatu unanti watan chitenametimakidi Jesúsun jatu yusinikiaki, na janchadan*

(Lc 6.37-38, 41-42)

<sup>1</sup> ana jatu yuikin:

—Tsuada ja akin chitekin unanti wayamaxankanwen. Man jatu jaska wamaken Diosundi jabiaskadi wakin matu chitekin ja akamadi ixanikiki. <sup>2</sup> Jamen jatuwen nuiama chitekin man jatu ja amisken jabiaskadi wakin Diosun ja man janchai ja imiswen Diosun matu ja akin chitediaxanikiki. Ja inun, jabias shinanwendi min jatu unanti wamiswen Diosun matudi unanti waxanikiki, kaneamadan. <sup>3</sup> ¿Jaskakin ikunwain betsawekin medabewannun, iwanan, jawen jamapai tude jawen beduki jikia min bikatsis ikaidan, mina anu ja dukun ja ji ewapa min jaya min shinanmamen? <sup>4</sup> Ji jidabiwen betimanabia jawa shinanma yuikin: “Jani min ji pese beduki ikadan, ¿mia bipa?” akin kanekin man yuimiski. <sup>5</sup> Jakia bemakis bepadamei janchamisbuun, matudi chakabubia betsawekin man ja amiski. Man ji jidabi betimanabia tsekaxun puta keska watan matun juinti medanua matun chakabu ewapa putatan ana kaneama medabenankin ji pese min jaibun bedu anua bia keska wakin juni betsawekin chakabu bexmas jayadi medabewakin man yusintiduki.

<sup>6</sup> —Jaska inun, jawada pepa Diosuna kaman puben man inantidumaki, jawen unanti watan matu keyutiduwen taexunan. Jabiaskadi wakin ina yawa puben man mabu pepa inantidumadiki, chakabuwakin jau matu pema pema akanyamanunan. Jabiaskadi wakin tsuabunda Diosun jancha dananjaidamistun jau matu deteyamanunbun jatu ana yusinyamakubainxankanwen—iwanan,

*Dios yukai chikishtimakidi Jesúsun jatu yusinikiaki, na janchadan*

(Lc 11.9-13; 6.31)

<sup>7-8</sup> ana jatu yuikin:

—Jaska inun, betsawan, tsuanda Dios yukakin ea akadan, jawen jawada inanmiski. Tsuanda jawada benakin Dios yukadan, jaki nukumamiski.

Tsuanda jawada bi jikinun ixun Dios kenadan, bepenxunmiski. Jaskaken shinanchakama Dios ea akadan, betsaki. Jawada min yuka mia axuntiduki. Benakin jawada min yuka mia bechimaxanikiki. Jawada bi jabe janchanun ixun min kena mia bepenxunxanikiki.

<sup>9</sup> —Ja inun, matun baken misi matu ea aka jaki dakekin mishki man inainsmaki. <sup>10</sup> Ja inun, baka matu ea aka jaki dakekin dunu man inainsmadiki, jatuwen nuikinan. <sup>11</sup> Jaskaken matun shinan pepamabia matun bakebu man duawamis man unaiin. Jamen tsuanda Epa Dios nai anua ea akin man yukadan, jawada pepa yaushiama matu inantidumaki. <sup>12</sup> Jaska inun, betsadan, tsuada miwen nuikin jau mia medabewaxanunbun matun dukun jaska shinankin uinmakin jatu medabewakubainxankanwen, jaska wai nukipakin man kaneamakidan. Jabias shinanwen Diosun jancha yuixunikabubetan Moisin jatu yusinidan, jaki dasi watan na jabias yununi jakimama shinain man jatube medabenankunkainxanaii— iwanan,

*Bai dabekidi Jesúsun jatu yusinkiaki, na janchadan*

(Lc 13.24)

<sup>13-14</sup> ana jatu yuikin:

—Chi nukaismakidi kaidan, janu jikiti xui inun jawen kati bai jaxpa keska jawen kai bikamawen taea yushin chakabun bai bechipai yudan kaian ichapa jawen bumisbuki. Jamen jiwekuankidi kaidan, janu jikiti xui inun jawen kati bai jashu bika keskawen taea ja bai benakubaini atimas nukutan yuda eskadabes jawen bumisbuki. Matudan, ja bai jashuki nukutan jawen bukin ea chibankubainkanwen— itan

*Ji tibi jawen bimiwen unantiki, akin yusinkin Jesúsun jatu unanmanikiaki, na janchadan*

(Lc 6.43-43)

<sup>15</sup> —Ja inun, betsadan, ja padanananmisbu pepa keskakin Dioskidi yusinbiakin jawen uinti inu puben keskan chani jancha matu yusiaibuna ninkama jatu uindakubainkanwen. <sup>16</sup> Nishi muxaya anua uva bimi man tsekaismaki. Ja inun, isne muxa anua higuera bimi batapa man tsekaismadiki. Jabiaskadi wakin jaskai jiwiemisbu pepaibu inun chakabuaibu uinkin ja padanananmisbu man unanxanaii, jaskai jiwiemisbu uinkinan. <sup>17-18</sup> Ja inun, ji pepa bimiai chakabu ikama pepa bestimiski. Jamen ji chakabu bimiai pepamadi chakabu besti idiamiski. <sup>19</sup> Janua ji bimiuma tibi dedatan kuamisbuki. <sup>20</sup> Jaskaken jadatuda bimi chakabu jaya keskatun tsuabuda yusin pewakin jatu medabewabuma unantan danankin jatu ninkayamakubainxankanwen— itan

*Diosun yunuawen besti amisbu jawenabukidi Jesúsun jatu yusinkiaki, na janchadan*

(Lc 13.25-27)

<sup>21</sup> —Ja inun, tsuabunda jatun kexa bestiwen ea kenakin: “Xanen Ibuun, Xanen Ibuun”, ea wabiakin jaska shinainsbumadan, jabun en Epan jancha chibanma nai anu nukube jiweama ixankanikiki. Jakia en Epa nai anuutun jawada yununi inun bechipaiai chibankin akubainmisbu besti nukube jiwxankanikiki. <sup>22</sup> Na jaska en matu yuiai keska enabu kayabi jatu ichawanun ika en ana juaya ichapabun ea yuikin: “Xanen Ibuun, Xanen Ibuun, mikidi yusinkubainkin min kena kushipawen yuikin yushin chakabu nichinkin dami atimaska betsaa betsapa nun mia axunkubainmiski. Nukudi katudiwe”, ea akaibu <sup>23</sup> jatu yuikin: “Padananain chani chakakin man chakabuwamiski. Man enabumaki. Tudi budikanwen”, en jatu waxanaii— itan

*Unanepabukidi inun unainsmapabukidi Jesúsun jatu yusinikiaki, na janchadan  
(Mr 1.22; Lc 6.47-49)*

<sup>24</sup> Jakia jabun en jancha ninkakin akubainxanaibukidi miyuiwen matu yusinun ninkakanwen. Tsuanda jiwe wakatsi ikin mai basanbainkin uke medan mishkiki pesaxun jaki mishki tsamabidankin jiwe waimaken <sup>25</sup> janua ui ika bai matajaidabidankin jawen jiwe achia ja jiwe mishkiki tsamianwen taea niwewanen tsibusketiduma keska jawen daya benuama ja juni unanepaki. En jancha ninkamisbu jaska keskaki. <sup>26</sup> Jamen jawada en yuiai danankin chibainsbumakidi matu yuinun ninkakanwen. Tsuanda jiwe wanun, iwanan, mashi anu basankin kini chai wama bexantu besti watan mishki tsamabidankin jabebis watan jiwe waimaken <sup>27</sup> janua ui ika bai matajaidakin jawen jiwe achia mishkiki tsamianmawen taea jawaida niwewan bekin tsibuskea di ika keskakin jawen daya benujaidamisbuki. Jaska dayamisbu keska patapabuki, en jancha danainbudan— akin jatu yusinkin jancha meneai <sup>28-29</sup> ninkai “Betsabun Diosun jancha nuku yusinmisbu keskamaki. Jakia xanen ibu kushipa keskakin nuku yusinbikain!”, iki Jesúsun jatu yuiai ninkai e iake iakenibukiaki.

## 8

*Juni yudaki chamini Jesúsun kayawanikiaki, na janchadan  
(Mr 1.40-45; Lc 5.12-16)*

<sup>1</sup> Janua Jesúsun jatu jancha wakin menetan mati anua butukidanaya yudan kaianen chibabidanaibun <sup>2</sup> juni yudaki chamini jabias baiwen Jesúsun juaiki nukutan ja be bun danti ixun yuikin:

—Yusinaan, ea kayawakatsis ikin min ea kayawatiduki— aka

<sup>3</sup> jawen chamiwen mesekin danankin tsuan mekatsi ismabiaken Jesúsun jawen dabanan ikin mexunkain mekin yuikin:

—En mia xuxawakin kayawaii— akaya jawen chami sakada iki daxnukui keyuaya <sup>4</sup> Jesúsun nemakin yuikin:

—En mia yuiai ninkaidawe. Jawada en mia axukidi tsua yuiyamayukubaintanwen. Ja dukunan, Diosbe nukunabu janchaxunika anu min yuda min ma kayaxu jatu uinmatanwen. Jaska min ma kayaxu jau jabun mikidi unanunbun jabiaskadi inankuin Moisin yununi jatu anu buditanwen. Min jaska buaya min ma kayaxu jabun mia unanxankanikiki— abainikiaki.

*Romano capitánen dayadu Jesúsun xuxawanikiaki, na janchadan  
(Lc 7.1-10; Jn 4.43-54)*

<sup>5</sup> Janua Jesúsun Cafarnaúm mae anu jikiaya ea anun, iwanan, romano capitán Jesúski nukuxun <sup>6</sup> yuikin:

—Yusinaan, en dayadu isin tene chakayamai ma babua ana benitiduma nuitapajaidaikiki— aka

<sup>7</sup> Jesúsun yuikin:

—Jaskakenan, en mia xuxawaxuin katiduki— akaya

<sup>8</sup> ana capitánen shinantan yuikin:

—Yusinaan, min ea binua en jawamaki. En jiwe anu kama min kushipa besti yunuwe, jau en dayadu ea xuxaxununan. <sup>9</sup> Ja inun, jatun ea yunumisdan, en xanen ibu jayaki. Eandi soldadobu yunui en xanen ibumiski. Betsa yunukin: “Kawe”, en wa kamiski. Betsa yuikin: “Jewe”, en wa jumiski. En dayadudi yunukin: “Ea axunwen”, en wa amiski— aka

<sup>10</sup> Jesúsun ninkai e itan ja jachun beaibu jatu yuikin:

—Na jaska nawa capitánen ea ikunjaidawai nukunabu Israelbun ikunwainbu jaska keska en jatuki nukudiamaki. <sup>11</sup> Eanan, chanima en matu yuiaii. Dios xanen ibukin mai jidabi anua badi juaikidia inun badi jikiaikidia ikunwainbu dasibibu jatu ichawatan duawakin Abraham inun Isaac inun Jacobetan jatu pimaxanikiki. <sup>12</sup> Jakia nukunabu Diosun yubabiani jawen jancha chibankin ikunwanbumaken jatu danantan janua kaxai xeta yenx yenx imisbu meshujaida medan jatu udenxanikiki—itan

<sup>13</sup> Jesús nasaukekauan capitán yuikin:

—Jaska min ea ikunwainwen taexun en mia axunxuki. Min jiwe anu kadiwe— akaya jabiatiandi jawen jiwe anua jawen dayadu xuxanikiaki.

*Pedron dais ainbu inun isin betsapa teneaibu Jesúsun jatu xuxawanikiaki, na janchadan*

(Mr 1.29-31; Lc 4.38-39)

<sup>14</sup> Janua jawen jiwe anu Simón Pedron Jesús iyua kai jikitán jabianudi jawen dais ainbu yuna daka uintushikin <sup>15</sup> Jesús jawen nuikin metsunxun yuna xuxawa benikidan duawakin bawaxun jatu pimaya

<sup>16</sup> janua ma badi kai meshuaya ja mae anu jiwea akeakeabun yushin chakabu jayabu inun isin betsapa teneaibu Jesús anu iweabu yushin chakabu kainmakin isin teneaibu dasibi xuxawanikiaki. <sup>17</sup> Diosun jancha yuixunika Isaíasin yuikin: “Diosun Katuatun nun isin teneai mainwankin nuku xuxawaxanikiki”, akin jatu bebunkidi yuini Jesúsun jabiaskadi wakin jatu anikiaki.

*Jesús chibanun, iwanan, yukanibukiaki, na janchadan*

(Lc 9.57-62)

<sup>18</sup> Xaba betsation januxun dasibi jatu xuxawashina tsautbaunxun daketa-pawaibu uinkin jawen tsumabu Jesúsun yuikin:

—Ian kexa betsaudi juindukuin nun bununbun matun xaxu pewakan-wen— jatu wa pewaibun <sup>19</sup> Diosun jancha kenenibu yusinanamis betsajuxun Jesús yuikin:

—Yusinaan, janida min kai anu en mia chibankatsis ikaii. ¿Mibe kapa?—aka

<sup>20</sup> jawen shinan unanun, iwanan, Jesúsun yuikin:

—Kaman inu jawen kini jayaki. Peiyabu jawen na jayabuki. Jakia matun Juchi Kayabi Iyua ean en jatu yusinkubaunai janu uxati jiwe en jayamaki. ¿En ikai keskai min idiatidumen?— akaya

<sup>21</sup> jaki chiti ika betsandi Jesús yuikin:

—Xanen Ibuun, ea jeneyuwe, ja dukun en epa mawa maiwatan en mia chipu chibankanaidan— aka

<sup>22</sup> nemakin Jesúsun yuikin:

—Jaskamaki. Jabun ea chibankuma mawa keskabun min epa mawa mia maiwaxuntidubuki. Jakia mianan, na jabiatiand tapin ebe kawe— abaini

*Niwe inun ianenwan Jesúsun nemanikiaki, na janchadan*

(Mr 4.35-41; Lc 8.22-25)

<sup>23</sup> janua jawen tsumabube xaxun inatan tu abaini kaya <sup>24</sup> ianenwan besusi pukeaibun Jesús ma bika xaxu chixukidi daka uxaken janua niwe kushipajaida bekin jene buspu tsaubidankin xaxu jene matawa ma jiki kemaya <sup>25</sup> datei Jesús anus ichaxun datekin bestenwankin yuikin:

—Yusinaan, yusinaan, menan nuku medabewadiwe, jiki nun jasatidukidan— akabu

<sup>26</sup> bestentan jatu yuikin:

—¿Jaskai man dateai? ¿Man ea ikun kayabiwadiamamen?— itan benikauan niwewan inun ianenwan buspu tsaubidanai nemakin:

—Nesewe. Peswe— aka niwe main neseaya ianenwandi bechuduni maianyan <sup>27</sup> e itan jawen tsumabu yuinamekin:

—Na junidan, ¿jawa junimen? min atidumakidan. Niwe inun ianenwa-nendi ninkaikikidan— ibaini bui

*Juni dabe yushin chakabu jaya Jesúsun kainmanikiaki, na janchadan  
(Mr 5.1-20; Lc 8.26-39)*

<sup>28</sup> janua kai ianenwan kexa betsaudi mai pakea Gadara anu keti itan Jesús bututan mapekekainaya janua juni dabe yushin chakabu jayabu janu mawabu maiwamisbu anu besti jiwea pubenjaidaken jatuwen datei tsuan dunkebainsma maiwati anua kainbidani Jesúski nukuaibun <sup>29</sup> yushin chak-abun jatu bis imakin yuimakin:

—Jesúsuu, min Diosun bake nun unaiin. Nukudan, ¿min nuku jaska wai? Janu kupiaitian idiamabiaken ¿unanti wakin min nuku kupi juai?— iwanan,

<sup>30</sup> ja mati anuxun ina yawa ichapabun pikin mai mixexaibu <sup>31</sup> yushin chakabun uintan Jesús yukakin:

—Min nuku kainmakin nichiainan, ua ina yawa anu nuku nichinwen, ja medan nun jikinunan— akabu

<sup>32</sup> Jesúsun jatu yuikin:

—Peki. Jadi butankanwen— jatu wa ja juni dabe anua yushin chakabubu kainbaini ina yawa medan jikibainaibun ja ina yawa datei mawa keyatapa butei nidi ibaini ianki pukui keyutan jasai keyuaibun

<sup>33</sup> jaskai uintan ja ina yawa mekenikabu datei kushibaini mae anu buxun juni dabe yushin chakabu jayabu jaskaxu jatuki chania akeakeaibun <sup>34</sup> janua ja mae anua yuda ichapa kainbidan jaskaxu uinun ika Jesús anu bexun ina yawa jasai keyukanxu uintan datekin Jesús nichinkin yuikin:

—Nukun mae anua kadiwe— anibukiaki.

## 9

*Jesúsun juni yuda babuni xuxawakin jawen kushipa jatu uinmanikiaki, na janchadan*

*(Mr 2.1-12; Lc 5.17-26)*

<sup>1</sup> Jaska wabu jawen tsumabube Jesús xaxun nanetan ana chintunkaini ianenwan pukebaini jawen mae Cafarnaúm anu jiki keti ikaibun <sup>2</sup> ma ana Jesús jua ninkatan juni yuda babuni jawen dakatiki daka jawen jaibuaibun bakebidan datantan: “Jesúsun xuxawatiduki”, iwanan, shinainbun ikun-wainbu Jesúsun unankin juni yuda babuni yuikin:

—Dateyamawe. Min chakabuwen Diosun mia kupikatsis ibiakin man ea ikunwainwen taexun jau ana shinanyamanun en mia buaxunaii— akaya

<sup>3</sup> Diosun jancha kenenibu yusinanamisbun ninkatan Jesúski sinatai yuinamei: “Ja juni chakabuki. Nuku padain Dios keskakatsis ikikiki. Diosun besti jawen chakabu buatiduki”, ikaibun <sup>4</sup> tsuan Jesús yuiamabia jatun shinan unankin Jesúsun jatu yukakin:

—Matunan, ¿jaskakin man shinan chakai ikai? <sup>5</sup> ¿Jadatu bikamamen, jawen chakabu buaxunadaka, jawen yuda beniadaka? <sup>6</sup> Ja dabe bikaken Diosun besti atiduwen taexun ¿jaskakin man shinanchakai? En matun Juchi Kayabi Iyua na mai anua ea en jawen kushipa jayatun jawen chakabu en buax-untidu man unanun en akai uinkanwen— iwanan, juni yuda babuni kaya wakin yuikin:

—Benitan min dakati iabaini min jiwe anu kadiwe— aka

<sup>7</sup> jawaida yuda damesteni kayatan benikauan jawen dakati bitan iabainaya <sup>8</sup> mapubaunxun uin datekin yuikin:

—Jabaa! tsuan jaska waismaki. Jakia Dios pepajaidatun na juni ma kayawaxuki— iwanan, uinkin Dios kenwanibukiaki.

*Gobierno pei bixunika Mateo Jesúsun katukin taxnimabainkiaki, na janchadan*

(*Mr 2.13-17; Lc 5.27-32*)

<sup>9</sup> Janua kainkaini januxun Roma gobierno pei bixunti jiwe anu en Mateo tsaua Jesúsun ea bechitan yuikin:

—En mia tapinmai: “Ea chibankubainwen”, ea wa benitan dasibi jene keyubain chiban taewabain <sup>10</sup> en jiwe anu iyuxun jatu pimanun, iwanan, Roma pei bixunmisbu inun Diosun jancha kenenibu yusinanamisbu jatu ninkaisbuma en jaibuaibu ichawaxun Jesúsbetan nun piaibun <sup>11</sup> fariseobun uinkin Jesúsun tsumabu yukakin:

—¿Jaskakin matun yusinan pei bixunmisbu chakabubu inun nukun jancha ninkaisbumabetan pimenkain? Chakabuki— akaibun

<sup>12</sup> Jesúsun ninkatan jatu chitekin yuikin:

—“En peki”, iwanan, shinainbu anu juni dauya kaismaki. Jakia isin te-neaibu anu besti juni dauya kenabu kamiski. <sup>13</sup> Diosun Oseas yuinidan, ¿man uindiamamen? Matu yuinun ninkaidakanwen: ‘Ea benimawanun ixun chaxuwan kuakin menu keyuaiwen besti akama yudabuwen nuikin jau ea benimawakubainunbunwen’, aka ninkatan Oseasin keneniki. Jaskaken “En chakabuki”, iwanan, shinainbu jatun juinti pewakin en jatu medabewa shinan betsa watan jau Dios ikunwanunbun en juniki, juni dauya keskaidan. Jakia “En chakabumaki”, ikin shinainbu jatu medabewatanun ika en juamaki— jatu waniki.

*Samakenikabun Jesús yukanibukiaki, na janchadan*

(*Mr 2.18-22; Lc 5.33-39*)

<sup>14</sup> Janunkain xaba betsation Nashimanika Juanki chiti ikabu Jesús anu bexun yukakin:

—Nuku inun fariseobuki chiti ikabu nukun chakabuwen taea nukunmebi ichakanikai samakei nun piama uxayumiski. ¿Jaskai miki chiti ikabu samakeisbumamen?— akabu

<sup>15</sup> Jesúsun jatu yuikin:

—Juni ainyain nawaibu anu jawen jaibuaibu paxkadiama manunamei jatunmebi piama ichakanikatidubumaki. Jakia jatu xunubaini kaken manui jawen jaibuaibu samakei piama ipaketidubuki. Ea iyuabun jabiaskadiai ewen nui en jaibuaibun piama idiaxankanikiki— iwanan, ana jatu yuikin:

<sup>16</sup> —En yusianan, tadi bena chukadiama keskaki. Matu yusinun ninkakanwen. Tadi xeni baxnekea tadi bena tuax chukadiamawen tadi xeni tsamian patsa estei ana baxnekemiski. Jamen matun yusianan, tadi xeni baxnekea keskaki. En yusianwen tsamian keska wakin matun yusian en pewatidumaki. <sup>17</sup> Ana jabiaskadi keskawen matu yusinun ninkakanwen. Bichi bishtu xeniki uva jene bena buspudiamana manekin mata waxun denex mestenwan jamebi katsai buspui bichi bishtu xeni pexemiski, vino bena inun bichi xeni benuidan. Jabiaskadi wakin en yusian bena matun shinan xeni en jusitudumaki, benukinan— jatu wai

*Ainbunjimi baxneni Jesúsun mainwantan Jairon bakedi bestenwanikiaki, na janchadan*

(*Mr 5.21-43; Lc 8.40-56*)

<sup>18</sup> janua janchai menediamaken judio xanen ibu betsa Jesús bechibidani juxun ja be bun danti ixun yuikin:

—En ainbu bake mawakatsis ikikiki. Ebe kaxun uinkin jau xuxanun ea mexuniyuwe— aka

<sup>19</sup> Jesús benitan kaya nun jawen tsumabudi nun jabe buaibun <sup>20-21</sup> janua ainbu jimi baxneni ja isin tenei ma 12 año kabia jawa neseisma badi betsa tukama ikunkainmis nuitapakin Jesús chibankin shinankin: “Jawen tadi kexa besti mea en xuxatiduki”, iki Jesúsun pechiudi chibankin kakin jawen tadi kexa besti metsa jawaida jawen jimi maiyan <sup>22</sup> Jesús niti itan nasaukekaun uinkin ja ainbu yuikin:

—Ainbuun, min ea ikunwanyan en mia xuxawaxuki. Ana isin teneama unanuma kai pediwe— aka jabatiandi ana jimi ikama kaya

<sup>23</sup> jaska wabaini buaibun judio xanen ibun jiwe anu icha yudan kaian kaxai sain iki biski ikaibun jikikainkin jatiditun tepe dewe mawaibu Jesúsun <sup>24</sup> jatu yuikin:

—¿Jaskai eiskaun kaxai man biski ikanai? Jawen bakedan, mawa kayabi-amaki. Uxa bestia ikikiki. Unu taxniyukanwen— jatu waya: “Jawen yuda ma mawaki”, ixun ichapabun Jesús uinkin usainbu <sup>25</sup> jatu nichian buaibun janu ainbu dakanu Jesús jikikain chipash metsuan ana jiwei benikaunikiaki. <sup>26</sup> Januxun ja maewan anuxun Jesúsun jaska washina dasibibu chaniaibu ninka keyunibuki.

### *Juni bekun dabe Jesúsun xuxawanikiaki, na janchadan*

<sup>27</sup> Janua xanen ibu Jairon jiwe anua kainkainaya juni bekun dabetan chibankin jancha kushipawen yuikin:

—Davidin babaan, nukuwen nuiwe— akubainabu

<sup>28</sup> janua Jesús jiwe betsa medan jikiaya juni bekun dabe jaki nukuabu Jesúsun jatu yukakin:

—En matu xuxawatidudan, ¿man ea ikunwain?— jatu wa

—Jaa. Xanen ibuun, nun mia ikunwaiin— akabu

<sup>29</sup> januxun Jesúsun jatu bemepitan yuikin:

—Jaska shinankin man ea ikunwainan, man xuxaii— jatu waya

<sup>30</sup> jawaida bepexetan uiainbun Jesúsun jatu nema chakayamakin yuikin:

—En matu jaska waxudan, tsua yuiyama mapuyukanwen— jatu wabia <sup>31</sup> buxun jaska Jesúsun jatu xuxawaxu dasibi jatuki chanibaunkin kakapa waibun

### *Juni juyu Jesúsun xuxawanikiaki, na janchadan*

<sup>32</sup> jabatiandi juni juyu yushin chakabu jaya Jesús anu juni betsabun iweaibun <sup>33</sup> Jesús jawen nuikin yushin chakabu kainma kaya janchai taeaya ja dapi mapubidankin uin e itan yuikin:

—Israelbun jaska nun uiain keska tsuan aismaki. Ja juni pejaidaki— akeakeaibun

<sup>34</sup> jatun jancha bechipaiama fariseobun jatu yuikin:

—Na junidan, yushin chakabu xanen ibun kushipa jayaki. Jaska bestiwen taexun yushin chakabu jatu kainmaikiki— ike aikeaibun

### *Jesúsun dayakapabu eskadabesken ana midima yukatikidi jatu yusinikiaki, na janchadan*

<sup>35</sup> janua jatu jaska wabaini kakin Galilea anu mae ewapabu inun mae jatiubuma anuxun jatun ichati jiwe anuxun yusinkin Dios xanen ibuaikidi kakape yusinkin isin betsa betsapa teneaibu xuxawakubaunkin <sup>36</sup> yudan

kaian uin jatuwen nuijaidakin jabu chaxuwan uinikauma keskabuwen taea jatuwen dabanan ikin <sup>37-38</sup> nun jawen tsumabu nuku yuikin:

—En tsumabun en jancha ikunwankin chibamisbun jatu yusian akeakebaunaibun ichapabun ea ikunwanxankanikiki. Jaskaken chanima Diosun bai anu miban midima ma jushin keyui keska dakaki. Jakia jawen dayakapabu eskadabeswen taexun ana dayakapabu ichapa jau yununun bai ibu Dios ana yukakanwen, jawen yunu tsekakin ichawaxunai keska wakin yudabu jau jawen jancha jatu yusinbaunxanunbunan— nuku waniki.

## 10

*Jesúsun jawen 12 tsumabu ichawaxun jatu kushipa wanikiaki, na janchadan (Mr 3.13-19; Lc 6.12-16)*

<sup>1</sup> Januxun nun jawen 12 tsumabu Jesúsun nuku ichawaxun jawen yushin chakabu kainmati kushipa inun jawen isin betsaa betsapa teneaibu xuxawati kushipa nuku yununiki. <sup>2</sup> Nun jawen 12 kushipayabun nukun kenadan: Simón jawen kena betsaa Pedro inun, jawen betsaa Andrés inun, Zebedeon bake dabe Santiago inun, jawen betsaa Juan inun, <sup>3</sup> Felipe inun, Bartolomé inun, Tomás inun, nawan pei bixunika Mateo ea inun, Alfeon bake Santiago inun, Tadeo inun, <sup>4</sup> Simón betsaa nawabu bechipaisma inun, Judas Iscariote jatun Jesús jatu chipu achimaxanai nun jati inibuki, Jesúsun tsuma kushipayabudan.

*Kakape jau jatu yusintanunbun dabe tibi jawen tsuma kushipayabu Jesúsun nichinkikiaki, na janchadan*

*(Mr 6.7-13; Lc 9.1-6)*

<sup>5</sup> Nuku jaska watan januxun nun jawen 12 tsuma kushipayabu Jesúsun nichinkin nuku yuikin:

—Nawabun mae anu buama inun Samaria mai pakea janu jiweabu anudi buyuama <sup>6</sup> jakia Israelbu chaxuwan benua keskabu anu besti buxun <sup>7</sup> jatu yuikin: “Diosun Katua xanen ibui ma kemaikiki”, akin jatu yusinkubauntankanwen. <sup>8</sup> Jaska wakin isin teneaibu xuxawakin mawabu bestenwankin yudaki chaminibu kayawakin yushin chakabu jayabu kainmakin akubauntankanwen. Na kushipa jawa pakama man bixuwen taea jabiaskadi wakin jabias kushipawen jatu medabewakin jawen jatun jamapai jatu yukayamakubauntankanwen.

<sup>9</sup> Kaidan, man eskabaintanunbun matu yuinun ninkakanwen. Mais buttankanwen, jawa buamadan. Oro pei jexe inun, plata pei jexe inun, cobre pei jexe buama, <sup>10</sup> kapangan buama sanpu betsaa buama, matun bichi tae betsaa buama, jawen mestenti betsaa buyamatankanwen. Jakia man jaskakainaya dayakapabu pimamisbu keska wakin matu pimadiaxankanikiki.

<sup>11</sup> Janua mae betsaa anu jikitani juni duapa yukai ikii jaki nukutan jawen jiwe anu matu iyua janu kaxun jawen mae anua kadiama ja juni duapatun jiwe anu jiweyuxun jawen mae anuxun yusinyuxankanwen. <sup>12</sup> Janua jiweitani jikikainkin eska yuixankanwen: “Unanuma jiwekanwen, Diosun jancha nun matu bexuainan”, jatu waxankanwen. <sup>13</sup> Januxun matu beyawaibunan, matun jancha pepa jatu yusinxankanwen. Januxun matu beyawakin Diosun jancha ninkaibu jau Diosun jatu unanuma jiwe makin duawakubainxanun yunuxankanwen. Jakia januxun matu beyawabumakenan, matun jancha pepa jatu anu jamen benuyamaxankanwen. <sup>14</sup> Ja inun, janixunda matu danankin ninkakatsi ikabumakenan jatu unanti wakin janua kainbainkin matun tae anua mai kudu jatuki tabainxankanwen, jau jabiaskasi jiwenunbunan, jawa unanmadan. <sup>15</sup> Chanima en matu yuiaii. Janu Diosun yudabu

dasibi jatu kupiaitian jaska Sodoma inun Gomorra ja maewan dabe chiwen Diosun jatu kupikin jaska wani binumakin jabun matu dananibu Diosun jatu kupijaidaxanikiki— iwanan,

*Jawen tsuma kushipayabu jatu ichakawaxanaibukidi Jesúsun jatu yusinikiaki, na janchadan*

<sup>16</sup> ana nuku yuikin:

—Eskawen taexun en matu yuiai ninkaidakanwen. Kaman inu pubenbu anu man en 12 tsumabu chaxuhan pepa nichian keska wakin en matu yunuaii, man en tsumabu ewen taea matuki sinataibu anudan. Jaskawen taea dunu tsuan padantiduma unanepai inun deiwan pepa keskakin tsua sintamayamaxankanwen. <sup>17</sup> Man en kakapekidi jatu yusianwen taexun ikunwanbuman matu kupinun, iwanan, jatun mae xanen ibu anu matu iyuxankanikiki. Ja inun, jatun ichati jiwe anuxun ekidi man jatu yusiainbu betsabun matu kusha kusha axankanikiki. Uindaxankanwen. <sup>18</sup> Jakia en kakape ikunwankin man ea chibainbuwen taexun tsuabunda matu achixun xanen ibu kushipabu anu matu iyuabu en yusiankidi xanen ibu betsabu betsapaki inun judiobuma nawabetsabuki ekidi man chanidaxanaii. <sup>19</sup> Jakia achixun xanen ibu kushipabu anu matu iyuabu jawada man yuitidukidi Diosun Yushin Pepatun matu unanmaxanikiki. Jaskaken jawa dateama ¿Jadakidi yuixanpa? ikin bebunkidi shinanyamakubainxankanwen, <sup>20</sup> matunmebi man janchamaken matun Epa Diosun Yushin Pepatun medabewakin matu janchamaxanikikidan.

<sup>21</sup> Ja inun, yuda betsan janubi jawen betsabun ea ikunwainbu jatu achima akeakediaxankanikiki, jau jatu tenanunbunan. Jabiaskadi wakin jatun ibubun janubi jawen bakebu jatu achimadiaxankanikiki. Ja inun, jabiaskadi wakin bakebu jatun ibubuki sinatakin jatun ibubun ea ikunwainbu jatu achimaxun jatu tenanmadiaxankanikiki. <sup>22</sup> Ekidi jaska yuibaunkin man ea chibainbuwen taexun yudabun matu danain midima matuki sinataxankanikiki. Tsuabuda matu keskakin ea chibain jeneisbumadi en jatu mekediakubainxanaii. <sup>23</sup> Jakia mae betsabu anuxun matu ichakawaibun janua kainbaini mae betsabu anudi kaxun jatu yusinkubaunxankanwen. Israelbun mae tibi anu nati ikin man jatu yusin keyudiamaken chanima matun Juchi Kayabi Iyua en xanen ibui taexanaii.

<sup>24</sup> Ja inun, jatun tsumabun jawen yusinan binuntidubumaki. Ja inun, jawen dayadun jawen xanen ibu binuntidumadiki. <sup>25</sup> Jaskawen taea jawen tsumabudan, jatun yusinan jancha chibain jau jabiaskadi keska ikubainunbunwen. Jabiaskadiai dayadubu jatun xanen ibun yunua ninkai jau jatun xanen ibu keska idiakubainunbunwen. Jaskaken en matun yusinan ea kenakin: “Yushin chakabu xanen ibu Beelzebúki”, ea wamisbuwen taexun en yusian man chibankubainmisbuwen taexun matudi kenakin: “Beelzebún enabuki”, akin matukidi yuikin chitediaxankanikiki— iwanan,

*Tsuki datetimakidi Jesúsun jatu yusinikiaki, na janchadan  
(Lc 12.2-7)*

<sup>26</sup> ana nuku yuikin:

—Jabun matu ichakawaibudan, jawada jabu bepadametan june akubainmisbudan, Diosun dasibi xabakabi jatu uinmaxanaiwen taea jatuki dateyamaxankanwen. <sup>27</sup> Jakia jawada en matu besti yuiai juneama xabakanxun jatu yuibaunxankanwen. Ja inun, dintu medan jikiton jawen beputi bepuasaka watan jamapai june en matu yuimis jemaintin anuxun jancha kushipawen xabakabi jatu yuixankanwen. <sup>28</sup> Ja inun, tsuabunda matun yuda

besti tenantidubuwen dateyamaxankanwen, tenanxun matu ana ichakawa-paketidubumakidan. Jaki besti mesei man datekubainunbun matu yuinun ninkakanwen. Tsuanda matun yushin tenantan chi nukaismanu jawen kushipawen matu yunutidu bestiki mesei datekubainkanwen, Dioskidan. Chanima en matu yuaidan, ja bestiki datei mesekubainxankanwen.

<sup>29</sup> Jaska inun, isa mishtin dabe pei jexe bestichaiwen bitidubuki, kadumadan. Jaska wabiamisbun isa tibi tanai Dios jakimaismaki. <sup>30-31</sup> Jamen matun bu dasibi midimabiaken Diosun ma tana keyumistun isa mishtin ichapa bechipaibiakin Diosun isa mishtin binumakin matu bechipai-jaidamiski. Jaskaken jawaki dateyamakubainxankanwen— iwanan,

*Jabun Jesús chanima ikunwain jaki dakeisbuma unanti waxanaibukidi jatu yusinikiaki, na janchadan*

(Lc 12.8-9)

<sup>32</sup> ana nuku yuikin:

—Tsuabunda ea ikunwain dakeama ea datan akin yudabu jatu yuikin: “En Jesúsunaki”, iki eki janchakubainmisbu en Epa Dios nai anube janchakin: “Jadan, enabuki”, akin en jatu yuixunxanaii. <sup>33</sup> Jakia tsuabunda ea chibanma en janchaki dakei: “En Jesús ikunwanmaki”, iki eki janchakubainmisbudan, eadi en Epa nai anuabe janchai: “Nadan, enabumaki”, akin en jatu janchax-unamadi ixanaii— iwanan,

*Jawenabun ikunwainbu inun ikunwanbuma bika tenemaxanaikidi Jesúsun jatu yusinikiaki, na janchadan*

(Lc 12.51-53; 14.26-27)

<sup>34</sup> ana nuku yusinkin:

—Mai anuxun yudabu unanuma jiwemanun ika en juni dabanan ¿man shinainmenkain? Jaskamaki. Jatu paxkatan jatu bika tenemanun ika en juniki. <sup>35</sup> En jatu jaska waya juni bake jawen epabe sinatadabexankanikiki. Ja inun, ainbu bake jawen ewabe sinatadabedioxankanikiki. Ja inun, jawen babawan jawen yayabe jabiaskadiaxankanikiki. <sup>36</sup> Ewen taea jawenabube dananain sinatanamexankanikiki.

<sup>37-38</sup> Jawen ibubu inun jawen bakebu bechipaijaidakin ea bechipai bexmas wamisdan, enabumaki. Ja inun, tsuabunda ea chibankatsi iki bika tenei eki jawa dakeama: “En jabe mawakatsi ikaii”, ikin yuiabumadan, jabu enabumadiki. <sup>39</sup> Jamen tsuabunda jatunmebi mekei: “En mawakatsi ikamaki”, ikin shinammisbudan, eauma mawaxankanikiki. Jakia ea ikunwankin en kakape yuikin ea chibainwen taexun tenanbu ebe jiwekuinxankanikiki— iwanan,

*Manakuti pepa ja dukuntun bitikidi Jesúsun jatu yusinikiaki, na janchadan*

(Mr 9.41)

<sup>40</sup> ana nuku yuikin:

—Jaska inun, en matu nichian man kaken tsuanda matun jancha ninkakin matu beya wakin eadi beya wakin jaibu waxankanikiki. Tsuabunda ea jaibu wakin jatun ea yununidi jaibu wadiaxankanikiki, jawen jancha ninkakinan.

<sup>41</sup> Diosun jancha yuixunikatun yuiai jawen jancha ninkakin beya wanixun jabun Diosun jancha akaibun manakuti pepa bixankanikiki. Diosun jancha ikunwankin juni pepa beya wanixun juni pepan manakuti pepadi bixankanikiki. <sup>42</sup> Ja inun, eki chiti iki bexmasbiabun jatu unpax matsipa yukabu ea chibamisbuwen taexun jatuwen nuikin unpax jatu amakubainmisbu chanima jawen kupiti pepa bixankanikiki— nuku aniki.

## 11

<sup>1</sup> Januxun nun jawen 12 tsuma kushipayabu yusin menetan Jesúsun nuku nichian nun kaya mae betsapa anuadi jibia dapikeadi jatu yusindi-akubaunaya

*Jesús anu Juanen jawen tsumabu yununikiaki, na janchadan  
(Lc 7.18-35)*

<sup>2-3</sup> Nashimanika Juan bichiti jiwe anu bichimabu jiwxexun jaska Jesucriston akubainaikidi banabimatantanabu Juanen ninkatan jawen tsuma jatida kenaxun yunukin:

—Jesús anu buxun: “Mekenika Cristo Diosun nukun xenipabu yubani ja juxanaidan, ¿min jabiamen? ¿Betsa daka nun manai?” akin ea yukaxuntankanwen— jatu wa buxun yukabu

<sup>4</sup> Jesúsun jatu yuikin:

—Jawada uinkin man ninkakubainaidan, jaska Juanki chaniditankanwen, eskaibukididan. <sup>5</sup> Bekun inun bexuxbu uiainbu inun, jaska mapuisbuma mapuaibu inun, jabu bichiki dasibi chami betsaniki dakemisbu main sakada iki keyuaibu inun, patabun ninkakin keyuaibu inun, mawa ana besteainbu inun, jabu nuitapaibun jatun paxati kakape ninkatan benimaibudan, jaska Juan yuitankanwen. <sup>6</sup> Tsuanda ea ikunwain jawa jawen shinan chakabui chintuinsmadan, chanima benimaxangananikiki!— jatu wa

<sup>7</sup> Juan anu buaibun ja dapi mapubaunabu Jesúsun Juankidi jatu yui tae-wakin:

—Janu tsua jiweabuma anuadán, ¿jawa man uintantanimamen? Tawa pei niwen bubi bubi wai keska wakin ¿junin jawen shinan betsapa maewa akeakeimamenkain? <sup>8</sup> ¿Jaskamen? ¿Jaskamadaka? ¿Jaskada jakidi kaiaín man uintantanimamen? ¿Junin tadi pepa sawea daka? Tadi pepa sawea mabu akunjaidayabu jatun xanen ibun jiwe jawendua anu besti jiwea ikaibu man uintiduki. <sup>9</sup> Jaskakenan, ¿jawa man uintantanimamen? ¿Diosun jancha yuixunikamenkain? Jaki. Juanan, chanima Diosun jancha yuixunikaki. Ja inun, yuixunika betsabu Diosun yununi Juanen ma jatu binuaki. <sup>10</sup> Ja inun, Diosun jawen bake nichinkatsi Juankidi yuikin:

‘Ninkawe. Janu min kaxanun jau pewai kanun en jancha yuixunika betsabebunkidi en yunuxanaii, en mia nichindiamadan’, akin jakidi jawen kaka kenenibuki. <sup>11</sup> Chanima en matu yuiaii. Yuda dasibibun Dios dayaxunkin tsuan Juan binuama ibianibun janu Epa Dios xanen ibuaitian ikunwainbu jaki dasiabu bexmasjaidabiabun Juan binuxankanikiki.

<sup>12-13</sup> Nashimanika Juan judiama matun ichati jiwe tibi anuxun Moisin yusian inun Diosun jancha yuixunikabun yusinpauni matu yusin bestikubainimabuki. Jakia Juan juxun Dios xanen ibuxanaikidi bebunkidi jawen kaka pepa yusinkubainaya juni pubenen detekatsis ikin Dios xanen ibuxanai ewamamakin bextenun ika ikanikiki. <sup>14-15</sup> Man pabinkiyabuki. Ninkatan jakimayamaxangananwen. Diosun jancha yuixunika Elías jau ana juxanun Diosun yubani Juanan, jabiaki. Man ikunwankatsi ikaidan, jawen jancha ikunwankanwen— iwanan,

<sup>16</sup> —Nukunabu na jabiatian jiweabunan, ¿jaskada shinankanimenkain? Matu yuinun ninkakanwen. Mae namakis jemaintin anu beyuskin jatun ibubu imis mawai bake mishtinbu xuku dabea tsauxun xuku betsan yuikin:

<sup>17</sup> “Tepe dewe nun mawabiaya benimai man nawamaki. Janua nun kaxeí ikaskin nun nulti nawa mawabiaya man kaxamadiki”, jatu wabu jawawenda beyusti unanbuma keskabuki, nukunabudan. Matun shinan chankanti jubiaken man benimamaki. Jamen matun chakabu shinain

kaxakatsi ikama man shinan betsa waismaki. <sup>18</sup> Jabiaskadiai ja dukun Nashimanika Juan juxun matu yusinkubainkin misi pepa piama vino paepa akama matube beyusamaken jakidi janchakin: “Yushin chakabu jayaki”, iwanan, man yuia akeakeimaki. <sup>19</sup> Janua eadi matun Juchi Kayabi Iyua juxun misi pepa pikin vino paepa aki en matube nawabiakunkainaya ea yuankin: “Uinwen. Pikeki. Paenkin romano pei bixunika chakabubu inun yuda chakabu betsabu jaibu wamiski”, ikin man eadi yuanmiski. Jamen nuku dabe nun pepabiaken Diosunabu kayabibu besti unanepakin jabun nukun yusian ninkatan nuku chibankanikiki— iwanan,

*Mae betsa betsapa anuxun Jesús ninkabumaken jatu ja anikiaki, na janchadan*  
(Lc 10.13-15)

<sup>20</sup> Januxun Jesúsun jatu yusinkin taewaimanu mae betsa betsapa anuxun yudabu uinmakin dami atimaska jatu waxunbia jawa jatun shinan betsa wama ikimabukidi yudan kaian Jesúsun jatu yuikin:

<sup>21</sup> —Corazín inun Betsaida anu man jiweabu matun chakabu jenetan man shinan betsa wakatsi ikamadan, man nuitapajaidaxankanaii. Jakia Corazín inun Betsaida anuxun jawen unanti dami kushipa betsa betsapa en matu uinmakubainima keska Tiro inun Sidón anu jiweabundi jabiaskadi uintan jatun chakabu jenenun, iwanan, juanti nishmajaidatan saku wati tadi bexa xeni sawetan chi mapuwen mapu tukutan jatun shinan betsa watan Dios ikunwankeanibuki. <sup>22</sup> Jaskawen taexun janu kupiaitian ja nawabu Tiro inun Sidón anu jiweabu jatu kopi midinkin Corazín inun Betsaida anu jiweabudi shinan betsa wabuma Diosun jatu kupijaidaxanikiki. <sup>23</sup> Ja inun, Cafarnaúm anu jiweabun man shinankin: “Nun pepabuwen taexun Diosun nuku kenwanxanikiki”, ibiakin man ea ikunwanbumawen taexun janu chi nukaisma anu Diosun matu yunuxanikiki. Jakia Cafarnaúm anuxun jawen unanti dami kushipa betsa betsapa en matu uinmakubainima keska Sodoma anu jiweabutiandi jaskadi uintan jatun chakabu jenenibunan, jatun bababudi nuku dapi jiwekeankanaii. <sup>24</sup> Jaskawen taexun janu kupiaitian ja nawabu Sodoma anu jiwenibu jatu kopi midinkin Cafarnaúm anu jiweabu shinan betsa wabuma Diosun jatu kupijaidaxanikiki, jaska Sodoma ani keska binumakinan— iwanan,

*Jesús bestitun Dios unainkidi jatu yusinikiaki, na janchadan*  
(Lc 10.21-22)

<sup>25</sup> janua Jesús shinan chankain benimakin yuikin:

—Epaan, nai inun mai jidabi minaski. Min duapa jancha ja unanepai kenmisbu min jatu unanmama jabu keinsbuma besti min jatu unanmakubainai-wen taexun en mia kenwaiin— iwanan <sup>26</sup> —Epaan, chanima jaska wakatsi mekenixun min ma jatu unanmai— itan

yuda betsabu mapuxun ninkaibun <sup>27</sup> Jesúsun jatu yuikin:

—En Epan jawen kushipa dasibi ea yununidan, tsuan en jawen bake ea unanbumaki. Jakia en Epan besti ea unan keyuikiki. Jakia tsuan en Epa unanmadiki. Ea jawen baken besti en Epa en unan keyudiaii. Jakia jabun ea chibainbu en Epa en jatu unanmamiski. <sup>28</sup> Tsuabunda xankama ia inun daya chakayamai keskai man punu nukabudan, en matu juindukunmakin medabewanun ea anu bekanwen. <sup>29</sup> Ja inun, ina awa dabeki ji tekixkunxun jawada xankama bumabu bika dayabiai medabenain punu nukaisbumaki. Jabiaskadiai eadan, duapakin matu medabewakin ina awa ji tekixkundabea medabenanmisbu keskai man ea chibanyan en kushipawen en matu medabewakubainxanaii, man bika tenebiaya matu juindukunmakinan. <sup>30</sup> Janua

ebe ji tekixkundabea keskaxun jawada bikajaida ana tenejaidama ebe med-abenain nun xankapa aka wabaintidubuki— jatu anikiaki.

## 12

*Juindukuntitian jawen tsumabun xekiwan bimi tsekaxun pikubainibukiaki, na janchadan*

(*Mr 2.23-28; Lc 6.1-5*)

<sup>1</sup> Jatianda ana juindukunti sábado betsatian xekiwan bai namakis manan baiwen nun jawen tsumabu Jesúsbe bukin xekiwan bimi tsekaxun dashukidi axun bunikin nun pikubainaibun <sup>2</sup> fariseobun nuku chibankin uinkin Jesús ja akin:

—Uinwen. Juindukunti sábadotian dayakin Diosun Moisés nuku nemani min tsumabun kanekanikiki— akabu

<sup>3</sup> Jesúsun jatu kemakin:

—Bunikin jawada nukun xenipabu pepa Davidin jawen jaibuaibubetan anidan, ¿man uinsmamen? Matu yuinun ninkakanwen. <sup>4</sup> Dios kenwanti tadi jiwe medan David jikixun Diosun Moisés yusiniwen taexun Diosbe nukunabu janchaxunikabun besti pitibiaken jawen Dios kenwanti misi Davidin bixun pitan jawen jaibuaibudi pimadianiki. <sup>5</sup> Ja inun, Diosbe nukunabu janchaxunikabu juindukunti tibi Dios kenwanti Templo anu dayakubainkin kaneabumakidi Diosun Moisés kenetimani ¿man shinanmamen? <sup>6-8</sup> Jamen en kushipawen Templo en binuaiwen taexun juindukuntitian jaska jau akubainunbun jawen yunuti inun jawen nemati en jatu yunudiatiduki. En matun Juchi Kayabi Iyua jaska kushipa en jayaki. Diosun jancha yuixunika Oseas Diosun yuimakin: “Yuda betsabuwen nuikanwen, ea kenwankin chaxuwan kuakin menuai bestiwenmadan”, aka jatu kenexuniki. Matun juinti medan na jancha shinankin na junibun kaneabuma unankin man jawa yuiama ikeanxuki— jatu abainiki.

*Juindukuntitian juni meyushki Jesúsun kayawanikiaki, na janchadan*

(*Mr 3.1-6; Lc 6.6-11*)

<sup>9</sup> Jabias juindukunti sábadotian jabia baiwen kai mae betsa anu jikitan jatun ichati jiwe medan jikixun Jesúsun jatu yusianyan <sup>10</sup> jabianudi juni meken meyushki jatube icha tsauken jawen yusian danankin fariseobun Jesús yuanun, iwanan, yukakin:

—Juindukuntitianan, Moisin nuku kenexuni chibankinan, ¿juni isin teneai xuxawatimen?— akabu

<sup>11</sup> Jesúsun jatu kemakin:

—Matunan, juindukuntitianbiaken matun chaxuwan unpax biti kini medan kauani pukua jawaida kain nexekin man dayadiamiski.

<sup>12</sup> Juindukuntitian matun inawen nuikin man medabewabiamisken Diosun matu binumakin yudabuwen nuijaidakin jabatiandi jatu medabewamiski. Jaskaken juindukuntitian tsuanda xuxawai dayabiakin kaneamaki— iwanan,

<sup>13</sup> juni meken meyushki yuikin:

—Min meken meshanwen— aka

meshanyan jawen meken betsa keskai ma mepekei peaya <sup>14</sup> jaska waxu fariseobun uin jaki sinatai kainbaini jaska waxun Jesús tenantimen ika yuinamei yubakai taenibukiaki.

*Diosun jancha yuixunikan jakidi keneni xabakabi Jesúsun jatu yusinikiaki, na janchadan*

<sup>15</sup> Januxun jatun shinan unantan Jesús kainkainaya yudan kaianen chibainbun isin teneaibu ichapa Jesúsun jatu xuxawakin <sup>16</sup> mae betsa betsapa anu jau tsuki chaniyamanun bun jatu nemakubainiki. <sup>17</sup> Jabiaskadi bebunkidi Jesúskidi jawen jancha yuixunika Isaías Diosun yuikin:

<sup>18</sup> ‘En tsuma en katunidan, en bechipaiai ea benimawamiski. En Yushin Pepa en yunua medabewaya pepakidi en tsumapan yudabu xukuabu tibi yuibaunxanikiki. <sup>19</sup> Jancha kushipawen juni betsa ja akama mae tibi anuxun jawen jui kunyan ikai ninkabuma ixankanikiki. <sup>20</sup> Chakabu maemakin binudiamma yudabuwen nuikin tawa yushtu senkeama keska wakin juinti babubu dananma ixanikiki, bin paji ibubis nukabiai nukama keskadan. <sup>21</sup> Januxun chakabu binuaya nawa xukua betsa betsapabun ikunwankin en tsuma manaxankanikiki’, aka ninkatankeneniki. Jaska jakidi keneni menekin Jesúsun yusinkin jatu xuxawakubainiki.

*Jesúsdan, yushin chakabun kushipa jayaki, anibukiaki, na janchadan  
(Mr 3.20-30; Lc 11.14-23; 12.10)*

<sup>22</sup> Jabianuxundi yushin chakabun juni bexux wakin juyu wani Jesús anu iweabujawen yushin chakabu nichinkin Jesúsun xuxawa januxun uin pewai janchaya <sup>23</sup> yudan kaianen uin:

—Jabaa! Yuu! Davidin baba mekenika Diosun nukun xenipabu yubani jabiamenkain. Jamadaka—ikeakeaibun

<sup>24</sup> jakia fariseobun jatun jancha ninkakin yuikin:

—Jaskamaki. Na junidan, yushin chakabu xanen ibu Beelzebún kushipa jayaki. Jaska bestiwen taexun yushin chakabu jatu kainmaikiki— jatu waibun

<sup>25</sup> jatun shinanen kaneaibu unankin Jesúsun jatu yuikin:

—Mae betsa anu jatunmebi paxkatan detenamei jatunmebi debui keyumisbuki. Ja inun, yudabu xuku betsa paxkatan jatunmebi debui yamai keyudiatidubuki. <sup>26</sup> Jabiaskadi wakin Satanásan jawenabu junibu anua kainma jatun yuda punu nukai babui keyukeanaii. <sup>27</sup> Jamen, eanan, Beelzebún kushipawen en yushin chakabu kainmaya ¿tsuan kushipawen matun tsumabun yushin chakabu kainmamisbumen? <sup>28</sup> Jamen chanima Diosun kushipawen ean en yushin chakabu kainmamiswen taea Dios xanen ibui matu anu ma juaki. <sup>29</sup> Jaska man kanejaidai matu yuinun ninkakanwen. Tsuanda juni kushipatun jiwe anu jikitayumetsunun, iwanan, jawen tae inun jawen meken dukun neatan jawen mabu yumetsutidubuki.

<sup>30</sup> Jaskaken tsuabunda ea jaibuwama ea nemamisbuki. Ja inun, tsuabunda yuda betsabu ea chibanmama jau ea ikunwanyamanun bun jatu nemamisbuki, jamakidi shinanmakinan. <sup>31</sup> Jaskaken matu yusinun ninkakanwen. Yudabun chakabu betsa betsapawakin chakabudi yuimisbu Diosun jatun chakabu buaxunkin jakimawatiduki. Jakia matu keskatun tsuabunda jawen Yushin Pepa danankin yuankubainaibudan, jatu buaxuntaskama ixanikiki. <sup>32</sup> Jamen tsuabunda en matun Juchi Kayabi Iyua ea yuanbiaibun Diosun jatun chakabu buaxuntiduki. Jakia tsuabunda Diosun Yushin Pepa yuainbu jatun chakabu Diosun buama shinanunbadikiki, natian inun badi jawen jeneatianan— iwanan,

*Ji tibi jawen bimiwen unantikidi Jesúsun jatu yusinikiaki, na janchadan  
(Lc 6.43-45)*

<sup>33</sup> —Ji pepa bimiai jawen bimi chakabuismaki. Jamen ji chakabu bimiai jawen bimi pepaismadiki. Jaskawen taexun jawen bimi tibiwen ji man unanmiski. Eanan, en pe yusinkubainmiswen taexun Satanásan kushipa

en jayamaki. Jakia Diosun kushipa en jaya en pepaki. <sup>34</sup> Jakia matudan, man padanan dunubuaibuki. Matun uinti chakabuken jaska shinankin kainmai janchakin jawada pepa yuiama chakabu besti man yuikubainmiski. <sup>35</sup> Jamen tsuabuda duapa uinti pepaya jawa chakabu yuiama jancha pepawens janchamisbuki. Ja inun, yudabu jawen uinti medan shinan chakabu jaya janchakin chakabus yuikin kainmamisbuki. <sup>36</sup> Matu yuinun ninkakanwen. Janu unanti waxanaitian: “Jancha jadi yuitimawen min yuipaunidan, jaskakenan ea yui pewawe”, akin yudabu bestibu tibi Diosun jatu yukaxanikiki—iwanan, <sup>37</sup> fariseobu ana yuikin: —Jamen matun jancha tibi shinankin Diosun matu unanti waxanikiki, “Min pemenkain, min chakabumenkain”, akin Diosun unantan matu kupixanikiki—jatu waya

*Dami betsa atimaska nuku taxnimaxunwen, akin yukanibukiaki, na janchadan*

(Mr 8.12; 3.31-35; Lc 11.29-32, 24-26; 8.19-21)

<sup>38</sup> jatu jaska wai ninkatan januxun fariseobu inun Diosun jancha kenenibu yusinanamisbun Jesús yuikin:

—Yusinaan, nun uinun naiudia jaska tsuan dami atimaska kainmaisma nuku axunwen—akabu

<sup>39</sup> Jesúsun jatu kemakin:

—Nukunabu na jabiatian jiweabudan, man chakabuki. Jamapai Dios anua unanti tsuan atiduma uinkatsi man ea yukabiamisdan, Diosun Jonás bakawan xeamashina ana kainma jiwenidan, jaska keska besti Diosun matu uinmakin matu axundiaxanikiki. Shinankanwen. <sup>40</sup> Nínive anu kaxun jau jatu yusintanun Jonás yunua ninkama jadi kama mae betsa anu paxai kai ianenwan medan pukuabu jasapanan bakawan ewapatun xeashina xaba dabe inun besti meshu jabiatidi kaya mashin mapeketan bakawan janan Jonás besteniki. Eadan, matun Juchi Kayabi Iyua jabioskadiai mawa mai anu daka xaba dabe inun besti meshu jabiatidi ka en ana bestendiaxanaii. <sup>41</sup> Jaska inun, Nínive maewan anu jiweabu Jonásin Dioskidi jatu yusian ninkakin jatun shinan betsa wanibuki. Jaskawen taexun janu kupiaitian Nínive anu jiwenibun matu ja axankanikiki. Ja inun, en Jonás binujaidabi-aken tsuan man ea ninkakin matun shinan betsa wakatsi ikamaki. <sup>42</sup> Jaska inun, betsadan, nawa ainbu xanen ibu surkidi chajaida Sabá maiwan anu jiwea nukun xenipabu Salomónen jancha unanepa ninkatanun ika juniki. Salomón en binujaidabiaken man ea ninkakatsi ikabumawen taexun janu matu kupiaitian ja nawa ainbu xanen ibun matu ja achakayamaxanikiki—iwanan,

*Yushin chakabu kainkaina chintumiskidi Jesúsun jatu yusinikiaki, na janchadan*

(Lc 11.24-26)

<sup>43</sup> jatukidi Jesúsun miyui betsawen ana jatu yuikin:

—Juni betsa anua yushin chakabu kainma kai juindukunkatsi iki janu unpax jayama anu kakunkaunkin jani juindukunti pepa bechiama shi-nankin: <sup>44</sup> “En janu jiwea en kainkidanshina anu en ana chintunkainaii”, ikaini kaxun ja yuda medan jiwe xaka matsua keska jawa jayama bechitan <sup>45</sup> kaxun ana 7 yushin betsa chakabujaida jatube dasikidan, ja dukuntun ja yuda ichakawakin midinwaima ana binumakin pikujaidamisbuki. Jaska keskadiai natian na yudabu jatun shinan pewabumawen taea jiwe chakakubainaibu chipu Diosun jatu kupijaidaxanikiki—akin

*Jawen ewa inun jawen betsabukidi Jesúsun jatu yusinikiaki, na janchadan*

<sup>46</sup> Jesúsun jatu yusin menediamá janchaya janua jawen ewa inun jawen betsabu bea Jesúski jaska kematima jemaintin mapuxun juni betsan jau yuixuntanun jawen ewan yunua <sup>47</sup> kaxun Jesú yuikin:

—Min ewa inun min betsabun unu jemaintinxun mibe janchanun ixun mia kenakanikiaki— aka

<sup>48</sup> Jesúsun kemakin jatun yui ka yuikin:

—¿Tsuamen, en ewa inun en betsabudan?— iwanan,

<sup>49</sup> nun jawen tsumabu nuku metukin yuikin:

—Na jabiabuki, en ewa inun en betsabudan. <sup>50</sup> Ja inun, Diosun jancha tsuabunda ninkatan ikunwankin axunmisbudan, jabiabu en betsabu inun en puibu inun en ewabudiki— jatu waniki.

## 13

*Jexe bai anu banamisbukidi miyuiwen Jesúsun jatu yusinikiaki, na janchadan*

(Mr 4.1-9; Lc 8.4-8)

<sup>1</sup> Jabias xabatian Jesú jiwtanua kainkaini ianenwan kexa anu ka tsauken

<sup>2</sup> yuda ichapabu Jesú anu bebidan bebidani jaki ichabu jatu yusinun ika xaxun ina tsauxun ian kexa mapustunun mapuabu <sup>3</sup> jancha junea betsapawen yusinkin jatu yuikin:

—Juni betsá jawen bai anu xekiwan jexe sa aki kaxun <sup>4</sup> sa akubaina jexe betsá janu kati bai namaki nidi aka peiyabu bexun keyu xeabun <sup>5</sup> jexe betsá mishki ewapabu mania anu mai eskadabes bemanchimea anu kauanadan, jawaida pexei benekaunaya <sup>6</sup> badi jui kukin jawen tapun bemakis bewex-eke a kua utsi xanamiski. <sup>7</sup> Ja inun, jexe betsá muxa jukundiamanu nidi aka xekiwan beneai muxa jukunkin yabua jaskatan bimitidumaki. <sup>8</sup> Jakia jexe betsá mai pepa anu nidi aka benei bimi ichapajaida jayamiski, betsá 100 jexeyaidan, betsadi 60 jexeyaidan, betsá 30 jexeyaidan— iwanan <sup>9</sup>—Man pabinkiyabunan, ninkatan jakimayamaxankanwen— jatu wa

*¿Jaskakin miyuiwens min jatu yusiain? iwanan, Jesú yukanibukiaki, na janchadan*

(Mr 4.10-12; Lc 8.9-10)

<sup>10</sup> janua nun jawen tsumabu besti Jesúski xukutan jaska miyuiwen jatu yusiain nun yuka <sup>11</sup> nuku yuikin:

—Matudan, jaskai Dios xanen ibumiskidi Diosun jawen pepa juneni xababi man en tsumabu matu yusinkin unanmaikiki. Jakia jabudan, en jatu jaska unanmamaki. <sup>12</sup> Jakia tsuabunda en jancha besti ninkakin chibainbu ichapa en ana jatu xabakabi yusinkubainxanaii. Jamen tsuabunda eskadabes ninkabiakin ea chibainsbuma ja eskadabes en jatu mebinxanaii, jakimawakinan— iwanan <sup>13</sup>—Na yudabun uinbiai uianbumaki. Ninkabiai ninkabumaki, jabu jawaumawen taexun miyui junea bestiwen en jatuki chanikunkainaii— itan <sup>14-15</sup>—Jaskai buaibuwen taexun bebunkidi jawen jancha yuixunika Isaías jatukidi Diosun yuimakin:

‘Jabun jancha ichapa ninkabiakubainmisbu jawa unanma ixankanikiki.

Ichapa uinbiakubainmisbu jawa uinsma keska ixankanikiki.

Jau uinyamanunbun jatun bedu bekua keskabuki.

Jau ninkayamanunbun jatun pabinki pabepukua keskabuki.

Na yudabu buxka kushibun jawa tapinkatsis ikabumaki.

Jau en jatu medabewakin xuxawapanan ea danain ea anu bekatsis ikabumaki’,

aka ninkatan nuku kenexuniki. Jabias jatukidi keneni keskai na yudabun uianma inun ninka pewabumadiki— iwanan

**16-17** —Na jaska yuinidan, man matun akaii, matun beduwen uinkin inun matun pabinkiwen ninkai natian man benimaidan. Chania nukun xenipabu Diosun jancha yuixunikabu inun yudabu pepabun ea uinpabiakin ea uianma inibuki. Ja inun, na man ea uiainan, ea uinkatsi ibiakin ea uianma inibuki. Ja inun, jabias man ninkaidan, ea ninkapaibiakin ea ninkamadi inibuki— akin

*Jexe miyuikidi xabakabi Jesúsun jatu unanmanikiaki, na janchadan  
(Mr 4.13-20; Lc 8.11-15)*

**18** —Jaskawen taexun jexe sa aka miyuiwen en jatu yusinxudan, matu xabakabi yuinun ninkaidakanwen. **19** Jexekidi yuiadan, Dios xanen ibuaikidi yusinti janchaki. Ja jexe janu kati bai anu nidi akadan, yudabun Dioskidi jancha ninkakin shinanbiaibun jamakidia Satanás juxun jawen jancha pepa jatun juinti anua mebinmiski. **20** Ja inun, jexe betsa mishki ewapabu mania anu mai eskadabes bemanchimea anu nidi akadan, tsuanda Diosun jancha ninkakin taewai benimabiaya **21** shinan pewamawen taexun jawen jiwepanan Diosun jancha dananmakin jatu bika wakin jawen jamapaiwen jatu ichakawabu tenei jawawen jaskatima ja uintan ana jawendi chintunbainmisbuki. **22** Jamapai jawen jiweawens kemui jeneama jawens besti nuichakayamakin Diosun jancha ninkabiakin ana tapinkatsi ikama mabuwens besti kemui pepaisbumaki, jaskatun yabua jancha pepa chibanma yudabu miban bimiuma keskabuidan. **23** Jakia jexe betsa mai pepa anu banadan, Diosun jancha ninkai pepakunkainkin yuda betsabu yusinkin jatu ikunwanmamisbuden, ja mai pepa anu jexe bana benei ewai bimiyatan 100 jexeyai inun, 60 jexeyai inun, 30 jexeyamis keskabuki— nuku aniki.

*Miban pepa chakabube jusiakidi miyuiwen Jesúsun jatu yusinikiaki, na janchadan*

**24** Januxun ana betsation miyui betsawen yudan kaian Jesúsun yusinkin: —Dios xanen ibui jaskamiskidi ana betsa matu yusinun ninkakanwen. Juni betsawen bai anu kaxun xekiwan jexe pepa banabaini kaken **25** dasibi uxabun janua jaki sinatamis juxun jexe chakabu jabe jusikin sa abainken **26** janua xekiwan jukunshina ma bimi taeai uinkin miban chakabu jabe benediasi jusia bechitan **27** janua jawen tsumabu bai anu buxun ja miban uinbain bai ibu yuikin: “Min bai anu xekiwan pepa min banatanima anudan, ¿jaskai miban chakabudi jusia yumeimenkain?” akabu **28** bai ibuan jawen yuikin: “Eki sinatamistun ea ichakawakin atanimaki”, jatu wa, jawen tsumabun yuikin: “Ja miban chakabudan, ¿jau yumeyamanun betse betse atanpa?” akabu **29** jatu nemakin: “Jamaki. Ja miban chakabu jusia betsekin xekiwandi man betseditatidubuki. **30** Jau jabiaska jabe yumeyunun meyamayukanwen. Ja dabe jusia ewai janu jushaintian tsekakin en jatu yunua ja miban chakabu dukun mextexun neatan manchianbu en kuaxanaii. Januxun en xekiwan bimi pepa mextekin ichawadiatan en dayadubun ea aduxunxankanikiki”, jatu waniki— iwanan,

*Jexe pexeishtakidi inun misi xaxawamiskidi Jesúsun jatu yusinikiaki, na janchadan*

*(Mr 4.30-34; Lc 13.18-21)*

**31-32** ana miyui betsawen jatu yusinkin: —Dios xanen ibui jaskamiskidi miyui betsawen ninkakanwen. Junin jawen bai anu mostaza jexe jawen miban tibi banaima anua jatube ja mostaza

jexe pexeishtajaidabia ewakin miban betsa binumai punyan ewapabushina jawen mebiki peiyabu tsaua jaki juindukunmisbuki. Dios xanen ibuidan jaska keskaki—itan

<sup>33</sup> ana miyui betsawen jatu yusinkin:

—Misi wakatsi ainbun xekiwan dudu midima kencha ewapa puchinin kesunxun jawen xaxawati eskadabes unpaxki nemustan jawen xaxawati xekiwan dudu kapan dasibi buspukidankin xaxawamiski. Dios xanen ibuidan, jaska keskadiki. Ja dukun juni betsan Diosun jancha ikunwain pepakunkainkin jawenabu yusian akeakeaya unanxubida midimabun ikunwantidubuki—jatu aniki.

<sup>34-35</sup> Ja xanen ibutan jaska janchanunbadiaikidi jawen jancha yuixunika Diosun yuikin:

‘Mai jidabi en damiwani anua jawada ean junenixun en jatu unanmaisma miyui betsa betsapawen yusinkin en jatu kainmaxunxanaii’, aka ninkatan nuku kenexuniki. Jabias Diosun yuini keska wakin miyui betsa betsapawen Jesúsun yudabu yusinkin jawa miyuimawen yuiama miyui bestiwen jatu yusin chanikunkainiki.

### *Miban chakabu jusiakidi Jesúsun jatu xabakabi yusinikiaki, na janchadan*

<sup>36</sup> Januxun Jesúsun yudan kaian yusinkin menetan jatu jenebaini jiwe betsan jikiaya janua nun jawen tsumabu jaki ichaxun yukakin:

—Miban chakabu jusiakidi min jatu yusinxudan, xabakabi nuku yuiwe—nun wa

<sup>37</sup> Jesúsun nuku yuikin:

—Ja miban pepa sa akadan, en matun Juchi Kayabi Iyuaki. <sup>38</sup> Baidan, mai jidabiki. Jexe pepadan, jabun Diosun jancha ninkakin pewamisbudan, jabu enabuki. Jakia jexe chakabudan, jabun en jancha ninkama Satanásan jancha besti chibankmisbudan, jawenabuki. <sup>39</sup> Ja inun, ja jaki sinatakin jexe chakabu sa axunmisdan, Satanáski. Ja inun, janu tsekatitian ixanaidan, ma mai jidabi keyuikiki. Ja jaskaitian mai anua jau yudabu bimi tseka keska wanunbun en nai tsumabu en jatu yunuxanaii. <sup>40-41</sup> Jamen ja miban chakabu mextekin ichawadan, mai jidabi anuxun yudabun chakabuwakubainmisbu inun yuda betsabun jawa unanma jabun yusinkin jatu dasibi ichakawamisbudan, ea en matun Juchi Kayabi Iyuautun en nai tsumabu en jatu yunua jabun ja yuda chakabu ichawaxun <sup>42</sup> chi nukaisma anu jatu udean janu jiwei peama kaxai xeta yenx yenx akubainxankanikiki. <sup>43</sup> Jakia jabun Diosun jancha pepa ninkakubainmisbudan, en jatu katua janu en Epan jiwe anu nukube jiwei badi keskai chaxai ikibi ixankanikiki. Man pabinkiyabunan, ninkatan jakimayamakanwen—iwanan,

### *Jaskai Dios xanen ibumiskidi miyuiwen jawen tsumabudi Jesúsun jatu yusinikiaki, na janchadan*

<sup>44</sup> ana miyui betsawen nuku yuikin:

—Tsuanda juni betsan bai anu pei midima adukin maiwani june benamabia juni betsan pukinxun bechitan ibu wakatsi ikin jawaida ana jabianudi achimatan benimajaidakin pei june bikatsis ikin jawen mabu dasibi peiwen taexun jatu inan keyutan june yumetsukatsi ikama jawaida bai ibu anu kaxun jawen peiwen bai ibu watan ja pei maiwanibu bitiduki. Dios xanen ibuidan, pei midima adunibu junea keskaki.

<sup>45-46</sup> Jamen Dios xanen ibui jaskamiskidi betsadan, ninkakanwen. Mabu inanananikan perla chudi mane jawenduabu benabaunkin atimas ja mane jawendua jawa chakabuma bestichai kadujaida bechitan jawen kemukin bikatsis ikin jawen mabu dasibi jatu inan keyutan ja pei bixunwen taexun ja

perla jawendua jawenas wakin biniki. Dios min xanen ibu waidan, jawada mabu min jayadan, ana jawen nuiama jenetan ja mabu betsa binun ixun ja besti min jawen nuiai keskaki— iwanan,<sup>47</sup> ana nuku yuikin:

—Dios xanen ibui jaskamiskidi ana betsadan, ninkakanwen. Juni betsabun ianenwan anu jisin ewapa puntebaunxun baka betsa betsapa jikia<sup>48</sup> jisin mataken ninibidan mashi anu mapematan janu tsauxun katukin baka ewapa piti pepabus kukiki nanekin jawen chudi chakabu putamisbuki.<sup>49</sup> Janu badi jawen jeneaitianan, jabiaskadi wakin Diosun nai tsumabu bexun yuda pepabube yuda chakabu jusia unantan jatu katukin paxkatan<sup>50</sup> chakabubu janu chi nukaisma anu jatu putaxankanikiki, janua jiwei peama jaska nun tenetiduma tenei kaxai jau xeta yenx yenx inunbunan.

<sup>51</sup> Na eska miyuiwen en matu yusianan, ¿man ninkai?— nuku wa

—Jaa, nun ninkaii— nun akeakea

<sup>52</sup> ana nuku yuikin:

—Jawen jiwe anuxun juni betsan jawen mabu betsa tibi adutan mekea unainkiki, mabu bena inun xenidan. Jaska tibi adumiswen taexun jawada mabu pepa bena inun xeni ja dabe kainmamis keska wakin Dios xanen ibuaikidi en yusian bena inun yusian xeni katukubainkin eadi chibankin ea ikunwandiatan Diosun jancha kenenibu yusinanamisbun jatu pe yusindiatidubuki— nuku watan

### *Nazaret anu Jesús kanikiaki, na janchadan*

(Mr 6.1-6; Lc 4.16-30)

<sup>53</sup> miyuiwen nuku yusin keyutan janua kainkaini<sup>54</sup> Jesús janua yumeni anu kai nun jabe jikishinken ma jatu yusin beyamis jatun ichati jiwe anuxun Jesúsun jatu yusindianun ika jikixun jatu yusin taewaya jatu yusian ninkai jaska yusinanainsbumawen e itan yuinamei:

—Na junidan, ¿janixun jaska tsuan jawen kushipa tapinmashinamen, ja atimaska nun atiduma aki unanepajaidaidan?<sup>55</sup> Nadan, ¿ji mabu wanikatun bakemamen? Jawen ewadan, Mariáki. Jawen betsabudan, Santiago inun, José inun, Simón inun, Judaski.<sup>56</sup> Jawen puibudan, nenu nukube jiwedia-buki. Jaskatan ¿janixun ja mesti jaska jawaida tapin keyushinamen?— itan<sup>57</sup> jawen jancha bechipaiama ikunwanbumaken Jesúsun jatu yuikin:

—Diosun jancha yuixunika juxun yudabu jatu yusianyan betsa betsapabun ninkakin duawaibun jakia jawen mae anu kaxun jawenabudi jatu yusindia jabun jawen jancha danainbun jabiatiandi jawen jiwe anuabun danandiamisbuki— jatu watan

<sup>58</sup> januxun jawen yusian bechipaiama jawa ikunwankatsi ikabuma danainbun jawen unanmati dami atimaska ichapa Jesúsun jatu axunkin uinmama iniki.

## 14

### *Nashimanika Juan textenibukiaki, na janchadan*

(Mr 6.14-29; Lc 9.7-9)

<sup>1</sup> Janua Jesúskidi yuia akeakeaibu Galilea anuxun xanen ibu Herodesin ninkatan<sup>2</sup> jawen tsumabu yuikin:

—Jaskakenan, Nashimanika Juan mawa ana bestenshinxun jawen kushipa jatu uinmakin atimaska dami jawa nun atiduma jatu uinmaikiki— jatu wanikiaki.

<sup>3-4</sup> Janua badi betsatian Jesúskidi Herodesin ninkadiamaken Nashimanika Juan mawani matu yuinun ninkakanwen. Herodesin jawen betsa Filipon ain Herodías mebinmaken Juanen Herodes ja akin yuikin:

—¿Jaskakin min betsan ain mebintan min ainwainmamen? Jaskatima-jaidaki. Ainwanyamawe— akubainaya jawen ainin janchawen taexun xanen ibu Herodesin jawen soldadobu Juan achimaxun mane dispiwen jatu menexmatan bichiti jiwe medan jatu bichimaima janu Juan jiweken

<sup>5</sup>januxun Herodesin Juan tenankatsis ibiai: “Nashimanika Juanan, Diosun jancha yuixunikaki”, iwanan, yuia akeakeaibuki datekunkainaya <sup>6</sup>janua jawen badi janu kaini taxniaya jabube xanen ibubu bets a pimakatsi jatu ia ichabu be bun anua Herodíasin bake chipash nawaxunkin xanen ibu Herodes inun jatube icha benimawaya <sup>7</sup>jaskai uinkin xanen ibun jawen aniwa yuikin:

—Min ea jaskaxunayadan, chanima jawada min ea yuka en mia inanx-anaii— akaya <sup>8</sup>janua chipash kainkaini kaxun jawen ewa Herodías yukakin:

—Ewaan, ¿jawa yukaxanpa?— aka jawen ewan yuikin:

—Na jabiatian Nashimanika Juanen buxka yukatanwen— aka kaxun xanen ibu Herodes yuikin:

—Nashimanika Juanen buxka ea inanwen, sapa kenchakidan— aka

<sup>9</sup>jawen juanti metexekei punu nukatan Nashimanika Juan tenankatsi ikamabia ja jatu pimaibu be bunxun jawen aniwa ma yubai ninkakanx-unwen taexun jawen yuba binumakatsi ikama <sup>10</sup>jakimamadi ja soldado bichiabu jatun jatu tenamis xanen ibun yunukin:

—Juanen buxka textexun ea bexuntanwen— aka <sup>11</sup>soldado kaxun bichiti jiwe medanua Juan textetan jawen buxka sapa kenchaki nanebidan bexun ja chipash inan ja chipashan jawen ewa inanikiaki.

<sup>12</sup>Janua Juan ma tenanbu jawen tsumabun ninkatan bexun jawen yuda yuka itan bibain maiwatan jaska wabaini buxun chipu Jesúski chaninibuki.

*Jesúsun 5,000 junibu pimanikiaki, na janchadan  
(Mr 6.30-44; Lc 9.10-17; Jn 6.1-14)*

<sup>13</sup>Januxun Juan jaska washinabu Jesús banabimabu ninkatan nun jawen tsumabu nuku yuikin:

—Janu tsua jiweabuma anu benanta juindukuin buyunankanwen— nuku wa janua Jesús nukubes xaxuwen kai janu tsua jiweabuma anu Jesús kai yudabu tsuan jatu yuiamabia ninkabaini chibain jatun mae anua main buabun Jesús jikidiama jabu dukun jikia maniabun <sup>14</sup>Jesús keti itan butukainkin yudan kaian uin jatuwen nuijaidakin jatunabu isin teneaibu janu iyuabu jatu xuxawaxunpakeaya <sup>15</sup>janua ma badi kai meshukidanaya nun jawen tsumabu Jesús anu buxun yuikin:

—Ma badi kaikiki. Nenu tsua jiweabumaki. Na yudan kaianen jania pitidubumaki. Ja mae udama tibi anua jau misi bitan pitan jaskadabainta-nunbun jatu nichindiwe— nun wa

<sup>16</sup>Jesúsun nuku kemakin:

—Jatu nichianma matun jatu pimakanwen— nuku waya

<sup>17</sup>nun jawen tsumabun yuikin:

—Misi meken besti inun baka dabe besti nun jayaki. Jati nun jatu pima damaki— nun wa

<sup>18</sup>nuku yunukin:

—Jabiaska ea bexunkanwen— nuku watan

<sup>19</sup>januxun yudan kaian yunukin:

—Ja basiki xukua akeakea tsaukanwen— jatu wa manibaunaibun Jesúsun ja misi meken besti inun baka dabe tsumaxun naiudi teskanxun uinkin pitikidi Dios kenwantan misi inun baka tunke tunke apakekin nuku inankin yunua ja yudan kaian inanbaunkin nun jatu keyua <sup>20-21</sup>dasibibun yani

wai benimai pepeaibun janua ja misi meken besti inun baka dabe jatu paxkaxuna 5,000 junibun pikanxu jawa jatun ain inun jatun bakebu tanama ja pititex wakanxu ichawakin 12 kuki nun jawen tsumabun matawanibuki.

*Jesús ianenwan bemaki bepai kainikiaki, na janchadan*

(*Mr 6.45-56; Jn 6.16-21*)

<sup>22-23</sup> Janua bebunkidi nukun dukun ianenwan nun pukei kanun nun jawen tsumabu xaxuwen nuku yunua nun kaya yudan kaiandi jatu nich-inbaini mati anu ka Diosbe janchai meshu medan Jesús ja mesti niken <sup>24</sup> ianenwan namakis ma bui nun nunqabun niwewan besukidia bekin ian buspu tsaubidankin xaxu tsakama tsakama akaya unanxubida nun kaya <sup>25</sup> ma pena kemaya Jesús nukuki nukuyui ian bepaikidanaya <sup>26</sup> jaskakidanai uin e itan datei jancha kushipawen yuikin:

—Yushinki!— nun ikaibun

<sup>27</sup> Jesúsun nuku yuikin:

—En eaki. Ewen dateyamakanwen— nuku waya

<sup>28</sup> Pedron yuikin:

—Yusinaan, min miamenkain, en miki nukui kanun: “Ian bemaki juwe”, ea wawe— aka

<sup>29</sup> Jesúsun yuikin:

—Jani nedjuwe— aka

Pedro xaxu anua butukaini ianenwan bemaki kai Jesúski kemayupanan <sup>30</sup> ja niwewanen ianenwan bechuduainki mesei datei jikikainkin jawaida yuikin:

—Yusinaan, ea nexewe— aka

<sup>31</sup> jawaida Jesúsun metsunxun nexetan yuikin:

—¿Jaskai min dateai? En mia ian bepaimatidu ikunwanbiai ¿min jadakidi shinan buxkenxumen?— atan

<sup>32</sup> Pedrobe xaxun inaya niwewan ian bechudunwain maianyan <sup>33</sup> janua ja xaxun nun tsauabu Jesús naman danti itan kenwakin yuikin:

—Chanima min Diosun bakeki— nun ikaini

<sup>34</sup> ianenwan pukei nun besusi kapaya niwen jamakidi nuku bukin xutua mae betsa Genesaret anu keti itan <sup>35</sup> nun butubainaibun yudan kaainen Jesús unantan jatuki chanibaunaibun mae kesua anua kushibidankin jatunabu isin teneabu iwekin janu Jesús anu jatu iweabu <sup>36</sup> jau Jesúsun tadi metsanun, iwanan, Jesús jatu ea axuanbu jawen tadi kexa ja isin teneabun metsatan dasibi main kaya akeakenibukiaki.

## 15

*Jawada atimapu nun shinamistun nuku chakabuwamiskiaki, na janchadan*

(*Mr 7.1-23*)

<sup>1</sup> Janua betsation Jerusalénkidia bai beshianbu fariseobu inun Diosun jancha kenenibu yusinanamis betsabu Jesúski nukuxun uinkin yukakin:

<sup>2</sup> —Nukun xenipabun beya chibankin pidiamma nun mepanui taemiski. Jaskakin min tsumabun nukun xenipabun beya chibanma mepanuama pikanimenkain?— akabu

<sup>3</sup> jaska waibu Jesúsun jatudi yukakin:

—Matunan, matun beya chibankin Diosun yununi betsawatan ¿jaskakin man ana chibainsbumamen? <sup>4</sup> Jaska Diosun yuini matu yuikin shinamanun ninkakanwen. “Matun epa inun matun ewa medabewakin jatu duawakubainxankanwen. Jakia matun ibubu man jatu ichakawayaya jau matu tenanxanunbunwen”, akin yunubianiken <sup>5</sup> jakia matundi juni betsawatan

yusinchakakin: “Matun ibubu jawadawen medabewati mabu man jaya man jaki tanabia Templo anu inankuinkatsi man butidu man shinantiduki. Tsuan matu ana bikawatidubumaki”, iwanan, jatu yusinmisxun <sup>6</sup> ana jatu yusinkin jau jatun ibubu ana jatu duawakin medabewayamanunbun pe-paibu jaska nemakin man jatu bextekubainmiski. Jaska wakin Diosun yununi danankin matun beya betsapa besti man chibankubainnai—iwanan <sup>7</sup> —Bebunkidi Isaías man bepadamenikabukidi Diosun yuimakin:

<sup>8</sup> ‘Na yudabunan, jatun janchawen ea kenwanbiakin jatun juintiwen ea shinainsbumaki.

<sup>9</sup> Ja inun, ichatan jawa ea kenwankin pewaisbumaki.

Jakia junibun yunuawen besti jatu yusinkubainmisbuki’, aka jawen jancha yuixunika Isaásin ninkatan nuku kenexuniki— jatu atan

<sup>10</sup> januxun Jesúsun yudan kaiandi kenakin jatu ichawaxun yusinkin:

—Na jaskaibukidi matu yusinun ninkatan tapinkanwen. <sup>11</sup> Jawada yudabun piabu jawa jatu chakabuwaismaki. Jakia yudabun juinti medanua jawada jancha chakabu shinain anua taxnikin jatun jatu chakabuwamiski, Dios sinatamakinan— jatu waya

<sup>12</sup> janua nun jawen tsumabun shinanbidan Jesús dapi nitan nemakin:

—Ja fariseobu min jatu yusiaín ninkatan mia ninkama miki sinataibudan, ¿min uianmamen?— nun wa

<sup>13</sup> Jesúsun nukudi yuikin:

—Tsuabunda ea inun en Epa ikunwanma nukun jancha danainbu en Epandi jatu danandiaxanikiki, miban tsuan banama jamebi jukuinma tachayabis betsea keska wakinan. <sup>14</sup> Jau shinan inunbunwen. Juni bekunman juni betsja beku iyupai jadakidi iyuai unanma jabia dabe mikin maebain di idabemisbuki. Ja bepadameaibu jaska keskabuki, jabun tsua medabewatidumadan. Jaskaken jawa jatu yuiyamakanwen— nuku wa

<sup>15</sup> Pedron Jesús yuikin:

—Na min pitikidi jatu yusinxudan, xabakabi nuku yuiwe— aka

<sup>16</sup> Jesúsun nukudi yuikin:

—Matundi, ¿man ninkakin pewadiabumamen? <sup>17</sup> Xabakabi matu yusinun ninkakanwen. Jawada yudabun piabu jatun shinanki naneama jawa jatun shinan chakabuwatidumaki. Jakia jawada piabu jatun jatuki nanea puiabu kainmiski. <sup>18</sup> Jakia jatun shinan medanua jawada chakabu jaya jawen chakabumisbuki. <sup>19</sup> Janua eska yudabu jaya jatun shinan uke medan aduabu chakabu shinankin xabakabi taxnimamisbuki, eska tibi shinan medanua xabakabi kainkinan, juni betsaki yubakatan tenankinan, juni betsan ain chutankinan, xebi jayabu chutabaunkinan, yumetsuidan, chani chakaidan, yuda betsja ja akinan. <sup>20</sup> Jaska tibi yudabun shinan anua taxnikin jatu chakabuwamiski, Dios sinatamakinan Jakia fariseobun beya chibana mepanuama pikin Dios sinatamatidubumaki— nuku aniki.

*Sirofenicianawa ainbun ikunwainwen taexun Jesúsun medabewanikiaki, na janchadan*

*(Mr 7.24-30)*

<sup>21</sup> Janua Jesús kainkaini mae dabe Tiro inun Sidón dapi kaken <sup>22</sup> janua jidiobuma Cananawa ainbu betsan Jesús bechitan chibain kakin unanxubima juu akin kenakin:

—Yusinaan, min Davidin babaki. Ewen dabanan ikin en ainbu bake yushin chakabun ea bika tenemainkikiki. Ea kainmaxunyuwe— akubidanaya

<sup>23</sup> Jesúsun ninkabiai jawa yuama kai tini tini ikainaya januxun nun jawen tsumabun yunukin:

—Juu ikin nuku mese wabidanikiki. Nichinwen, jau kanunan— akin nun yuikubaina

<sup>24</sup> atimas Jesús niti itan ainbu yuikin:

—Israelbu chaxuwan benuabu keska besti en jatu yusinkubainun Diosun ea yununiki. En mia medabewatidumaki— abia ninkama

<sup>25</sup> jukidan ja be bun danti itan yuikin:

—Xanen ibuun, ea jaska wama ea medabewawe— aka

<sup>26</sup> Jesúsun yuikin:

—Israelbun piti bianxun kaman anu putatimaki— akaya

<sup>27</sup> ainbun jantsidi ana yuikin:

—Jeen. Jabiaskaki. Xanen Ibuun, en kaman keskaki. Israelbun tapukixun piabu jawen pese kamanen mitumisbuki. Jaska keskadi wakin en bake medanua yushin chakabu ea kainmaxunuwe— aka

<sup>28</sup> ninkatan Jesúsun yuikin:

—En jaska yuiai ikunwankin min pe yuiaii. Jaskaken min bake anua yushin chakabu ma kainkainxuki. Uinditanwen— akaya

jabatiandi jawen bake medanua yushin chakabu kainkainaya kayaniki- aki.

### *Isin betsapajayabu Jesúsun jatu xuxawanikiaki, na janchadan*

<sup>29</sup> Jaska wabidani janua iaketankidani Jesús kaikidani Galilea ianenwan ketanbidankin binubaini mati anu mapekea tsauken <sup>30</sup> janu tsaua shinan- bidani yudan kaianen jawenabu isin teneaibu jau Jesúsun jatu xuxawax- unun tidibu inun, bekunbu inun, chantui tsedesnibu inun, juyubu inun, isin betsapajayabu iwexun ja dapi jatu janabu xuxawai <sup>31</sup> uinkin ja juyunibu janchaibu uinkin chantui tsedesnibu ni peaibu uinkin bekuni- bun uiainbu uin jabaa iake iakekin Israelbun mekenika Dios kenwankin taewakubainaibun

### *Jesúsun 4,000 junibu pimanikiaki, na janchadan*

(Mr 8.1-10)

<sup>32</sup> jabianuxun nun jawen tsumabu Jesúsun kenaxun nuku yuikin:

—Ma xaba dabe inun besti ea ninkakin jabun piti ma keyuabuwen taea en jatuwen nuiaii. Jatun jiwe anu piti mais en jatu nichian bui bai puchinin punu nukai babui unanyamastidubuki— nuku waya

<sup>33</sup> —Janu tsua jiweabumanua jania piti bixun jati junibu nun jatu pimatidu- maki— nun wa

<sup>34</sup> Jesúsun nuku yukakin:

—¿Jati misi man jayamen?— nuku wa

—Siete misi inun baka pishta eskadabes nun jayaki— nun wa

<sup>35</sup> januxun Jesúsun ja yudan kaian yunukin:

—Ja main tsubaunkanwen— jatu watan <sup>36</sup> ja siete misi inun bakadi bixun Dios kenwantan misi tunkepakekin bakadi tekepakekin nun jawen tsumabu nuku inanpakea ja yudan kaian nun inan akeakebauna <sup>37-38</sup> januxun dasibi- bun yaniwai benimai pepeaibun 4,000 junibu besti tanakin jatun ainbuabu inun jatun bakebu nun tanama januxun ja pikantxu jatun texe ichawakin siete kuki nun matawaya <sup>39</sup> Jesúsun jatu yunukin:

—Ma en kai inun budikanwen— jatu wabaini janua nun jawen tsumabubes xaxun inatan kai Magadán mai pakea anu nun kaniki.

## 16

*Jawada tsuan atiduma fariseobu inun saduceobun Jesús yukanibukiaki, na janchadan*

(*Mr 8.11-13; Lc 12.54-56*)

<sup>1</sup> Ana betsatian fariseobu inun saduceobu bexun Jesús unanti wanun, ikin padankin yukakin:

—Dios anua jawen unanti dami nuku axunwen, min jawen kushipa jaya nun uinunan— akabu <sup>2</sup> jatun shinanen kaneaibu unankin Jesúsun jatu yuikin:

—Ma badi jikiaya matun yuikin: “Ikis nai tashipaki. Meshukidi penai badi pejaidaxanikiki”, man imiski. <sup>3</sup> Janua penayadi yuikin: “Ikis nai tashipaki ma nai kuin meshu meshuikiki. Natian ui bekatsis ikikiki”, ikin jaska ui inun niwe bemis unanbiakin janu jawen chakabu kupititian ma kemai en matu yusin chakayamabiakubaina ¿jawen unanmati man uintidumamen? <sup>4</sup> Nukunabu na jabiatian jiweabudan, man chakabuki. Jamapai Dios anua unanti tsuan atiduma uinkatsi man ea yukabiamisdan, Diosun Jonás bakawan xeamabiashinxun ana jiwemakin kainmanidan, jaska keska besti Diosun matu uinmakin matu axundiaxanikiki. Shinankanwen— jatu watan jenebaini

*Fariseobu inun saduceobun yusian mesekidi Jesúsun jatu yusinikiaki, na janchadan*

(*Mr 8.14-21*)

<sup>5</sup> Ianenwan kexa betsaudi jabe kakin nun jawen tsumabu jabe kakin misi buama nun jakimakainaya <sup>6</sup> Jesúsun nuku yuikin:

—Shinaindakanwen. Fariseobu inun saduceobun misi xaxawati meseki. Uindaxankanwen— nuku wa

<sup>7</sup> shinan pewama nun jawen tsumabu yuinamei:

—Nun misi beama ixuken nuku jaska yuikiki— nun ikaya

<sup>8</sup> Jesúsun nukun shinan unankin yuikin:

—¿Jaskai: “Nun misi beama ixuken nuku jaska yuikiki”, man ikai? Man ea uinbiakin man ea ikunwan chakaii. <sup>9</sup> Jawada en matu yusian ninkakin ¿man tapindiamamen? Ja 5 misi tunkepakexun 5,000 junibu en jatu pimashina inun jawen texe ichawakin jati kuki man matawashina, ¿man shinanmamen? <sup>10</sup> Ja inun, 7 misi tunkepakexun 4,000 junibu en jatu pimadiashina inun jawen texe ichawakin jati kuki man matawashina, ¿man shinanmadimen? ¿Man daka shinain? <sup>11</sup> Jaskai fariseobu inun saduceobun misi xaxawatikidi janchai ¿jaskai jatun misi kayabikidi en janchamabiaken man shinan chakai?— nuku wa

<sup>12</sup> januxun fariseobu inun saduceobun misi xaxawatikidi yuikin jabun yusinkin kanemisbukidi nuku nemaxu atimas tapintan nun shinankubainiki.

*Min nukun Mesías Cristoki, akin Pedron yuinikiaki, na janchadan*

(*Mr 8.27-9.1; Lc 9.18-27*)

<sup>13</sup> Janua Jesús nun jawen tsumabube kai ja mae pakea Cesarea Filipo anu jikitán nuku yukakin:

—Yudabunan, en matun Juchi Kayabi Iyuadan, ¿en tsua ea yuimisbumen?— nuku wa

<sup>14</sup> —Betsabun yuikinan: “Nashimanika Juan ana bestenshinaki”, mia wakanikiaki. Betsabundi yuikin: “Elías ana besteinmaki”, mia wadiakanikiaki. Betsabundi yuikin: “Diosun jancha yuixunika Jeremías kasmai jawen jancha yuixunika betsá daka”, akin mikidi yuimisbukiaki— nun wa

<sup>15</sup> —Jamen matun shinankinan, ¿man tsua ea wamismen?— nuku wa

<sup>16</sup> Simón Pedron kemakin:

—Miadan, Epa Dios jiweatun bake min nukun mekenika Mesías Cristoki—aka

<sup>17</sup> Jesúsun yuikin:

—Simón Jonásin bakeen, en jaken juni betsan mia yuiamabia en Epa nai anuatuñun mia unanmakin mia duawaikiki. Benimadiwe. <sup>18</sup> Ean mia kenakinan, mia Pedro wakin mishki kushipa keska en mia waii. Min jaska janchakin yuixuwen taexun yudabu minwendi ichapa en jatu ikunwanmax-anaii. Yuda mema mawatidubiaken Satanásan datemakin ea ikunwainbu maematidumaki, jatu nemakinan. <sup>19</sup> Jaska inun, ikunwainbu min jatu mekekubainxanun naiudia kushipa en mia yunuxanaii. Nenuxun yusinkin min jawada nemaya Epa Diosundi nemaxanikiki. Jawada nenuxun min nemamaken Epa Diosundi nemama ixanikiki— atan,

<sup>20</sup> Jesúsun nuku nemakin:

—En Mesías Cristoki tsua banabimayamayuxankanwen— itan,

*Mawaxanaikidi Jesúsun jatu banabimanikiaki, na janchadan  
(Mr 8.31-9.1; Lc 9.22-27)*

<sup>21</sup> janua Jerusalén anu ka jaska waxanaibu nuku yusinkin taewakin:

—Eki sinatakin ea ichakawakin judio xanen ibubu inun, Diosbe nukunabu janchaxunikabu inun, Diosun jancha kenenibu yusinanamisbun ea danankin ichakawakin ea jatu tenanmabu xaba dabe inun bestitian en ana bestenxanaii— akin <sup>22</sup> nuku xabakabi yuiaya Pedron ja mesti paxkabain nemakin yuikin:

—Xanen Ibuun, jaskamaki. Diosun mia jaska yunuama iniki. Jau tsuan mia tenanyamaxanunbunwen— akaya

<sup>23</sup> Jesús jawen tsumabukidi nasauketan uinkin Pedro nemakin yuikin:

—Satanásan shinanwen min ea teawakatsis ikai ana jadi jaskayamawe. Jawada Diosun uiain keska min uianmaki, eska shinankinan, jaska yudabun uinmis keskawen min ea nemaidan— abain

<sup>24</sup> janua Jesúsun nun jawen tsumabu nuku yuikin:

—Tsuada eki chiti ikatsis ikidan, jaska jamebi shinanmis jakimatan: “En jabe mawatiduki”, ikin jau ea chibankubainunbunwen. <sup>25</sup> Ja inun, tsuanda jatun jiwea ibubis mekekatsi ikamadan, jau benununbunwen. Jatun jiwea ewen benubiashinabudan, ea anua ana jiwekuian bixankanikiki. <sup>26</sup> Jamen tsuanda mabu midimawen kemu bestikin ichawaxun ea ikunwankin chibanma jatunmebi jatun jiwekuian benuxankanikiki, eauma mawaidan. Ja inun, jatun jiwea pakatan tsuan ana bitidumajaidaki. <sup>27</sup> Jamen en matun Juchi Kayabi Iyuadian, en Epan kushipaya Xanen Ibui jawen nai tsumabube ana juxun tsuabunda ea chibain jiwei pemisbu inun chakabumisbu jabutibi en jatu manakuxanaii, pepa inun chakabuwenan— iwanan <sup>28</sup> —Chanimá en matu yuiai ninkakanwen. Na jibia man ebe mapuabudan, man betsa betsapa mawadiamaken en matun Juchi Kayabi Iyu en matu Xanen Ibui taexunai man uinxanaii— nuku aniki.

## 17

*Jesús jawen yuda damitan chaxajaidanikiaki, na janchadan  
(Mr 9.2-13; Lc 9.28-36)*

<sup>1</sup> Janua 6 día binuaya Pedro inun Santiago inun Santiagon betsa Juan Jesúsun jatu dapaxkabainkin iyui kai mati keyatapajaida jatube mapeketan

<sup>2</sup> janua Jesús dami jawen besu dami badi keskai chaxai jawen tadi juxupa-jaidai xaba keskai juxu punte punte ikaya <sup>3</sup> Moisés inun Elías Jesúsbe janchai uiainbun <sup>4</sup> jawa unanma Pedron Jesús yuikin:

—Yusinaan, nun nenu juadan, pejaidaki. ¿Pean xubu dabe inun besti matu waxunpa, betsa mina inun, betsa Moisésna inun, betsadi Elíasinadan?—<sup>5</sup> akaya januxun nai kuin juxu mayabidankin jatu achiaya nai kuin anuxun jui taxnikin jatu yuikin:

—Na en bake en Katunidan, en bechipaijaidaii. Jawen en benimajaidaii. Ninkaidakubainkanwen— jatu wa

<sup>6</sup> jawen tsumabun ninkai datejaidai main beua maniabun <sup>7</sup> Jesús jatu dapi juxun jatu mekin yuikin:

—Ana dateama benidikanwen— jatu wa

<sup>8</sup> benitan bedu bedu ikin uin janu tsua niama Jesús besti nia uiainbun

<sup>9</sup> janua mati keyatapa anua butebidankin Jesúsun jatu nemakin yuikin:

—En matun Juchi Kayabi Iyua mawa en ana matu bestenxundiamaken na eska man uinxudan, tsua yuiyamayuxankanwen— jatu waya

<sup>10</sup> ana Jesús yukakin:

—Diosun jancha kenenibu yusinanamisbun yusinkin: “Nukun mekenan Cristo judiama bebunkidi Elías ana juxanikiki”, ikidan, ¿jaskai imisbumen?—akabu

<sup>11</sup> jatu kemakin:

—Chanima Elías bebunkidi ana juxun dasibi benawakin pewakin tae-waimaki. <sup>12</sup> Janunkain chanima en matu yuiaii. Elías ma ja dukun juyama unanma danankin jawen jawada wakatsis ikin Elías akimabuki. Jabiaskadi wakin en matun Juchi Kayabi Iyua jabun eadi danankin ichakawakin ea achitan jatu ea nuitapawamadiaxankananikiki— jatu wa

<sup>13</sup> janua Elíaskidi Jesúsun jatu yuama jakia Nashimanika Juankidi junea janchawen jatu yuia jawen tsuma dabe inun bestitun atimas shinanbidanibukiaki.

*Jesúsun yushin chakabu juni bake anua kainmanikiaki, na janchadan  
(Mr 9.14-32; Lc 9.37-45)*

<sup>14</sup> Janua Pedro inun, Santiago inun, Juan Jesúsbe jui janu yudan kaianki nukutushiaya jabianudi juni betsa jukidan Jesús bebun danti ixun yuikin:

<sup>15-16</sup> —Xanen ibuun, en juni bake yushinin duxku imakin nuitapawakin chi anu napukin jenen pukumisken min tsumabu anu en iwebia jaska waxun tsuan ea kainmaxuntidumaki. En bakewen nuikin ea xuxawaxunwen— aka

<sup>17</sup> Jesúsun mapuabu jatu yuikin:

—Ikunwainsbuma inun chakabubuun, ¿jatiki matu medabewai ana en matube jiweyxanai? Nedi iwekanwen, ja bakedan— aka

<sup>18</sup> iwea Jesúsun yushin chakabu kainma kaya jakimamadi jawen bake kayai xuxaya

<sup>19</sup> chipu januxun nun jawen tsumabun Jesús paxkabain yukakin:

—¿Jaskakin ja yushin chakabu nukun nun kainmatiduma ixumen?— nun wa

<sup>20-21</sup> Jesúsun nuku yuikin:

—Ea ikun kayabijaidawadiama man atiduma ixuki. Chanima jancha en matu yuiai ninkakanwen. Mostaza jawen jexe pexeishtabia banabu ewai ji ewapamiski. Jabiaskadi wakin ea ikun pishtawabiakin en kushipa shinankin na mati yuikin: “Nuela maei betsa anu katanwen”, man wa matu ninkatan ja mati maetiduki. Jamen ea ikun kayabi wakin dasibi man jaska atidubuki— nuku watan

<sup>22</sup> janua dasibi nun jawen tsumabu jabe kai Galilea anu nun jabe kakunkaunaya Jesúsun nuku yuikin:

—Ea en matun Juchi Kayabi Iyuadan, tsuanda ea jatu achima <sup>23</sup> ea tenanbu xaba dabe inun bestitian en ana bestenxanaii— nuku wa jaska chaniai ninkatan nun nuijaidaniki.

*Templo jawen pewati pei pakatikidi Jesúsun yusinikiaki, na janchadan*

<sup>24</sup> Ana kai jawen mae Cafarnaúm anu nun jawen tsumabu Jesúsun nuku iyukan Templo pei bixunikabun Jesús bechibaini kaxun Pedro yukakin:

—Matun yusinanan, ¿jawen Templo mekekin pewati pei badi betsa tibi pakakubainmismen?— akabu

<sup>25</sup> Pedron jatu yuikin:

—Jaa. Pakamiski— jatu watan kai jiwetan jikiaya Pedron shinan unankin Jesúsun ja dukuntun jancha wakin:

—¿Jawen gobieno medabewati pei ichawakin xanen ibu kushipabun tsuabu dukun yukamisbumen, jawenabumenkain, nawabudaka? ¿Jaskada min shinain, Simóon?— aka

<sup>26</sup> Pedron yuikin:

—Nawabu jatu amamisbuki— akaya

januxun Jesúsun yuikin:

—Chانيا xanen ibun jatun yunuaitun pakaisbumaki. Jabiaskadi wakin nun Diosunabun nun pakatidumabiaken <sup>27</sup> nukuki jau sinatayamanun bun xeamatiwen ianenwan anu xeamakin baka ja dukun min bia jabexutan pei jexe bestichai bechitan bixun Templo jawen pewati pei mina inun ena daken buxun jawen jatu pakatanwen— aka kaxun jaska Jesúsun yunua ninkabain bitanxun Pedron jatu pakanikiaki.

## 18

*¿Tsua Jesúsbe ja kachu nun xanen ibuxanai? ikin shinanibukiaki, na janchadan*

(*Mr 9.33-37, 42-48; Lc 9.46-48; 17.1-2*)

<sup>1</sup> Jabias xabatiandi nun jawen tsumabu Jesúski ichaxun yukakin:

—Mibe xanen ibukin jadatutun nun jatu binuxanimenkain, nuku yuiwe— nun wa

<sup>2</sup> januxun nuku yusinun, iwanan, bakeishta kena juai namakis nichinxun

<sup>3</sup> nuku yuikin:

—Chanya en matu yuiaii. Bake mishtinbun jawa dateama ea ikunwain chintunkatsi ikama ea chibankubaintidubuki. Tsuabuda jaska keskadiakin jawa keanma ea ikunwankin chibanmadan, nai anu man ebe jiwei xanen ibutidumajaidaki. <sup>4</sup> Jakia tsuada juni ewabia na bakeishta keskai ibubis keanma jatu medabewa bestikubainmisbu ebe xanen ibukin betsabu man binuxanaii. <sup>5</sup> Ja inun, ea duawanun, iwanan, na bakeishta keska wakin tsuada en kenaya juai ea ikin akawakin man duawatiduki— iwanan,

*Yuda betsan jawada jatu chakabuwamai mesekiaki, na janchadan*

(*Mr 9.42-48; Lc 17.1-2*)

<sup>6</sup> ana nuku yuikin:

—Tsuabunda jawada Diosun nemamis inun yunumis chibanma chakabu wamisbun bake mishtinbun ea ikunwain jatu padankin chakabu jatu ama akeakediamisbudan, jaskawen taexun Diosun jatu kupijaidaxanaiwen taea jawen xekian deneti mishki ewapa nexaxun teumatan ianenwan medan pukua jasadan, jawen kupiti bexmas mekeanaii. <sup>7</sup> Ja inun, jamapai betsabu bet-sapawen kemukin yudabun chakabuwamisbuki. Jakia tsuabunda enabun Diosun yunumis inun nemamis shinanbiaibun jointi babubu padankin

jatu chakabu ama akeakemisbu jabudi Diosun jatu kupia nuitapajaidax-ankanikiki.

<sup>8</sup> Jaskaken matun meken kasmai matun taewen jawada man chakabuwakubainai matun meken kasmai matun tae mextea keska watan jawaida jenekubainkanwen. Man meken dabeya inun man tae dabeyaken janu chi nukaisma anu matu udean pemajaidaki. Jakia meken bestichaiya inun tae bestichaiya Diosbe jiwei kai peki. <sup>9</sup> Ja inun, matun bedu betsawen jawada uinkin man chakabuwakubainai bedu betsawen tseka keskatan jawada man chakabuwai jawaida jenekubainkanwen. Man bedu dabeyaken janu chi nukaisma anu matu udean pemajaidaki. Jakia bedu bestichaiya Diosbe jiwei kai peki— iwanan,

*Chaxuhan benua benamisbu keska miyuiwen Jesúsun jatu yusinikiaki, na janchadan*

(Lc 15.3-7)

<sup>10</sup> ana nuku yusinkin:

—Na bakeishtan ea ikunwain keskabu jawa keinsbumadan, Diosun nai tsumabun jatu mekei en Epabe beisinain jabe janchakin jatu medabewamisbuwen taexun jawa jatu ichakawakin dananyamakubainkanwen— iwanan,

<sup>11-14</sup> —Miyuiwen matu yusinun ninkakanwen. Tsuada 100 chaxuhan jaya bestichai benua 99 besti basi mati anu mapuken jeneyubain bestichai benua man benamisbuki. ¿Chanimamen? Jaskaken ja 99 benuabumawen benimabiakin atimas ja bestichai benua bechitan man jawen benimajaidamiski. Jabiaskadi wakin matun Epa nai anuutun jawa bestichai bakeishtan ea ikunwain benukatsi ikamaki— iwanan,

*Ikunwain betsan mia chakabuwa jakimawatikiaki, na janchadan*

(Lc 15.3)

<sup>15</sup> ana nuku yusinkin:

—Ea ikunwain betsan kanekin mia chakabuwa jubes janchai pekin jadakidida mia chakabuwaxu jau unanun yuiwe. Mia ninkaya min jabe jai-bunamexanaii. <sup>16</sup> Jakia mia ninkamaken januxun ea ikunwain bestichai kasmai dabe jatu kenatan jadidi mia chakabuwashina jabias janchadi jatudi banabimatan jatun mia chakabuwashina anu jatu iyewe, jau jabundi mia medabewanunbunan. <sup>17</sup> Januxun jatun janchadi ninkamaken matun ichati jiwe anu iyuxun jatudi banabimadiawe. Januxun jabun pewakin yusabudi binu keyukin ninkamaken jaskawen taexun ikunwanbuma inun gobierno pei bixunika chakabuwen meseisma keska wakin jatu danankubainx-ankanwen.

<sup>18</sup> Chania en matu yuiaii. Nenuxun ikunwainbu yusinkin man jawada nemaya Epa Diosundi nemaxanikiki. Jawada nenuxun man nemaxuna-maken Epa Diosundi nemama idiaxunxanikiki.

<sup>19-20</sup> Ja inun, ikunwainbu dabe kasmai dabe inun besti ichabu en kenawen janchakin yukaibu en kushipawen en jatube nashui ika ikunkainxanaii. Jabiaskadi wakin matu dabetsundi jabias shinankin jawada pepas Dios man ea aka matu axunxanikiki— nuku waya

<sup>21</sup> jawen jancha ninkatan Pedron Jesús yukakin:

—Yusinaan, mia ikunwain betsan ea chakabuwaya ¿jatiki jawen chakabu jakimawaxanpa? ¿Metutikidaka?— aka

<sup>22</sup> Jesúsun nemakin:

—Jaskamaki. Metutiki bestimaki. Jakia min chakabu Diosun mia tanais-maki. Jaskawen taexun jawen chakabu tanama jakimawakunkainxanwen— iwanan,

*Xanen ibujaidatun tsumapan jabe dayadu betsaja dibiawen nuiama inikidi Jesúsun jatu yusinikiaki, na janchadan*

*23-24 miyuiwen jabiaskadi nuku dasibi yusinkin:*

—Dios xanen ibui jaskamiskidi matu yusinun ninkakanwen. Xanen ibujaida jawen tsumabun dibiabu pewanun, ixun jawen tsuma betsabu yunukin: “Ea dibiabu ea ixuntankanwen”, jatu wa juni betsan ichapajaida dibia iwexunabu <sup>25</sup> ja jawen tsumapan dibijaida jawawen pakatidumaken ja xanen ibun jawen tsuma betsabu yunukin: “Na ea dibijaida jawawen ea pakatimaki. Jaskaken jawada ea dibia jau jawen ea pakakin keyunun jawen jawada inun, na juni inun, jawen ain inun, jawen bakebu jatuwen pei bikatsi jatu inankanwen, jau juni betsya dayaxununbunan”, akaya <sup>26</sup> ja dibia jaska wai ninkatan jawen xanen ibu naman danti ixun nemakin: “Xanen ibuun, ea jaska wama ewen nuiyuwe, chipu unanxubida en mia pakakin keyukubainxanaidan”, aka <sup>27</sup> jaska wa ninkatan janua jawen xanen ibu jawen nuikin: “Dasibi min ea dibia en jakimai ana ea pakayamaxanwen. Ana jawen nuiama inun kadiwe”, aka <sup>28</sup> janua kain kaini kakin jawen xanen ibun tsuma betsya jaki nukutan eskadabes dibibia jawen pei binun ixun tetsunxun yuikin: “Min ea dibiadan, ikis ea pakadiwe”, axun jenea <sup>29</sup> ja naman danti ixun nemakin: “Jawaida ikis jawawen en mia pakatidumaki. Ewen nuikin manayuwe, chipu unanxubida en mia pakaxanaidan”, abia <sup>30</sup> jawa ninkama bichiti jiwe anu iyukin policiabu jatu bichimaniki, januxun ja dibia pakamaken kaintidumawakinan. <sup>31</sup> Jaska wai jawen xanen ibun tsuma betsabun uin jawen nuijaidakain jatun xanen ibu anu buxun ja junin jaska waxu dasibi yuiabu <sup>32</sup> januxun jatun xanen ibun jawen tsumabu yunukin jatu yuikin: “En tsumapan ea dibia en jakimabiaxu ja jatun jaska waxudan, ea ixuntankanwen”, jatu wa ixuntanabu yuikin: “Min juni chakabujaidaki. Ichapajaida min ea dibibiaxun ea ea akin min ea nema miwen nuikin dasibi min ea dibia en mia jakimaxunxuki. <sup>33</sup> Jaska shinantan en mia jakimaxu keskai miadi en tsuma betsan mia jatida dibia min jakimatishadaxuki”, atan <sup>34</sup> jawen xanen ibu jaki sinatajaidakin bichiti jiwe medan jadi jau bichitanunbun yununiki, jau jadixun ja dibijaidatun jau pakakin keyuxanunan. <sup>35</sup> Matu man jaska keskadiai ikunwain betsan mia chakabuwa jawen nuikin jau ewen nuinun, iwanan, mia yuibiaken miadi jawen nuiama min jakimamaken ja xanen ibu keskai en Epa Dios nai anua matuwendi nuiama ixanikiki, matun chakabu buamadan—nuku aniki.

## 19

*Junin jawen ain jenetimakidi Jesúsun jatu yusinikiaki, na janchadan  
(Mr 10.1-12; Lc 16.18)*

<sup>1</sup> Januxun Jesúsun nuku yusin menetan Galilea anua kainkaini kai Jordán jene kexa betsaudia este badi juaikidia Judea mai pakea jatuma anu nun jikiaya <sup>2</sup> Jesúski yudan kaian ichakin isin teneabu iweabu jatu kayawakin jatu xuxawaxunpakeaya

<sup>3</sup> januxun fariseobu jatiditun Jesús unanti watan jaki bepadamenun ika jaki kematan yukakin:

—Jawen jamapaiwen taexunan, ¿juninan, jawen ain jenetimen?—akabu

<sup>4-5</sup> Jesúsun jatu yuikin:

—Diosun jancha Moisin nukun xenipabu yusinxun kenenidan, ¿man uins-mamen? Matu yuinun ninkakanwen. Diosun damiwakin taewakinan, juni inun ainbu damiwaniki. Januxun Diosun Moisés yudabu jatu yusinmakin yuikin: “Junin ainbu ainwankatsi jawen ibubu dapaxkabaini ka ainyantan

jawen ainbe ketaxameawen taea ana yuda dabema jabias yuda bestichai keska jiwtidubuki”, aniki. <sup>6</sup> Jaskaken Diosun juni inun jawen ain yuda bestichai keska jatu wa junin jawen ain dapaxkabainkin jenetimajaidaki—jatu waya

<sup>7</sup> januxun fariseobun Jesús ana yuikin:

—Jamen Moisin nukun xenipabu yusinkinan: “Jaskakin animen, tsuanda jawen ain jenekatsi ikin jabe itimaskatanan, jawen taexun ainbu jeneti kene inankin: ‘En mia ana ainwanmaki’, iwanan, kene inantan jau taxnibainxanunbunwen”, akinan, jaskakin jaska jatu axunimen?— akabu

<sup>8</sup> Jesúsun ana jatu yuikin:

—Matun xenipabu uinti kushiken Moisin jaska jatu yununiki. Jakia Diosun dasibi damiwakin taewatanan, jaska yunuama iniki. <sup>9</sup> Chanimae matu yuiaii. Jamapai shadabu chani ninkatan sinatakin jawen ain jenetidubumaki. Jamen jenetan kainkain ainbu betsa ainwainan, ibubis chakabumisbuki. Jakia tsuanda jawen ainin juni betsa chutamabiatiayuima padanyanan, jawen ainan jenetiduki— jatu waya

<sup>10</sup> nun jawen tsumabun Jesús yuikin:

—Juni ainyantan jau ana jeneyamaxanunbun Diosun nemaniwen taeandan, ainbu biama chutauma unanuma jiwea pepamenkaintsa— nun wa

<sup>11</sup> Jesúsun nuku yuikin:

—Chanimaki. Jakia juni dasibibu jaska jiwtidubumabiaken jabu Diosun katuxun medabewakin jaska yunumis bestibu jaskai jiwtidubuki. <sup>12</sup> Juni bestibu jubuxkuma kaian ewatan chutatidubumaki. Ja inun, juni bestibu jubuxkuya kaian ewai esclavo dayaduwakin jubuxku biabu chutatidubumadiki. Jakia juni bestibu jubuxkuya kaian ewatan Diosun jancha yusin besti dayakin chutaisbumadiki. Tsuabuda jaska jiwtidubudan, jau jiewekubainunbunwen— nuku waya

*Jau Diosun bake mishtinbu duawanun Jesús yukaxunikiaki, na janchadan  
(Mr 10.13-16; Lc 18.15-17)*

<sup>13</sup> januxun mamepipakekin jau Dios yukaxunun Jesús anu jatun bakebu jabun iweaibu nun jatu nemanun ika ikaya <sup>14</sup> uinkin Jesúsun nuku yuikin:

—Jatun bake mishtinbu ea anu iweaibu jatu nemayamakanwen. Dios xanen ibuaitianan, na bake mishtinbu eki dateabuma keskabu besti Dioski dasixankanikiki— nuku watan

<sup>15</sup> bake mishtinbu mamepipakekin Diosun jau unanuma duawanun jatu dasibi yukaxuntan janua kainkainaya

*Bedunan mabu ichapaya Jesús be janchanikiaki, na janchadan  
(Mr 10.17-31; Lc 18.18-30)*

<sup>16</sup> janua bedunan betsa mabu inun bai midimaya Jesús anu kaxun yukakin:

—Yusinaan, ¿mia yukapa? Jiwea kayabi bikinan, ¿jawa pepa akubainkin en jiwea kayabi en bitidumen? Ea yuiwe— aka

<sup>17</sup> Jesúsun yuikin:

—¿Jaskakin pepatikidi min ea yukai? Dios besti pepaki, ¿min unanmamen? Jakia jiwei ikibi ikatsidan, Diosun yunuti inun jawen nemati chibankin jeneyamaxanwen— aka

<sup>18</sup> bedunantun Jesús yuikin:

—¿Jadatumen?— aka

—Juni betsaki sinatakin tenantimaki. Ainbu min ainma chutatimaki. Yumetsutimaki. Juni betsaki chani chakatimaki. <sup>19</sup> Matun ibubu duawakubaintiki. Jaska inun, min jabube jiweabu duawadiakubainkanwen, ibubis nui man mekemis keskaidan— aka

<sup>20</sup> bedunantun ana yuikin:

—Na dasibi min ea yuiaidan, bakeishtatun tapinixun en jeneismaki. ¿Jawa betsa Diosun yununi en adiamamen?— aka

<sup>21</sup> Jesúsun ana yuikin:

—Min ea pe yuiaii. Na besti min shinandiamaki. Mia yuinun ninkawe. Nai anua Diosun manakuti pepa bikatsis ikin min jawada dasibi jaya jatu inan keyutan ja pei min bishian ja nuitapaibu inankuintan chintuanma ebe kakin ea chibankubainxanwen. Min jaskakunkainaiwen taexun jiwekuian kayabi min bixanaii— aka

<sup>22</sup> januxun bedunan mabu ichapa jayatun Jesúsun jaska yuiai ninkai jawen mabuwen taea pes uinti nishmai keyutan ana jawa yuama kaya

<sup>23-24</sup> Jesúsun nuku yuikin:

—Chanima en matu yuiaii. Ja yuinaka ewapa camellodan, ja xumux jawen chixuiki jawen yuda kainmakinan, tsuan atidumaki. Jakia jaska keska bikadan, juni mabu ichapayadan, jawen mabu besti shinain jawen nuikin jatun shinan betsa wama Dioski chiti itidubumaki— nuku waya

<sup>25</sup> —Jabaa!— iki yuinamei:

—Jaskakenan, ¿tsuabu Diosun nuku mekekin paxawakin jiwematidumen?— nun ikaya

<sup>26</sup> nukuwen nuikin Jesúsun ana yuikin:

—Dateyamakanwen. Yudabun jaska watidubumajaidabiaken Dios nuikipatun dasibi matu axuntiduki— nuku waya

<sup>27</sup> Pedron yuikin:

—Yusinaan, nukunan, mia chibankatsi ikinan, jawada nun jaya dasibi bashikin keyubidan nun ma mia chibanpakeaii. Nun jaskakidanimadan, ¿nun jawa jayaxanai?— aka

<sup>28</sup> Jesúsun ana nuku yuikin:

—Chanima en matu yuiaii. Badi jawen jenei keyuaitian en Epan dasibi benawayen en jabe xanen ibuaya chintuanma man en 12 tsumabun ea chibankubainmisbu ebe xanen ibukin Israelin 12 bakebu xukua akeakeabu man unanti wanun badiakii. <sup>29</sup> Jaska inun, tsuabunda ea chibankin Diosun jancha kakape yusintanun ixun dasibi jatun jiwe jenekin jatun betsabu inun jatun puibu xununbainkin jatun ibubu xununkin jatun bakebu bashikin jatun bai jenekin keyubain yusinkubainmisbuwen taexun na jabiatian Diosun ana jatu manakukin duawamixun jaska uatian jiweshinawenma Diosun pepawen jatu manakujaidakin jaska tanatidubuma jatu ichawamakubainshinxun janu ma badi keyuaitian jiwea kayabi jatu inanxanikiki.

<sup>30</sup> Jaska inun, yuda ichapabu na jabiatian kenkin yunumisbudan, Diosun jatu kenwanma ixanikiki. Jakia betsabu na jabatiandi jawa kenkin yunuismadanan, Diosun jatu kenwankin xanen ibujaidawaxanikiki— iwanan,

## 20

*Dayakapabu tibikidi miyuiwen Jesúsun jatu yusinikiaki, na janchadan*

<sup>1</sup> ana nuku yuikin:

—Dios xanen ibui jaskamiskidi ana matu yusinun ninkakanwen. Dios xanen ibuidan, bai ibuan dayakapabu katutan jatu yunupakemis keskaki. Penai taeaya jawen bai anu jau uva tsekaxuntanun bun dayakapabu katuxun

<sup>2</sup> yuikin: “Man ea dayaxuni ka badi kai jikiaya xaba jidabi daya pei en matu

inaiin”, iwanan, dayakapabu jawen bai anu jatu yunua buabun <sup>3</sup> janua ma badi chikeyaya jawen mae namakis jemaintin anu juni betsabun jawawama uinkin <sup>4</sup> jatu yunukin: “Matundi en bai anu en bimi ea tsekaxuntankanwen, badi kai jikiaya en matu paka pewaidan”, jatu wa buabun <sup>5</sup> janua bai ibu ana badi manananbi taxnikaun juni betsabu jatu yunua buabun ana badi nai puchinin dakaken juni betsabudi jatu yunua buabun <sup>6</sup> janua ma badi jiki kemaya ana jawen mae namakis jemaintin anu kaxun juni betsabun jawawama uinkin jatu yukakin: “¿Jawai badi chaitanai man dayama ibaiai?” jatu wa <sup>7</sup> jabundi yuikin: “Tsuau nuku jawa yunuama nun ikaii”, akabu bai ibuan jatu yunukin: “Matudi en bai anu kaxun en bimi ea tsekaxuntankanwen, ma badi jikiaya en matu paka pewaidan”, jatu wa buabun

<sup>8</sup> janua ma meshu beaya bai ibun dayaibu uinika yunukin: “Ea dayaxuntankanxu jatu kenaxun jabianus kesua pei ea jatu inan akeakeaxuntanwen. Ja dama bukanxu ja dukun jatu paka taewabainkin ja jabu dukun buabu jawen jenekin jatu pakakin keyutanwen”, aka kaxun <sup>9</sup> ja dama bukanxu jabu dukun kenaxun xaba jidabi daya pei jatu inankin keyutan <sup>10</sup> janua ja badi nai puchinin dakaken dayai buabu jatu kenaxun jabianus kesua pei jatu pakatan janua ja badi manananbi dayai buabu jatu kenaxun jabianus kesua pei jatu pakatan janua ja badi chikeyaya dayai buabu jatu kenaxun jabianus kesua pei jatu pakatan janua jabu dukun buabu bekin shinain: “Ja jatu pakai binumakin nuku inainmenkaintsa”, ibiaibun jabianus kesua pei binuama jabias jatu inandiaya <sup>11</sup> jabun pei bitan bai ibuki sinatakin ja akin <sup>12</sup> yuikin: “Badin nuku kua niskain xaba jidabi nuku besti dayai nun nuitapabaixuken ¿jaskakin ja dama bubiakanxu daya eskadabesbiakanxuken nuku itsawakin xaba jidabi daya pei min jatu pakaxumen?” akabu <sup>13</sup> bai ibuan jatu bestichai yuikin: “Jatixun kesua ma bebunkidi en mia yuba en mia pakaxuki, mia padanmadan. <sup>14-15</sup> Ana eki sinatama en mia pakaxuya kadiwe. Jakia na dama bukanxu matu itsai xaba jidabi daya pei en jatu inanxudan, jawa chakabumaki. Ja pei man jawen nuiidan, matunamaki. Enaki. Jameen en jatu duawayaya ¿min daka en peiwen nui ikai?” aniki.

<sup>16</sup> Jaskawen taexun yudabu babuaibun shinan pepakin ea dananma en jancha chibankin taewaibu pepawen en jatu mekexanaii. Jakia badi ichapa en jancha chibain ikunwanmisbu ja kachukea jabu keskadi en jatu mekekubainxanaii— nuku waniki.

*Mawaxanaikidi dabe inun bestiki Jesúsun jatu yuinikiaki, na janchadan  
(Mr 10.32-34; Lc 18.31-34)*

<sup>17</sup> Janua Jerusalén baikidi nun kaya yudan kaian nukubedi buaibun januxun Jesúsun nun jawen 12 tsumabu besti kenaxun tadi paxkabain nuku yuikin:

<sup>18</sup> —Jerusalén anu na jabiatian nun kaidan, man unaiin. Januxun en matun Juchi Kayabi Iyua Diosbe nukunabu janchaxunika xanen ibubu inun Diosun jancha kenenibu yusinanamisbu tsuanda ea jatu achima <sup>19</sup> jabun ea tenankatsis ikin nawa betsabu ea jatu yunuabu jabun ea kaxe wakin ea kusha kusha akin cruzki mastaxun ea tenanxankanikiki. Ea tenanbu janua mawa xaba dabe inun besti kaya en ana bestenxanaii— nuku waken

*Santiago inun Juanen ewan Jesús jatu yukaxuniaki, na janchadan  
(Mr 10.35-45)*

<sup>20</sup> chipu Zebedeon bake Santiago inun Juan jatun ewabe kai Jesús besti niaki nukutan jatu jancha waxunun ika ja be bun danti itushiaya <sup>21</sup> Jesúsun yukakin:

—¿Mia jawa medabewapa?— aka

jatun ewan jatu yuixunkin:

—Min nukun xanen ibuaitianan, na en bake dabe jau mibe xanen ibux-anun min inaitian betsa min yusiudi inun betsa min yusmaudi ea jatu katubain tsaurmaxunxanwen— akaya

<sup>22</sup> jawen bake dabe uinkin Jesúsun jatu yuikin:

—Man jaska ea yukaidan, man unandiamaki. Jawada en tenexanaidan, ¿man idiatidumen?— jatu wa

—Nun idiatiduki— akabu

<sup>23</sup> Jesúsun ana jatu yuikin:

—Chanima ea ichakawaibu en isin tenexanai keska man idiaxanaii. Jakia en yusiudi inun en yusmaudi tsautant tsua ebe xanen ibuxanaidan, ibubis en yunutidumaki. En Epa Diosun jatu katunidan, jabudan, ebe ixankanikiki, xanen ibuidan— jatu waya

<sup>24</sup> janua Santiago inun Juan jaska yuka ikaibu nun jawen 10 tsuma betsabun ninkai nun jatuki sinataya <sup>25</sup> januxun nun jawen tsumabu betsabu ana nuku xuku watan yuikin:

—Jaska nawa xanen ibubun jawenabu ja akin jatu mese wabetanan ku-shipawen jatu yunumisbu man unaiin. <sup>26</sup> Jakia matubunan, jaska shinanya-makubainkanwen. Matu anua tsuada xanen ibukatsis ikinan, jau dasibi matu medabewakin duawakubainunbunwen. <sup>27</sup> Jabiaskadiai tsuada xanen ibukatsis ikidan, dasibibun tsuma jau idiakubainunbunwen. <sup>28</sup> Jamen ea iki juidan, en matun Juchi Kayabi Iyuabiadan, jau ea duawanunbun ika en juamaki. Jakia matu debuxunkin yuda ichapabu benuabu mexpamatian matu jiwemanun ika en juniki— nuku waniki.

*Juni bekun dabe Jesúsun bepexkin kayawanikiaki, na janchadan  
(Mr 10.46-52; Lc 18.35-43)*

<sup>29</sup> Janua Jericó maewan anu nun jawen tsumabube Jesús jikia ibai nun jabe kainkainaya yudan kainen nuku chibainbun <sup>30</sup> janu bai kaya kexa juni bekun dabe tsauabu Jesús juai juni betsa chaniaibu ninkatan januxun jabun unanxubima yuikin:

—Davidin baba Xanen Ibuun, nukuwen nuiwe— akubainaibun

<sup>31</sup> ichapabun nemapaibiabu ana unanxubimajaida yuikin:

—Davidin baba Xanen Ibuun, min miamenkain, nukuwen nuiwe— akabu

<sup>32</sup> janua Jesús niti itan juni bekun dabe kena beaibu jatu yukakin:

—¿Jawa matu medabewapa?— jatu wa

<sup>33</sup> ja dabetun yuikin:

—Xanen Ibuun, ana nun uinun nuku bepexwe ika nun ikaii— akabu

<sup>34</sup> Jesús jatuwen nuikin jatun bedu mekin jatu bepexa jawaida uinkin pewatan Jesús chibanbaini nukube bunibuki.

## 21

*Jerusalén maewan anu Jesús jikinikiaki, na janchadan  
(Mr 11.1-11; Lc 19.28-40; Jn 12.12-19)*

<sup>1</sup> Janua Jesús Jerusalén anu kai Betttagé anu kemai Olivos Mati tetanbaini Jesús niti itan jawen tsuma dabe <sup>2</sup> jatu yunukin:

—Ja mae besuudi kayanbis buxun burro yuxan tsua jaki katsaumediama jawen bakebe nexea bechitan tepetan ja dabe beyutankanwen. <sup>3</sup> Ja inun, tsuanda matu yukakin: “¿Jawakatsi man tepebainai?” matu wa yuikin: “Nukun Xanen Ibun nuku yunua nun bixunyuaii, samama jabianudi nuku bemaikikidan”, jatu watankanwen— jatu wa buaibun

<sup>4-5</sup> januxun bebunkidi jawen jancha yuixunki Zacarías Diosun yuikin:

“Jerusalén anu jiweabu yuikin: ‘Uinkanwen. Matun Xanen Ibu pepa keinsma burro bake kamaki tsaua jikixanikiki’, jatu yuiwe”, aka ninkatan Zacaríasin yuitankeneniki. Jaska yuini menei inun ika jawen tsuma dabe Jesúsun yunua <sup>6</sup> ja dabe kaxun jaska Jesúsun jatu yuia jabiaskadi wakin <sup>7</sup> burro bakeya bexuanbu nukun bemakia tadi pekatan nun kabekanxuna Jesús jaki inatan katsaumekainaya <sup>8</sup> janua yuda ichapabia jatiditun jatun bemakia tadi bai namaki nabekanbainunbun betsabundi xenpan mextexun jabiaskadi wabainaibun <sup>9</sup> jabu bebuuaibu inun jachun beabun benimachakayamabainkin jui kushipawen jawenchains yuibainkin:

—Aichu! Aichu! Diosun kushipaya juaidan, benimawakin duawanankanwen. Yavé Dios dasibi binuatun kushipaya nuku mekei juikiki, nukun xenipabu David ipauni keska jawen baba xanen ibujaaidan. Kenwanankanwen—akubaini bui

<sup>10</sup> janu Jerusalén anu Jesús jikiaya jaskakubainaibu ninkatan uinun ika bei:

—Nadan, ¿tsuamen?— ibidan ibidanaibun

<sup>11</sup> Jesúsbe bukin jatu yuikin:

—Diosun jancha yuixunika Jesúski. Galilea mai pakeanua jawen mae Nazaretki—jatu akubainaibun,

*Templo jemaintin Jesúsun pewakin xunpi wanikiaki, na janchadan  
(Mr 11.15-19; Lc 19.45-48; Jn 2.13-22)*

<sup>12</sup> janua Templo jemaintin kenekauanu Jesús jikikainkin jawen Dios daewati inabu kuamisbu chaxuwan inun, ina awa inun, deiwan inananainbu inun biaibu jatu nichinkin pei janua biananamisbun tapu nadabekin deiwan inanmisbun jawen kenedi nadabediakin <sup>13</sup> jatu ja akin yuikin:

—Jawen Templokidi jawen jancha yuixunika Isaías Diosun kenemani matu yuinun ninkakanwen. “En jiwedan, janua ebe janchakin ea kenwanxankanikiki”, ibianiken na jiwe jemaintin xabatudu anua man yumetsun jiwe wamisbuki—jatu wakin jatu nichinkin taxnimakin keyuaya

<sup>14</sup> janua ja Templo jemaintin anu bekunbu inun kistsedesnibu Jesús anu iweabu jatu kaya waya <sup>15</sup> Diosbe nukunabu janchaxunika xanen ibubu inun Diosun jancha kenenibu yusinanamisbun jaska jawen unanmati damiwai uinkin inun jabianuxundi bake mishtinbun kenwankin: “Davidin baba pepajaidaki”, iki shan shanki ikaibun ninkadiai jaki sinatakin <sup>16</sup> Jesús yukakin:

—¿Mia jaska waibudan, min ninkai?— akabu

Jesúsun jatu yuikin:

—Jaa. Jabia en ninkaii. Diosun jancha yuixunikabun jaska ekidi kenenibudan, ¿man uindiamamen? Salmoskidi matu yuinun ninkakanwen:

‘Min pepajaidawen taexun bake mishtinbu inun chuchu akaibun mia kenwanxankanikiki’,

aka matu kenexuniki—jatu watan

<sup>17</sup> januxun jatu jenebaini Jerusalén anua kainkaini Betania anu uxatanun ika nun kaniki.

*Jesúsun ji bimiuma bechitan yupunikiaki, na janchadan  
(Mr 11.12-14, 20-26)*

<sup>18</sup> Uxashini bestenkaini Betania anua ana Jerusalénkidi Jesús kai bunikainkin <sup>19</sup> ji betsa higuera benanta tupan bai kexa nia bechitan jawen bimi jayamenkain uintanun ika kaxun jawa bimi jayama jawen peis besti uinkin Jesúsun ji bimiuma yupukin yuikin:

—Jau tsuan min bimi ana piyamaxanunbun ana bimitaskayamaxanwen—akaya

jaskabiam e iskaun jawen pei nidi iki xanaya <sup>20</sup> nun jawen tsumabun uin jabaa! iwanan, Jesús yukakin:

—¿Jaskai ja ji jawaida xanaimenkain?— nun wa

<sup>21</sup> Jesúsun nuku yuikin:

—Chanima en matu yuiaii. Man jadatutunda ea ikunwain shinan dabeyama na ji en axu keska wakin na mati yuikin: “Matipaan, mimebi tsekekain ianenwan medan pukutanwen”, man waya Diosun jaska yunux-anikiki. <sup>22</sup> Ja inun, Diosun kushipa unain shinan dabeyama jabe janchakin yukakubainkanwen. Man jaska wai matu medabewaxanikiki— nuku abaini

*Jesús jaskai kushipaikidi yukanibukiaki, na janchadan*

(Mr 11.27-33; Lc 20.1-8)

<sup>23</sup> janua Templo jemaintin anu jikixun Jesúsun yuda ichapabu kakape yuikin jatu yusianyan Diosbe nukunabu janchaxunika xanen ibubu inun xanen ibu betsabun Jesús nemanun ika bexun yukakin:

—Na min eska waidan, ¿tsuan jawen kushipa mia yunuimawen min aki ikai? ¿Tsuau jawen kushipa mia inainmamen, min jaska wanunan?— akabu <sup>24</sup> Jesúsun jatu kemakin:

—Entsedi en matu yukai matun dukun ea yui taewakanwen, man ea yuiaya jawada man ea yukai en matu yuidiae ninkakanxunan— itan <sup>25</sup> — Nashimanika Juan jau jatu nashimanun yunukinan, ¿tsuan kaya yunuyama man shinain, Diosundaka, junibundaka? Ea dukun yuikanwen— jatu wa

janua jabudi june yuinamekin:

—“Diosun yunuyamaki”, nun wadan, “¿Jaskakin Juanen jancha man ikunwanma ikimamen?” iwanan, nuku kunyan atiduki. <sup>26</sup> Jamen Diosun Juan yunuyama yuda midimabun ikunwainbuwen taea jabuki datekin yuikin: “Junibun yunuyamaki”, nun wapanan nun jaska yuitidumaki— iwanan,

<sup>27</sup> jabun Jesús yuikin:

—Nun unanmaki— akabu

Jesúsun jatu yuidiakin:

—Jaskakenan tsuanda jawen kushipawen ea yunuimadan, eandi en matu yuiamaki— iwanan,

*Juni bake dabeyakidi miyuiwen Jesúsun jatu yusinikiaki, na janchadan*

<sup>28</sup> jabias xanen ibubu dake wanun, iwanan, Jesúsun miyuiwen ana jatu yuikin:

—Juni betsa juni bake dabeyakidi yusintan matu yukanun ninkakanwen— ixun, jatu yuikin:

—Jawen bake betsa yunukin: “Epaan, ikis en bai anu dayakin en uva bimi ea tsekaxuntanwen”, aka <sup>29</sup> jawen baken yuikin: “En dayakatsi ikamaki”, ibia janua shinan betsatan bai anu ka dayajaidaimaki. <sup>30</sup> Januxun jawen bake betsa jawen epan bechitan jadi yunukin yuikin: “Miandi en bai anu dayakin en bimi ea tsekaxuntanwen”, aka jawen baken yuikin: “Peki. Ia, en kaii”, ibia kama ikimaki. <sup>31-32</sup> Jaskakenan, ¿matu yukapa? ¿Jadatutun jawen epan yunua ninkatan axuanimamen?— jatu wa

—Ja ja dukun yunuimatun ninkakin axuntanimaki— akabu

Jesúsun jatu yuikin:

—Eskatian chanima en matu yuiaii. Nashimanika Juan taxnimaxun jaskai jiwei peti matu yusinbia jawa matun shinan betsawatan man ikunwanma ikimabuki. Jakia ja gobieno pei bixunika chakabubu inun ainbu jinini-pabun Juanen jancha ninkakin ikunwainbu uinbiakin matun man shinan

betsa wama ikubainshinabuki. Jabiaskadiai natian nawa pei bixunikabu inun ainbu jininipabu Diosun jancha en yusiain jabun ninkaibu Diosun jawenabu jatu waikiki, matu binukinan— iwanan,

*Dayakapabu mekenan besumakidi Jesúsun jatu yusinikiaki, na janchadan  
(Mr 12.1-12; Lc 20.9-19)*

<sup>33</sup> ana jatu yuikin:

—Miyui betsawen matu ana yusinun ninkakanwen. Xanen ibu betsan bai waxun uva bimi batapa banatan mishkiwen dakenbaunkin keyutan janua jaki uva tsiniti watan januxun dasibi uinbaanti jiwe pishta keyatapa watan januxun jau bimi dabukun ea inanxanunbun, iwanan, juni betsa dayakapabube jabube yubakatan ibu keska wakin inanyubaini chai kaimaken <sup>34</sup> janu ma kani tsekatitian ikaya bai ibuan jawena dabukun jau yukatan bixuntanun, iwanan, jawen tsuma betsabu yunua buabu <sup>35</sup> jabun jawena inankatsi ikama uva bimi mekeabun jawen tsumabu betsabu achixun kusha kusha atan betsabu debu watan betsabu mishkiwen tsaka tsaka atan jawa inanma nichianbu <sup>36</sup> januxun bai ibuan ana jawen tsuma betsabu yunudia buabun jabun uva mekexunabun jawen tsuma tibi buabu jabiaskas jatu wabu mais bebidan bebidanaibun

<sup>37</sup> januxun tsua ana yunutima jawen bake bechipaijaidabiakin atimas yunukin shinankin: “En bake en yunua ka jaki mesekin en bimi ea inantidubuki”, iwanan, yunua ka <sup>38</sup> jawen bake jatuki kemai kai bechitan yuinamei: “Bai ibu mawashinken na jawen baken jawen bai tibi inun jawen jiwe tibi dasibi jawenawayuikiki. Na bai nukunas nun wanun tenanankanwen”, ixun <sup>39</sup> juai achixun bai kene anua kainmaxun tenanshinabuki— iwanan,

<sup>40</sup> Jesúsun jatu yukakin:

—Jawenabu jaskawanshinabunan, ja bai ibu juxun jaskada jatu waxanimenkain?— jatu wa

<sup>41</sup> jabundi Jesús yuikin:

—Bai ibu juxun ja dayakapabu chakabubu jawa jatuwen nuiama jawenabubetan jatu tenantan januxun dayakapa betsabu yunukin jau jabun en bimi dabukun ea inanxanunbun, iwanan, yunutiduki— akabu

<sup>42</sup> Jesúsun ana jatu yuikin:

—Diosun jancha kenenibu ¿yuikin man uinsmamen? Matu ana yusinun ninkakanwen:

‘Jiwe wanikabun mishki dananbiaibun jabias mishki Diosun bixun dexun makedex wakin jawen kene mestenwan keska wakin nuku uinmakin jaba! imakin nuku jadakidi shinantima waxanikiki’, axun keneniki. <sup>43</sup> Jaska keneni keska wakin matun xenipabu Diosun katubianixun man jawenabubiatun shinanma man danananyan januxun yuda betsabundi ninkakatsi ikaibu Diosun katutan jatu jabe xanen ibumaxanikiki. <sup>44</sup> Ja inun, betsadan, tsuada ja mishkiki sinatakin ea maemanun ika mishki mamaki kauana teke teke ika keska itiduki. Jakia ja mishki jadatukida kauani jaki tin ikin chushakin mishpu waxanikiki— jatu waya

<sup>45</sup> Diosbe nukunabu janchaxunika xanen ibubu inun fariseobun na miyuiwen jabukidi yusiain ninkatan <sup>46</sup> Jesús achikatsis ibiai yudan kaianen: “Jesús Diosun jancha yuixunikaki”, ikaibuki datekin jawa achiyuabumaken

<sup>1</sup> januxun Jesúsun miyui betsawen ana jatu yusinkin:

<sup>2</sup> —Jaskai Dios xanen ibumiskidi ana matu yusinun ninkakanwen. Xanen ibujaidatun jawen juni bake ainyanwankatsi jawenabu xanen ibu betsapajau jabe nawai besi benunbun, iwanan, <sup>3</sup> jawen tsumabun jau jatu itanunbun jatu yunua buxun jatu yuibiatanabu beabumaken <sup>4</sup> ana jawen tsuma betsabu yunukin: “En jatu ikatsis ikaidan, eska ea yuixuntankanwen: ‘Nukun tsumapan ina awa inun jawen yuinaka ina tibi xuadanwan detexun ma matu bawakin xui pewaxunabuki. Jaskaken jawen bakebe nawai bekanwen’, ea jatu waxuntankanwen”, jatu wa bui jatuki chanikubaunbi-abu <sup>5</sup> jawa bekatsi ikama betsajawen bai anu katanun betsajawen mabu jiwe anu dayai kaken <sup>6</sup> januxun jatiditun xanen ibun tsumabu achixun ichakawakin betsabu jatu tenainbun <sup>7</sup> janua xanen ibu sinatajaidakin jau jawen soldadobun ja sinatapabu tenantan jatun mae tibi jau kuabauntanunbun jatu yunutan <sup>8</sup> januxun jawen tsuma betsabu yuikin: “Janu nawati ma dasibi pewabuki. Jakia en jatu chanimashina chakabui beabumaken en ana jatu ikatsi ikamaki. <sup>9</sup> Jaskaken ja bai puchinin jiwekubainabu anu bui jatuki nukuxun jau nawai benunbun jatu yuidiatankanwen”, jatu wa <sup>10</sup> bui bai tanabaini jatuki nukuaibu tibi jatu yuikubainkin chakabubu inun pepabu jatu kenatan jatube ichai jiwe teke xaka betsana junin kaian texke ikabun

<sup>11</sup> janua jatun xanen ibujaida juxun jikikain nawaibu uinkin juni betsajaya nawati tadi danankin saweama bechitan <sup>12</sup> yuikin: “Baa, en tadi jaya nawati ¿jaskakin min saweama jikiamen?” aka dakei jawa janchamaken <sup>13</sup> januxun xanen ibun ja jabun jatu piti inainbu jatu yuikin: “Na juni chakabu junexkin menextan bukin janu meshujaida medan udentankanwen, jau jadi jiwea bika tenei kaxai xeta yenx yenx axanunan”, jatu waniki. <sup>14</sup> Dios xanen ibuaitianan, jabiaskadi waxanikiki. Ichapabu Diosun jatu kenabiapakeaya ichapamatun ninkatan ikunwainbu ja jawenawakin jatukumiski— jatu waya

*Nawa xanen ibu pei inantikidi Jesúsun jatu yununiaki, na janchadan  
(Mr 12.13-17; Lc 20.20-26)*

<sup>15</sup> janua fariseobu Jesúsun jatu jaska yuia ninkatan bua: “Jawawen taexunjaska waxun Jesús padantan Romano xanen ibu anuxun nun chitetidumenkain”, ika yubakatan <sup>16</sup> januxun jatuki chiti ika betsabu inun xanen ibu Herodeski chiti ika betsabudi jau Jesús unanti watanunbun jatu yunuabu Jesús anu buxun yuikin:

—Yusinaan, juni betsabu miki sinatabiaibun jawa jatuki dakekin jabu daewama chanima jancha besti yusinkin jaska wakin Dios chibantidubu besti min xabakabi jatu yusinkubainmis nun unaiin. <sup>17</sup> Jaskawen taexunan, ¿jaskada min shinainmenkain mia yukapa? Ja Romano xanen ibu Césarnuku pei yukamisdan, ¿jaska wananaxpana? ¿Pakananaxpana? ¿Pakatimadaka?— aki

<sup>18</sup> jaki bepadameaibu Jesúsun unankin jatu yuikin:

—¿Bepadamenikabuun, jancha pewen man ea bepadanun ika ikanai?  
<sup>19</sup> Jawen gobierno impuesto pakati pei jexe betsaa einmakanwen— jatu wa jawen pakamisbu pei jexe betsabexun tsumaxun einmabu <sup>20</sup> uinkin Jesúsun jatu yukakin: —Nadan, ¿tsuan besu inun tsuan kena neamen? Ea yuikanwen— jatu wa <sup>21</sup> jabun yuikin:

—Romano xanen ibu Césarnaki— akabu januxun Jesúsundi jatu yuikin:

—Césarnawen taexun matun xanen ibu César duawakin jawen gobierno dayaxunmisbu pei jatu inanxunkubainkanwen. Jakia Diosdi duawakin jawen yusian chibankin jawada bechipaiai axundiakubainkanwen— jatu wa

<sup>22</sup> ninkai e itan: —Nun jaska waxun padantidumaki— itan jenebaini dabekebainaibun

*Mawanibu bestenxanaikidi Jesús yukanibukiaki, na janchadan  
(Mr 12.18-27; Lc 20.27-40)*

<sup>23</sup> janua saduceobu judiobu paxka betsa: “Ja mawabu jawen yuda tsua ana besteinsmaki”, imisbu Jesús anu jabudi bexun yukakin:

<sup>24</sup> —Yusinaan, Moisin yusinkin: “Juni betsaa ainyanbia juni bakewadiama mawaken janua jawen betsaa ain janubi ainwantan juni bakewaxuntiki, jawen betsaa mawaimatun kena dabikin jawena waxunkinan”, nuku waniki. <sup>25</sup> Jaskakidi ja jawen 7 betsabukidi mia yuinun ninkawe. Ja dukun iyuautun ainbu betsaa ainwanxun juni bakewadiama mawaken <sup>26</sup> ja kachukeatun jawen betsaa jabias ainwanxun juni bake wadiamadi mawaken ana ja kachukeatun jawen betsaa ain jabiadi ainwandiatan juni bake wadiamadi mawaniki. <sup>27</sup> Janua ja 7 jawen jenekin jabias ainbudi bixun jabu tibitun jawa juni bake wabuma mawai keyuabun janua jawen jenei ainbu juni bake biamas mawadianiki. <sup>28</sup> Ja jaskanibudan, mawabu ana besteainbutian <sup>29</sup> ja ainbu bestichai ja juni 7bun ainwanibudan, jadatutun kaya ana ja ainbu bixanimenkain?— akabu

<sup>29</sup> Jesúsun jatu kemakin:

—Matunan, Diosun jancha kenenibu unanma jawen kushipa man unanmadiki. Jaska wakin man kanemiski. <sup>30</sup> Xabakabi matu shinamanun ninkakanwen. Mawanibu ana bestenxanaibutianan, jawa ana ainyain inun ana beneyai ikama ixankanikiki. Jadia Diosun nai tsumabu keska beneuma inun ainyuma jiwxankanikiki. <sup>31-32</sup> Mawakubainaibu bestein ana jiwxanaibukidi matu shinamanun ninkakanwen. Ji maxu kua jede ji ikai anuxun Diosun Moisés jancha wakin: “Eadan, natian en Abrahamnen mekenikaki. En Isaacun mekenikaki. En Jacobun mekenikadiki”, ikai ninkayamaxun Moisin kenenidan, ¿man uinkin yuismamen? Diosdan, mawabunamaki. Jakia jiweabunaki. Jaskaken Abraham inun Isaac inun Jacob jatun yushin jiweabuki. Chipu ana yuda bera Diosun jatu inanxanai shinanna man kanejaidamiski— jatu wai <sup>33</sup> Jesús saduceobube yuinamei yudan kaianen ninkabaikin Jesús jaskakidi yukabu jatu yui pewaxukidi ninkai “Jabaa!” ikaibun

*Diosun yununidan, ¿jadatu bestitun binu keyuamen? ikaikidi Jesúsun jatu yusinikiaki, na janchadan*

*(Mr 12.28-34)*

<sup>34</sup> januxun saduceobun Jesús yukabu jatu yusinkin jatun bepadanti jancha jatu nesewawen taea jawa ana yuiama mapuabun janua fariseobundi ninkatan jabudi icha yubakanametan <sup>35</sup> jabundi unanti wanun ika yuinamebidan Jesús anu buxun jabu betsaa Diosun jancha kenenibu yusinanamis betsaa unanti wanun iwanan, yukakin:

<sup>36</sup> —Yusinaan, ¿jadatu yunua kushipa binua Moisin nuku kenexuniwen besti nun chibainwen taexun Diosun nuku mekekubaintidumen?— aka

<sup>37</sup> Jesúsun yuikin:

—Na eska yununi betsaa betsapa tibi dasibi binujaidadan, na janchaki ninkawe. “Yavé min Mekenika Dios duawakin bechipaikin min jointi jidabiwen inun, min yushin jidabiwen inun, min shinan jidabiwen chibankin duawakubainwen”, ani <sup>38</sup> chibankin na eska bestiwen min Dios benima-jaida wakubaintiduki. <sup>39</sup> Ja inun, ana ja kachu yunua betsadan, jabisaka dabeski. Ninkawe: “Min jabube jiweabu duawadiakubainkanwen, ibubis man nuimekemis keskaidan”, <sup>40</sup> ani ja dabe chibain man jaki chiti imiswen

taea dasibi Diosun yunua Moisin keneni inun Diosun jancha yuixunikabun  
kenenibu jaki tsamia keskawen taea ja chibankin dasibi man shinandi-  
atidubuki— atan

*Mesías Cristodan, ¿tsuan babamen? iwanan, Jesúsun jatu yukanikiaki, na  
janchadan*

(*Mr 12.35-37; Lc 20.41-44*)

<sup>41</sup> janu Templo jemaintin anu fariseobu icha budiabumaken <sup>42</sup> Jesúsun jatu  
yukakin:

—Nukun Mekenika Mesías Cristokididan, ¿jaskada jakidi man shinanmis-  
men? ¿Tsuau babamen?— jatu wa

jabun yuikin:

—Davidin baba ixanikiaki— akabu

<sup>43</sup> Jesúsun ana jatu yuikin:

—Diosun Yushin Pepatun David yusian ninkatan ¿jaskakin jawen Mekenika  
Mesías Xanen Ibu wanimen? Matu yuinun ninkakanwen. Davidin yuikin:

<sup>44</sup> “Dios Mekenikatun en Xanen Ibu Mesías yuikin: ‘Miki sinataibu en jatu  
maemadiama manai en yusiudi tsauyuwe’”,  
aniki. Jaska watan keneniki. <sup>45</sup> “Mesías en xanen ibuki”, Davidin abianiken  
¿jaskatan jawen xanen ibu janubi jawen baba itidumen? Ea yuikanwen— akin  
jatu unantimaska wa

<sup>46</sup> januxun tsuan jawa ana jancha betsaa yuitiduamajaida dakekin jawen  
bepadankin yukatiwen ana jawenchains jawa yukama nesea mapuabun

## 23

*Diosun jancha kenenibu yusinanamisbu inun fariseobu Jesúsun jatu  
chitenikiaki, na janchadan*

(*Mr 12.38-40; Lc 11.37-54; 20.45-47*)

<sup>1</sup> januxun judio xanen ibubun ninkadiaibun Jesúsun yuda ichapabu inun  
jawen tsumabu ana nuku yuikin:

<sup>2</sup> —Diosun jancha kenenibu yusinanamisbu inun fariseobun Moisin  
jancha keneni matu yusinkin chanima jancha kaneama matu yuimisbuki.

<sup>3</sup> Jaska matu yusinmisbu jatun jancha pe chibankin jakia jatunmebi kein  
bepadamemisbudan, ja jatu mawayamakubainkanwen. Pe matu yuibiatan  
ibubis kanekubainkaniki. <sup>4</sup> Jaskawen taexun jabunan, xankamajaida  
matu iama keska wakin yusian tsuan chibantiduma matu yusinbiakin jabias  
yusian jabundi chibantidubumaki, jaska matu yusiaibuu keska jiwekin  
matu uinmamadan. <sup>5</sup> Ja inun, “Diosun jancha en chibanjaidai uinkin  
dasibibun jau ea kenwanunbun”, ika tadi chaipa dauya panan pananyan  
sawetan Diosun jancha kene bichi bau pishtaki nanea bichiwen nexea  
betunku anu sawekein netantan punti anudi netandiatan jau ea uinunbun  
ika jatu kenwanmai mapumisbuki. <sup>6</sup> Ja inun, pi ichaxun xanen ibu dapixun  
pinun, iwanan, benamisbuki. Ja inun, janu ichati jiwe anu jikikain jaki  
tsauti pepa janu dasibibun jatu uintidubu anu tsaukatsis imisbuki. <sup>7</sup> Ja inun,  
bai xexa tibi mapua mabu inananamisbu anuxun: “Yusinaan, akin jau ea  
duawanunbun”, ika mapumisbuki.

<sup>8</sup> Jakia matudan, jabu ikai keska iyamaxankanwen. Yudabu kenamakan-  
nan, jakia matun yusinanamisbu bestichaiki. Ja ikunwain man jawen betsabu  
inun jawen puibu bestiki. Jaskawen taexun “Yusinaan”, akin jau matu  
kenayamaxanunbunwen. <sup>9</sup> Ja inun, mai anu jiweabu binu keyua nai anu  
medabenan Yushin Epa Dios bestichai jiwea man jayawen taexun juni  
betsaa Dios itsa wakin: “Epaan”, akin kenayamakubainxankanwen. <sup>10</sup> Ja

inun, Diosun Katua Cristo ja besti matun tapinmanikaki. Jaskawen taexun: “Tapinmanikaan”, akin jau matu kenayamanun bun Dioskidi yusinkin jatu mikidi kenwanmayamaxankanwen. <sup>11-12</sup> Jakia tsuada natian keanma Diosun jatu duawakin xanen ibujaidawaxanikiki. Ja inun, tsuada natian ibubis kein xanen ibukatsis imisbu Diosun jatu dake wakin ana xanen ibu wama ixanikiki. Jaskawen taea matudan, tsuada keanma duapakin dasibi man jatu medabewakubainmiswen taeandan, man xanen ibu ixanaii— akin nuku yuitan

<sup>13-14</sup> nasaukei dabeketan betsabudi metukin yuikin:

—Diosun janchakenenibu yusinanamisbu inun fariseobu man bepadamebuun, man peidawa! Diosun jancha jawen jiweti unanbiai ninka pewama tsuabuda Dios xanen ibuai anu jikikatsi ikaibu man jatu nemamiski. Matudi man jikitidumabia jabu betsabu jikipananbun man jatu nemakubainnai.

<sup>15</sup> Janua matudan, Diosun jancha kenenibu yusinanamisbu inun fariseobu man bepadamebuun, main bukin ianenwan pukebaini buxun nawa betsa matu keska judio wanun ixun jatun shinan betsa wamakin jatu ikunwanmanun, iwanan, matun beya midima man jatu tapinmakin matun chakabu man jatu binumaibuwen taexun Diosun jatu kupijaidakin chi medan jatu udean jiwechakaxankanikiki.

<sup>16</sup> Janua matudan, matu bekun keskatun jatu yusinchakakin yuikin: “Chانيا Templo Diosun shinamis keska wakin en mia padanmaki, akin tsuada yubabiatan jawen yuba akama jawen nuiama peki”, akin man jatu yusinmiski. Jakia “Jawen Templo medanua oro pei Diosun shinamis keska wakin en mia padanmaki, akin tsuada jaska yubatan jawen yuba jau anunwen. Jawen yuba jancha akamadan, chakabujaidaki”, akin man jatu yusinmiski. <sup>17</sup> Man bekun keskabu inun man unainsmapabuki. ¿Jadatu Diosun bechipaimismen? ¿Peimen? ¿Jawen Templodaka? Matu yuinun ninkaidakanwen. Jawen Templo anuxun yudabun Dios kenwanmisbuwen taea jabun pei shinamna jawen kenwanti Templo besti shinankin Diosun bechipaimiski— iwanan <sup>18</sup> —Jamen ana betsa jatu yusinkinan: “Chانيا jawen kenwanti chi tapu Diosun shinamis keska wakin chani chakakin en mia padanmaki, akin tsuada yubabiatan chipu padananainan, man jawen nuiama peki”, akin man jatu yuimiski. Jakia: “Jawen kenwanti chi tapu anu inan kuin betsa betsapa Diosbe nukunabu janchaxunikabun manchin-tan jatu kuaxunmisbudan, Diosun shinamis keska wakin chani chakakin en mia padanmaki, akin tsuada jaska yubatan jawen yuba jau anunwen. Jakia yuba jancha akamadan, chakabujaidaki”, akin man jatu yusindiamiski. <sup>19</sup> Bekun keska unainsmapabuun, ¿jadatu Diosun bechipaimismen? ¿Inankuin mania bestimenkain? ¿Januxun kuakin Dios benimawamisbu tapudaka? <sup>20</sup> Matu yuinun ninkakanwen. Tsuada jawen kenwanti chi tapukidi yubakakin jawen inankuinkidi dasibi man yubakadiamisbuki. <sup>21</sup> Ja inun, tsuada Templokidi yubakai Dios janu jiweakidi man yubakadiamisbuki. <sup>22</sup> Ja inun, tsuada naikidi yubakai janu Dios jiwea inun Diosun dasibi mekei tsaua xanen ibumiskidi man yubakadiamisbuki. Bepadamei man jaskamiswen taexun Diosun matu kupiaitian man nuitkaajaidaxanaii.

<sup>23</sup> Diosun jancha kenenibu yusinanamisbu inun fariseobu man bepadamemisbuun, man peidawa! Matun piti niswati tibi ichawaxun meken dabeti manchinwantan Diosbe nukunabu janchaxunika manchin betsa inanbiakubainmis jaska Diosun jancha Moisin yusini man shinamna jawada jawen pepawati inun jawen nulti inun jawen jancha betsa watima yunubianiken matubu jawen jiwekin man jatu uinmaismaki, kanekinan.

<sup>24</sup> Bekun keska unainsmapakin matunabun chakabu pexepishta shiu tiubiaken uinkin man jatu yusinmiski, jatu pewanun, iwananan. Jakia matun chakabu ewapa camello tiubiaken matun chakabu jawa shinanma man jawa uin e itan jeneismaki.

<sup>25-26</sup> Diosun janchakenenibu yusinanamisbu inun fariseobu man bepadamebuun, man peidawa! Matun beya chibankin matun kencha tibi bemakis besti dachukin man napan pewamisbuki. Jakia bepadamekin yumetsui yaushikin jamapai chakabu tibi wai matun shinan man pewaisbumaki. Fariseobu bekun keskabuun, ja dukun matun shinan chakabu uke medanua pewakin taewakanwen, matun kencha tibi man bemakisa dachukin man amis keska wakinan. Jaskatan man jiwei pekunkainxanaii.

<sup>27</sup> Janua matudan, Diosun janchakenenibu yusinanamisbu inun fariseobu bepadamemisbuun, junibun pewakin janu mawabu maiwamisbu mishki tanpe jawendua wanun, iwanan, bemakis juxupawen dapuxmisbuki. Jakia uke medan xau inun nami chapui pisi maiai mania tsuan meisbuma <sup>28</sup> keskai matudi bepadamekin yudabu uinmai bemakis jawendua bestitan padananankin matun shinan chakabu man jenekin pewaisbumaki.

<sup>29</sup> Janua matudan, Diosun janchakenenibu yusinanamisbu inun fariseobu bepadamemisbuun, Diosun jancha yuixunikabu inun yuda pepa betsabu mawanibun januxun ana jawen xau adukatsi maiwati tanpe pepa waxun jawen shinanmati jawendua wakin man dami waxun netanbaunmiski. <sup>30</sup> Ja inun, matun yuikin: “Nukun xenipabun Diosun jancha yuixunikabu tenanibu nukudi jiwexun nukun xenipabu nun jatu medabewama ikeanaii”, man imiski. <sup>31</sup> Jawa unanmabia yuikin: “En xenipabun Diosun jancha yuixunikabu tenanibuki”, man imiski, jawa dakeamadan. Jaskaken man detenan bababuki, jatu keskadan. <sup>32</sup> Matun xenipabun chakabuwakin taewanibuwen taexun man jabun bababun jabiaskadi wakin jatu menexunxankanwen.

<sup>33</sup> Jamen matudan, man padanan dunu pianan keskabuwen taexun Diosun matu kupijaidakin chi medan matu udean man jawawen taea paxatidubumaki. <sup>34</sup> Jaskawen taexun matu medabewanun ixun ea ikunwain Diosun jancha yuixunika inun unanepabu inun yusinanamis pepabu jau yusin benunbun en yunuxanaii. En jaska wabiaken matun jatu danankin betsabu tenankin bestibu cruzki jatu mastamakin betsabu matun ichati jiwe medanxun kusha kusha akin mae tibi anuxun man jatu ichakawakin bika tenemaxanaii. <sup>35</sup> Man jatu jaska waxanaibuwen taexun bebunkidi matun xenipabun Adánen bake betsa Abel juni pepa tenanixun januxun juni pepa betsabu jatuki sinatakin tenankubidankin jawen jenekin Berequíasin bake Zacarías na jibia Templo jemaintin anu chi tapu dapikea tenanibuwens taexun matudi Diosun kupixanikiki. <sup>36</sup> Chanima en matu yuiaii. Matun xenipabun jatu tenanibu keska shinankin jabun chakabuwens taexun na jabiavian Israelbu dasibi matube jiweabu Diosun jatudi kupixanikiki— jatu watan

*Jerusalén anuabuwen taea Jesús punu nukanikiaki, na janchadan  
(Lc 13.34-35)*

<sup>37</sup> yudabu uinbaunkin Jesúsun jatu yuikin:

—Jerusalén anu jiweabuun, Jerusalén anu jiweabuun, Diosun jancha yuixunikabu inun jawen jancha jatu bana bexunpakeaibu Diosun jatu yunubaya jatu danankin jatu tenankin matun xenipabun anibu keska wakin mishkiwen man jatu tsaka tsaka amisbuki. Takadan jawen bake nuxamis

keska wakin eandi matu medabewakin matu mekenun ika en jubianiken jaska shinanma ea danankin man ea jawa ninkamaki.<sup>38</sup> Uinkanwen. Matun mae matun mesti man mekenun Diosun matu jenexanikiki, ana Jerusalén mekeamadan.<sup>39</sup> Jakia janu en ana juaitian: “Yavé Diosun kushipaya juaidan”, ikin man yuidiamadan, man ana ea uinyuama ixankanai— jatu wabaini

## 24

*Jesús ana judiama jaska taxninunbadiai bebunkidi Jesúsun jatu unanmanikiaki, na janchadan*

(*Mr 13.1-23; Lc 21.5-24; 17.22-24*)

<sup>1</sup> janua Jesús Templo jemaintin anua kainkainaya nun jawen tsumabu jaki nukubainkin yuikin: “Na Dios kenwanti Templo dan, jabi jawendua benibin!” nun ikaya <sup>2</sup> nuku yuikin:

—Chanimaki. Na mishki jiwe ewapa jawendua wanibu man uiainan, jawenduabia jabianu mishki betsaa ana matsama dasibi ja mishki jiwe tekekin pudekin keyuxankanikiki— nuku wabaini

<sup>3</sup> Olivos Mati anu mapeketan Jesús tadi ka tsauken nun jawen tsumabun june yukakin:

—Ja mishki jiwe tekekin pudekin keyuxanaibu min nuku yuixudan, ¿mia yukapa? ¿min ma mai jidabi jawen jenei keyuaitian min ana juaxanai kemai taeai jaskai nun unantidumenkain? Nuku yuiwe— nun wa

<sup>4-8</sup> nuku yuikin:

—En ka en ana judiamaken eskai nuitapai taexanaibu Diosun yununi eskaxankanikiki. Xabakabi matu yuinun ninkakanwen. En kani ma en janu jua kemaya juni betsaa betsapa bexun yuikin: “En Diosun Katua Mesías Cristoki”, iwanan, yuda ichapabu jatu padanxankanikiki. Jau tsuabuda jaskadiakidan matu padanyamaxanun bun uindaxankanwen. Ja inun, yudabu nuitapai taeaitianan, nawabu nawa betsabube detenamei inun tsakanamea akeakeaibu mai pacha sakua akeakeaya bunijaidai nuitapaibun isin betsaa betsapa tenea akeakexankanikiki. Jakia tsakanamea akeakeaibukidi bana ninkai datei meseyamaxankanwen, na jaskaidan, isin betsaa beai mekin man uinxanai keska bebunkidi xabakabi en matu banabimaidan.

<sup>9</sup> Januxun man ea ikunwainbuwen taexun matu ichakawakin matu bestibu tibi tenankin mai jidabi anuxun ewen taea matuki sinatakin matu dananxankanikiki. <sup>10</sup> Matu jaska waibutian ichapabun ea chibain bexteketan januxun ikunwainbu betsabu danankin jatu achima akeakexankanikiki. <sup>11</sup> Janu jaska butian juni ichapabu bexun yuikin: “Diosun jancha matu yusinun ea ninkakanwen”, ikin chani chakakin yuda ichapabu jatu padanxankanikiki. <sup>12</sup> Ja inun, ikunwainbu ichapabu nawabun jatu ichakawachakayamaibun ikunwain betsabu ana bechipainamei nuiama ixankanikiki. <sup>13</sup> Matu jaska wabiaibun tsuanda ea chibakin jeneisma jatu mekekin en jatu paxawaxanaii. <sup>14</sup> Ja inun, betsadan, nawa dasibibun jau ekidi unanun bun en ana judiamaken yudabu mania akeakeabu dasibibu tsuabunda en kakapekidi jabun jatu yusinkubaunxankanikiki. Nawa xukua tibibun jau kakape ekidi ninkanun bun jatu yusinkin menetanaibuns en ana juxanaii.

<sup>15</sup> Jaska man unanxanun ja Dios danantan chakabu kenwainbukidi Diosun jawen jancha yuixunika Daniel yuia ninkatan bebunkidi keneni matu yusinun ninkakanwen— iwanan, ea en Mateon matu kenexunai tsuanda na jancha uinkin tapinkanwen, eska Jesúsun ana yuikubainkin:

—Danielin jaska waken Templo jemaintin anu jaska Diosun danamis ja dami itsa taxnia nia bechitan <sup>16</sup> ja Judea anuxun ikunwainbu ja mati keyatapa anu jau paxaxanunbunwen. <sup>17</sup> Ja inun, betsabu na mai bawa jiwe sapa xeni manaundi maniabudan, butuxun jawen jamapai bikatsis ibiakin jau jawen jiwe anu jikiama jau jawaida paxadiyanunbunwen. <sup>18</sup> Ja inun, ikunwain ja bai anu dayabudan, meshu medan jawen dakukuti bikatisis ibiai jau ana chintunbidanama jau jabiadi paxadiyanunbunwen. <sup>19</sup> Jamen ja yumainbutianan, tuyabu inun ja chuchu amamisbudan, nuitapa-jaidaxankanikiki. <sup>20-21</sup> Jaska inun, Diosun mai damiwani anua yumainbutian jaskaxanai anu tsuan jaska tenediamma inun ana teneama ixanai tenei dasibibu nuitapa chakayamaxankanikiki. Jaskaxanaiwen taea jau uitian inun juindukuntitian man paxayamaxanunbun Dios ea akin yukakubainxankanwen. <sup>22</sup> Ja jaskaibutian Diosun jawa nemakin tsua paxawatidumabia ma jawenabu jatu katuniwen taexun jatuwen nuikin jau dasibibu debui keyuyamaxanunbun yumainbutian Diosun badi ana chai wama chaima xekaxanikiki.

<sup>23-25</sup> Jabiatiandi juni betsabu juxun jatu padankin yuikin: “Eadan, Diosun ea yunua en jawen jancha yuixunikaki. Ea ninkaidakanwen”, ikaibun betsabundi yuikin: “Eadan, Diosun Mesías Cristo matu anu ana en juxuki”, ikaibu betsabun ninkatan jatu yuikin: “Uian. Nuku anu Cristo ma juxukiaki”, ikaibu ninkatan ana betsabun yuikin: “Uian. Janu ma juxukiaki, Cristodan”, ikaibun januxun jabun jamapai betsaa betsapaxanikiki. Jaskaibu ninkatan ikunwankin man kaneyamaxanunbun bebunkidi xabakabi ja padanananxanaibukidi en matu besuunbi bana bimai ninkakanwen <sup>26</sup> Jaskaken padanun, iwanan, matu yuikin: “Uian. Unu janu tsua jiweabumanu Cristo ma juaki”, ikaibun buyamaxankanwen. Ja inun, matu padanun, iwanan, matu yuikin: “Uian. Cristodan, nenu dintu medan juneaki”, ikaibu jawa ikunwanyamaxankanwen. <sup>27</sup> Jakia en matun Juchi Kayabi Iyua en ana eskakidanxanai matu yuinun ninkakanwen. Jawaida uke bukun kana bedi iki bakamis keskatan en ana juai dasibibun ea uinxankanikiki. <sup>28</sup> Janu yuda mawa daka pisi mayai xeten xetebidan janu ichai nuyabaunmis keskai ixankanikiki— iwanan,

*Nukun Juchi Kayabi Iyua ana juidan, eskakidanunbadikiaki, na janchadan  
(Mr 13.24-37; Lc 17.26-30, 34-36; 21.25-33)*

<sup>29</sup> januxun nuku yusinkin menediamma ana nuku yuikin:

—Yumain keyuaibu binukainaya nai anua dasibi betsaa betsapaxanikiki. Badi ana pexeama nukai taeaya uxedi ana chaxama meshuaya bishi nidi iki keyui dasibi nai tako tako iki chuduanyan <sup>30</sup> nai anua jaskai yudabun uin mai jidabi anua datejaidai kaxai keyubaunaibun en matun Juchi Kayabi Iyua xanen ibui kushipajaidai chaxajaida nai anua nai kuin medanua en juai uiainbun <sup>31</sup> Diosun jawen nai tsumabu yunua jawen trompeta chaan akin jawen katuabu mai jidabi anu manibaunabu jatu ichawaxankanikiki.

<sup>32</sup> Jaskaken higuera jiwen man unantidubukidi miyuiken ana matu yusinun ninkakanwen. Ji mebi jawen pei petakatan metubistan peiyai uinkin ma badi kemai man unanmis keskai <sup>33</sup> jawada en matu yuixu bechitan en samama juai man unanxanaii. <sup>34</sup> Jaska inun, yudabu dasibi jiwebaunabu yamadiabuma chanima dasibi en matu yuixu jaskai taexankanikiki. <sup>35</sup> Jakia jabiaskadiai nai anua inun mai anua Diosun damiwani jabu keyuxankanikiki. Jakia en janchawen bebunkidi en matu yusiainan, binuama menepakexanikiki.

<sup>36</sup> Janua jawatianda en ana juxanai tsuan unanmaki. Diosun nai tsumabun unanma inun ea Diosun baken en jawa unanmadiki. Jakia Epa Dios ja bestitun unainkiki.

<sup>37</sup> Jaska inun, Noé jiweken chakabui jiwekubainibu keskadiaibun matun Juchi Kayabi Iyua en ana chintunkidanxanaii. <sup>38</sup> Eskanibuki. Jawen nunutiwen Noé jikidiamaken yudabun pikin mabex aki ainyankin jatun bakebu beneyawakin Dioskidi jawa shinanma jiwekubainaibu Diosun yunua Noén chibain jawenabubes jawen nunuti menetan jikiaya <sup>39</sup> jenen jatu achiaya Diosun yunua ninkaisbuma jatunmebi debui jasai keyunibuki. Jabiaskadiai matun Juchi Kayabi Iyua en juai yudan kaianen ea shinankin manabumaken en jatu jaskadi wakin kupixanaii. <sup>40</sup> Ja inun, na jabiatian bai anu juni dabe dayaibu betsan ea chibamis iyukin betsan ea chibainsma Diosun nai tsuman jenebainxanikiki. <sup>41</sup> Ja inun, ainbu dabetan deneaibu betsan ea chibamis iyukin betsan ea chibainsma jenediabainxanikiki. Jaska wakin Diosun nai tsumabun bestibu jatu katuxankanikiki.

<sup>42</sup> Jaskaken jatianda en ana juxanai man unanmibia jawa chikishama ea manakakin jeneyamaxankanwen. <sup>43</sup> Ja inun, chanima jatiada yumetsu juai bebunkidi unankin jiwe ibun bextekatsi manatiduki, jau jikiyamanunan.

<sup>44</sup> Jaska keskadiai jatianda en matun Juchi Kayabi Iyua en ana juxanai tsuan unanmaken matunan, matun jiwea pewakin keyutan ea manakubainxanikanwen— iwanan,

*Jawen jancha jabun ninkaxanaibu inun ninkama ixanaibukidi Jesúsun jatu yusinikiaki, na janchadan*

*(Lc 12.41-48)*

<sup>45</sup> januxun nuku shinanmakin nun jawen tsumabu nuku ana yusinkin:

—Xanen ibu chai kakin jawen tsuma unanepa yunubainmiskidi matu yuinun ninkakanwen. Jawen tsuma betsabu pimakin jau jawen jiwe mekexunkubainun jatun xanen ibun jawen tsuma unanepa yunubainmiski.

<sup>46</sup> Janua xanen ibu ana chintunkidan jaska yunubainima axunkubainaya ja xanen ibu jaki nukutushitan benimajaidaxanikiki. <sup>47</sup> Chanima ja xanen ibun jawen tsuma dasibi jawen jamapai mekemaxanikiki, jawen jiwe inun, jawen bai betsabu betsapa inun, jawen inabu inun, jawen tsumabu betsadan.

<sup>48</sup> Jakia jawen tsuma shinan pema ja xanen ibun yunubainima shinanchakakin yuikin: “En xanen ibu yane juamaki. Uatian jui kaimenkain”, iki <sup>49</sup> dayanika betsabu juni inun ainbu ichakawai inun nawachakayamai paenkin <sup>50</sup> jatian jawen xanen ibu juai shinankin manama xanen ibu jui jikitushitan <sup>51</sup> manaka chakabube kupijaidaxanikiki, bepadamemisbubetan jau bika tenejaidai kaxai xeta yenx yenx anunan— iwanan,

## 25

*Miyuikin 10 chipashbukidi Jesúsun jatu unanmakin yusinikiaki, na janchadan*

<sup>1</sup> januxun miyui betsawen nuku ana yusinkin yuikin:

—Dios xanen ibui jaskaxanaikidi matu ana yusinun ninkakanwen. Chipashbu meken dabetibun jatun bin dekutan jatun jaibu beneyai anu jaki jabe nukui kakatsi jawen bene juai jaki nukutan iyuxunun ika bai puchinin jaki nukui ka maniabu keskanu Dios xanen ibuxanikiki. <sup>2-4</sup> Janua ja chipash meken besti bebunkidi unanepakin jatun bin dekua inun netsuai ana maneti bishtu betsabu jayabun janua ja chipash betsabu meken besti unanepama jatun bin dekua besti netsua jawa ana maneti jayabumaken

<sup>5</sup> janua ja juni jatuki nukuti washina binuaya manachakayamashinaibun

ja chipash meken dabeti uxabun <sup>6</sup> atimas juni ja manaibu yamenapun juai tsuanda ninkatan jatu bestenwankin unanxubima yuikin: "Jawen bene man manaidan, ma juikiki. Iyuxunditankanwen", jatu wa <sup>7</sup> dasibi bestenbaun jatun bin ma nuka kemai bin jene manenun, iwanan, <sup>8</sup> ja chipash meken besti unainsmapabun ja bebunkidi unanepabu jatu ea akin yuikin: "Jau nukun bin nukayamadianun matun bin jene nuku tusaxunyukanwen", jatu wabu <sup>9</sup> jakia ja chipash unanepabun jatu yuikin: "Jaskamaki. Matuna nun matu manexunken nukunadi netsui nukatiduki. Jaskakenan, buxun janua bin jene inamisbu anua bitankanwen, matuna ibubisdan", jatu wabu <sup>10</sup> ja unaismapabun bin jene bi jamakidi buabun jatumaki jatun jaibun bene juai ja chipash unanepabun itani jua jabe nawai jikiabun januxun beputi ma bepuabun <sup>11</sup> janua ja kachu ja chipash unanepama bexun jatu kenakin yuikin: "Xanen ibuun, nun mibe jikiai nuku bepenxunwen", akabu <sup>12</sup> jatu yuikin: "Jaskamaki. Man ea manakakin pewama ixuki. Man tsuabumenkain, en matu unanmaki", jatu waxanikiki— nuku watan,

<sup>13</sup> —Na miyuidan, ¿jaska man ninkaxumen? En matun Juchi Kayabi Iyua jatianda en ana juxanai tsuan man unanmawen taea tsuada ebe jiwekatsi iki unanepai jawa chikishama pepakunkaini Diosbe janchakin ea manakin uindakubainxankanwen— nuku watan

*Jawen tsuma pepabu inun chikishbukidi miyuiwen Jesúsun jatu yusinikiaki, na janchadan*

<sup>14</sup> januxun miyui betsawen Jesúsun nuku ana yusinkin:

—Dios xanen ibui jaskaxanaikidi betsawen matu ana yuinun ninkakanwen. Dios xanen ibuidan, juni chai ka keska ixanikiki. Juni betsawen matu ana yuinun ninkakanwen. Juno xanen ibuun, 5,000 min ea inanbainshina jawa chikishama dayai inananankin ana 5,000 jawen xanen ibu bixunkubainkin ichawaxunaya <sup>17</sup> ja unanepa bexmas 2,000 inanbainshina jawa chikishama dayai inananankin ana 5,000 jawen xanen ibu bixunkubainkin ichawaxunaya <sup>18</sup> jakia ja 1,000 besti inanbainshinadi chikishi jawa dayaxunkatsi ikama june mai pukinxun janu jawen xanen ibun pei adukin bepukin pewaxunshinken

<sup>19</sup> janua jatun xanen ibu badi ichapa jiwtani juxun jawen tsumabu jawen pei inanbainshina: "En pei ea jaskawanyamabumenkain uinun", iwanan, jatubetan pewakatsi jatu kena <sup>20</sup> ja 5,000 inanbainyama ja dukun juxun pei ichawaxunkubainshina bexun inankin yuikin: "Xanen ibuun, 5,000 min ea inanbainyamadan, inananankin ana 5,000 en mia bixunkubainshinadan, naki", akin 10,000 inanyan <sup>21</sup> jawen xanen ibun yuikin: "Min en tsuma pejaida kaneismaki. Eskadabes en mia yunubiabaini inananankin jawa benuama min pe mekekin kaneama ishianwen taexun ana daya ichapa en mia yunuxanaii. Jaskawen taea natian ebe benimachakayamadiwe", akaya <sup>22</sup> janua ja 2,000 inanbainyamadi ja kachu jikixun pei ichawaxunkubainshina bexun jantsidi inandiakin yuikin: "Xanen ibuun, 2,000 min ea inanbainyamadan, inananankin ana 2,000 en mia bixunkubainshinadan, naki", akin 4,000 inanyan <sup>23</sup> jawen xanen ibun jadi yuikin: "Min en tsuma pejaida kaneismadiki. Eskadabes en mia yunubiabainyama inananankin jawa kaneama min pe mekekubainshinawen taexun ana daya ichapa en mia yunuxanaii. Jaskawen taea natian ebe benimachakayamadiwe", akaya

<sup>24-25</sup> janua ja 1,000 inanbainyama jadi jawen jenei jikixun jawen xanen ibu yuikin: “Xanen ibuun, naki, min peidan. Miwen datekin min pei benukatsi ikama bibaini kaxun mai pukinxun en mia aduxunyamaki. Dayakin jawa miban banamabia min ichawamiski. Janua jexe sa akamabia min ichawadiamiski. Min juni meseken miwen datekin min pei en mia aduxunyamaki”, akaya <sup>26</sup> januxun xanen ibun yuikin: “Min en tsuma chakabu chikishchakamaki. Chanima dayakin jawa miban banaumabia en ichawamiski. Ja inun, jexe sa akamabia en ichawadiamiski. <sup>27</sup> Ja unantan ɿjaskakin banco anu cuenta watan inananankin en pei min ea aduxunama iyamamen, ibubis juxun en pei xekekunkainai en biyui kanunan?” atan <sup>28</sup> jawen tsuma betsabu mapuabu jatu yuikin: “Ja chikishin pei ja 1,000 mebintan ja 10,000 jaya inankanwen”, iwanan, <sup>29</sup> ana jatu yuikin: “Tsuada na en tsuma pepa keskatun jawada jaya pe mekeaa unantan ichapa jayawen manakukin ana ichapa en inanxanaii, binumakinan. Jakia tsuada na en tsuma chikish keskatun jawada jaya pe mekeama ja eskadabes jaya unantan en mebinxanaii. <sup>30</sup> Jaskawen taexun meshujaida anu janua bika tenei kaxai xeta yenx yenx axanaibu anu na en tsuma chakabu udentankanwen”, jatu waniki—iwanan,

*Mai jidabi anu jiweabu unantiwatan Jesúsun jatu kupixanaikidi jatu yusinikiaki, na janchadan*

<sup>31</sup> na miyuiwen nuku ana yusin pewakin:

—En matun Juchi Kayabi Iyu Xanen Ibu chaxajaida jui en nai tsumabube juxun yudabu jancha betsaa tibi xukuabu unanti watanun ika Xanen Ibun tsauti pepaki en tsauken <sup>32-33</sup> en nai tsumabun ea jatu ichawaxunkin keyuxunxankanikiki. Januxun jaska chaxuwan mekenikan jawen chaxuwan paxkamis keska wakin dasibi enabu chaxuwan kayabi keskabu en yusiudi jatu ichawatan ja enabuma chaxuwan kayabi keskabuma en yusmaudi en jatu ichawadiaxanaii. <sup>34</sup> Janua en xanen ibujaidatun enabu en yusiudi en jatu nichian mapuabu jatu yuikin: “En Epan mai damiwakin taewakin matu jabe jiwemakatsi matu katunixun natian matu ma kenaikiki. Jabe jiwedi bekanwen, matu duawai benimaikikidan. <sup>35</sup> Matunan, en buniaya man ea pimaniki. En unpax manuaya man ea unpax amaniki. En chaikaa jua jani en uxatima yumanyan ea jawa unanmabia janu uxati ea inankin man ea duawaniki. <sup>36</sup> En tadiumaken man ea tadi betsaa inaniki. En isin teneaya man eki bakin man ea shinan chankanwaniki. En bichiti jiwe medan nikanka man eki bakin man ea shinan chankanwaniki”, en jatu waya <sup>37</sup> januxun jabundi ea kemakin: “Xanen Ibuun, jaskamaki. Min buniaidan, ɿjanixun mia uinkin nun mia pimanimen? Min unpax manuaidan, ɿjatian nun mia amanimen? <sup>38</sup> Mia unanmabia duawakinan, ɿjatian janu uxati nun mia yununimen? Min tadiumaken ɿjatian nun mia tadi betsaa inanimen? <sup>39</sup> Min isin teneaidan, ɿjatian nun mia uinkin nun mia shinan chankanwanimen? Min bichiti jiwe medan nikenan, ɿjatian nun miki bai kaxun nun mia shinan chankanwanimen?” ea wabu <sup>40</sup> eandi jatu yuikin: “Chanima en matu yuiaii. Na dasibi en betsabu inun en puibudan, jawaumabubiaken nuikin man jatu medabewakubainmiski. Jatu jaska wakin chanima eadi man ea duawakubainmiski”, iwanan, jawen yusiudiabu yui keyutan

<sup>41</sup> januxun jawen yusmaudiabu mapuabudi yuikin: “Matu man chakabubudan, man enabumaki. Tudi budikanwen. Jaskawen taea matunamabia janu chi nukaisma anu diablo Satanás inun jawen nai tsuma chakabubube yumankin tenekubainxanaibu anu matudi budikanwen. <sup>42</sup> Matubunan, en buniaya man ea pimama iniki. En unpax manuaya man

ea amama iniki. <sup>43</sup> En chaikaea jua jani uxatima yumanyan janu uxati ea yunukin man ea duawama iniki. En tadiuma yumanyan man ea tadi betsa inanma iniki. En isin tenei yumanyan ea uin man eki bama iniki. En bichiti jiwe medan nia yumanyan man eki bamadi iniki”, en jatu wa <sup>44</sup> jabundi ea yuikin: “Xanen Ibuun, jania min jaskaya ɿjatian mia medabewakin nun mia duawama inimen?” ea wabu <sup>45</sup> eandi jatu yuikin: “Chanimá en matu yuiaii. Na dasibi en betsabu inun en puibu jawa jayamabiabuwen nuiama ewendi man nuiama ikubainyamabuki”, en jatu waxanaii. <sup>46</sup> Januxun ja yuda chakabubu jatu kupikin chi medan jatu yumanwankin enabu pepabu besti jatun pepawen manakukin ebe en jatu jiwekuinmaxanaii, ikibi imakinan—nuku waniki.

## 26

*Jesús achixanun ika yubakanibukiaki, na janchadan*  
(Mr 14.1-2; Lc 22.1-2; Jn 11.45-53)

<sup>1</sup> Januxun nun jawen tsumabu jaska dasibi Jesúsun nuku yusin menetan nuku ana betsya yuikin:

<sup>2</sup> —Ja Pascuatiinan, Egipto anuxun Diosun yunua debuwanika nai tsuman nawan bakebu tenankin nukun xenipabu dunkebaini shinamatitinan, uxa dabe ma kemai misi xaxama nun pimis man unaaiin. Jaska inun, en matun Juchi Kayabi Iyua ea tenanun ixun cruzki ea mastakatsi ikin samama ea achitan ea jatu inankatsis ikanikiki— nuku waya

<sup>3</sup> jabiatandi Diosbe nukunabu janchaxunika xanen ibubu inun judio mae xanen ibu betsabu bui Diosbe nukunabu janchaxunika xanen ibujaida Caifásin jiwe anu dasitan icha <sup>4</sup> jaska waxun Jesús bepadantán tenantima yubakaibu <sup>5</sup> betsan jatu nemakin yuikin:

—Pascua nawaibutian meyamayuxankanwen, nukunabu nukuki sinatai bedukubauntidubukidan, betsatian nun atidumenkainan— jatu wa jaska shinainbun

*Ainbun Jesúski xeni maukanikiaki, na janchadan*  
(Mr 14.3-9; Jn 12.1-8)

<sup>6</sup> Jerusalén chaíma Betania anuxun Simón yudaki chaminí Jesúsun kaya waimatun jawen jiwtanxun <sup>7</sup> Jesú pimaya ainbu betsan nenkati bishtu juxupaki xeni inin jas kadujaida bexun tesketan Jesúsun buxkaki mauka jaki jababainaya <sup>8</sup> nun jawen tsumabu jatiditun inin mayai xetekin uin jaki sinatai yuinamei:

—Jaska wakin ja xeni kadujaida jamen chakawakin maukaxumen? <sup>9</sup> Jatu inanxun jawen pei midima bitan nuitapaibu medabewatibin!— iki ainbuki nun ja ikaya

<sup>10</sup> nun jaskaibu Jesúsun ninkatan nuku yuikin:

—Na ainbun ea duawai ɿjaskai man jadi janchai? <sup>11</sup> Nuitapaibu matube jiweabu man jatu duwapaketiduki. Jakia eadán, jawenchains man ea duwapaketidumaki. <sup>12</sup> Jaskaken eki xeni ininipa maukakin na ainbun en mawadiama bebunkidi en yuda ea pewaxuki, jau jawama ea maiwashadaxanunbunan— itan <sup>13</sup> —Xabakabi chanima en matu yuiaii. Mai jidabi anuxun kakape ekidi chanibaunkin na ainbun ea axu shinankin yuidiabaunxankanikiki, tsua jau jakimayamaxanunbunan— nuku waya

*Judasin Jesús jatu achimaxanun ika jatube yubakanikiaki, na janchadan*  
(Mr 14.10-11; Lc 22.3-6)

<sup>14</sup> janua Jesúsun 12 tsumabu betsa paxkakain Judas Iscariote Diosbe nukunabu janchaxunika xanen ibubube yubakanun ika kaxun <sup>15</sup> jatu yukakin:

—Jesús en matu achimayadan, ¿jati pei man ea inantidumen?—jatu wa jabu benimakaun jabun 30 pei jexe plata kadujaida inanbu <sup>16</sup> jatube jaskatani jui nukuki ana nukutan: “¿Jatian janixun Jesús en jatu achimatidumen?” ikin shinankubainaya

*Badi kaya Jesúsun jawen tsumabubetan jawen shinanmatijatu pimanikiaki, na janchadan*

(Mr 14.12-25; Lc 22.7-23; Jn 13.21-30; 1 Co 11.23-26)

<sup>17</sup> ja badi Pascua besi taemisbutian jabianudi misi xaxama pikubainmisbutian ikaya, januxun nun jawen tsuma betsabun Jesús yukakin:

—¿Jani kaxun nawakin badi kaya piti bawakin mia pewaxuntanpa?— akabu

<sup>18</sup> Jesúsun jawen tsuma dabe nichinkin yuikin:

—Bui Jerusalén anu jikitan ja juni betsa nun unain anu jawen jiwe anu kaxun yuikin eska watankanwen: “Nukun yusinan nuku yuixudan, ¿mia yuipa? Ma en mawa kemaxun min jiwe anuxun Pascuatian nawakin shinanmati piti en tsumabubetan pinun ika juikiaki. ¿Janixun bawakin pewaxunpa?” akin ea yuixuntankanwen— jatu wa

<sup>19</sup> jawen tsumabu kainbaini Jerusalén maewan anu jikitan jaska Jesúsun jatu yuixu jiwe ibu yukatan januxun nawakin Pascua piti bawa menetan chintunbaina

<sup>20</sup> ibai ma badi kai meshuaya Jesús nun jawen 12 tsumabube kai jikitan tapu anuxun nun jatubetan piaibun <sup>21</sup> Jesúsun nuku yuikin:

—Chanima en matu yuiaii. Jadatutunda man ea jatu achimai kaii— nuku wa

<sup>22</sup> nuku jaska wai ninkatan nun jawen tsumabu juinti nishmai keyutan yukakin:

—Xanen ibuun, ¿jabia en eamen?— nun iaketanyan

<sup>23</sup> Jesúsun nuku yuikin:

—Na jabias kenchaki ebetan misi pukuxun man piaitunan, jatun ea jatu achimai kaikiki. <sup>24</sup> Jaska ekidi kenenibu chibain matun Juchi Kayabi Iyua en jaskai mawai kaii. Jakia ja junin ea jatu achimai kaidan, pemajaidaki! Jaskaken ja juni kaianma inidan, pepakeanaii— nuku waya

<sup>25</sup> Jesús jatu achimai kabiakatsi Judasin bepadankin yukakin:

—Yusinaan, ¿jabia en eamenkaintsa?— aka

Jesúsun yuikin:

—Jawaikika! Jabiadi min yuiaii— akaya

<sup>26</sup> nun piaibun Jesúsun misi betsa tsumaxun Dios kushipa yukatan tunketan inankin nuku yuikin:

—Na misi betsadan, en nami keskaki. Bibaunkin pikanwen— nuku wa tude betsa bitan metex atankin nun pibaunaibun

<sup>27-28</sup> januxun kencha vino mata tsumaxun Dios kenwandiatan nuku inankin yuikin:

—Yuda ichapa medabewakin jatun chakabu Dios jatu buamai en mawaya en jimi ea ikunwainbu jatu dasibi jabaxunxanikiki. Na vino en jimi keskaki, jawen en yubakai bena shinanmatidan, akanwen— nuku wa bitan tusa nun nuxabaunaibun

<sup>29</sup> —Chanima en matu yuiaii. En Epa Diosbe xanen ibui en ana judiama na uva vino en ana matubetan ayuama ixanaii. Abaunkanwen— nuku waya

*Pedro jaki dakei kaikidi Jesúsun yuinikiaki, na janchadan  
(Mr 14.26-31; Lc 22.31-34; Jn 13.36-38)*

<sup>30</sup> jabianuadi Salmos Davidin keneni betsa betsapa nukun juiwen nawai menetan janua ma Judasin nuku paxkabainken Olivos Mati anu nuku iyuxun <sup>31</sup> Jesúsun nuku ana yuikin:

—Jawen jancha yuixunika ekidi Diosun yuikin: “Chaxuwan jatun mekenika en tenanyan jawen chaxuwan datei paxai keyuxankankikiki”, aka ninkatan keneniken na jibia meshutian jabiaskadiai matu dasibibun ea shinanma man ea jenebaini paxadaii, chaxuwan keskaidan. <sup>32</sup> Jakia ea tenanbiabu ana bestentan janu matuki nukunun ika bebunkidi Galilea anu en matu kaxunxanaii— nuku waya

<sup>33</sup> Pedron yuikin:

—Miwen datei dasibi paxai keyuaibun eanan, en mia jawa jenekin putamaki— ikaya

<sup>34</sup> Jesúsun Pedro yuikin:

—Jaskamaki. Chania en mia yuiaii. Na jibia meshu medan takada keudiamaken: “En ja unanmaki”, iki dabe inun bestiki eki dakekin min yui kaii— aka

<sup>35</sup> ninkamas jancha kushipawen Pedron ana yuikin:

—Jaskamaki. En mibe mawabiai kai jaskai en miki dakeamaki— ikaya nun jawen tsuma dasibibun shinanma jabiaskasdi nun yuidianibuki.

*Getsemaní anu ka Jesús Diosbe janchanikiaki, na janchadan  
(Mr 14.32-42; Lc 22.39-46)*

<sup>36</sup> Janua Jesús nun jawen tsumabube kai miban xuku betsa jawen kena Getsemaní mishkiwen kenenibu anu jikitan nuku yuikin:

—Nenu jabianu tsauyukanwen, en Diosbe janchai kaidan— ikainkin

<sup>37</sup> Pedro inun Zebedeon bake dabe Santiago inun Juan besti iyui kai punu nuka jawenchains juinti metexekei niti itan <sup>38</sup> jatu yuikin:

—En yudawen mawakin en matu xunubainxanai shinan en punu nukajaidaki. Na jabianuxun uxama ea manakanwen— jatu wabaini

<sup>39</sup> janua kai chaima ka beua maiki beti ixun Dios yukakin:

—En Epa Diosuun, jamapai dasibi min atidu en unaiin. Jau ea tenanya manunbun min jatu nematidubia jaska en shinainwen akama min shinan bestiwen ea axanwen— atan

<sup>40</sup> janua jawen tsuma dabe inun besti anu chintunkidan uxabuki nukutan jatu datekin Pedro yuikin:

—¿Jawai man uxamen? ¿Uxama hora bestichai bedu mestenwantan man ea manatidumamen? <sup>41</sup> Chania matun shinan pebia matun yuda babuwen taea man punu nukaya matuki chakabu jikia man kaneyamanunbun Diosun jau matu medabewanun uxama jabe janchakanwen— jatu awani

<sup>42</sup> ana Diosbe janchai kaxun yuikin:

—En Epa Diosuun, en yumanyamanun ea unanti wakin min jenekatsi ikamadan, peki. Min shinanen besti ea axanwen— atan

<sup>43</sup> ana jua ma uxa paen jatu achia uxabuki nuku wani <sup>44</sup> jawa jatu yuiama ana chintunkain Diosbe janchai kaxun jabies jancha yuitan <sup>45</sup> janua jawen tsumabu anu ana juxun jatu yuikin:

—¿Jaskaida man uxa ninkama uxa bestia man juindukunsi ikanai? Uinkanwen. En Diosun bake matun Juchi Kayabi Iyua juni chakabubun ea achi bei ma kemakanikiki. <sup>46</sup> Benidikanwen, nun kanunan. Ea jatu achimai jatube ma juikiki— jatu wai

*Jesús unanmamabain achinibukiaki, na janchadan  
(Mr 14.43-50; Lc 22.47-53; Jn 18.2-11)*

<sup>47</sup> Jesú jancha menediamaken Diosbe nukunabu janchaxunika xanen ibubu inun mae xanen ibubu betsabun jatu yunua juni ichapa nupe chipayabu inun kushati jiyabube Jesúsun 12 tsuma betsá Judas Iscarioten jatu iwekin <sup>48</sup> Judasin bebunkidi jatu yubakin yuikin:

—Ja en tantsu akaidan, jaki. Achixun iyukanwen— jatu abidanxuwen taexun

<sup>49</sup> Judas Iscariote Jesúski nukutushikin yuikin:

—Yusinaan, en miki nukuyuiai— iwanan, tantsu akaya <sup>50</sup> Jesúsun yuikin:

—Peki, en jaibuun. Ea jaska wanun ika min jatube yubakakidanaidan, ea jatu amadiwe— akaya —Jakiaki. Akanwen— ibain achiaibun

<sup>51</sup> Jesúsun tsuma betsan jatu mepanmanun ika nashui ikain jawen nupe chaipa sitan Diosbe nukunabu janchaxunika xanen ibujaidatun tsuma mapexpaikin maebain paxteaya <sup>52</sup> Jesúsun jawen tsuma nemakin:

—Ana jatu meama min nupe ana jawendi usunwen. Tsuabuda nupe chaipawen detenameaibu jabiawendi mawaxankanikiki. <sup>53</sup> Na ea eska waibu en Epan jau ea medabewanun en yukaya samama jawen nai tsumabu 12,000 ea medabewamai jawaida nidi ibidan ea axuntidubu ¿min unanma-men? <sup>54</sup> Jakia Diosun jaska waya jawen jancha yuixunikabun ekidi keneama inibudan, ea jaska wabuma ikeankanaii— iwanan,

<sup>55</sup> mapuabu uinkin jatu yuikin:

—Uatian xaba tibi Templo jemaintin anuxun en matu yusinkubainai man ea xabakabi achiama ikubainshinabuki. ¿Jaskai natian meshu medan yumetsu achimisbu shinain jawen deteti nupe chaipaya inun jawen kushati jiya man bekanxumen? <sup>56</sup> Eskawen taea man ikaii. Diosun jancha bebunkidi ekidi kenenibu jaska yuiniwen taexun man ea achiaii— jatu waya janua dasibi nun jawen tsumabu datekin Jesú besti jenebaini paxai nun junei keyubainaibun

*Xanen ibubu Junta Suprema anu Jesú iyunibukiaki, na janchadan  
(Mr 14.53-65; Lc 22.54-55, 63-71; Jn 18.12-14, 19-24)*

<sup>57</sup> janua achitan iyukin Diosbe nukunabu janchaxunika xanen ibujaida Caifásin jiwe anu janu mae yununika xanen ibu betsabu inun, Diosun jancha kenenibu yusinanamisbu jabu dasibibu jabu dukun bua icha maniabu anu Jesú iyukin janu bichiaibun <sup>58</sup> janua Pedro datei benanta kakin chibankubaina Caifásin jiwe jemaintin mishki kenebaunibu anu jikidiatan ¿jaska wakanimenkain? uinun ika Templo mekenikabube tsauxun uiyanan

<sup>59</sup> januxun Diosbe nukunabu janchaxunika xanen ibubu inun Junta Supremabu dasibi ichaxun Jesú jau tenanunbun jakidi chakabujaida yuiaibuwen chani jancha ikun keska watan jawen unanti watan tenankatsi benai maniabun <sup>60</sup> juni betsá betsapabun jakidi chani chitebiakin jakia juni dabetun jabias chani yuiabumaken atimas juni dabedi jaki chani chakakin <sup>61</sup> yuikin:

—Nukun ninkakinan, Jesúsun eska yuiai nun ninkashinaki. Matu yuinun: “Na mishki Templo junibun anidan, tekekin pudekin keyutan uxá dabe inun besti kaya junibun akamaken ana en benixanaii”, ikai nun ninkashinaki— jatu wabu

<sup>62</sup> jaska waibu ninkabaikin Diosbe nukunabu janchaxunika xanen ibujaida Caifás namakis dasibube tsaua benitan nixun Jesú yukakin:

—Na junibun mikidi chakabu yuiaibudan, ¿miadan, jaskai min jatube kemanameamamen?— aka

<sup>63</sup> Jesús pes jawa yuiama niken Diosbe nukunabu janchaxunika xanen ibujaidatun ana yuikin:

—Dios jiweatun mia ninkaya jau min chani chakayamanun en mia yunuai, chanima nuku yuiwe. ¿Jabia min miamen ikaidan, min Diosun bake nukun mekenan Mesías Cristodan?— aka

<sup>64</sup> Jesúsun yuikin:

—Jabiadi min yuiaii. Jamen ean en mia yuiaidan, en Epa Dios kushipajaidatun yusiudi en tsaua matun Juchi Kayabi Iyua nai kuinwen en juai man ea uinxanaii— akaya

<sup>65</sup> Diosbe nukunabu janchaxunika xanen ibujaida jaki sinatajaidakin jawen sanpu tadi ushnitan yuikin:

—Dios ichaikiki. Ana jatida janchai en ninkakatsi ikamaki. <sup>66</sup> Na jaska janchayadan, ¿jaskada jakidi man shinain?— jatu wa

jabun yuikin:

—Dios ma ichawen taexun jau tenan unbunwen— iake iaketan

<sup>67</sup> ichakawakin taewakin betsabun besuki kemu michukin kushaibun betsabundi tanpais akin <sup>68</sup> kaxe wakin yuikin:

—Min Diosun Mesías Cristodan, ¿tsuan mia kushaimenkain? unantan nuku yuiwe— akaibun

*Pedro Jesúski dakei kaikidi yuividana jaskanikiaki, na janchadan*

*(Mr 14.66-72; Lc 22.56-62; Jn 18.15-18, 25-27)*

<sup>69</sup> janua jemaintin anu Pedro tsaua xanen ibu dayaxunmis ainbu betsan bechitan yuikin:

—Miadan, Jesús Galilea anuabe min nimiski. En mia unaiin— aka

<sup>70</sup> Pedron padankin jabube ichabu bebunxun yuikin:

—Jaskamaki. Ja min jadi yuiaidan, en ja unanmaki— abaini <sup>71</sup> janu jemaintin kenekauana jikiti xui anu ka niken ainbu betsandi janu nia uinkin jatu yuikin:

—Ja junidan, Jesús Nazaret anuabe nimiski— jatu waya

<sup>72</sup> januxun Pedron ana jatu yuikin:

—Jaskamaki. Diosun ea kupituduwen taea en chani chakamaki. Ja junidan, en ja unanmaki— jatu wa

<sup>73</sup> janua jabianu manixun betsabundi Pedro uindiakin jaki kemaxun yuikin:

—Chanima Galilea anuabu min jawen janchaki. Min Jesúsun tsuma betsaki. Jadi man janchamisbin nun mia ninkai— akabu

<sup>74</sup> januxun Pedron jatu ana padankin yuikin:

—Ja juni man yuiaidan, en ja unanmajaidaki. En chani chakayadan, jau Diosun ea kupinunwen— jatu waya

jakimamadi takada keuai <sup>75</sup> ninkatan jaska Jesúsun Pedro yuikin: “Dabe inun bestiki: ‘En ja unanmaki’, akin takada keudiamma min yuixanaii”, abidana Pedron shinain taxnikain kaxa chakayamanikiaki.

## 27

*Pilato anu Jesús iyuaibun Judas eiskain tenexeketan mawanikiaki, na janchadan*

*(Mr 15.1; Lc 23.1-2; Jn 18.28-32)*

<sup>1</sup> Janua penaya Diosbe nukunabu janchaxunika xanen ibubu inun judio xanen ibu betsabu icha jaska wakin Jesús tenantikidi yubakaxun <sup>2</sup> Jesús menexxun romano xanen ibu Pilato anu iyuaibun

<sup>3</sup> Judasin jatu achimabidana Jesús tenankatsi ikaibu uinkin unankin shinanin jawen nuikin ja 30 pei jexe Diosbe nukunabu janchaxunika xanen ibubu inun xanen ibu betsabun inanshinabu ana jatu inanun, iwanan, <sup>4</sup> jatu yuikin:

—Jesús juni pepabiaken jau man tenanun chakabu shinakin en matu achimashinaki. Na pei man ea inanshinadan, en ana jaska jayakatsi ika-maki—jatu wa

jawen pei ana bikatsi ikama jabun Judas yuikin:

—Min chakabushina nun jawen nuiamaki. Min nuku jaska wamashinadan, minaki—akabu

<sup>5</sup> janua uinti nishmajaiddai keyutan janu Templo jikiti xui xexekaian nitan ja pei jexe putakin sa atan kainkaini ka dispiwen tenexeketan dunua mawanikiaki.

<sup>6</sup> Ja pei jexe sa abaina Diosbe nukunabu janchaxunika xanen ibubun tupitan yuinamei:

—Na peiwen juni achishinxun nun jatu tenanmai kaiwen taexun Dios ken-wankin janu inankuinti bauki nun jaska jaki nanetidumaki, ja pei jimiwen iduma keskadan—itan

<sup>7</sup> ¿jawen jawa jaska wananaxpa? ika yuinamei yubakakin shinantan Jerusalén anu bai bea mawabu medibi janu jatu maiwati wanun, iwanan, mai kenti wanikan bai ja 30 pei jexewen bikin ibu wanibukiaki. <sup>8</sup> Jaska wanibu na jabiatiandi kenakin: “Jimi Baiki”, nun wamiski. <sup>9-10</sup> Jaska Diosun jancha yuixunika Jeremíasin bebunkidi jatu yuikin: “Jabun 30 pei jexe bixun mai kenti wanikan bai bikin jaska Israelbun jawen kadu yubashina jawen pakakin ibu waxankanikiki, akin Diosun ea yuia en matu yuixuki”, jatu waxun keneniki. Jabiaskadi kaneama menekin Judasin peiwen bai bikin ibu wanibukiaki.

*Pilaton jau Jesús unanti wanun janu iyunibukiaki, na janchadan  
(Mr 15.2-20; Lc 23.3-5, 13-25; Jn 18.33-19.16)*

<sup>11</sup> Janua romano xanen ibu Pilato anu Jesús iyuabu kainkidan tsauxun yukakin:

—¿Miadan, min judio xanen ibubu binu keyuamen?— aka  
Jesúsun yuikin:

—Jawaikika! Jabiadi min ea yuiaii— akaya

<sup>12</sup> Diosbe nukunabu janchaxunika xanen ibubu inun xanen ibu betsabun jakidi yuikin chani tibi chiteaibun Jesúsun jawa yuialma niken <sup>13</sup> Pilaton ana yukakin:

—Ja mikidi betsapta betsapa chakabu yuiaibudan, ¿min jawa ninkamamen?— aka

<sup>14</sup> Jesúsun jawa jancha betsapta yuialma niken:

—Jabaa! ¿Jaskai janchamamen? —itan Pilato jadakidi shinantimawa

*Jesús jau tenanunbun Pilaton yununikiaki, na janchadan  
(Mr 15.6-20; Lc 23.13-25; Jn 18.38-19.16)*

<sup>15</sup> romano soldadobun jatu achixun bichimabu badi tibi ja Pascua nawaibutian jau bestichai taxninun ja romano xanen ibu Pilaton beyawen taexun maen katuaya jatu kainmaxunpakemisken <sup>16</sup> jabiatiandi juni betsaptenameti unan keyuai Barrabás achixun bichimabun <sup>17-18</sup> janua Diosbe nukunabu janchaxunika xanen ibubu Jesúski chani chakai jaki sinatakin jaska waxun maematima maemanun ixun iyuabu Pilaton unankin mae anua dasibi ichabu jatu yukakin:

—¿Jadatu man bechipaiai, ja en matu taxnimaxunaidan? ¿Barrabásmenkain? ¿Jesús Diosun Katua Mesías kenamisbudaka?— jatu wai <sup>19</sup> janu Pilato gobernador tsauti anu tsaudiaken jawen ainen jancha bumakin yuikin:

—Jesúswen taea en nama chakashinaii. Jaskawen taexun ja juni pepa jawa jatubetans jakidi chakabu yuikin jawa yunuyamawe— aka juxun jawen tsumapan yuixunbiaya

<sup>20</sup> Pilato ninkamama june Diosbe nukunabu janchaxunika xanen ibubu inun xanen ibu betsabun yudan kaian Jesúski jatu sinatajaidamakin yunukin:

—Barrabás jau nuku taxnimaxuntan Jesús jau jatu tenanmanun yunukanwen— jatu waibu mae anuabun ninkaibun <sup>21</sup> Pilaton ana jatu yukakin:

—Ja juni dabeledan, ¿jadatu man bechipaiai? jawa meama ja en matu taxnimaxunaidan— jatu wa

jabundi Pilato yuikin:

—Barrabás nuku axunwen— iake iakeaibun

<sup>22</sup> Pilaton ana jatu yukakin:

—Jesús Mesías Cristo kenamisbudan, ¿jadan, jaska wapa?— jatu wa dasibibun yuikin:

—Cruzki nuku mastaxunwen— iake iakeaibun

<sup>23</sup> ana Pilaton jatu yukakin:

—¿Natunan, jawa chakabuwashinamen?— jatu wa ana unanxubima jancha kushipawen yuikin:

—Cruzki nuku mastaxunwen— jawenchains ikaibun

<sup>24</sup> Pilaton jancha jawa ninkama ana keketikubainaibun jabun shinan jatu mae wamatiduma Pilaton unankin jatu unanti wanun, iwanan, jawen soldado yunua unpax bexuan yudan kaianen bedubi mepanukin jatu yuikin:

—Na juni pepa en jatu tenanmakatsi ikama matu unanmanun ika en mepanuaii. Matun man jaska yunuai bestiwen taea mawatiduki— jatu wa

<sup>25</sup> ja yuda dasibibun yuikin:

—Peki. Nuku inun nukun bakebun nun yunuaiwen besti jau mawanunwen— akabu

<sup>26</sup> januxun Pilaton jatu daewakin Barrabás jatu taxnimaxuntan Jesús jatu kusha kusha amatan jau jiki mastatanunbun jawen soldadobu yunua

<sup>27</sup> januxun xanen ibu Pilaton jiwe ewapa jemaintin anu soldadobun Jesús iyuxun soldado jabus jaki xukui kexebauntan <sup>28</sup> januxun Jesúsun tadi pekatan kaxe wakin xanen ibun bemakia tadi tashijaida Jesús sawematan

<sup>29</sup> janua muxa maiti waxun maimatan jawen meken yusiudi ji sidi jawen xanen ibun mestenti keska tsumamatian janua jaki kaxei ja bebun danti itan yuikin:

—Judío xanen ibu kayabidan, min miaki— atan atankin

<sup>30</sup> jaki kemu michukin jabias ji sidiwen tsumabuwuen makush makush atan <sup>31</sup> kaxe wai jaki beyusi keyutan bemakia tadi tashijaida pekatan jawen tadi kayabis sawemabainkin cruzki mastanun, iwanan, jaki mastai kanun, iwanan, cruz iamatan xadamabainkin iyuaibun

*Cruzki Jesús mastanibukiaki, na janchadan*

*(Mr 15.21-32; Lc 23.26-43; Jn 19.17-27)*

<sup>32</sup> janua juni betsa Simón jawen mae Cirene anua juaiki nukuxun Jesúsun cruz jau iaxunyubainun soldabobun yunua iaxunbainaya

<sup>33</sup> Gólgota anu Jesús jadi iyukin mapematan, jaska yuidan, Buxka Xau Mati anudan, <sup>34</sup> vino isin nemati dau muka jusia amabu metan danankin akamaken

<sup>35</sup> januxun cruz bexuki Jesús mastaxun nichintan januxun soldadobun jawen beyustiwen maemanankin jawen tadi paxkanun iwanan: “¿Tsuán dukun jawen tadi bimenkain? Akanwen”, ikin Jesúsun tadi paxkakin mene-<sup>36</sup>tan janua jau mawanun Jesús kexea tsauxun uiainbun <sup>37</sup>jabatiandi jawen unanti ji bexa tuaxki kenekin: “Nadan, judiobun Xanen Ibu Jesúski”, Pilaton aka buxun Jesús mamaki mastadiabun

<sup>38</sup> jabianudi jabe juni yumetsu dabedi cruz dabeki mastaxun betsa jawen yusiudi nichinxun betsa jawen yusmaudi akabun <sup>39</sup> janua juni betsabun ichakin dainbaini budi budi ikin <sup>40</sup>yuikin:

—Uinwen. “Dios kenwanti mishki Templo tekekin pudekin keyutan xaba dabe inun besti kaya en ana benixanaii”, min ishianki. Min ja kushipa jayadan, jaska min Diosun bakemenkain ja cruz anua mimebi paxai butudiwe, mawamadan—akaibun

<sup>41</sup> Diosbe nukunabu janchaxunika xanen ibubu inun, Diosun jancha kenenibu yusinanamisbu inun, judio xanen ibu betsabudi Jesúski kaxekin yuikin:

<sup>42-43</sup> —Juni betsabu medabewabiamis jamebi paxatidumaki. Jaskakenan, jaska Israelbun Xanen Ibu Cristo kayamenkain cruz anua butuai uinkin na jabiatian nun ikunwantiduki. Dios ikunwain jakidi janchakunkainshinaki. Natiandi Dios benimakin jau medabewanunwen, paxawakinan, jaska waya nukundi nun ikunwainan—ikaibun

<sup>44</sup> juni yumetsu dabe jabe mastabundi Jesús ichadianibukiaki.

*Jesús mawanikiaki, na janchadan*

(Mr 15.33-41; Lc 23.44-49; Jn 19.28-30)

<sup>45</sup> Janua badi manananbibiaken badi nuka meshua itsa daka manaibun ma badi nai puchinin dakaken bepenakainaya <sup>46</sup> jabatiandi Jesúsun jui kushipawen yuikin:

—Elí, Elí, ¿lemá sabactani?— ikidan juni kuin janchadan, “En Diosuun, en Diosuun, ¿jaskakin min ea jeneamen?” ikaya

<sup>47</sup> ja naman jatidi mapuxun betsabun ninkatan yuikin:

—Ninkakanwen, Diosun jancha yuixunika Elías kenaikikidan—ikaibun

<sup>48</sup> janua ja naman mapuabu betsa kushikidan janu jawen tsiniti vino muka pu atan tawaki ustanzun bexun amanun, iwanan, sananxunaya <sup>49</sup> betsabun nemakin yuikin:

—Jaska wama jeneyuwe, Elíasin butekin paxawayuimenkainan—akaibun

<sup>50</sup> janua Jesús ana unanxubima bis itan mawaya <sup>51</sup> jabatiandi Templo medan tadi dintu wakin kebenibu jamebi manaundia dis iki keyuaya mai pacha sakuaya mishkipanwan bepunibu maei dabekeaya <sup>52</sup> janua janu maiwati tanpe xabakabiaya jabun Dios ikunwain mawanibu Diosun jatu bestenwan <sup>53</sup> Jesús bestendiamawen taea jabu dukun kainbaini Jerusalén ja mae medibi anu jikiabu januxun yuda ichapabun jatu uinibuki.

<sup>54</sup> Janua romano capitán inun jabun Jesús mekekin mai pacha sakui betsa betsai uin datejaidakin yuikin:

—Chanima kayaki. Na junidan, Diosun bakeki—ikaibun

<sup>55-56</sup> janua ainbuaibun Galilea anuxun duawakin Jesús chibanmisbu María Magdalena inun Santiago inun José María betsa inun Zebedeo juni bake dabetan ewadi Jesús mawai jabu benanta nixun uindianibuki.

*Jesús mawa maiwanibukiaki, na janchadan*

(Mr 15.42-47; Lc 23.50-56; Jn 19.38-42)

<sup>57</sup> Janua ma badi kaya judio betsa mabu pai paimaya jawen kena José Arimatea anua kainitun Jesús ikunwankin chibankubainshinatun <sup>58</sup> ana

jawaki dateama Pilato anu kaxun Jesús maiwakatsi jawen yuda yuka jau Josén butetan butanun Pilaton jaska yunua <sup>59</sup> kaxun Josén jawenabubetan butetan tadi juxupawen dayabutan buaibun <sup>60</sup> ainbu dabetan jatu chibainbun jawen yuda bakebainkin bukin jawen bai neki mishki kini bena jatu amaima anu Jesús datantan mishki beputi ewapawen beputan buaibun <sup>61</sup> jabianudi María Magdalena inun María betsa maiwati tanpe anu ja be bun niti ika tsauxun dasibi uinibukiaki.

*Jesúsun yuda jau yumetsuyamanunbun soldadobu kexemanibukiaki, na janchadan*

<sup>62</sup> maiwashinabu judiobun juindukuntitian Diosbe nukunabu janchaxu-nika xanen ibubu inun fariseobu Pilato anu jabe janchanun ika bua ichaxun <sup>63</sup> yuikin:

—Xanen ibuun, ja juni chani chakakin mawadiama janchai nun ninkamis-dan: “Mawa xaba dabe inun besti kaya en ana bestenxanaii”, ishian nuku yuishinabu nun shinaii. <sup>64</sup> Jaskawen taexun xaba dabe inun besti bin-udiamma maiwashinabu jau kexexun meke pewanunbun min soldadobu yunuwe. Min jatu jaska wamamaken meshu medan jawen tsumabu bexun jawen yuda june tsekabain butan chipu yudan kaian yuikin: “Nukun Xanen Ibu ma nuku bestenxun kainshinaki”, iwanan, dasibibu jatu padantidubuki. Jaska wakin jawen chani jancha jatu pikumatidubuki— akabu

<sup>65</sup> Pilaton jatu yuikin:

—Na soldadobu man jayaki. Matudi maiwashinabu anu jatube buxun jatu pewamatankanwen, jau jaska yumetsuyamanunbunan— jatu wa

<sup>66</sup> buxun jawen beputi mishkiki juni betsan bepean unanti shadawakin jawen unanti dispiki tsamintan puntekin bewexetan jau mekekin uinunbun soldadobu yunukin kexematan benibukiaki.

## 28

*Jesús maiwashinabu bestenkainikiaki, na janchadan*

(Mr 16.1-8; Lc 24.1-12; Jn 20.1-10)

<sup>1</sup> Janua ma sábado juindukunti binukainaya penai taeaya domingotian María Magdalena inun María betsa maiwashinabu anu buxun <sup>2</sup> uiainbun mai pacha sakuaya jabiatiandi Diosun nai tsuma maiwati tanpe anu butuxun mishkiwen bepushinabu bepentan jamamaki tsaua <sup>3</sup> jawen yuda kana bakai keska chaxai jawen tadi juxupajaida juxu punte punte ikai <sup>4</sup> soldadobun uin datei saki saki iki tin ika mawa keska tsistibainbaina maniabun <sup>5</sup> januxun nai tsuman ainbu dabe beabu yuikin:

—Jesús mastashinabu man benai jua en unaiin. Dateyamakanwen. <sup>6</sup> Jaska bebunkidi matu yuishina keskai ma bestenkainaki. Ana nenumaki. Janu datanshinabu jikixun uin <sup>7</sup> bekanwen. Uinbaini buxun jawaida na jancha jawen tsumabuki chanikin: “Jesús mawashinadan, ma bestenkainaki. Matu bebunkidi Galilea anu kaxuinkiki. Jadia matube ana ichai benai kaikiki. Jadi buxun uinditankanwen”, akin jawen tsumabu jatu yuiditankanwen. Jaska bestiki, en jancha matu bexuanki— jatu wa

*Ainbu dabeki Jesús nukui taenikiaki, na janchadan*

<sup>8</sup> ainbu dabe maiwati tanpe anua uintan datei taxnibaini benimachakaya-mai kushibaini jawen tsumabu yui buaibun <sup>9</sup> Jesús jatuki nukui jatu bechankametan jatu jancha wa ainbu dabe jaki nukuxun Jesús kenwain danti ixun jawen tae jutsundabeabu <sup>10</sup> Jesúsun jatu yuikin:

—Dateyamakanwen. En betsabu jau Galilea anu bununbun ea jatu yuix-unditankanwen. Jadixun jabundi ea uin bukanikiki— jatu wa

*Xanen ibubun jamakidi chaniti soldadobu jatu yununibukiaki, na janchadan*

<sup>11</sup> ainbu dabe buaibun Jesús maiwashinabu soldadobun kexeabu jatidi Jerusalén anu buxun jaska uinkanxu Diosbe nukunabu janchaxunika xanen ibubuki chaniaibun <sup>12</sup> janua jabu xanen ibu betsabube janchai bua jaska wakin yudan kaian padantidubu yubakatan soldadobu pei midima inankin <sup>13</sup> jatu yuikin:

—Jadi man jatu yuikubaintanun matu yuinun ninkakanwen: “Meshu medan nun uxaken jawen tsumabu bexun jawen yuda yumetsubainabuki”, <sup>14</sup> man ikaya Pilaton jaska ninkatan jau matu kupiyamaxanun nuku nun jabe janchakin nun matu yui pewaxunxanaii—jatu wa

<sup>15</sup> januxun soldadobun pei bitan jaska jatu yuixukidi jabu chania akeakenibu na jabiatiandi judiobun jabiaskadi jatu yuikubainmisbuki.

*Jawen daya Jesúsun jatu yununikiaki, na janchadan*

(*Mr 16.14-18; Lc 24.36-49; Jn 20.19-23*)

<sup>16</sup> Janua nun jawen 11 tsumabu Galilea anu mati betsaa anu jaska Jesúsun nuku yunushina anu kaxun <sup>17</sup> Jesús bechitan ikunwain ja be bun danti itan kenwainbun jatiditun shinan chankanma kenwanma juinti kushikin kenwanbumaken <sup>18</sup> Jesús nukuki kematan nuku jancha wakin yuikin:

—Jawen kushipa ea inankin jawada nai anua inun jawada mai anua mekekin en yunukubainxanun En Epan ea Xanen Ibu waniki. <sup>19</sup> Jaskawen taexun matu yununun ninkakanwen. Kakunkaunkin dasibi en matu yusinmis nawa betsaa betsapa xukuabu tibi yusindiakin en tsumabu ea jatu waxunkubainxankanwen. Januxun ea ikunwankin jawenabu jau jatu unanti wamanunbun Epa Dios inun ea jawen bake inun jawen Yushin Pepa kena dayuikin jatu nashimakubainxankanwen. <sup>20</sup> Jatu jaska wakin jaska en matu yusinmis jau jabundi chibanunbun dasibi jatu yusian akeakexankanwen. Man jatu jaska waya eadan, janu na mai jidabi anu badi keyudiamatian dasibi man ea ikunwainbube dasitan badi tibi en matu medabewapakexanaii—nuku waniki.

Jatiski, nukun Xanen Ibukidi en jancha chanimadan.

Mateo

## KAKAPE MARCOSIN JATU KENEXUNIKIAKI MARCOS

*Janu tsua jiweabumanuxun Nashimanika Juanen jatu yusinkin jatu nashimanikiaki, na janchadan*

*(Mt 3.1-12; Lc 3.1-9, 15-17; Jn 1.19-28)*

<sup>1</sup> Ja dukun bebunkidi Diosun jawen bake Jesús Mesíaskidi jatu yubani jaska jawen kakape taxnimakin taewani matu yuinun ninkakanwen.

<sup>2-3</sup> “Naiudixun Diosun jawen bake yuikin: Min kadiama mia beぶun en jancha yuixunika jau mikidi bebunkidi chanixanun en mia yunuxunxanaii. Jatun janu tsua jiweabumanuxun jui kushipawen jatu yuikin: ‘Nukun Xanen Ibu nai anua matuki bayui ma kemaikiki. Matun jointinin shinan pewadikanwen, bai kayatapia keska wakinan’, jatu wakin mia jatu yuixunxanikiki”,

ayama Diosun jawen jancha yuixunika betsakidi jaska yuini chipu Isaíasdi jaska Diosun yuia ninkatan jawen jancha yuixunika Isaásinkeneniki.

<sup>4</sup> Janua jaska yuini keskai jadi tsua jiweabumanu Nashimanika Juan kaima jiwea taxnitushitan jatu yuikin: “Matun shinan betsawatan matun chakabu Diosun jau matu buaxunxanun ninkatan jawada chakabuwen man benua jiwea jenedikanwen. Matun shinan maewatan man ea uinmaya en matu nashimaxanaii”, iwanan, jatu yusinkubainaya <sup>5</sup> Judea mai pakeanu jiweabu inun Jerusalén maewan anu jiweabu dasibi bexun Juanen jatu yusiain ninkakin jabun ikunwankin jatun chakabu Juanki chanikin jatun chakabu jenekatsi ikin shinan betsawiba jawn unanti wakin Jordán jene anuxun Juanen jatu nashimapakekubainikiaki.

<sup>6</sup> Janua Juanen tadi inun jawen pitikidi matu yuinun ninkakanwen. Camello dani sanpu tima sawea inun, bichi nanexeketi sawea inun, jawen piti pe bexmas chanpu inun ni medanua buna batapa aki jiwekunkainikiaki.

<sup>7</sup> Januxun yudan kaian jatu banabimakin:

—Xanen ibu kushipajaida betsan ea binuan ea kachu dama juxanikiki. Jaskawen taexun mawaida en kushipa jayamatun kakain en jawen jawau-majaidatun jawen bichi tae mexpun tsitsauxun pekaxunkin akawakin en duawatidumaki. <sup>8</sup> Jamen eanan, jenewen besti en matu nashimakubainaii. Jakia jatunan, Diosun Yushin Pepawen matu unanti wakubainxanikiki, nashima keska wakinan— akin Juanen jatu yuikubainikiaki.

*Juanen Jesús nashima kashinken Satanásan Jesús padanpai inikiaki, na janchadan*

*(Mt 3.13-4.11; Lc 3.21-22; 4.1-13)*

<sup>9</sup> Ja jaskaitian Jesús jawen mae Nazaret Galilea mai pakeanua kainkidani Juan anu ka Jordán jene anuxun Juanen nashimakin meneaya <sup>10</sup> nexekei mapekekidakkin Jesúsun uiyanan nai udia Diosun Yushin Pepa deiwan keska jamamaki butuaya <sup>11</sup> nai udixun Diosun yuikin:

—Miadan, min en bakeki. En mia bechipaikin katunidan, en miwen benimajaidaii— anikiaki.

<sup>12</sup> Janua jadi tsua jiweabuma benanta yuinaka mese piananbu anu Diosun Yushin Pepatun Jesús iyushina <sup>13</sup> 40 día Satanásan Jesús padanun, iwanan, unanti wa akeakeaya kakunkaunkin Jesúsun Satanás maemakubaunaya Diosun nai tsumabun medabewakubainibukiaki.

*Galilea mai pakea anuxun Jesúsun jatuyusinkin taewanikiaki, na janchadan  
(Mt 4.12-17; Lc 4.14-15)*

<sup>14</sup> Januxun bichiti jiwe anu Juan ma bichishinabun Galilea mai pakeanu kaxun Diosun kakapekidi Jesúsun jatu yusinkin <sup>15</sup> taewakin:

—Na jabiatian Dios ma nenu xanen ibuikiki. Jaskaken man Dioskidi chakabumis jenetan en kakape ekidi ikunwankubainkanwen— jatu wanikiaki.

*Baka nexenikabu dabe inun dabe Jesúsun jatu katunikiaki, na janchadan  
(Mt 4.18-22; Lc 5.1-11)*

<sup>16</sup> Janua kai Galilea ianenwan kexa Jesúsun ketankubaini kakin baka nexenika dabe Simón inun jawen betsa Andrésin jatun jisin ewapa punteaibu jatu bechixun <sup>17</sup> Jesúsun jatu katukin yuikin:

—Ea chibankanxun matun daya jenekanwen. Man jaska dayamisbudan, ana baka nexeama jakia man baka nexemis keska wakin yudabu en matu ichawamaxanaii, jau ea ikunwanxanunbunan— jatu wa <sup>18</sup> januxun jatun xaxu inun jatun jisin jatun jaibu betsa yunu keyutan jawaida jenebaini Jesúsbe buaibun <sup>19</sup> janua Jesús ana ketankubainkin Zebedeo bakebu Santiago inun Juanen xaxunxun jatun jisin tadas ika junukin kexeaibu bechixun <sup>20</sup> Jesúsun jatudi katukin yuikin:

—Ea chibankubainkanwen— jatu wa ninkatan jabianu jatun ibu Zebedeoibe xaxu namaki jabun medabewamisbube bashibaini Jesús chibain budianibukiaki.

*Juni yushin chakabu jaya Jesúsun kainmanikiaki, na janchadan  
(Lc 4.31-37)*

<sup>21</sup> Jatu jaska wabaina Jesúsbe bui mae betsa Cafarnaúm anu jikishinabun sábado juindukuntitian janu ichamisbu anu Jesús jikixun jatu yusiain <sup>22</sup> Diosun jancha kenenibu jabun jatu yusinkin shinan chankanwainsma keskama Jesús xanen ibu kayabi kushipakin jatu yuiai yudabun ninkai e itan: “¿Jaskamen?” iki benimakubainaibun <sup>23</sup> jabianudi juni yushin chakabuya tsaua yushinen unanxubima bis imakin <sup>24</sup> yuimakin:

—Jesús Nazaret anuaan, ¿jaskai nuku anu min juxumen? ¿Nun yushin chakabu nuku yamawanun ika min juadaka? En mia unaiin, min Diosun bake pepa medibidan— ikaya

<sup>25</sup> yushin chakabu Jesúsun nemakin yuikin:

—Janua jaskama neseten ja juni anua kaindikaintanwen— aka

<sup>26</sup> ja juni anua yushin chakabu kainkainkin unanxubimajaida sai imatan mai pusamatan duxku imatan kainkainaya <sup>27</sup> dasibibun uin

—Jabaa!— ike ikei yuinamekin yuikin: —Nadan, yusian betsa jayaki. Xanen ibu keska kushipajaidaki. Jawen jancha paepaki, yushin chakabu xunska yunua ninkai jawen datei kainkanikikidan— itan <sup>28</sup> samama bui jakidi jatu banabimai chania akeakeaibun Galilea mai pakeanuxun Jesúskidi kakaibu dasibibun ninkabaunibukiaki.

*Simónen dais ainbu isin teneai Jesúsun xuxawanikiaki, na janchadan  
(Mt 8.14-15; Lc 4.38-39)*

<sup>29</sup> Janu ichamisbu jiwe anua Jesús kainkaini Simón inun Andrésin jiwe anu Santiago inun Juanbe buaibun <sup>30</sup> Simónen dais ainbu yuna tenei daka anu jikitán jaska isin teneaikidi jabun Jesús yuiabu <sup>31</sup> jaki kemaxun metsunxun benitushia jawen yuna damaintan benimakin jatu duawakin bawaxun jatu pimaya

*Isin betsapa teneaibu Jesúsun jatu xuxawanikiaki, na janchadan  
(Mt 8.16-17; Lc 4.40-41)*

<sup>32-33</sup> janua ma badi kai meshuaya dasibi ja mae anu jiweabu Simón inun Andrésin jiwe anu ichai bekin dasibi isin teneaibu inun yushin chakabu jayabu Jesús anu iweaibun <sup>34</sup> isin betsa betsapa teneaibu ichapa xuxawakin yushin chakabu ichapayadi yudabu anua kainmapakenikiaki. Jaska wakin yushin ichapatun Jesús unainbuwen taexun Jesúsun jatu janchamamakin nemapakenikiaki.

*Jatun ichati jiwe tibi anuxun Jesúsun jatu yusinikiaki, na janchadan  
(Lc 4.42-44)*

<sup>35</sup> Janua uxashini ma penabiai meshuyuken Jesús butukaina mae dapi benanta Diosbe janchai ka jabe janchaya <sup>36</sup> Simón bestenkauan jawen jaibuaibubetan Jesús benabaunkin <sup>37</sup> atimas jaki nukutan yuikin:

—Dasibibun mia benakanikiki— akabu <sup>38</sup> Jesúsun jatu yuikin:

—Diosun jancha yusinbaunun ika en kainkidanshinaki. Jaskawen taea mae betsa udama janudi yusin budinankanwen— jatu wabaini

<sup>39</sup> Galilea mai pakea dasibi anu kakunkaunkin janu Diosun jancha ninkakatsis iki janu ichamisbu jatun jiwe tibi anuxun kakape yusinkin yushin chakabu yudabu anua kainmakubaunkiaki.

*Juni jawen yuda dasibiki chami betsani Jesúsun kaya wanikiaki, na janchadan*

*(Mt 8.1-4; Lc 5.12-16)*

<sup>40</sup> Janua juni jawen yudaki chami betsani Jesúski nukutan danti ixun yuikin:

—Ea kayawakatsis ikin min ea kayawatiduki— aka <sup>41</sup> jawen chamiwen datekin danankin tsuan metsakatsi isbumabiaken Jesús jawen dabanan ikin mexunkain mekin yuikin:

—En mia kaya waii— akaya <sup>42</sup> jawen chami sakada iki daxnukui keyuaya

<sup>43</sup> Jesúsun nichinkin nemakin:

<sup>44</sup> —En mia yuiai ninkaidawe. Jawada en mia axukidi tsua yuiyamayukubaintanwen. Jadi dukun kakin Diosbe nukunabu janchaxunika min yuda min ma kayaxu uinmatanwen. Jaska min ma kayaxu jau dasibibun mikidi unanunbun jawen jatu bepadanbainkin jabiaskadi inankuin Moisin yununi jatu anu buditanwen. Min jaska buaya min kayaxu jabun unanxankanikiki— abia <sup>45</sup> ninkama kaxun jaska Jesúsun axunxu juneama tsuabudaki nukua akeakekaini dasibibuki chaniaya xabakabi jamapai mae anu Jesús ana jikitiduma jadi tsua jiweabumanu besti niaketanaya mae tibi anuxun yudabun Jesús uinun ika “¿Janimen?” iki yuka ibidan ibidani jaki ichanibukiaki.

## 2

*Juni yuda babuni Jesúsun kaya wanikiaki, na janchadan  
(Mt 9.1-8; Lc 5.17-26)*

<sup>1</sup> Janua uxa eskadabes jawen mae Cafarnaúm anu Jesús katani jikiaya banabitán yuinamei: “Ma ana nenu juxukiaki”, ikaibun <sup>2</sup> yuda ichapabu janu bei jaki xukui ana jani maputima jemaintin anu ika kai bestuabu ana jadakidi tukuama mapuabun Diosun jancha jiwe uke medanxun Jesúsun jatu yusianyan <sup>3</sup> juni yuda babuni jawen baketiki daka juni dabe inun dabetun Jesús anu jawen dakatiki bakebidan <sup>4</sup> janu yudan kaian xukuabuwen taea jaska watan bichibain Jesús uinmatima mai bawa jiwe sapa xeni mamaki inabain jawen dakatiki janu butenun, iwanan, janu bexpa wakin pudenkin xui watan janu ja juni yuda babuni Jesús anu buteaibun <sup>5</sup> jaska jatun shinan ikunjaidawaibu unankin juni yuda babuni Jesúsun yuikin:

—Dateyamawe. Min chakabuwen Diosun mia kupikatsis ibiakin man ea ikunwainwen taexun jau ana shinanyamanun en mia buaxunaii— akaya

<sup>6</sup> januxun Diosun jancha kenenibu yusinanamisbu bestibu tsauxun shi-nankin: <sup>7</sup> “Ja juni chakabuki. Nuku padain Dios keskakatsi ikikiki. Diosun besti jawen chakabu buatiduki”, ikaibun <sup>8-10</sup> januxun tsuan Jesús yuiamabia jatun shinan unankin Jesúsun jatu yuikin:

—Matunan, ¿jaskakin man shinan chakai ikai? ¿Jadatu bikamamen, jawen chakabu buaxunadaka? ¿Jawen yuda beniadaka? Ja dabe bikaken Diosun besti atiduwen taexun ¿jaskakin man shinanchakai? En matun Juchi Kayabi Iyua na mai anua ea en jawen kushipa jayatun jawen chakabu en buax-untidu man unanun en akai uinkanwen— iwanan, juni yuda babuni kaya wakin yuikin:

<sup>11</sup> —Benitan min dakati bui min jiwe anu inun kadiwe— akaya <sup>12</sup> jawen yuda damestentan benikauan jawen dakati bitan iabainaya mapubaunabun uinkin yuikin:

—Jabaa! Tsuan jaska waismaki. Jakia Dios pepajaidatun na juni ma kayawaxuki— iwanan, Dios kenwanibukiaki.

*Jesúsun Leví katukin kenanikiaki, na janchadan*  
(Mt 9.9-13; Lc 5.27-32)

<sup>13</sup> Janua ana ianenwan kexa anu Jesús ka jaki yudan kaian ichabu jatu yusinbai <sup>14</sup> janua kakin Cafarnaúm anuxun Romabun gobieno pei bixunmisbu jiwe anu Alfeon bake Leví jawen kena betsa Mateo tsaua Jesúsun bechitushitan yuikin:

—Ea chibankubainwen— aka Leví benitan chibankin taewabainaya

<sup>15-16</sup> janua chipu Jesús inun jawen tsumabun Levín jiwe anuxun piaibun jabianudi Roma xanen ibu pei bixunmisbu ichapa inun jabun fariseobun yusian ninkaisbuma ichapabun Jesúsun tsumabu jabubetan pidiaibun Diosun jancha kenenibu yusinanamis fariseobun Jesúsun jabubetan piai uinkin jawen tsumabu yukakin:

—¿Jaskakin matun yusinan pei bixunikabu inun ja juni chakabun nuku ninkaisbumabetan pimenkain? Chakabuki— ikaibu <sup>17</sup> Jesúsun jatun jancha ninkatan jatu yuikin:

—“En peki”, iwanan, shinainbu anu juni dauya kaismaki. Jakia isin teneaibu anu besti juni dauya kenabu kamiski. Jaskaken “En chakabuki”, iwanan, shinainbu jatun jointi pewakin medabewatanun ika en juxuki, juni dauya keskaidan. Jakia “En chakabumaki”, iwanan, shinainbu jatu medabewatanun ika en juamaki— jatu wanikiaki.

*Samakemisbun Jesús yukanibukiaki, na janchadan*  
(Mt 9.14-17; Lc 5.33-39)

<sup>18</sup> Janua Nashimanika Juanki chiti ikabu inun fariseobuki chiti ikabudi samakeaibun juni betsabu Jesús anu kaxun yukakin yuikin:

—Juanki chiti ikabu inun fariseobuki chiti ikabu jatun chakabuwen taea jatunmebi ichakanikai samakekin jabun jawa piyuibumaki. ¿Jamen jaskai miki chiti ikabu samakeama pikubainmisbumen?— akabu <sup>19</sup> Jesúsun jatun yuikin:

—Juni ainyain nawaibu anu jawen jaibuaibu paxkadiabuma piama jatunmebi ichakanikatidubumaki. Jakia jatu xunubaini kaken manui jawen jaibuaibu samakekin piama iyutidubuki. <sup>20</sup> Jabiaskadi wakin ea achixun iyuabun ewen nui en jaibuaibun piama idiaxankanikiki— iwanan,

<sup>21</sup> ana yusinkubainkin yuikin:

—En yusianan, tadi bena chukadiama keskaki. Matu yusinun ninkakanwen. Tadi xeni baxnekea tadi bena tuax chukadiamawen tadi xeni tsamian patsa estei ana baxnekemiski. Jamen matun yusianan, tadi xeni baxnekea keskaki. En yusianwen tsamian keska wakin matun yusian en pewatidumaki. <sup>22</sup> Ana jabiaskadi keskawen matu yusinun ninkakanwen. Bichi bishtu xeniki uva jene bena buspudiamanekin mata waxun denex mestenwan jamebi katsai buspui bichi bishtu xeni pexemiski, vino bena inun bichi xeni benuidan. Jabiaskadi wakin en yusian bena matun shinan xeni en jusitudumaki, benukinan— jatu wanikiaki.

*Sábado juindukuntitian Jesúsun tsumabun xekiwan bimi tsekanibukiaki, na janchadan*

(Mt 12.1-8; Lc 6.1-5)

<sup>23</sup> Januxun ana sábado juindukunti betsation xekiwan banaimabu anu manan baiwen kakin jawen tsumabu Jesúsbe bukin xekiwan bimi tsekaxun pikubainaibun <sup>24</sup> fariseobun jatu uinkin Jesús yukakin:

—¿Jawai juindukunti sábadotian dayakanimenkain? Dayakin Diosun Moisés nuku nemamani min tsumabun kanekanikiki— akabu <sup>25</sup> Jesúsundi jatu yuikin:

—Bunikin jawada nukun xenipabu pepa Davidin jawen jaibuaibubetan anidan, ¿man uinsmamen? <sup>26</sup> Matu yuinun ninkakanwen. Abiatar Diosbe nukunabu janchaxunika xanen ibuaya Dios kenwanti tadi jiwe medan David jikixun ja medibi misi Dios uimakin janakubainaibu Diosbe nukunabu janchaxunika jabun besti pitibiaken jawen Dios kenwanti misi David bunikin bixun pitan jawa dateama jawen jaibuaibudi pimadianiki. Jaska wabiaya Dios jaki sinatama iniki— jatu watan

<sup>27</sup> jabianuxundi Jesúsun ana jatu yuikin:

—Juindukuntiwen yudabu bikawanun, iwanan, Diosun juindukunti wama iniki. Jakia jatu medabewanun, iwanan, juindukunti wakin Diosun yudabu axuniwen taexun <sup>28</sup> en matun Juchi Kayabi Iyuatunan, juindukuntitian jamapai betsapa en atiduki— jatu wanikiaki.

### 3

*Sábado juindukuntitian juni meyushki Jesúsun kaya wanikiaki, na janchadan*  
(Mt 12.9-14; Lc 6.6-11)

<sup>1</sup> Janua ana ichati jiwe medan Jesús jikiaya juni meken meyushki jadi jatube jikia tsauken <sup>2</sup> januxun jabun jawen yusian danankin Jesús chitenun, iwanan, juindukuntitian ja juni mepeai uinun, ixun manai maniabun <sup>3</sup> juni meken meyushki bechitan Jesúsun yuikin:

—Benikidan ja maniabu namakis niwe— aka benia niken <sup>4</sup> ja dapi maniabu jatu yukakin:

—Moisin jancha pepa chibankin juindukuntitan, ¿jaska watimen? ¿Pewakin medabewatidaka? ¿Chakabuwakin ichakawatidaka? ¿Jawen jiwea meketidaka? ¿Jawen jiwea yamawatidaka?— jatu wa jabun jawa yuiama manixun <sup>5</sup> yuinamea akeakekin jatun shinan bikawaibun Jesús ninkakatsis ikabumaken janua Jesús sinatai juinti nishmaxun jatu uinkin keyutan ja juni meken meyushki yuikin:

—Min meken meshanwen— aka meshanyan jawen meken ma mepekei peaya <sup>6</sup> fariseobu kain keyubaina judio xanen ibu Herodeski chiti ikabube icha jaska waxun Jesús tenantimen ika yuinamei yubakai taenibukiaki.

*Ianenwan kexa anu Jesús kaken yudan kaian jaki ichanibukiaki, na janchadan*

<sup>7</sup> Janua Jesús jawen tsumabube ian kexa anu kaya yudan kaian Galilea anuabun jatu chibainbun <sup>8</sup> januxun jamapai betsapa Jesúsun akai ninkabidanbidanaibun uintanun ika bei, Judea anua bei, Jerusalén anuadi bei, Idumea anuadi bei, Jordán jene kexa betsaudiadi bei, Tiro inun Sidón anuadi beake beakeaibun <sup>9-12</sup> isin teneaibu ichapa xuxawashinken jabundi jawenabu isin teneaibudi iwekin Jesús mematanun ika bei jaki ichai keyuabun jabianudi yushin chakabu yuda medan jiwexun Jesús uintan ja yuda Jesús anu danti imatan jancha kushipawen yuimakin:

—Miadan, min Diosun bake kayabiki— ibidan ibidanaibu jatu janchamakin:

—Janua ekidi jaska janchama kainkanwen— jatu wapakekin Jesúsun yushin chakabu jatu nichiaiñwen taea ana jaki ichai texke ikaibu uinkin jatu dapaxkabainun, iwanan, jawen tsumabu yunukin:

—En xaxun inai ea xutukanxun xaxu pewai bukanwen— jatu wanikiaki.

*12 junibu kushipa wakin Jesúsun jatu katunikiaki, na janchadan  
(Mt 10.1-4; Lc 6.12-16)*

<sup>13-15</sup> Xaba betsatian mananan mati anu mapekexun Jesúsun jaki chiti ikabu betsabu kenakin:

—Ea anu bekanwen— jatu wa bei jaki ichaibu 12 juni besti katukin yuikin:

—Matu yusinun tapin ebe bukubainkanwen. Kakape ekidi man jatu yuikubainxanunbun jancha kushipawen yunutishada wakin en matu yunuaii, man en kushipayabu wakin matu kenakinan. Jaska bitan isin teneaibu man jatu xuxawakubainxanunbun inun, yushin chakabu jayabu man jatu kainmadiakubainxanunbun en matu yunuaii— akin <sup>16</sup> ja 12 junibu katukin Simón, kena betsaa Pedro watan <sup>17</sup> Zebedeo bake dabe Santiago inun jawen betsaa Juanbe ana jatu kena betsaa wakin Boagnerges, juni kuin janchadan, Kana Tin Ikainkainmis Keskatun Bakebudan, jatu watan <sup>18</sup> Andrés inun, Felipe inun, Bartolomé inun Mateo, jawen kena betsaa Leví, inun Tomás inun, Alfeon bake Santiago inun, Tadeo inun Simón, ja Roma anua xanen ibubu jatu danankin jatu nichinkatsis imis <sup>19</sup> inun, Judas Iscariote, jatun Jesús chipu jatu achimaxanaaidan, jati katunikiaki, Jesúsun tsumabudan.

*Jesús Beelzebún kushipa jayaki, iwanan, ja akin chitenibukiaki, na janchadan  
(Mt 12.22-32; Lc 11.14-23; 12.10)*

<sup>20</sup> Janua jatu jaska wabidani jawen tsumabube jiwe betsanu Jesús jikiken ana yudan kaian jaki ichabu janixun Jesús inun jawen tsumabun pitidubu-maken <sup>21</sup> Jesús jaskai jawen ewa inun jawen betsabun ninkatan yuinamei:

—Unainsmapai tidumai ikikiki. Inun bukanwen— ibidanaibun

<sup>22</sup> janua Jerusalén anua Diosun jancha kenenibu yusinanamisbun uinkin Jesúskidi yuikin:

—Na junidan, yushin chakabu xanen ibu Beelzebún kushipa jayaki. Jaska bestiwen taexun yushin chakabu jatu kainmaikiki— ikaibu <sup>23</sup> ninkatan Jesúsun jatu ichawaxun eska miyuiwen jatu yuikin:

—Satanásan ibubis jawen yuda Satanás kainmatidumaki. <sup>24</sup> Miyuiwen matu yusinun ninkakanwen. Mae betsaa anua nawabu jatunmebi paxkatan detenamei jatun yuda debui keyumisbuki. <sup>25</sup> Jaska inun, yudabu jawenabuyas paxkatan jatunmebi duanameama sinatai jiwea petidubumadiki. <sup>26</sup> Jaskaken Satanásan jawenabu kainma jawen yuda punu nukai babui keyukeanaii.

<sup>27</sup> Jabiaskadi wakin tsuanda juni kushipatun jiwe anu jikitin yumetsunun, iwanan, jawen tae inun jawen meken dukun neatan jawen mabu yumetsutidubuki. Jamen eanan, jaska keskadi wakin Satanás maemakin jawen kushipa mebintan en binutiduki— jatu waya

<sup>28-30</sup> Diosun jancha kenenibu yusinanamisbun yuikin: “Min yushin chakabu jaya iki ikaii”, akaibuwen taexun Jesúsun jabu yuikin:

—Chania en matu yuiai ea ninkakanwen. Yudabun jabun chakabu betsaa betaspa inun jabu Dioski xechakamisbu Diosun jatu jakimawakin jatun chakabu jatu buaxuntiduki, pewakinan. Jakia matu keskakin tsuanda jawen Yushin Pepa danain jaki xechakamisbu jatun chakabu jatu buaxuntaskama ixanikiki— iwanan,

*Jabu jawen ewa kayabi inun jawen betsabu kayabikidi Jesúsun jatu yusinikiaki, na janchadan*

(Mt 12.46-50; Lc 8.19-21)

<sup>31</sup> Jesúsun jatu yusinkin keyudiamaken jemaintin anu jawen ewa inun jawen betsabu jabe janchanun, iwanan:

—Jesús ea yuixunkanwen— jatu wa <sup>32</sup> ja dapi tsubaunxun Jesús yuikin:

—Min ewa inun min betsabun unu jemaintinxun mibe janchanun ixun mia kenakanikiaki— akabu <sup>33</sup> Jesúsun jatu yukakin:

—¿Tsuabumen, en ewa inun en betsabudan?— iwanan, <sup>34</sup> ja dapi tsauabu uinbaunkin jatu yuikin:

—Na jibia ea dapi manixun ea ninkaibudan, jabiabu en ewa kayabibu inun en betsaa kayabibu inun en pui kayabibuki, na jabiabudan. <sup>35</sup> Ja inun, Diosun jancha tsuabunda ninkatan ikunwankin jabun chibanbainkin axuainbudan, jabiabu en betsabu inun, en puibun inun, en ewabudiki— jatu anikiaki.

## 4

*Jexe banakidi miyuiwen Jesúsun jatu yusinikiaki, na janchadan*

(Mt 13.1-9; Lc 8.4-8)

<sup>1-2</sup> Ianenwan kexa anuxun Jesúsun ana jatu yusinkin taewaya yuda ichapabun ninkanun ika beabu ianenwan kexa anu dasibi tsauxun ninkaibun ian kexa xaxu namaki Jesús tsauxun miyui betsaa betsapawen jamapaikidi jatu yuikin:

<sup>3</sup> —Miyuiwen matu yusinun ninkakanwen. Juni betsaa jawen bai anu xekiwan jexe sa aki kaxun <sup>4</sup> sa akubaina jexe betsaa janu kati bai namaki nidi aka peiyabu bexun keyu xeabun <sup>5</sup> jexe betsaa mishki ewapabu mania anu mai eskadabes bemanchimea anu kauanadan, jawaida pexei benekau-naya <sup>6</sup> badi jui kukin jawen tapun bemakis bewexekeea kua utsi xanamiski. <sup>7</sup> Ja inun, jexe betsaa muxa jukundiamanu nidi aka xekiwan beneai muxa jukunkin yabua jaskatan bimitidumaki. <sup>8</sup> Jakia jexe betsaa mai pepa anu nidi aka benei bimi ichapajaida jayamiski, jexe betsaa yumentan 30 jexeyai inun, jexe betsaa yumentan 60 jexeyai inun, jexe betsaa yumentan 100 jexeyaidan— iwanan, <sup>9</sup> ana jatu yuikin:

—Man pabinkiyabuki. Ninkatan jakimayamaxankanwen— jatu wanikiaki.

*Jexe miyuikidi xabakabi Jesúsun jatu unanmanikiaki, na janchadan*

(Mt 13.10-23; Lc 8.9-15)

<sup>10</sup> Janunkain yudan kaianen ma Jesús jenebainabun ja mesti tsauken jawen 12 tsumabu inun jaki chiti ika betsabun jaska miyuiwen jatu yusinxu yukabu— <sup>11</sup> Jesúsun jatu yuikin:

—Matudan, jaskai Dios xanen ibumiskidi Diosun jawen pepa juneni xabakabi man en tsumabu matu yusinkin unanmaikiki. Jakia jabun Diosun jancha ninka bestiaibu miyuiwens besti en jatuki chanikunkainaii, <sup>12</sup> jabun chakabu Diosun jatu buaxunkatsi ikamawen taexun ninkabiakubainkin jau xabakabi ninkayamanunbun inun uinbiakubainkin jau jatun chakabu bexteketan Dios ikunwanyamanunbunan— akin

<sup>13</sup> —¿Jaska jancha juneawens en jatu yusinxudan, man ninkama ixumen? ¿Dasibi miyuiwen en matu yusianan, man daka tapinkin ninkama ikubainkanai?— iwanan, <sup>14</sup> ana jatu yuikin: —Miyui jexe nidi akakidi matu xabakabi yusinun ninkakanwen. Juni betsan Diosun jancha kenenibu yusinanamisdan, jexe sa aka keskaki. <sup>15</sup> Ja jexe betsa jawen kati bai namaki nidi ikadan, yudabun Diosun jancha ninkabiaibun jamakidia Satanás juxun jawen jancha pepa ninkatanais mebinmiski, jakimawakinan. <sup>16</sup> Ja inun, jexe betsa mishki ewapabu mania anu mai eskadabes bemandchimea anu nidi akadan, tsuanda Diosun jancha ninkakin taewai benimabiaya <sup>17</sup> shinan pewamawen taexun jawen jiwepanan Diosun jancha dananmakin jatu bika wakin jawen jamapaiwen jatu ichakawabu tenei jawawen jaskatima ja uintan ana jawendi chintunbainmisbuki. <sup>18</sup> Ja inun, jexe betsa muxa jukundiamanu nidi akadan, yuda betsabun Diosun jancha chiban taewabiai <sup>19</sup> jamapai jawen jiweawens kemui jeneama jawens besti nuichakayamakin Diosun jancha ninkabiakin ana tapinkatsi ikama mabuwens besti kemui icha bestiwanun ika pepaisbumaki, jaskatun yabua jancha pepa chibanma yudabu miban bimiuma keskabuidan. <sup>20</sup> Jaska inun, jexe betsa mai pepa anu sa akadan, Diosun jancha ninkaxun yuda betsabu jatu yusinkin ikunwanmamisbuki, mai pepa anu jexe nidi aka ewai benei bimiai betsa 30 jexeyai keska inun, betsa 60 jexeyai keska inun, betsa 100 jexeyai keskadan— iwanan,

*Bin dekutan xabakabi tsautikidi miyuiwen Jesúsun jatu yusinikiaki, na janchadan*

(Lc 8,16-18)

<sup>21</sup> Jesúsun ana jatu yusinkin:

—Bin dekutan ji bau medan junetima inun tapu naman tsautima man unaiin. Jakia bin dekuxun jau jawenabu jikikin uinshadanunbun manaudi tsautmisbuki. <sup>22</sup> Jaskaken jawada en matu yusinkubainai yuda betsabu jatu yusinkin juneyamakubainxankanwen. Jaska inun, jamapai tibi junekin man jatu axuanmadan, dasibi Diosun jatu xabakabi waxunkin keyuxanikiki. <sup>23</sup> Jaskaken man pabinkiyabunan, na jancha ninkatan jaki-mayamakubainkanwen— iwanan,

<sup>24</sup> januxun ana jatu yusinkin:

—Man yuda betsabu medabewakin pewamis jabiaskadi wakin Diosun matu manakukin pepawendi man amis keskama ana matu binumaxanikiki. Januxun man jatu medabewachakamis jabiaskadi wakin Diosun matu inanchakadiakin manakukin pemawendi matu kupixanikiki, nuitapawakinan. <sup>25</sup> Jaska inun, tsuabunda en jancha besti ninkakin chibainbu ichapa en ana jatu xabakabi yusinkubainxanaii. Jamen tsuabunda eskadabes ninkabiakin ea chibainsbuma ja eskadabes en jatu mebinxanaii, jakimawakinan— iwanan,

*Miyuiwen yunu bana ewamiskidi Jesúsun jatu yusinikiaki, na janchadan*

<sup>26</sup> jaska keskai na mai anua Dios xanen ibumiskidi Jesúsun ana jatu yuikin:

—Dios xanen ibuidan, eskamiski, matu yusinun ninkakanwen. Junin xekiwan banatanima <sup>27</sup> uianmas uxa ichapa binutan janua xekiwan jukuin

yumei ewamiski. Jaskai yumeai ja junin unanmabiaken <sup>28</sup> main yunu bemenakin ja dukun jawen pei kainmakin ewa wakubauna ja kachu jawen taxudi kain ewatan janua juatan bimiai beduyai kanimiski. <sup>29</sup> Janua chushiaya ibuan tsekakin mextekin ichawamiski. Jaska keskadi wakin Dios ikunwainbu ichawadiaxankanikiki— iwanan,

*Jexe pexemishtinkidi Jesúsun jatu yusinikiaki, na janchadan  
(Mt 13.31-35; Lc 13.18-19)*

<sup>30</sup> ana Jesúsun jatu yuikin:

—Dios xanen ibu jaska keskamiskidi miyui betsawen ana matu yusinun ninkakanwen. <sup>31</sup> Miban betsaa mostaza jexe pexeishtajaidabia <sup>32</sup> mai anu bana bestibiabu ewakin miban betsaa tibi binumiski. Jaska inun, jawen punyan ewapashinaki peiyabu jaki juindukuin utamisbuki. Dios xanen ibuidan, jaska keskadiki— iwanan,

<sup>33-34</sup> yuda dasibibu jancha junea miyuiwens Jesúsun jatu yusinkin jawada ninkatidubu jatu yuia akeakeaya januxun jawen tsumabun jawa xabakabi unankin tapindiabumaken miyuiwens jatu yusinshina januxun jawen tsumabu Jesúsun jatu yui tapinmakin jatu xabakabi yuinikiaki.

*Niwegian kushipajaida inun ianenwan buspu tsaubidanai Jesúsun nemaniikiaki, na janchadan*

*(Mt 8.23-27; Lc 8.22-25)*

<sup>35</sup> Janua badi kai meshuaya jawen tsumabu Jesúsun yuikin:

—Ianenwan kexaa betsaudi buyanankanwen— jatu wabaini <sup>36</sup> januxun yudan kaian xunubaini Jesús jawen tsumabube xaxun inatan xutubaini buaibun janua xaxu betsawen chibain jabe budiaibun <sup>37</sup> janua niwegian kushipajaida besubainaibukidia bekin jene buspu tsaubidankin xaxu jene mata waya <sup>38</sup> Jesús jawen tedatametiki xaxu chixukidi daka uxaken jawen tsumabu datekin bestenwantan yuikin:

—Yusinaan, nun jikiaidan, ¿min nukuwen dabanan ikamamen?— akabu

<sup>39</sup> janua Jesús bestenkauan benitan niwegian kushipa inun ianenwan nemakin:

—Peswe. Nesewe— aka niwegian main neseaya ianenwandi buspu tsaubidanai main neseaya <sup>40</sup> Jesúsun jatu yuikin:

—¿Jaskai man dateai? Ea shinainan, man dateama ikeanaii— jatu wa

<sup>41</sup> e iki dateyabi yuinamekin:

—Na junidan, ¿jawa junimen? min atidumakidan, niwe inun ianenwanendi ninkakanikikidan— ibaini bui

## 5

*Gerasa anu kaxun Jesúsun juni yushin chakabu jaya kainmanikiaki, na janchadan*

*(Mt 8.28-34; Lc 8.26-39)*

<sup>1</sup> janua ianenwan kexaa betsaudi Gerasa mai pakeanu Jesús kai keti itan

<sup>2</sup> xaxu anua bututan jawen tsumabube mapekekainaya janu mawabu maiwamisbu anu juni yushin chakabu jaya Jesús bechitan juaya <sup>3-4</sup> ja juni yushin chakabu jaya jawawen jaska watima mane dispiwen nexakin mestenwanbiakubainabu jawenchains mane dispi nasakin tesaya jawen tae tanexkin inun jawen meken menexbiabu dasibi pekakin ja mane dispi tesakin chudi mishtinwankin keyuaya ana jaska waxun tsuan nematidumadan, <sup>5</sup> janua meshu medan inun badidi nia sai ikin mawabu maiwamisbu anu inun mati anua sai idiai inun mishki maniaki ibubis tin tin iki dachakamemisken

<sup>6</sup> jakia Jesús chai juai bechibidani kushi chakayamakidan ja dapi danti ikaya  
<sup>7-9</sup> Jesúsun yuikin:

—Yushin chakabuun, ja juni anua kainwen— atan yukakin:

—¿Jadakidi min kena ikai?— aka yuikin:

—En kenadan, “Ichapajaida En Jayaki”, en yushin midimayadan— iwanan, sai ikin jancha kushipawen yuikin:

—Jesúsuun, min Dios kushipajaidatun bakedan, en unaiin. Diosun nuku uiyanan nukudan, kupikin nuku nuitapawayamawe!— itan sai ikin <sup>10</sup> ana yushin chakabun Jesús ea akin yuikin:

—Nun nanta kakatsi ikamaki. Nuku nanta nichinyamawe— iwanan, <sup>11</sup> ja mati anuxun ina yawa ichapabun piaibun <sup>12</sup> yushin chakabun uintan ea akin yuikin:

—Ja ina yawa anu nuku nichinwen, ja medan nun jikinunan— akabu

<sup>13</sup> januxun Jesúsun jadi jatu yunua ja juni anua kainbaini ina yawa medan jikibainaibun ja ina yawa 2,000 datei mawa keyatapa butei nidi ibaini ianki pukui jasai keyuaibun

<sup>14</sup> janua ja ina yawa mekenikabu datei kushibainkin mae tibi anu jiweabu inun bai puchinin jiweabu jatu banabima akeakebainaibun yuda ichapabun ninkatan uin beaibun <sup>15-16</sup> janu Jesúski nukuxun ichapajaida ja juni yushin chakabu jaya ikunkidanshina ma tadi sawea ana unainsmapa keskama janu Jesúsbet tsaua ana jaska dabanan ikin datekin ja juni jaskaxu jabun uintan jatu yuikin ja yushin chakabu ina yawa medan jikibainxu chaniaibun <sup>17</sup> ninkatan ja mae anuabun mesekin Jesús nichinkin:

—Nukun mae anua kadiwe— akabu

<sup>18</sup> janua Jesús xaxun naneaya janua ja juni yushin chakabu kainmaxutun Jesús ea akin yuikin:

—¿Mibe kapa?— aka <sup>19</sup> nemakin yuikin:

—Ebe kayamawe. Jakia minabu anu kaxun jaska Dios miwen nuikin yushin chakabu mia kainmaxu minabu yuiditanwen, jau miwen benimadidunbunan— abaini kaya

<sup>20</sup> januxun ja juni yushin chakabu jaya Jesúsun kainmabaina kaxun nawa betsabun mae Décapolis yuiadan, juni kuin janchadan, Mae Meken Dabeti anu kaxun ja juni jaska Jesúsun duajaidawakin ja yushin chakabu kainmabainxu jatuki chanikunkainaya ninkai dasibi benimai Jabaa! iki keyubukiai.

*Ainbu jimi baxneni neseisma Jesúsun mainwantan Jairon bake mawa bestenwanikiaki, na janchadan*

(Mt 9.18-26; Lc 8.40-56)

<sup>21</sup> Janua Jesús ianenwan kexa betsaudi katani ana jawendi chintunkidani jui keti ikaya janua ian kexa anu yudan kaian Jesús uinun ika bei ichabidan-bidanaibun <sup>22</sup> janua janu ichati jiwemekemis xanen ibu betsa jawen kena Jairon Jesús bechibidani juxun danti ixun <sup>23</sup> ea akin yuikin:

—En bake ainbu mawakatsis ikikiki. Ebe kaxun en jiwe anuxun uinkin jau xuxanun ea mexuniyuwe— aka

<sup>24</sup> janua Jesús jabe kaya yudan kaiandi jabedi bukin Jesús nashui akin texke abainaibun <sup>25</sup> janua ainbu jimi baxneni ja isin tenei ma 12 año kabia jawa neseisma badi betsa tukama ikunkainmis <sup>26</sup> janua nuitapaya juni dauyabun jau ea xuxawanun, iwanan, jawen pei dasibi putakin keyubia jawa maianma ikunkaini jakia ana pikujaidakin <sup>27-28</sup> Jesúskidi janchakin yuiaibu ninkatan ja yudan kaian supu ibaini jabe buaibu anu ja ainbu isin teneya chipu kakin: “Jawen tadi kexa besti mea en xuxatiduki”, iwanan,

shinanbaini kakin nashui ikain Jesúsun tadi kexa metsatoshia <sup>29</sup> jawaida jawen jimi nesei maintan: “Ma en xuxaxubiin!” iwanan, shinanyan <sup>30</sup> jawen kushipa kainkain tsuada ma xuxaxu Jesúsun unankin yudan kaian jachun beaibu uinbaunkin Jesús niti itan jatu yukakin:

—¿Tsuau man en tadi metsaxumen?— jatu wa

<sup>31</sup> januxun jawen tsumabun yuikin:

—Na yuda ichapa bei miki supu ibidankin mia akanikiki. Tsuan mia axu nun unanmaki— akabu <sup>32</sup> jatun Jesús metsaxu ainbu uinun ika nasaukekaua-naya <sup>33</sup> ainbun unain datei saki saki ikin jawada Jesúsun axu unain ja be bun danti itan xabakabi Jesúski chaniaya <sup>34</sup> Jesúsun yuikin:

—Ainbuun, min ea ikunwanyan en mia xuxawaxuki. Ana isin teneama unanuma kai pediwe—

<sup>35</sup> aki nikken janua Jairon jiwe anua jawen tsumabu bexun Jairo yuikin:

—Min bakedan, ma mawaxuki. Ana juni yusinan daketapa wayamawe— akin <sup>36</sup> yuiaibu Jesúsun ninkakin Jairo yuikin:

—Dateama ea besti ikunwankubainwen— abaini kakin <sup>37</sup> janua Pedro inun Santiago inun jawen betsa Juan besti Jesúsun jatu iyukin <sup>38</sup> Jairon jiwe anu jabe buaibun janua jancha biski ikaibu ninkakin yuda ichapa kaxai sain iki bau bau ikaibun <sup>39</sup> janua Jesús jatu anu jikikain yuikin:

—¿Jaskai e iskaun kaxai man biski ikanai? Jawen bake mawa kayabiamaki. Uxaki— jatu waya <sup>40</sup> januxun Jesúsun jaska yuiai yuda ichapabun usanbau-naibun januxun Jesúsun jabu kainmatan jawen epa inun jawen ewa inun jawen tsumabu jabe buabube ja ainbu bake janu daka anu dintu medan jikikain <sup>41</sup> metsunxun yuikin:

—Talitá, cum— iwanan, nukun janchadan —Chipashaan, beniwe— aka <sup>42</sup> jawaida ja chipash 12 badiya benikaunaya jawen ibubu inun jawen tsumabu e itan yuikin: “Jabaa!” ikaibun <sup>43</sup> januxun Jesúsun jatu nemakin jau tsuki chaniyamayununbun ana yuikin:

—Matun bake pimakanwen— jatu wabainikiaki.

## 6

*Nazaret anu ana Jesús chintunkidanikiaki, na janchadan  
(Mt 13.53-58; Lc 4.16-30)*

<sup>1</sup> Janua Jesús jadi katani ana jawen mae janua yumeni anu jawen tsumabube jikishinabun <sup>2</sup> sábado juindukuntitian janu judiobu ichamisbu anuxun jatu yusinkin taewayá juni ichapabun ninkai e itan Jabaa! iki yuinamei:

—¿Na junidan, janixun jaska tsuan jawen kushipa tapinshinamen, ja atimaska nun atiduma aki unanepajaidaidan?— iwanan <sup>3</sup> —Jakia nadan, ji mabu wanikaki. Jawen ewadan, María inun, jawen betsabudan, Santiago inun, José inun, Judas inun, Simónki. Janua jawen puibudan, nenu nukube jiwediebuki— itan ikunwanma danainbun <sup>4</sup> Jesúsun jatu yuikin:

—Diosun jancha yuixunika juxun yudabu jatu yusianyan betsa betsapabun ninkakin duawaibun jakia jawen mae anu kaxun jawenabudi jatu yusindia jabun jawen jancha danainbun jabiatiandi jawen jiwe anuabu inun jawenabu betsabun danandiamisbuki— jatu watan <sup>5</sup> januxun isin teneaibu eskadabes jatu mekin jatu xuxawatan jawada atimaska Jesúsun ana jatu axunkin jatu uinmama <sup>6</sup> jaska jatuwen nuikin yusinbia jabun ikunwanbu-mawen taea uinti nishmai e inikiaki.

*Jesúsun jawen tsumabun jau jatu yusintanunbun dabe tibi yununikiaki, na janchadan*

(Mt 10.5-15; Lc 9.1-6)

Mae udama jiweabu tibi besti anu kakunkaunkin Jesúsun jatu yusinkubauntani juxun <sup>7</sup> januxun jawen 12 kushipayabu kenaxun yushin chakabu kainmati kushipa jatu yunukin juni dabe tibi yunua akeakekin yuikin: <sup>8</sup> —Kaidan, man eska baintanunbun matu yuinun ninkakanwen. Mais butankanwen, jawa buamadan. Jakia matun mestenti besti man butiduki. Ja inun, misi inun, kapankan inun, jaki pei aduti buyamaxankanwen. <sup>9</sup> Matun tae pewetametia inun sanpu ma saweaya besti bukanwen, ana betsa buamadan— akin <sup>10</sup> ana jatu yuikin:

—Kadan, jiwe bestichai mae tibi anu jiweyuxun yusinkubaintankanwen. Januxun yusinkin menetan mae betsa anudi maekubainxankawanen. <sup>11</sup> Jaska inun, janixunda matu danankin ninkakatsi ikabumaken Dios jatuki sinatai unanti wakin janua kainbainkin matun tae anua mai kudu jatuki tabainxankawanen, jau jabiaskasi maninunbunan, jawa unanmadan— jatu wa ninkatan <sup>12</sup> janua jawen tsumabu buake buakexun dabe tibi kaxun jatu yusin taewakin:

—Dioskidi man chakabumis jenetan matun shinan betsa wadikanwen— jatu wakin <sup>13</sup> yushin chakabu kainmakin kaya wakubainkin isin teneaibu xeniwen dapuxkin jatun isin mainwankubaunibukiaki.

*Nashimanika Juan tenanibukiaki, na janchadan*

(Mt 14.1-12; Lc 9.7-9)

<sup>14</sup> Janua jawada Jesúskidi chania akeakeaibu xanen ibu Herodesin ninkatan jawen tsumabu yuikin:

—Nashimanika Juan mawashina ana bestenshinxun jawen kushipa Jesúski maewa jatun jawen kushipawen atimaska jawa nun atiduma Jesúsun jatu uinmaikiki— ikaya

<sup>15</sup> januxun juni betsan jawen shinanen yuikin:

—Ja Jesúsdan, Elías ana jushianki. Elías ikibikain— ikaya betsandi yuikin:

—Ja Diosun jancha yuixunika nukun xenipabube jiwepauni betsaki, ja Jesúsdan— ikaibun

<sup>16</sup> Herodesin jatu ninkatan yuikin:

—Jabaa! Juan en jatu yunua textemabudan, ma bestenshinamenkain—inikiaki.

<sup>17-18</sup> Herodesin eska shinankin anidan, matu yuinun ninkakanwen. Badi betsatian Herodesin jawen betsa Filipon ain Herodías mebinmaken Juanen nemakin yuikin:

—Jaskakin min betsan ain mebintan min ainwainmamen? Jaskati-majaidaki. Aiwanyamawe— akubainaya atimas jawen ainkidi shinain jenekatsi ikama nuikin xanen ibu Herodesin jawen policiabu yunua Juan achixun mane dispiwen menextan bichiti jiwe medan bichiabun <sup>19</sup> xanen ibun ain Herodías Juanki sinatakin jatu tenanmanun ikaya <sup>20</sup> jakia Herodesin jaska Juan juni pepa unankin jawen ain nemakubainkin dasibi jawen yusian ninkabiakubainkin jawen shinan pewadiama ikunkainaya <sup>21</sup> janua jawen badi janu kaini taxniaya januxun jatu beyusmakin nawamakatsis ikin jabu jatubetan yunumisbu inun, soldadobu xanen ibubu inun, Galilea anu pei ichapayabu jawen jiwe anu jatu ichawaxun jatu pimaya Herodíasin jawen bene padankin Juan jatu tenanmakatsis ikaya <sup>22</sup> Herodíasin bake chipash jatu nawaxunkin xanen ibu Herodes inun ja jatu pimakin ichawa jatu benimawaya Herodesin jawen aniwa yuikin:

—Jawada min ea yuka en mia inanxanaii— iwanan, <sup>23</sup> yubakin ana yuikin:

—Jawada betsapa min ea yuka nukun mai pakea namakis paxkaxun en mia yunutiduki— akaya <sup>24</sup> ninkatan chipash nawai mainkaini kaxun jawen ewa Herodías yukakin:

—Ewaan, ¿jawa yukatanpa?— aka jawen ewan yunukin:

—Nashimanika Juan jatu textemaxun jau mia jatu bemaxunun ja ea atanwen— aka <sup>25</sup> jawen epa xanen ibu Herodes anu jawaida ana jikikain yuikin:

—Na jabiatian Nashimanika Juanen buxka ea inandiwe, sapa kenchakidan— aka <sup>26</sup> jawen juinti metexekei punu nukatan Nashimanika Juan tenankatsi ikamabia ja jatu pimaibu bebunxun jawen aniya ma yubai ninkakanxunwen taexun jawen yuba binumakatsi ikama <sup>27</sup> jakimamadi ja soldado bichiti jiwe anu jau katanun xanen ibun yunukin:

—Juanen buxka textexun ea bexuntanwen— aka <sup>28</sup> soldado kaxun bichiti jiwe medanua Juan textetan jawen buxka sapa kenchaki nanebidan bexun ja chipash inan ja chipashan jawen ewa inanikiaki. <sup>29</sup> Jaska wakin Juan tenankanxu jawen tsumabun ninkatan bexun jatu yukatan jawen yuda bibain maiwati anu maiwanibukiaki.

### *Jesúsun yudan kaian pimanikiaki, na janchadan*

(Mt 14.13-21; Lc 9.10-17; Jn 6.1-14)

<sup>30</sup> Janua jawen kushipayabu yunua butani Jesúski ana jaki dasitan jaska wakubauntanshinabu Jesúski chania akeakei meneabun <sup>31</sup> yudan kaian Jesúski ichabu janixun jawen tsumabun pitidubumaken Jesúsun jatu yuikin:

—Benanta jatu dapaxkabain jadia juindukunyunun bukanwen— jatu wabaini <sup>32</sup> janua Jesús jawen tsumabubes xaxun inatan kai janu tsua jiwe-abumanu buaibun <sup>33</sup> jakia Jesúsun jatu jenebaini kakin mae tibi dunkebainai uin Jesús dunkenanain bechibaini chibain kushibaini mae bestibu tibi anu-abudi bui Jesús jikidiama jabu dukun bebunkidi jikia maniabun <sup>34</sup> Jesús xaxuwen kai keti itan xaxu anua butukainkin yudan kaian uin jatuwen nuijaidakin jabu chaxuwan uinikauma keskabuwen taea jatuwen dabanan ikin jatu yusin taewaxun betsapa wen jatu yusinbaiaya <sup>35</sup> janua ma badi kaya jawen tsumabu Jesús dapi buxun yuikin:

—Ma badi kaikiki. Nenu tsua jiweabumaki. <sup>36</sup> Na yudan kaianen jabun jania pitidubumaki. Ja mae udama tibi anua jau misi bixun pitan jau jaskad-abaintanunbun jatu nichindiwe— akabu <sup>37</sup> Jesúsun jatu kemakin nemakin:

—Jaska jatu wama, matun jatu pimakanwen— jatu wa januxun jawen tsumabun yuikin:

—¿200 día nun dayai peiwen jatu misi bixuntanpa, jau pinunbunan?— akabu <sup>38</sup> Jesúsun jatu yukakin:

—¿Jati misi man jayamenkain? Uintankanwen— jatu wa buxun uintanxun yuikin:

—Meken besti misi inun baka dabe besti nun jayaki— akabu <sup>39</sup> januxun jawen tsumabu Jesúsun yunukin:

—Jatu ichawa akeakekanwen. Ja basiki jau tsauununbun jatu yunukanwen— jatu wa <sup>40</sup> jatu yunuabu jatidi xuku betsai 100 inun jatidi xuku betsai 50 mania akeakebaunaibun <sup>41</sup> Jesúsun ja misi meken besti inun baka dabe tsumaxun naiudi teskanxun uinkin pitikidi Dios kenwantan misi tunke tunke apakekin jawen tsumabu inankin jatu yunua ja yudan kaian inanbau-naibun januxun baka dabedi jatu inan jadi jatu inan keyuabu <sup>42</sup> dasibibun yani wai benimai pepeaibun <sup>43-44</sup> janua ja misi meken besti inun baka dabe ja dabe jatu paxkaxuna 5,000 junibun pikin texe wakanxu ichawakin 12 kuki jawen tsumabun mata wanibukiaki.

*Jesús ian bemaki bepai kainikiaki, na janchadan  
(Mt 14.22-27; Jn 6.16-21)*

<sup>45-46</sup> Janua nuku dukun bebunkidi ianenwan pukei Betsaidaudi nun jawen tsumabu kanun xaxuwen nuku yunua nun kaya yudan kaiandi jatu nich-inbaini mati anu ka Diosbe janchanun ika ka Jesús ja mesti nikén <sup>47</sup> meshu medan jawen tsumabu ianenwan namakis bui nunubainaibun Jesús ja mesti main nixun uiainyan <sup>48</sup> jawen tsumabun xaxu tuein bikaibun niwewan bekin xaxu chixtekidi butan butanaya ma pena kemaya Jesús jatuki nukuyui ian bemaki bepaikidankin jatu dainbaini <sup>49</sup> ja ian bemaki kaya uin yushin dabanan sai iki <sup>50</sup> dateaibun Jesúsun jatu janchawakin:

—En eaki. Ewen dateyamakanwen— jatu watan <sup>51</sup> janua jawen tsumabuki xaxun inaya niwewanen ian bechudunwain maianyan jabu jadakidi shinanima jatu wa Jabaa! iake iakekin <sup>52</sup> Jesúsun jaska jatu misi pimai uinbiabidankanxu jawa jatun shinan xabakabidiabuma jaska tapindiabuma inibukiaki.

*Genesaret mae anuabu isin teneaibu Jesúsun jatu xuxawanikiaki, na janchadan*

*(Mt 14.34-36)*

<sup>53</sup> Janua ianenwan pukei besusi bupananbun niwen jamakidi jatu bukin xutua mae betsa Genesaret anu keti itan jatun xaxu nexatan <sup>54</sup> janua butubainaibu yudan kaianen Jesús unantan <sup>55</sup> mae kesua anua kushibidankin isin teneaibu jatun baketiki bakebidankin Jesús anu jatu iweabu <sup>56</sup> janunkain mae udama tibi anua inun bai puchinin jiweabu anua isin teneaibudi bai tanamabidankin januxun jau Jesúsun tadi metsanun, iwanan, jatu Jesús ea axuanbu jawen tadi kexa ja isin teneaibun metsatan dasibi main kaya akeakenibukiaki.

## 7

*Jawada atimapu nun shinamistun nuku chakabuwamiskiaki, na janchadan*

*(Mt 15.1-20)*

<sup>1-4</sup> Fariseobu inun judiobu dasibibun jatun xenipabun beyakidi matu yusinun ninkakanwen. Jabun xenipabun beya tibi chibankin fariseobu inun judiobu dasibibun pidiamá mepanui taemisbuki, chakabu nemaidan. Jaska inun, piti bitani jui jikitán jawen beyawen taea jatu meuxkeabu mepanukubainmisbuki. Jaska inun, jatun xenipabun beya betsa betsapa chibankin jatun kencha dachukin jatun shumu napankin jatun mane kencha dachukin jatun dakati unpaxwen bewash bewash atan tede amisbuki. Jaska jatun xenipabun beya chibankin akeakekubainmisbuki.

Jaska wamisbuwen taea fariseobu inun Diosun jancha kenenibu yusinanamisbu Jerusalén anua beshianbu Jesúski kemaxun uinkin jaska jatun xenipabun beya chibanma Jesúsun tsumabun pidiamá mepanuabuma piabu uinkin jatu yuankin <sup>5</sup> Jesús yukakin:

—¿Jaskakin min tsumabun nukun xenipabun beya chibanma mepanuma pikanimenkain?— akabu <sup>6-7</sup> Jesúsun jatu yuikin:

—Man yusinmis keska akama man bepadamemisbukidi chanima bebunkidi Diosun matukidi yuikin:

‘Na yudabunan, jatun janchawen ea kenwanbiakin jatun jointiwen ea shinainsbumaki.

Ja inun, ichatan jawa ea kenwankin pewaisbumaki.

Jakia junibun yunuawen besti jatu yusinkubainmisbuki’,

aka jawen jancha yuixunika Isaíasin ninkatankeneniki. <sup>8</sup> Jaska waniwen taea Diosun yunua shinankinchibankma yudabun beya besti man chibamisbuki—iwanan,

<sup>9</sup> ana jatu yuikin:

—Matun beya betsa betsapa besti chibankin jakia Diosun yununi shinankiakin man akin pewaismaki. <sup>10</sup> Eska Moisin yununi ana matu shinamanun ninkakanwen: “Matun epa inun matun ewa medabewakin jatu duawakubainkanwen. Jakia matun ibubu man jatu ichakawayaya jau matun xanen ibubun matu tenanxanunbunwen”, abianiken <sup>11</sup> jaska shinanma matumebi ibubis matun jancha watan jatu yusinkin: “Matun ibubu jawadawen medabewati mabu man jaya man jaki tanabia Templo anu inankuinkatsi man butidu man shinantiduki. Tsuan matu ana bikawatidubumaki”, akin man jatu yunuchakamiski, nemakinan. <sup>12</sup> Jaska wakin jatu nemakin man jaska wakubainaibu tsuan ana matu yunu yunu atidubumaki, matun ibubu man medabewanunbunan, akin man jatu yunumiski. <sup>13</sup> Jaska wakin matumebi ibubis beya betsa chibanti matuna watan Diosun yununi jancha man jatu jakimawamiski, yunuti betsa betsapa jatu maewaxuankea akekinan, jau ja chibanunbunan—jatu watan

<sup>14-16</sup> ana Jesúsun yudan kaian kenaxun jatu yuikin:

—Man pabinkiyabuki. Matu yusinun ninkakin peidawakanwen. Piti tibi yudabun piabu jawa jatu jawen chakabuwaismaki. Jakia yudabun jointi medanua besti jawada chakabu taxnikin Dios jatu dananmamiski, yudabuki sinatamakinan—jatu watan

<sup>17</sup> janua Jesúsun yudan kaian jenebaini jawen tsumabube jiwetan jikiaibun ja miyuiwen jatu yusinxukidi ana jawen tsumabun yukabu <sup>18-19</sup> Jesúsun jatu yuikin:

—¿Matundi man ninkakin tapindiabumamen? Xabakabi matu yusinun ninkakanwen. Piti shadabu yudabun piabu jatun shinan medan naneama jawa jatun shinan chakabuwatidumaki. Jakia piti shadabu piabu jatun jatuki naneabu puiyabu kainmiski—iwanan—Jaskaken piti shadabun jawa jatu chakabuwatidumaki—jatu anikiaki. Jaskawen taea jawada piti shadabu pikin nukun puku anu nun nanemisdan, pekiaki. Jadan, jatun Dios sintamaismaki. <sup>20</sup> Jaskawen taexun Jesúsun ana jatu yuikin:

—Yudabun shinan medanua jawada chakabu jayabu taxnikinan, jaskatun jatu chakabuwamiski, Dios sinatamakinan. <sup>21</sup> Jaska inun, eska yudabu jaya jatun shinan uke medan aduabu chakabu shinankinchibankma taxnimamisbuki. Eska tibi xabakabi shinanwen kainkinan, kemukin jamapai tibi xebi jayabu chutabaunmisbuki. Ja inun, yumetsumisbuki. Ja inun, yuda betsaki yubakatan tenanmisbuki. <sup>22</sup> Ja inun, ainyan inun beneyabia betsabe chutanamemisbuki. Ja inun, yuda betsan mabuwen kemumisbuki. Ja inun, chakabu betsaa betsapa wamisbuki. Ja inun, yuda betsaa padanmisbuki. Ja inun, jatun yudawen jawada pae tibi aki paein chakabumisbuki. Ja inun, yuda betsaa jawen jiwea keskama jatu uin juni betsaa jaska jayatidumawen nui jatuwen bika tenemisbuki. Ja inun, chani chakabaunmisbuki. Ja inun, ibubis shinain kein: “En pepaki”, imisbuki. Ja inun, yuda betsawen nuikin duawakin medabewaisbumaki. <sup>23</sup> Jaska tibi yudabun shinan anua taxnikin jatu chakabuwamiski, Dios sinatamakinan—jatu anikiaki.

*Sirofenicianawa ainbun ikunwainwen taexun Jesúsun medabewanikiaki, na janchadan  
(Mt 15.21-28)*

<sup>24</sup> Janua Jesús kainkidani Tiro mae pakea anu junekain jikipanan tsuanda unainbun jiwe betsa anu jikiaya <sup>25-26</sup> janua judiobuma Sirofenicianawa ainbu jawen bake yushin chakabuya Jesúskidi chaniaibun ninkabidani Jesúski nukuxun danti itan yuikin:

—En ainbu bake yushin chakabu jayaki. Ea kainmaxuin kawe— aka <sup>27</sup> Jesúsun yuikin:

—Israelbun piti bixun kaman anu putama ja dukun jau jawen bababun yaniwayununbun metidubumaki— aka <sup>28</sup> jawen jancha ninkatan Jesús ana yuikin:

—Jeen. Yusinaan, nun kaman keskaki. Israelbun besti tapukixun piabun jawen pese kamanen pimisbuki. Jaska keskadi wakin en bakedi min ea kainmaxuntiduki— aka <sup>29</sup> jaska ikunwain unankin Jesúsun yuikin:

—Min pe yuiaya en mia medabewaxuki. Jaskawen taea min bake anua ma yushin chakabu kainkainxuki. Uinditanwen— akaya <sup>30</sup> kaxun jawen jiwe anu jikitan ja ainbu bake ma yushin chakabu kainma pes daka uintushiniki- aki.

### *Juni patani inun juyuni Jesúsun xuxawanikiaki, na janchadan*

<sup>31</sup> Janua Jesús Tiro mae pakeanu chintuntani Sidón dunkeatain Decápolis kesua anu Galilea ianenwan kexa anu jikiken <sup>32</sup> janua juni betsa patani inun juyuni Jesús anu iyuxun ea axunkin:

—Min mekenwen jaki mepitán nuku xuxawaxunwen— akabu <sup>33</sup> ja isin teneai tadi ja mesti metsunbain Jesúsun iyuxun jawen metutinin pamis- tubukuntan jaxpa watan jawen kemu jamichutan <sup>34</sup> naiudi besutan juinsi- nakin yuikin:

—Efatá!— iwanan, nukun janchawen yuikin: —Jau pabepemenunwen— aka <sup>35</sup> jawen pabinki dabe ma pabepemea inun jawen janadi ma janpekea ma jancha kayabiaya <sup>36</sup> Jesúsun jatu anu ana iyuxun jatu nemakin:

—Tsua yuiyamayutankanwen— jatu wabia kaxun yudabu betsa betsapa jatu banabima akeakeabu <sup>37</sup> e itan Jabaa! Yuu! ikin yuikin:

—Jesúsun jamapai betsa betsapa pepa atiduki, patanibu ninkamakin inun juyunibudi janchamaikikidan— inibukiaki.

## 8

### *Jesúsun 4,000 yudabu pimanikiaki, na janchadan*

(Mt 15.32-39)

<sup>1-2</sup> Januxun ana xaba betsation yudan kaian Jesúsun jatu yusinkubainaya ma xaba dabe inun besti kaya jatun piti ma keyuabu jania pitibumaken Jesúsun jawen tsumabu kenaxun yuikin:

—Ma xaba dabe inun besti ea ninkakin jatun piti ma keyuabuwen taea en jatuwen nuiyii. <sup>3</sup> Jatun jiwe anu piti mais en jatu nichian bui bai puchinin anua punu nukai babui unanyamastidubuki, betسابو chaikea beshianbu- dan— ikaya <sup>4</sup> jawen tsumabun Jesús yuikin:

—Nenu tsua jiweabumaki. Jania piti bixun nun jatu pimatidumabin— akabu <sup>5</sup> Jesúsun jatu yukakin:

—¿Jati misi man jayamen?— jatu wa

—Sieteki— akabu

<sup>6</sup> januxun Jesúsun ja yudan kaian yuikin:

—Ja main tsubaunkanwen— jatu watan ja siete misi bixun Dios kenwan- tan tunke tunke akai jawen tsumabun bibainbainkin ja yudan kaian jatu inan akeakeaibun <sup>7</sup> janua baka eskadabesdi jaya Jesúsun bixun Dios ken- wandiatan tekepakediakin jawen tsumabu inan jabun jatu inankin mebesa

<sup>8</sup> januxun dasibibun yaniwai benimai pepeaibun ja pikantu piti texea ichawakin siete kuki matawabun <sup>9</sup> janua 4,000 yudabun pikin keyuabun Jesúsun jatu yuukin:

—En ma kai buditankanwen— jatu watan <sup>10</sup> janua jawen tsumabubes xaxun nanetan bui Dalmanuta mai pakeakidi bunibukiaki.

*Jawada jawen unanmati dami atimaska fariseobun Jesúsyukanibukiaki, na janchadan*

(Mt 16.1-12; Lc 12.54-56)

<sup>11</sup> Janua fariseobu Jesúus anu bexun jabe ja inun, iwanan, unanti wakin yuukin:

—Dios anua jawen unanti dami nuku axunwen, min jawen kushipa jaya nun uinunan— akabu <sup>12</sup> Jesúus uinti nishmaxun jatu yuukin:

—¿Jaskakin jawada Diosun besti damiwatidu uinun ixun man ea yukai? Chanima en matu yuiai ninkakanwen. Jamapai betsaa uinmakin en ana matu axuntaskamaki— jatu watan <sup>13</sup> januxun jatu jenebaini xaxun nanetan ana chintunkaini ianenwan kexa betsaudi jawen tsumabu jatu iyua

<sup>14</sup> janua bui misi jakimabaini jawa piti buama misi bestichaiya besti xaxun buaibun <sup>15</sup> Jesúsun bebunkidi jatu banabimakin yuukin:

—Fariseobu inun xanen ibu Herodesin misi xaxa wati meseki. Uindakubainkanwen— jatu wa <sup>16</sup> jatu jaska wa jamakidi shinain jawen tsumabu yuinamei:

—Nun misi beama ixuken nuku jaska nemai kiki— ikaibun

<sup>17</sup> jaskakidi yuinamei janchaibu unantan Jesúsun jatu yuukin:

—¿Jaskai buxka kushikin man ninkadiabumamen? ¿Jaskai: “Nun misi beama ixuken jaska nuku yusinkiki”, iki man yuinamekanai? <sup>18</sup> Man beduyabia jawada en matu axuain man uin pewama ikunkainai. Man pabinkiyabia jawada en matu yusiai man ninka pewama idiakunkainai. <sup>19</sup> Eska uinbiaidan, misi meken besti tunkepakexun 5,000 junin kaian en jatu pimadan, ¿jati kuki jawen texe man ichawashinamen, ja pitidan?— jatu wa

—Doce kain— akabu

<sup>20</sup> —Janua betsadan, siete misi tunkepakexun 4,000 en jatu pimadan, texe wabudan, ¿jati kuki man matawashinamen?— jatu wa

—Siete kain— akabu

<sup>21</sup> januxun Jesúsun jatu yuukin:

—Matunan, ¿jaskakin man tapindiabumamen?— jatu wabaini

*Betsaida anuxun juni bekun Jesúsun xuxawanikiaki, na janchadan*

<sup>22</sup> janua bui mae betsaa Betsaida anu jikiabun juni bekuni jau xuxawanun Jesúus anu iwexun ea axunkin:

—Jaki bemepiwe— akabu <sup>23</sup> juni bekun metsunbainkin benanta iyuxun jawen beduki kemu michuxun bemepitan metseketa yukakin:

—¿Jaskada min uiain?— aka <sup>24</sup> bepexe midintan yuukin:

—Junibu uinbiakin ji mapua keska buanaibu en jatu uiain— aka <sup>25</sup> Jesúus ana jawen beduki meopia janunkain ma xuxa xabakabi dasibi uinkin pewaya <sup>26</sup> Jesúsun jawen jiwtan nichinkin yuukin:

—Na mae anu ana jadi kama min jiwe anu inun kadiwe— abainikiaki.

*Min nukun Mesías Cristoki, akin Pedron yuinikiaki, na janchadan*

(Mt 16.13-20; Lc 9.18-21)

<sup>27</sup> Janua Jesúus jawen tsumabube kai Filipon mae Cesarea chaima anu ana bai tanabainkin jawen tsumabu yukakin:

—Yudabunan, ¿en tsua ekidi yuimisbumen?— jatu wa <sup>28</sup> jawen tsuma betsan yuukin:

—Betsabun mikidi yuikinan: “Nashimanika Juan ana bestenshinaki”, mia wakanikiaki. Betsabundi yuikin: “Elías ana jushianki”, mia wadiakanikiaki. Betsabundi yuikin: “Diosun jancha yuixunika betsa ana besteinmaki”, mia wadiamisbukiaki— akabu

<sup>29</sup> januxun Jesúsun jabudi yukakin:

—Jamen matun shinankinan, ¿man tsua ea yuimismen?— jatu waya januxun Pedron jatu yuixunkin:

—Miadan, min nukun mekenika Mesías Cristoki— akaya

<sup>30</sup> Jesúsun jatu nemakin:

—En Mesías Cristoki tsua banabimayamayuxankanwen— iwanan,

*Jesús mawaxanai bebunkidi jatu banabimanikiaki, na janchadan  
(Mt 16.21-28; Lc 9.22-27)*

<sup>31</sup> Jesúsun ana jatu yuikin:

—Diosun bake en matun Juchi Kayabi Iyuadian, ea nuitapawaxankanikiki. Eki sinatakin ea ichakawakin mae xanen ibubu inun, Diosbe nukunabu janchaxunika xanen ibubu inun, Diosun jancha kenenibu yusinanamisbundi ea danankin ea jatu tenanmabu dabe inun besti xaba kaya en ana bestenxanaii— akin <sup>32</sup> jaska wakin jatu xabakabi yuiai ninkatan Pedron Jesús ja mesti paxkabain nemakin yuikin:

—Min jaskatidumaki— aka <sup>33</sup> Jesús jawen tsumabukidi nasauketan uinkin Pedro nemakin yuikin:

—Satanásan shinanwen min ea nemaii. Ana jadi jaskayamawe. Jawada Diosun uiain keska min uianmaki, eska shinankinan, jaska yudabun uinmis keskawen min ea nemaidan— atan

<sup>34</sup> januxun Jesúsun jawen tsumabu inun yudabu jabe buaibu kenaxun yuikin:

—Tsuabuda eki chiti ikatsis ikidan, jamebi jaska shinamis jakimatan: “Bika tenei en jawen taea mawatiduki”, ikin jau ea chibankubainunbunwen. <sup>35</sup> Jamen tsuabunda shinain: “En mawakatsi ikamaki”, iki jatunmebi mekeabudan, eauma mawakin jatun jiwea benuxankanikiki. Jakia ea ikunwankin en kakape yusinkin ea chibainwen taexun tenanbiabu jatun jiwea benuama jiwekuinxankanikiki. <sup>36</sup> Jaska inun, jaskati dabanan yudabun shinanma mai anua mabuwen inun jamapai tibiwen kemukin ichawai jiwemisbuden, jabudi eauma mawai benuxankanikiki. <sup>37</sup> Ja inun, jawada inananankin jawen jiwea pakatan jawen jiwekuinti tsuan bitidubumajaidaki. <sup>38</sup> Jaska inun, tsuabuda na yudabu chakabu bebunua eki inun en janchaki dakemisbuden, en Epan kushipaya jawen nai tsuma pepabube jua jabiaskadiai en jatuki dakediaxanaii— iwanan,

## 9

<sup>1</sup> ana jatu yuikin:

—Chanima en matu yuiai ninkakanwen. Na jabia man ebe mapuabudan, betsabu man mawadiamaken Dios Xanen Ibui taei kushipajaidai man uinxanaii— jatu anikiaki.

*Jesús jawen yuda damitan jatu uinmanikiaki, na janchadan  
(Mt 17.1-13; Lc 9.28-36)*

<sup>2</sup> Janua ana 6 día binuaya Pedro inun, Santiago inun, Juan Jesúsun katubainkin jatu iyui kakin mati keyatapajaida mapeketan janua jatu bebutun Jesús dami <sup>3</sup> jawen tadi juxupajaidai chaxajaidai tsuan tadi patsakin juxupa wakin jaska waisma keskai ikaya <sup>4</sup> jaskaya jabianudi Elías inun

Moisés Jesúsbe janchai uin <sup>5-6</sup> datejaidaibun jadakidi shinantima Pedron Jesús yuikin:

—Yusinaan, nun nenu juadan pejaidak. ¿Pean xubu dabe inun besti matu waxunpa, betsa mina inun, betsa Moisésna inun betsadi Elíasinadan?— ikaya <sup>7</sup> janua samama nai kuin bekin jatu bepuaya nai anua jui taxnikin yuikin:

—Nadan, en bakeki. En bechipaijaidaii. Ninkaidakubaikanwen— jatu waya <sup>8</sup> samama bedu bedu ikin uin ja jabe mapukanxu ana niama Jesús besti nia uiainbun

<sup>9</sup> janua mati keyatapa butebidankin Jesúsun jatu yuikin:

—En matun Juchi Kayabi Iyua matu mawaxuntan en ana matu bestenxundiamaken jawada na jaska man uinxudan, tsua yuiyamayuxankanwen— <sup>10</sup> jatu wa tsua yuama jatunmebi yuinamekin: “Mawatan ana bestenxanaidan, ¿jaskadamen?” ixun <sup>11</sup> ana jawen tsumabun Jesús yukakin:

—Yusinanbun jatu yusinkin Diosun jancha kenenibuwen jatu yuikin: “Nukun mekenan Cristo judama bebunkidi Elías juxanikiki”, ikidan, ¿jaskai imisbumen?— akabu <sup>12</sup> jatu kemakin:

—Chanima Elías bebunkidi ana juxun dasibi benawakin pewakin tae-waimaki. Ja dikabi, Diosun jancha yuixunikabun kenekin: “Diosun bake jatun Juchi Kayabi Iyuadan, jabun danankin ichakawabu nuitapax-anikiki”, adianibuki. <sup>13</sup> Jakia eanan, en matu yuiaii. Elíasdan, chanima ja dukun juimaxun jatu yusianyan danankin Elías Diosun jancha yuixunika ichakawakin jaskadaxanaikidi Diosun jancha yuixunikabun bebunkidi jakidi kenenibu akin jabiaskadi wakin ichakawaimabuki— jatu abidani

*Juni bake yushin chakabuya Jesúsun kainmanikiaki, na janchadan  
(Mt 17.14-21; Lc 9.37-43)*

<sup>14</sup> janua Jesús jawen tsuma betsabuki nukunun ika jui janu yudan kaian jawen tsumabuki icha Diosun jancha kenenibu yusinanamisbube jatube icha yuinamea akeakeaibu Jesúsun uinkubidanaya <sup>15</sup> Jesús juai dasibibun uin benimajaidai kushibaini jaki nukuxun yukakin:

—¿Min ma juai?— akabu <sup>16</sup> januxun Jesúsun jatu yukakin:

—¿Jawai Diosun jancha kenenibu yusinanamisbube jadakidi man janchawen yuinamei ikai?— jatu waya

<sup>17</sup> ninkatan juni betsan yuikin:

—Yusinaan, en juni bake yushin chakabun juyu wani en mia anu iwexuki. <sup>18</sup> Ja yushin chakabun achixun duxku imakin tin imatan mai pusama daxka daxka iki bakuxyai xeta yenx yenx iki bakux kebus iki chadish chadish imakin jaska wakin babu wakubainmiski. Jaskamisken: “Jau yushin chakabu ea kainmaxununbun ika”, min tsumabu en jatu shinanbiabidana tsuan jawa ea kainmaxuntidubumaki— aka

<sup>19</sup> mapuabu Jesúsun jatu yuikin:

—Ikunwainsbumaan, ¿jatiki matu medabewai ana en matube jiweyuxanai? Nedi iwekanwen, ja bakedan— aka

<sup>20</sup> iweaibun yushin chakabun Jesús bechitan ja juni bake ana duxku ima main tin itan taka taka iki kemu bus bus ikaya <sup>21</sup> Jesúsun jawen epa yukakin:

—¿Jatian bedukui taenimen?— aka jawen epan yuikin:

—Bakeishta iki taeniki. <sup>22</sup> Ja yushin chakabun tenanun, iwanan, jawen-chains chi medan napukin inun jene medandi pukumiski— atan —Jamapai min atiduwen taexun ¿en bake min ea xuxawaxuntidumen? Nukuwen nuikin min atidudan, ea medabewawe— aka

<sup>23</sup> Jesúsun yuikin:

—En mia medabewatidudan, ¿min shinanmamen? Min ea ikunwanyan jamapai betsa betsapa en mia axuntiduki— aka

<sup>24</sup> jawaida jawen epan unanxubima yuikin:

—En mia ikunwaiin. Ana en ikunjaidawanun uinmakin ea medabewawe— aka

<sup>25</sup> yudan kaian ichabidanbidanaibun uinkin Jesúsun yushin chakabu yuikin:

—Yushin pata wakin inun juyu wamistuun, ja juni bake medanua kaindikaintanwen. Chintunkidan ana jaki jikiyamaxanwen— akaya

<sup>26</sup> yushinin bis imatan ana duxku imabaini kainkainaya ja juni bake mawa keska dakaken ichapabun yuikin: “Ma mawaki”, ikaibun <sup>27</sup> januxun Jesúsun metsunxun benia benikauan niken

<sup>28</sup> janua Jesús jiwtan jikiaya jawen tsumabus jabe jikibain ana yukakin:

—¿Jaskakin ja yushin chakabu nukun nun kainmatiduma ixumen?— akabu

<sup>29</sup> Jesúsun jatu kemakin yuikin:

—Na eska yushin chakabu kainmakinan, Dios dayuikin ea a bestikubainkin man kainmatiduki— jatu watan

*Mawaxanaikidi ana ja kachu Jesúsun jatu yuinikiaki, na janchadan  
(Mt 17.22-23; Lc 9.43-45)*

<sup>30-31</sup> janua Jesús jawen tsumabu besti tadi iyuxun yusinun ika yudabu uinmama jatube june kai Galilea napaibaini kakin jatu yusinkin:

—En matun Juchi Kayabi Iyuadan, tsuanda ea jatu achima ea tenanbu xaba dabe inun bestitian en ana bestenxanaii— jatu wa <sup>32</sup> jaska jatu yuiai jawen tsumabun jawa ninkamajaida jawa yuiai dabanan datekin Jesúsun ana jawa yukama inibukiaki.

*Tsuanda jatu binuntidukidi Jesúsun jatu yusinikiaki, na janchadan  
(Mt 18.1-5; Lc 9.46-48)*

<sup>33</sup> Janua Cafarnaúm maewanu bei jiwtan jikiabun Jesúsun jatu yukakin:

—Bai tanabidanidan, ¿jawakidi man yuinamekubidankanxumen?— jatu wa

<sup>34</sup> bai tanabidani janchai yuinamekubidani:

—Jesúfbe xanen ibukin ¿nukunan, jadatubun betsabu nun matu binunxanimenkain? ¿Eamenkain?— iki yuinamekanxu dakei jawa yuiai pes maniabun <sup>35</sup> Jesúsun tsauxun jawen 12 tsumabu kenaxun yuikin:

—Jadatuda man xanen ibu pepa ikatsis ikaidan, ja dukun yuda dasibibu medabewakin jatuwen nuikin jabun tsuma keska ikubainkin jau jatu duawakubainunbunwen— jatu watan

<sup>36</sup> januxun bakeishta betsa jawen tsumabu nashui abidan iwexun ikuxun jatu yuikin:

<sup>37</sup> —Ea duawanun, iwanan, na bakeishta keska wakin tsuada en kenaya juaidan, ikin ea akawakin man duawatiduki. Jabiaskadi wakin ea besti duawama jatun ea yununi Diosdi jabun duawaxankanikiki— jatu waya

*Tsuanda nuku dananma nukun jaibuki, anikiaki, na janchadan  
(Mt 10.42; Lc 9.49-50)*

<sup>38</sup> Juanen Jesúsun yuikin:

—Yusinaan, juni betsan min kena kushipa paewen yushin chakabu kainmai nun uinbidanshinaki. Nukubetan mia chibanmaken nun nemakin nun bextepaibia nuku ninkama ishianki. Jadi nun nemashinadan, ¿pemen?— aka

<sup>39</sup> Jesúsun jatu yuikin:

—Nemakin man jatu bextetidumaki. Tsuada nukuki sinatamadan, nuku medabewaikiki. Jawada atimaska yudabun atidubuma en kena kushipawen abiakin samama ekidi chakabu yuitidubumaki. <sup>40</sup> Ja inun, tsuada nukuki

sinatamadan, nuku medabewaikiki. <sup>41</sup> Ja inun, man ea ikunwainbuwen taexun jamapai tibiwen matu duawakin unpax amai keskawen matuwen dabanan ikin matu inainbudan, chanima Diosun jatu duawaxanikiki, pepawen manakukinan— iwanan,

*Tsuanda jawada chakabu jatu memaidan, meseakiaki, na janchadan  
(Mt 18.6-9; Lc 17.1-2)*

<sup>42</sup> jabias bake ikuxun ana jawen jatu shinanmakin yusinkin:

—Tsuabunda jawada Diosun nemamis inun yunumis chibanna chakabu wamisbun bake mishtinbun ea ikunwain jatu padankin chakabu jatu ama akeakediamisbudan, jaskawen taexun Diosun jatu kupijaidaxanaiwen taea jawen xekiwan deneti mishki ewapa nexaxun teumatan ianenwan medan pukua jasadon, jawen kupti bexmas mekeanaiii. <sup>43-48</sup> Jaska man ikatsi ikamadan, jawanda matu chakabuwamis bextekekin jawaida jenedikubainkanwen. Janua min meken betsa kasmai min tae betsa kasmai min bedu betsa kasmai jadatuwenda mia chakabuwamis ja mextekeia keskakin jamapai chakabu man imis inun man amis tibi jawaida bextekei jenetiki. Min meken dabeya kasmai min tae dabeya kasmai min bedu dabeyadan, janu chi nukaisma anu inun janu nami xena debuisma anu chi medan mia puta pemajaidaki. Jakia min meken bestichaiya inun min tae bestichaiya inun min bedu bestichaiyadan, Dios anu niti ikama min jiwenunbadiai pejaidaki.

<sup>49</sup> Chi keskawen man ikunwainbu tibi chuxakin akawakin matu bika tenemaxankanikiki. Matu jaska wabiabu Diosun jawen kushipawen matu mekeia man kushipaxanaiii, tewen nami mekemis keskaidan. <sup>50</sup> Tewedan, nami chaputima wati inun nami meketibia payukui keyumiski. Matubunan, Diosun jancha man unainbuwen taexun matunabu yusiin man tewe batawen meketi keskabuki. Jakia jaskai tewe jawen bata keyu bumis ana meketiduma keskama Diosun jancha ninkakin pewatan ea chibainbube medabenain unanuma jiwekubainxankanwen— jatu anikiaki.

## 10

*Juni inun ainbu jenenametimakidi Jesúsun jatu yusinikiaki, na janchadan  
(Mt 19.1-12; Lc 16.18)*

<sup>1</sup> Janua Cafarnaúm anua kainkaini kai Jordán jene kexa betsaudi estekidi Judea mai pakea anu jikia yudan kaian ana jaki ichaibu jaskabidanaibu jatu yusinmis keskaibu Jesúsun ana jatu yusianyan <sup>2</sup> januxun fariseobu jatiditun Jesús unanti watan jaki bepadamenun ika jaki kematan yukakin:

—Juninan, ¿jawan ainan jenetimen?— akabu <sup>3</sup> Jesúsun jatudi yukakin:

—Moisinan, ¿jaskada nukun xenipabu yusinkin yununimen?— jatu wa

<sup>4</sup> jabundi yuikin:

—Moisin yusianan, ainbu jenekatsi ikinan, jawen jeneti unaki kenexun inantan jenebaintiki, ani nun uinmiski— akabu

<sup>5</sup> januxun Jesúsun fariseobu jatu yuikin:

—Chanimaki. Matu keska matun xenipabu uinti kushiken jaska Moisin jatu yununiki. <sup>6</sup> Jakia Diosun dasibi damiwakin taewakinan, juni inun ainbu jau ja dabe ketaxamenunbun, iwanan, Diosun jatu damiwaniki. <sup>7</sup> Jaskaken jawen ibubu dapaxkabain juni ainyantan jawen ainbe ketaxameawen taea <sup>8</sup> ana yuda dabema jabias yuda bestichai keska jiwtidubuki. <sup>9</sup> Janua Diosun juni inun jawen ain yuda bestichai keska jatu wa junin jawen ain dapaxkabainkin jenetimajaidaki— jatu watan

<sup>10</sup> janua Jesús jawen tsumabube jiwetan jikia maniabun jaska jatu yusinxu ana yukabu <sup>11</sup> Jesúsun jatu yuikin:

—Tsuabuda jawen ain jetan ainbu betsa ainwankinan, jawen ain xeni danankin Diosun yununidi danain chakabumisbuki. <sup>12</sup> Jaska inun, ainbun jawen bene jetan juni betsa benewakinan, jawen bene xeni danankin Diosun yununidi danain chakabudiamisbuki— jatu anikiaki.

*Bake mishtinbu unanuma wakin Jesúsun Dios jatu yukaxunikiaki, na janchadan*  
(Mt 19.13-15; Lc 18.15-17)

<sup>13</sup> Janua jatun bakebu jau ea Jesúsun mexunkin unanuma waxunun, iwanan, janu iwebidanbidanaibu jawen tsumabun jatu nemaya <sup>14-15</sup> Jesúsun uin jawen tsumabuki sinatakin jatu yuikin:

—Jatun bakebu ea anu iweaibu jatu nemayamakanwen. Dios xanen ibuaitianan, na bake mishtinbu eki dateabuma keskabu besti Dioski dasix-ankanikiki— jatu watan

<sup>16</sup> januxun bake mishtinbu ikuxun mamepixun duawakin bestibu jatu yuikin:

—Dios miwen nuikin mia bechipaiaya unanuma yumei pekanwen— jatu wa akeakenikiaki, Jesúsun.

*Juni mabu ichapa jaya Jesúsbe janchanikiaki, na janchadan*  
(Mt 19.16-30; Lc 18.18-30)

<sup>17</sup> Janua Jesús ana kainkainaya juni betsa kushikidan jaki nukutan ja bebun danti itan yukakin:

—Yusinan pepaan, ¿Mia yukapa? Jiwea kayabi bikinan, ¿jaska kayatan en bitidumen? Ea yuiwe— aka

<sup>18</sup> Jesúsun yuikin:

—¿Jaskakin ea kenakin: “Pepaan”, min ea wai? Dios bestiki, pepadan, ¿min unanmamen? <sup>19</sup> Mianan, Diosun yunuti inun jawen nematidan, ¿min unanmamen? Eska yuinidan: “Ainbu min ainma chutatimaki. Juni betsaki sinatakin tenantimaki. Yumetsutimaki. Juni betsaki chanichakatimaki. Padananantimaki. Ja inun, min epa inun min ewa duawakubaintiki”— aka

<sup>20</sup> ja juni mabuyatun Jesús yuikin:

—Chanimaki. Dasibi Diosun yunuti inun jawen nemati jaskadan, en ma unan keyuaii. Bakeishtatun tapinixun en chibankubainmiski— aka

<sup>21</sup> Jesúsun uin jawen nuikin ana yuikin:

—Min pe ea yuiaii. Na besti min shinandiamaki. Mia yuinun ninkawe. Nai anua Diosun manakuti pepa bikatsis ikin min jawada dasibi min jaya jatu inan keyutan ja pei min bishian ja nuitapaibu inankuintan chintuanma ebe kakin ea chibankubainxanwen. Min jaskakunkainaiwen taexun jiwekuian min bixanaii— aka

<sup>22</sup> Jesúsun jaska yuia ninkai jawen mabu ichapawen nui juinti nishmai keyutan ana jawa yuiama benikainaya

<sup>23</sup> Jesúsun jatu uinbaunkin jawen tsumabu yuikin:

—Juni mabujaidayan, Dios xanen ibuai anu jikinun ikaidan, bika-jaidaki— jatu wa

<sup>24-25</sup> jawen tsumabun jawen jancha ninkai Jabaa! ikaibun Jesúsun ana jatu yuikin:

—Chanimaki. Ja yuinaka ewapa camellodan, ja xumux jawen chixuiki jawen yuda kainmakinan, tsuan atidumaki. Jakia jaska keska bikadan, juni mabu ichapayadan, jawen mabu besti shinain jawen nuikin jatun shinan betsa wama Dioski chiti itidubumaki— jatu waya

<sup>26</sup> jawen jancha ninkatan pes uinti nishmaxun yuikin: Jabaa! iki yuinamekin:

—Jaskakenan, ¿tsua Diosun nuku mekekin paxawakin jiwematidumen?—ikaibun

<sup>27</sup> jatu tibi uinbaunkin yuikin:

—Tsuada yudabun matu jaska waxuntidubumabiaken Diosun besti dasibi matu axuntiduki— jatu wa

<sup>28</sup> Pedron yuikin:

—Yusinaan, nukunan, mia chibankatsi ikinan, jawada nun jaya dasibi bashikin keyubidanimaxun nun ma mia chibapakeaii— aka

<sup>29</sup> Jesúsun ana jatu yuikin:

—Chanima en matu yuiai ninkakanwen. Jadatutunda ea chibankin Diosun jancha kakape yusintanun ixun jawen mae jenekin jawen betsabu inun, jawen puibu inun, jawen epa inun, jawen ewa inun, jawen bakebu inun, jawen bai jenekin keyubainken <sup>30</sup> tsuabunda jamapaiwen jatu bika tenemabiaibun na jabiatian Diosun jatun pepawen manakujaidakin ana jiwe betsabu inankin, betsabu inankin, puibu inankin, ewabu inankin, bakebu inankin, bai inankin jatu jaska waxunxanikiki. Jatu jaska wanixun nai anu jatu jabe jiwemaxanikiki, ikibi imakinan. <sup>31</sup> Ja inun, yuda ichapabu na jabiatian kenkin yunumisbudan, Diosun jatu kenwanma ixanikiki. Jakia betsabu na jabiatandi jawa kenkin yunuibumadan, Diosun jatu kenwankin xanen ibujaidawaxanikiki— jatu anikiaki.

*Mawaxanaikidi dabe inun bestiki ana Jesúsun jatu yuiniaki, na janchadan (Mt 20.17-19; Lc 18.31-34)*

<sup>32</sup> Janua Jerusalén bai tanabainaibun Jesús bebukainaya jaki chiti ikabu jachun bui supuibaini jadia Jesúski jaki sinatamisbu anu kaya jawen tsumabun jaska shinain yuinamekubainaibun yudan kaian jatube bui dateyabi chibainbun januxun Jesúsun jawen 12 tsumabu besti kenaxun jatu tadi iyuxun jaska wakin ichakawaxanaibu ana jatu yuikin:

<sup>33</sup> —Jerusalén anu na jabiatian nun kaidan, man unaiin. Januxun Diosun bake en matun Juchi Kayabi Iyua Diosbe nukunabu janchaxunika xanen ibubu inun Diosun jancha kenenibu yusinanamisbu jabu tsuanda jatu ea achimaxanikiki. Jabun ea tenankatsis ikin nawá betsabu ea jatu inanbu

<sup>34</sup> jabu eki kaxekin eki kemu michukin ea kusha kusha axun ea tenanbu xaba dabe inun besti kaya en ana bestenxanaii— jatu wanikiaki.

*Santiago inun Juan daketapaibukidi Jesúsun jatu yusinikiaki, na janchadan (Mt 20.20-28)*

<sup>35</sup> Janua Zebedeon juni bake dabe Santiago inun Juan Jesús dapi kaxun yukakin:

—Yusinaan, nun mia jaskakidi yukaidan, nuku axanwen— akabu

<sup>36</sup> —¿Man jawa ea yukai?— jatu wa

<sup>37</sup> jabun Jesús ana yuikin:

—Min xanen ibu kushipai pepaya mibe nun xanen ibudianun mibe nuku tsauemaxanwen, betsabu min yusiudi inun betsabu min yusmaudidan— akabu

<sup>38</sup> Jesúsun jatu kemakin:

—Jaska man ea ea akaidan, shinankin man ninkadiabumaki. Jawada en ixanai keskadan, ¿man idiatidumen?— jatu wa

<sup>39</sup> —Nun idiatiduki— akabu

Jesúsun ana jatu yuikin:

—Chanima ea ichakawaibu en isin tenexanai keska man tenediaxanaii.

<sup>40</sup> Jakia en yusiudi inun en yusmaudi man ebe xanen ibutidudan, en matu

yunutidumaki. Jakia en Epa Diosun jatu katunidan, ebe xanen ibux-ankanikiki—jatu waya

<sup>41</sup> janua Santiago inun Juan jaska yuka ikaibu Jesúsun tsuma betsa meken dabetibun ninkai jatuki sinataibun <sup>42</sup> januxun Jesúsun jawen tsumabu keyu ichawaxun jatu yuikin:

—Jaska nawa xanen ibubun jawenabu ja akin mese wabetanan kushipawen jatu yunukin jatun tsumabu jawen kushipa jatu uinmakin jatu babu watan yunumisbu man unaiin. <sup>43</sup> Jakia matubunan, jaska shinanya-makubainkanwen. Matu anua tsuada xanen ibukatsis ikinan, jau dasibi matu medabewakin duawakubainunbunwen. <sup>44</sup> Jabiaskadiai tsuada xanen ibukatsis ikidan, dasibibun tsuma jau idiakubainunbunwen. <sup>45</sup> Jamen ea iki juidan, en matun Juchi Kayabi Iyuabiadan, jau ea duawanunbun ika en juamaki. Jakia matu debuxunkin yuda ichapabu benuabu mexpamatan matu jiwemanun ika en juniki—jatu abaini

### *Jesúsun Bartimeo bekun xuxawanikiaki, na janchadan*

(Mt 20.29-34; Lc 18.35-43)

<sup>46</sup> Janua Jericó maewan anu Jesúsun jawen tsumabube jikia ibai janua Jesúsun kainkaini yudan kaian inun jawen tsumabube kaya janu bai kexa anu Timeon juni bake Bartimeo bekun tsauxun pei jatu yukamistun <sup>47</sup> Jesúsun Nazaret anua yumeni yui jakidi janchabainaibu ninkatan unanxubima jawenchains yuikin:

—Davidin babaan, ewen nuiwe— akaya

<sup>48</sup> ichapabun nemabiabu ana unanxubimajaida yuikin:

—Davidin baba Jesúsuun, ewen nuiwe— abaunbaunaya

<sup>49</sup> Jesúsun niti itan junibu jatu yuikin:

—Kenakanwen—jatu wa

januxun juni bekun kenakin yuikin:

—Mia kenaikiki. Shinan chankain benidikidanwen— akabu

<sup>50</sup> jawen yabukuti peputakatan jawaida benikidan Jesúski nukua <sup>51</sup> Jesúsun yukakin:

—¿Mia jawa medabewapa?— aka

juni bekunman yuikin:

—Xanen ibuun, ana en uinun ea bepexwe ika en ikaii— aka

<sup>52</sup> Jesúsun yuikin:

—Ana uindiwe, min ea ikunwainwen taea xuxatan inun kadiwe— aka samama Bartimeo bepexetan Jesúsun chibanbainaya

## 11

### *Jerusalén maewan anu Jesúsun jikinikiaki, na janchadan*

(Mt 21.1-11; Lc 19.28-40; Jn 12.12-19)

<sup>1</sup> janua Jesúsun Jerusalén anu kai Betfagé inun Betania ja mae dabe anu kemai Olivos Mati tetanbainkin jawen tsumabu dabe yunukin:

<sup>2</sup> —Ja mae besuudi kayanbis buxun burro nexea tsua jaki katsaumediama bechitan tepetan beyutankanwen. <sup>3</sup> Jaska inun, tsuanda matu yukakin: “¿Jawakatsi man tepeai?” matu wa yuikin: “Nukun Xanen Ibun biyukatsis ikikiki. Samama jabianudi nuku bemaxanikiki”, atankanwen—jatu wa

<sup>4</sup> ja dabe buxun jiwe beputi dapi burro nexea bai namaki nia bechitan tepeaibun

<sup>5</sup> jabianudi manixun yukakin:

—¿Jaskakin burro man tepeai?— jatu waya

<sup>6</sup> januxun Jesúsun jaska jatu yuixukidi yuiabu:

—Peki. Buxunyutankanwen— jatu wa <sup>7</sup> tepeten januxun jatun bemakia tadi burro kamaki kabekanbain Jesús anu buxuanbu Jesús jaki inatan kat-saumekainaya <sup>8</sup> ichapabun jatun bemakia tadi bai namaki nabekanbainai-bun janua ana betsabundi xenpan mextexun jabiaskadi wakin nabekanxun-diabainaibun

<sup>9</sup> bebubainaibu inun chipu beaibun jui kushipawen jawenchains yuibainkin:

—Aichu! Aichu! Ja Diosun kushipaya juaidan, benimawakin du-awanankanwen. <sup>10</sup> Nukun xenipabu David ipauni keska xanen ibujaidai juikiki. Dios kenwanxunankanwen— akubaini bui

<sup>11</sup> janu Jerusalén anu jikixun januxun Dios kenwanmisbu Templo je-maintin anudi Jesús jikidaxun janua jawen jamapai dasibi uinbaunkin keyutan janua ma badi kaya kainkaini jawen 12 tsumabube Betania anu bua

*Ji bimiuma Jesúsun yupunikiaki, na janchadan*

(Mt 21.18-19)

<sup>12</sup> uxashini xaba betsation meshukidi Betania anua bunikainkin <sup>13</sup> ji betsa higuera benanta tupan nia Jesúsun bechitan jaska bimiyamenkain uintanun ika kaxun jawa bimi jayama jawen peijaida besti uinkin janu bimimistian idiamaken <sup>14</sup> januxun Jesúsun ji bimiuma yupukin:

—Jau tsuan taska min bimi ana piyamaxanunbunwen— akai jawen tsum-abun ninkabaini buaibun

*Templo jemaintin Jesúsun pewakin xunpi wanikiaki, na janchadan*

(Mt 21.12-17; Lc 19.45-48; Jn 2.13-22)

<sup>15</sup> janua Jerusalén anu Jesús ana jikitushitan janu Templo jemaintin kenekauanu jikikain januxun jawen Dios daewati inabu chaxuwan inun, ina awa inun, deiwan inananainbu inun biaibu jatu nichinkin taewakin pei bianananmisbun tapu nadabekin deiwan inanmisbun kenedi nadabediakin keyutan <sup>16</sup> janu jawen jemaintin kapukekin jau jawada iabaunyamanunbun jatu nemaxun <sup>17</sup> ana xanen ibubu jatu chitekin yuikin:

—Jawen Templokidi jawen jancha yuixunika Isaías Diosun kenemani matu yuinun ninkakanwen: “En jiwedan, janua yuda betsa betsapabu ebe janchakin ea kenwanxankanikiki”, ibianiken na jemaintin xabatudu anua matubu padananankin yumetsun jiwe man wamisbuki— ikaya

<sup>18</sup> jawen jancha ninkai Diosbe nukunabu janchaxunika xanen ibubu inun Diosun jancha kenenibu yusinanamisbun shinankin jabiadi yudan kaia-nen jawen jancha ikunwainbuwen taea jaki sinatai Jesúsun yusinkin jatu binutidu shinain jaki datei jaskatan tenantimen ika yubakai taeaibun <sup>19</sup> ma meshuaya Jesús jawen tsumabube Jerusalén anua kainbainaibun

*Higuera ji Jesúsun yupubainshina xananikiaki, na janchadan*

(Mt 21.20-22)

<sup>20</sup> janua meshukidi ana bai tanabainkin ja ji bimiuma anu ana dainbainkin jawen tacha inun jawen ibu ma xanashinken <sup>21</sup> Jesúsun jaska yuiai ninkash-inxun Pedron shinankin Jesús yuikin:

—Uian. Yusinaan, ja ji bimiuma min yupushinadan, ma xanashinabin— akaya

<sup>22</sup> Jesúsun jatu kemakin:

—“Diosun jamapai atiduki”, ikunwankanwen— itan <sup>23</sup> —Chanimen matu yuiaii. Na mati tsuanda yuikin: “Matipaan, mimebi tsekekain ianen-wan medan pukutanwen”, akin man shinan dabewen shinanwen akama man ikunwankin jadi yuiaiwen taea Dios matuwen dabanan ikin matu axunxanikiki. <sup>24</sup> Jaskati en matu yuiaii. Diosbe janchakin: “En jaska

bikatsis ikaii”, ikin yuikubainkanwen. Man shinan dabeyamaken jaska Diosun matu yunuaya man bixanaii. <sup>25</sup> Jaska inun, Dios dayui jabe jan-chakin tsuanda jawada matu chakabuwashina jaki sinatabiatan jawaida jabe daekubainkanwen, ana jas shinanmadan. Man jaskaibu matun chak-abudi Diosun matu buaxuntan ana shinanma idiaxanikiki. <sup>26</sup> Jamen yuda betsabun matu ichakawabu man jatube daenameamaken Dios nai anuatur matun chakabudi matu buaxunamadi ixanikiki— jatu abidani

*Jaska kushipakin jatu binuaikidi Jesús yukanibukiaki, na janchadan  
(Mt 21.23-27; Lc 20.1-8)*

<sup>27</sup> janua Jesús inun jawen tsumabu Jerusalén anu ana chintunkidan jikitán janu Templo jemaintin anu Jesús jikixun uiantani niken Diosbe nukunabu janchaxunika xanen ibubu inun, Diosun jancha kerenibu yusinanamisbu inun, mae xanen ibu betsabu ja dapi buxun <sup>28</sup> yukakin:

—Na min eska waidan, ¿tsuan jawen kushipa mia yunuimawen min aki ikai? ¿Tsuau jawen kushipa mia inainmamen, min jaska wanunan?— akabu

<sup>29</sup> Jesúsun jatu kemakin:

—Entsedi en matu yukai matun dukun ea yui taewakanwen, man ea yuiaya jawada man ea yukai en matu yuidiae ninkakanxunan. <sup>30</sup> Nashimanika Juan jau jatu nashimanun yunukinan, ¿tsuan kaya yunuyama man shinain, Diosundaka, junibundaka? Ea dukun yuikanwen— jatu wa

<sup>31</sup> janua jabudi june yuinamekin:

—“Diosun yunuyamaki”, nun wadan, “¿Jaskakin Juanen jancha man ikunwanma ikimamen?” iwanan, nuku kunyan atiduki. <sup>32</sup> Jamen yuda midimabun Diosun Juan yunuyamakidi jabun ikunwainbuwen taea jabuki datekin yuikin: “Junibun yunuyamaki”, nun wapanan nun jaska yuitidubuki— itan <sup>33</sup> jabun Jesús yuikin:

—Nun unanmaki— akabu

Jesúsun jatu yuidiakin:

—Jaskakenan, tsuanda jawen kushipawen ea yunuimadan, eandi en matu yuiamaki— jatu watan

## 12

*Dayakapabu mekenan besumakidi Jesúsun jatu yusinikiaki, na janchadan  
(Mt 21.33-46; Lc 20.9-19)*

<sup>1</sup> jabianuxundi miyuiwen Jesúsun xanen ibubu jatu yusinkin:

—Juni betsan bai waxun uva bimi batapa banatan mishkiwen dakenbaunkin keyutan janua jaki uva tsiniti watan januxun dasibi uinbaanti jiwe pishta keyatapa watan januxun jau bimi dabukun ea inanxanunbun, iwanan, juni betsaa dayakapabube jabube yubakatan ibu keska wakin yunuyubaini chai kaimaken <sup>2</sup> janu ma kani tsekatitian ikaya bai ibuan jawena dabukun jau yukatan ea bixuntanun, iwanan, jawen tsuma betsaa yunua ka <sup>3</sup> jabun jawena inankatsi ikama uva bimi mekeabun achixun kusha kusha axun jawa inanma mais kaya <sup>4</sup> januxun bai ibuan ana jawen tsuma betsaa yunudia ka kunyan axun makushkin mapextan nichindiabu kadiaken <sup>5</sup> januxun bai ibuan ana jawen tsuma betsaa yunua ka tenanbun januxun betsaa betsapadi yunua buabu jatu kusha kusha akin jatidi tenanbun

<sup>6</sup> jatu jaska tibi wabia jabun inanbumaken jawen bake bestichai bechipai-jaidai ja besti niti itanaya jakidi shinankin: “En bake en yunua kaya jaki mesekin en bimi ea ja inanxuntidubumenkain”, iwanan, yunua ka <sup>7</sup> jawen bake jatuki kemai kai bechitan yuinamei: “Bai ibu mawashinken na jawen baken jawen bai tibi inun jawen jiwe tibi dasibi jawenawayuikiki. Na

bai nukunas nun wanun tenanankanwen”, ixun <sup>8</sup> achixun tenantan bai tsisumen putanibuki—iwanan,

<sup>9</sup> —¿Jaskakenan, ja bai ibuan jaskada jatu waxanimenkain? Matu yuinun ninkakanwen. Bai ibu jawenabube juxun bai anu dayamisbu jatu tenantan januxun juni betsabu jawen bai anu jau dayaxununbun jatu yunuxanikiki—iwanan

<sup>10</sup> —¿Diosun jancha kenenibu uinkin man yuismamen? Matu ana shinamanun ninkakanwen:

‘Jiwe wanikabun mishki dananbiaibun jabias mishki Diosun bixun dexun makedex wakin jawen kene mestenwan keska wakin

<sup>11</sup> nuku uinmakin jabaa! imakin nuku jadakidi shinantima waxanikiki’, jatu waya <sup>12</sup> na miyuiwen jatu ja akin chiteai unankin xanen ibubun Jesús achikatsis ibiai yudan kaianki mesekin jawa meama jeneyunibukiaki.

*¿Ja gobierno dayaxunmisbu pei pakatimen? ikaibu Jesúsun jatuyununikiaki, na janchadan*

(Mt 22.15-22; Lc 20.20-26)

<sup>13</sup> Januxun Jesús jaska waxun tenantima jawen padantan romano xanen ibu ja amakatsi ikin judio xanen ibubun fariseobu inun Herodeski chiti ika betsabu Jesús anu jatu yunuabu <sup>14</sup> jaki bepadamebain yuikin:

—Yusinaan, yuda betsabu miki sinatabiaya jawa jatuki dateama chanima jancha besti yusinkin jaska wakin Dios chibantidubu besti min jatu xabakabi yusinkubainaidan, nun unaiin. Jaskawen taexunan, ¿jaskada min shinainmenkain mia yukapa? Ja Romano xanen ibu Césarn nuku pei yukamisdan, ¿jaska wananaxpana? ¿Pakananaxpana? ¿Pakatimadaka?— akaibu

<sup>15</sup> Jesús jawen bepadankin jamakidi yuimatan ichakawatidubu unankin jatu yuikin:

—¿Jaskadawen man ea unanti wakin bepadanun ika ikanai? Jawen gobierno impuesto pakati pei jexe betsaa ea uinmakanwen— jatu wa

<sup>16</sup> betsaa bexun inanbu uinkin Jesúsun jatu yukakin:

—Nadan, ¿tsuan besu inun tsuan kena neamen? Ea yuikanwen— jatu wa jabun yuikin:

—Romano xanen ibu Césarnaki— akabu

<sup>17</sup> Jesúsundi jatu yuikin:

—Césarnawen taexun matun xanen ibu César duawakin jawen gobierno dayaxunmisbu pei jatu inanxunkubainkanwen. Jakia Diosdi duawakin jawen yusian chibankin jawada bechipaiai axundiakubainkanwen— jatu waya

—Nun jaska waxun padantidumaki— iki e itan ana jawa yuitima buaibun

*Mawanibu bestenxanaikidi Jesús yukanibukiaki, na janchadan*

(Mt 22.23-33; Lc 20.27-40)

<sup>18</sup> janua saduceobu judiobu paxka betsaa: “Ja mawabu jawen yuda tsua ana besteinsmaki”, imisbu Jesús anu jabudi bexun yukakin:

<sup>19</sup> —Yusinaan, Moisin yusinkin: “Juni betsaa ainyan juni bakewadiama mawaken janua jawen betsaa ain janubi ainwantan juni bakewaxuntiki, jawen betsaa mawaimatun kena dabikinan”, nuku waniki. <sup>20</sup> Jaskakidi ja jawen 7 betsabukidi mia yuinun ninkawe. Ja dukun iyuatun ainbu betsaa ainwanxun juni bakewadiama mawaken <sup>21</sup> ja kachukeatun jawen betsaa jabias ainbu ainwanxun juni bake wadiamadi mawaken ana ja kachukeatun jawen betsaa ain jabiadi ainwandiatan juni bake wadiamadi mawaniki. <sup>22</sup> Janua ja 7 jawen jenekin jabias ainbudi bixun jabu tibitun jawa juni bake bawabuma mawai keyuabun janua jawen jenei ainbu juni bake biamas mawadianiki.

**23** Ja jaskanibudan, mawabu ana besteinbutianan, *¿ja ainbu bestichai ja juni 7bun ainwanibudan, jadatutun kaya ana ja ainbu bixanimenkain?*— akabu

**24** Jesúsun jatu kemakin:

—Matunan, Diosun jancha kenenibu unanma jawen kushipa man unanmadiki. Jaskakin man kanemiski. Xabakabi matu shinamanun ninkakanwen. **25** Mawanibu ana bestenxanalbutianan, jawa ana ainyain inun ana beneyai ikama ixankanikiki. Janua Diosun nai tsumabu keska beneuma inun ainyuma jiwxexankanikiki. **26** Mawakubainaibu bestein ana jiwxexanaibukidi matu yusinun ninkakanwen. Ji maxu kua jede ji ji ikai anuxun Diosun Moisés jancha wakin: “Eadan, natian en Abrahamnen mekenikaki. En Isaacun mekenikaki. En Jacobun mekenikadiki”, ikai ninkayamaxun Moisin kenenidan, *¿man uinkin yuismamen?* **27** Diosdan, mawabunamaki. Jakia jiweabunaki. Jaskaken Abraham inun Isaac inun Jacob jatun yushin jiweabuki. Chipu ana yuda bena Diosun jatu inanxanai shinanma man kanejaidamiski— jatu wa

*Diosun yununidan, ¿jadatu bestitun binu keyuamen? ikaikidi Jesúsun jatu yusinikiaki, na janchadan*

(Mt 22.34-40)

**28** Jesús saduceobube yuinameai ninkabaikin Jesús jaskakidi yukabu jatu yui pewaxukidi unain Diosun jancha kenenibu yusinanamis betsa Jesúski kemaxun unanti wanun ixun yukakin:

—*¿Jadatu yunua kushipa binua Moisin nuku kenexuniwen besti nun chibainwen taexun Diosun nuku mekekubaintidumen?*— aka

**29** Jesúsun yuikin:

—Na eska yununi betsa betsapa tibi dasibi binujaidadan, eskaki. Ninkakanwen: “Israelbuun, nukun Xanen Ibu Dios ja besti ikibi ini jiwepeakeikiki. **30** Jaskaken nukun Xanen Ibu Dios duajaidawakin bechipaikin jawen nuikin matun uinti inun, matun yushin dasibiwen inun, matun shinan dasibiwen inun, dasibi matun kushipawen jeneama akubainkanwen.” Min jaska tibiwen shinankin akaidan, ja yunua betsa dasibi binujaidaki. **31** Ja kachu yunua betsadan, jabe ketaxnidan, ninkawe: “Min jabube jiweabu duawadiakubainkanwen, ibubis man nui mekemis keska wakinan”, akin yuini ja yunuti dabe chibain man jaki chiti ikaiwen taea matuwen Dios benimaxanikiki— aka

**32** Diosun jancha kenenibu yusinanamistun Jesús yuikin:

—Yusinaan, min yusianan, peki. Chanima min yui kayabiaii. Nun bechipaijaidaii. Chanima Epa Dios bestitun nuku mekekubaintiduki, betsan nuku mekeamadan. **33** Jaska inun, nukun uinti inun, nukun yushin dasibiwen inun, nukun shinan dasibiwen inun, dasibi nukun kushipawen Epa Dios duawai jaska nukunmebi nun nuimis keskai yuda betsabu tibiwen nun nuiawen taexun Diosun nuku bechipaijaidaikiki. Jamen jaskama jatida yuinaka detexun kuakin Dios nun inankuinmis inun jatida inankuinti betsa betsapa Dios kenwanti jiwe anu nun bumisdan, jawama keska Diosun shinamiski— akaya

**34** Diosun jancha pe ninkakin yuiai Jesúsun yuikin:

—Dios xanen ibuaiki min ma jaki dasi kemaki— aka ana tsuan jawa yukama mapuabun

*Mesías Cristodan, ¿tsuan babamen? iwanan, Jesúsun jatu yukanikiaki, na janchadan*

(Mt 22.41-46; Lc 20.41-44)

<sup>35</sup> jabianuxundi Templo jemaintin anuxun Jesúsun jatu bepxumakin yuakin:

—Diosun jancha kenenibu yusinanamisbun matu yusinkin: “Cristodan, Davidin baba ixanikiki”, ikin ḡjaskakin matu jaska yusinmisbumen? <sup>36</sup> Matu yuinun ninkakanwen. Diosun Yushin Pepatun David yusian kenenitun matu yuakin:

Dios mekenikatun en Xanen Ibu Mesías yuakin:

“Miki sinataibu en jatu maemadiama manai en yusiudi tsauyuwe”, aniki. Jaska watan keneniki. <sup>37</sup> Jakia: “Mesías en xanen ibuki”, Davidin abianiken ḡjaskatan jawen xanen ibu janubi jawen baba itidumen? Ea yuikanwen—akin xanen ibubu shinanmaya yuda midimabun Jesúsun jancha ninkai benimai tse ikaibun

*Diosun jancha kenenibu yusinanamisbu Jesúsun jatu chitekin dabin wanikiaki, na janchadan*

(Mt 23.1-36; Lc 11.37-54; 20.45-47)

<sup>38</sup> jabianuxuns Jesúsun ana jatu yusinkin:

—Diosun jancha kenenibu yusinanamisbunan, jatu uindakanwen. Jatun tadi chaipa jawendua sawea mae jemaintin ewapa plaza anu en kauanai ea bechipaikin ea kenwankin jau jancha pewen ea duawanunbun ika mapumisbuki. <sup>39</sup> Jaska inun, janu ichati jiwe anu jikikain jaki tsauti pepa janu dasibibun jatu uintidubu anu tsaukatsis imisbuki. Ja inun, ichatan pinun, iwanan, janu xanen ibubu dakai baxti ixun pimisbu benadiamisbuki. <sup>40</sup> Jaska inun, ainbun bene ma mawakin xununiken jawen jamapai pepayabi jawen jiwe mebinun itan ainbu bepadankin jakidi pe shinanmanikapai Diosbe janchai chaipajaidamisbuki. Jaskamisbuwen taexun Diosun jatu unanti watan kupiadan, yumanjaidaxankanikiki— jatu watan

*Ainbu beneuma nuitapaitun pei pishta inankuники, na janchadan*  
(Lc 21.1-4)

<sup>41</sup> Jesúsun jatu yusin meneaya nuitapaibu jawen medabewati inankuin pei janu mistumisbu anu bau bebun tsauxun Jesúsun uiyan yuda pei midima jayabun ichapa mistubidanbidanaibun <sup>42</sup> ainbu beneumadi nuitapai juxun pei jexe dabe jawa damajaida mistuaya Jesúsun uintan <sup>43-44</sup> jawen tsumabu kenaxun jatu yuakin:

—Eskaki, matu xabakabi yuinun. Ja junibu pei ichapayabun jatun pei paxkaxun texe besti inankinkanxuki. Jakia ja ainbu nuitapaitun dasibi jawen jawada biti pei inankin keyuxuki— jatu watan

## 13

*Templo jiwe tekei pudekei keyuxanaikidi Jesúsun jatu yuiniaki, na janchadan*

(Mt 24.1-28; Lc 21.5-24; 17.22-24)

<sup>1</sup> Januxun Templo jiwe jemaintin anua jawen tsumabube Jesús kainkainaya jawen tsuma betsan yuakin:

—Yusinaan, uinwen. Na Templo jiwe wakin mishki tsama akeakenibudan, jabi jawendua benibin!— aka

<sup>2</sup> Jesúsun yuakin:

—Chanimaki. Na dasibi jiwe ewapa wanibu jawendua man uiainan, jawenduajaidaki. Jaskabiaken ja mishki jiwe tekekin pudekin keyuxankanikiki, mishki betsana matsanbaunabumadan— jatu abaini

*Mai anua jaska taxni keyununbadiai bebunkidi Jesúsun jatu yusinikiaki, na janchadan*

<sup>3</sup> janua bui Olivos Mati anu mapeketan Templo bebun tsauabun Pedro inun Santiago inun Juan inun Andrésin Jesús june yukakin:

<sup>4</sup> —Ja mishki jiwe tekei pudekei keyuxanai min nuku yuixudan, ¿mia yukapa? ¿Ma kemai taei jaskai nun unantidumenkain? Nuku yuiwe— akabu

<sup>5-8</sup> Jesúsun jatu yuikin:

—En ka en ana judiamaken eskai nuitapai taexanaibu Diosun yununi eskaxankanikiki. Xabakabi matu yuinun ninkakanwen. En kani ma en janu jua kemaya juni betsapa bexun yuikin: “En Diosun Katua Mesías Cristoki”, iwanan, yuda ichapabu jatu padanxankanikiki. Jau tsuabunda jaska wakin matu padanyamaxanunbun uindaxankanwen. Ja inun, yudabu nuitapai taeaitianan, nawabu nawa betsabube detenamei inun tsakanamea akeakeaibu mai pacha sakua akeakeaya bunijaidai nuitapaibun isin betsapa tenea akeakexankanikiki. Jakia tsakanamea akeakeaibukidi bana ninkai datei meseyamaxankanwen, na jaskaidan, isin betsapa beai mekin man uinxanai keska bebunkidi xabakabi en matu banabimaidan.

<sup>9-11</sup> Jakia matu dukun taewakin betsabun matu kupinun, iwanan, jatun mae xanen ibu anu matu iyuxankanikiki. Ja inun, ichati jiwe anuxun ekidi man jatu yusiaibun betsabun matu kusha kusha axankanikiki. Uindaxankanwen. Jakia en kakape ikunwakin man ea chibainbuwen taexun tsuabunda matu achixun xanen ibu kushipabu anu matu iyuabu jawada man yuitidu Diosun Yushin Pepatun matu yuimaxanikiki. Jaskaken jawa dateama: “¿Jadakidi yuixanpa?” ikin bebunkidi shinanyamaxankanwen, jawen Yushin Pepatun matu jaska medabewaya en yusiankidi xanen ibu betsapa sabuki man chanixanaidan. En ana judiamaken chanima yudabu mania akeakeabu dasibibu tsuabunda en kakapekidi ea ikunwakin jatu yusinbaunxankanikiki.

<sup>12</sup> Ja inun, yuda betsan janubi jawen betsabun ea ikunwainbu jatu achima akeakediaxankanikiki, jau jatu tenanunbunan. Jabiaskadi wakin jatun ibubun janubi jawen bakebu jatu achimadiaxankanikiki. Ja inun, jabiaskadi wakin bakebu jatun ibubuki sinatakin jatun ibubun ea ikunwainbu jatu achimaxun jatu tenanmadiaxankanikiki. <sup>13</sup> Ekidi jaska yuibaunkin man ea chibainbuwen taexun yudabun matu danain midima matuki sinataxankanikiki. Matu jaska wabiaibun tsuada ea chibankin jeneisma jatu mekekin en jatu paxamaxanaii.

<sup>14</sup> Jaskaken ja ichakanikakidi Diosun Daniel yuia kenen tsuanda ja yuikin unanmisdan, ja ichakanika taxnia Templo medan nia man bechiaya ja Judea anuabu mati keyatapa anu jau paxaxanunbunwen. <sup>15</sup> Ja inun, betsabu na mai bawa jiwe sapa xeni manaundi maniabudan, butuxun jawen jamapai bikatsis ibiakin jau jawen jiwe anu jikiama jau jawaida paxadiaxanunbunwen. <sup>16</sup> Ja inun, ikunwain ja bai anu dayaibudan, meshu medan jawen bemakia tadi kextupa bikatsis ibiai jau ana chintunkidanama jau jabiadi paxadiaxanunbunwen. <sup>17</sup> Jamen ja yumainbutianan, tuyabu inun ja chuchu amamisbudan, jatu peidawaxankanwan. <sup>18-19</sup> Jaska inun, Diosun mai damiwani anua yumanxanaibudan, tsuan jaska tenediamma inun ana teneama ixanai tenei dasibibu nuitapachakayamaxankanikiki. Jaskaxanaiwen taea uitian man jaska teneyamaxanunbun Dios ea akin yukakubainxankanwen. <sup>20</sup> Ja jaskaibutian Xanen Ibu Diosun jawa nemakin tsua paxawatidumabia ma jawenabu jatu katuniwen taexun jatuwen nuikin jau dasibibu debui keyuyamaxanunbun yumainbutian Diosun badi ana chai wama chaima xekaxanikiki.

<sup>21-23</sup> Jabiatiandi juni betsabu juxun matu padankin yuikin: “Eadan, Diosun ea yunua en jawen jancha yuixunikaki. Ea ninkaidakanwen”, ikaibun

betsabundi yuikin: “Diosun Mesías Cristo, eadan, matu anu en ana juxuki”, ikaibu betsabun ninkatan jatu yuikin: “Uian. Nuku anu Cristo ma juxukiaki”, ikaibun ana betsabun yuikin: “Uian. Janu ma juxukiaki, Cristodan”, ikaibun januxun jabun jamapai betsapa juni betsabun atiduma jabun akin yuda ichapa padankin Diosun jawena wakin jatu katudiani padankatsis idiaxankanikiki. Jaskaibu ninkatan ikunwankin man kaneyamaxanun bunbebunkidi xabakabi ja padanananxanaibukidi en matu besuunbi banabimai ninkakanwen— iwanan,

*Nukun Juchi Kayabi Iyua juidan, eskakidanunbadikiaki, na janchadan  
(Mt 24.29-35, 42, 44; Lc 21.25-36)*

<sup>24-25</sup> ana jatu yusinkin:

—Yumain keyuaibu binukainaya nai anua dasibi betsapaxanikiki. Badi ana pexeama nukai taeaya uxedi ana chaxama meshuaya bishi nidi iki keyui dasibi nai tako tako iki chuduanyan <sup>26</sup> en matun Juchi Kayabi Iyua xanen ibui kushipajaidai chaxajaida nai anua nai kuin medanua en juai uiainbun <sup>27</sup> Diosun jawen nai tsumabu yunua jawen katuabu mai jidabi kesua anu manibaunabu jatu ichawaxankanikiki.

<sup>28</sup> Jaskaken ji higuerawen man unantiduwen miyuiwen matu yusinun ninkakanwen. Ji pei petakatan chipu metubistan peiai uinkin ma badi kemai man unanmis keskai <sup>29</sup> jawada en matu yuixu bechitan en samama ana juai man unantidubuki. <sup>30</sup> Jaska inun, yudabu dasibi jiwebaunabu yamadia-buma chanima dasibi en matu yuixu jaskai taexankanikiki. <sup>31</sup> Jakia jabiaskadiai nai anua inun mai anua Diosun damiwani jabu keyuxankanikiki. Jakia en janchawen bebunkidi en matu yusiainan, binuama menepakexanikiki.

<sup>32</sup> Janua jawatianda en ana juxanai tsuan unanmaki. Diosun nai tsumabun unanma inun ea Diosun baken en jawa unanmadiki. Jakia Epa Dios ja bestitun unainkiki. <sup>33</sup> Jaskaken tsuan jawa unanmawen taea matubudan, jawa chikishama pepakunkaini Diosbe janchakin ea manakin jatianda jaskaxanai uindakubainxankanwen. <sup>34</sup> Jaska inun, juni chai kakin jawen tsumabu jawen daya tibi jawen jiwe anu yunua akeaketan jiwe beputi kexemis yunutan bumisbu keska wakin en matu yunubainkin akawai. <sup>35</sup> Jawa chikishama ea manakaxankanwen. Jawa badida jiwe ibu jumis keskai eadi en ana juxanai man unanmadiki. Meshui taeayamenkain. Yamenapunmenkain. Takada keui taeayamenkain. Meshukidimenkain. <sup>36</sup> Jaskaken jawaidakidan uxabu keska en matu bechiama ixanun <sup>37</sup> en matu yuiai jakimama uindakubainxankanwen, jabiaskadiai dasibibuki en jatuki chanidiaidan— jatu anikiaki.

## 14

*Jesús achixanun ika yubakanibukiaki, na janchadan  
(Mt 26.1-5; Lc 22.1-2; Jn 11.45-53)*

<sup>1</sup> Ja Pascuatianan, Egipto anuxun Diosun yunua debuwanika nai tsuman nawan bakebu tenankin nukun xenipabu dunkebaini shinanmatitianan, uxu dabe ma kemai misi xaxama nun pimis ma kemaya Diosbe nukunabu janchaxunika xanen ibubu inun Diosun jancha kenenibu yusinanamisbun Jesús june padanxun achitan tenanun ika yubakaibun <sup>2</sup> jakia betsabun jatu yuikin:

—Nukunabu nawaibutian meyamayuxankanwen, jawen taea bedukubauntidubukidan— inibukiaki.

*Jesús ainbun xeni maukanikiaki, na janchadan  
(Mt 26.6-13; Jn 12.1-8)*

<sup>3</sup> Chipu Betania anuxun Simón yudaki chamini Jesúsun kaya waimatun jiwetanxun Jesús pimaya ainbu betsan nenkati bishtu juxupaki xeni inin pepa kadujaida bexun tesketan Jesúsun buxkaki mauka jaki jababainaya <sup>4</sup> ja jabetan piaibu jatiditun inin mayai xetekin uin jaki sinatai yuinamekin yuikin:

—¿Jaska wakin ja xeni kadujaida jamen chakawakin maukaxumen? <sup>5</sup> Jatu inanxun 300 xaba daya pei bitan nuitapaibu medabewatibin!— ika ainbuki ja ikaibun

<sup>6</sup> jaki jaskaibu Jesúsun jatu nemakin:

—¿Na ainbun ea duawai jaskakin man dakewai? <sup>7</sup> Nuitapai matube jiwe-abu medabewakin man jatu duawapaketidubuki. Jakia eadan, jawenchains man ea duawapaketidubumaki. <sup>8</sup> Jaskaken eki xeni ininipa maukakin na ainbun en mawadiama bebunkidi en yuda ea pewaxuki, jau jawama ea mai-washadaxanunbunan. <sup>9</sup> Jakia chanima en matu yuiaii. Mai jidabi anuxun kakape ekidi chanibaunkin na ainbun ea axu shinankin yuidiabaunx-ankanikiki, tsua jau jakimayamaxanunbunan— jatu wai ninkashinabun

*Judasin Jesús jatu achimaxanun ika jatube yubakanikiaki, na janchadan  
(Mt 26.14-16; Lc 22.3-6)*

<sup>10</sup> janua Jesúsun 12 tsumabu betsa Judas Iscariote Diosbe nukunabu jan-chaxunika xanen ibubube janchai ka jaska wakin Jesús jatu achimatidu Judas jatube yubakai <sup>11</sup> ninkai shinan chankankin pei inankatsi yubabu chintunkidankin “¿Jatian janixun en Jesús jatu achimatidumen?” ikin shi-nankubidanikiaki.

*Badi kaya Jesúsun jawen jenekin jawen tsumabubetan pinikiaki, na janchadan*

*(Mt 26.17-29; Lc 22.7-23; Jn 13.21-30; 1 Co 11.23-26)*

<sup>12</sup> Ja badi Pascua besi taemisbutian ja dukun chaxuwan bake tesenxun tae-wamisbutian jabianudi misi xaxama pikubainmisbutian jawen tsumabun Jesús yukakin:

—¿Jani kaxun Pascuatian badi kaya piti bawakin mia pewaxuntanpa?— akabu

<sup>13</sup> januxun jawen tsuma dabe yunukin yuikin:

—Bui Jerusalén anu jikitan jabianua juni betsan unpax shumuwan iabainaiki nukutan chibancantankanwen. <sup>14</sup> Man chibancaina janu jikiai uintan ja jiwe ibu yukakin eska watankanwen: “Nukun yusinan nuku yunuxudan, ¿mia yukapa? ¿Jadatu dintu anuxun badi kaya en tsumabubetan nukun shinanmati Pascua piti pipa?” man wa <sup>15</sup> januxun dintu ewapa man-aundi ma pewa matu uinma januxun nukun piti bawakin pewatankanwen— jatu wa

<sup>16</sup> jawen tsumabu kainbaini Jerusalén anu jikitan jaska Jesúsun jatu yuixu keska ja juniki nukutan chibancaini jabe kaxun jiwe ibu yukatan januxun Pascua nawakin piti bawakin menetan buxun jatu itani

<sup>17</sup> badi kai meshuaya Jesús jawen 12 tsumabube kai jikitan <sup>18</sup> tapu anuxun jabetan piaibun Jesúsun jatu yuikin:

—Chanima en matu yuiaii. Na jabiatian ebetan man piaibunan, jadatutunda man ea jatu achimai kaii— jatu wa

<sup>19</sup> jatu jaska wai ninkatan juinti nishmai keyutan yukakin:

—¿Jabia en eamen?— iaketaibun

<sup>20</sup> ana Jesúsun jatu yuikin:

—Man en 12 tsumabun jabias kenchaki man misi pukuxun piaibunan, man bestichaitun ea jatu achimai kaii. <sup>21</sup> Jaskawen taea jaska ekidi kenenibu

chibain matun Juchi Kayabi Iyua en jaskai mawaxanaii. Jakia ja junin ea jatu achimai kaidan, pemajaidaki! Jaskaken ja juni kaianma inidan, pepakeanaii— ikaya

<sup>22</sup> piti betsá keyudiabumaken Jesúsun misi betsá tsumaxun Dios kushipa yukatan tunketan inankin nuku yuikin:

—Na misi betsádan, en nami keskaki. Pikanwen—

<sup>23</sup> januxun kencha vino mata tsumaxun Dios kenwandiatan jatu inanbauna uva bimi vino abaunaibun <sup>24</sup> jatu yuikin:

—Yuda ichapabu medabewai mawakin en jimi en jatu jabaxunxanaii. Na vinonan, en jimi keskaki, jawen yubaka bena shinamatidan. <sup>25</sup> Chania en matu yuiaii. En Epa Diosbe xanen ibui en ana judiama na uva vino en ana matubetan ayuama ixanaii. Abaunkanwen— jatu watan

*Pedro jaki dakei kaikidi Jesúsun yuinikiaki, na janchadan*

(Mt 26.30-35; Lc 22.31-34; Jn 13.36-38)

<sup>26</sup> jabianuadi Salmos Davidin keneni betsá betsapa jatun juiwen nawai menetan janua Judasin jatu paxkabainken Olivos Mati anu jatu iyuxun

<sup>27</sup> Jesúsun jatu yuikin:

—Jawen jancha yuixunika ekidi Diosun yuikin: “Chaxuwan jatun mekenika en tenanyan jawen chaxuwan datei paxai keyuxankaniiki”, aka ninkatan keneniken na jabiatian jabiaskadai matu dasibibun ea shinanma man ea jenebaini paxadiakanaii, chaxuwan keskaidan. <sup>28</sup> Jakia ea tenanbiabu ana bestentan janu matuki nukunun ika bebunkidi Galilea anu en matu kaxunxanaii— jatu waya

<sup>29</sup> Pedron yuikin:

—Miwen datei dasibi paxai keyuaibun, eanan, en mia jawa jenekin putamaki— ikaya

<sup>30</sup> Jesúsun Pedro yuikin:

—Jaskamaki. Chania en mia yuiaii. Na jibia meshu medan takada keu dabediamaken: “En ja unanmaki”, iki dabe inun bestiki min eki dakekin yui kai— aka

<sup>31</sup> ana unanxubima Pedron yuikin:

—Jaskamaki. En mibe mawabiai kai jaskai en miki dakeamaki— ikaya dasibibundi jabiaskasdi yui janchai keyutan

*Getsemaní anu ka Jesús Diosbe janchanikiaki, na janchadan*

(Mt 26.36-46; Lc 22.39-46)

<sup>32</sup> Janua Jesús jawen tsumabube kai miban xuku betsá jawen kena Getsemaní mishkiwen kenenibu anu jikitán jatu yuikin:

—Nenu jabianu tsauyukanwen, en Diosbe janchai kaidan— ikainkin

<sup>33</sup> Pedro inun Santiago inun Juan besti iyui kai punu nuka jawenchains juinti metexekei niti itan <sup>34</sup> jabudi yuikin:

—En yudawen mawakin en matu xunubainxanai shinain en punu nukajaidaki. Na jabianuxun uxama ea manakanwen— jatu wabaini

<sup>35-36</sup> janua kai benanta kakain main beui beti ixun Diosbe janchakin yuka jeneama yuikin:

—En Epa Diosuun, jamapai dasibi min atidu en unaiin. Ea jaska waibu minaki. En mawayamanun min nematidubia en shinain keskawen ea akama min shinanen besti ea axanwen— atan

<sup>37</sup> janua jawen tsuma dabe inun besti anu chintunkidan uxabuki nukutan jatu datekin Pedro yuikin:

—Simóneen, ¿min uxamen? ¿Jaskai hora bestichai bedu mestenwantan man ea manatidumamen? <sup>38</sup> Chania matun shinan pebia matun yuda babuwen

taea man punu nukaya matuki chakabu jikia man kaneyamanun bun Diosun jau matu medabewanun uxama jabe janchakanwen— jatu wabaini

<sup>39</sup> ana jabianudi Diosbe janchai kaxun jabias jancha yuitani <sup>40</sup> ana jua ma uxa paen jatu achia uxabuki nukutan ana jatu bestenwan jawa jancha yuitima maniabun <sup>41</sup> ana Diosbe janchatani juxun jatu yuikin:

—¿Jaskaida man uxa ninkama uxa bestia man juindukunsi ikanai? Uinkanwen. En Diosun bake matun Juchi Kayabi Iyua juni chakabubun ea achi bei ma kemakanikiki. <sup>42</sup> Ma ea jatu achimai juikiki. Benidikanwen, nun bunun bunan— jatu wabidani jatuki dasitushitan jatu yui

*Judasin Jesús jatu achimanikiaki, na janchadan*

(Mt 26.47-56; Lc 22.47-53; Jn 18.2-11)

<sup>43</sup> Jesús jancha menediamaken Diosbe nukunabu janchaxunika xanen ibubu inun Diosun jancha kenenibu yusinanamisbu inun mae xanen ibubu betsabun jatu yunua juni ichapa nupe chaipayabu inun kushati jiyabube Jesúsun 12 tsuma betsa Judas jatube jukin <sup>44</sup> Jesúski nukuyukin Judas Iscarioten bebunkidi jatu yubakin yuikin:

—Ja en tantsu akaidan, jaki. Achixun iyukanwen— jatu abidanxuwen taexun

<sup>45</sup> Judas Iscarioten Jesús bechitushitan jaki nukuxun yuikin:

—Yusinaan, en miki nukuyuiai— iwanan, tantsu akaya <sup>46</sup> “Jakiaki, akanwen”, ibain achiaibun

<sup>47</sup> Jesúsun tsuma betsan jatu mepanmanun ika nashui ikain jawen nupe chaipa sitan Diosbe nukunabu janchaxunika xanen ibujaidatun tsuma mapexpaikin maebain paxteaya <sup>48-49</sup> Jesúsun jawen tsuma nematan ma jaki nukuabu Jesúsun jatu yuikin:

—Uatian xaba tibi Templo jemaintin anuxun en matu yusinkubainai man ea xabakabi achiamma ikubainshinabuki. ¿Jaskai natian meshu medan yumetsu achimisbu shinain jawen deteti nupe chaipaya inun jawen kushati jiya man bekanxumen? Jamen man ea akamaki. Diosun jancha kenekin bebunkidi ekidi yuini jaska menekin man ea achiaii— jatu waya

<sup>50</sup> janua dasibi jawen tsumabu datekin Jesús besti jenebaini paxai junei keyubainaibun

<sup>51</sup> bedunan betsa tadi juxupa bestiwen yabukua ja paxama Jesús chibain policiabu betsan achipaikin <sup>52</sup> jawen tadi besti tsumaya mepamai jawen tadi pekabaini tadiuma paxai junekainiki.

*Xanen ibubu Junta Suprema anu Jesús iyunibukiaki, na janchadan*

(Mt 26.57-68; Lc 22.54-55, 63-71; Jn 18.12-14, 19-29)

<sup>53</sup> Janua Diosbe nukunabu janchaxunika xanen ibubu dasibi inun, mae yununika xanen ibubu betsabu inun, Diosun jancha kenenibu yusinanamisbu jabu dasibibu janu Diosbe nukunabu janchaxunika xanen ibujaida Caifásin jiwe anu jabu dukun bua icha maniabu anu Jesús iyukin janu bichiaibun <sup>54</sup> janua Pedro datekin benantaxun uinkubaini ka xanen ibun jiwe jemaintin anu Templo mekenikabube tsaua chin yukin june uiyan

<sup>55</sup> januxun Diosbe nukunabu janchaxunika xanen ibubu inun Junta Supremabu dasibi ichaxun Jesús jau tenanun bun jakidi chakabujaida yuiaibuwen chani jancha ikun keska watan jawen unanti watan tenankatsi benai maniabun <sup>56</sup> juni betsa betsapabun jakidi chani chitebiakin jakia juni dabetun jabias chani yuiabumaken <sup>57</sup> jaskaibun betsabudi benitan chani jakidi chitekin yuikin:

<sup>58</sup> —Nukun ninkakinan, Jesúsun eska yuiai nun ninkashinaki. Matu yuinun: “Na Dios kenwanti mishki Templo junibun anidan, tekekin pudekin

keyutan uxa dabe inun besti kaya junibun akamaken ana en benixanaii”, ikai nun ninkashinaki— jatu wa akeakeaibun <sup>59</sup> jabun jabias chani chakabu jakidi yuiyabuma ninkai jaska waxun kupitima shinainbun <sup>60</sup> jaska waibu ninkatan Diosbe nukunabu janchaxunika xanen ibujaida Caifás namakis dasibube tsaua benitan nixun Jesús yukakin:

—Na junibun mikidi chakabu yuiaibudan, ¿miadan, jaskai min jatube kem-anameamamen?— aka

<sup>61</sup> Jesús pes jawa yuiama niken Diosbe nukunabu janchaxunika xanen ibujaidatun ana yukakin:

—¿Jabia min miamen ikaidan, min Diosun bake nukun mekenan Mesías Cristodan?— aka

<sup>62</sup> —Jaa. Jaska min ekidi yuiaidan, en jaki. Epa Dios kushipajaidatun jawen yusiudi en tsaua matun Juchi Kayabi Iyua nai kuinwen en juai man ea uinxanaii— ikaya

<sup>63-64</sup> ninkatan Diosbe nukunabu janchaxunika xanen ibujaida Caifás jaki sinatajaidakin jawen sanpu ushnitan yuikin:

—Dios ichaikiki. Ana jatida janchai en ninkakatsi ikamaki. Na jaska jadi janchayadan, ¿jaskada jakidi man shinain?— akin jatu yuka:

—Dios ma ichaxuki. Jau tenan menunwen— iake iakeaibun

<sup>65</sup> januxun ichakawakin taewakin jaki kemu michukin jawen bedu beputan kaxe wakin kushakin yukakin:

—¿Tsuán mia kushaimenkain? Unantan nuku yuiwe— akubainaibun januxun Dios kenwanti Templo mekenikabundi bepas bepas akaibun

*Pedro Jesúski dakenikiaki, na janchadan*

(Mt 26.69-75; Lc 22.56-62; Jn 18.15-18, 25-29)

<sup>66-67</sup> janua jemaintin anu Templo mekenikabube Pedro chin yuaya Caifásin tsuma ainbu betsan bechitan yuikin:

—Miadan, Jesús Nazaret anuabe min nimiski. En mia unaiin— aka

<sup>68</sup> Pedron padankin yuikin:

—En ja unanmaki, ja jaska min jakidi janchaidan— itan janu jemaintin kene jikiti xui anu ka niken takada keui taeaya <sup>69</sup> janua ja ainbun ana Pedro bechitan janu maniabu yuikin:

—Na junidan, Jesúsun tsuma betsaki— jatu waya

<sup>70</sup> Pedron ana jatu yuikin:

—Jaskamaki— ikaya jabianudi mapuxun Pedro uinkin yuikin:

—Chanima min Jesúsun tsuma betsá en unaiin. Galilea anua min jancha en ninkaii— akabu

<sup>71</sup> Pedron jatu yuikin:

—Ja juni man jakidi janchaidan, en ja unanmaki. En chani chakayadan, jau Diosun ea kupinunwen— ikaya

<sup>72</sup> jakimamadi ja kachu takada keuai ninkatan jaska Jesúsun yuikin: “Takada dabeki keudiamá dabe inun bestiki: ‘En ja unanmaki’, iki min eki dakei kaii”, abidana shinantan Pedro kaxa chakayamanikiaki.

## 15

*Pilato anu Jesús iyunibukiaki, na janchadan*

(Mt 27.1-2, 11-14; Lc 23.1-5; Jn 18.28-38)

<sup>1</sup> Ma penaya Diosbe nukunabu janchaxunika xanen ibubu inun Diosun jancha kenenibu yusinanamisbu inun mae xanen ibubu Junta Suprema jidabi ichaxun jaska wakin Jesús tenantikidi yubakatan Jesús menexxun

romano xanen ibu Pilato anuxun chitenun ixun iyuabu <sup>2</sup> Pilaton Jesús yukakin:

—¿Miadan, min judio xanen ibubu binu keyuamen?— aka

Jesúsun yuikin:

—Jawaikika! Jabiadi min ea yuiaii— aka

<sup>3</sup> Diosbe nukunabu janchaxunika xanen ibu betsa betsapabun jakidi chani yuikin chiteaibun <sup>4</sup> Pilaton ana Jesús yukakin:

—Ja mikidi betsa betsapa chakabu yuiaibudan, ¿min jawa jatu yuiammen?— aka

<sup>5</sup> Jesúsun jawa yuiama niken: “¿Jaskai janchamamen?” itan Pilaton jadakidi shinantima tsauken

*Jesús jau tenanunbun Pilaton jatu yununiaki, na janchadan*

(Mt 27.15-31; Lc 23.13-25; Jn 18.38-19.16)

<sup>6</sup> romano soldadobun jatu achixun bichimabu badi tibi ja Pascua nawaibutian jau bestichai taxninun ja romano xanen ibu Pilaton beyawen taexun maen katuaya jatu kainmaxunpakemisken <sup>7</sup> jabiatiandi juni betsa jawen kena Barrabás juni betsabube detenamekin jatun xanen ibu detepaikin jatubetan juni betsa tenainmaken jabun achixun bichimabun <sup>8</sup> janua yudan kaian Pilato anu ana bexun yuikin:

—Nawaibutian juni betsa badi tibi min nuku taxnimaxunmis keska wakin natiandi juni betsa nuku kainmaxunwen— akabu <sup>9-10</sup> Diosbe nukunabu janchaxunika xanen ibubu Jesúski chani chakai jaki sinatakin jaska waxun maematima maemanun ixun iyuabu Pilaton unankin yudan kaian yukakin:

—¿Judiobun xanen ibu kayabi Jesús jawa wama matu nichinxunpa?— ikaya

<sup>11</sup> Diosbe nukunabu janchaxunika xanen ibubun yudan kaian ana Jesúski sinatajaidamakin jatu dasibidi sinatamakin keyukin:

—Jau Barrabás nuku kainmaxunun yuikanwen— jatu waibun yudan kaianen jabiaskadi yuiaibun <sup>12</sup> Pilaton ana jatu yukakin:

—Ja juni: “En judiobun xanen ibuki”, iki kenamisdan, ¿matu jaska waxunpa?— jatu wa

<sup>13</sup> jancha kushipawen ana yuikin:

—Cruzki nuku mastaxunwen— ikaibun

<sup>14</sup> ana Pilaton jatu yukakin:

—¿Natunan, jawa chakabuwashinamen?— jatu waya ana unanxubima jancha kushipawen yuikin:

—Cruzki nuku mastaxunwen —aki jawenchains ikaibun

<sup>15</sup> jaskaibun Pilaton yudan kaian daewakin Barrabás jatu kainmaxuntan Jesús jatu kakush kakush amatan jau cruzki jatu mastaxuntanunbun jatu yunua

<sup>16</sup> januxun xanen ibu Pilaton jiwe ewapa jemaintin anu soldadobun Jesús iyuxun soldado jabus jaki xukui ichatan <sup>17</sup> xanen ibun bemakia tadi chaipa tashijaida Jesús sawemaxun muxa maiti waxun maimatan <sup>18</sup> unanxubima jancha kushipawen kaxe wakin yuikin:

—Judio xanen ibu kayabidan, min miaki— akin jawenchains yuibetanan <sup>19</sup> ji sidiwen makush makush atan jaki kemu michutantankin jaki danti itan jancha pepawen yuixunikapaikin kaxe wakin <sup>20</sup> keyutan bemakia tadi chaipa tashijaida pekatan jawen tadi kayabis Jesús sawemaxun cruzki mas-takatsi kainmabainaibun

*Cruzki Jesús mastanibukiaki, na janchadan*

(Mt 27.32-44; Lc 23.26-43; Jn 19.17-27)

<sup>21</sup> janua juni betsa Simón jawen mae Cirene anua jawen bakebu Alejandro inun Rufodan, bai anu dayatani jui jatuki nukutan Jesúsun cruz jau iaxun-yubainun soldabobun yunua iaxunbainaya

<sup>22</sup> Gólgota anu Jesús jadi iyukin mapematan, jaska yuiadan, Buxka Xau Mati anudan, <sup>23</sup> uva vino jene isin nemati dau muka jusia amapayabu danankin akamaken <sup>24-25</sup> ma badi jui nai puchinin dakaken Jesúsun tadi peka keyutan mastaxun cruzki nichintan soldadobun shinankin yuikin:

—¿Tsuán jawen tadi tibi biainmenkain? Akanwen— ixun jawen beyusti putapakekin jawen tadi paxkatan

<sup>26</sup> jawen taexun jatu tenanmai unanti ji bexa tuaxki kenekin: “Judiobun Xanen Ibujaidaki”, aka bexun Jesús mamaki ja ji tuaxki kenea mastadiaxun <sup>27-29</sup> jabianudi jabe juni yumetsu dabedi cruz dabeki mastaxun betsa jawen yusiudi nichinxun betsa jawen yusmaudi nichindiabu junibun dainbainkin budi budi ikin yuikin:

—Uinwen. “Dios kenwanti mishki Templo tekekin pudekin keyutan xaba dabe inun besti kaya en ana benixanaii”, min ishianki. <sup>30</sup> Min ja kushipa jayadan, ja cruz anua mimebi paxai butudiwe, mawamadan— akaibun

<sup>31</sup> Diosbe nukunabu janchaxunika xanen ibubu inun Diosun jancha ke-nenibu yusinanamisbundi Jesús kaxe wadiai yuinamekin:

—Juni betsabu medabewabiamis jamebi paxatidumaki. <sup>32</sup> Jaskakenan, jaska Israelbun Xanen Ibu Cristo kayamenkain cruz anua butuai uinkin na jabiatián nun ikunwantiduki— ikaibun ja jaska waibu ninkatan juni yumetsu dabe jabe mastadiabudi jancha chakabukin Jesús yuandiaibun

*Jesús mawanikiaki, na janchadan  
(Mt 27.45-56; Lc 23.44-49; Jn 19.28-30)*

<sup>33-34</sup> janua badi manananbibiaken badi nuka meshua itsa daka manaibun ma badi nai puchinin dakaken bepenakainaya jabiatiandi Jesúsun jui ku-shipawen yuikin:

—Eloí, Eloí, ¿lemá sabactani?— ikidan juni kuin janchadan, “En Diosuun, en Diosuun, ¿jaskakin min ea jeneamen?” ikaya

<sup>35</sup> ja naman jatidi mapuxun betsabun ninkatan yuikin:

—Ninkakanwen, Diosun jancha yuixunika Elías kenaikikidan— ikaibun

<sup>36</sup> janua ja naman mapuabu betsa kushikidan janu jawen tsiniti vino muka pu atan tawaki ustaxun bexun amanun, iwanan, sananxunkin shinankin yuikin:

—En daka manakayuti Elíasin buteyui juimenkain— itan nikén

<sup>37</sup> janua Jesús ana unanxubima bis itan mawaya <sup>38</sup> Templo medan tadi dintu wakin kebenibu jamebi manaundia dis iki keyuaya <sup>39</sup> soldado romano capitán Jesúsun besuudi nixun uinkin Jesús bis itan mawaya yuikin:

—Chanima kayaki. Na junidan, Diosun bakeki— ikaya

<sup>40-41</sup> janua ainbuaibu Galilea anuabun Jesús Galilea anu ka jabun du-awakin chibanmisbun uiainbun jatubetan uindiaibudan, Josén betsa maxku Santiago ja dabetun ewa María inun, Salomé inun, María Magdalenan jabun benantaxun uiainbun janua ainbu betsa betsapabu Jerusalén anu Jesúsbe beshianbundi jatubetan Jesús mawai uinibukiaki.

*Jesús mawa maiwati medan jananibukiaki, na janchadan  
(Mt 27.57-61; Lc 23.50-56; Jn 19.38-42)*

<sup>42</sup> Janua ma badi kaya jabiatiandi judiobu sábadotian juindukunkatsi bebunkidi piti pewamisbuken <sup>43</sup> janua judio Junta Supremabube jatube xanen ibumis betsa José Arimatea anua kainitun Cristo Xanen Ibuxanai

manakubainshina jawa dateama Pilato anu kaxun Jesús maiwakatsi jawen yuda yuka <sup>44</sup> Pilato e itan yukakin:

—¿Ma jawaida jaskatan mawaxumen?— ixun soldado capitán kenaxun yukakin:

—¿Jesúsdan, jatian ma mawaxumen?— aka

<sup>45</sup> capitánen uinxu ja badi mawaxu yuia Pilaton ninkatan jawen yuda José yunua kaxun <sup>46-47</sup> tadi juxupa chaipa bixun Jesúsun yuda jawenabubetan butexun tadiwen dayabutan bukin janu maiwati mishki kini waimabu anu datainbu María Magdalena inun Joséñ ewa Maríán uiainbun mishki beputi ewapawen bepunibukiaki.

## 16

*Jesús bestenkainikiaki, na janchadan*

*(Mt 28.1-10; Lc 24.1-12; Jn 20.1-10)*

<sup>1</sup> Ma sábado juindukunti binushinken María Magdalena inun, Santiagon ewa María inun, Salomén jatibun Jesúsun yuda jawen dapuxkatsi xeni ininti bitanshina <sup>2</sup> janua penayajaida domingotian maiwati anu bui ma badi kainyuaya <sup>3</sup> yuinamekunkainkin:

—Ja mishki beputi ewapadan, ¿tsuan nuku bepenxunkin tadanxuntidumente?— ikubaini

<sup>4</sup> jakidi besukainkin uinkin ja mishki ewapawen bepushinabu ma jamaudi tadanmea bechitan <sup>5</sup> ja maiwati kini medan jikitan uinkin jabianudi juni bedunan tadi juxupa chaipa sawea yusiudi tsaua uin e ikaibun <sup>6</sup> jatu yuikin:

—Jesús mastashinabu man benai jua en unaiin. Dateyamakanwen. Jaska bebunkidi matu yuishina keskai ma bestenkainaki. Ana nenumaki. Janu datanshinabu jikixun uinbaini <sup>7</sup> buxun Pedro inun jawen tsuma betsabu menan jatu yuditankanwen: “Jadan, matu bebunkidi Galilea anu kaxuinkiki. Jadia matube ana ichai benai kaikiki, jaska matu yuishina keskaidan”— jatu wa

<sup>8</sup> ainbuabun ninkatan maiwati kini anua kainkaini saki saki iki kushibidani dateyabi bekin jatu dainkubidankin tsua yuialma benibukiaki.

*Ja dukun María Magdalena Jesúsnukunikiaki, na janchadan*

*(Jn 20.11-18)*

<sup>9</sup> Penayajaida domingotian Jesús bestenkaini jatuki nukutanun ika kai ja dukun María Magdalena ja <sup>7</sup> yushin chakabu jaya kainmayamaki nukua

<sup>10</sup> janua benimakaini jatu banabimai kakin jabun Jesús chibanmisbu pes mania Jesús manui kaxaibuki nukuxun <sup>11</sup> jaska Jesús jiwea uinbain jatu yuia jawa ikunwanma ikaibun

*Jesús jawen tsumabuki ana nukunikiaki, na janchadan*

*(Mt 28.16-20; Lc 24.13-49; Jn 20.19-23)*

<sup>12</sup> janua Jesúsun tsumabu dabe bai tanabainaibu jaska uinmisbu keskama jatuki Jesús nukua uinbidani <sup>13</sup> bexun jabun chibanmisbu ichapabu jatu banabima ninkatan jabun janchadi jawa ikunwanma idiaibun

<sup>14</sup> janua Jesús jawen <sup>11</sup> tsumabun pi maniabuki nukua uin juinti kushikin Jesús bestean uinbidan jatuki chanibiabu jawa jatu ikunwanma ibayaibun Jesúsun jatu ja atan <sup>15</sup> jatu yunukin:

—Mai jidabi anu bukin Diosun kakape ekidi dasibibu jatu yusinkubainx-ankanwen. <sup>16</sup> Jabun ea ikunwain jenewen man jatu nashimaya en jatu mekexanaii. Jakia jabun ea ikunwankin shinan betsa wabuma en jatu kupixanaii. <sup>17</sup> Jaska inun, tsuabunda ea ikunwain jaskakubainxanaibu matu yuinan ninkakanwen. En kushipa jayaxun en kenawen taexun yushin

chakabu kainmaxankanikiki. Ja inun, jancha bena tapindiamawen janchax-ankanikiki. <sup>18</sup> Ja inun, dunu pianan meabu jawa jatu piama ixanai inun, jawada mawati dau jatu amabiabu aka jawa jatu chakabuwatan tenema ixankanikiki. Ja inun, isin teneaibu jatu meabu xuxaxankanikiki— jatu watan

*Nai anu Jesús inanikiaki, na janchadan  
(Lc 24.50-53)*

<sup>19</sup> Xanen Ibu Jesús jatube janchai meneaya januxun Diosun nai anu ainitan jawen yusiudi tsauimaya <sup>20</sup> janua Jesúsun tsumabu kainbaini bukin mae tibi anu yusinkubaunaibun nukun Xanen Ibu Jesúsun jatu medabewakin jawen kushipawen jawada unanti dami atimaska chanima jatu uinmakubainibuki-aki.

Marcos

## KAKAPE LUCASIN KENENIKIAKI LUCAS

*Jawen jaibu Teófilo kene bumanikiaki, na janchadan*

<sup>1-4</sup> Xanen ibu Teófiloon, en mia kene bumai uinwen. Jaska Jesúsun yusinkin taewani anua jawen tsuma kayabibun uian akeakenibu inun Jesúsun jawada jatun bedubi uinkubainima Diosun jatu katua jabun jawen kushipayabu jau chanikubainxanunbun jabun nuku yusianbu juni betsabun jabiaskadi bebunkidi unankin pewatan nuku kenexunimabuki. Jakia jawen tsumabun yusinmiskidi miandi min ninkaima: “Chanimaki”, eandi jabikaskadi shinnakin en mia kenexunai min unankubainxanun jaskani Jesúskidi dasibi yuka iki nati itan eandi ninkakin pewatan en mia kene bumaii.

*Nashimanika Juan kainxanaikidi bebunkidi jawen ibuki nai tsuma chaninikiaki, na janchadan*

<sup>5-7</sup> Judea mai pakea jatiuma anu Herodes jatun xanen ibu ikunkainaya jabiatiandi jawenabu Diosbe janchaxunika Abíasin enabu xuku betsa anua jawen kena Zacarías jiwekunkainikiaki. Janua jawen ainin kena Isabel Aarónen babadi yuxabujaidakin bake biama jawen benedi anibujaidatun bakewanun ixun shinankubainkin Diosun jancha chibankin jawen yunuti inun jawen nemati kaneabumaken jatuwen Dios benimakunkainikiaki.

<sup>8</sup> Janua janu Dios kenwanti Templo anu Abíasin enabu betsabube Zacarías uxe bestichai dayakin <sup>9</sup> Templo anu jikixun jau ininti jatu kuaxuntanun jatun beya chibankin jatun kena tibi ketenan ja una tude bitan jawen kena bechitan Zacarías katuabu <sup>10</sup> jikixun chi tsistuki jawen Dios kenwanti ininti dau Zacaríasin jatu kuaxunaya jemaintin anuxun yuda ichapabu ichaxun Dios kenwain danti ika maniabun <sup>11</sup> januxun ininti kuati chi tapu yusiudia Diosun nai tsuma damia nia <sup>12</sup> Zacaríasin uin e itan en jaskai iki datejaidaya <sup>13-16</sup> januxun nai tsuman yuikin:

—Zacaríasiin, dateyamawe. Jawada min yukai ninkamissun Diosun mia axunxanikiki. Min ain Isabel yuxabubiatun bake bima juni bake kainxanikiki. Kaiyaintian min benimaya minabudi benimaxankanikiki. Kenakanan: “Juanki”, axanwen. Januxun minabu Israelbu chakabubiakubainai-bun Juan kainixun jatu yusinkin nukun medabenan yushin Dioskidi yuda ichapabu chibanmaya benimajaidaxankanikiki. Nanei taea Diosun Yushin Pepatun kushipa wakubainkin jeneama uva jene vino inun jene paepa tibi akama min baken Dios benimawakin minabu Yavé Dios anu ana jatu chintunwanxanikiki, jatu chibanmakinan. <sup>17</sup> Jaska inun, min bake Juanenan, Diosun kushipaya jawen Yushinyan bebun nixun jaska Elíasin Diosun jancha yuixunikatun ani keska wakin jatun ibubu jabun bakebu ana danananain sintanameama inun ja patapakin ninkaisbuma jau jabundi Dios chibanun-bun min bake Juanen yudabu jatun Xanen Ibu juai manamakin jatu shinan betsa wamaxanikiki— aka

<sup>18</sup> jawen jancha ninkabiatan shinankin Zacaríasin nai tsuma yukakin:

—Ma en anibuaki. En ain yuxabudiki. ¿Jaska waxun min jancha chanima en unantidumen?— aka

<sup>19</sup> nai tsuman yuikin:

—Eadan, en Gabrielki, nai tsuma xanen ibudan. Diosbe beisinain en janchamiski. En mibe janchanun na kakape Diosun ea yunuxuki. <sup>20</sup> Jakia

en jancha min ikunwanmawen taea min bake kaindiamma juyu min jiweyukunkainxanaii. Na en mia yuiaidan, Diosun akatsis ikin axanikiki—atan kaya

<sup>21</sup> jaskai nishma dakaken Templo jemaintin anuxun manakin jawenabu yuinamekin yuikin: “Jawa dakiai ikikiki, taxniamabin!”, iki maniabun <sup>22</sup> atimas taxnitan jaska waxun jatu jancha watimaken jabun unanbaunkin jakidi yuikin:

—Jaskakenan, ¿Templo dintu medanuxun namai keskakin Dios anua uinxumenkain?— ikaibun jawen meken bestiwen jatu unanmatan jabiaska janchama jatube dayakunkainkin

<sup>23</sup> Templo anua jatun daya uxe nichintan Zacarías inun kaxun <sup>24</sup> jawen ain bakewa tuyaima 5 uxe besti jawenabube janchakatsi ikama Isabel jawen jiwe anus jiwekunkainkin shinankin: <sup>25</sup> “En bake bitidumawen taexun jau ana enabun ea dake wayamaxanunbun Diosun ea bechipaikin ea medabe-waikiki”, ika benimakunkainkiaki.

### *Jesús nanexanaikidi Mariáki nai tsuma chaninikiaki, na janchadan*

<sup>26-27</sup> Isabel tuya 6 uxe kaya chipash jawen kena María chutanamei pese-diamma jawen epan beneyawakatsi jatun xenipabu xanen ibujaida Davidin baba José yubakin ibu waimaken januxun Diosun jawen nai tsuma Gabriel jau kakape María yuinun Galilea mai pakea namakis mae betsa Nazaret anu yunua <sup>28</sup> damitan jawen dintu medan jikixun Gabrielin María yuikin:

—En miki baiyuaii. Yavé Dios miwen benimajaidakin mia bechipaikiki—atushia

<sup>29</sup> jawen jancha ninkai e itan Marían shinankin: “¿Jaskakin ea jaska yuimenkain?” ixun shinanyan <sup>30-31</sup> nai tsuman ana yuikin:

—Maríaan, ewen dateyamawe. Miwen dabanan Dios benimajaidaiwen taexun juni bake mia bimakin miki nanexanikiki. Chipu kaian kenakin: “Jesúski”, axanwen. <sup>32</sup> Jamen Xanen Ibu kushipajaidakunkainaya jabun yuikin: “Yushin kushipa jatu binuatun bakeki”, iwanan, kenakubainxankanikiki. Ja inun, jaska matun xenipabu xanen ibu David xanen ibu ini keskai <sup>33</sup> Diosun yunua min bake Jesús Jacobun bababun Xanen Ibu ipaxanikiki, niti ikama ikibi ikidan—aka

<sup>34</sup> Marían yukakin:

—En chutanamei pesediamabia ¿jaskatan en bake nanetidumen?— aka <sup>35</sup> jawen nuikin nai tsuman ana yuikin:

—Kushipa jatu binuatun jawen kushipawen jawen Yushin Pepa yunua mikia dami naneima kainmaxun jatun Dios chibanyan: “Jadan, medibi Diosun bakeki”, ixun kenakubainxankanikiki.

<sup>36-37</sup> Jamen betsadan, minabu Isabel ma yuxabubia ma juni bake bimaki. “Jaskatun bake bismaki”, iwanan, yuanbiakubainmisbu jamapai shadabu Diosun atiduwen taea ikis uxe meken buxka ka pustuki—akaya

<sup>38</sup> Marían yuikin:

—Peki. Jaska min ea yuiaidan, jau shinanxun ea anunwen. Diosun tsumadan, en eaki—aka ninkatan kainkainikiaki.

### *Isabel anu María bai kanikiaki, na janchadan*

<sup>39</sup> Gabrielin María jancha wawanshinken Judea mai pakea mawa mati matipa anu mae jatiumanua María jawaida bai ka <sup>40</sup> Zacaríasin jiwe anu jikitan Marían Isabel yuikin:

—Ewaan, miki bakin en mia uinyuaii—atushiaya <sup>41</sup> Isabelin María ninkaya jawen pustu medanua jawen bake tukuaya Diosun Yushin Pepatun kushipa waya <sup>42</sup> benimakin Isabelin unanxubima bis iki eai itan yuikin:

—Diosun mia bechipaikin ainbu betsabu binumakin mia inun min bake naneshinxun mia jabe duajaida waikiki. <sup>43-44</sup> Min ea kena min jancha en ninkaya en bakedi benimajaidai en pustu medanua tukuxuki. En jawayaidaken Diosun ea duawayen Xanen Ibu ewa min eki bayuaii. Jaskaken en benimajaidaii. <sup>45</sup> Jaska inun, jawada Diosun mia axunxanai mia yuishina min ikunwainwen taea min benimajaidaii— aka

<sup>46-48</sup> januxun Maríandi yuikin:

“En jawen tsuma bexmasjaidabiaken  
Diosun ea shinankin ea katushinaki.

Jaska inun, dasibibun shinankin:

‘Diosun María shinan chankanwanmiski’, iwanan,  
ekidi yuikubainxanaibuwen taea en mekenan Dios kushipawen taea  
juinti benimakin en Xanen Ibu Dios en kenwaiin.

<sup>49-50</sup> Ja inun, duawai jawen kushipaki mesemisbuwen nuikunkaini  
shinan pepa kushipa jatu binukin keyuatun ea duajaida washinaki,  
jawen kena medibi pepatunan.

<sup>51-53</sup> Jaska inun, ibubis yubakatan keinsbuma jatu xanen ibu wakin  
betsabu nuitapai bunaibu piti pepa jatu yani wamakin  
mabu ichapayabu nuitapawakin meken bestia mais jatu nichinmiski.

Jaska inun, ibubis keainbu ichakawakin  
jatu juinti nishma wakin ibubis xanen ibui kushipamisbu  
jatu mintanuma wakin Diosun jawen kushipa uinmakin jatu unanmax-  
anikiki.

<sup>54-55</sup> Janunkain jaska nukun xenipabu Abraham inun jawen bababukidi  
yubaxuni shinain  
nukuwen nuikin nun jawen tsumabu Diosun ana nuku medabewakin tae-  
wani jeneama nuku axunkubainikiki”,

ishian <sup>56</sup> janu María bayui niti ikama jabe jiwelexun uxe dabe inun besti  
nichintan janua María inun kanikiaki, jawen jiwe anu chintunkainidan.

### *Juan kainikiaki, na janchadan*

<sup>57</sup> Janua Isabelin bake bima ewai pustujaidatan juni bake kainken <sup>58-59</sup> ja  
dapi jiweabu inun jawenabun Dios Isabelwen nuikin medabewaya ma bake  
kaian jabun ninkatan benimashianbun janua kainshina 8 xabatian ibu  
dabetan jawenabu kena uinun ika bexun jaska jatun xenipabun yununi  
chibankin jawen jina kubichi mextexuntan jawen epa Zacarías dabipanan-  
bun <sup>60</sup> jawen ewan jatu nemakin yuikin:

—Jaskamaki. Jawen kenadan, “Juan” wakanwen— jatu wa <sup>61</sup> jabun Isabel  
yuikin:

—¿Jaskakin jadi min kenai? Min benen enabun kenadan, jadi jayabumaki—  
ikeaketan <sup>62</sup> januxun jadakidida jau kenanun jawen epa juyuwen taexun  
mekenen besti yukabu <sup>63</sup> mekenendi jaki keneti jau bexununbun jatu yunua  
bexuanbu Zacaríasin kenekin: “Jawen kenadan Juanki”, jatu wa uin e itan  
“Jadidikiaki”, ikaibun <sup>64</sup> jaskatanaibuns Zacarías jawaida ana janchakin Dios  
kenwanikiaki. <sup>65</sup> Januxun ja dapi jiweabu dasibi e iki: “Jabaa!” ishinxun janu  
mai pakea Judea mati matipanu jiweabu anu jaskashina jatuki chanibau-  
naibun <sup>66</sup> jaskaibu dasibibun ninkakin unain jaskakenan: “Diosun ja bake  
yumewaidan, jaskadada ixanikika”, iki ja bakekidi janchanibukiaki.

### *Zacaríasin Dios kenwanikiaki, na janchadan*

<sup>67</sup> Juanen epa Zacarías Yushin Pepatun kushipa wa janchakin Dios ken-  
wain Dios janchaxunkin yuikin:

<sup>68</sup> “En Xanen Ibu pepa Israelitabun Diosuun,

min ma minabu medabewakin jatu pekakin akawai jushianwen taexun en mia kenwaiin.  
 69 Min tsuma Davidin baba betsa kushipajaida mekenan kayabi nuku anu min ma nuku nichinxunshinaki.  
 70 Nukun xenipabu jatu yubai jakidi jabias min jancha yuinxunika medibi tibi min jatu janchamapaunidan,  
 71 jawen taexun nukuki sinatamisbu inun, dasibi nuku danamisbu min jatu jawen maemakin nuku paxawatiduki.  
 72 Jaska bebunkidi nukun xenipabu jawawen jatu jaska wati nuii jatuwen yubakai  
 jatukidi jancha medibi wai min janchapaunidan, jakimama min shinaiin.  
 73 Jaska jawen kanetima wai nukun xenipabu Abraham min jabe yubakani natian min ma ana nuku shinankin bechipaiaii.  
 74 Ana tsua dateyabi nun jiwtidubuma inun nukuki sinatamisbu min jatu nuku daewaxunaki. Jawama nun mia dayaxuni  
 75 jaska chanima pepawen bestiwen medibitan nukun jiwea jidabiwen mia bebun nun pe nikatsis ikaii, itan  
 76 janua epaan, miadan, ‘Dios dasibi binu keyuatun yuixunikaki’, iwanan, mia kenaxankanikiki. Janu nukun Xanen Ibu Mesías juxanai  
 bebunkidi jawen bai min jatu pewamaxunxanaii,  
 77 jau jawenabun jatun chakabuwen taea  
 Dioski mesekin jatun shinan chakabu jenetan  
 Dios buamatan jau meketi jiwea jatu inanxanunan.  
 78 Nukun Dios nuikipa chakamatun nuku bechipaikin  
 nai anua jawen bake xaba badi bena keska nuku butexunxanikiki.  
 79 Yudabu jatun chakabuwen taea atimapanu mawai benui bupananbun  
 meshu ten ikai anua bin chaxa watan nuku inan keska wakin nun jabu  
 jiweyuabu nun jawen unanuma jiwei kai nuku yusinxanikiki”,  
 iniken  
 80 Zacaríasin bake Juan ewai Diosbe jaibunamejaidai unanepai jawenabu Israelbu yusindiamama jadi tsua jiweabumanu jiwekunkainikiaki.

## 2

### *Jesús kainan, eskanikiaki, na janchadan (Mt 1.18-25)*

<sup>1</sup>Janua ja jaskaitian romano xanen ibujaida César Auguston jawen maiwan kesua jidabi anuxun juni tibitun kena netankin jau tanaxanunbun jawen tsuma betsa betsapabu yununikiaki. <sup>2</sup>Januxun tsuan jaska tanakin tae-wadiama Siria mai pakea anu romano xanen ibu bexmas Quirinio xanen ibuaya romano xanen ibujaida César Augusto ja dukuntun jau jawenabu tananunbun xanen ibu bexmas dasibibu jatu yunuimawen taea <sup>3</sup>jau tananunbun jatun xenipabun mae tibi anua besti ichai buaibun <sup>4</sup>José jawen mae Nazaret mai pakea jatiuma betsa Galilea anu jiwebia Davidin babawen taea <sup>5</sup>Josén jawen kena jatu netanmanun ika jawen xenipabu Davidin mae Belén, Judea mai pakea anu kakin María José bimakatsi ibuama bestimabu dadatamea tuyaima iyui jabe kai jikia <sup>6-7</sup>Belén anu jiwe pakatan uxati ma keyubia texke ikabun jani itima ina jiwe anu José inun María ikabun janua Marían juni bake iyua kaian dachutan yabuxun burro pimati ji xantu wanibuki basi nawatan datanxun uiainbun

*Nai tsuma damitan chaxuwан mekemisbuki Jesús kaiankidi chaninikiaki, na janchadan*

<sup>8</sup> jabiatiandi Belén dapixun jabun ina chaxu mekemisbun basi xukua anuxun meshu medan uiainbun <sup>9</sup> Diosun nai tsuma damia Diosun kushipawen chaxajaida jatu dapi nia chaxuwan mekemisbun uin datejaidaibu <sup>10</sup> nai tsuman jatu yuikin:

—Dateyamakanwen. Matunabu jawen benimai keyuxanaibu en matuki chanikin kakapepa bexunxuki, ninkakanwen. <sup>11</sup> Matun xenipabu xanen ibujaida Davidin mae Belén anu jaska Diosun yubani matun medabenan Xanen Ibu ma kaianki, Cristo Mesíasdan. <sup>12</sup> Janu benabaunkin ina jiwe anu yabuxun burro pimati ji xantu wanibuki datanbu man bechi katiduki. Jaska bechitan en jancha chanima man unanxanaii— jatu waya

<sup>13</sup> jakimamadi nai tsuma midimajaida damibidan jabetan Dios kenwain nawakin yuikin:

<sup>14</sup> “Mai anuxun tsuabunda jabun Dios chibankin duawamisbu Dios kushipajaidatun jau jatu unanuma jiwemanunwen. Jaskaken dasibibun Dios kushipa nai anua jau kenwandianunbunwen”, jatu watan <sup>15</sup> nai anu ana buaibun benimai yuinamekin yuikin:

—Jabaa! Jaska Diosun nuku yuixudan, Belén anu benakin uinun bukanwen— itan

<sup>16</sup> jawaqidabaini Belén anu jikitan benabaunkin atimas ina jiwe medan José inun María inun jawen bake burro pimati ji xantu wanibuki datanbu <sup>17</sup> bechitan jaska nai tsuman bakeishtakidi jatu yuia ninkabidana jatunmebi chaniaibun <sup>18-20</sup> jaska Diosun nai tsuman jatu yuixu ninkabidan uinwani chanima jabiaska uinkanxu chaxuwan mekenikabu chintunbainkin Dios kenwankubainaibun dasibibun jaska jabun yuikubainaibu yuda betsabun ninkai e itan shinain: “¿Jawa yui ikanimenkain?” ikaibun janua Maríán jaska wanaibu jawen juinti medans shinan jeneama inikiaki.

### *Templo anuxun Jesús jatu uinmakin iyunibukiaki, na janchadan*

<sup>21</sup> Janua 8 día ka manashinxun jawen xenipabu Abrahamnen ani keska wakin jawen jina kubichi mextekin jatu bimatan María bake nanediamma jabies kena Diosun nai tsuman yuimakidi shinankin Josén Maríabetan kenakin Jesús wabun

<sup>22</sup> Moisin yunukin bake kainma naxuxatan besti jau ichati jiwe anu jikixanunbunwen, ani jaska chibain María bake kainma ma naxuxai pea janu jawen ibu dabetan ja bake Jerusalén anu jatun Xanen Ibu Dios jawnawamanun ixun iyuaibun <sup>23</sup> ja dukun bebunkidi Dios janchai “Juni bake ja dukun kaianan, enaki”, ikai Moisin ninkatan kenen i jaska chibankin jawenawamatanun, iwanan, <sup>24</sup> iyukin ja inantan ana jawena wakatsi ikin jaska Diosun yununi keska wakin deiwan dabe ja menuxunti buaibun

<sup>25</sup> jabiatiandi juni betsa pepajaida Dios kenwankin kaneisma jawen kena Simeón Jerusalén anu jiwxun Diosun Israelbu dasibi ana medabewakin jatu pekakin akawaxani yubani Simeón manakakubainshina jawen Yushin Pepa jaya jatun medabewakin unanmaya <sup>26</sup> Mesías Diosun yunuxanai uindiama jau debuyamaxanun Diosun Yushin Pepatun yubaimaken <sup>27</sup> januxun Templo jemaintin anu Diosun Yushin Pepatun Simeón yunua ka tsauken jaska Moisin yusini jawen juni bake bianananun ixun ibubun iyui jemaintin anu jikiaya januxun Diosun Yushin Pepatun Simeón yusinkin jadatuda bake jabun medabenan jau unanun ixun unanma <sup>28</sup> benimakain María Jesús mebintan ikuxun Ibu Dios kenwankin yuikin:

<sup>29</sup> “Xanen Ibu kushipatuun, natian ea duawakin jaska min ea yubaima min ma akaki.

Jaskawen taea jawa dateama unanuma benima paewen en mawaxanai ea ana nemayamaxanwen.

<sup>30</sup> Na bakewen yudabu paxawakin min mekexanai en ma uiaiin,

<sup>31</sup> jawen taexun na bakewen dasibi jiwebaunabu min xanen ibuai jawen min jatu unanmaxanaidan.

<sup>32</sup> Jadan, bin ewapa chaxa keska nawa betsa betsapabun uinkin minabu Israelbu min kushipawen min jatu duawai uindiaxankanikiki”, akaya

<sup>33</sup> jaska wai ninkai José inun María e idabeaibun <sup>34-35</sup> januxun Simeónen jatu yuikin:

—Diosun jau matu duawakubainxanunwen— iwanan, María besti yuikin:

—Na bakedan, jawen yuda Israelbu unanti wakatsi Diosun katuniki. Jawen yusian ninkatan jatiditun shinan betsa watan chibainbun inun jatiditun shinan betsa wama danankubainxankanikiki. Min bake danankin nupe kenujaidawen min juinti chachia keska wakin mia yumanwakin mia nu-itapawaxankanikiki— anikiaki.

<sup>36-37</sup> Jamen betsadan, Israeliin bake Aserin baba betsakidi mia yuinun ninkawe. Penuelin ainbu bake Ana chipash beneyaima 7 badi besti jabe jiwea jawen bene mawaniken janua beneuma 84 badi jiwekunkaini Diosun jawen jancha yunua jawenabu jatu yuixunmis Dioski mesei samakekin jau jawenabu medabewanun ika jawen kenwantan Templo jemaintin anua kaianma jatu Dios yukaxunkubainmis <sup>38</sup> José inun Maríaki nukutan jadi benimakin Dios kenwantan jaska Diosun Jerusalénkidi yubani dasibibun manaibu Anan uinwanshinxun Jesúskidi jatu yuikin kaka wakubainikiaki.

<sup>39</sup> Januxun juni bake ja dukun kaian jau jaska wai bununbun Moisin kenekin yununi chibankin menetan Galilea jawen mae Nazaret anu chintunwakin ana jawendi Josén jatu iyuima <sup>40</sup> jadia Jesús ewai jawen yuda kushipai unanepaya Dios jawen benimakin duawakubainikiaki.

### *Jesús bedunan Templo jemaintin anu kashian ibubun bechinibukiaki, na janchadan*

<sup>41</sup> Jaska inun, Pascuatián Egipto anuxun jatun juni bakebu tenanma jatun xenipabu Diosun nai tsuman jatu dunkebaini shinain besinun ika badi tibi Jerusalén anu Jesúsun ibubu bupakemisbun <sup>42</sup> janua ma Jesús 12 badiyaken jawen ibubu jatun beya chibain buaibu jabiatiandi Jesús jatube kai taeshina <sup>43-44</sup> jawen ibubu besi keyutan jawen mae anu jatube jiwemisbube José inun María chintunbidanaibun janu Jerusalén anu Jesús besti bashikua ibuan unanma benadiama shinankin: “Jabe bedunanbube juikiki”, itan, José inun Maríán shinanyabi kai ma xaba jidabi chai buxun badi kaya Jesús jawenabu anu benakin nati atan <sup>45</sup> jawenabu anu inun jawen mae anu jiweabu anua jawa bechiama benakin keyutan janu uxashini Jerusalén anu benanun ika chintunkainshina <sup>46</sup> janua 3 día ibubun benakubaunkin atimas Templo jemaintin anu jaki nukutushikin Diosun jancha kenenibu yusinanamisbube tsauxun jatu ninkakin Jesúsun jatu yukai jatube janchanamekunkainaya <sup>47</sup> Jesús unanepai ninkakin jabun ja yukaibu tibi yui pewaiwen taea dasibibun ninkai: “Jabaa! ¿Tsuán juni bake bedunan unanepamen?” iki jabube maniabu anu <sup>48</sup> atimas jawen ibubu jaki nukui e itan jawen ewa Maríán yuikin:

—Kukaan, ¿jaskakin min nuku jaska washinamen? Ea inun min epa miwen nui chakayamai datekin nun mia benakin mae nati ashianki— aka <sup>49</sup> Jesúsun jatu yuikin:

—¿Jaskakin man ea benabaunai? ¿En Epan jiwe anua ma en jatube yuinetidu man shinanmamen?— jatu wa <sup>50</sup>jawa jatu yuiai dabanan ikin ninkabumaken

<sup>51</sup> janua kainmabaini jawen ibu dabebe Nazaret anu chintunbainima jadia Jesús yumei ninkanikai jawen ibubun jancha tapinkubainaya ibu Marían uinti medans Jesús jaskai jakimama shinanxunkubainaya <sup>52</sup>janua jawen yuda ewai jawen shinan unanepaya Dios inun jawenabu jawen benimakubainibukiaki.

### 3

*Janu tsua jiweabumanuxun Nashimanika Juanen jatu yusinikiaki, na janchadan  
(Mt 3.1-12; Mr 1.1-8; Jn 1.19-28)*

<sup>1</sup> Janua badi ichapa kaya romano xanen ibujaida betsа Tiberio César ma 15 badi xanen ibukin dasibi jatu yunukubainaya Judea anu Poncio Pilato romano xanen ibu bexmasaya Galilea anudi jawen tsuma Herodes romanoma xanen ibu bexmasdiaya Iturea inun Traconítide anudi jawen tsuma Herodesin betsа Filipo xanen ibu bexmasdiaya Abilene anudi jawen tsuma Lisanias xanen ibu bexmasdiaya <sup>2</sup> ja jaskaibun Jerusalén anuadi judiobu Anás inun Caifás Diosbe jawenabu janchaxunika xanen ibujaida dabe inibukiaki.

Ja jaskaibu betsatian Zácaríasin bake Juan janu tsua jiweabumanua ewaima jiwea Diosun yunua <sup>3</sup> taxnikidan Jordán jene ketankubaunkin jiweabu tibi jatu yusin taewakin yudabu yuikin: “Matun shinan betsа watan matun chakabu Diosun jau matu buaxunxanun ninkatan jawada chakabuwen man benua jiwea jenedikanwen. Matun shinan maewatan man ea uinmaya en matu nashimaxanaii”, iwanan, jatu yusinkubainikiaki. <sup>4</sup> Jaska Diosun jancha yuixunika Isaíasin jakidi kenekin yuini keska axuin Juan jaskanikiaki:

“Jadi tsua jiweabumanua jui kushipawen chanikin jatu yuikin:

‘Nukun Xanen Ibu nai anua matuki bayui ma kemaikiki.

Matun uintinin shinan pewadikanwen, bai kayatapia keska wakinan.

<sup>5</sup> Napaku tibi buakin mata waxun

mati tibidi pewakin panpa waxun

xantu xantupadi keyu buakin panpa waxun

jawen bai pewaxuna keska wakin jatun jiwea pewatan

<sup>6</sup> januxun Diosun medabewati jua dasibibun uinxankanikiki’ ”,

akin jaska yuini keska wakin Juanen akin jatun chakabu Diosun jau ana shinanyamakubainxanun chakabu jenekin jatun shinan betsа watan jawenabu jawen unanmati Juan yukakin: “Ea nashimawe”, jau ea anunbun ixun Juanen jatu yusinkubainikiaki.

<sup>7-8</sup> Janua Juanen jau ea nashimanun ika bebidan bebidanaibu jatu yuikin:

—Matudan man padananan dunu pianamemis keskabuki. Man jaska keska matuki Dios sinatakin matu kupijaidaxanaiwen taea matun shinan betsа wakanwen. Jaska waxun matun chakabu man ma bextekea xabakabi man ea uinmaya en matu nashimaxanaii. Jamen jaskama ibubis kein shinan betsа wakatsi ikama: “Nukun xenipabu Abraham Diosbe jaibunameniwen taea nun jawen bababu nuku kupiamaxanikiki”, ikin, ana shinanyamakanwen. Jakia Abrahamnen bababu dasibi matu yamawakin keyutan na mishki manibauna Diosun damiwakin Abrahamnen bababu benawaxuntiduki.

<sup>9</sup> Jaskaken matu yuunun ninkakanwen. Ji tibi bimi pepa jayama dedatan man kuamis keska wakin bestibu Diosun matu kupixanikiki. Jamen tsuabuda

Abrahamnen baba kayabibun jawen yusian jau chibankubainunbunwen. Jakia man jaska wamaken matu kupinun, iwanan, duewen matu deda keska watan chi anu matu udenun ixun manaikiki— jatu waya

<sup>10</sup> januxun yudabun Juan jaskai ninkatan yuka ikin:

—Jaskakenan, Dios daewakinan, ¿jaska waxanpa?— akeakeabu <sup>11</sup> Juanen jatu yuikin:

—Dios daewakinan, min tadi dabeyadan, ja nuitapai tadiuma man betsa inantiduki. Ja inun, min pitiyadan, yuda betsa piti jayama man betsa inantiduki— iwanan, jatu yuikubainaya

<sup>12</sup> jabun romano gobierno pei bixunmisbudi jau eadi nashimanun ika bexun yukakin:

—Yusinaan, ¿nukukain, nun jaskatidumen?— akabu

<sup>13</sup> Juanen jabudi yuikin:

—Gobierno pei bixunkin man ichawaxunmisdan, janu kesua besti xanen ibun matu yunua bixunkubainxankanwen, ana jatu padanmada— jatu waya

<sup>14</sup> januxundi soldadobundi yukakin:

—Nukukain, yusinaan, shinan betsa watan mia unanmakatsidan, ¿nun jaskaxanai?— akabu Juanen jabudi yuikin:

—Matudan, matun shinanen ichakanikakin jatun jamapai mebinya-makubainxankanwen. Ja inun, chani chakakin yuda betsan pei padantan mebinyamakanwen. Jakia matun daya pei besti bi benimakubainxankanwen— jatu waya

<sup>15</sup> ninkatan ichapabu jawen janchawen benimakin jabun medabenan manakin Juankidi shinain yuka iki yuinamekin: “Diosun yubani nukun Mesías Cristodan, ¿jamenkain?” ikaibu <sup>16</sup> jaskaibu Juanen jatun shinan unankin dasibi jatu nemakin yuikin:

—Chanima, eanan jawen matu unanmati wakin jenewen besti en matu nashimakubainaii. Jakia ja man jakidi shinainan, kushipajaidatun ea binuan chipu juikiki. Kushipajaida mesetun ea binujaidawen taexun en jawen jawaumajaidatun jaska waxun jawen bichi tae mexpun pekakin medabewakin jawen dayadu itsakin kushipa midintun en axuntidumaki. Jakia jatun matu pepawakin Diosun Yushin Pepa matu inantant bika matu tene-makin matun chakabu buakin yamawa keska waxanikiki, jawada chakabu bechipaiama chiwen kua keska wakinan. <sup>17</sup> Jaska inun, xekiwan bimi ta keyuxun pepa aduti anu adutan jawen xepa man kuamis keska wakin dasibi jawenabuma danankin jawa chi nukaisma anu udenxun kuanun, iwanan, manakubainikiki— iwanan,

<sup>18</sup> januxun jancha ichapawen jatu nemakin yusinkin jatun shinan jatu betsa wamakin kakape Juanen jatu yusinkubainaya <sup>19</sup> januxun judiobun xanen ibu Herodesin jawen betsa Filipon ain Herodías mebinshina inun chakabu betsa betsapa wakubainai ninkakubainkin uintan yudabu jakidi yuishinxun Juanen nemakin jawen chakabu jenemanun, iwanan, betsabun ninkaibun Juanen Herodes nemakin ja ashianwen taexun <sup>20</sup> Herodes jaki sinatakin Juan jau ana jakidi janchayamanun, iwanan, jawen soldadobu jatu bichimanikiaki.

### *Juanen Jesús nashimanikiaki, na janchadan*

(Mt 3.13-17; Mr 1.9-11)

<sup>21</sup> Juan bichidiabuma yuda ichapabu nashimakubainkin Jesúsdi Juanen nashima jawen Epa Diosbe janchaya nai baxnei <sup>22</sup> Diosun Yushin Pepa deiwan keska jui jamamaki butuaya nai anuxun jawen Epan yuikin:

—Miadan, min en bakeki. En mia bechipajaidakin katunidan, en miwen benimajaidaii— anikiaki.

*Jesúsun xenipabu eska tana keyunibukiaki, na janchadan  
(Mt 1.1-17)*

<sup>23</sup> Jabatiandi Jesús 30 badiya jawen Epa Dios dayaxunkin taewaya Josén yumewaimawen taexun yudabun yuikin: “Jesúsun epadan, Joséki”, iwanan, yuikubainibukiaki. Jawen xenipabukidi mia yuinun ninkawe.

Josén epadan, Elíkiaki.

<sup>24</sup> Elín epadan, Matat inikiaki.

Matatin epadan, Leví inikiaki.

Levín epadan, Melquí inikiaki.

Melquín epadan, Janai inikiaki.

Janain epadan, José inikiaki.

<sup>25</sup> Josén epadan, Matatías inikiaki.

Matatíasin epadan, Amós inikiaki.

Amósin epadan, Nahúm inikiaki.

Nahúmnen epadan, Eslí inikiaki.

Eslín epadan, Nagai inikiaki.

<sup>26</sup> Nagain epadan, Máhat inikiaki.

Máhatin epadan, Matatías inikiaki.

Matatíasin epadan, Semeí inikiaki.

Semeín epadan, Josec inikiaki.

Josecin epadan, Joiadá inikiaki.

<sup>27</sup> Joiadán epadan, Johanán inikiaki.

Johanánen epadan, Resá inikiaki.

Resán epadan, Zorobabel inikiaki.

Zorobabelin epadan, Salatiel inikiaki.

Salatielin epadan, Nerí inikiaki.

<sup>28</sup> Nerín epadan, Melquí inikiaki.

Melquín epadan, Adí inikiaki.

Adín epadan, Cosam inikiaki.

Cosamnen epadan, Elmadam inikiaki.

Elmadamnen epadan, Er inikiaki.

<sup>29</sup> Erin epadan, Josué inikiaki.

Josuén epadan, Eliézer inikiaki.

Eliézerin epadan, Jorim inikiaki.

Jorimnen epadan, Matat inikiaki.

Matatin epadan, Leví inikiaki.

<sup>30</sup> Levín epadan, Simeón inikiaki.

Simeónen epadan, Judá inikiaki.

Judán epadan, José inikiaki.

Josén epadan, Jonam inikiaki.

Jonamnen epadan, Eliaquim inikiaki.

<sup>31</sup> Eliaquimnen epadan, Meleá inikiaki.

Meleán epadan, Mená inikiaki.

Menán epadan, Matatá inikiaki.

Matatán epadan, Natán inikiaki.

<sup>32</sup> Natánen epadan, David inikiaki.

Davidin epadan, Jesé inikiaki.

Jesén epadan, Obed inikiaki.

Obedin epadan, Booz inikiaki.

Boozin epadan, Sélah inikiaki.  
 Sélahn epadan, Nahasón inikiaki.  
<sup>33</sup> Nahasónen epadan, Aminadab inikiaki.  
 Aminadabin epadan, Admín inikiaki.  
 Admínen epadan, Arní inikiaki.  
 Arnín epadan, Hesrón inikiaki.  
 Hesrónen epadan Fares inikiaki.  
 Faresin epadan, Judá inikiaki.  
<sup>34</sup> Judán epadan, Jacob inikiaki.  
 Jacobun epadan, Isaac inikiaki.  
 Isaacun epadan, Abraham inikiaki  
 Abrahamnen epadan, Térah inikiaki.  
 Térahn epadan, Nahor inikiaki.  
<sup>35</sup> Nahorin epadan, Serug inikiaki.  
 Serugin epadan, Ragau inikiaki.  
 Ragaun epadan, Péleg inikiaki.  
 Pélegin epadan, Éber inikiaki.  
 Éberin epadan, Sélah inikiaki.  
<sup>36</sup> Sélahn epadan, Cainán inikiaki.  
 Cainánen epadan, Arfaxad inikiaki.  
 Arfaxadin epadan, Sem inikiaki.  
 Semin epadan, Noé inikiaki.  
 Noén epadan, Lámeč inikiaki.  
<sup>37</sup> Lámecin epadan, Matusalén inikiaki.  
 Matusalénen epadan, Henoc inikiaki  
 Henocin epadan Jéred inikiaki.  
 Jéredin epadan Mahalaleel inikiaki.  
 Mahalaleelin epadan, Cainán inikiaki.  
<sup>38</sup> Cainánen epadan, Enós inikiaki.  
 Enósin epadan, Set inikiaki.  
 Setin epadan, Adán inikiaki.  
 Adánen epadan, Dios inikiaki.  
 Jaskaken Jesús juni kayabi idianiki, nuku keskadan.

## 4

*Diablo Satanásan padanpaia Jesúsun ninkama inikiaki, na janchadan*  
*(Mt 4.1-11; Mr 1.12-13)*

<sup>1-2</sup> Janua Juanen Jesús nashimaya Diosun jawen Yushin Pepawen ku-shipajaida wa jene Jordán anua Jesús kai janu tsua jiweabumanu Diosun Yushin Pepatun Jesús iyushina kauanaya yushin chakabu xanen ibu diablon padankin kanemanun ikaya janua 40 día janu jiwelexun jawa piama binukainaya jaskakainaya Jesús bunijaidai <sup>3</sup> uinkin unanti wanun, iwanan, yushin chakabu diablon Jesús yunukin:

—¿Jaska min Diosun bakemenkain? Na mishki damiwakin misi wawe, min buniai ja pixunan— aka

<sup>4</sup> januxun Jesúsun nemakin:

—Jaskakidi Diosun jancha kenenibudan, ninkawe. “Piti besti shinain yudabu jawens jiwedidubumaki. Jakia Diosun jancha yuini ninkakin chibain yudabu pei jiwedidubuki”, aniki— iwanan —Jaskawen taexun ja min ea yunuaidan, en akamaki— akaya

<sup>5</sup> jaska ninkatan januxun mati keyatapajaida anu yushin chakabu diablon Jesús iyuxun mai jidabi anu mai pakea jawendua tibi inun jawen damiwati kushipawen jawaida xabakabi uinmakin <sup>6</sup> yuikin:

—Na mai jidabi mai pakea tibi anu inun jawen xanen ibubu dasibi mebinixun en mekeawen taexun tsuada en kushipa inankatsi en jaska wamiswen taexun jau mia kenwanxanunbun en mia jatu xanen ibu wamatiduki. <sup>7</sup> Jaskawen taexun eki mesei danti ixun ea kenwankin min ea xanen ibu waya dasibi mia inantan en mia jatumekemakubainxanaii— aka <sup>8</sup> Jesúsun ana nemakin:

—Na Diosun janchakenenidan, ana ninkawe. ‘Matun medabenan Yavé Dios ja besti duawakin kenwankubainkanwen, yushin betsa ninkamadan’, aniki. Jaska keneniwen taexun ja min jaska yuiaidan, en mia akamaki— aka <sup>9-11</sup> januxun Jerusalén anudi iyuxun Templo keyatapa mamaki nichinxun diablon ana yuikin:

—Na Diosun jancha kenenidan, miandi ninkawe.  
‘Jau mia mekekubainunbun jawen nai tsumabu Diosun yunuxanikiki.  
Mishkiki min jutekepanan min kauanai mia mekesuxankanikiki’,  
aniwen taea jaska min Diosun bake kayamenkain ea uinmai nenua ishchuwe— aka

<sup>12</sup> ana nemakin Jesúsun yuikin:

—Jaska kenenibu min dama yuiai chanimabiaken ana betsa entsedi mia yuinun ninkawe. ‘Matun Yavé Dios unanti wayamakanwen’, akin kenekin yusindianiki. Jaskawen taexun min ea ana yunuaidan, en ikamaki— aka

<sup>13</sup> ana jawawen padankin unanti watima janu tsua jiweabumanu ana iyuxun chipu ana padankatsi Jesús diablon jeneyubainaya

*Galilea anuxun Jesúsun yusinkin taewanikiaki, na janchadan  
(Mt 4.12-17; 13.53-58; Mr 1.14-15; 6.1-6)*

<sup>14-15</sup> janua Galilea anu kaxun mae tibi anu jatun ichati jiwe anu jikia akeakekin Diosun Yushin Pepatun kushipa jayawen taexun Jesúsun jatu yusiain ninkai jakidi janchakin dasibibun kenwankubaunibukiaki.

<sup>16</sup> Jaskakunkauntani janua yumei ewaima Nazaret anudi ka jaskai jatube ichai beyamis juindukuntitian janu ichamisbu jiwe anu jatube jikia Diosun jancha kenenibu yuixunun ika Jesús benia niken <sup>17</sup> Diosun jancha yuixunika Isaíasin keneni jancha una inanbu chudetan jakidi jancha kenenibu bechitan jatu yuikin:

<sup>18-19</sup> “Nuitapaibu kakape en jatu yusinun Diosun ea katuniwen taea jawen Yushin Pepa en jayaki.

Januxun uinti nishmabu jatu benimawakin

yuda betsan jatu tsuma wa jenemakin

bekun keskabu bepexa keska wakin

jatu yusin pewakin jatu ichakawaibu nemakin

Dios benimawatikidi dasibibu en jatu unanmakubainxanun Diosun ea yu-nuniki”,

jatu watan keneni jancha yuikin keyuxun <sup>20</sup> ana sebitan una mekenika inan mebintan aduaya ana jatukidi besua tsaua manibaunxun beis chakayamai-bun <sup>21</sup> Jesúsun jatu yusinkin taewakin:

—Jaskakidi Isaíasin keneni en matu yuixunai man ninkaxudan, nukunabu medabewakin na jabiatian Diosun ma meneikiki— iwanan, <sup>22</sup> unanepakin jancha pewen jatu yusiain ninkai e itan jawen jancha bechipaibiakin shinanin: “Nadan, nukunabuki, Josén bakeki. ¿Janixun jaska tapintanshinxun nuku yuimenkain?” iki yuinamebaunaibu

<sup>23</sup> Jesúsun ana jatu yuikin:

—Man ea itimaska kaya wai en uiaiin. Unanepa janchawen man ea yuikin: “Min juni dauyakiaki. Mimebi xuxakin min kushipa nuku uinmawe”, ea akin, “Cafarnaúm anuxun jawen unanmati dami kushipa min jatu uinmashinakiaki. Min ashian keska wakin na min mae anuxundi nuku axundiawe, nun uinunan”, akin man ea yuitidubuki— iwanan, <sup>24</sup> ana jatu yusinkin:

—Chania Diosun jancha yuixunikadan, jawenabun jawen mae anuxun ninkakatsi ikama dananmisbuki. <sup>25</sup> Jaska inun, Diosun jancha yuixunika Elías jiweken badi dabe inun besti namakis ui ikamaken pitiuma nukun xenipabu nuitapajaidaibun ainbu jawen bene ma mawayama midimabudi yumankubainibu man ninkamiski. <sup>26</sup> Jaskabiaibun nukun xenipabu Israelbu beneuma nuitapaibu jau Elásin dasibi jatu medabewanun Diosun yunuama iniki. Jakia maewan Sidón dapi mae betsa Sarepta anu nawa ainbu beneuma nuitapai jiwea besti jau medabewanun Diosun Elías yunukin nichiniki. <sup>27</sup> Jaska inun, Diosun jancha yuixunika Eliseo jiweatiandi jatidi nukunabun chami buisma teneaibun nukun xenipabu jatuki dakekin danainbu Eliseon jatu xuxawamadi iniki. Jakia Siria anua nawa betsa jawen kena Naamán Eliseo anu Diosun ynuua ja besti xuxawaniki— akin

<sup>28</sup> nawabukidi jatu yuiai ninkai dasibi ichati jiwe anu ichabu jatu jaska wai ninkatan jaki sinatajaidakin <sup>29</sup> kainmabainkin Jesú tsumaxun ninikubainkin jatun mae mawa keyatapa mamakixun januxun xutunun, iwanan, iyuaibun <sup>30</sup> janua Diosun kushipawen ichabu namakisa kakin jatu mepanmabaini jawen mae jenebainikiaki.

*Juni betsa yushin chakabu jaya Jesúsun kainmanikiaki, na janchadan  
(Mr 1.21-28)*

<sup>31</sup> Janua Galilea mai pakea anu Nazaret jenebaini mae betsa Cafarnaúm anu jikishinxun sábado tibi jatun ichati jiwe anuxun jatu yusinkubainkin <sup>32</sup> xanen ibu kayabi kushipakin jatu yuiai yudabun ninkai e itan: “¿Jaskamen?” iki benimakubainaibun <sup>33</sup> jabianudi juni yushin chakabuya tsaua yushinen bis imakin unanxubima yuimakin:

<sup>34</sup> —Jesú Nazaret anuaan, ¿jaskai nuku anu min juxumen? ¿Nun yushin chakabu nuku yamawanun ika min juadaka? En mia unaiin, min Diosun bake pepa medibidan— ikaya <sup>35</sup> yushin chakabu Jesúsun nemakin yuikin:

—Janua jaskama neseten ja juni anua kaindikaintanwen— aka yushin chakabu juni medanua kaikainkin jawa wama mai pusamabainai uin dasibibu <sup>36</sup> datei:

—Jabaa!— ike ikei yuinamekin yuikin: —Nadan, yusian betsa jayaki. Xanen ibu keska kushipajaidaki. Jawen jancha paepaki, yushin chakabu xunska ynuua ninkai jawen datei kainkanikikidan— itan <sup>37</sup> janua bui jakidi chania akeakeaibu dasibi janu jiwea akeakeabun Jesúsun jaska wai ninkanibukiaki.

*Simónen dais ainbu inun isin betsa betsapa teneaibu Jesúsun jatu xuxawanikiaki, na janchadan  
(Mt 8.14-17; Mr 1.29-34)*

<sup>38</sup> Ja juni medanua yushin chakabu nichintan jatun ichati jiwe anua kaya Simón Pedron jawen jiwe anu Jesú iyua Simón Pedron dais ainbu yuna chakayama daka ninkatushitan jawen isin jau mainwanun jakidi Jesú yuiabu <sup>39</sup> janu dakanu Jesú kaxun jawen yuna nemaxuna damaintan benikain jabiatiandi jatu duawakin bawaxun jatu pimaya

<sup>40</sup> jaska waxu ninkabaikin janua ma badi kai meshuaya dasibi ja mae anu jiwea akeakeabun dasibi isin betsa betsapa teneaibu Jesú anu iweabu

Jesúsun jabu tibi mekin xuxawakin kaya wapakekin <sup>41</sup> ja isin betsapa teneaibu anua yushin chakabu nichian kainkainkin unanxubima jancha kushipawen yuikin:

—Miadan, min Diosun bakeki— akin yuikin Diosun Mesías Cristo unainbuwen taexun jau jadidi janchakin ana yuiyamanunbun Jesúsun jatu janchamamakin nemapakekin yushin chakabu kainmapakenikiaki.

*Judiobun ichati tibi anuxun Jesúsun jatu yusinkubaunikiaki, na janchadan (Mr 1.35-39)*

<sup>42</sup> Janua uxashini ma pena kemaya Jesús butukaina mae dapi benanta ja mesti ka benabaunkin jawen jaibuaibun bechitan jaki nukuxun yuikin:

—Dasibitun mia benakanikiki. Nenua ana kayamawe— akabu <sup>43</sup> Jesúsun jatu nemakin yuikin:

—En Epa xanen ibuaikidi en jatu yusinkubaunun ea yununiki. Jaskakenan, mae betsapa betsapa anu en yusindiai katiduki— jatu wabaini <sup>44</sup> Israelbun mae tibi anu Jesús kakunkaunkin janu Diosun jancha ninkakatsis iki janu judiobu ichamisbu tibi anuxun jatu yusian akeakenikiaki.

## 5

*Baka midima Jesúsun jatu nexematan janubijatu katunikiaki, na janchadan (Mt 4.18-22; Mr 1.16-20)*

<sup>1</sup> Jatu yusinkubauntani Galilea ianenwan ketankubaini kakin jawen kena betsya ian Genesaret anu niti ixun jatu yusianyan Diosun jancha ninka pewakatsis iki jaki midima ichakin texke akabu <sup>2</sup> xaxu ewapa dabe xaka mashin keti axun baka nexenikabun jatun jisin chukaibu Jesúsun uinkubaini <sup>3</sup> kakain Simón Pedron xaxuki inatan jau ana ja kachu xekanunbun yunua jawen betsabetan jawen jisin jawaida nexetan jawen xaxu ja kachu xekakin nuntanxunabu ja namaki tsauxun kexa mapubaunabu Jesúsun jatu yusin-pakekin <sup>4</sup> keyutan Simón yuikin:

—Ana ja kachu nuajaidanu xekaxun januxun baka bikin nexekatsi matun jisin pukubaunkanwen— aka <sup>5</sup> Simónen yuikin:

—Yusinaan, yame chai tanakin nun pukujaidabia nun jawa biama ishiaiin. Jakia jaska min nuku yunuai en anun kain— ixun

<sup>6</sup> nuajaida anu xekatan jawen jisin jawen betsabetan pukubaunabu baka midima jikia ninibidanabu xankamajaida jatun jisin tadas iki taeaya <sup>7</sup> xaxu betsya anu jawen jaibuaibu jabe dayamisbu jau medabewai benunbun jatu meken bea bea aka jawaidabidan medabewakin jatun xaxu dabe baka mata wabu xaxu jikikatsis ikaya <sup>8-10</sup> baka midima nexekanxuwen taea Simón Pedro inun jabe dayamisbu inun Zebedeon bakebu jawen jaibu betsabu Santiago inun Juan e e iki dateaibun Simón danti itan Jesús yuikin:

—Yusinaan, en juni chakabuki. Ea anua butukaini ea jenebaini kadiwe— abia

Jesúsun yuikin:

—Eki dateyamawe. Na ikis min baka nexexu keska wakin yudabu min ea jatu ichawaxunxanaii— aka <sup>11</sup> jatun xaxu dabe keti atan janu jawenabube xaxu inun jisin bakayabi bashibainkin tapinkatsis ikin Jesús chibain jabe bunibukiaki.

*Juni betsya bichiki dasibi chami betsani Jesúsun kaya wanikiaki, na janchadan (Mt 8.1-4; Mr 1.40-45)*

<sup>12</sup> Janua chipu betsation mae betsa anu Jesús kaken juni bichiki dasibi chami betsani Jesúski nukutan ja bebun dankui sapakain di itan beuxun ea akin:

—Yusinaan, ea kayawakatsis ikin min ea kayawatiduki— aka <sup>13</sup> jawen chamiwen datekin danankin tsuan metsakin meisbumabiaken Jesús jawen dabanan iki mexunkain mekin yuikin:

—Jaa. En mia kayawai— aka jawen chami sakada iki daxnukui keyuaya <sup>14</sup> Jesúsun nichinkin nemakin:

—En mia yuiai ninkaidawe. Jawada en mia axukidi tsua yuiyamayukubaintanwen. Jadi dukun kakin Diosbe nukunabu janchaxunika min yuda min ma kayaxu uinmatanwen. Jaska min ma kayaxu jau dasibibun mikidi unanunbun jawen jatu bepadanbainkin jabiaskadi inankuin Moisin yununi jatu anu buditanwen. Min jaska buaya min kayaxu jabun unanxankanikiki— abaini kaya

<sup>15</sup> yuda betsabun Jesúsun jaska wakin akaikidi chanibaunaibu ninkatan jawen jancha ninkakatsis iki inun jau jatu xuxawanun badi tibi Jesús anu bebidan bebidanaibu jatu xuxawapakei <sup>16</sup> janua jawen Epabe besti janchanun ika jatu paxkabain janu tsua jiweabumanu kakunkainikiaki.

*Juni yuda babuni jawen chakabu buaxunkin Jesúsun xuxawanikiaki, na janchadan*

(Mt 9.1-8; Mr 2.1-12)

<sup>17</sup> Janua ana xaba betsation Galilea inun, Judea mae betsa betsapa anua inun, Jerusalén anuadi beshinxun Jesúsun yusiain ninkai tsauabun jabianudi Moisin jancha chibanjaidanika fariseobu inun Moisin jancha yusinanamisbu jiwe medan ichaxun Diosun xuxawati kushipayatun Jesúsun jatu yusianyan <sup>18</sup> jau Jesúsun xuxawanun, iwanan, juni yuda babuni jaki isin teneaibu butiki datantan jawen jaibuaibun Jesús anu bakebidani <sup>19</sup> janu yudan kaian xukuabuwen taea jaska watan bichibain Jesús uinmatima mai bawa jiwe sapa xeni mamaki inabain jawen dakatiki janu butenun, iwanan, janu bexpa wakin pudenkin xui watan janu ja juni yuda babuni Jesús anu buteaibun <sup>20</sup> jaska jatun shinan ikunjaidawaibu unankin juni yuda babuni Jesúsun yuikin:

—Dateyamawe. Min chakabuwen Diosun mia kupikatsis ibiakin man ea ikunwainwen taexun jau Diosun ana shinanyamanun en mia buaxunaii— akaya

<sup>21</sup> Moisin jancha jatu yusinmisbu inun fariseobun ninkatan Jesúski sinatai june yuinamei: “Ja juni chakabuki. Dasibi nuku padain Dios keskakatsi ikikiki. Diosun besti jawen chakabu buatiduki”, ikaibun <sup>22</sup> januxun tsuan Jesús yuiamabia jatun shinan unankin Jesúsun jatu yukakin:

—Matunan, ¿jaskakin man shinan chakai ikai? <sup>23</sup> ¿Jadatu bikamamen, jawen chakabu buaxunadaka, jawen yuda beniadaka? Ja dabe bikaken Diosun besti atiduwen taexun <sup>24</sup> ¿jaskakin man shinan chakai? En matun Juchi Kayabi Iyua na mai anua ea en jawen kushipa jayatun jawen chakabu en buaxuntidu man unanun en akai uinkanwen— iwanan, juni yuda babuni kaya wakin yuikin:

—Benitan mia jaki bakebidankanxu bui min jiwe anu kadiwe— akin <sup>25</sup> jawaida kayawa benikauan jawen dakati bitan buaya mapubaunabun <sup>26</sup> date paeyabi yuikin:

—Jabaa! Tsuan jaska waismaki. Jakia Dios pepajaida kushipatun na juni ma kayawaxuki. Natian jaska nun uinsma nuku uinmaikikidan— iwanan, Dios kenwanibukiaki.

*Leví gobierno pei bixunika Jesúsun katunikiaki, na janchadan  
(Mt 9.9-13; Mr 2.13-17)*

<sup>27</sup> Janua kainkaini janu bai kexa anu januxun Roma gobierno pei bixunmisbun jiwe anu Leví tsaua Jesúsun bechitushitan yuikin:

—Ea chibankubainwen— aka

<sup>28</sup> Leví benitan dasibi jenebainkin chibankin taewai jabe kashinxun

<sup>29</sup> jawen jiwe anuxun Jesúswen benimakin piti midima jatu pewamatan xanen ibu pei bixuin padanananmisbu inun jawen jaibu betsabapu jatu ichawa Leví inun Jesúsbetan piaibun <sup>30</sup>Diosun yunuti inun jawen nemati yusinaninanmisbu inun fariseobun Jesúsun jatubetan piai uinkin yuankin jaki chiti ikabu yukakin:

—¿Jaskakin matun yusinan pei bixunika chakabubu inun nuku ninkaisbumabetan pimenkain? Chakabujaidabubin!— ikaibu <sup>31</sup>Jesúsun jatun jancha ninkatan jatu yuikin:

—“En peki”, iwanan, shinainbu anu juni dauty kaismaki. Jakia isin teneaibu anu besti juni dauty kenabu kamiski. <sup>32</sup>Jaskaken: “En chakabuki”, iwanan, shinainbu jatun juinti pewakin en jatu medabewa shinan betsawatan jau Dios ikunwanunbun en juniki, juni dauty keskaidan. Jakia: “En chakabumaki”, ikin shinainbu jatun medabewatanun ika en juamaki— jatu wa

*Samakenikabun Jesúsyukanibukiaki, na janchadan  
(Mt 9.14-17; Mr 2.18-22)*

<sup>33</sup> januxun ana betsan Jesúsun jatu yukaxunkin:

—Nashimanika Juanki chiti ikabu inun fariseobuki chiti ikabun jatun chakabuwen taea jatunmebi ichakanikai samakechakayamakin Dios kenwankin jawen kushipa yuka chakayamakin jawa piyuisbumaki. ¿Jaskai miki chiti ikabu samakeama badi betsawatanun ika en juamaki— jatu wa

—Juni ainyain nawaibu anu jawen jaibuaibu paxkadiabuma piama jatunmebi ichakanikatidubumaki. <sup>35</sup> Jakia jatu xununbaini ma jatu dapaxkabaini kaken manukin jawen jaibuaibu samakekin piama itidubuki. Jaska keska kainkin en jatu xununbaina ewen nui en jaibuaibun piama samakexankanikiki— iwanan,

<sup>36</sup> ana jatu yusinpakekin miyuiwen yuikin:

—En yusianan, tadi bena estediamaka keskaki. Matu yusinun ninkakanwen. Tadi xeni baxnekea tadi bena tuax estediamaka mextexun jawen tadi xeni tsamian patsa estei ana baxnekei pikumiski. Jamen matun yusianan, tadi xeni baxnekea keskaki. En yusianwen tsamian keska wakin matun yusian en pewatidumaki. <sup>37-38</sup> Ana jabiaskadi keskawen matu yusinun ninkakanwen. Bichi bishtu xeniki uva jene bena buspudiamaka manekin mata waxun denex mestenwan jamebi katsai buspui bichi bishtu xeni pexemiski, vino bena inun bichi xeni benuidan. Jabiaskadi wakin en yusian bena matun shinan xeni en jusitudumaki, benukinan. <sup>39</sup> Jamen vino xeni ma beya wanixun vino bena pepabiaken akatsi ikabuma keska wakin matun beya xeni bechipaikin matun shinan bena wakatsi ikama en yusian bena man danaiin— jatu wanikiaki.

## 6

*Juindukuntitian jaki chiti ikabun xekiwan bimi tsekaxun pikubainibukiaki,  
na janchadan  
(Mt 12.1-8; Mr 2.23-28)*

<sup>1</sup> Januxun ana juindukunti sábado betsation xekiwan bai namakis manan baiwen bukin jaki chiti ikabu Jesúsbe bukin xekiwan bimi tsekaxun daxukidi axun pikubainaibun <sup>2</sup> fariseobu jabudi jatube kakin jatu uinkin Jesúski chiti ikabu jatu yukakin:

—¿Jawai juindukunti sábadotian man dayai? Sábadotian dayakin Diosun Moisés nuku nemani chibanna man kaneaai— jatu waibu <sup>3</sup> Jesúsun jatu yuikin:

—Bunikin jawada nukun xenipabu pepa Davidin jawen jaibuaibubetan anidan, ¿man uinsmamen? Diosun janchadan. <sup>4</sup> Matu yuinun ninkakanwen. Dios kenwanti tadi jiwe medan David jikixun Diosun Moisés yusiniwen taexun Diosbe nukunabu janchaxunikabun besti pitibiaken jawen Dios kenwanti misi Davidin bixun pitan jawen jaibuaibudi pimanikiaki. Jaska wabiaya Dios jaki sinatama iníki, kaneamawen taeadan— iwanan,

<sup>5</sup> —Jaskaken juindukunti sábadotiandi matun Juchi Kayabi Iyua xanen ibukin en yunuaiwen taea eki chiti ikabundi bunikin pikin kaneabumadiki— jatu wanikiaki.

*Juindukuntitian juni meken meyushkini Jesúsun kaya wanikiaki, na janchadan*

(Mt 12.9-14; Mr 3.1-6)

<sup>6</sup> Chipu ana sábado betsation mae betsa anu kaxun jatun ichati jiwe medan jikixun Jesúsun jatu yusianyan jabianudi juni meken yusiudi meyushkini jatube tsauken <sup>7</sup> januxun jabun jawen yusian danankin Jesús yuanun, iwanan, juindukunti sábadotian ja juni mepeai uinun, ixun, jaska wai uintan unanti watan ja anun ika manai tsauxun <sup>8</sup> jaskaibu Jesúsun jatun shinan unankin juni meken meyushkini yuikin:

—Benikidan ja maniabu namakis niwe— aka jawenabu maniabu namakis benia niken <sup>9</sup> januxun fariseobu inun Mosésin jancha jatu yusinmisbu Jesúsun jatu yuikin:

—En matu yukai jaskadamenkain, ea yuikanwen. Moisin jancha pepa chibankin juindukunti sábadotianan, ¿jaska watimen? ¿pewakin medabewatimen? ¿chakabuwatidaka? ¿yuda betsan jiweadan, paxawakin meketimen? ¿nuitapawakin yamawatidaka?— jatu watan <sup>10</sup> jatun jancha manakin Jesúsun uinbaunaya jawa yuiabumaken juni meken meyushkini nia Jesúsun ana yuikin:

—Min meken meshanwen— aka meshanyan jawen meken ma mepekei peaya <sup>11</sup> uin fariseobu inun yusinanamisbu jaki sinatakin jaska waxun Jesús nematimen ika june yuinamei jaki yubakai taenibukiaki.

*Doce junibu kushipa wakin Jesúsun jatu katunikiaki, na janchadan*

(Mt 10.1-4; Mr 3.13-19)

<sup>12</sup> Janua xaba betsa badi kaya Jesús ja mesti kai mati mapetan uxama Diosbe janchashini <sup>13</sup> penaya jaki chiti ikabu dasibi jatu kena beabu <sup>12</sup> besti katutan jatu kenakin: “Man en kushipayabuki”, jatu wanikiaki. <sup>14</sup> Ja 12 junibun kena mia yuinun ninkawe. Simón kena betsa wakin Pedro wani inun, jawen betsa Andrés inun, Santiago inun, Juan inun, Felipe inun, Bartolomé inun, <sup>15</sup> Mateo inun, Tomás inun, Alfeon bake Santiago inun, romano nawabu nichinkatsis imis Simón inun, <sup>16</sup> Santigon bake Judas inun, Judas betsa Iscariote anua yumeni chipu jatun Jesús jatu achimaxanaidan, jati Jesúsun katunikiaki.

*Yuda ichapabu Jesúsun jatu yusinikiaki, na janchadan*

(Mt 4.23-5.12)

**17-19** Januxun 12 junibu katutan jatu iwei bututan mawa tenanman panpanuxun jaki chiti ikabu Jesúsun yusinun ika tsauken jabianudi jabun chibainbu inun midima yudabu Judea anua inun, Jerusalén anua inun, ia-nenwan kexa betsa Tiro inun Sidón anua jawen jancha ninkatanun ika bekin isin teneaibu jatu kayawamakatsi iweshinabu jaki dasiabu isin teneaibu xuxawakin yushin chakabun jatu nuitapawai kainmakin jawen kushipa janua kainkin Jesúsun jatu kayawayu uin bechipaikin Jesúsun mekatsis ikaibun

*Diosun jatu benimawaxanaikidi jawen tsuma kushipayabu Jesúsun jatu yusinikiaki, na janchadan*

**20** jatu xuxawakin menetan jaki chiti ikabu besti beiskin jatu jancha wakin:  
—Tsuabuda yumain matunmebi man kenkunkainama Dios xanen ibukin matu mekekubainxanaiwen taea man benimakunkainmiski.

**21** Ja inun, tsuabuda jawada pepa besti bechipai chakayamai jawen nui-jaidaiwen kupikin Diosun jatu yaniwama keska waxanaiwen taea benimapaketi shinain benimakubainkanikiki.

Ja inun, tsuabunda matun chakabu shinain juinti nishma man kaxakatsis imisbuwen taexun Diosun matun juinti shinan chankanwan man benimakunkainmiski.

**22** Ja inun, matun Juchi Kayabi Iyua tsuabunda man ea chibainbuwen taexun jabun matuki ejen iki danain matu ichakin jatun ichati jiwe anu man ana jikiyamanun matu nemakin matu danainbun man benimakunkainx-anaii. **23** Jaska inun, Diosun jancha yuixunikabu ichakawanibu keska wakin matudi ichakawaibu nai anuxun Diosun matu duawaxanaiwen taea jawa dateama shinan chankankubainxankanwen— iwanan,

**24** mapuabudi yuikin: —Jamen matudan, mabuwen jiwei kein “En mabu midima jayaki”, iki tsuabuda natian man jawen benimaii. Jakia uatian man nuitapaxanaii.

**25** Ja inun, tsuabuda yaushikin piti yani bestiwatan man benimakubainaibu ana tsuan matu medabewakin matu duawabuma buni tenei man nuitapajaidaxanaii.

Ja inun, natian tsuabunda Dios shinanma matun jamapai besti shinain man usanmis ana jaskama matun juinti nishma kaxai man nuitapajaidaxanaii.

**26** Tsuada ibubis jawawenda jawenduakin dasibibu jatu bechipaimakin man jatu kenwanmatidudan, uindaxankanwen, mesekidan. Jabun Dios yuixunikapaiaibun jatu padan paepawa matun xenipabun jatu kenwanpau-nibu keska iyamaxankanwen— iwanan,

*Nukuki sinataibuwen nuitikiaki, na janchadan*  
(Mt 5.38-48; 7.12)

**27** ana jatu yusinkin:

—Man ea ninkaibu matu yusinun ninkakanwen. Matuki sinataibu jatuki sinatama jatuwen nuikubainkanwen. Ja inun, matu danainbu jatu bebis danananma jatu duawakubainkanwen. **28** Ja inun, tsuabunda matu ichakawai matuki sinataibun jatu bebis manakunama jau Diosun jatu medabewanun jatu Dios yukaxunkubainxankanwen. **29** Ja inun, tsuada mikisinatakin mia detekin ispais aka jabebis sinatai kupinameama: “Uke betsadi ea awe”, ika dabekexunai keskakin shinankubainxankanwen. Ja inun, tsuada min dibiawen taexun min dakukuti tadi mia biankin buaya min tadi manankidiadi yaushiyama jadi inanyuxankanwen. **30** Jamen tsuada nuitapai juxun min jawada mia yuka medabewakin inanyukubainxankanwen. Jamen betsadan, tsuanda min jawada bushinxun ibu wakin mia ana

inankatsi ikamaken jas shinain jaki sinatayamakubainxankanwen. <sup>31</sup> Jamen betsadan, tsuada miwen nuikin jau mia medabewaxanun bun matun dukun jaska shinankin uinmakin jatu medabewakubainxankanwen, jaska wai nuikipakin man kaneamakidan.

<sup>32</sup> Jaska inun, Diosun jancha danain chakabumisbu jabiaskadiai duanamemisbuki. Jaskaken matudi matun jaibubes man duanamei man jawa binunananmaki. <sup>33</sup> Ja inun, juni chakabu jabetan chakabu wamisbube nui medabenankubainmisbuki. Jaskaken matudi pepabuwén nui jabu besti medabewai ma pepamadiki. <sup>34</sup> Jamen betsadan, juni chakabubu duanamekin betsan jawen jaibun jamapai buxun jawaida ana bexunmiswen taexun duawakin jawen jamapai ana yuka inanyukatsis imisbuki. Jaskaken matudi duanamei pepabiai tsuanda matun jamapai jawaida ana matu bexunmis besti man inanmiski, ana manakuti pepa bikatsi shinamanan. <sup>35</sup> Jakia pepakatsis ikidan, eskatiki. Matuki sinataibuwen nuikin jatu duawankin matun pepa jatu uinmakubainkanwen. Jaskawen taexun tsuabunda min jamapai biwanshinxun mia ana bexunmisbu besti ana ja shinanma mia yane bexuinsbumadi jatu inandiakin yuda dasibibu jatu duawakubainxankanwen. Jaska wakin man jatu binumamisken matun pepawen Dios dasibi binuatun matu manakuxanikiki, jawen bakebu matu wakinan. Janunkain jabun Dios kenwainsbuma inun juni chakabububiaken betsaa betsa inankin Diosun jatu duawamiswen taea <sup>36</sup> matun Epa Dios nuikipa keskai nukipadiakubainkanwen— iwanan,

*Yuda betsa chitekin ja atimatikiaki, na janchadan*

(Mt 7.1-5)

<sup>37</sup> Jesúsun ana jatu yusinkin yuikin:

—Tsuada ja akin chitekin unanti wayamakanwen. Man jatu jaska wamaken Diosundi jabiaskadi wakin matu chitekin ja akamadi ixanikiki. Ja inun, tsuada jatu dake wayamakanwen. Man jatu dake waismaken Diosundi matu dake wama ixanikiki. Ja inun, tsuabunda matu chakabuwaibu ja shinanma jatu jakimawakin buawe. Man jaska waya Diosundi matun chakabu matu buaxunxanikiki. <sup>38</sup> Ja inun, jawada man jaya paxkaxun juni betsa inankubainkanwen. Jaska wai man yaushiamaken Diosdi matuki yaushiamma jabiaskadi matu waxanikiki. Tsuanda man xeki inankin tana pewatan sakuki deukin yaushiamma tsinki tsinki akin mata waxun man jatu inanmis keska wakin jabias shinanwendi Diosun matu manakuxanikiki— atan,

<sup>39</sup> Jesúsun miyui betsa tibiwen jatu yusinkin yuikubainkin:

—Juni bekunman juni betsa jabe bekun iyupai jadakidi iyuai unanma jafia dabe mikin maebain di idabemisbuki. Jaska keskai matun shinan pewakin mae wadiama jawa jatu yusinkin man pewatidumaki. <sup>40</sup> Ja inun, jawen tsumabun jatun yusinan binutidubumaki. Jakia jatun yusinan jatu tapinmakubainaya jatun yusinan keska itidubuki.

<sup>41</sup> ¿Jaskai ikunwain betsa pewakin medabewanun, iwanan, jamapai pese jawen beduki jikia min bikatsis ibiai mina dukun ji ewapa min uianmamen? Ji jidabiwen betimanabia jawa shinanma yuikin: “Uian. Min ji pese beduki ikadan, ¿mia bipa?” akin min yuimiski, kanekinan. <sup>42</sup> Jakia bemakis bepadamei janchamisbuun, matudi chakabubia betsa chakabuai uinkin man ja amiski. Man ji jidabi betimana tsekaxun puta keska wakin matun juinti medanua matun chakabu ewapa putatan ana kaneama medabewakin ji pese min jaibun bedu anua bia keska wakin juni betsan chakabu bexmas jayadi man medabewakin yusintiduki— iwanan,

*Jawen bimi tibiwen ji unanmisbukiaki, na janchadan  
(Mt 7.17-20; 12.34-35)*

<sup>43</sup> ana miyui betsawen Jesúsun jatu yusinkin yuikin:

—Ji pepa bimiai jawen bimi chakabuismaki. Jakia ji chakabu bimiai jawen bimi pepaismadiki. <sup>44</sup> Jaskawen taexun jawen bimi tibiwen ji man unanti wamisbuki. Mae muxa anua higo bimi man tsekaismaki. Ja inun, isne anua uva bimi man tsekaismadiki. <sup>45</sup> Jabiaska keskadi tsuabuda duapabu juinti pepaya jancha pepawens janchamisbuki. Jamen tsuabuda duapa juinti pepa jaya jawa chakabu jayama yui jancha pepawens janchamisbuki. Ja inun, tsuabuda jatun juinti medan shinan chakabu mata janchakin chakabu yuikin kainmamisbuki— iwanan,

*Ninkaibu inun ninkaisbumakidi yusinikiaki, na janchadan  
(Mt 7.24-27)*

<sup>46</sup> Jesúsun jatu yusinkubainkin yuikin:

—Xanen Ibuun, Xanen Ibuun, akin man ea kenabiamis ¿jaskakin en matu yusian man aismamen? <sup>47</sup> En jancha ikunwankin ea chibunun, iwanan, jawada en yuai akubainxanaibukidi matu yusinun ninkakanwen. <sup>48</sup> Tsuanda mishki jiwe wakatsi ikin jene kexa mai basankin uke medan mishkiki pesaxun ja mamaki mishki tsamabidankin jiwe wadan, en yuiai akubainmisbudan, ja jiwe wanika keskabu ixankanikiki. Janua bai matajaidabidankin jawen jiwe achia ja jiwe mishkiki tsamiawen taea jawa takax iki tsibusketidumaki. <sup>49</sup> Jamen jawada en yuiai ea danankin akama ixanaibukidi matu yuinun ninkakanwen. Tsuanda mishki jiwe wanun, iwanan, jene kexa mai basankin kini keyatapawama bexantu bestiawan mishki tsamabidankin jabebis watan jiwe wadan, ea danainbudan, ja jiwe wanikabia unainsmapabu keskaki. Janua bai matajaidabidankin jawen jiwe achia mishkiki tsamiamawen taea jawaida tsibukei di imiski. ¿Jadatu man jaskamenkain? Uindakanwen— akin Jesúsun jatu yusinikiaki.

## 7

*Romano capitánen dayadu Jesúsun xuxawanikiaki, na janchadan  
(Mt 8.5-13; Jn 4.43-54)*

<sup>1</sup> Januxun jatu yusin menetan Cafarnaúm anu Jesúsun chintuntani jikiken <sup>2</sup> janua jabianudi romano soldado xanen ibu capitánen dayadu isin tenei mawakatsis ikai bechipaijaidakin <sup>3</sup> Jesúsun ma jua ninkatan jau xuxawaxunu-n judio xanen ibu anibubu nichinkin Jesúsun chanimakin jatu yunua <sup>4-5</sup> Jesúsun anu buxun jau xuxawaxuin kanun ea akin yuixunkin:

—Capitán juni duapaki. Nukun ichati jiwe nuku jatu amaxunyamaki. Ja inun, nukunabu bechipaijaidadiamiswen taexun medabewakin jawenadi xuxawaxuin kawe— akeakeabu <sup>6</sup> jatun jancha ninkatan jatube kai ma jawen jiweki kemai kaya jau yuixununbun soldado capitánen jawen jaibuaibudi yunua Jesúsun juaiki nukuxun capitán yuixunkin:

—Xanen Ibuun, en jaibu capitánen jancha en mia yuiai ninkawe. Ewen dabanan en jiwe anu juyamawe. <sup>7</sup> En pe bexmasjaidawen taea mianu en kama ixuki. Jaskaken en tsuma jau xuxanun min jancha besti yunukin ea xuxawaxunwen. <sup>8</sup> Ja inun, jatun ea yunumisdan, eadi en xanen ibu jayaki. Eandi soldadobu yunui en xanen ibudiamiski. Betsa yunukin: “Kawe”, en wa kamiski. Betsa yuikin: “Jewe”, en wa jumiski. En dayadudi yunukin: “Awe”, en wa amiski. Jakia min ea binuawen taexun min jancha bestiwen min xuxawatiduki, en unanan— akin capitán jancha yuixuna

<sup>9</sup> Jesúsun jawen jancha ninkatan soldado capitán ikunjaidawaiwen taea Jesúsun e itan yudan kaianen chibain jachun beaibukidi nasauketan jatu yuikin:

—Jaska na nawa xanen ibun ea ikunjaidawai keska nukunabu Israelbu en jaska jatu uindiamaki— jatu waya <sup>10</sup> jawen jaibuaibu soldado capitánen jiwe anu chintumbain jawen dayadu ma xuxaxuna uinibukiaki.

*Baneyabia jawen bene ma mawatun bake mawa Jesúsun bestenwanikiaki, na janchadan*

<sup>11-12</sup> Jesúsun jaska wabaini jawen 12 tsumabu kushipayabu inun, jaki chiti ikabu inun, yudan kaianen chibain jabe bukin mae betsa jawen kena Nainkidi kai kemaya ainbu jawen bene mawayamatun jawen bake bestichai mawaxuna maiwanun, iwanan, juni dabetan baketiki beaibu jawenabu jachun bei jawen ewabe kaxakubidanaibu <sup>13</sup> Jesúsun jaki nukutan jawen ewa nuitapaiwen nuikin yuikin:

—Kaxama nesewe— atan <sup>14</sup> bedunan mawa beaibuki Jesúsun kemaxun jawen baketi besti tsumaya niti itan tsumabun mawa yuikin:

—Bedunaan, en mia yuiai bestenwen— aka

<sup>15</sup> mawa jawen tadiwen yabukin mestenjaida wabu jaska peketima bestenkauan natsaua janchai taeaya jawen ewa benimawatan jawen bake nichinxuna iyuaya <sup>16</sup> Jesúsun jaska wai uin jaska uinsbuma jawen datei mesejaidakin:

—Jabaa! Nuku anu Diosun jancha yuixunika pepajaida ma ana taxnishi-naki. Jawnabu duawai Dios ana bayuxuki— ikin Dios kenwankubainaibus <sup>17</sup> jaska Jesúsun axu ninkabain Judea mai pakeanuabu inun mae betsa betsapa anuabundi yuiaibu bana ninka akeakenibukiaki.

*Jaki chiti ikabu Nashimanika Juanen Jesúsun anu jatu yununikiaki, na janchadan*  
(Mt 11.2-19)

<sup>18</sup> Nashimanika Juan bichiti jiwe anu jiwea jaska Jesúsun akubainaikidi jawen tsumabu Juanki chanikubainaibu <sup>19</sup> ninkatan jawen tsumabu dabe kenaxun jatu yunukin:

—Jesúsun kaxun: “Mekenika Diosun nukun xenipabu yubani chanima juxanaidan, ¿min jabiamen? ¿Betsa daka nun manai?” akin ea yukaxuntankawan— iwanan, jatu yunua

<sup>20-21</sup> buxun isin betsa betsapa teneaibu xuxawakin yushin chakabu betsa betsapa kainmakin bekun inun bexuxbu uinmakin Jesúsun jatu kaya wapakeaya Nashimanika Juanki chiti ika dabe Jesúsun anu kaxun jaska wai bechitan atimas jaki nukutan betsan yuikin:

—Mianu Nashimanika Juanen nuku yunushinaki. Mekenan Diosun nukun xenipabu yubani chanima juxanaidan, ¿min jabiamen? ¿Min jamadaka? ¿Betsa daka nun manayuai?— aka <sup>22</sup> ja dabe shinanmakin Jesúsun yuikin:

—Jawada uinkin man ninkakubainaidan, jaska Juanki chaniditankanwen, eskaibudan. Bekun inun bexuxbu uiainbu inun, jaska mapuisbuma mapuaibu inun, jabu bichiki dasibi chami betsani jaki dakemisbu main sakada iki keyuaibu inun, patabun ninkakin keyuaibu inun, mawa ana besteainbu inun, jabu yumainbu jatun paxati kakape ninkatan benimaibudan, jaska Juan yuitankanwen. <sup>23</sup> Tsuanda ea ikunwain jawen shinan chakabui chin-tuinsmadan, chanima benimaxankanikiki!— jatu wa

<sup>24</sup> Juanen jatu yunushina iwani ana chintumbainabun ja dapi mapub-aunabu Jesúsun Juankidi jatu yui taewakin:

—Janu tsua jiweabumanuadán, ¿jawa man uintantanimamen? Tawa pei niwen bubi bubi wai keska wakin ¿junin jawen shinan betsa betsapa maewa akeakeimamenkain? <sup>25</sup> ¿Jaskamen? ¿Jaskamadaka? ¿Jaskada jakidi kaiaín man uintantanimamen? ¿Junin tadi pepa sawea daka? Tadi pepa sawea benimai beyusidan, mabu akunjaidayabu jatun xanen ibun jiwe jawendua anu besti jiwea ikaibu man uintidubuki. <sup>26</sup> Jaskakenan, ¿jawa man uintantanimamen? ¿Diosun jancha yuixunikamenkain? Jaki. Juanan, chanima Diosun jancha yuixunikaki. Ja inun, yuixunika betsabu Diosun yununi Juanen ma jatu binuaki. <sup>27</sup> Ja inun, Diosun jawen bake nichinkatsi Juankidi yuikin: ‘Ninkawe. Janu min kaxanun jau pewai kanun en jancha yuixunika betsabebunkidi en yunuxanaii, en mia nichindiamadan’, akin jakidi jawen kaka kenenibuki. <sup>28</sup> Chanima en matu yuiaii. Yuda dasibibun Dios dayaxunkin tsuan Juan binuama ibianibun janu Epa Dios xanen ibuaitian ikunwainbu jaki dasiabu bexmasjaidabiabun Juan binuxankanikiki—jatu wai

<sup>29</sup> Jesúsun jancha ninkakin jabun Nashimanika Juanen jancha ninkatan shinan betsa waibu jawen unanti wakin Juanen jatu nashimaimawen taexun yudan kaian inun romanon xanen ibu pei bixunikabun yuikin: “Chanimaki. Jawada Diosun akaidan pepaki”, iwanan, shinan akeakeaibun <sup>30</sup> jakia judio fariseobu inun Diosun jancha kenenibu yusinanamisbun Juanen jancha ninkama inun jawen unanti nashimati danainmabuwen taexun Diosun jabudi duawapanan danainmabun <sup>31</sup> Jesúsun ana jabianudi jatu yuikin:

—Nukunabudan, ¿jaskada shinain imisbumenkain? Matu yuinun ninkakanwen. <sup>32</sup> Mae namakis jemaintin anu beyuskin jatun ibubu imis mawai bake mishtinbu xuku dabea tsauxun xuku betsan yuikin: “Tepe dewe nun mawabiaya benimai man nawamaki. Janua nun kaxei ikaskin nun nulti nawa mawabiaya man kaxamaki”, jatu wabu jawawenda beyusti unanbuma keskabuki, nukunabudan. Matun shinan chankanti jubiaken man benimamaki. Jamen matun chakabu shinain kaxakatsi ikama man shinan betsa waismaki. <sup>33</sup> Eskaki, matu yuinun ninkakanwen. Ja dukun Nashimanika Juan juxun matu yusinkubainkin misi pepa piama vino paepa akama matube beyusamaken jakidi janchakin: “Yushin chakabu jayaki”, iwanan, man yuia akeakeimaki. <sup>34</sup> Janua eadi matun Juchi Kayabi Iyua juxun misi pepa pikin vino paepa aki en matube nawabiakunkainaya ea yuankin: “Uinwen. Pikeki. Paenkin romano pei bixunika chakabubu inun yuda chakabu betsabu jaibu wamiski”, ikin man eadi yuanmiski. <sup>35</sup> Jamen nuku dabe nun pepabiaken Diosunabu kayabibu besti unanepakin jabun nukun yusian ninkatan nuku chibankanikiki—jatu waya

### *Fariseo Simónen Jesúspimanikiaki, na janchadan*

<sup>36</sup> januxun fariseo betsa jawen kena Simón jawen jiwe anuxun Jesúspimakatsi chanima jawen jiwe anu Jesúspika pikatsi ixkexkanan dakai baxti ibaunxun piaibun <sup>37</sup> jabia mae anuadi ainbu jininipan Jesúsun piai ninkatan xeni jene ininipa kadujaida nenkati juxupa bishtuki bexun <sup>38</sup> june Jesúsun tae dapi danti itan jawen chakabu shinain juinti nishmajaida june kaxakin jawen beun jene besti Jesúsun tae pechiki tuis tuis axun jawen bu chaipawen jutekede atan jawen tae petsu petsu akin keyutan xeni jenewen jawen tae cha akaya Jesúsun unanbiakin uianmaken <sup>39</sup> Jesúspika jatun iatun uintan Jesúskidi shinankin: “Dios nuku yuixunika kayabitunan ja ainbun jawen tae meaidan ainbu chakabukunkainmis unankeanaii”, ikaya <sup>40</sup> Jesúsun jawen shinan unantan medabewakin yuikin:

—Simóon, ¿jawada mia yuipa?— aka fariseon yuikin:

—Ea yuiwe, yusinaan— aka

<sup>41</sup> miyuiwen Jesúsun yuikin:

—Juni dabetan juni betsa anua pei biyuimabu dibiabuki. Betsan 500 xaba daya pei dibiken betsandi 50 dibiaki. <sup>42</sup> Ja dabetun jania pei bixun pakatidubumaken juni betsan ja dabe pei inanyima dibiabu jatuwen nuikin ja dabetun dibia jatu kenatan jakimashinaki, ana shinamadan. Jaskaken ja dabetanan, ¿jadatutun ja jatun pei inanyima bechipai-jaidaimenkain, betsa binunkinan?— aka <sup>43</sup> fariseon yuikin:

—En shinanan, ja midima jakimawashinatun bechipaijaidaikiki— aka

—Chanimaki. Min yui kayabiaii— iwanan <sup>44</sup> Jesús nasauketan ainbu uinkin Simón yuikin:

—Na ainbun ea duawaidan, ¿min uiain?— iwanan —Min jiwetan en jikiai jaska wamisbu keska wakin juchukiti unpax min ea tsauvxunama ibiaxuken na ainbun jawen beunwen ea juchuxun jawen buwendi en tae ea jutekede axuki. <sup>45</sup> Ja inun, ea beya wakin min ea tantsu akamaken mia anu jikiai en dakaken na ainbun besti ea beya wakin en tae petsu petsu akin jeneamaki. <sup>46</sup> Ja inun, ea beya wakin xeni teipa ininjaidawen en bu min ea macha akamaken xeni jene ininjaidawen jatun en tae cha axuki, ea beya wakinan. <sup>47</sup> Jaskaken ewen nuikin ea bechipaijaidaiwen taexun jawen chakabu midimabiaken ma en buaxuna min unantiduki. Jamen tsuanda chakabu eskadabes nun buaxuna mawaida ea inun en Epa shinankin midinwanmusbuki— iwanan, <sup>48</sup> ainbudi yuikin:

—Epa Dios en mia daewaxunxuki, min chakabu mia buaxuntan jau ana shinanyamanunan— akaya <sup>49</sup> jabube jatu iabun piaibun ninkatan baxexen yuinamei:

—Nadan, ¿jawa juni ikimenkain? yudabun chakabu xunska buaxuntidu-dan— iwanan, yuia akeakeaibun

<sup>50</sup> jaskabiabun ainbu Jesúsun ana yuikin:

—Min ea ikunwainwen taexun min chakabu min ma bextekei pexuki. Ana jawa dakei dateama unanuma inun kadiwe— anikiaki.

## 8

### *Ja ainbuaibun Jesús medabewanibukiaki, na janchadan*

<sup>1</sup> Janua ana betsation jaska pepawen inun chakabuwen kipi Dios nenu ana xanen ibuxanaikidi mae ewapa betsa betsapa inun mae jatiubuma anuxun Jesúsun jatu yusinkubaunaya jawen 12 tsuma kushipayabun tapin jabe bukubainaibun <sup>2-3</sup> ja dikabi ainbu betsa betsapa isin teneaibu xuxawakin yushin chakabu kainmakin Jesúsun jatu medabewakin xuxawaimaken jatun peiwendi Jesús inun jawen tsumabu medabewakubaini María Magdalena anua Jesúsun 7 yushin chakabu kainmaima inun, Susana inun, xanen ibu Herodes yunuxunmis Cuzan ain Juana inun, ainbu betsa betsapabudi Jesús anu butan butankin medabewakubainaibun

### *Jexe sa akakidi miyuiwen Jesúsun jatu yusinikiaki, na janchadan*

(Mt 13.1-23; Mr 4.1-20)

<sup>4</sup> mae betsa betsapa anua bei Jesús uinkin jawen jancha ninkanun ika ichabidanbidanaibun yudan kaian jaki dasi ichabu Jesúsun jawen jancha juneawen jatu miyuikin:

<sup>5</sup> —Juni betsan jawen bai anu xekiwan sa aki kaxun sa akaya jexe betsa kati bai namaki kauana yudabun pema pema akaibu deiwan juxun xea keyuabun janua xekiwan jukuanmaken <sup>6</sup> jexe betsa mishki ewapabu mania

anu mai eskadabes bemandchimea anu bana pexei benekaunaya mai eskadabesken badi jui kukin mai tsusinwan jawen tapun bemakis bewexekeea xanai utsimiski. <sup>7</sup> Ja inun, jexe betsa muxa jukundiamma anu nidi ika jukuainki muxan buexekin yabua bimitidumaki. <sup>8</sup> Jakia jexe betsa mai pepa anu nidi aka benei bimi ichapajaida jayamiski, betsa 100 jexeyaidan—iwanan, unanxubima yuikin:

—Man pabinkiyabuki. Ninkatan jakimayamaxankanwen— jatu wabainaya

*Jexe miyuikidi xabakabi Jesúsun jatu unanmanikiaki, na janchadan*  
(Mt 13.10-23; Mr 4.10-20)

<sup>9</sup> jawen tsumabu besti Jesúski dasixun jaska miyuiwen jatu yusinxu yubu <sup>10</sup> jatu yuikin:

—Matudan, jaskai Dios xanen ibumiskidi Diosun jawen pepa juneni xabakabi man en tsumabu matu yusinkin unanmaikiki. Jakia jabun Diosun jancha ninka bestiaibu miyuiwens besti en jatuki chanikunkainaii, uinbiakin jau uin pewayamanunbun inun ninkabiakin jau ninka pewayamanunbunan—iwanan,

<sup>11</sup> —Man en tsumabudan, jexe sa akakidi miyui matu xabakabi yuinun ninkaidakanwen. Jexedan, Dioskidi yusinti janchaki. <sup>12</sup> Jexe betsa janu kati bai anu kauanadan, yudabun Diosun jancha ninkabiaibun jamakidia diablo Satanás juxun jawen jancha pepa jawen uintiki banai mebinmiski, jau ikunwain mekeyamaxanunan. <sup>13</sup> Ja inun, jexe betsa mishki ewapabu mania anu mai eskadabes bemandchimea anu nidi akadan, tsuanda Diosun jancha ninkakin taewai benimabiaya shinan pewamawen taexun jawen jiwepanan Diosun jancha dananmakin jatu bika wakin jawen jamapaiwen jatu ichakawabu tenei jawawen jaskatima ja uintan ana jawendi chintunbainmisbuki, jatun tacha ichapama keskawen taeidan. <sup>14</sup> Ja inun, jexe betsa muxa anu nidi ikadan, jabun Diosun jancha bechipaibiai jatun jiweawen nui inun mabu betsa betsapawen kemu chakayamai jayakatsis ikin jatun jatu yabua Diosun jancha ninkabiai tapinkatsi ikama unanxubida jenekubainmisbuki, yudabu miban bimiuma keskabuidan. <sup>15</sup> Jakia jexe betsa mai pepa anu banadan, Diosun jancha pepa tapintan uinti shinan chankankin jeneama mestentan chibankubainkin januxun yuda betsabu yusinkin jatu ikunwanmamisbuki, mai pepa anu jexe sa aka ewai benei pamis keskaidan—jatu watan

*Binkidi miyuiwen Jesúsun jatu yusinikiaki, na janchadan*  
(Mr 4.21-25)

<sup>16</sup> janua yudan kaian anu ana kaxun Jesúsun miyui betsawen ana jatu yusinkin:

—Bin dekutan jamapaiwen bepukin junetima inun tapu naman tsautima man unaein. Jakia bin dekuxun jau jawenabu jikikin uinshadanunbun manaundi tsauunmisbuki. <sup>17</sup> Jaskaken jawada en matu yusinkubainai yuda betsabu jatu yusinkin juneyamakubainxankanwen. Jaska inun, jawada junekin man jatu yusianma inun jawada june ibubis man ikaidan, dasibi Diosun jatu xabakabi waxunkin keyuxanikiki. <sup>18</sup> Jaskawen taexunan, ninka peidawakanwen. Jakia tsuabunda en jancha besti ninkakin chibainbu ichapa en ana jatu xabakabi yusinkubainxanaii. Jamen tsuabunda ea chibani kayabismabia: “En ikunwaiin”, ikin jaska besti shinanmis ja eskadabes en jatu mebinxanaii, jakimawakinan— jatu wai

*Jawenabu kayabikidi Jesúsun jatu yusinikiaki, na janchadan*  
(Mt 12.46-50; Mr 3.31-35)

<sup>19</sup> Jesúsun jatu yusinkin menediamaken yudan kaian texke ikabuwen taea jawen ewa inun jawen betsabu bea Jesúski jaska kematima <sup>20</sup> juni betsya yunua yuia akeakebainabu atimas jawen ewa juni betsya Jesúsun yuixunkin:

—Min ewa inun min betsabun unu jemaintinxun mibe janchanun ixun mia kenakanikiaki— akaya

<sup>21</sup> jatu yusinkin Jesúsun yuikin:

—Diosun jancha ninkakin akubainmisbudan, jabiabu enabu kayabiki, en ewabu inun, en puibu inun, en betsabudan— jatu wanikiaki.

*Jesúsun niwe inun ianenwan nemanikiaki, na janchadan*

(Mt 8.23-27; Mr 4.35-41)

<sup>22</sup> Ana betsatian Jesúsun jawen tsumabu jatu yuikin:

—Ianenwan besusi pukei kexa betsaudi buyunankanwen— jatu wa jawen tsumabube xaxun inatan xutubaini buaibun <sup>23</sup> janua ianenwan besusi pukeabun Jesúsun ma bika xaxu chixukidi daka uxaken janua niwe kushipajaida besubainaibukidia jene buspu tsaubidankin xaxu jene mata wa ma jiki kemaya <sup>24</sup> datei Jesúsun anus ichaxun bestenwankin yuikin:

—Yusinaan, yusinaan, nun jikiaii— akin bestenwanbu Jesúsun bestenkauan benitan niwewan inun ianenwan buspu tsaubidanai yuikin:

—Nesewe. Peswe— aka niwe main neseaya ianenwandi buspu tsaubidanai main pesaya <sup>25</sup> Jesúsun jawen tsumabu yuikin:

—¿Man jawawen datei ikai, ea shinanmadan?— jatu wa e iki keyutan yuinamekin yuikin:

—Jabaa! Na junidan, ¿jawa junimen? min atidumakidan. Niwe inun ianenwanendi ninkakanikikidan— ibaini bui

*Gerasa anu kaxun Jesúsun juni yushin chakabubu jaya kainmanikiaki, na janchadan*

(Mt 8.28-34; Mr 5.1-20)

<sup>26</sup> Galilea ianenwan kexa betsaudi Gerasa mai pakeanu Jesúsun kai atimas keti itan <sup>27-29</sup> xaxu anua butui jatube mapekekainaya janua juni betsya yushin chakabuya unainsmapa tadiuma jiwetan jiweisma janu mawabu maiwamisbu anu besti jiwekunkainmis natian jawenabun mane dispiwen nexabiakubainmisbu yushin chakabun kushipa wa mane dispi nasamis jabun unainsmapa watan janu jiweabumanu iyumis Jesúsun juai bechibidani kushikidan unantan bis ikidan Jesúsun naman danti iken ja juni anua yushin chakabu Jesúsun yunukan taewa janua jancha kushipawen yushinen juni unainsmapa yuimakin:

—Jesúsuun, min Dios kushipajaidatun bakedan, en mia unaiin. En mia yukai nukudan, kupikin nuku nuitapawayamawe!— aka <sup>30</sup> Jesúsun yukakin:

—¿Jadakidi min kena ikai?— aka yushin chakabu ichapa ma juniki jikinibuwen taexun yushinen juni janchama Jesúsun yuikin:

—En kenadan, “Ichapajaida En Jayaki”, en yushin midimayadan— akaya <sup>31</sup> janu kupiti mai kini uke medanjaida anu Jesúsun jau jatu yunuyamanun yushin chakabun Jesúsun nematan <sup>32</sup> ja mati anuxun ina yawa ichapabun pikin mai mixexaibu yushin chakabun bechitan Jesúsun ea akin yuikin:

—Ja ina yawa anu nuku yunuwe, ja medan nun jikinunan— akabu janua Jesúsun jadi jatu yunua <sup>33</sup> ja juni anua kainbaini ina yawa medan jikibainabu ja ina yawa midima datei mawa butei nidi ibaini ianki pukui dasibi jasai keyuaibun

<sup>34</sup> janua ja ina yawa mekemisbu datei kushibainkin jaskaxu jatun mae anu jiweabu inun bai puchinin jiweabu jatu banabima akeakeabun <sup>35</sup> yudan kaianen uin beaibu janu Jesúski nukuxun ja juni: “Yushin chakabu ichapa en

jayaki", ixu ma tadi sawea ana unainsmapa keskama janu Jesúsbe tsaua ana jaska ikunkainshina keska dabanen ikin shinain dateaibun <sup>36</sup> jabun Jesúsun jaska wai uinbaina jatu yui kakaibun <sup>37</sup> janu Gerasa anuabu datekin Jesús nichinkin:

—Nukun mae anu ana mapekeama kadiwe— akeakeabu janua Jesúsun jatun jancha ninkatan kai xaxun inai kaya <sup>38</sup> ja juni yushin chakabu kainmaxutun Jesús ea akin:

—En mibe kaii— aka nemakin yuikin:

<sup>39</sup> —Ebe kayamawe. Jakia minabun jiwe anu kaxun jaska Dios miwen nuikin min yushin chakabubu mia kainmaxu minabu yuiditanwen, jau miwen benimadinunbunan— abaini kaya ja junin jaska Jesúsun yushin chakabu midimajaida kainmaxunbainshina jatu yuikubaunikiaki.

*Ainbun jimi baxneni neseisma Jesúsun mainwantan Jairon bakedi bestenwanikiaki, na janchadan*

(Mt 9.18-26; Mr 5.21-43)

<sup>40</sup> Janua Jesús ianenwan kexa betsaudia chintuntani ana jawendi jui keti ikaya yudan kaianen manajaidaibun Jesús juai bechitan jawen benimai ii jaki ichabu <sup>41-42</sup> ichati jiwe anuxun yunumis xanen ibu betsaa Jairon Jesús bechitan jukidan ja bebun di iki beutan ea akin yuikin:

—En ainbu bake bestichaiyaki, 12 badiyadan. Ma eskatian ea isin tenexuni mawakatsis ikaya miki chani en juxuki. Ebe kaxun uinkin ea xuxawaxunuwe— atushia janua jaska Jesúsun ninkatan jawen jiwe anu jabe kaya ja yudan kaian ichapabundi itimaska wai supu ibainaibun

<sup>43</sup> janua ainbu jimi baxneni ja isin tenei ma 12 año kabia jawa neseisma badi betsaa tukama ikunkainmisen janua nuitapaya juni dauyan mainwankin xuxawapaibiabu jawen pei dasibi putakin keyubia jawa maianma ikunkainkin yudan kaianbetan Jesús chibain <sup>44</sup> ja ichun kakin jawen tadi kexa metsaya jawaida jawen jimi bextekai maianyan

<sup>45</sup> jaska jawen kushipawen tsuada xuxawa Jesúsun unankin yudan kaian jachun beaibu niti itan uinbaunkin jatu yukakin:

—¿Tsuau man en tadi metsaxumen?— jatu wa

—Tsuau mia metsamaki— akaibun Pedro inun Jesúsun tsuma betsabun yuikin:

—Yusinaan, na yudan kaian bei michun supu ibidankin mia aki ikanikiki. ¿Jaskakin nuku yukakin: “¿Tsuau man en tadi metsai?” min nuku wai ikai?— akabu <sup>46</sup> Jesúsun jatu yuikin:

—Tsuanda ea metsaya chanima en kushipa kainkainkin xuxawaxu en unaiin— ikaya

<sup>47</sup> ainbu datei saki saki ikin jani junetima jawada Jesúsun axunxu unain jaki kematan ja bebun danti itan xabakabi ichapabun bedubi Jesúski chanaya <sup>48</sup> Jesúsun yuikin:

—Ainbuun, min ea ikunwanyan en mia xuxawaxuki. Ana isin teneama unanuma kai pediwe—

<sup>49</sup> aki nikken jabiatiandi xanen ibu Jairon jiwe anua jawen tsuma betsaa juxun Jairo yuikin:

—Min bakedan, ma mawaxuki. Ana juni yusinan daketapa wayamawe— aki <sup>50</sup> Jesúsun jawen tsumapan Jairo jawada yuiai ninkatan Jairo yuikin:

—Dateyamawe. Ea besti min ea ikunwanyan min bake xuxaikiki— abaini

<sup>51</sup> bui Jairon jiwe anu jikikainkin ja mapuabu jau jikiyamanunbun jatu nemakin niti atan Pedro inun Santiago inun Juan inun chipashan ibu dabe jatu jikimakin <sup>52</sup> junin kaian kaxai sain iki bau bau ikaibu jatu yuikin:

—¿Jaskai e iskaun kaxai man biski ikanai? Jawen bakedan mawa kayabiamaki. Uxa bestia ikikiki— jatu waya

<sup>53</sup> yuda ichapabun: “Ma mawaki”, iwanan, uintan Jesúsun jaska yuiai ninkatan usainbun <sup>54</sup> januxun Jesúsun chipash metsunxun unanxubima yuikin:

—Chipashaan, en mia yuiai beniwe— aka <sup>55</sup> ana bestein samama benikau-naya januxun jau pimanunbun Jesúsun jatu yunuaya <sup>56</sup> jawen ibu dabe benimai e ikaibun jaska Jesúsun axunxu jau tsua yuiyamayununbun jatu nemanikiaki.

## 9

*Jesúsun jawen tsumabun jau jatu yusintanunbun jatu nichinikiaki, na janchadan*

(Mt 10.5-15; Mr 6.7-13)

<sup>1</sup> Januxun Jesúsun jawen 12 tsumabu kenaxun jatu ichawatan yushin chakabu betsaa betsapaa kainmati kushipa inun isin teneaibu jawen xuxawati kushipa jatu inantan <sup>2</sup> nichinkin yuikin:

—Jaska Dios xanen ibuxanaikidi yusinkubaunkin isin teneaibu man xuxawatanun en matu yunuuyuaii. <sup>3</sup> Kaidan, man eskakanintanun matu yuinun ninkakanwen. Mais butankanwen, jawa buamadan. Mestenti betsaa inun, kapankan inun, misi inun, pei matun chinexeketiki usua inun, sanpu betsaa buyamaxankanwen. <sup>4</sup> Jaska inun, mae tibi anu buxun yusin jiwe bestichai anu jiweyxankanwen. Januxun yusinkin menetan mae betsaa anudi bukubainxankanwen. <sup>5</sup> Jaska inun, janixunda matu danankin ninkakatsi ikabumaken Dios jatuki sinatai unanti wakin janua kainbainkin matun tae anua mai kudu jatuki tabainxankanwen, jau jabiaskasi maninunbunan, jawa unanmadan— jatu wa

<sup>6</sup> mae tibi anu buake buakexun jaska Dios xanen ibuxanaikidi jatu yusinkin isin teneaibu xuxawakubainaibun

*¿Jesús tsuamen? ixun Herodesin unankatsis inikiaki, na janchadan*

(Mt 14.1-12; Mr 6.14-29)

<sup>7-8</sup> janu judiobun xanen ibu Herodesin Jesúsun jawada akeakeaikidi ninkaya betsabun yuikin:

—Juan tenanbiashinabu ma ana besteanmenkain— ikaibun betsabundi yuikin:

—Elías Diosun jancha yuixunika kabiani jawen yushin damimamenkain— idiaibun betsabundi yuikin:

—Nukun xenipabu Diosun jancha yuixunika betsaa mawanidan, ma ana besteinmamenkain— ikeakeaibu Herodesin ninkaxun shinain: “¿Jadatu chanima kayabimen?” iwanan, <sup>9</sup> yuikin:

—Juan jau textenunbun ean en jatu yunuimaki. Jaskaken ja Jesúskidi yuiaibudan, ¿tsuamen?— iwanan, Jesús uinun ixun manakubainikiaki.

*Jesúsun 5,000 junibu pimanikiaki, na janchadan*

(Mt 14.13-21; Mr 6.30-44; Jn 6.1-14)

<sup>10</sup> Janua jawen 12 kushipayabun Jesús anu chintunbidan jaska washinabu Jesúski chani meneabun Jesúsun jawen tsumabu janu tsua jiweabuma Bet-saida dapi anu jatu iyuaya <sup>11</sup> yudan kaianen unantan Jesús chibainbu jawa jatuki sinatama jatu ikin pewaxun Dios xanen ibuxanaikidi yusinkin isin betsaa betsapaa teneaibu xuxawabaiaya

<sup>12</sup> ma badi kaya jawen 12 tsumabu jawen kushipawen yununikabu Jesús dapi bea ichaxun yuikin:

—Ma badi kaikiki. Nenu tsua jiweabumaki. Na yudan kaianen jabun jania pitidubumaki. Jau pitan juindukundi bununbun mae udama anu jatu nichindiwe— akabu

<sup>13-15</sup> Jesúsun jatu nemakin yuikin:

—Jaska jatu wama, matun jatu pimakanwen— jatu wa

5,000 junibu mapuabuwen taea e itan Jesús yuikin:

—Meken besti misi inun baka dabe besti nun jayaki. ¿Nun daka jatu piti bixuin kai?— akabu Jesúsun jawen 12 tsumabu yuikin:

—Ja basiki 50 tibi xuku akeakea jau tsauununbun jatu yunukanwen— iwanan, Jesúsun jatu yunua jawen tsumabun jatu tsauamakin keyuken <sup>16</sup> januxun Jesúsun ja misi meken besti inun baka dabe tsumaxun naiudi teskanxun uinkin pitikidi Dios kenwantan misi inun baka tunke tunke apakekin jawen tsumabu inankin jatu yunua ja yudan kaian inanbaunkin keyuabun <sup>17</sup> dasibibun yaniwai benimai pepeaibun janua ja misi meken besti inun baka dabe 5,000ti junibun pikin texe wabu ichawakin 12 kuki mata wanibukiaki.

*Min nukun Mesíaski, akin Pedron yuinikiaki, na janchadan*

*(Mt 16.13-19; Mr 8.27-29)*

<sup>18</sup> Janua betsatian janu tsua jayamanu Jesús jawen tsumabube ka Diosbe janchai menetan Jesúsun jawen tsumabu yukakin:

—Yudabunan, ¿en tsua ekidi yuimisbumen?— jatu wa <sup>19</sup> jabun yuikin:

—Betsabun yuikinan: “Nashimanika Juan ana bestenshinaki”, mia wakanikiaki. Betsabundi yuikin: “Diosun jancha yuixunika Elías ana jushianki”, mia wadiakanikiaki. Betsabundi yuikin: “Diosun jancha yuixunika betsa ana besteinmaki”, mia wamisbukiaki— akabu

<sup>20</sup> januxun Jesúsun jabudi yukakin:

—Jamen matun shinankinan, ¿en tsua man ea wamismen?— jatu wa Pedron yuikin:

—Miadan, Diosun yubani min nukun Mesías Cristoki— akaya

*Jawen tsuma kushipayabu jawen mawaxanaikidi Jesúsun yusinikiaki, na janchadan*

*(Mt 16.20-28; Mr 8.30-9.1)*

<sup>21</sup> januxun Jesúsun jatu nemakin:

—En Mesías Cristoki tsua banabimayamayuxankanwen— iwanan, <sup>22</sup> ana jawen tsumabu jatu yusinkin yuikin:

—Diosun bake matun Juchi Kayabi Iyuadan, eki sinatakin ea ichakawakin nukun xanen ibubu inun Diosbe nukunabu janchaxunika xanen ibubu inun yusinanamisbun ea danankin ea jatu tenanmabu mawa xaba dabe inun besti kaya en ana bestenxanaii— jatu watan

<sup>23</sup> januxun yudan kaian jatu ichawaxun jatu yusinkin yuikin:

—Tsuabunda ea chibankatsis iki ibubis jawenakidi jaska shinamis jau ana jaska shinanyamakubainunbunwen. Jaska inun, “Bika tenei Jesúswen jawa dakeama ja keskai en jabe mawatiduki”, jau ikubainunbunwen.

<sup>24</sup> Jamen tsuabuda jatunmebi mekei: “En mawakatsi ikamaki”, ikin shinamisbudan, eauma mawaxankanikiki. Jakia ea ikunwankin en kakape yuikin ea chibainwen taexun tenanbu ebe jiwekuinxankanikiki. <sup>25</sup> Ja inun, mabu midimawen kemukin ichawaxun ea ikunwankin chibabuma jatunmebi jatun jiwekuian benuxankanikiki, eauma mawakinan. <sup>26</sup> Jaskaken tsuabuda eki inun en janchaki dakemisbudan, en Epan kushipayá jawen nai tsuma pepabube jua jabiaskadiai en jatuki dakediaxanaii— iwanan <sup>27</sup> —Chanima en matu yuiai ninkakanwen. Betsabu na jabia man mapuabudan, man

mawadiamaken Dios kushipajaidai xanen ibui taeai man uinxanai— jatu wanikiaki.

*Jesús damitan jatu uinmanikiaki, na janchadan*  
(Mt 17.1-8; Mr 9.2-8)

<sup>28</sup> Janua janchashina 8 día xaba kasmai jatida kaya Pedro inun Santiago inun Juan Jesúsun jatu iyui kai Diosbe janchanun ika kakin mati keyata-pajaida jatube mapeketan <sup>29</sup> janua Jesú Diosbe janchaya ma besu betsai damia jawen tadi juxupajaidai chaxa chaxa ikaya <sup>30-31</sup> Elías inun Moisés jabiaskadiai ja dabedi chaxajaida punte punte iki mapuxun jaska Jerusalén anua Jesú mawaxanai yui jabe janchaibu <sup>32</sup> Pedro inun Santiago inun Juan yuda datsupe ika uxakatsis ibia uxama Jesú inun ja dabe jabe mapuabu uiainbun <sup>33</sup> ja dabetan Jesú ma dapaxkabainaibun xabakabi shinanma Pedron Jesú yuikin:

—Yusinaan, nun nenu juadan, pejaidaki. ¿Pean xubu dabe inun besti matu waxunpa, betsaa mina inun, betsaa Moisésna inun betsadi Elíasinadan?— ikaya <sup>34-35</sup> janua nai kuin bekin jatu bepuaya dateaibun nai kuin anuxun jatu yuikin:

—Na en bake en Katunidan, ninkaidakubainkanwen— jatu waya <sup>36</sup> jakimamadi samama bedu bedu ikin Jesú besti nia uinibukiaki. Januxun jaska june uinbidanimaxun tsua yuiyama iyukubainibukiaki.

*Juni bake yushin chakabuya Jesúsun kainmanikiaki, na janchadan*  
(Mt 17.14-21; Mr 9.14-29)

<sup>37</sup> Mati anua Jesú damia uintan jabianu niti ika jatube uxashini penaya butubidanaibun Jesúski dasitanun ika yudan kaian jaki nukui buaibun <sup>38</sup> januxun juni betsaa jatu nashui ikaina nixun jui kushipawen unanxubima Jesú yuikin:

—Yusinaan, en juni bake bestichaiyaki. Ea uinxunwen. <sup>39</sup> Yushinin achixun bis bis imakin duxku imakin kemur bus bus imakin ichakawakin jeneismaki. <sup>40</sup> Jaskamisken: “Jau yushin chakabu ea kainmaxununbun ika”, min tsumabu en jatu shinanbiabidana tsuan jawa ea kainmaxuntidubumaki— ikaya

<sup>41</sup> Jesúsun mapuabu dasibi yuikin:

—Ikunwainsbuma inun chakabubuun, ¿jatiki matu medabewai ana en matube jiweyuxanai?— iwanan, ja juni yuikin: —Min bake uinun nediiwewe— aka

<sup>42</sup> iweaya yushin chakabun Jesú bechitan ja juni bake duxku imakin main tin imatan taka taka imaya Jesúsun uinkin yushin kunyan akin kainmaxuntan jawen epa yunuaya <sup>43</sup> Diosun pepa kushipawen Jesúsun jatu uinmakubainaiwen taea dasibi e iki Jabaa! ike ikeabun

*Mawaxanaikidi Jesúsun ana jatu yuinikiaki, na janchadan*  
(Mt 17.22-23; Mr 9.30-32)

janua Jabaa! iki mapuabun jawen tsumabu besti Jesúsun yuikin:

<sup>44</sup> —Eska en matu yuiai ninkatan jakimayamaxankanwen. Ea en matun Juchi Kayabi Iyuadian, tsuanda ea jatu achimaxanikiki— jatu waya

<sup>45</sup> jaska Jesúsun jatu yuixu jau ninkayamanunbun Diosun jatu nemaiwen taexun jawa ninkamajaida jawa yuiai dabanen datekin Jesú jawa ana yukama inibukiaki.

*Tsuanda jatu binuntidukidi Jesúsun jatu yusinikiaki, na janchadan*  
(Mt 18.1-5; Mr 9.33-37)

<sup>46</sup> Janua Jesúsun tsumabu yuinamei: —Jesúsbe xanen ibukin ḡnukunan, jadatubun betsabu nun matu binunxanimenkain? ḡEamenkain?— ibidankanxu  
<sup>47</sup> unantan jatu yusinun, iwanan, bakeishta betsa ixun <sup>48</sup> jatu yuikin:

—Ea duawanun, iwanan, na bakeishta keska wakin tsuada en kenaya juaidan, ikin ea akawakin man duawatiduki. Jabiaskadi wakin ea besti duawama jatun ea yununi Diosdi jabun duawaxankanikiki. Jaskaken tsuada jawa shinanma keanma dasibibu medabewakin ja kenmisbu jatu binux-ankanikiki— jatu waya

*Tsuanda nuku dananma nukun jaibuki, anikiaki, na janchadan*  
*(Mr 9.38-40)*

<sup>49</sup> januxun Juanen Jesús yuikin:

—Yusinaan, juni betsan min kena kushipa paewen yushin chakabu kainmai nun uinbidanshinaki. Nukubetan mia chibanmaken nun nemakin bextepaibia nuku ninkama ishianki. Jaska wakin nun nemashinadan, ḡpemen?  
 — aka

<sup>50</sup> Jesúsun Juan yuikin:

—Nemakin man jatu bextetidumaki. Tsuada nukuki sinatamadan, nuku medabewaikiki— jatu wanikiaki.

*Santiago inun Juan nemakin Jesúsun jatu kunyan anikiaki, na janchadan*

<sup>51</sup> Janua jawen Epa anu Jesús kaxanai kemaya dateama Jerusalén anu kai taekin <sup>52</sup> janu uxati jiwe jau unanti watanunbun jawen jancha yuix-unika bebunkidi jatu yunua bui Samarianawabun mae anu jikixun yuk-abu <sup>53</sup> Jerusalén anu Jesús kaiwen taea janu jau uxayamanunbun jatu danankanxu chanitushiaya <sup>54</sup> Santiago inun Juanen ninkaxun Jesús yuikin:

—Yusinaan, jaska Elíasin ani keska wakin ḡnai anua chi kauankin jau Diosun ja mae jatu yamawakin keyunun Dios yukapa?— ikaya

<sup>55</sup> Jesús sinaxun jatu kunyan akin nemabaini <sup>56</sup> mae betsa anu uxanun ika bunibukiaki.

*Jesús chibanun, iwanan, yukanibukiaki, na janchadan*

*(Mt 8.19-22)*

<sup>57</sup> Ana Jerusalénkidi bui bai tanabainaibun juni betsan Jesús yuikin:

—Yusinaan, janida min kai en mia chibankatsis ikai. ḡMibe kapa?— aka

<sup>58</sup> jawen juinti pepamenkain, unanun, iwanan, Jesúsun yuikin:

—Kaman inu jawen kini jayaki. Peiyabu jawen na jayabuki. Jakia matun Juchi Kayabi Iyua ean en yusinkubainmiswen taea janu uxati jiwe en jayamaki. ḡEa keskai min jiwekunkaintidumen?— akin <sup>59</sup> juni betsadi Jesúsun yuikin:

—Tapinkin ea chibankubainwen— aka

—Xanen Ibuun, ea jeneyuwe, ja dukun en epa mawa maiwatan en mia chipu chibanxanaidan— aka

<sup>60</sup> nemakin Jesúsun yuikin:

—Jaskamaki. Ikunwanma mawa keskabun min epa maiwatidubuki. Jakia mianan, na jabiatian ebe kai taekin Dios xanen ibuxanaikidi yusinkubainx-anwen— akaya

<sup>61</sup> januxun betsandi Jesús yuikin:

—Yusinaan, eandi en mia chibankatsi ḡja dukun en jiweanua enabuki chaniyutanpa?— aka

<sup>62</sup> nemakin Jesúsun yuikin:

—Tsuabunda ea chibankiakin jawen shinan dabewen unudi shinain inun unudi uiainan, jaska Dios xanen ibuxanai pe dayaxuntidubumaki— anikiaki.

## 10

*Jesúsun 72 junibu yununikiaki, na janchadan*

<sup>1</sup> Januxun mae tibi anu janu Jesús chipu kaxanai anu jau bebunkidi yusintanunbun 72 juni jaki chiti ikabu katuxun juni dabe tibi jatu yunua akeakekin <sup>2</sup> jatu yuikin:

—En tsumabun en jancha ikunwankin chibannmisbun jatu yusian akeakebaunaibun ichapabun ea ikunwanxankanikiki. Jaskaken chanima Diosun bai anu miban midima ma jushin keyui keska dakaki. Jakia jawen dayakapabu eskadabeswen taexun ana dayakapabu ichapa jau yununun bai ibu Dios ana yukakanwen, jawen yunu tsekakin ichawaxunai keska wakin yudabu jau jawen jancha jatu yusinbaununbunan. <sup>3</sup> Eanan, kaman inu pubenbu anu chaxuwan bake yunua keska wakin man en tsuma pepabu matuki sinataxanaibu anu en matu yunuai yusinditankanwen. <sup>4</sup> Man jaskabaintannunbun matu yusinun ninkakanwen. Mais butankanwen. Jaki mabu aduti kapankan buama jaki pei aduti matun chinexeketiki usua nuxatiya buama inun matun bichi tae betsa buyamakanwen. Jaska inun, bai tanabaini tsukida nukutan jabe janchai niti ikama dainbainxankanwen. <sup>5</sup> Ja inun, mae anu jikitan tsuanuda jiweyukatsi iki jatun jiwe anu jikitan jatu yuikin: “Diosun jau matu unanuma jiwemakubainunwen”, jatu axankanwen. <sup>6</sup> Man jaska wa yuda duapa janu jiweabu matun janchawen benimaxankanikiki. Jakia yuda duapa janu jiweama matun jancha danainbun matun duapa jancha ana jatu mebinbainxankanwen. <sup>7</sup> Ja inun, jani mae anuxunda matu beya waibu anu janu jiweyuxankanwen. Dayakapabu pakamisbu keska wakin matu pimakin mabex amakin jawada matu inanbu jabianuxundi piyuxankanwen, jiwe betsa tibi anua piti benabaunamadan. <sup>8</sup> Janida mae anu man jikia matu beya waibu anuxun jawada piti matu inanbu piyuxankanwen, dananmadan. <sup>9</sup> Ja inun, jabianu jiweabu isin teneaibu xuxawakin jatu yusinkin: “Dios xanen ibui nenu ma kemaikiki”, akin jatu yuikubaunxankanwen. <sup>10</sup> Jakia janida mae anu jikitan man jatu yusian danainbu jatun bai namakixun yuikin: <sup>11</sup> “Dios matuki sinatai man unanun matun jemaintin anua matun mai mishpudi buama nun jutakai jushukidi ikainaii. Jakia matu duawayui Dios xanen ibui ma kemabiaya jawen jancha man danain uindaxankanwen”, akin jatu yuixankanwen. <sup>12</sup> Jamen betsadan, janu Diosun yudabu dasibi jatu kupiaitian jaska Sodoma chiwen Diosun jatu kupikin jaska wani binumakin jabun matu dananibu Diosun jatu kupijaidaxanikiki—jatu watan

*Mae betsa betsapa anuxun Jesús ninkabumaken jatu ja anikiaki, na janchadan*

(Mt 11.20-24)

<sup>13</sup> jatidi betsabu mapuabu ana jatu yuikin:

—Corazín inun Betsaida anu man jiweabu matun chakabu jenetan man shinan betsabu wakatsi ikamadan, man nuitapajaidaxankanaii. Jakia Corazín inun Betsaida anuxun jawen unanti dami kushipa betsa betsapa en matu uinmakubainima keska Tiro inun Sidón anu jiweabundi jabiaskadi uintan jatun chakabu jenenun, iwanan, juanti nishmajaidatan saku wati tadi bexa xeni sawetan chi mapuwen mapu tukutan jatun shinan betsa watan Dios ikunwankeanibuki. <sup>14</sup> Jaskawen taexun janu kupiaitian ja nawabu Tiro inun Sidón anu jiweabu jatu kupi midinkin Corazín inun Betsaida anu man jiweabudi shinan betsa wabuma Diosun jatu kupijaidaxanikiki. <sup>15</sup> Ja inun, Cafarnaúm anu jiweabun man shinankin: “Nun pepabuwen taexun Diosun

nuku kenwanxanikiki”, ibiakin man ea ikunwanbumawen taexun janu chi nukaisma anu Diosun matu yunuxanikiki— iwanan,

<sup>16</sup> jabun chibainbu betsabu yuikin:

—Tsuabuda en jancha man jatu yusianyan matu ninkakin eadi ninkaxankanikiki. Jamen tsuabunda matun jancha danankin enadi danandiaxankanikiki. Ja inun, ea danankin jatun ea yununidi danandiaxankanikiki— jatu watan nichian bunibukiaki.

*Ja 72 junibu jaki chiti ikabu chintunbidanibukiaki, na janchadan*

<sup>17</sup> Jesúsun jatu yunuima yusinkin jatu xuxawakubauntani shinan chankanyanbi benimajaidakubidani jikibidanbidani ja 72 junibu Jesúsun anu ichai keyutan yuikin:

—Yusinaan, isin teneaibu xuxawakin min kushipawen inun min kenawen taexun yushin chakabundi nun yunua ninkatan kaindiakubainshinabuki. Jaska watani jui nun benimajaidakunkidanaai— akeakeabu <sup>18</sup> Jesúsun jatu yuikin:

—Yushin chakabubu man jatu kainmakubaunaibun Satanás kushipabiken Diosun jawen kushipa mebian nai anua kana bakai mai anu tin ikai keskai Satanás babutan kauanai en uinshinaki. <sup>19</sup> Ninkakanwen. En kushipa en matu inankin yunuimaki, jau tsuan matu meyamakubainxanunbunan. Dunuki man paia matu pia jawa man isin tenetidumaki. Ja inun, nibuki man paia matu pia jawa man isin tenetidumadiki. Ja inun, Satanásan binukin matu jawa maematidumaki. <sup>20</sup> Jaska man washina peki. Jaskabia yushin man kainmashinawen besti benimayamakanwen. Jakia nai anu Diosbe man jiwexanaibu Diosun matun kena tibi ma keneniwen taea jaska bestiwen benimakubainkanwen— jatu waya

*Jesús benimakin jawen Epa kenwanikiaki, na janchadan*

*(Mt 11.25-27; 13.16-17)*

<sup>21</sup> januxun Diosun Yushin Pepatun Jesúsun benimawakin shinan chankawan Jesúsun kenwankin yuikin:

—Epaan, nai inun mai jidabi minaski. Min duapa jancha ja unanepai kenmisbu min jatu unanmama jabu keinsbuma besti min jatu unanmakubainaiwen taexun en mia kenwaiin— atan

<sup>22</sup> mapubaunabu yuikin:

—En Epan jawen kushipa dasibi ea yununidan, tsuan en jawen bake ea unanbumaki. Jakia en Epan besti ea unan keyuikiki. Jakia tsuan en Epa unanmadiki. Ea jawen baken besti en Epa en unan keyudiaii. Jakia jabun ea chibainbu en Epa en jatu unanmamiski— iwanan,

<sup>23-24</sup> jawen tsumabukidi dabekexun jatu besti yuikin:

—Matu yuinun ninkakanwen. Ea en matun medabenan man uiainan, nukun xenipabu Diosun jancha yuixunikabu inun xanen ibubun uinpaiib- iakin ea uianma inibuki. Ja inun, na man ea uiainan, uinkatsi ibiakin ea uianma inibuki. Ja inun, jabias man ninkaidan, ninkapaibiakin ea ninkamadi inibuki. Jaskaken jabias man uiainan, tsuabunda uindiai benimakanikiki— jatu waya

*En jabube jiweadan, ¿tsuabumen? ikai miyuiwen samaritanokidi Jesúsun yusinikiaki, na janchadan*

<sup>25</sup> mapuxun ninkaibun Moisin keneni yusinanamistun Jesúsun unanti wanun ika benikauan yukakin:

—Yusinaan, jiwea kayabi bikatsi ikin Dios benimawakin ¿jaska waxanpa?— aka

<sup>26</sup> Jesúundi yukakin:

—Moisin kenenidan uinkin ¿jawa min yuimismen?— aka  
**27** yusinmistun Jesús yuikin:

—Eska nuku kenexuniki: “Matun shinan jidabiwen inun, matun ku-shipa jidabiwen inun, matun yuda jidabiwen matun Xanen Ibu Dios du-awakubainkanwen. Ja inun, min jabube jiweabu duawadiakubainkanwen, ibubis man nui mekemis keskaidan”, nuku waniki— aka

**28** Jesúsun yuikin:

—Min pe yuiaii. Jaska min yuiai keska akubaini Dios anu min jiwea kayabi ixanaii— aka

**29** ibubis penun ixun Jesús yukakin:

—En jabube jiweadan, ¿tsuabumen?— aka

**30** unanmakin miyuiwen Jesúsun yuikin:

—Jerusalén anua juni betsa kai Jericó bai tanabainai juni yumetsubun jawen mabu binun, iwanan, kusha kusha axun dasibi jawen mabu biantan jenebainabun shinanea dakaken **31** janua Diosbe nukunabu janchaxunika betsa jawa shinanma jui jabias bai tanabidankin juni kushabainabu daka bechitan jawen nui jaki kemakatsi ikama benantaxun besti uintan dunkebainken **32** janua Dios kenwanti jiwe anuxun jatu medabewai dayamis Levín baba betsa jabias baiwendi jukin bechitan jawen nuiamadi dunke-diabainken **33** ja Samarianawabube danananain man dakekenanmis betsa jabias baiwen jukin matunabu betsa kushabainabu daka bechitushitan jawen dabanan iki niti itan **34** ja juni detebainabu jawen nui jaki kematan jawen dete piti xeniwen inun vinowen dapuxxun neatan jawen burroki katsauntan janu chaikea bei uxamisbu anu iyuxun duawakinmekeshini **35** penaya kakin jawen pei aduti saku anua pei ewapa dabe bixun jiwe ibu inankin yuikin: “En ma kai na juni ea duawaxunkubainxanwen. Na pei keyukan ana kauankin jawen texe ana en mia pakayuxanaii”, abainimaki— iwanan, **36** Diosun jancha kenenibu yusinanamis Jesúsun yukakin: —Ja juni dabe inun bestidan, ¿ja juni kushabainabu jadatu jawen nuikin jabube jiwea keskakin duawaimamen? Min shinanan, ea yuiwe— aka

**37** yusinmistun Jesús yuikin:

—Ja juni jawen nuimaki— aka januxun Jesúsun yuikin:

—Miadi jabiaskadi ikunkainwen— abaini

### *Marta inun Maríán jiwe anu Jesús bai ka jikinikiaki, na janchadan*

**38** janua ana jawen tsumabube kakunkaini mae betsa anu Jesús jikiaya ainbu betsa Martan jawen jiwe anu iwana **39** januxun jawenabu yusianyan jawen betsa María Jesúsun tae dapi tsauxun ninkaya **40** Martan piti ichapa bawai ja mesti bikakin jaskawen dabanan Jesús yuikin:

—Xanen Ibuun, mia pimanun ika en mesti bawai en daya chakayamaya en betsan ea medabewamaki. Jaskaken ewen nuikin ea yunuxunwen, jau ea medabewanunan— aka

**41** Jesúsun Marta nemakin yuikin:

—Martaan, Martaan, dayakin piti nuku bawaxunkin min jiwe nuku pe-waxuni pebiai min juinti ma sinaki. **42** Ea duawaidan, jaskatimaki. Jakia María en yusian ninkakin ea duawai tsuan nematidumaki— anikiaki.

## 11

### *Jaskai Diosbe janchatikidi Jesúsun yusinikiaki, na janchadan*

(Mt 6.9-15; 7.7-11)

<sup>1</sup> Ana betsatian Jesús ka Diosbe janchai meneaya jawen tsuma betsan ea akin yukakin:

—Xanen Ibuun, jaska Juanen jaki chiti ikabu yusinma keska wakin Diosbe janchai jadakidi itimenkain nuku yusinwen— aka

<sup>2</sup> Jesúsun jatu yuikin:

—Diosbe janchakin yuikinan eska watiki:  
‘Epaan, min kena medibidan, mia duawakin  
jau mia kenwankubainunbunwen.

Nai anua xanen ibukin min yunua jaska chibanmisbu keska wakin  
nenuxundi nun mia chibankatsis ikaibu  
min shinan besti nuku chibanmakin nuku medabewakubainwen.

<sup>3</sup> Ja inun, nuku mekekin na jabiatian jaska min nuku axuain nun piyunun  
piti nuku inankubainwen.

<sup>4</sup> Ja inun, tsuabunda nuku chakabuwaibu jatu jakimawakin jatun chakabu  
nun ana jaska shinanmawen taexun  
nun mia chakabuwai buaxuntan ana jaskakidi nuku shinanmayamawe.

Ja inun, nun kaneyamanunbun  
jawada nun jawen kemumis kainyain nuku nemaxunkubainwen’,  
atiki— iwanan,

<sup>5-6</sup> miyuiwen ana jatu xabakabi yusinkin:

—Matubudan, man jaibu tibiyaki. Yamenapun min jaibun jiwe anu kaxun  
kenakin: “Xexei, xexei, ¿min uxamen?” min wa “¿Jawamen?” ikaya “Nukun  
jaibu eki bai juxu en jawa pimatimaki. Misi dabe inun besti ea inanyuwe”,  
min wa <sup>7</sup> jawen jiwe medanxun mia nemakin yuikin: “Ma en bakebube  
inakin beputi en bexeaki. Jaska butukain en mia inantimaki. Ea chikish  
wama kadiwe”, mia wabia <sup>8</sup> min jawen jaibuwen taea chikishkin mia  
inankatsi ikama ibiaya ninkamas daketapa wakin min yuka jeneamawen  
taexun butuxun jawada min bikatsis ikai mia inantiduki.

<sup>9-10</sup> Jaska wakin tsuanda Dios yukakin ea akadan, jawen jawada inanmiski.  
Tsuanda jawada benakin Dios yukadan, jaki nukumamiski. Tsuanda jawada  
bi jikinun ixun Dios kenadan, bepenxunmiski. Jawada min yuka mia  
axuntiduki. Benakin jawada min yuka mia bechimaxanikiki.

<sup>11</sup> Ja inun, betsadan, min baken baka mia ea aka jaki dakekin dunu man  
inainsmaki. <sup>12</sup> Ja inun, takada bachi mia ea aka jaki dakekin nibu man  
inainsmadiki. <sup>13</sup> Jaskaken man pepamabia matun bakebu man duawamis  
man unaiin. Jamen jaska binumakin Epa Dios nai anuatun man tsuabunda  
yukai ninkatan jawen Yushin Pepa matu inanmiski— jatu wanikiaki.

*Jesús Satanásan kushipa besti jayaki, akin yuanibukiaki, na janchadan  
(Mt 12.22-30; Mr 3.20-27)*

<sup>14</sup> Ana betsatian yushin chakabun juni betsya juyu wayama Jesúsun nichian  
kainkainaya juni ana janchai taeaya yudan kaianen uin yuinamei: “Jabaa!  
Nadan, juni kushipa pejaidaki”, ikaibun <sup>15</sup> jakia jatiditun yuikin:

—Na junidan, yushin chakabu xanen ibu Beelzebún kushipa jayaki. Jaska  
bestiwen taexun yushin chakabu jatu kainmaikiki— ikaibun

<sup>16</sup> betsabun Jesúsun anti wanun, ixun Jesúsun yuikin:

—Dios anua jawen unanti dami nuku axunwen, min jawen kushipa jaya  
nun uinunan— akabu <sup>17</sup> jatun shinanen kaneaibu unankin Jesúsun jatu  
yuikin:

—Mae betsa anu jatunmebi paxkatan detenamei jatunmebi debui keyu-  
misbuki. Ja inun, jabias yudabu paxkai jatunmebi jenenamei yamai keyu-  
diatidubuki. <sup>18</sup> Jabiaskadi wakin Satanásan jawenabu yudabu anua kainma  
jawen yuda punu nukai babui keyukeanaii. Ja inun, Beelzebún kushipa  
en jaya jawenabu en kainmama ikeanaii. <sup>19</sup> Jamen eanan, Beelzebún

kushipawen en yushin chakabu kainmaya matun tsumabunan, ¿tsuan kushipawen yushin chakabu kainmakanimenkain? Jaskaken man kanejaidai jabun matu chitekin ja axanikiki. <sup>20</sup> Jamen chanima Diosun kushipawen ean en yushin chakabu kainmamiswen taea Dios matuki bai ma juaki. <sup>21</sup> Jaskakin man kanejaidai matu yuinun ninkakanwen. Juni kushipa jawen pia inun jawen kushatiyatun jawen mae pe mekeaya tsua jikikain yumetsutidumaki. <sup>22</sup> Jakia juni betsa ja binuan juxun maemakin jawen yuda junekinmekemis inun jawen pia inun jawen kushati mebinxun jawen jamapai ibu watan jawen jaibuwaibu inanbaunmiski. Eanan, Beelzebú binukin jawen kushipa jatuwen dayai mebintan ena en watiduki. <sup>23</sup> En jaskaken tsuanda ea jaibuwama ea nemaikiki. Ja inun, tsuanda juni betsbu ea chibanmama jatu eki dakemamisbuki— iwanan,

*Yushin chakabu kainkaina chintunmiskidi Jesúsun jatu yusinikiaki, na janchadan*

(Mt 12.43-45)

<sup>24</sup> miyui betsawen jatu yuikin:

—Juni betsa anua yushin chakabu kainma kai juindukunkatsi iki janu unpax jayama anu kakunkaunkin janu juindukunti pepa bechiama shinankin: <sup>25</sup> “En janu jiwea en kaikidanshina anu en ana chintunkainaii”, ikaini kaxun ja yuda medan jiwe xaka matsua keska jawa jayama bechitan <sup>26</sup> kaxun ana 7 yushin betsa chakabujaida jatube dasikidan, ja dukuntun ja yuda ichakawakin midinwaima ana binumakin pikujaidamisbuki— ikin

*Jesúsun jancha ninkai benimati kayabi jaya jatu yuinikiaki, na janchadan*

<sup>27</sup> Jesúsun jatu yuikin menediaman yudan kaian nashui ixun jancha kushipawen ainbun yuikin:

—Min ewa mia kainxun mia chuchu amaniwen taea benimajaidaikiki—aka <sup>28</sup> Jesúsun ainbu yuikin:

—Chanima jabiaskaki. Jakia tsuabunda Diosun jancha ninkakin chibanmisbun en ewa binui ana benimajaidakanikiki— jatu waya

*Jawen dami wati kushipayukamisbu Jesúsun jatu yusinikiaki, na janchadan*

(Mt 12.38-42; Mr 8.12)

<sup>29</sup> janua ana jaki yudan kaian ichabidanbidani mapubaunaibun Jesúsun jatu yuikin:

—Nukunabu na jabiatian man jiweabudan, man chakabuki. Jamapai Dios anua unanti tsuan atiduma uinkatsi man ea yukabiamisdan, Diosun Jonás bakawan xeamashina ana kainma jiwenidan, jaska keska besti Diosun matu uinmakin matu axundiaxanikiki. Shinankanwen. <sup>30</sup> Nínive maewan anu kaxun jau jatu yusintanun Diosun Jonás yunua ninkama mae betsa anu paxai xaxuwen kai ianenwan medan jasa bakawan ewapatun xea xaba dabe inun besti ka janan Jonás ana besteanwen taexun Nínive anuabun unankin jatun shinan betsa watan Dios kenwanibukiaki. Jamen eadan, matun Juchi Kayabi Iyua mawa en jabiaskadiaya bestibu man ea ikunwanxanaii. <sup>31</sup> Jaska inun, betsadan, nawa ainbu xanen ibu surkidi chajaida Sabá maiwan anu jiwea nukun xenipabu Salomónen jancha unanepa ninkatanun ika juniki. Salomón en binujaidabiaken man ea ninkakatsi ikabumawen taexun janu matu kupiaitian ja nawa ainbu xanen ibun matu ja achakayamaxanikiki. <sup>32</sup> Ja inun, Nínive anuabu Jonásin Dioskidi jatu yusian ninkakin jatun shinan betsa watan Dios ikunwanibuki. Jamen eanan, en Jonás binujaidabiaken tsuan man ea ninkakin matun shinan man betsa wakatsi ikamawen taexun janu kupiaitian Nínive anu jiwenibundi matu ja adiaxankanikiki— iwanan,

*Binkidi miyuiwen Jesúsun jatu yusinikiaki, na janchadan  
(Mt 5.15; 6.22-23)*

<sup>33</sup> ana jatu yusinkin:

—Bin dekuxun june anu tsauinsbuma inun ji bauwen achimaisbumaki. Jakia jikikin jau uinunbun dekuxun manaundi tsauñmisbuki. <sup>34</sup> Jaska keskadi matun yuda anudan, matun bedudan, bin chaxa keskaki. Jaskakidi matu yusinun ninkakanwen. Matun beduwen man uinmiski. Matun shinanwen matun yuda pepa jaya kemuama man xabakabi meke pewaki. <sup>35</sup> Jakia man bin jayadan, man meshu medan jiwea keskatidubumaki. Uindakubaikanwen. <sup>36</sup> Jamen tsuabuda Diosun mekea bin chaxa keskawen chakabuuma man pe besti shinanxanaii, kaneamadan— jatu watan

*Fariseo inun Diosun jancha yusinanamisbu Jesúsun chitenikiaki, na janchadan*

*(Mt 23.1-36; Mr 12.38-40; Lc 20.45-47)*

<sup>37</sup> janua Jesús janchai meneaya fariseo betsan pimakatsi jawen jiwe anu iyua Jesús jikikain tapu dapi tsauxun piaya <sup>38</sup> fariseon uin metsayamas katan yuikin:

—Nukun xenipabun beya chibankin ¿pidama min mepanuamamen?— aka <sup>39</sup> Jesúsun yuikin:

—Fariseobun man shinamiskidi mia yuinun ninkawe. Matun beya chibankin matun kencha tibi bemakis besti dachukin man napan pewamisbuki. Jakia yumetsukin jamapai chakabuwatan uke medanua matun shinan man pewaisbumaki. <sup>40</sup> Man unainsmapabuki. Bemakia jawada man uintidu chukakin man pewabiamis matun jointi uke medan chakabubiaken man unainsmaki. Matun meken man uintidu inun jawada uke medan man jaya jabias Diosun damiwaniki. Shinaindakanwen. <sup>41</sup> Ja inun, ja dukun matun shinan pewatan Dios duawakatsi ikin yaushiama nuitapaibu inankuin man pepakunkainxanaii.

<sup>42</sup> Fariseobuun, man peidawa! Matunan, man kanekubainmisbuki. Matun piti nis wati ichawaxun maspu meken dabeti waxun bestichai Dios kenwanti jiwe anu dayanikabu medabewakin man jatu inankuñmiski. Jaska pewabiai jaska Diosun jancha Moisin yusini man shinanma jawada jawen pepawati inun jawen nuiti inun jawen jancha betsa watima yunubianiken matubu jawen jiwekin man jatu uinmaismaki, kanekinan.

<sup>43</sup> Fariseobuun, matudan, matun ichati jiwe anu jikikain jaki tsauti pepa janu dasibibun matu uintidubu anu man tsaukatsis imisbuki. Ja inun, bai tanai nia jau ea duawanunbun, ika kemutapa man nimiski. Man jaskaya Dios matuki sinatamis man nuitapaii.

<sup>44</sup> Matudan, man bepadamemisbuki. Matunabu yusin chakakin jatu padankin man jatu kanemakubainmisbuki, tsuada mawa nitimabiaken maiwanibu unanma jamamaki jaki paia keskakinan— akaya

<sup>45</sup> jawen janchaki sinatakin Moisin keneni yusinanamis betsan Jesús yuikin:

—Jabaa! Yusinaan, jaska yuikin nukudi min nuku chiteaii— aka

<sup>46</sup> Jesúsun yuikin:

—Moisin jancha yusinanamisbuun, matudan, fariseobu keskai matudi man peidawa! Xankamajaida matunabu iama keska wakin yusian tsuan chibantidubuma man jatu yusinbiakin jaska man jatu yusinmis ibubis chibanma janua man jatu medabewaismadiki.

<sup>47-48</sup> Matudan, man dakeisbumaki. Matun xenipabun Diosun jancha yuixunikabun yusiainbu danankin jatu tenanxun maiwanibu jaska besti

shinankin matun xenipabun ani medabewakin matundi jabias jawen shinnanti jiwe jawendua besti man wamisbuki. <sup>49</sup> Jaskawen taexun Dios unanepatun yuikin: ‘Ea jatu yuixunikabu inun en tsuma kushipayabun jau jatu yusinunbun en jatu yunupakea jatu danankin betsabu tenankin betsabu ichakawakin jatu nichinxankanikiki’, iniki. <sup>50-51</sup> Matun xenipabun jatu dananpauni keska shinankin Diosun jancha yuixunikabu man danan-diamisbuki, na jabiatianan. Jabias shinanwen Diosun matu manakudanaxanikiki. Jaskawen taexun mai damiwakin taewani anua jatun Adánen bake Abel tenani inun Dios kenwanti chi tapu inun jawen kenwanti Templo namakixun Diosun jancha yuixunika Zácarías detenibu inun dasibibun Diosun jancha yuixunika betsabu tibi matun xenipabun tenanpaunibuwen taea ja shinanwen Dios jakimamawen taexun na jabiatian jiweabube man keainbu Diosun matu kupijaidaxanikiki.

<sup>52</sup> —Diosun janchakenenibu yusinanamisbuun, man peidawa! Diosun jancha jawen jiwei unanbiai ninka pewama tsuabuda Dios xanen ibuai anu jikikatsi ikaibu man jatu nemamiski. Matudi man jikitidumabia jabu betsabu jikipananbun man jatu nemakubainaii— jatu waya

<sup>53-54</sup> yusinanamisbu inun fariseobun jawen jancha ninkai Jesúski sinatakin ibubis kanemanun iwanan, padanpaikin jawen yusiankidi jaikaimas jamapai yukanibukiaki.

## 12

*Jawada junea imisu xabakabi unanxanaibukidi Jesúsun jatu yusinikiaki, na janchadan*

<sup>1</sup> Januxun Jesús jaska waibun ana midimajaida jaki ichabu jani ni pexun ninkatidubumabia ninkaibun Jesúsun jaki chiti ikabus dukun yusin tae-wakin yuikin:

—Fariseobu yusinanain bepadamemisbu misi xaxa wati keskabuki. Jatun yusian matuki jikitan matu kanematiduki. Jatun yusian uindakanwen.

<sup>2</sup> Jawada jabun june akubainmisbudan, ana juneama xabakabi dasibibun unanxankanikiki. <sup>3</sup> Januxun jawada dasibibun yui meshu medan nua keska junea janchamisbu xaba keska anuxun ana juneama xabakabi ninkaxankanikiki. Ja inun, dintu medan jikitan beputi beputan jampai junexun yuimisbu jemaintin anua jancha kushipawen chaniai keska ninkaxankanikiki— iwanan,

*Jaki besti mesei datetikidi Jesúsun jatu yusinikiaki, na janchadan  
(Mt 10.28-31)*

<sup>4</sup> ana betsabu jaki chiti ikabu yuikin:

—En jaibuaibuun, ana matu yuinun ninkakanwen. Tsuabunda matun yuda besti tenantidubuwen dateyamakanwen, tenanxun matu ana ichakawapaketidubumakidan. <sup>5</sup> Jakia jaki besti mesei man datekubainunbun matu yuinun ninkakanwen. Tsuanda matun jiwea tenantan chi nukaismanu jawen kushipawen matu yunutidu bestiki mesei datekubainkanwen, Dioskidan. Chanima en matu yuiaidan, ja bestiki datei mesekubainkanwen.

<sup>6</sup> Jaska inun, isa mishtin meken besti bikin pei jexe pishta dabelswen bitidubuki, kadumadan. Jabiaskabiaken isa tibi tanai Dios jakimaismaki.

<sup>7</sup> Jamen matun bu dasibi midimabiaken Diosun ma tana keyumistun isa mishtin ichapa bechipaibiakin Diosun isa mishtin binumakin matu bechipaijaidamiski. Jaskaken jawaki dateyamakubainkanwen— iwanan,

*Jabun Jesús chanima ikunwain jaki dakeisbuma unanti waxanaibukidi jatu yusinikiaki, na janchadan*

(Mt 10.32-33; 12.32; 10.19-20)

<sup>8</sup> ana jatu yusinkin:

—Tsuabunda ea ikunwain dakeama ea datan akin yudabu jatu yuikin: “En Jesúsunaki”, ikubainmisbu eandi Diosun nai tsumabu bebun nixun mekekin: “Nadan, enabuki”, akin en jatu yuixunxanaii. <sup>9</sup> Jakia tsuabunda ea chibanma en janchaki dakei: “En Jesús ikunwanmaki”, eki ikubainmisbudan, eadi Diosun nai tsumabu bebunxun: “Nadan, enabumaki”, akin en jatu janchax-unamadi ixanaii.

<sup>10</sup> Jamen tsuabunda en matun Juchi Kayabi Iyua ea yuanbiaibun Diosun jatun chakabu buaxuntiduki. Jamen betsadan, tsuabunda Diosun Yushin Pepa yuainbu jatun chakabu Diosun buaismaki.

<sup>11</sup> Jaska inun, matuki sinatakin jau matu kupinun bun jatun ichati jiwe anu kasmai xanen ibu betsan anu kasmai matu iyuxun jatun xanen ibubu anu matu nichianbu: “¿Jadakidi yuixanpa?” iki dateyamaxankanwen. <sup>12</sup> Matu jaska waibu jabiatian matu janchamakin Diosun Yushin Pepatun matu unanmakin jaska matu janchamaxanikiki—jatu waya

*Jawen jiwitimabiaken mabuwen kemuaidan, meseikiaki, na janchadan*

<sup>13</sup> januxun mapuabu anuxun juni betsan jau Jesúsun ea medabewanun ixun yuikin:

—Yusinaan, en ibu mawashinken en juchin jawen mabu ea paxkaxunamaki. Jau ea paxkaxunun ea yuixunwen—aka

<sup>14</sup> nemakin Jesúsun yuikin:

—En matun xanen ibumaki. Jaska watan en matu paxkaxuntidumaki—iwanan, <sup>15</sup> yudan kaian yuikin:

—Man mabuwen kemuaidan, matu yuinun ninkakanwen. Man mabuyabia jatun matu jiwematidumawen taea jamapai mabu shadabu besti bechipai ja jayanun ika man kemukunkainaidan, uindakanwen—iwanan,

<sup>16</sup> januxun jaskakidi miyuiwen jatu yusinkin

—Juni betsaa mabu midimayatun jawen bai anu yunu betsaa betsapa waxun ichawatan <sup>17</sup> jawen shinanan shinankin: “En xekiwan midima en jani adutidumaki. ¿Jaska waxanpa?” iwanan, <sup>18</sup> “En shinanan, en xekiwan aduti betsaa betsapa apakin keyutan ana janu aduti jiwe ewapa wakin janu en xekiwan inun en mabu en aduxanaii”. <sup>19</sup> Jaska watan jamebi shinankin yuikin: “Ma janu en mabu inun en piti ichapa aduti en jayaki. Jaskaken ana dayama juindukunkin piti ichapa pikin mabex aki benimakunkaini badi ichapa en jiwexanaii”, ikaya <sup>20</sup> januxun Diosun yuikin: “Jaskamaki. Jaska min yuiaidan, min unanmajaidaki. Na jibia meshu medan min mawaya ja min mabu min pewakin keyuxudan, tsuabunda paxkaxankanikiki”, akin yuitiduki. <sup>21</sup> Ja juni keskakin tsuabunda jamebi mabu ichawakin yaushikin Dios jaibuwama Dios bebunua nuitapaikiki—iwanan,

*Diosun jawenabu mekekubainmiskiaki, na janchadan*

(Mt 6.25-34)

<sup>22</sup> januxun Jesúsun jawen tsumabu besti ana yuikin:

—Ecka bestiwen taea matunmebi man jamapaiwen dabanan imisbukidi matu yusinun ninkakanwen. Jiwe bestia pepakunkainun ika piti pi inun tadi sawenun ika jawen dabanan iyamakubainxankanwen. Jiwea jayaidan, pitiwen besti man itidubumaki. Yuda jayaidan, tadi sawe bestinun ika man itidubumadiki. Jaskaken ja dabewen taea man jiwenun Diosun matu jiwea

inanma iniki. <sup>23</sup> Jamen Diosun matu mekekubainmistun matu damiwatan matu jiwemakin chanima piti inun matun tadi matu inankubainmiski. <sup>24</sup> Ja inun, nai anu peiyabukidi matu shinanmanun ninkakanwen. Jabun jawa miban banama inun jawa bimi tsekaisbuma inun jabun piti aduti jayabumabiaken Diosun jatu pimakubainmiski. Jaskaken Diosun matu bechipaikin peiyabu matu binumakubainkiki. <sup>25</sup> Ja inun, tsuabuda ibubis nuikin jawen mabu inun jawen piti shinainwen taexun jawen jiwea ana chaipawatidumajaidaki. <sup>26</sup> Min jaska bestitidumawen taea jawada betsapina inun ika jawen dabanan iyamakubainkanwen.

<sup>27</sup> Jaskatan sua tuemis shinankanwen. Jawa dayakin tuduaismabia jawenduai tuemiski. Jakia nukun xenipabu xanen ibu Salomón mabujaidayatun jawen tadi jawendua sawexun jawenduakin sua tuemis binuama iniki. <sup>28</sup> Jakia ni maxu juaya sepashinxun kuamisbuki. Diosun sua jawenduawamistun ja sua binumakin Dios matuwen nuikin matu tadi sawematiduki, man ikun bexmas wabiayadan. <sup>29-30</sup> Jaskaken yuda dasibibu mai jidabi anuabu piti inun tadiwen kemukin benakubaunmisbuki. Jakia matudan, man betsaki. Matun Epan matu unainwen taea ja piti inun tadi man bikatsis imisdan, ana jas shinain jawen dabanan iyamakubainxankanwen. <sup>31</sup> Jakia jawada Diosun bechipaiai chibankin ja dukun Dios xanen ibuwakin shinankubainxankanwen. Man jaska wai ja kachu jawen jiwei piti inun tadi man jayakunkainxanaii, Diosun matu medabewadan— iwanan,

*Dios jiwxuni pepatikidi Jesúsun jatu yusinkikiaki, na janchadan  
(Mt 6.19-21)*

<sup>32</sup> Jesúsun jawen tsumabu yusinkubainkin yuikin:

—En matu mekeawen taea man en chaxuwan keskabuki. Ja inun, man ikunwainbu ichapamabiaken matun Epa Diosun jawenabu matu watan jabe matu jiwxunxanikiki. Jaskawen taea jawawen dateyamakanwen.

<sup>33</sup> Matun mabu jawada ma jayawen nuiama matun mabu betsawen pei bitan jawen nuitapaibu medabewakubainxankanwen. Jamen ja pei matun kapankanki man adua yumetsubun bibaintidubuki. Ja inun, jawen masanen pesa pesa atiduki. Jakia matun pei yaushiama man inanananmisbu pewen matu kupikin nai anua jawa chapui keyuisma Diosun matu inanxanikiki. <sup>34</sup> Jamen tsuabuda jawen jiwei mabuwen kasmai Dioskidi shinain man Dios jiwxunaidan, jabiadidi matun shinanen man nuiai jayaki, nai anu kasmai mai anudan— iwanan,

*Uxa keskama ninkai keskakin Jesúsun juxanai manakubaintikiaki, na janchadan*

<sup>35</sup> Jesúsun jatu yusinkubainkin ana yuikin:

—Tadi pekadiama inun bin nukawadiama keskaxun man ea manakubainxanun bebunkidi matu yuinun ninkakanwen. <sup>36</sup> Jawen jaibu ainyain anu jiwe ibu nawai ka jawen tsumapan manaya juxun jikinun ixun kenaya jawen beputi xui jawaida bepenxunxanun ika uxama manai keskakubainkanwen. <sup>37-38</sup> Janunkain ¿jatian juimenkainan? yamenapun kasmai takada keui taeaya kasmai jiwe ibu jukin jawen tsuma uxabuma bechitushiaya jawen tsumabu benimajaidaxankanikiki. Januxun chanima jiwe ibun jawen tsumabu duawakin jau jabetan pinunbun jatu baxti imatan jatu pimaxanikiki. <sup>39</sup> Ja inun, chanima jatiada yumetsu juai bebunkidi unankin jiwe ibun bextekatsi manatiduki, jau jikiyamanunan. <sup>40</sup> Jaska keskadiai jatianda en matun Juchi Kayabi Iyua en ana juxanai tsuan unanmaken matunan, matun jiwea pewakin keyutan ea manakubainxankanwen— ikaya

*Tsuma chikish inun tsuma chikishmakidi Jesúsun jatu yusinikiaki, na janchadan*

(Mt 24.45-51)

<sup>41</sup> januxun Pedron Jesús yukakin yuikin:

—Yusinaan, na miyuiwen min nuku yusiainan, ¿nukuna bestimen? ¿dasi-bitunadaka?— aka

<sup>42</sup> Jesúsun yuikin:

—Eска keskaki. Xanen ibu betsа chai kakin jawen tsuma unanepa yunubainmiskidi matu yuinun ninkakanwen. Jawen tsuma betsabu pimakin jau jawen jiwe mekexunkubainun jatun xanen ibun jawen tsuma unanepa yunubainmiski. <sup>43</sup> Janua xanen ibu ana chintunkidan jaska yunubainima axunkubainaya ja xanen ibu jaki nukutushitan benimajaidaxanikiki. <sup>44</sup> Chanima ja xanen ibun jawen tsuma dasibi jawen jamapaimekemaxanikiki, jawen jiwe inun, jawen bai betsа betsapa inun, jawen inabu inun, jawen tsumabu betsadan. <sup>45</sup> Jakia jawen tsuma shinan pema yunubainima shinan chakakin yuikin: “En xanen ibu yane juamaki. Jatiada juxanikiki”, iki dayanika betsabu juni inun ainbu ichakawai nawachakayamai paenkin <sup>46</sup> jatian juai manama ja xanen ibu jikitushitan jawen yunua axuanmawen taexun manaka chakabube kupijaidaxanikiki. <sup>47</sup> Jaskaken tsuabunda jawen xanen ibun daya unan keyubiakin jaska bechipaiai akama inun chibamawen taexun jatu kupijaidaxanikiki. <sup>48</sup> Jakia betsadan, xanen ibun yunuama kaken jawen shinan jaska bechipaiai unanma kanemisbu ja mawaida jatu kupiama ixanikiki. Januxun tsuada Diosun jancha ichapa inanshina jawen taexun jawen daya ichapadi yukaxanikiki. Tsuada Dio-sun ichapa mekemamis jani jaska wamis ichapadi yukadiakubainxanikiki—iwanan,

*Jesúsun jatu paxka akeakenun ika junikiaki, na janchadan*

(Mt 10.34-36)

<sup>49</sup> Jesúsun ana jawen tsumabu yusinkin yuikin:

—Ea ikunwainbu inun ea ikunwanbuma jawen unanti wakin jatu paxkakin unanti wanun ika en juniki. Jaskaken ewen taea jau paxkanunbun en manayuaii. <sup>50</sup> Jaskaken Diosun ea unanti wakin jatu ea tenanmakin ea nuitapawaxanaibu manai en yumanyuaii. <sup>51</sup> Man shinanan, mai anuxun unanuma matu jiwematanun ika en juni dabanen ¿man shinainmenkain? Jaskamaki. Yudabu paxkanun ika en juniki. <sup>52</sup> Jaskaken na jabiatian taewakin jiwe betsа anuxun jau ea chibamunbun jawenabu meken besti paxkakin dabe kasmai dabe inun bestibun ea ikunwainbu dabe kasmai dabe inun bestibun ea ikunwanbuma en jatu paxka akeakekubainaii. <sup>53</sup> En jatu jaska waya ewen taea juni bake jawen epabe sinatanamexankanikiki. Ja inun, ainbu bake jawen ewabe sinatanamexankanikiki. Ja inun, jawen babawan jawen yayabe jabiaskadiaxankanikiki. Jatu jaska wakin en jatu paxka akeakekubainxanaii— jatu watan,

*Janu kupiti juaitian unanbumakidi Jesúsun jatu yusinikiaki, na janchadan*

(Mt 16.1-4; Mr 8.11-13)

<sup>54</sup> januxun mapuabu Jesúsun jatu dasibi yuikin:

—Badi kaikidi meshu meshuai uinkin: “Ui bekatsis ikikiki”, ikin uinkin man yuimiski, kaneamadan. <sup>55</sup> Ja inun, surkidia niwe bei xunku ikai uinkin: “Ikis badi kujaidayuikiki”, ikin man yuidiamiski, kaneamadan.

<sup>56</sup> Bepadamemisbuun, jaska ui inun niwe bermis unanbiamisxun janu chakabu betsа betsapa kaiankeakeai uinbiakin ¿jaskai man jiwea matu kupixanai man unanmamen?— iwanan

*Dibiawen jau jawen nuinun daewatikidi Jesúsun jatu yusinikiaki, na janchadan  
(Mt 5.25-26)*

<sup>57</sup> —Jaskai matunmebi unanbiakin ¿jawada pepa man pewaismamen?  
<sup>58</sup> Jaska inun, yuda betsa man dibijaidawen taexun ja man dibiatur nawa xanen ibu anu matu iyuaya jau xanen ibun jawen policiabu matu bichimayamanun ja man dibia jawawenda daewakanwen. <sup>59</sup> Man daewabainama matu bichiabu man paka keyuama chanima man jaskatan kaintidumaki. Jabiaskadi wakin ea jaibuwatan Epa Dios daewadiakubainkanwen, matun chakabuwen jau matu kupiyamaxanunan— jatu waya

## 13

*Jawen shinan betsa watikidi yusinikiaki, na janchadan*

<sup>1</sup> januxun jabatiandi juni betsan Jesús yuikin:

—Uatian min mai pakea jatiuma Galilea anuabu Templo jemaintin anuxun kenwankin jatun chaxawan tesenxun kuakin menupananbun xanen ibu Pilaton jawen soldadobu yunua machatuwen jatu detekin jatun jimi chaxawan jimi yabi jusishinabukiaki. ¿Jaskakin Pilaton jatu jaska washinamen?— akabu <sup>2</sup> Jesúsun jatun shinan pewakin jatu yuikin:

—Man shinanan, ja junibu tenanshinabudan, jatunabu Galilea anu jiwe-abu jabun chakabujaida wakin jawenabu binuanwen taexun jatu kupishina dabanan man shinainmen ikaitsa. <sup>3</sup> Jaskamaki. Jamen matundi matun shinan man betsa wama man jabiaskadiai mawaxanaii, Diosun matu ku-piaitanan. <sup>4</sup> Ja inun, ¿ana betsa matu yukapa? Jerusalén anu mishki jiwe keyatapa jawen kena Siloé januxun uinbaanti jiwe pudekekidan 18 junibu ja naman mapuabu tenanidan, chakabuwakin juni betsabu Jerusalén anu jiweabu jatun chakabuwen jatu binuawen taexun kupini ¿man jaska shinan-diamismenkain? <sup>5</sup> Jaskamadiki. Jamen matundi matun shinan man betsa wama man jabiaskadiaxanaii, niti ikama nuitapakunkainidan— iwanan,

*Miban bimiumakidi Jesúsun jatu yusinikiaki, na janchadan*

<sup>6</sup> januxun jabias yusian Jesúsun miyuiwen ana jatu yusinkin

—Juni betsan jawen bai nemaki higuera ji banayamakidi matu yuinun ninkakanwen. ¿Bimi jayamenkain? ixun uin ka jawa jayama uintantanmis <sup>7</sup> jawen dayanikaki nukuxun yunukin: “Uian. Dabe inun besti badi ka na higuera ji anu bimi en jamen benabidanbidanmiski. Bimiumasken ea dedaxunwen, jamen uinbain niakidan”, aka <sup>8</sup> jawen tsumapan nemakin yuikin: “Ana badi bestichai manayuwe. Mai pukinkin mishpu bitan ina awa pui jusitan en mia tamanchinxunyuxanaii. <sup>9</sup> En jaska wa bimiyaxani-menkain. Bimiyamasken en mia dedaxunxanaidan”— akin yuiniaki.

*Juindukuntitian ainbu kakuni Jesúsun kayawa kawenikinikiaki, na janchadan*

<sup>10</sup> Mae betsa anuxun juindukuntitian jatun ichati jiwe anuxun Jesúsun jatu yusianyan <sup>11</sup> jabianudi ainbu betsa yushin chakabun ichakawakin kaku wani 18 badi kabia kawenikitidumajaida jatube tsaua <sup>12-13</sup> Jesúsun uinkin kenaxun ainbu yuikin:

—Ainbuun, min ma xuxaki, min isin tenenidan— akin kamepiaya jawaida kawenikitan januxun Dios kenwankin taewaya

<sup>14</sup> janua juindukuntitian Jesúsun jaska wai uinkin shinain jatun ichati jiwe xanen ibu sinaxun jawenabu ichabu yuikin:

—Semana tibi 6 xaba nun dayamiski. Jau matu xuxawanun dayatian besti bekanwen, juindukuntitian xuxai juamadan— ikaya

<sup>15</sup> januxun Jesúsun jatu chitekin yuikin:

—Min jaska shinain keska minabubetan shinain man bepadamemisbuki. Juindukuntitianbiaken matubun matun ina awa inun matun burro jawen nuikin tepebain man jatu unpax amamiski. <sup>16</sup> Jabiaskadi wakin na ainbu matu keska Abrahamnen babadi 18 badi ka Satanásan kanexkin isin tene-mani jawen nuikin juindukuntitian en kaya wakin burro tepea keska waxu-dan, ¿chakabumen?— akaya <sup>17</sup> jabu jaki sinataibu jatu chitea dake chakayamai jawa yuiama maniabun yuda ichapabun Jesúsun betsа betsapa pepa dasibi waiwen taea benimai keyuaibun

*Dios xanen ibuidan, jexe pexemishtin yumei ewapamis keskakidi jatu yusinikiaki, na janchadan*

(Mt 13.31-32; Mr 4.30-32)

<sup>18</sup> Jesúsun jatu ana yusinkin yuikin:

—Dios xanen ibui jaskamiskidi <sup>19</sup> miyuiwen matu yusinun ninkakanwen. Junin jawen bai anu mostaza jexe pxeishtabia banaima yumei ewai ewa-pashina jawen mebiki peiyabun jaki juindukuin utamisbuki. Dios xanen ibuidan, jaska keskaki. Ja dukun juni betsan Diosun jancha ikunwankin jawenabu yusian akeakeaya jawen yusian ninkakin bechipaikin chibanmis-buki, ichapabunan— iwanan,

*Dios xanen ibuidan, misijawen xaxa wati keskakidi Jesúsun jatu yusinikiaki, na janchadan*

(Mt 13.33)

<sup>20</sup> miyui betsawen ana jatu yuikin:

—Dios xanen ibui jaska keskamiskidi ana matu yusinun ninkakanwen. <sup>21</sup> Misi wakatsi ainbun xekiwan dudu midimabiaken kencha ewapaki pu-chinin kesunxun jawen xaxa wati eskadabes unpaxwen nemuskin kapan dasibi buspukidankin xaxa wamiski. Dios xanen ibuidan, jaska keskaki. Ja dukun juni betsan Diosun jancha ikunwain pepakunkainkin jawenabu yusian akeakeaya unanxubida midimabun ikunwantidubuki— jatu wabaini

*Janu jikiti xui jashuwen jikitikiaki, na janchadan*

(Mt 7.13-14, 21-23)

<sup>22</sup> Jerusalén baiwen kakin mae tibi anuxun Jesúsun jatu yusinkubainaya

<sup>23</sup> juni betsan Jesúsun yukakin:

—Xanen ibuun, janu min xanen ibuayadan, ¿eskadabes besti min jatu mekexanai?— aka

<sup>24</sup> —Jaa. Chanimaki. Ea chibankatsis iki menan shinan mestenwantan janu jikiti xui jashu anu jikikanwen, chipu ichapa jikikatsis ibiai jikitubuma ixankanikiki. Jaska en matu yuiaii. <sup>25</sup> Eskaki, matu yuinun ninkaidakan-wen. Ijis en jancha ikunwankin man ea chibantiduki. Jakia en Epan mae jikiti xui ma en bepuken tsuabuda jikinun, iwanan, kene pechiudi nixun kenakin yuikin: “Xanen ibuun, nuku bepenxunwen”, man wa matu nemakin yuikin: “¿Man jania ikimenkain? En matu unanmabin!”, matu wa <sup>26</sup> tsuanda yuikin: “Mibetan nun piniki. Nukun mae anuxun min yusiniki”, man wa <sup>27</sup> januxun matu yuikin: “Man enabumaki. ¿Man jania ikimenkain? En ma matu yuixuki. Chakabuwakin matun shinan man betsа waismaki. Nenua budikanwen”, en matu waxanaii. <sup>28</sup> Januxun matun xenipabu Abraham inun jawen bake Isaac inun jawen baba Jacob inun Diosun jancha yuixunika dasibi Diosun mae anu dasiabu uin chai matu udenibuwen taea jatu uin jaska man mapeketidubumawen taea xeta yenx yenx iki man kaxakunkainxanaii. <sup>29</sup> Ja inun, Dios xanen ibukin mai jidabi anua nortekidia inun, surkidia inun, estekidia inun, oestekidia ikunwainbu

dasibi dasia tsauxun pixankanikiki. <sup>30</sup> Jaskawen taea na jabiatiān tsuabuda jabu xanen ibuisbumadan, jabu dukun xanen ibu ixankanikiki. Ja inun, na jabiatiān tsuabuda xanen ibumisbudan, mawaida ana xanen ibuama ixankanikiki—jatu waya

*Jesús Jerusalén anuabuwen taea punu nukanikiaki, na janchadan  
(Mt 23.37-39)*

<sup>31</sup> jabiatiāndi fariseobun Jesús datekin mese wanun ika bexun yuikin:  
—Xanen ibu Herodesin mia detekatsis ikikiaki. Nenua janida paxadiwe—akabu

<sup>32</sup> Jesúsun jatu yuikin:

—Uian. Ikis inun meshukidi yushin betsapa kainmakin isin te-neaibu xuxawakin en yusinkubainaii. Jaska watan ua betsatian en daya en keyuxanaidan, en jaskayukunkainaii. Kaxun ja kaman inu keska padanan yuiditankanwen—iwanan, <sup>33</sup> ana jatu yuikin: —Diosun jancha yuixunikabu Jerusalén anua debumisbuwen taea eadi jabiadidi en kaii. Ikis inun, meshukidi inun, meshukidi betsatian en daya en menei kaiwen taea matun shinanwen janu en niti itidumaki—ikin,

<sup>34</sup> —Jerusalén anu jiweabuun, Jerusalén anu jiweabuun, Diosun jancha yuixunikabu inun jawen jancha jatu bana bexunpakeaibu Diosun jatu yunubiaya danankin jatu tenankin matun xenipabun ani keska wakin mishkiwen man jatu tsaka tsaka amisbuki. Takadan jawen bake nuxamis keska wakin eandi matu medabewakin matu mekenun ika en jubianiken jaska shinanma ea danankin man ea jawa ninkamaki. <sup>35</sup> Uinkanwen. Matun mae matun mesti man mekenun Diosun matu jenexanikiki, ana Jerusalén mekeamadan. Jakia janu en ana juaitian: “Yavé Diosun kushipaya juaidan”, ikin man yuidiamadan, man ana ea uinyuama ixankanaii—jatu wabaini

## 14

*Jesúsun juni betsawen yuda jene ichai xaxani xuxawanikiaki, na janchadan*

<sup>1</sup> Ana juindukunti betsatian fariseo xanen ibun jiwe anuxun Jesúsun jabetan piaya fariseo betsabun uiainbun <sup>2</sup> Jesúsun besuudi juni betsawen yuda jene ichai xaxaima tenei tsauawen taexun <sup>3</sup> Moisin keneni yusinanamisbu inun fariseobu unanti wakin Jesúsun jatu yukakin:

—Jaska Diosun Moisés yusini chibankinan, ¿juindukuntitian xuxawati yununimen? ¿Yunuama inidaka? Ea yuikanwen—<sup>4</sup> jatu wabia pes jawa yuiaama maniabun juni jawen yuda jene ichai xaxaima tsaua metsunxun xuxawatan nichian kaya <sup>5</sup> fariseobu Jesúsun ana jatu yuikin:

—¿Matubunan, juindukuntitianbiaken min bake kasmai min ina awa unpax biti kini medan kauana uinsama jawaida kain min nexeismamen?—jatu wa <sup>6</sup> jatu xabakabi chiteawen taea jawa yuiamabumaken

*Ainyanwankin jatu ixun pimatikidi Jesúsun jatu yusinikiaki, na janchadan*

<sup>7</sup> janua fariseobun jiwe anuxun jatu pimakatsi jatu ia betsabu binunun ika xanen ibu dapi baxti ikatsis ikaibu uinkin Jesúsun jatu yusinkin:

<sup>8</sup> —Ja ainyankin nawa wai anu min sua pinun ika xanen ibu dapi baxti iyamakanwen. Jamen mia dukun xanen ibu dapi min baxti iken xanen ibu betsawen yuda jukan <sup>9</sup> jiwe ibuan mia yunukin: “Janu ikama uani iwe. Jau betsawen yuda jukan inun ukedi xekexunwen”, akin mia mebinkiki. Mia jaska wa dakejaidai benikain jawen jenei baxti ixun min pixanaii. <sup>10</sup> Jakia mia kayabis iwanxun jawen jenei man baxti ika dakaken jiwe ibun mia uinkin yuikin: “Baa, ja xanen ibu dapi ikiyuwe”, iwanan, mia yunuikiki. Mia jaska watan

mibetan piaibu mikidi jatu pe shinanmaxanikiki. <sup>11</sup> Jabiaskadi wakin tsuada ibubis kenmis Diosun dake waxanikiki. Jakia tsuada ibubis keinsma Diosun kenwanxanikiki. Ninkaidakanwen— iwanan,

<sup>12</sup> jiwe ibun pimabiaxu jadi Jesúsun yuikin:

—Min duapawen kupikin jau mia chipu pimadiaxanun bun pimakin min jaibuaibu inun, min betsabu inun, minabu betsa inun, mabuya mia dapi jiweabu besti jatu iyamakubainxanwen. <sup>13</sup> Jakia nuitapaibu jatu ixun pimakin jawaumabu inun yuda babunibu inun, pakebu inun, bekunbu medabewakin min jatu duawaya <sup>14</sup> jaska waxun mia ixun jabundi mia pimatidubumawen taexun pepabu mawa ana besteaintian min pepawen Epa Diosun mia manakua min benimaxanai— akaya

*Piti ichapa ichawashinxun yuda ichapa jatu pimatikidi miyuiwen yusinikiaki, na janchadan*

(Mt 22.1-10)

<sup>15</sup> jaska wai dakaxun ninkabaikin betsan Jesúsbetan pikin Jesús yuikin:

—Dios xanen ibuaitianan, chanima tsuabunda jabetan pidan, jabe benima-jaidaxankanikiki— aka

<sup>16</sup> januxun Jesúsun miyuiwen yuikin:

—Juni betsan nawakin piti wakatsis ikin ichapabu yubashina <sup>17</sup> ma janu pia kemaitian jawen tsuma yuikin: “Jatu yuibauntanwen, jau ikis bed-inunbunan”, iwanan, yunua yuikubaunaya <sup>18</sup> dasibibu bepadamekin ja dukuntun yuikin: “Bai wakatsi juni betsan bai en bianxuki. En ja uinyukai en jabetan piyuamaki, ea yuixunyutanwen”, ikaya <sup>19</sup> ja kachu betsandi yuikin: “Jawen dayati ina awa meken dabeti en dama bixuki. Jatu unanun, ixun iyunun ika en jabetan piyuamaki, ixuki, akin ea yuixuntanwen”, ikaya <sup>20</sup> januxun betsandi yuikin: “En dama ainyanxuki. Jaskawen taea en yudan-wanyuai ea yuixunyutanwen”, aka <sup>21</sup> ninkatani chintunkidan jawen xanen ibu jaskakanxu dasibi yuia sinatakin ana jawen tsuma yunukin: “Nukun mae anu jiweabu bai jatiubuma inun bai ewapabuwen benabaunkin nutitapaibu inun, yuda babunibu inun, nia chakabubu inun, bekunbu jatu itanwen, jau ebetan pi benunbunan”, aka <sup>22</sup> kaxun jatu itankin jawen xanen ibu yuikin: “Min ea yunua en abiaxu min nawati dintu medan ichai texke idiabumaki. ¿Jaska wapa?” aka <sup>23</sup> “En jiwe anu jau ichai texke iki benunbun nukun mae dapi jiweabu daya jayabiabun jatu bikawakin jatu ea ixuntanwen, jau piyui benunbunan. <sup>24</sup> Chanima jabu dukun en yubashinabun en piti piabumaki”, akin jawen tsuma yuiniki. Dios xanen ibunun badiaitianan, Diosun jabiaskadi waxanikiki— akin Jesúsun jatu yusinikiaki.

*Jesús chibanan bikakiaki, na janchadan*

(Mt 10.37-38; 5.13; Mr 9.50)

<sup>25</sup> Januxun yuda ichapabun jawen jancha tapinkin chibainbu dabekekauan Jesúsun jatu yusinkin yuikin:

<sup>26</sup> —Tsuada eki chiti ikatsis ikinan, jau ea dukun bechipaikin chibankubainxan unbun wen. Jamen ja dukun jawen ibubu inun, jawen ain inun, jawen bakebu inun, jawen betsabu inun, jawen puibu bechipaikin jeneama inun, jawen jiwea bechipaikin jeneamadi ea bechipaikin binumamadan, en tsuma itidumaki. <sup>27</sup> Ja inun, tsuabunda ea chibunun ibiai ewen bika tenekatsi ikamadan, en tsuma itidumaki. <sup>28</sup> Jamen betsan ea chibankatsi ikinan, man eska shinantiduki. Matun bai nemaki janu mapekea nixun uinbaanti keyatapa wakatsis ikin, ¿en pei damenkain? iwanan, jawen kadu tanakin man shinamiski. <sup>29</sup> Jakia man jaska wama janu mapekea nixun uinbaanti min taewaima min keyutidumawen taexun

juni betsan mia usankin <sup>30</sup> yuikin: “Jaska jawen kadu shinandiamabia ja unainsmapatun ja dukun janu mapekea nixun uinbaunti taewaima jaska waxun menetidumaki”, mia watidubuki. <sup>31-32</sup> Jamen betsadan, jaki sinatakin nawa xanen ibu betsan 20,000 soldadobu iweai nemakatsi jawen soldadobu yunudiamma shinankin yuikin: “¿En 10,000 soldadobun jawen 20,000 soldadobu maematidumen?” ixun atidubuma unantan ja dapi bediabuma jaska wakin daewatidu jau yukatanunbun jawen tsumabu yunumiski. <sup>33</sup> Jaska keskadi wakin tsuabunda matun jamapai tibi ana shinanma jawada dasibi man jaya ana jawen nuiama bestibu man eki chiti ikubaintidubuki.

<sup>34-35</sup> Jamen betsadan, tewekidi matu yuinun ninkakanwen. Tewe jawen nue wa peki. Jakia jawen bata keyu ka paismaken ana jaska waxun jawen min miban min pewatidubumawen taexun putamisbuki. Bestibu man jaskatiduki. Uindaxankanwen. Man pabinkiyabunan, ninkaidakanwen—jatu waya

## 15

*Chaxuwan bestichai benua jawen ibuan bechitidukidi miyuiwen yusinikiaki, na janchadan*

(Mt 18.10-14)

<sup>1</sup> gobieno pei bixunika ichapabu inun yuda betsabu kaka chakamisbu ichapabundi Jesúsun jancha ninkanun ika jaki xukuabu <sup>2</sup> uinkin Moisin keneni chibanjaidamis fariseobu inun Diosun janchakenenibu yusinanamisbun Jesúsun yuain yuinamekin yuikin:

—Ja juninan, yuda chakabun Moisin keneni chibainsbuma beya wakin jatubeten pikiki—ikaibu

<sup>3</sup> jaska yuainbu jatun shinan unantan miyuiwen Jesúsun jatu yusinkin:

<sup>4</sup> —Tsuada man 100 chaxuwan jayatun bestichai benua ja 99 bai anu mapukan bestichai benua man benamiski. ¿Chanimamen? <sup>5</sup> Atimas ja benua bechitushitan benimakin iabidani <sup>6</sup> min jiwe anu jikitin min jaibuaibu inun mia dapi jiweabu kenakin ichawaxun jatu yuikin: “En chaxuwan benuadan, ma en bechitanaii. Jaskawen taea ebe benimajaidakanwen”, akin man jatu yuimiski. <sup>7</sup> Chania jabiaskadi imisbu en matu yuiaii. 99 yuda ichapabun ea ikunwain pepakubainmisbuwen taea nai anu jabu Diosbe jiweabu benimabiamisbun jakia bestichai benua keska chakabui jiwekunkainmistun jawen chakabu jeneten jawen shinan betsa waken jawen benimai chakayamai shinan chankajaidamisbuki—iwanan,

*Pei jexe bestichai benua jawen ibuan bechitikidi miyuiwen Jesúsun jatu yusinikiaki, na janchadan*

<sup>8</sup> Jesúsun ana jatu yusinkin

—Ainbu 10 pei jexe kadujaida jaya bestichai pakea benanun, iwanan, bin dekuxun jawen jiwe medan unanxubida matsukin bechidiamma matsu jeneismaki. <sup>9</sup> Janua atimas bechitan jawen jaibuaibu inun ja dapi jiweabu jatu kenakin ichawaxun yuikin: “En pei jexe en benushina en bechixuwen taea ebe benimajaidakanwen”, akin man jatu yuimiski. <sup>10</sup> Chania jabiaskadi en matu yuiaii. Yuda bestichaitun jawen chakabu atimas jeneten jawen shinan betsa watan ikunwanyan Diosun nai tsumabu benimamisbuki—iwanan,

*Jawen bake maxku benua keska jawen epa anu chintunkidanikidi miyuiwen Jesúsun jatu yusinikiaki, na janchadan*

<sup>11</sup> Jesúsun ana jatu yusinkubainkin yuikin:

—Juni betsa juni bake dabeyakidi en matu yuiai ninkakanwen. <sup>12</sup> Jawen bake maxkun yuikin: “Epaan, min mawadiamabia jatiada min mawaken jawada enaxanaidan, paxkaxun menan ea inandiwe”, aka shinantan yuikin: “Peki. En mia axuntiduki”, iwanan, jawen jamapai dasibi jawen bake dabe paxkaxun jawen bake maxku jawena inanshina <sup>13</sup> uxa eskadabes ka chipu jawen bake maxkun pei binun, iwanan, jawen mabu jatu inankin keyubaini ja pei bishianyan chai kai mai pakea betsa anu kaxun jawen pei mekeama jawada betsa betsapawen kemukaunkin jawaida puta keyutan <sup>14</sup> jawen pei yamaken ja mai pakeanuabu buni taeaibun jawen bake maxku bunidiakin <sup>15</sup> januxun daya benabaunkin nawa xanen ibu tsuma wanun, iwanan, daya yuka jawen bai anu ina yawa mapua jau mekenun yunua <sup>16</sup> ja ina yawa pimakin jawen piti yani wapanan tsuan jawa inanma <sup>17</sup> januxun xabakabi shinan pewakin yuikin: “En epan jiwe anuxun jawen dayadubun piti piabu texe jayabiaken nenua buni en mawatiduki. <sup>18</sup> Jaskaken nenua chintunkain jikixun yuikin: ‘Epaan, Diosun yunua ninkama ichai miadi ichakawai en chakabukaintanaii. <sup>19</sup> Kanekin en mia xunubainima jaskawen taexun ana min bakewakin ea kenama min dayadu betsa ea wawe’, akin en yuixanaii”, iwanan, <sup>20</sup> nawa jenebaini jawenabu anu chintunkaini jawen epan jiweki kemadiamabiaken chaike jawen epan bechibaini jawen nui kushikaini jaki nukutan benimajaidakin ikuxun tantsu tantsu akaya <sup>21</sup> jawen bake maxkun yuikin: “Epaan, Diosun yunua ninkama ichai miadi ichakawabaini en chakabu kaintanaii. Kanekin en mia xunubainima jaskawen taexun ana min bakewakin ea kenayamawe”, abia <sup>22</sup> ninkama jawen epan jawen dayadubu yunukin yuikin: “Tadi pepa jawaida bitanxun sawemakanwen. Ja inun, meichikiti sawematan bichi tae sawemadiakanwen”, iwanan, <sup>23-24</sup> “Na en bake mawaima keska ma ana bestean keskaki. Benuima nun ma jaki nukuawen taexun ina awa bake xuajaida bitanxun textexun ja naiti piti ichapadi bawakanwen, pi nun jabe benimanunbunan”, jatu wa jawen jancha ninkai jabe benimajaidai nawai taeaibun

<sup>25</sup> jaskaibun jawen bake iyua bai anu dayatani jui jawen jiwe dapi kemakin nawaibu ninkakubidankin <sup>26</sup> jawen dayadu betsa kenaxun “¿Jaskai e iskaun beyusi nawai ikanimenkain?” ikaya <sup>27</sup> jawen dayadun yuikin: “Min betsa maxku chintunkidani jawa isin teneama jikixuwen taea benimakin ina awa bake xua jau bawaxununbun min epan jatu yunua detetan bawaxun pi min epabe ma benimai beyusi nawakanikiki”, aka <sup>28</sup> janua sinatai jiwetan jikikatsi ikamaken jawen epan daewanun ika taxnixun jancha wa <sup>29</sup> jakia jawen epa nemakin yuikin: “Eskai en sinatai mia yuinun ninkawe. Badi ichapa mia dayaxunkin min jancha en ninkakubainmiski, jawa kaneamadan. En jaskabiaken en jaibuaibube jaya beyusi en nawai benimanun chaxuwan bake babupa min ea detexuinsmaki. <sup>30</sup> Jakia ja min bake maxkun ainbu jininipabubetan min pei puta keyutani mais jubiaken nukun ina awa bake xua min jamen bawaxunxuki. Jaska watimaki”, aka <sup>31</sup> daewanun, iwanan, jawen epan yuikin: “Epaan, min en bake iyuadian, min ebe jiwekunkainmiski. Dasibi en jaya minaski. <sup>32</sup> Jaskabiaken min betsa maxku mawa keska ishian ma ana jiwea keskaki. Uatian benushina ikis nun ma bechiawen taea benimai nun beyusi nawai pejaidaii”— jatu watan

## 16

*Mabu mekexunikatun jawen xanen ibu padanikidi miyuiwen yusinikiaki, na janchadan*

<sup>1</sup> januxun fariseobun ninkadiaibun Jesúsun jawen tsumabu uinkin jabudi yusinkin:

—Juni betsa mabujaidaya inun bai ichapaya jabu dasibi mekexunika dayaxunmiskidi matu yuinun ninkakanwen. Jawen dayaxunikatun kanekin jawen jamapai tibi pe mekexunamaken jaki chaniabu ninkaxun <sup>2</sup> jawen tsumapan kenaxun yuikin: “Mikidi yuaibu en ninkaidan, ¿chanimamen? En pei inun en mabu min ubisita wamiskiaki. Jaskaken jaska nuku dibiabu cuenta tibi pewaxun ea inantan ana ea dayaxunama janida kaindikaintanxanwen”, aka <sup>3</sup> jawen mabu mekexunikatun shinankin: “En tsumapan ea nichiainan, ¿jaskaxanpa? En yuda ma en babu bai anu pukin en dayatidumaki. Ja inun, jamapai jatu ea abauni en daketapakauntidumaki, pei ea ikidan. <sup>4</sup> Jaskakenan, en tsuma dibiabun jiwe anu en ka jau ea medabewakin jaibuwaxanunbun jaska wakin en jatu jaibu watidu en jatukidi shinaiin”, itan <sup>5</sup> jawen tsuma dibiabu tibi bestibu kenaxun ja dukun jua bichitan yukakin: “En tsumadan, ¿jati jawen jawa min dibiamen?” aka <sup>6</sup> ja dibiatur yuikin: “Jawen piti xeni 100 bidón en dibiaki”, aka jawen mabu mekexunikatun jaibuwakin yuikin: “Jaki min dibia una cuenta bitani nenu tsauxun ana bena wakin jawaida na jabiatián 50 bidón besti kenediwe, min dibia xeni ana shinanmadan”, aka kainkainaya <sup>7</sup> januxun ja kachu juadi yukakin: “En tsumadan, ¿jati jawen jawa min dibiamen?” aka, “Xekiwan 1,000 saku en dibiaki”, aka: “Jaki min dibia una cuenta bixun ana bena wakin 800 besti kenediwe, min dibia xeni ana shinanmadan”, akin kainma kaya <sup>8</sup> dibiabu tibi jabiaskas jatu waken jawen tsumapan jawen aka jaki chaniaibu unantan jaska nuitapatiduma jaskai jaibuyai jiwxanai unantan jawen mabu mekenika chakabubia unanepawen taexun kenwaniki. Chania mabuwen kemukin inananain jawen nuiama unanepatan Diosunabuman jaska wai jiwekin jabun Dios ninkaibu jatu binumisbuki. <sup>9</sup> Jaskawen taexun mabuya man jaskakubainxanunbun matu yusinun ninkakanwen. Mabuwen kemua mesebiaken ja mabu man jayawen medabenankin yudabu jaibuwakin man beyawatidudan, yudabube inananain pepaxankanwen. Matun mabu keyuaya janua man ea chibankin jaska jatu axunmiswen taea Dios matuwen benimakin nai anu jiwti kayabi inankin matu manakuxanikiki.

<sup>10</sup> Ja inun, tsuabuda mabu eskadabes jaya pe mekemisdan, mabu ichapadi jayakin ichapadi pe meketidubuki. Jamen tsuabunda mabu eskadabes pe mekeismadan, ichapadi pe meketidubumaki. <sup>11</sup> Jaskaken mai anua mabuwen kemukin man pe meketidumaken Diosun daya pepajaida matu yunuamadi ixanikiki. <sup>12</sup> Ja inun, yuda betsan mabu man pe mekexuntidumaken jawada Diosun matu yubani matu inanmadi ixanikiki. <sup>13</sup> Ja inun, jadatuda dayadun jawen xanen ibu dabe dayaxunkin medabewatidumaki, betsbechipaikin chibankin betsbechipaima danankin ninkamadan. Jabiaskadi wakin pei inun Diosdi shinankin ja dabe jaska waxun man duawatidumaki—jatu waya

<sup>14</sup> fariseobu peiwen kemukin bechipaimisbun Jesúsun yusian ninkakin kaxe wakin usainbu <sup>15</sup> Jesúsun jatu yuikin:

—Matudan, bemakis pepakin junibu padankin man jatu kenwanmamiski. Jakia Diosun matun shinan unanmiski. Ja inun, kenkin jawada yudabun bechipaiai Diosun dananmiski—iwanan,

*Diosun jawen yusian jatu yununi tsuan betsa watimakiaki, na janchadan*

<sup>16</sup> Jesúsun jatu yuikubainkin:

—Jamen Nashimanika Juan judiamatun matun ichati jiwe tibi anuxun Moisin yusini inun Diosun jancha yuixunikabun yusinpauni yusinkubainkin Juanki tekiwanibuki. Januxun Juanen kaka pepa Dios xanen ibuxanaikidi chaniaya ichapabun bechipajaidai janu jikinun ika naxukunibukiaki. <sup>17</sup> Jabiaskabiaken Diosun yusini dainbainai keska wakin tsuan betsa watidumaki. Nai inun mai yamaxanai bikama keskaki. Jakia dasibi Diosun Moisés yusian keneni jawa betsa texe wama menexanikiki, tsuan betsa watiduma-jaidawan taeandan.

*Ainbu jenetimakidi Jesúsun jatu yusinikiaki, na janchadan  
(Mt 19.1-12; Mr 10.1-12)*

<sup>18</sup> Jaskaken Diosun Moisés yusian eskaki. Tsuanda jawen ain jenetan ainbu betsa bikinan, Diosun jancha kanei chakabumisbuki. Ja inun, ainbu jawen benen jenebaina juni betsan ainwainan, ja juni betsadi jawen chakabudikiki, jaska Diosun Moisés yusian keneni kaneidan— iwanan,

*Juni mabujaidaya inun Lázaro nuitapanikidi Jesúsun jatu unanmanikiaki, na janchadan*

<sup>19</sup> januxun Jesúsun jawen yusinti betsawen jatu yusinkin yuikin: —Juni betsamabujaidaya inun bai ichapayatun xanen ibukin tadi pepas sawekin pei ichapa putaxun jawen jaibuaibus pimai jatube beyusi nawai benimakunkainiki, jawen shinan betsa wamadan. <sup>20</sup> Jamen juni betsan nuitapai chaminitun Dios ikunwain jawen kena Lázaro jawauma juni mabujaidayatun jemaintin kene xui xexekaian jawenabun janatantanmisbu <sup>21</sup> piti texe xanen ibun putai pikin yani wanun ika dakaken kaman bexun jawen chami dataxkubainmisbu <sup>22</sup> janua Lázaro nuitapai mawa jawen xenipabu Abraham anu jau pepa besti jiwenun Diosun nai tsumabun jawen yushin iyuabu janua jatianda ja mabujaidayadi mawa jawenabun maiwabu <sup>23</sup> janu mawabu bumisbu anu juni mabujaidayaima nuitapai yumankin uinbaunkin chairea Abrahamnen Lázaro duawai bechitan <sup>24</sup> sai ikin yuikin: “Epa Abrahamneen, ewen nuiwe. Chi jede anua en yumiain. Unpax metsabidan jau en jana ea matsi wayunun Lázaro ea yunuxunwen”, aka <sup>25</sup> Abrahamnen yuikin: “Baa, eskaki shinanwen. Min jiweadan, jawa bika teneama mabujaidaya min jiwekunkainimaki. Min jaskaya Lázaroden, nuitapakin isin chakabu besti tenei jiwekunkainimaki. Jakia natian Lázaro Diosun duawakin mia kupiaiwen taea min nuitapai. <sup>26</sup> Jaskaken miaudia ea anu jau tsua juyamanun inun ea anua mia anu jau tsua kayamanun na kini keyatapajida waxun Diosun nemaniki”, aka <sup>27-28</sup> mabujaidayaimatun yuikin: “Jaskakenan Epaan, en mia yukaii. En meken bestiti betsayaki. Nenu en yumain anu jau jabudi beyamaxanunbun en epabe jiweabu jau jatuki chanitanun Lázaro ea yunuxunwen”, aka <sup>29</sup> Abrahamnen ana yuikin: “Moisin yusian inun Diosun jancha yuixunikabun yusian ke-nenibu minabu jayawen taexun jatun yusian jau tapinunbunwen”, aka <sup>30</sup> mabujaidayaimatun yuikin: “Epa Abrahamneen, chanimaki. Enabu Diosun jancha jayabia tapinsbumaki. Jakia juni mawa ana bestenkain jatuki chania jatun shinan betsa watidubuki”, aka <sup>31</sup> ana nemakin Abrahamnen yuikin: “Moisin yusian chanima inun Diosun jancha yuixunikabun jatu yusini jawa ninkaisbumawen taexun juni mawa ana bestenkaini kaxun minabu jatu yusinbia jawa ninkamadi itidubuki”, akin Abrahamnen ne-maimaki— iwanan,

## 17

*Yuda betsan jawada jatu chakabuwamai mesekiaki, na janchadan  
(Mt 18.6-7, 21-22; Mr 9.42)*

<sup>1-2</sup> Januxun Jesúsun jaki chiti ikabu besti yusinkin yuikin:

—Tsuanda jaska shinanmabiaken yuda betsan jawada chakabu memakin mia beya wamanun, iwanan, jaska Diosun yunumis inun nemamis matu amakin chakabuwamisbuki. Jakia tsuabunda enabu uinti babubu padankin jatu chakabuwamamis jabudi Diosun jatu kupia nuitkaajaidaxanaiwen taea jawen xekiwani deneti mishki ewapa nexaxun teumatan ianenwan medan pukua jasadon, jawen kupiti bexmas mekeanai.

<sup>3</sup> Jaskaken chakabuwakin man kanekatsi ikamadan, uindakanwen. Jamen ea ikunwain betsan kañekin mia chakabuwa dakeama kaxun xabakabi chitekin dakewawe. Min jancha pewen jawen chakabu min jakimawa jawen shinan betsaa waya jawen chakabu ana shinanyamawe. <sup>4</sup> Jabias xabatian tsuanda 7ki mia chakabuwaxu jabiaticiki mia yuikin: “En ana kanexuki. Ana en jaskayamaxanun en chakabu ana shinanyamawe, nun ana sinatadabeyamanunan”, mia waya jabiaticiki jawen chakabu ana jabetan shinantimaki— jatu wa

*Jawen tsumabun ana ikunjaidawati kushipa ea anibukiaki, na janchadan*

<sup>5</sup> jawen tsuma kushipayabun Jesúsun akin yuikin:

—Nun mia ikunwanbiaya ana ikunjaidawati kushipa nuku inanwen—akabu

<sup>6</sup> januxun Jesúsun jatu yuikin:

—Man ea ikunwainan, mostaza jexe pexeishta keska man jayaki. Jaska keska jayabun na ji yunukin: “Nenua min tacha betsekekain unu ian nemaki ni maewe”, man aka matu ninkatan itiduki— iwanan,

*Jatun xanen ibuan yunua axunkin duawai kentimakidi Jesúsun yusinikiaki, na janchadan*

<sup>7</sup> ana jatu yusinkin:

—Tsuada man dayaduya matun bai udutani kasmai matun chaxuwan inun ina awa matu mekexunbai jukidan jiwtan jikiai man yuikin: “Tsauxun pidiyuwe”, akin ¿man yuimismen? <sup>8</sup> Man jaska waismaki. Yuikin: “Badi kaya nun pinun bawa taewawe, ea dukun en piaya chipu min tadi betsa sawetan miandi min piaidan”, akin matun dayadu man pe yunumiski. <sup>9</sup> Jaska yunua jawen tsumapan ninkakin pe akubainaiwen taexun jawen xanen ibun jawen tsuma: “Peki”, aismaki. <sup>10</sup> Matudan man jabiaskadi keskaki. Jaskaken jawada Diosun matu yunua atan ibubis keanma yuikin: “En xanen ibun ea yunuas besti en akubainai. En jawen tsuma bestiki”, ikin jawada matu yunua ja besti shinankin axunkin ja dukun menexunkubainkanwen, jawa chikishamadan— jatu wanikiaki.

*Meken dabeti junibu bichiki chamini buisbuma Jesúsun xuxawanikiaki, na janchadan*

<sup>11</sup> Janua betsation Jesúsun Jerusalénkidi kakunkaini Samaria mai pakea inun Galilea mai pakea ja dabe namakis anu kai <sup>12</sup> mae betsaa anu jikiaya 10 junibu yudaki chaminibun Jesúsun bechitan benanta mapuxun <sup>13</sup> jancha kushipawen yuikin:

—Jesúsun yusinaan, nukuwen nuiwe— akabu

<sup>14</sup> Jesúsun jatuwen nuikin uinkin jatu yunukin:

—Jerusalén anu buxun Diosbe nukunabu janchaxunikabu matun yuda uinmaditankanwen— jatu wa jawen jancha ikunwanbaini dabekebaini

bukin jatun yudaki chamini ma xuxa ana chami jayama uiainbun <sup>15</sup> jabu bestichaitun jawen yudaki chamini ma xuxa uintan dabekekidan jui ku-shipawen Dios kenwain <sup>16</sup> Jesúsunabuma Samarianawabia Jesúsun besuudi danti iki beti ixun kenwanyan

<sup>17</sup> Jesúsun yuikin:

—10 juni chaminibu en xuxawaxuki. ¿Chanimamen? ¿Janimen, ja 9 juni Israelbudan?— ikin <sup>18</sup> —Na nawan besti Dios kenwain chintunkidanxuki. Jawen tapinkanwen— iwanan, <sup>19</sup> nawa danti ika yuikin: —Benitan inun kadiwe. Min ea ikunwainwen taea min xuxaxuki— anikiaki.

*Jaskai Dios xanen ibui ana juxanaikidi yusinikiaki, na janchadan*

(Mt 24.23-28, 36-41; Mr 13.15-16)

<sup>20</sup> Januxun fariseobun Dios xanen ibui ana juxanaikidi yukabu Jesúsun jatu yuikin:

—Dios xanen ibuaidan, ikis beduwen man uintidumaki. <sup>21</sup> Ja inun, tsuanda yuikin: “Uinwen. Dios xanen ibui naki”, ikasmai: “Uinwen. Unuki”, ikin yuima ixankanikiki. Chania en matu yuiaii. Dios xanen ibuidan, ikis matube dasia niaki, taeidan— jatu watan

<sup>22</sup> januxun jawen tsumabu beiskin yuikin:

—Eadan, matun Juchi Kayabi Iyua ea uinbianixun ana ea uinkatsis ibiakin man yane ana ea uianma ixankanaii. <sup>23</sup> Man jaskaya matu padankin yuikin: “Nenu ma juaki, Cristodan”, ikasmai, “Unu ma juaki”, ikaibu ninkabiataan jadi jatu chibanyamaxankanwen. <sup>24</sup> Jakia en matun Juchi Kayabi Iyua en ana eskakidanxanai matu yuinun ninkakanwen. Jawaida uke bukun kana bedi iki bakamis keskatan en ana juai dasibibun ea uinxankanikiki.

<sup>25</sup> En jaskadiama ja dukun na jabiatián ea danankin yudabun bikajaida ea tenemakin ea nuitapawayuxankanikiki. <sup>26</sup> Jaska inun, Noé jiweken chakabui jiwekubainibu keskadiaibun matun Juchi Kayabi Iyua en ana chintunkidanxanaii. <sup>27</sup> Eshanibuki. Jawen nunutiwen Noé jikidiämaken yudabun pikin mabex aki ainyankin jatun bakebu beneyawakin Dioskidi jawa shinanma jiwekubainaibu Diosun yunua Noén chibain jawenabubes jawen nunuti menetan jikiaya jenen jatu achiaya Diosun yunua ninkais-buma jatumebi debui jasai keyunibuki.

<sup>28</sup> —Jaska inun, jabiaskadiai Lot jatube jiweiäken chakabuwakubain-misbu Diosun jatu kupikin yamawani ana matu shinanmanun ninkakan-wen. Jabun pikin mabex akin mabu bikin mabu inananankin bai waxun banakin jiwe wakubaini Dioski jawa dateama jiwekubainaibun <sup>29</sup> Lot juni pepa jawen mae Sodoma anua Diosun paxa watan nai anua chi inun azufre ui keskai nidi ikin Sodomanawabu jatu yamawaniki. <sup>30</sup> Jabiaskadiai matun Juchi Kayabi Iyua en juai yudan kaianen ea shinankin manabumaken en jatu jabiaskadi wakin kupixanaii.

<sup>31</sup> —En jatu jaska waxanaitian na mai bawa jiwe sapa xeni manaundi maniabudan, butuxun jawen jamapai bikatsis ibiakin jau jawen jiwe anu jikiama jau jawaida paxaxanunbunwen. Ja inun, ikunwain ja bai anu dayaibudan, meshu medan jatun bemakia tadi kextupa bikatsis ibiai jau ana chintunkidanama jau jabiadi paxadijanunbunwen. <sup>32</sup> Jamen betsadan, eskaniki. Shinankanwen. Lotin ain Sodoma anua jabe paxabiai jawen mabuwen nui jaskaimenkain uinun ika nasaukeai Diosun jabiadi damiwakin tewe wanidan, man jaskadiatiduki. Uindaxankanwen. <sup>33</sup> Jaskaken tsuabunda jawen jiwea yaushikin benuxankanikiki. Jakia tsuabuda ewen taea mawanun ika jawen jiweawen nuiama mawabudan, jawen jiwea ben-uama jiwekuinxankanikiki, niti ikamadan.

<sup>34-36</sup> Ja inun, betsadan, meshu medan jabias dakaniki dabe uxabu betsan ea chibamnis iyukin betsan ea chibainsma Diosun nai tsuman jenebainx-anikiki. Ja inun, ainbu dabetan deneaibu betsan ea chibamnis iyukin betsan ea chibainsma jenediabainxanikiki— jatu wa

<sup>37</sup> jaska yuiai jawen tsumabun ninkatan yukakin:

—Xanen Ibuun, dasibi min nuku yuiaidan, ¿jania jaskaxanimenkain?— akabu junea janchawen ana jatu yuikin:

—Janu yuda mawa daka pisi mayai xeten xetebidan janu ichai tuyabaunmis keskai ixankanikiki— iwanan,

## 18

### *Punu nukama Dios yukatikidi miyuiwen yusinikiaki, na janchadan*

<sup>1</sup>januxun jawen tsumabun Dios kushipa yukai jau punu nukayamaxanun-bun miyuiwen Jesúsun jatu yusinkin <sup>2</sup> yuikin:

—Mae betsa anu juez jiwxun Dioski meseama juni betsan jancha ninkaismadi <sup>3</sup> jabias mae anua yuxabu jawen bene ma mawayama jau ea medabewanun ika juez anu kaxun yuikin: “Juni betsan ea ichakawakin padainkiki. Medabewakin ea pewaxunwen”, abidan abidankin chikish waya <sup>4</sup> ja dukun jawen jancha ninkama ikunkainkin januxun atimas shi-nankin: “Yudabuwen nuiama Dioski en meseamabia <sup>5</sup> natun ea daketapa wabidan wabidanaiwen taexun en nemaxuni kaii. En jaska waxunamaken jukidan jukidankin ea punu nukawatiduki”, ixun medabewaniki— iwanan,

<sup>6</sup> ana Jesúsun jatu yuikin:

—Ja juez chakabun jaska wamisbun <sup>7-8</sup> jamen Diosun nuku medabewakin jabun matu chakabuwakatsi ikaibu nemaidan, jawen shinan betsajaidaki. Jawen katuabu Diosun matu medabewakin badidi inun meshu medan man ea atan manaibu ninkatan manama jawaida jatu nemakin matu pewaxun-miski. Jaskawen taea ea matun Juchi Kayabi Iyua en ana juaitian jabun ea ikunwankin jenekubainabuma ¿en jatu bechitushixanimenkain?— iwanan,

### *Fariseo inun pei bixunikakidi Jesúsun miyuiwen jatu yusinikiaki, na janchadan*

<sup>9</sup> janua ichapa mapuxun ninkaibukidi jabu jatidi ibubis kenkin shinain bepadamei: “Ea besti en pepaki. Jakia betsabudan, jaskaisbumaki”, ikin jatu dananmisbu Jesúsun ana miyui betsawen jatu yusinkin jatu dabinwankin yuikin:

<sup>10</sup> —Templo jemaintin anu juni dabe Diosbe janchai bua mapuabukidi matu yuinun ninkakanwen. Ja juni dabedan, betsa Moisin yusian inun jawen xenipabu betsabun yusian chibajaidamis fariseoki. Ja inun, betsadan, Romanawa xanen ibu pei bixunikaki. <sup>11</sup> Jaskakain fariseo nia naiudi besuxun Dios dayuikin: “Diosuun, yuda betsabu keskama en pewen taexun en mia kenwaiin. Yumetsumisbu inun, padanananmisbu inun, chutaname-baunmisbu inun, ja pei bixunika chakabu en jatu keskamaki. <sup>12</sup> Ja inun, semana tibi xaba dabe mia kenwain en samakemiski. Ja inun, jamapai dayakin bixun meken dabeti paxkatan bestichai min kenwanti jiwe mekenikabu en inankuinmiski”, iki ibubis keanyan <sup>13</sup> janua ja Romanawa xanen ibu pei bix-unika jawa keanma benanta nidiaxun jawa naiudi besuama dakei aitin iki xutidin xutidin ikin yuikin: “Diosuun, min jancha en kanemisbiaken ewen nuikin en chakabu ea buaxunwen”, <sup>14</sup> abaini inun kaya Dios jawen nuikin jawen chakabu buaxunkin pewaxunimiski. Jakia fariseon jancha ninkama Diosun jawa buaxunama ikimaki. Jaskaken tsuabuda ibubis kenmis Diosun dake waxanikiki. Jakia tsuabuda keinsma Diosun duawaxanikiki— jatu wa

*Bake mishtinbu unanuma wakin Jesúsun Dios jatu yukaxunikiaki, na janchadan*

(Mt 19.13-15; Mr 10.13-16)

<sup>15</sup> janua jatun bake mishtinbu Jesús anu iwekin jau ea mamepikin uinxunkin Dios ea duawamaxunun, iwanan, jabun jatun bake iwebidan-bidanaibu Jesúski chiti ikabun uinkin jatun nemaibun <sup>16</sup> nantaxun jatun jaska waibu Jesúsun jatun kenaxun yuikin:

—Jatun bake mishtinbu ea anu iweaibu jatun nemayamakanwen. Dios xanen ibuaitianan, na bake mishtinbu eki dateabuma keskabu besti Dioski dasixankanikiki. <sup>17</sup> Chanima en matu yuaii. Bake mishtinbun jawen ibu bechipaimis keska wakin Epa Dios bechipaiabuma Dios xanen ibuaitian jaki dasiama ixankanikiki— jatun wa

*Juni xanen ibu mabu ichapaya Jesúsbe janchanikiaki, na janchadan*

(Mt 19.16-30; Mr 10.17-31)

<sup>18</sup> januxun xanen ibu betsan Jesús yukakin yuikin:

—Yusinan pepaan, ¿mia yukapa? Jiwea kayabi bikinan, ¿jaska kayatan en bitidumen? Ea yuiwe— aka

<sup>19</sup> Jesúsun yuikin:

—¿Jaskakin ea kenakin: “Pepaan”, min ea wai? Dios bestiki, pepadan, ¿min unanmamen? <sup>20</sup> Mianan, Diosun yunuti inun jawen nemati min ma unainan: “Ainbu min ainma chutatimaki. Sinatakin yuda betsaa tenantimaki. Yumetsutimaki. Yuda betsaki chanichakatimaki. Padananantimaki. Ja inun, min epa inun min ewa jatu duawakubaintiki”— aka

<sup>21</sup> jaska wa ana xanen Ibuun Jesús yuikin:

—Jaa. Dasibi Diosun yunuti inun jawen nemati bakeishtatun tapinixun jeneama en chibankubainmiski— aka

<sup>22</sup> ninkatan Jesúsun uin jawen nuikin ana yuikin:

—Min pe ea yuiaii. Na besti min shinandiamaki. Mia yuinun ninkawe. Nai anua Diosun manakuti pepa bikatsis ikin min jawada dasibi min jaya jatu inan keyutan ja pei min bishian ja nuitapaibu inankuintan chintuanma ebe kakin ea chibankubainxanwen. Min jaskakunkainaiwen taexun jiwekuian min bixanaii— aka

<sup>23</sup> jakia juni mabujaidayatun Jesúsun jaska yuiai ninkai pes juinti nishmai keyutan ana jawa yuiaama jawen mabuwen nuiaya <sup>24-25</sup> Jesúsun uinkin ana yuikin:

—Ja yuinaka ewapa camelldoran, ja xumux jawen chixuiki jawen yuda kainmakinan, tsuan atidumaki. Jakia jaska keska bikadan, juni mabu ichapayadan, jawen mabu besti shinain jawen nuikin jatun shinan betsaa wama Dioski chiti itidubumaki— jatun wa

<sup>26</sup> januxun jabun Jesúsun jancha ninkatan yukakin:

—Jaskakenan, ¿tsua Diosun nuku mekekin paxawakin jiwematidumen?— ikaibun

<sup>27</sup> Jesús jatuwen nuikin yuikin:

—Dateyamakanwen. Yudabun jaska watidubumajaidabiaken Diosun besti matun shinan matu betsaa wamatana dasibi matuwen nuikin matu axuntiduki— jatun waya

<sup>28</sup> Pedron yuikin:

—Xanen ibuuun, nukunan, mia chibankatsi ikinan, nukun jawada nun jaya dasibi bashikin keyubidanimaxun nun ma mia chibankapeaaii— akaya

<sup>29</sup> Jesúsun ana jatu shinanmakin yuikin:

—Chanima en matu yuiai ninkakanwen. Tsuabunda ea chibankin Dio-sun jancha kakape yusintanun, ixun matun jiwe xununkin matun ibubu

xununkin matun betsabu bashibainkin matun ain xununyubainkin matun bakebu bashikin keyuyubainxanaibu <sup>30</sup> na jabatiandi dayaibu Diosun pepawen matu duawakin manakukubainshinxun jabisakadi wakin nai anudi matu jabe jiwekuinmaxanikiki, ikibi imakinan— jatu wabaini

*Mawaxanaikidi dabe inun bestiki Jesús jatuki chanikiaki, na janchadan  
(Mt 20.17-19; Mr 10.32-34)*

<sup>31</sup> januxun jawen 12 tsumabu besti jatu kenaxun Jesúsun jatu tadi iyuxun yuikin:

—Jerusalén anu nun ma mapekei kaidan, man unaiin. Nun janua jaskaxanaikidi matu yuinun ninkakanwen. Diosun jancha yuixunikabun ea matun Juchi Kayabi Iyuakidi ekidi kenenibu menekin ea axankanikiki. <sup>32</sup> Januxun eki sinatakin ea achixun nawabu anu ea iyuxun inanbu jabun ea chitekin ichakawakin eki kaxekin eki kemu michukin <sup>33</sup> ea kusha kusha axun ea tenanbu xaba dabe inun besti kaya en ana bestenxanaii— jatu wabia <sup>34</sup> jawen 12 tsumabun jawen jancha ninkabiakin jawa jatu yuiai dabanen jawa xabakabi ninka pewatiduma ibainaibun

*Jericó bai kexakea juni bekun Jesúsun bepexnikiaki, na janchadan  
(Mt 20.29-34; Mr 10.46-52)*

<sup>35</sup> janua Jerusalénkidi kai maewan betsá Jericó anu kemaya bai kexa juni bekun tsauxun pei jatu ea akin ninkaya <sup>36</sup> yuda ichapabun dainbainaibu ninkatan yuka ikaya <sup>37</sup> betsabun yuikin:

—Jesús Nazaret anua kauani ikikiki— akabu <sup>38</sup> jancha kushipawen yuikin:

—Davidin babaan, ewen nuiwe— akaya <sup>39</sup> bebebainkin nemapaibiabu ninkama unanxubima jatu binumakin yuikin:

—Davidin baba Jesúsuun, ewen nuiwe— ikaya

<sup>40</sup> Jesús niti itan junibu jatu yunukin:

—Iwekanwen— jatu wa iweabu chaimaxun yukakin:

<sup>41</sup> —¿Mia jaska wapa?— aka juni bekunman yuikin:

—Xanen Ibuun, ana en uinun ea bepexwe ika en ikaii— aka <sup>42</sup> xuxawakin Jesúsun yuikin:

—Ana uindiwe, min ea ikunwainwen taea min xuxaidan— akaya <sup>43</sup> jawaida bepexetan Dios kenwankin Jesús chibanbainaya ichapabundi Jesúsun jaska wai uintan dasibibun Dios kenwanbainaibun

## 19

*Jesús Zaqueoki nukunikiaki, na janchadan*

<sup>1</sup> janua Jericó baiwen Jesús jikikaini mae kapukekainaya <sup>2</sup> jabianudi juni betsá mabujaidayatun Roma pei bixunikabu jatun xanen ibu jawen kena Zaqueon <sup>3</sup> Jesús uinkatsis ibiaya juni ichapabube Jesús kaya Zaqueo juni chanpaishtatun jaska waxun uintima <sup>4</sup> Jesús uinun ika bebui kushikain jiwen ina tsauken <sup>5</sup> Jesús jukin manaundi uinkin Zaqueo bechitan yuikin:

—Zaqueoon, min jiwe anu en uxai kakatsis ikaii. Menan butudiwe— aka

<sup>6</sup> janua jawaida butukidan benimakin jawen jiwe anu Jesús inun jawen tsumabu itan iyuaya <sup>7</sup> jaska wabainai dasibibun uintan Jesús yuankin: “Juni chakabu anu uxai kaxuki”, ikaibun <sup>8</sup> januxun Jesúsun jancha ninkakin jawen shinan betsá watan Zaqueo benitan Jesús yuikin:

—Xanen Ibuun, en jatu jaska waxanai ninkawe. En mabu inun en pei tanatan dabukun ja nuitapaibu en jatu inanbauntidu en shinaiin. Ja inun, tsuabuda jatu padanxun jatun jamapai en bianmis dabe inun dabeki en ana jawendi en jatu inanxanaii— akaya

<sup>9-10</sup> Jesúsun yuikin:

—Eadan, matun Juchi Kayabi Iyuatun juni chakabu benua keska benabaunkin medabewanun ika en juniki. Na jabiatian na jiwe anu matun mekenan ma matu anu jikixuki. Jaskawen taea min shinan betsa waya Dio-sun minabube mia mekekubainxanikiki. Jaska Abrahamnen ikunwanpauni keskakin ikunwain min ma Abrahamnen baba kayabiki— akaya

*Pejexekidi miyuiwen Jesúsun jatu yusinikiaki, na janchadan*

<sup>11</sup> yuda ichapabun Jesúsun yusiain ninkakubainkin shinankin: “Jerusalén anu kematan nawabu nichintan Dios samama xanen ibujaidai kaimenkain”, iwanan, yuiaibuwen taexun <sup>12</sup> jabun shinan Jesúsun unantan jatu pewanun, ixun miyuiwen jatu yusinkin:

—Xanen ibu bexmasbiaken jau mae ichapa xanen ibujaidaxanun, iwanan, xanen ibu kushipa binuatun kena ka ja xanen ibu bexmas katanima matu yuinun ninkakanwen. <sup>13</sup> Chai mae betsa anu kadiama jawen 10 dayax-unikabu kenaxun pei jexe ichapajaida ja tibi jatu inan akeaketan jatu yunubainkin: “En judiama na en peiwenan, jamapai tibi bitan jawen inananankin ana binumaxankanwen”, jatu watan chai kaimaken <sup>14</sup> januxun jawen maewan anuxun jawenabun ja xanen ibu bexmas danankin bechipaiabumawen taexun jawenabu betsabu yuikin: “Xanen ibujaida binuatun jiwe anu kaxun ja juni jau nukun xanen ibu iyamaxanun yuitankanwen”, jatu wa buimaxun jaki nukutan yuiabu

<sup>15</sup> jabun danankin jaska jakidi yuibiaibun ja xanen ibujaida binuatun ja juni jawenabun bechipaiabumabiaken jau jabun xanen ibu inun jatu katuxunshinken chintunkidan jikixun ja jawen 10 dayanikabu kenaxun ja pei jatu inanbainimakidi jatu yukakin: “¿Jati man ana ea ichawaxunshinamen?”, iwanan, bestibu tibi jatubetan pewanun, iwanan, jatu kena <sup>16</sup> ja dukun juxun yuikin: “Xanen ibuun, min pei jexe ichapa inananankin ana midimajaida 10tiki binumakin en mia ichawaxunshinaki”, aka <sup>17</sup> jawen xanen ibun yuikin: “Pejaidaki. Min en dayanika pepaki. Eskadabes min pemekeshinawen taea mia manakukin 10 mae jati mekei ea xanen ibuxunuwe”, akaya <sup>18</sup> ja kachu jawen dayaxunika betsabu juxun yuikin: “Xanen ibuun, min pei jexe ichapa inananankin ana 5tiki binumakin ichapa en mia ichawaxunshinaki”, akaya <sup>19</sup> jadi yuikin: “Jaskakenan, miandi 5 mae jati mekei ea xanen ibuxunuwe”, adiaya

<sup>20</sup> janua jawen dayanika betsadi danas inanbainima juxun yuikin: “Xanen ibuun, naki, min peidan. Benukatsi ikama dakutan en mia aduxunimaki. <sup>21</sup> Min juni meseken miwen datekin min pei benukatsi ikama tadi tuaxwen yabutan en mia aduxunimaki. Dayakin jawa miban banamabia min ichawamiski. Janua jexe sa akamabia min ichawadiamiski”, akaya <sup>22</sup> januxun xanen ibun yuikin: “Min en dayadu chakabu chikish chakamaki. Chanima dayakin jawa miban banaumabia en ichawamiski. Ja inun, jexe sa akamabia en ichawadiamiski. Ja unantan <sup>23</sup> ¿jaskakin banco anu cuenta watan inananankin en pei min ea aduxunama ikimamen, janua ibubis juxun en pei xekei ana jaki ichashina en biyuxanunan?” atan <sup>24</sup> jawen dayadu betsabu mapuabu jatu yuikin: “Ja chikishin pei mebintan ja 10tiki binumashina ana ichawamakanwen”, iwanan, <sup>25</sup> jabun jatun xanen ibu yuikin: “Ma 10 binujaida jayaki. ¿Jaskakin min ana pei inain?” aka <sup>26</sup> xanen ibun jatu yuikin: “Tsuada na en dayadu pepa keskatun jawada jaya pe mekeama unantan ichapa jayabiaken manakukin ana ichapajaida en inanxanaii, binumakinan. Jakia tsuada na en dayadu chikish keskatun jawada jaya pe mekeama ja eskadabes jaya unantan en mebinxanaii. <sup>27</sup> Ja inun, jabu eki sinatakin jau jatun xanen ibu en iyamaxanun, jabun ea bechipaiama

danainmabudan, itanxun en besuubi jatu tenankanwen”, jatu akimakiaki—Jesúsun jatu wabaini

*Jerusalén anu Jesús jikinikiaki, na janchadan  
(Mt 21.1-11; Mr 11.1-11; Jn 12.12-19)*

<sup>28</sup> januxun jatu jaska yusinbaini kaya yuda ichapabun Jesús chibainbainai-bun Jesús Jerusalénkidi ana kai <sup>29</sup> Betfagé inun Betania ja mae dabe anu kemai Olivos Mati tetanbainkin jawen tsuma dabe yunukin <sup>30</sup> yuikin:

—Ja mae besuudi kayanbis buxun burro nexea tsua jaki katsaumediama bechitan tepetan beyutankanwen. <sup>31</sup> Ja inun, tsuanda matu yukakin yuikin: “¿Jawakatsi man tepeai?” matu wa yuikin: “Nukun xanen ibun biyukatsis ikikiki”, atankanwen—jatu wa

<sup>32</sup> ja dabe buxun burro nexea bai namaki nia bechitan tepeaibun <sup>33</sup> jabianudi burro ibubu manixun jatu yukakin:

—¿Jaskakin man burro tepeai?—jatu wa <sup>34</sup> jabun yuikin:

—Nukun Xanen Ibun biyukatsis ikikiki—akabu —Peki. Buxunditankanwen—jatu wa <sup>35</sup> tepetan januxun jatun bemakia tadi burro kamaki kabekan-bain Jesús anu butan Jesús jaki tsauanbu <sup>36</sup> katsaumekainaya jatun bemakia tadi bai namaki nabekanbainaibun <sup>37</sup> Olivos Mati butebidani jaki chiti ika ichapabun Jesús chibankin Jesúsun atimaska betsaa betsapa wai uinkubidanshinabuwen taea benimakin jui kushipawen Dios kenwain nawakin <sup>38</sup> yuibainkin:

—Aichu! Aichu! Ja Xanen Ibu Diosun kena kushipaya juaidan, benimakin kenwanankanwen. Naiudia unanuma jiwea inun kushipa binu keyua unankin jau kenwanunbunwen—ikubainaibun

<sup>39</sup> jabianudi fariseobu jatube bui sinataibun betsan Jesús jatu yuixunkin:

—Yusinaan, miki chiti ikabu jaskaibudan, jatu nemawe—aka <sup>40</sup> Jesúsun jatu yuikin:

—Chanima eki chiti ikabu neseaibun na mishkipan ea kenwain sai itidubuki—jatu wabaini <sup>41</sup> Jerusalénki kemakin uinkubaini ja maewan Jerusalén anu jiweabuwen nui kaxakin <sup>42</sup> yuikin:

—Jawen Dios daewati man ea unanyan matu kupiama ikeanxankanikiki. Jakia natian ikunwanbumawen taexun junea keskaken shinankin man ana uintidubumaki. Man peidawa! <sup>43-44</sup> Jaskaken Dios matu anu bai juai man jawa ikunwanmawen taea matuki sinatamisbun matu ichakawakin matu nuitapawakin matun mae dapi mai kene keyatapa wabaunkin matu keben keyutan man ana kaintiduma watan matuki sinataibun matun maewan mishki kene nidi akin keyukin matu inun matun bakebu detekin matun mae yamawaxankanikiki, jawa texe wamadan—ikunkaini Jerusalén anu jikitán

*Templo jemaintin anua inanananmisbu Jesúsun nichinikiaki, na janchadan  
(Mt 21.12-17; Mr 11.15-19; Jn 2.13-22)*

<sup>45</sup> janua janu Dios kenwanti Templo jemaintin kenekauna anu jikikainkin januxun jawen Dios daewati ina janubia inananainbu jatu nichinkin <sup>46</sup> yuikin:

—Jawen Templokidi jawen jancha yuixunika Isaías kenemani matu yuinun ninkakanwen: “En jiwedan, janua ebe janchakin ea kenwanxankanikiki”, Dios ibianiken na jiwe xabatududan, janua matu padananankin yumetsun jiwe man wamisbuki—iaketankin jatu nichin keyutan

<sup>47</sup> januxun xaba tibi Templo jemaintin anuxun Jesúsun jatu yusinkubainaya Diosbe nukunabu janchaxunikabu xanen ibubu inun, Diosun jancha kenenibu yusinanamisbu inun, judiobu xanen ibu betsaa

betsapabun Jesús jaska datanai detenun ika yuinamebiakubainaibun <sup>48</sup> yuda ichapabun Jesúsun yusiain bechipaikin ninkajaidaibuwen taexun jaska waxun tenantima bika tenenibukiaki.

## 20

*¿Tsuā mia kushipa inainma min aki ikai? akin Jesús yukanibukiaki, na janchadan*

(Mt 21.23-27; Mr 11.27-33)

<sup>1</sup> Januxun xaba betsatian Templo jemaintin anuxun Jesúsun yuda ichapabu kakape yuikin jatu yusianyan Diosbe jawenabu janchaxunika xanen ibubu inun, Diosun jancha kenenibu yusinanamisbu inun mae xanen ibu bexmasbun Jesús nemanun ika jaki kemaxun <sup>2</sup> jabun yukakin:

—Na min eska waidan, ¿tsuan jawen kushipa mia yunuimawen min aki ikai? ¿Tsuā jawen kushipa mia inainmamen, min jaska wanunan?— akabu

<sup>3</sup> Jesúsun jatu kemakin:

—Entsedi en matu yukai ea yuikanwen— itan <sup>4</sup> —Nashimanika Juanen jau jatu nashimanun yunukinan, ¿tsuan kaya yunuymada, shinain, Diosdaka, junibudaka? Ea dukun yuikanwen— jatu wa

<sup>5</sup> janua jabudi june yuinamekin:

—“Diosun yunuymaki”, nun wadan, “¿Jaskakin Juanen jancha man ikunwanma ikimamen?” iwanan, nuku kunyan atiduki. <sup>6</sup> Jamen yuda midimabun Diosun Juan yunuymakidi jabun ikunwainbuwen taea jabuki datekin yuikin: “Junibun yunuymaki”, nun ikaya mishkiwen nuku tsaka tsaka akin nuku tenantidubuki— itan <sup>7</sup> januxun jabun Jesús yuikin:

—Tsuanda Juan yunuymada nun unanmaki— akabu <sup>8</sup> Jesúsun jatu yuidiakin

—Jaskakenan, tsuanda jawen kushipawen ea yunuimada, eandi en matu yuiamaki— jatu watan,

*Dayakapabu mekanan besumakidi Jesúsun jatu yusinikiaki, na janchadan*

(Mt 21.33-44; Mr 12.1-11)

<sup>9</sup> januxun yuda ichapabun Jesús ninkanun ika beabu miyuiwen Jesúsun ana jatu yusinkin:

—Juni betsan bai waxun uva bimi batapa banatan jau bimi dabukun ea inanxanunbun, iwanan, juni betsaa dayakapabube jabube yubakatan ibu keska wakin inanyubaini chai kaimaken <sup>10</sup> janu ma kani tsekatitian ikaya bai ibuan jawena dabukun jau yukatan ea bixuntanun, iwanan, jawen tsuma betsaa yunua ka jabun jawena inankatsi ikama uva bimi mekeabun achixun kusha kusha axun jawa inanma mais nichianbu kaya <sup>11</sup> januxun bai ibuan ana jawen tsuma betsaa yunudia ka jadi inanxunkatsi ikamadi jabun kunyan akin kusha kusha adiatan jawa inanma mais nichindiabu kaken <sup>12</sup> janua bai ibuan jawen tsuma betsaa yunua ka jabiaskadi wakin deda deda atan kene pechiudi putabu isin tenei kaken <sup>13</sup> atimas bai ibuan shinankin: “¿Jawa jaska waxanpa?”, itan “Jaskakenan en juni bake en bechipaijaidai en yunua ka jaki mesekin en bimi dabukun ea inanxankanimenkain”, iwanan, shinantan nichian kai <sup>14</sup> jawen bake jatuki kemai kai bechitan yuinamei: “Bai ibu mawashinken na jawen baken jawen bai tibi inun jawen jiwe tibi dasibi jawenawayuikiki. Na bai nukunas nun wanun tenantanakanwen”, ixun <sup>15</sup> achibain bai nekixun tenanbun <sup>16</sup> jaska washinabun ja bai ibuan jaskada jatu waxanimenkain? Matu yuinun ninkakanwen. <sup>16</sup> Bai ibu kaxun jatu kupidiakin dayakapabu jatu tenan keyutan januxun dayakapa betsabu jawen bai jatu yunuxanikiki— jatu wai ninkai e itan yuikin:

—Jau jatu jaska wayamaxanunwen— ikaibu <sup>17</sup> Jesúsun jatu beiskin yuikin:

—Ja Diosun jancha Isaíasin kenenidan, ¿jaskada jakidi man shinanmismen?, eska yuinidan: ‘Jiwe wanikabun mishki dananbiaibun jabias mishki Diosun bixun dexun makedex wakin jawen kene mestenwan keska wakin nuku duawakin nuku axunxanikiki’, anidan. <sup>18</sup> Eskaki, ninkakanwen. Tsuada ja mishkiki sinatakin ea mae-manun ika mishki mamaki kauana teke teke ika itiduki. Jakia ja mishki jadatukida kauani jaki tin ikin chushakin mishpu waxanikiki— jatu waya <sup>19</sup> januxun Diosbe jawenabu janchaxunika xanen ibubu inun Diosun jancha kenenibu yusinanamisbun Jesúsun dayakapabu chakabubukidi miyui-wen jatukidi janchai jabun ninkakin unantan jaskaitian Jesús achikatsis ibiai yudan kaianki datekin jawa meama mapuxun uinkin

*Gobierno pei bixunmisbukidi Jesús yukanibukiaki, na janchadan  
(Mt 22.15-22; Mr 12.13-17)*

<sup>20</sup> jaskawen unanti watan chitetan romano xanen ibu Pilato anu ja amakatsi Jesús padanun ixun juni betsabu Jesúsun unandiamma judiobun jatu yunukin jau juni pepa itsakin jabun unanti watan Jesús yukakin yuimakatsi nawa xanen ibu jau achimaxanun yunuabu <sup>21</sup> Jesús anu buxun padanpaikin yuikin:

—Yusinaan, junibun jatu kenwanmamisbu keskama chanima jancha besti yusinkin jaska wakin Dios chibantidubu besti min xabakabi jatu yusinkubainmis nun unaiin. <sup>22</sup> Jaskawen taexunan, ¿jaskada min shinain-menkain mia yukapa? Ja romano xanen ibu Césarn nuku pei yukamisdan, ¿jaska wananaxanpa? ¿Pakananaxanpa? ¿Pakatimadaka?— aki

<sup>23</sup> jaki bepadamebainabu Jesúsun unankin jatu yuikin:

—¿Jaskakin man ea padankatsis ikanai? <sup>24</sup> Jawen gobierno impuesto pakati pei jexe betsa ea uinmakanwen— jatu wa bexuanbu uinkin Jesúsun jatu yukakin: —Nadan, ¿tsuan besu inun tsuan kena neamen? Ea yuikanwen— jatu wa jabun yuikin:

—Romano xanen ibu Césarnaki— akabu <sup>25</sup> Jesúsun jatu yuikin:

—Césarnawen taexun matun xanen ibu César duawakin jawen gobierno dayaxunmisbu pei jatu inanxunkubainkanwen. Jakia Diosdi duawakin jawen yusian chibankin jawada bechipaiai axundiakubaikanwen— jatu waya <sup>26</sup> yudan kaianen ninkaya jabun achikatsis ikin unanti wabiabu jaska waxun padankin kanematima nawabun ninkatan min atidumaya Jesúsun janchawen e itan jaska watima pes mapuabun

*Ana bestenxanaibukidi saduceobun Jesús yukanibukiaki, na janchadan  
(Mt 22.23-33; Mr 12.18-27)*

<sup>27</sup> janua saduceobu judiobu paxka betsa: “Ja mawabu jawen yuda tsua ana besteinsmaki”, imisbu Jesús anu jabudi bexun yukakin:

<sup>28</sup> —Yusinaan, Moisin nuku kenexuntanan, eska nuku bashixunbainiki: “Juni betsa ainyantan juni bakeyadiama mawaken janua jawen betsan ain janubi ainwantan juni bakewaxuntiki, jawen betsa mawaimatun kena dabikinan”, nuku waniki. <sup>29</sup> Jaskakidi ja jawen 7 betsabukidi mia yuinun ninkawe. Ja dukun iyuatun ainbu betsa ainwanxun juni bakewadiama mawaken <sup>30</sup> ja kachukeatun jawen betsan jabias ainbu ainwanxun juni bake wadiamadi mawaken <sup>31</sup> ana ja kachukeatun jawen betsan ain jabiadi ain-wandiatan juni bake wadiamadi mawaken janua ja 7 jawen jenekin jabias ainbudi bixun jabu tibibun jawa juni bake bawabuma mawai keyuabun

<sup>32</sup> janua jawen jenei ainbu juni bake biamas mawadianiki. <sup>33</sup> Ja jaskanibudan, mawabu ana bestearinbutianan, ¿ja ainbu bestichai ja juni 7bun ainwanibudan, jadatutun kaya ana ja ainbu bixanimenkain?— akabu

<sup>34</sup> Jesúsun jatu kemakin:

—Na jabiatian beneyai inun ainyain man jiweabuki. <sup>35</sup> Jakia Diosunabu kayabi ana jatu unanti wakin besten waintianan, jabe jiwei jau benimai jiwenunbun Diosun junibu inun ainbu jatu bestenwanan, jadia ana ainyain inun beneyama ixankanikiki. <sup>36</sup> Janua Diosunabu kayabi ana besteanbuwen taea Diosun nai tsumabu keska beneuma inun ainyuma jiwxankanikiki, ana mawamadan.

<sup>37</sup> Mawakubainaibu ana bestenxanaibukidi Moisin yusini matu yuinun ninkakanwen. Ji maxu kua jede ji ikai anuxun mawanibu ana jatu bestenwain kakatsi ikin Diosun Moisés yuia keneinan, eska waniki: “Eadan, natian en Abrahamnen mekenikaki. En Isaacun mekenikaki. En Jacobun mekenikadiki”, ikai ninkayamaxun Moisin kenenidan, ¿man uinkin yuismamen? <sup>38</sup> Diosdan, mawabunamaki. Jakia jiweabunaki. Jaskaken Abraham inun Isaac inun Jacob jatun yushin jiweabuki. Chipu ana yuda bena Diosun jatu inanxanai shinanma man kanejaidamiski— jatu waya

<sup>39</sup> janua Diosun jancha Moisés yusian kenen yusinanamis betsabun Jesúsu yuikin:

—Yusinaan, min pe jatu yuixuki— akaya <sup>40</sup> januxun tsuan ana jawa betsaya yukabumaken

### *Mesíaskidi Jesúsun jatu yukanikiaki, na janchadan*

(Mt 22.41-46; Mr 12.35-37)

<sup>41</sup> ja unanepabu jabu mapuabu Jesúsun jatu bepxumakin yukakin:

—Diosun jancha kenenibu yusinanamisbun matu yusinkin yuikin: “Mesías Cristodan, Davidin baba ixanikiki”, ikin ¿jaskakin matu jaska yusinmisbumen? <sup>42-43</sup> Nukun xenipabu pepa Davidin Salmos anu kenen matu yuinun ninkakanwen:

‘Dios kushipa dasibi binuatun en xanen ibu Mesías yuikin:  
Miki sinataibu en jatu maemadiama manai en yusiudi tsauyuwe’,  
aniki. <sup>44</sup> “Mesías en xanen ibuki”, Davidin abianiken ¿jaskatan jawen xanen ibu janubi jawen baba itidumen? Ea yuikanwen— jatu wa jawa yuiabumaken

### *Diosun jancha kenenibu yusinanamisbu Jesúsun jatu chitenikiaki, na janchadan*

(Mt 23.1-36; Mr 12.38-40; Lc 11.37-54)

<sup>45</sup> yudan kaianen Jesúsun ninkadiaibun jawen tsumabu Jesúsun yuikin:

<sup>46</sup> —Diosun jancha kenenibu yusinanamisbudan, jatu uindakanwen. Jatun tadi chaipa jawendua sawea mae jemaintin ewapa plaza anu en kauanai ea bechipaikin ea kenwankin jau jancha pewen ea duawanunbun ika mapumisbuki. Jaska inun, janu ichati jiwe anu jikikain jaki tsauti pepa janu dasibibun jatu uintidubu anu tsaukatsis imisbuki. Ja inun, ichatan pinun, iwanan, janu xanen ibubu dakai baxti ixun pimisbu benadiamisbuki. <sup>47</sup> Jaska inun, ainbu jawen benen xununitun jawen jiwe bianun, ixun, ainbu padain bepadani Diosbe janchai chaipajaidakubainmisbuki. Jaskamisbuwen taexun jabu Diosun jatu kupijaidaxanikikiki— itan

<sup>1</sup> Templo jemaintin anu tsauxun Jesúsun uiyanan pei ichapayabun ja jakia nuitapaibu medabewati bauki inankuin nanekin mistubainbainaibun <sup>2</sup> ja jaska waibu uiyanan ainbu beneumadi nuitapabiai juxun pei jexe dabe jawa damajaida nanekin mistuaya <sup>3</sup> Jesúsun jawen tsumabu yuikin:

—Chanima na beneuma nuitapaitun jawen pei inankuin nanekin dasibi pei ichapayabu jatu binumakin keyuxuki. <sup>4</sup> Eskaki, matu xabakabi yuinun. Ja junibu pei ichapayabun jatun pei paxkaxun texe besti inankinkanxuki. Jakia ja ainbu nuitapaitun dasibi jawen jawada biti pei inankin keyuxuki—jatu watan

*Dios kenwanti jiwe tekei pudekei keyuxanikidi Jesúsun jatu yuникиаки, na janchadan*  
(Mt 24.1-2; Mr 13.1-2)

<sup>5</sup> janua jemaintin anu mapuxun Templo inun ja mishkipanwanwen jiwe wakin jawenduawanibu inun inankuinti jamapai shadabuwen dau wanibu uin jawen tsumabu bestibu jakidi janchaibu ninkakin Jesúsun yuikin:

<sup>6</sup> —Na jiwe man uiainan, jawenduabia jabianu mishki betsana matsan manama dasibi ja mishki jiwe tekekin pudekin keyuxankanikiki— jatu wa

*Jaska tashinun badiabebunkidi Jesúsun jatu yusinikiaki, na janchadan*  
(Mt 24.3-28; Mr 13.3-23)

<sup>7</sup> jawen tsumabun yukakin:

—Yusinaan, ja mishki jiwe tekei pudekei keyuxanai min nuku yuixudan, ¿mia yukapa? ¿Ma janu kema taei jaskai nun unantidumenkain? Nuku yuiwe—akabu

<sup>8</sup> Jesúsun jatu yuikin:

—En ana judiamaken jaskai nuitapai taexanaibu Diosun yuini eskax ankanikiki. Xabakabi matu yuinun ninkakanwen. Ma en janu jua kemaya juni betsabu bexun yuikin: “En Diosun Mesías Cristo. Ea ninkakan wen”, ikaibun betsabundi yuikin: “Cristo dama juikiki. Matu uinmanun ea chibankanwen”, iwanan, yuaibu jatu ninkayamaxankanwen, jau matu padanyamanunbunan. <sup>9</sup> Ja inun, yudabu nuitapai taeaitianan, detenamei kakaibu ninkabiai e iki jawa dateyamaxankanwen, jaskaibutian en juamakidan— iwanan, <sup>10</sup> ana jatu yuikin: —Ja yudabu nuitapaibutianan, nawa betsapa nawa betsabube detenameaibun <sup>11</sup> mai pacha sakua akeakeaya piti jayama buni teneaibun isin betsapa mae tibi anuxun tenea akeakeaibun nai anua jawen unanti mese jaska taxnisma uiainbun janu en judiamai xanaii.

<sup>12</sup> Jakia na dasibi eskaxanai idiamaken man ea chibankubainaibuwen taexun matu ichakawakin matu achitan ichati jiwe anu matu yunuabu januxun bichiti jiwe anu matu bichitan xanen ibu betsapa anu matu iyuabu jabun betsabu matu ekidi yuimaxankanikiki, man ea chibainbuwen taexunan. <sup>13</sup> Matu jaska wabiabu kakape ekidi man jatu yuixanaii. <sup>14-15</sup> Man jaskaibu ean matu medabewakin jancha pe yuiti shada en matu inan jawen unanepakin ja matuki sinataibun ninkakin jawa ekidi chakabu yuama inun matu nematidubuma ixankanikiki. Jaskaken jawa dateama “¿Jadakidi yuixanpa?” ikin bebunkidi shinanyamaxankanwen.

<sup>16-17</sup> Ja inun, ea chibankin man ekidi yusinkubainaibu yuda midimabun matu danain janubi matun ibubu inun matun betsabu inun matun puibu inun matunabu betsabu inun matun jaibuabun matu danankin jabun nawabu matu achimaxun betsabu matu jatidi tenanmaxankanikiki. <sup>18</sup> Matu jaska wabiaibun Dios matu jakimamajaida ixanikiki. Matu jaska waibuwen

nuiyamaxanwen. <sup>19</sup> Ja inun, tsuabunda ea chibain chintuanmawen taexun janu kupititian en matu piskumaxanaii, matu kupiamadan.

<sup>20</sup> Ana betsadan, nawa soldadobu Jerusalén mae kexebaunabu uinkin jawaida jatu yamawaxanaibu man unanxanaii. <sup>21-22</sup> Ja inun, Diosun jancha yuixunikabun Diosun Jerusalén kupixanaikidi kenenibu samama keyunun badiyuai unain Judea anuabu mati keyatapa anu jau paxaxanunbunwen. Ja inun, Jerusalén anuabu jau taxnidiaibainxanunbunwen. Ja inun, bai anu dayaibu jatun jiwe anu ana beama jau paxadiaxanunbunwen. <sup>23</sup> Nukun maewan jidabi anuabu yumainbutianan Dios danainbu jatuki sinatakin Dio- sun jatu kipiaya betsapa teneaibun tuyabu inun ja jatun bake chuchu amamisbudan, nuitapajaidaxankanikiki. <sup>24</sup> Ja inun, detenamekin nupe chaipawen betsabu detekin jatidi tenantan betsabu achixun tsuma waxun mai pakea betsapa betsapa anu jatu iyuaibun Diosun nawa kushipabu jatu nemakin yamawadiama jabun Jerusalén anuabu ichakawaxankanikiki— iwanan,

*Nukun Juchi Kayabi Iyua juidan, eskakidanun badikiaki, na janchadan  
(Mt 24.29-35, 42-44; Mr 13.24-37)*

<sup>25-26</sup> Jesúsun jatu yuikubainkin

—Januxun Diosun badi inun uxe inun bishi betsapa taxnimatanaya mai anu nawa xukua tibi jiwea akeabu jaskai tsuan ninkaisma betsajaidai ia-nenwan tunkax ikaiwen date paepai unanyamasi jawa dabanan ninkai mese chakayamaibun jabatiandi nai anua betsapa nai chuduankin taka taka akaya ja yudabun shinain: “Ma nuku yamawaikiki”, ixankanikiki. <sup>27</sup> Ja jaskaibun en matun Juchi Kayabi Iyua xanen ibui kushipajaidai chaxajaida nai anua nai kuin medanua en juai uinxankanikiki. <sup>28</sup> Jaskai taeaya man jawawen ana jawa teneama samama en matu pepawen jiwemayuai unantun benimajaidai naiudi teskantan uinkin ea bechixankanwen— iwanan,

<sup>29</sup> miyuiwen jawen unanti jatu yusinkin:

—Jiwen man unantidubukidi matu yusinun ninkakanwen. <sup>30</sup> Ja ji mebi jawen pei petakatan ana pei bena jui metubistan peiai uinkin ma badi kemai man unanmis <sup>31</sup> keskai jawada en matu yuixu ikai bechitan en samama xanen ibui juai man unanxanaii. <sup>32</sup> Ja inun, yudabu dasibi jiwebaunabu yama-diabuma chanima dasibi en matu yuixu jaskai taexankanikiki. <sup>33</sup> Jakia jabi-askadiai nai anua inun mai anua Diosun damiwani jabu keyuxankanikiki. Jakia en janchawen bebunkidi en matu yusiainan, binuama menepakex-anikiki.

<sup>34-35</sup> Jaska tibi kainxanaiwen taea matun jointinin kemu betsapa betsapa mekin kaneama uindaxankanwen. Jawada chakabu aki jointi kushiya-maxankanwen. Eskaidan, paeanwen inun jawada matumebi man jaska shinainwens besti dabanan iki jointi nishmayamakubainxankanwen. Man jaskai jiweabun yudabu mai jidabi anu en jatu unanti watanun ika juaya bidun medan jikitan kebenmana keskama Diosunabu man paxaxanaii. <sup>36</sup> Jamen matunan, en jancha chibankin jeneama Diosbe badi tibi janchakubainxankanwen. Jaska mese tibi taxnixanai binutan man ma pewen taea janu matun Juchi Kayabi Iyua en matuki nukuaitian ea be bun man mapuxankanaii— jatu wanikiaki.

<sup>37</sup> Januxun badidi Templo jemaintin anuxun Jesúsun jatu yusinkubaini meshu medan tibi Jerusalén anua kainkaini Olivos Mati anu uxatantanaya

<sup>38</sup> Jesúsun jancha ninkanun ika yudan kaian penaya bestentan Templo jemaintin anu jaki nukui ichabidanbidanibukiaki.

## 22

*Jesús achinun ika yubakanibukiaki, na janchadan  
(Mt 26.1-5, 14-16; Mr 14.1-2, 10-11; Jn 11.45-53)*

<sup>1</sup> Ja Pascuatianan, Egipto anuxun Diosun yunua debuwanika nai tsuman nawan bakebu tenankin judiobun xenipabu dunkebaini shinamatianan, uxu dabe ma kemai misi xaxama pimisbu ma kemaya <sup>2</sup> jawenabu Diosbe janchaxunika xanen ibubu inun Diosun jancha kenenibu yusinanamisbun jaska waxun Jesús padanxun june achitan tenankatsi yubakai yuinamei yuda ichapabun Jesús ninkamisbuki ika mesei dateaibun

<sup>3</sup> janua Jesúsun 12 tsumabu betsa Judas Iscariote Satanás jawen juintiki jikia jawen jaibuaibu dapaxkabain <sup>4</sup> Diosbe jawenabu janchaxunikabu xanen ibubu inun jabun Templo mekenika xanen ibubube janchai kaxun jaska watan Jesús jatu achimaxanun ika jatube yubakaya <sup>5</sup> jabu benimakin yuikin: “Nun mia pei inanxanaii”, akabu <sup>6</sup> Judas jukin “¿Jatian janixun en Jesús jatu june achimatidumen?” ikin shinankin taewabidanikiaki.

*Badi kaya jawen tsumabubetan pikin Jesúsun jatu yuba bena wanikiaki, na janchadan*

*(Mt 26.17-29; Mr 14.12-25; Jn 13.21-30; 1 Co 11.23-26)*

<sup>7</sup> Ja badi Pascua besi taemisbutian ja dukun chaxuhan bake tesenxun taewamisbutian jabianudi misi xaxama pikubainmisbutian <sup>8</sup> Jesúsun Pedro inun Juan nichinkin yuikin:

—Ja Pascua shinanti nukun piti pewatankanwen— aka <sup>9</sup> yukakin:

—¿Jani kaxun bawakin pewatanpa?— akabu <sup>10</sup> Jesúsun jatu yuikin:

—Bui Jerusalén mae anu jikitán jabianudi juni betsán unpax shumuwanki iabidanai jaki nukutan chibancantankanwen. Man chibancaina janu jikiai uintan <sup>11</sup> ja jiwe ibu yukakin eska watankanwen: “Nukun yusinan nuku yuixudan, ¿mia yukapa? ¿Jadatu dintu anuxun en tsumabubetan nukun Pascua shinamati piti pipa?” man wa <sup>12</sup> januxun dintu ewapa manaundi ma pewa matu uinma januxun nukun piti bawakin pewayutankanwen— jatu wa

<sup>13</sup> jawen tsuma dabe kainbaini Jerusalén mae anu jikitán jaska Jesúsun jatu yuixu keska ja juniki nukutan chibancaini jabe kaxun jiwe ibu yukatan januxun Pascua besikin piti bawa menetan butani

<sup>14</sup>badi kai meshuaya Jesús jawen 12 tsuma kushipayabube jui jikitán tapu dapi dakai baxti ibainbainxun piaibun <sup>15</sup> Jesúsun jatu yuikin:

—En mawadiama na Pascua shinanti matubetan pikatsis ikin en manakubainshinaki. <sup>16</sup> Chanima Dios danainbu juxun en yamawakin keyudiama en ana jabiaskadi piama ixanaii. Jakia Dios xabakabi xanen ibuaya en matubetan ana pixanaii— jatu watan

<sup>17-18</sup> jawen Pascua piti keyukin jawen kencha tsumaxun Dios kenwantan yuikin:

—Chanima en matu yuiaii. En Epa Diosbe xanen ibui en ana judiama na uva vino en ana matubetan ayuama ixanaii. Abaunkanwen— jatu watan

<sup>19</sup> Pascua piti jawen jenekin jatu pima keyutan januxun shinamati bena wakin misi betsa bixun Dios kenwantan namakis tunketan jatu inankin yuikin:

—Na misidan, en matu mawaxunxanai shinanti en yuda keskaki. Ea shinabetanan man pixanai ikis pikin taewakanwen— jatu wa

<sup>20</sup> bitan tudexun pikubaunaibun jabiaskadi wakin kencha vino mata tsumaxun yuikin:

—Yuda ichapabu matu medabewai mawakin en jimi en matu jabaxunxanaii. Na vino en jimi keskaki. Jawen yubaka bena shinanmatiki. Ea shinanbetanan, man axanai ikis akin taewabaunkanwen—iwanan,

<sup>21</sup> ana jatu yuikin: —Jamen matu bestichaitun na man ebetan piaibunan man ea jatu achimai kaii. <sup>22</sup> Jaska ekidi kenenibudan, matun Juchi Kayabi Iyua en jaskai mawaxanaii. Jakia ja junin ea jatu achimai kaidan, peidaxawan!—jatu waya

<sup>23</sup> yuinamei yuka idabebaunkin yuikin:

—¿Eamen, en jatu amaxanaitsa? —iake iakei keyutan

### *Jaskatan jatu binutikidi Jesúsun jatu yusinikiaki, na janchadan*

<sup>24</sup> janua jawen tsumabu yuinamekin yuikin: “¿Jesúsbe xanen ibui jadatu kaya nun binunananin kai?” ikaibu <sup>25</sup> Jesúsun ninkatan jatu shinan betsawamakin yuikin:

—Nawa xukua tibi xanen ibubun jawenabu jatu bika tenemakin yunu chakayamabiakin jawenabu jatu kenwanmakin yuimakin: “Min xanen ibu pepaki”, jatu amamisbu, ichakawabia pepawanikapainun ikadan. <sup>26</sup> Jakia matunan, jaska jatu wayamaxankanwen. Jatu keskama eska shi-nankubainxankanwen, matubunan. Tsuada juni ewabia bedunan jawa yuiama yunuabu besti chibankin amisbu keskakin matunabu betsabu man binuxanaii. Ja inun, tsuanda jatu yunubiakin matunabu betsabu jatu duawakubainxankanwen. <sup>27</sup> Eska yudabun uinkin shinanmisbuki. Na baxti ika dakaxun pimisbu xanen ibuki. Jamen jatun jatu pimakin duawaidan, xanen ibumaki, iwanan, shinanmisbuki. Jamen eanan, matu anuxun matu tapinmanun ixun en matu bestibu duawakin uinmakubainaii. Jaska keskakin jadatutunda ea chibankin betsabu man binuai man unantiduki—iwanan,

<sup>28</sup> ana jatu yuikin:

—Nukunabun ea unanti wakin betsapa ea tenemabiaibun man ea jeneama ikunkainaii. <sup>29-30</sup> Jaska man bika tenekubainshinawen taexun ebetan pikin jawen xanen ibu jaki tsauti ea dapi tsauxun Israelin 12 bakebun baba xukuabu tibi jau man jatu unanti watan mekexanunbun jaska en Epan ea yunua en jabe xanen ibumis keskakin ebe en matu xanen ibumaxanaii—iwanan,

### *Pedro jaki dakei mesei kaikidi Jesúsun yuinikiaki, na janchadan*

(Mt 26.31-35; Mr 14.27-31; Jn 13.36-38)

<sup>31</sup> Simón Pedro besti Jesúsun yuikin:

—Simóon, Simóon, jawena matu wakatsis ikin xekiwan xaka tamisbu keska wakin matu unanti wanun, iwanan, Satanásan Epa Dios ma yukashinaki. Uindawe. <sup>32</sup> Jabiaskabiaken ea chibain jau min uinti babuyamanun eandi Epa Dios ma en mia yukaxunshinaki. Mia jaska wa kanebiatan ana ea chiban taewakin ikunwain betsabu jau chintunyamanunbun jatu kushipa wakin medabewakubainxanwen—aka

<sup>33</sup> Simón Pedron shinan pewama yuikin:

—Yusinaan, jaskamaki. Mibe kai bichiti jiwe anu ka kasmal janu min mawai anu en mibe kaii, jawa dateamadan—aka

<sup>34</sup> jaska waya Jesúsun nemakin:

—Pedroon, min jaskamaki. Na jabia meshu medan pena kemaya takada keudiama yuikin: “En ja unanmaki”, iki chanima dabe inun bestiki min eki dakekin yui kaii—atan,

*Jesúsun jawen tsumabu jenebainkatsi mapui jau jaskaxanunbun jatu yu-nunikiaki, na janchadan*

<sup>35</sup> januxun Jesúsun jawen tsumabu yunua butanimabu jatu yukakin:  
—Man yusintanunbun peiuma inun kapankaunma inun tae pewetametia  
benauma en matu nichian man katanimadan, ¿jawa man yupaimamen?—  
jatu wa jabu kemakin:

—Jaskamajaidaki. Dasibi nun jayaimaki— ikaibun

<sup>36</sup> Jesúsun ana jatu yuikin:

—Natianan, matu ana nichinti en betsa waii. Tsuada man pei jaya bux-  
ankanwen. Tsuada man piti jaya buxankanwen. Tsuada man jawen dete-  
nameti jayamadan, matun dakukuti betsa inananantan jawen detenameti  
bixankanwen. <sup>37</sup> Na eska en matuki chaniaidan, jaska ea wakin binumama  
menexanaibu Isaíasin kenekin yuikin: “Juni chakabu yuibaunxankani-  
kiki”, ani chanima ekidi keneni dasibi betsa texewama ea axankani-  
kiki, ewen menekinan— jatu wa

<sup>38</sup> jawen tsumabun yuikin:

—Xanen Ibuun, nun ma dabe jayaki, jawen detenametidan— aka jatu  
yuikin:

—Peki. Ana jadakidi matu yuitimaki —Jesúsun jatu watan

*Getsemaní anu ka Jesús Diosbe janchanikiaki, na janchadan*

(Mt 26.36-46; Mr 14.32-42)

<sup>39</sup> Jerusalén anua kainkainkin jawen tsumabu iyui janu kamis anu Olivos  
Mati mapetan <sup>40</sup> januxun jatu yuikin:

—Matuki chakabu jikiaya man kaneyamanunbun Diosun jau matu med-  
abewanun uxama jabe janchakanwen— jatu watan

<sup>41</sup> jatu jenebaini kai tsuanda jatixun tin ikimenkain ixun mishki tude  
putabu kai tin imistixun Jesús ka danti itan jawen Epa yukakin <sup>42</sup> yuikin:

—Epaan, jamapai dasibi min atidu en unaiin. En mawayamanun min  
nematiidubia en shinain keska ea akama min shinanen besti ea axanwen—  
ikaya

<sup>43</sup> ja jaskaitian nai anua Diosun nai tsuma taxnitan medabewakin kushipa  
watushiaya <sup>44</sup> janu bika tenechakayamai mestean daka anua niskajaidai  
jimi keska tuis ikin mai mecha watan

<sup>45</sup> Diosbe janchai menetan benikidan jawen tsumabuki nukuyuxun juinti  
nishmajaidatan uxabu bechitan <sup>46</sup> Jesúsun jatu yuikin:

—¿Jaskai man uxamen? Bestentan chakabu juaya man kaneyamanun  
Diosbe janchakin jau matu medabewanun yukakanwen— jatu wai

*Jesús unanmamabain achinibukiaki, na janchadan*

(Mt 26.47-56; Mr 14.43-50; Jn 18.2-11)

<sup>47</sup> Jesús jawen tsumabube jancha menediamma juni ichapabube Judas jui  
jatu bebuxunkidani Jesúski nukutushitan tantsu akaya <sup>48</sup> Jesúsun yuikin:

—Judasiin, jawen bechipaiti tantsu akaiwen unanmakin min Juchi Kayabi  
Iyua ¿min ea jatu achimai?— akaya

<sup>49</sup> Jesúsbe mapuabun jaskabidanabu unankin yukakin:

—Xanen ibuun, ¿na eskabidankanxudan, machatuwen jatu detekin  
nemapa?— ikain

<sup>50</sup> betsan jawenabu Diosbe janchaxunikabu xanen ibujaidatun tsuma  
jawen pabinki yusiudia maebain mepexpaikin paxteaya <sup>51</sup> Jesúsun nemakin  
jatu yuikin:

—Min ma axuki. Jatu jaska wayamakanwen— iwanan, jawen pabinki  
paxtea tin ika bixun patsankin Jesúsun xuxawatan <sup>52-53</sup> jawenabu Diosbe  
janchaxunikabu xanen ibubu inun jatun Templo mekenika xanen ibubu

inun mae xanen ibu bexmasbun Jesús achinun ika beabu Jesúsun jatu chitekin yuikin:

—Xaba tibi januxun Templo jemaintin anuxun en matu yusinkubainai man ea achiama ikunkainshinaki. ¿Jaskai natian yumetsu achimisbu shinain jawen deteti nupe chaipaya inun jawen kushati jiya man bekaxumen? Natian chanima chakabu dayaya ja medabewamai man ea achinun ika bekaxuki— jatu wa

*Jesúski Pedro dakekin padanikiaki, na janchadan*

(Mt 26.57-58, 69-75; Mr 14.53-54, 66-72; Jn 18.12-18, 25-27)

<sup>54</sup> ninkamas Jesús achixun jawenabu Diosbe janchaxunika xanen ibujai-datun jiwe anu iyuaibun Pedro datekin benanta chipu kakin chibankubaina

<sup>55</sup> janu xanen ibun jemaintin chi ketian yui tsubaunabube Pedro jatube tsaua june yuaya <sup>56</sup> janua ainbu dayadu juxun Pedro chin yuai uin kayati watan jatu yuikin:

—Na juni matube tsauadan, jawen tsuma betsaki— akaya

<sup>57</sup> Pedron padankin yuikin:

—Ainbuun, jamaki. En ja unanmaki— ikaya

<sup>58</sup> jakimamadi betsandi bechixun yuikin:

—Miadan, min jabia jatube uinanmandi— aka Pedron ana yuikin:

—Jaskamaki. Eadan, en jamaki— aka

<sup>59</sup> janua jakimatsais katan Pedro metukin juni betsan unanxubima ma-puabu yuikin:

—Chanima na junidan, jabe nimiski. Jabia Galilea anuabu jancha nun ninkaiii— ikai

<sup>60</sup> ninkatan Pedro datekin yuikin:

—Ja jadi min jaska yuiaidan, en unanmaki— ikaya

ja jaskaitian takada keuaya <sup>61</sup> Jesús nasaukekauan Pedro uiyanan jaska Jesúsun Pedro yuia: “Takada keudiamma yuikin: ‘En ja unanmaki’, ikin chanima dabe inun bestiki min eki dakei padanananxanaii”, aka jaska shinain

<sup>62</sup> janua Pedro taxnikain kaxachakayamaya

*Xanen ibubu Junta Suprema anu Jesús iyunibukiaki, na janchadan*

(Mt 26.59-68; Mr 14.55-65; Jn 18.19-24)

<sup>63-64</sup> jabianuxundi jabun Jesús achibidan ichakawakin besu beputan kaxe wakin kusha kusha akin yuikin:

—¿Tsuán mia kushaimenkain? Unantan nuku yuiwe— akubainkin <sup>65</sup> betsá betsapa yuikin ichakawashinkin

<sup>66</sup> janua badi chi pexeaya mae yununika xanen ibubu inun Diosbe jawenabu janchaxunika xanen ibubu inun, Diosun jancha kenenibu yusinanamisbu na Junta Suprema ichabu anu Jesús jatu iyuxunabu <sup>67</sup> jabun yukakin:

—¿Jabia min miamenkain, nukun Mesías Cristodan? Menan nuku yuidiwe— akabu Jesúsun jatu yuikin:

—“Chanima en jaki”, iwanan, en matu yuibia man ea ikunwantidu-maki. <sup>68</sup> Ja inun, jawada eandi en matu yukabia man ea yuitidubumaki.

<sup>69</sup> Jabiaskabiaken en matu yuiai ninkakanwen. Na jabiatian man ea ten-anbia Dios kushipajaida dasibi binuatun yusiudi en tsaua en matun Juchi Kayabi Iyua en jabe xanen ibukunkainxanaii— jatu wai

<sup>70</sup> ninkatan dasibibun yukakin:

—Jaskakenan, ¿jabia min Diosun bakedaka ikai?— akabu Jesúsun jatu yuikin:

—Iubis matumebi jabiadi man yuiaii— jatu wa

<sup>71</sup> janua jaki sinatai jabudi yuinamei:  
—Jawen kexawen Dios ichai jamebi chakabuikiki. Jaskai nun ninkaiwen taexun jau tenanunbunwen— itan yuinametan

## 23

*Pilato anu anu Jesús iyuxun chitenibukiaki, na janchadan*  
(Mt 27.1-2, 11-14; Mr 15.1-5; Jn 18.28-38)

<sup>1</sup> xanen ibu dasibibun jaska wakin unanti wakin menetan janua benibainkin romano gobernador Pilato anu Jesús iyuxun <sup>2</sup> jakidi chitekin Pilato yuikin:

—Na juninan, chakabu betsa betsapa jatu yusinkin nukunabu itimaska wakin jatu padainkiki. “Min xanen ibu César jau pei inanyamanunbun nukunabu jatu nemamiski”. Jabiadi “En Xanen Ibu Mesías Cristoki”, imiskiaki— akin jakidi yuiaibu

<sup>3</sup> Pilaton ninkakin Jesús uinkin yukakin:

—¿Miadan, min judio xanen ibubu binu keyuamen?— aka Jesúsun yuikin:

—Jawaikika! Jabiadi min ea yuiaii— ikaya

<sup>4</sup> januxun judiobu Diosbe jawenabu janchaxunika xanen ibubu inun yudan kaian Pilaton jatu yuikin:

—Jawa chakabu akamaki. Jawawen taexun kupiti jayamaki— jatu wabia

<sup>5</sup> Pilaton jancha ninkama jawenchains unanxubima yuikin:

—Judea anuxun jatu yusian akeakekin jatu itimaska wamiski. Galilea anuxun taewaima nenuxundi jatu yusindiaikiki— akaibu

*Herodes anudi Jesús iyuxun chitenibukiaki, na janchadan*

<sup>6</sup> jaska yuiaibu Pilaton ninkatan jatu yukakin: “Aa, ja junidan, ¿Galilea anuadaka?” ikaya <sup>7</sup> “Jaa, Galilea anuaki”, akabu Pilaton tapintan ja Galilea xanen ibu Herodes na jibia mae Jerusalén anu bai jushinken jawen soldadobu yunukin xanen ibu Herodes anu Pilaton Jesús jatu yunua iyuabu <sup>8</sup> jaska Jesúsun jamapai damiwakin betsa betsapa wai kakai Herodesin ninkamis jaska jawen bedubi dami betsa axuain uinun ixun manajaidamis atimas Jesús uin xanen ibu Herodes benimajaidakin <sup>9</sup> jaska wamis keska yuka chakayamabiaya Jesúsun jawa yuiamajaidaken <sup>10</sup> jabianudi Diosbe jawenabu janchaxunika xanen ibubu inun Diosun janchakenenibu yusinanamisbun Herodes yuidiakin jakidi Jesús chitekin ja akeakeaibun <sup>11</sup> Jesúsun jawa ja yukaikidi jatube janchama kutaxna niken jawen soldadobubetan Herodesin Jesús ichakawakin kaxe wakin betsa betsapa watan xanen ibu keska wakin sanpu jawendua sawematan jawawen jaska watima ana jawendi Herodesin Pilato anu Jesús yunua iyuabu

<sup>12</sup> romano xanen ibu Pilato inun judio xanen ibu Herodes uatian sinatanamebianibu na jabiadian daenamei jaibunamei taenibukiaki.

*Pilaton Jesús jau mastanunbun jatu yununikiaki, na janchadan*  
(Mt 27.15-26; Mr 15.6-15; Jn 18.39-19.16)

<sup>13</sup> Pilato anu Jesús ana chintuanbidanabu uinkin Diosbe jawenabu janchaxunika xanen ibubu inun mae xanen ibubu inun yudan kaian Pilaton jatu ichawaxun <sup>14</sup> yuikin:

—Na juni ana ea anu iwexun matunabu padankin jatu itimaska wamis yuikin man chitexuki. Jakia dasibi man uiayan Jesús yukakin unanti wakin jawa chakabuwakin meshina en bechiamaki. <sup>15</sup> Januxundi jau Herodesin unanti watan jaskada wanun, iwanan, en yunua unanti wakin

jawa chakabuwashina bechiamadi ea anu Herodesin ana yunuxuki. Jawa jaskashinawen taexun jau tenanunbun en yunutidumaki. <sup>16</sup> Jaskaken kusha kusha a bestitan jau jawama kanun en jatu yunuaii— ikyak

<sup>17-19</sup> badi tibi Pascua besiaibutian romano soldadobun jatu achixun bichimabu jau bestichai taxnimanunbun yudabun katua romano xanen ibun jatu kainmaxunpakemisken jabatiandi juni betsa Barrabás juni betsabube detenamekin jatun xanen ibu detepaikin jatubetan juni betsabu tenanken jabube achixun bichimabun ja shinankin januxun yudan kaianen unanxubima yuikin:

—Jau Jesús tenanunbun yunuwe. Jaska watan Barrabás kainmatan nuku nichinxunwen— ikaibun <sup>20</sup> Pilato Jesúswen nuikin jawa wama nichinkatsis ikin ana jatu yuikin:

—Jaskamaki. ¿Matun xanen ibu Jesús matu kainmaxunpa?— jatu wabia <sup>21</sup> ninkakatsi ikama unanxubimajaida ana yunukin:

—Cruzki jatu mastamawe! Cruzki jatu mastamawe!— akeakeabu

<sup>22</sup> Pilaton ana jatu nemanun, iwanan, yuikin:

—¿Jawa chakabuwashinamen? Jau tenanunbun unanti wakin jawada chakabuwashina en bechiamaki. Jatu kusha kusha ama bestitan en jenekatis ikaii, jau jawama kanunan— jatu wabia

<sup>23</sup> ninkamas yuda ichapabun unanxubima ana yuikin:

—Cruzki nuku mastaxunwen— akin jaska shinainbu keska jau jatu axunun yunukin jeneabumaken <sup>24-25</sup> atimas jaska shinainbu keska jau jatu axununbun jawen soldadobu Pilaton yunutan ja juni Barrabás detenameawen taexun bichimabu yudabun katua kainmatan januxun Jesús jau mastata-nunbun jatu yununiaki.

*Cruzki Jesús mastanibukiaki, na janchadan  
(Mt 27.32-44; Mr 15.21-32; Jn 19.17-27)*

<sup>26</sup> Januxun romano soldadobun cruz Jesús jaki mastanun, iwanan, iam-abainkin iyukin juni betsa Simón Cirene anua ewani Jerusalén anu jikiai achixun jau Jesúsun cruz iaxunbainun yunuabu Jesús bebuaya <sup>27</sup> yuda ichapabun Jesús chibanaibun ainbuaibu jawen nui kaxai bis ikubainaibu <sup>28-31</sup> Jesúsun jatu uinkin yuikin:

—Jerusalén anua ainbuaibuun, ewen nui kaxayamakanwen. Jakia janu nuitapaibutian nenuabun yuikin: “Ainbun jabun bake bisbuma besti benimaxankanikiki”, ikaibun januxun yuda ichapabun jabun chakabuwen datekin mawa yuikin: “Nukuki matekei di ikin nuku junewe”, axankanikiki. Jaska inun, ea en jawa wama nibiaken ea ichakawakanikiki. Jamen jabun ea ichakawaibu Diosun jabudi ichakawa chakayamadiakin jatu kupijaidanaxikanikiki. Jaskawen taea ana ewen nui kaxama matumebi inun matun bake-buwen taea nui kaxakanwen— jatu wabainaya

<sup>32</sup> janua juni yumetsu dabe Jesúsbe tenanun, iwanan, iyui <sup>33</sup> Buxka Xau Mati anu mapematan Jesús cruzki mastatan januxun juni yumetsu dabedi jabianudi jabe mastakin betsa jawen yusiudi betsa jawen yusmaudi mastaxun nichinkin <sup>34</sup> meneabun soldadobukidi Jesúsun yuikin:

—Epaan, ea jaska waibudan, jawa jatu kupiyamawe, jawa unanma iki ikanikikidan— ikaya januxun soldadobun jawen beyustiwen maemanankin jawen tadi paxkanun iwanan: “¿Tsuán dukun jawen tadi bimenkain? Akan-wen”, ikaibun <sup>35</sup> jabianudi xanen ibubu inun yuda ichapabun uinkin kaxe wakin yuikin:

—Juni betsabu medabewamiski. Jamebidi jau paxadianunwen. Jaska Diosun Katua Mesías kayamenkain cruz anua na jabiatian butuai uinkin nun ikunwantiduki— ikaibun

<sup>36-38</sup> ji bexa sapaki kenekin: “Nadan, judiobun xanen ibujaidaki”, akin kenea Jesús mamaki mastaxun soldadobun chaima ja dapixun kaxe wakin vino jene muka amapaikin yuikin:

—¿Min judio xanen ibu kayabimenkain? Nuku unanmai mimebi paxai butudikaintanwen— adiaibun

<sup>39</sup> janua yumetsu dabe jabe mastabudi betsaa jancha chakabukin yuikin:  
—¿Min Diosun Mesías Cristomenkain? Mimebi bututan nukudi butediwe, nun paxanunan— akaya

<sup>40-41</sup> janua betsan kunyan akin nemakin yuikin:

—Nukunan, nun chakabuwashinawen taexun achixun ichakawakin nuku tenankanikiki. Jakia na juni pepatun jawa chakabuwaismabiaken ichakawakin nukube tenandiakanikiki. ¿Dioski meseama na juni pepa min jatubetans jaska wai? Ana jaska yuiyamawe— iwanan, <sup>42</sup> jawen chakabuwen datekin Jesús yuikin:

—Jesúsuu, min xanen ibui taeaitianan, ewen nui ea jakimayamaxanwen— akaya <sup>43</sup> Jesúsun yuikin:

—Chanima en mia yuiaii. Min shinan betsaa waiwen taea na jabiatian pe besti anu ebe ka min jiwepakexanaii— ikaya

### *Jaskatan Jesús mawanikiaki, na janchadan*

(Mt 27.45-56; Mr 15.33-41; Jn 19.28-30)

<sup>44-45</sup> janua badi manananbibiaken badi nuka meshua itsa daka manaibun ma badi kai nai puchinin dakaken bepenakainaya Templo medan dintu wakin ja tadiwen kebenibu jamebi manaundia namakis dis iki keyuaya

<sup>46</sup> janua Jesús bis ikin yuikin:

—Epaan, mia anu en yushin en nichiaiin ea mekewe— akin jaska yuitan mawaya

<sup>47</sup> januxun romano soldado capitán Jesús jaskai uintan Dios kenwankin yuikin:

—Chanima na juni chakabumaki— akaya

<sup>48</sup> ja dapi yudan kaian mapubaunabun jaskaxu dasibibun uin jawen nui uinti nishmai xutidin xutidin ibainaibun <sup>49</sup> janua jatidi Jesúsun jaibuaibu inun ainbuai Galilea anua jabe beshianbudi benanta nixun jaskai uinibukiaki.

### *Jesús cruzkia mawa butebain maiwanibukiaki, na janchadan*

(Mt 27.57-61; Mr 15.42-47; Jn 19.38-42)

<sup>50-54</sup> Janua ma badi kaya jabatiandi judiobu juindukunkatsi bebunkidi piti pewakin dasibi menea badi jikiaya ana dayatidubumawen taea janu Judea anua José jawen mae Arimatea anua ewai yumeni, juni pepa inun duapatun Dios xanen ibuxanaitian manakin judio xanen ibubiakin jau Jesús tenanunbun xanen ibu betsabube Junta Suprema jatube ja yubakama ishian José romano xanen ibu Pilato anu kaxun Jesús maiwatanun ixun jawen yuda yukai kaxun yuka yunua ma juindukunti kemaiwen taea jawaida kaxun cruz anua jawen jaibubetan Jesúsun yuda jatu butemaxun tadi chaipa juxupawen dayabutan buxun maiwati mishki tanpe bena kini waimabu anu janu yuda betsaa datandiabuma anu José jawen jaibuaibubetan Jesúsun yuda datantan mishki ewapawen bepubainaibun <sup>55</sup> janua ainbuai Galilea anua Jesúsbe beshianbun Jesúsun yuda buai buai chibancaini maiwati tanpe inun jaska Jesúsun yuda datantan bepubainaibu uintan <sup>56</sup> jadia Jerusalén anu

chintunbain jatun jiwe anu jikixun xeni ininipa pepa inun jawen dapuxti dau betsa jawen yuda taxka wakin chaputima wati dau pewakin meneabun ma badi jikiaya juindukuntianken jaska Diosun Moisés yununi shinain ainbuaibu juindukunkin manabaishina

## 24

*Jesús maiwashinabu bestenkaina benanibukiaki, na janchadan  
(Mt 28.1-10; Mr 16.1-8; Jn 20.1-10)*

<sup>1</sup> janua ma juindukunti binushinken domingotian penamajaida maiwati tanpe anu bukatsi jawen dapuxti xeni ma pewashinabu buaibun ainbu betsabudi jatu chibain jatube bui <sup>2</sup> kematan ja mishki beputi ewapajaida tsuanda ma tadanbu bechitan <sup>3</sup> jikikain Xanen Ibu Jesúsun yuda jawa bechiama <sup>4</sup> jani tsuan jaskada washina unanma janua e iki keyutan uiainbun jabianudi jawaida juni dabe jatu bebun taxnia tadi juxupa chaxajaida sawea bechitan <sup>5</sup> jaska uin datejaidai main beui beti ikaibun juni dabetan jatu yuikin:

—¿Jaskakin maiwati medan juni jiwea man benakanai? <sup>6-7</sup> Nenumaki. Ma bestenkainaki. Galilea anuxun matu yusinkin yuikin: “Eadan, Matun Juchi Kayabi Iyua juni chakabun ea achixun jiki ea mastabu mawa xaba dabe inun besti kaya en ana bestenxanaii, jaska Diosun yubanidan”, akin matu yusinkin yuimadan, ¿man shinanmamen? Shinankanwen— jatu wa

<sup>8</sup> jaska Jesúsun jatu yuima chanima shinantan <sup>9-10</sup> maiwati tanpe anua kainbaini María Magdalena inun, Juana inun, Santiagon ewa María inun, ainbu betsabu jabun kaka buxun Jesúsun 11 tsuma kushipabu inun jabun Jesúsun chibanmis betsabu jaska uinkanxu jatu yuibiabu <sup>11</sup> jatun jancha jawa ikunwanma: “Jaskatandun jaskanun jumei ikanikanikiki”, ikaibun

<sup>12</sup> janua Pedro jadi chaniaibun ninkatan: “Eandi uintanun”, ika taxnikaini maiwati tanpe anu kushikain uinun ika kakui denikain uke medan uinkin jawen yabushinabu tadi jamaudi daka uintan jaska uin e iki teku itan Pedron jaskashina shinain shinanyabi kaya

*Emaús maekidi bai tanabainaibu Jesúsun jatuki nukunikiaki, na janchadan  
(Mr 16.12-13)*

<sup>13</sup> janua Jerusalén anua bui 11 kilómetro mae betsa jawen kena Emaús anu jabias xabatian Jesúsun tsuma betsabu dabe bui <sup>14</sup> jaska wa akeaketan tenanshinabu bestenkainakidi janchai <sup>15</sup> yuinamekubainaibun jabiatiandi Jesúsun jatu ichun taxnitan kakin jatu chibain kai jatuki nukukainaya <sup>16</sup> jau unanyamanunbun Diosun jatun bedu betsa wa <sup>17</sup> januxun Jesúsun jatu yukakin:

—Bai tanabidanidan, ¿jawa yui man ikubainkanai?— jatu wakin ana jatu nui chipea nuiyabi buaibun <sup>18</sup> januxun jabu betsa Cleofásin yuikin:

—Jerusalén anua jaska dasibi washinabu dasibibun unankanikiki. Jerusalén anu bai jubiashina ¿jaskakin mian besti min jaska uianma ishianmen?— aka

<sup>19</sup> januxun jatu yukakin:

—¿Jaskashinamen? Ea yuiwe— aka ana yuikin:

—Jesús Nazaret anua ewani ichakawakin eskaya tenanshinabuki. Mia yuinun ninkawe. Diosun jancha yuixunika pepajaida eskakin Dios inun yuda ichapabu jawen aka uinmakin daya duapa inun jancha kushipai unanepai <sup>20</sup> pepajaidabiaken jau tenanunbun Diosbe nukunabu janchaxunika xanen ibubu inun nukun mae xanen ibu betsabun nawabu anu Jesúsun yunuabu cruzki jatu mastamabu mawashinaki. <sup>21</sup> Ja inun, Jesúsun nawabu

nichinkin Israelbu nuku pe mekekin Dios nuku daewaxunxanai dabanen nun jamen dasibi manakakubainshinaki. Ja inun, ma xaba dabe inun besti binubiakainaya nun jawa uindiamaki. <sup>22-23</sup> Jaska inun, nukubetan jabun Jesús chibandiamisbu ainbuaibu penamajaida maiwati tanpe anu buxun Jesúsun yuda jawa uianma nai tsuma dabe jatu bechankamea nia uiainbu jatu yuikin: “Jesús jiweaki”, jatu wa bexunkiaki. Jaska nuku yuiabu datei nuku dateabu e itan nun ninkaki. <sup>24</sup> Jaska nukuki chaniaibun nukun jaibu betsabudi maiwati tanpe anu buxun jaska ainbuaibun yuixu keska uinkin jawa Jesús uianma idiakanxukiaki—aka

<sup>25</sup> janua Jesúsbe janchai unandiabuma Jesúsun jatu yuikin:

—Diosun jancha yuixunikabun medabenan Mesías Cristokidi kenenibu unanbiakin unanxubida ikun bexmas wakin shinan pewadiama man kaneaii. <sup>26</sup> Nukun medabenan Mesías xanen ibudiamma jau jaskai yumain kanun Epa Diosun yununiki—iwanan, <sup>27</sup> Diosun Moisés yusian keneniwén jatu yusin taewakin Diosun jancha yuixunikabu dasibibun yusian janchawendi Jesúsun jatu yusinkin jatu unanmakubainaya

<sup>28</sup> Emaúski kemai buaibun jatu binubainai dabanen <sup>29</sup> nemakin yuikin:

—Ma badi kai meshuikiki. Jabianu nukube niti iyuwe—akabu ninkatan jabianu jatube bashikui niti itan <sup>30</sup> jabianuxun jatubetan pinun ika baxti itan misi bixun piti jayabuwen taexun Dios kenwantan tunkexun jatu inanyan <sup>31</sup> jabiatiandi Diosun jatun bedu ana betsawaya Jesús uinkin unantanaibuns samama ana damikainaya <sup>32</sup> ja dabetan shinaín yuinamekim:

—Bai tanabidankin Diosun jancha yuixunikabun yusini nuku unanmakin nuku yusianyan nun juinti shinanchankunkidanki, ¿chanimamen?—iki yuinametan <sup>33</sup> ma meshubiaken ana janu ikatsi ikama benibidani Jerusalén anu jawaida chintunbain Jesúsun 11 tsuma kushipayabu inun jatube jawen tsumabu betsabu ichabu anu jatu anu jikitushitan <sup>34</sup> januxun jabu ichapabu yuikin:

—Chanima ma besteanki, nukun Xanen Ibudan, ja Simón Pedroki nukukin uinmaxudan—iwanan, yui jatuki chaniaya

<sup>35</sup> januxun jaska Jesús unandiamabia bai tanabainkin Jesúsun ja dabe jatube kakin yusinxu yuitan januxun misi tunkexun jatu inain anu atimas xabakabi uinbidan jatu yuaibun

*Jesús bestenkaina jawen tsumabuki nukunikiaki, na janchadan  
(Mt 28.16-20; Mr 16.14-18; Jn 20.19-23)*

<sup>36</sup> jaskaxu yui menediamma janchan wainbun Jesús jawaida dami nashui itan jatu jancha wakin yuikin:

—¿Jaska man unanumamen? Ma en juaki. Dateyamakanwen—jatu wabia <sup>37</sup> datekin shinankin yuikin: “Nadan, ¿yushinmenkain?” ikin uinkin shinainbun <sup>38</sup> Jesúsun ana jatu yuikin:

—¿Jaskai mesei datei man e ikanai? ¿Man juinti kushimen?—iwanan, <sup>39-40</sup> jawen meken inun jawen tae jatu uinmakin yuikin:

—En tae inun en meken uinkanwen, jibia en eakidan. Nami inun xau en jaya keska yushin jayaismaki. Mekin ea unankanwen—jatu wa <sup>41</sup> shinanchankanbiai bika tenekin ikunjaidawadiabumawen taexun Jesúsun ana jatu yukakin:

—¿Piti man jayamen? Ea inankanwen—jatu wa <sup>42</sup> baka xui inanbu <sup>43</sup> jatun bedubi pitan <sup>44</sup> yuikin:

—“Moisin yusini jancha inun Diosun jancha yuixunika betsabun yusini jancha inun Davidin jawen nawakin kenwanti jancha Salmoswen Dios yubakaniki, jau dasibi jaskaxanunan”, iwanan, yuinibu en mawadiama

matu anuxun jabiaskadi matu yusinkin dasibi ekidi na kenenibu bebunkidi en matu yuikubainimaki— iwanan,

<sup>45</sup> ja kenenibu una jau ninka pewanunbun <sup>46</sup> jatu yuikin:

—Ekidi kenenibu matu yuinun ninkakanwen. Diosun Katua Mesías medabenan yumantan mawa xaba dabe inun besti kaya ana bestenx-anikiki. <sup>47</sup> Jaskawen taexun jawen kushipawen jatu yusinxankanikiki, jau jatun chakabu Dioskidi chakabumisbu jau jenetan jabun shinan betsa waibu Diosun buaxunxanikiki. Nawa xukua tibi ninkaxanaibu yuini matun Jerusalén anuxun taewakin <sup>48</sup> na kakape ekidi chanibaunxankan-wen. <sup>49</sup> Jaska en Epan ea yununi keska wakin eandi en matudi yunuaii. Diosun jawen janchati kushipa datetima en matu yunuxanai binun ika na jibia Jerusalén anu jiweyuxun manakayukanwen. Diosun jawen kushipa nai anua matu inan bitan nawa dasibibu yusinkin taewaxankanwen— jatu watan

*Jesús jawen tsumabun bedubi Diosun aininikiaki, na janchadan  
(Mr 16.19-20)*

<sup>50</sup> jaskakunkainkin xaba betsation Jerusalén anua kainkaini Betania anu Jesús kakin jawen tsumabu iyuxun jawen meken sananxun jau Diosun jatu duawakubainxanun jatu yukaxunaya <sup>51</sup> jabu jenemabainkin nai anu jawen Epan ainiaya <sup>52</sup> jatu jenebainai uin jawen tsumabun teskanbainbainxun Jesús kenwantan benimajaidai Jerusalén anu ana chintunbidan <sup>53</sup> Diosun ku-shipa manakakin xaba tibi jawen Templo anuxun Dios kenwankubainbuki-aki.

Jatiski, Teófiloon, na kakape en mia kene keyuxunxudan.

Lucas

## KAKAPE JUANEN KENENIKIAKI JUAN

*Diosun jancha jawen Shinain Janchati yuda kayabi kainikiaki, na janchadan*

<sup>1</sup> Bawakin taewadiama Diosun Shinain Janchati Epa Diosbe jiwea jabiaska dabes Dios ipaunibukiaki, niti ikamadan. Jakidi matu yuinun ninkakanwen.

<sup>2-3</sup> Bai taei yuda jayadiama jabias jawen Shinain Janchati Diosbe yubakatan jabetan dasibi damiwakin keyunikiaki. Dasibi damiwakin jabe paxkama jiwea jauma Diosun jawa wadiama jakia jawen Shinain Janchatibetan dasibi betsa betsapa damiwanun ixun damiwakin keyunibukiaki. <sup>4</sup> Jaska inun, jawen Shinain Janchati xaba keskatun chanima jancha jiwekuiankidi jatu shinanmai <sup>5</sup> jubiaken chakabu shinankin yudabu meshu medan nia keskabun chanima jancha ninkakatsi ikama ja xaba jiwemanika bextekin nemanun ibiakin atidubuma inibukiaki.

<sup>6</sup> Janua jawen Shinain Janchatin yusinkin taewadiama juni betsa jawen kena Juan Diosun yunua <sup>7</sup> jawen Shinain Janchatikidi jau dasibibun ninkakin ikunwanxanunbun bebunkidi jatu yui juniki, Juanan. <sup>8</sup> Jaskawen taea Juanan, Diosun Shinain Janchatimaki. Jakia ja chanima jancha jakidi jau jatu yusinyunun Diosun Juan yununiki.

<sup>9</sup> Januxun xaba keskatun jiwekuiankidi yusin jatu unanmai <sup>10</sup> mai damiwani anu juua jatube jiwea jawen yusian jabun jawen jancha ninkama jatu jawenawakin damiwabiani Diosun Shinain Janchati midimabun unanma inibuki. <sup>11</sup> Jaska inun, Diosun Shinain Janchati jawenabu anu juken jabia jawenabundi jawen jancha ninkama jabun beya wama danainbun <sup>12</sup> jakia jatiditun jawen jancha ninkatan ikunwankin beya waibun Diosun Shinain Janchatin jau Diosun bakebu iyanunbun jawen kushipa jatu inankin jatu duawakin taewaniki. <sup>13</sup> Jaska inun, Diosun jawen bakebu jatu pepa wakinan, chutakin akama inun yudabun shinanwen akama jakia Diosun jawen kushipawen besti jawen bakebu wakin jatu jiwekuinmakin taewaniki. <sup>14</sup> Janua jawen Shinain Janchati yuda kayabi jayanun ika ainbu medanu naneima kaian Diosun bake bestichai ewatan nuku anua yumetan ewani jiwea jawen Epa Dios itsa kushipa duapajaida nun uinpauniki, nuikipa jaya inun chani chakatima jancha jayadan.

<sup>15</sup> Jaska inun, jawen Shinain Janchati Juanen Jesús unantan Juan ninkai beabu jancha kushipawen jatu yuikin:

—“Ja dukun jiweniwen taea ea kachu kainbiaimaxun ea binuyuxanikiki, xanen ibujaidakinan”, akin jaskakidi en matu yuikubainai— akin Jesúskidi Juan janchaxunkunkainiki.

<sup>16</sup> Diosun dasibi pepa nuku inantiduwen taea nukuwen nuikin nuku tibi jawen aka kushipa tibi betsa betsapa nuku inan akeakemiski, chakabu katumamadan. <sup>17</sup> Jaskawen taexun bebunkidi Diosun Moiséswen jawen jancha nun ja chibanun nuku yununiki. Jakia chanima jancha jaya inun jawen nui bechipainameti kayabi juidan, janua nun binun Jesucristowen taea besti juaki. <sup>18</sup> Ja inun, natian tsuabunda Dios uinakamabiakien jawen bake bestichai Diosbe janchanameai Dios ja keskajaidadi jawen Epabe ketaxamexun xabakabi jatun besti Dioskidi nuku unanmakubainiki.

*Nashimanika Juanen Jesúskidi pepa yuikubainikiaki, na janchadan  
(Mt 3.11-12; Mr 1.7-8; Lc 3.15-17)*

<sup>19</sup> Jaska Nashimanika Juanen Jesúskidi jatu unanmani en matu yuiai ninkakanwen. Jerusalén anuabun Juan kakaya judio mae xanen ibubun jau Juan yuka tapintanunbun Diosbe nukunabu janchaxunikabu inun Jacobun bake Levín baba betsabu jabu yunuabu Nashimanika Juan anu bexun jatun xanen ibubu yukaxunkin:

—¿Miadan, min tsuamen? ¿Min Mesías Cristomen?— akabu <sup>20</sup> jatu padanma yuikin:

—En ea Mesías Cristomaki— jatu wa

<sup>21</sup> —Min tsuadaka, Dios janchaxunika Elías kanidan, ¿min jamen?— akabu

—En jamadiki— jatu wa

—“Diosun jancha yuixunika kushipa ea keska juxanikiki”, akin Moisin yuinidan, ¿min jamenkain?— akabu

—En jamadiki— jatu wa

<sup>22</sup> —Jabun nuku yunushinabu jadi nun jatu yuitanun, miadan, min tsuamenkain nuku yuiwe, mikidi nuku yunushinabu nun jatu yuitanunan— akabu

<sup>23</sup> januxun Nashimanika Juanen jatu yuikin:

—Jaskakidi Dios janchaxunika Isaásin keneni keskadan: “Janu tsua jiwe-abumanuxun jancha kushipawen jatu yuikin: ‘Nukun Xanen Ibu nai anua matuki bayui ma kemaikiki. Matun juintinin shinan pewadikanwen, bai kayatapia keska wakinan’”, akin kenenidan, en jaki— jatu wa

<sup>24-25</sup> janu jau Juanbe janchatanunbun fariseobun jatu yunushinabun ana yuikin:

—Min Mesías Cristomadaka. Min Elíasmadaka. Min Diosun jancha yuixunika betsamadaka. ¿Jaskakenan, jawawen taexun daka min jatu nashimakubaini ikai, miki chiti ikabu jatu wakinan?— akabu

<sup>26-27</sup> januxun Jesúskidi Juanen jatu yuikin:

—Chanima jenewen besti en jatu nashimakubainaii. Jamen ea dukun en kainbianiken ja juni betsa matube jiwebia man unandiamadan, jawen kushipawen ea binujaidaki. Jaskawen taea eadan, jawen tsumapan jawen daya axunmis keska wakin en jawen jawaumajaidatun ean medabewakin jawen bichi tae mexpun tsitsauxun en pekaxuntidumaki— ikin <sup>28</sup> Jordán jene kexa betsaudi Betania anuxun Juanen jatu nashimakubaini jadia jaska janchakin yuikubainiki.

### *Jesús Diosun bakeki, akin Juanen jatu unanmanikiaki, na janchadan*

<sup>29</sup> Janua uxashini bestentan maniabun Jesús juai chaima bechitan metukin Juanen jatu yuikin:

—Uinkanwen. Dios daewakin jatun chaxuwan bake menumisbu keska wai yudabu dasibibun chakabu jatun jatu buaxunkin Dios nuku daewaxunti ma juikiki. <sup>30</sup> Jakidi jabias matu yuinun, ninkakanwen: “Ja dukun jiweni ea kachu kainbianixun ea binuxanikiki, xanen ibujaidakinan”, iwanan, en matu yuishinaki. <sup>31-34</sup> Ja inun, man Israelbun ja juni unankin man shinan betsa waxanunbun matu unanmakin jenewen nashimakin en matu taewaimaki, ja juni eandi en unandiamabiadan. Jakia ea yununitun ea xabakabi yuikin: “Ja juniki Yushin Pepa jaki butua jaki matsaume min uinx-anaidan, jabiatundi Yushin Pepawen jatu nashimaxanikiki”, ea washinken chanima ja juniki nai anua deiwan keska Diosun Yushin butua ja juni mamaki bashikuai en uinmaki. Jaskawen taexun: “Ja juni Diosun Bakeki”, akin en matu yuiaii— akin Nashimanika Juanen jatu yuitan

### *Jabu dukuntun Jesús chibankin taewanibukiaki, na janchadan*

<sup>35</sup> janua ana uxashini Nashimanika Juan jawen tsumabu betsa dabebe nixun <sup>36</sup> Jesús kauanai uinkin nuku yuikin:

—Uinkanwen. Jatun Dios sinatai daewanikaki, chaxuwan bake menumisbu keskadan— nuku wa

<sup>37</sup> ninkatan ja dabe nun Juanen tsumabia Jesús chibarbaintanun ika shinain nun kaya <sup>38</sup> niti itan dabekekaun nuku uinkin yukakin:

—¿Man jawa benayuai?— nuku wa

—Yusinaan, ¿min jani jiwea ikai?— nun wa

<sup>39</sup>—Ebe kaxun uin bukanwen!— nuku wa jabe kai janu jiwea anu nun jabe jikia ma 4:00 badi jikitushitan nun jabe janchaya <sup>40-41</sup> Nashimanika Juanen jancha ninkatan Andrésin Jesús chibarbaina jabe janchatan jawaida jawen betsa Simón Pedro yuinun ika benabaunkin bechitan yuikin:

—Mesías Cristoki nun nukuxuki. Min tsidi uin kawe— itan <sup>42</sup> januxun Jesús anu Andrésin Simón iyua januxun Jesúsun uinkin dais butan butankin yuikin:

—Miadan, min Juanen bakeki. Min Simónbiaken en mia kena dabeaya waii. Cefas wakin mia kenaxankanikiki— aniki. Cefasdan, nawan janchawenan, Pedroki. Pedrodan juni kuin janchawenan, Mishki Ewapaki.

### *Jesúsun Felipe inun Natanael katunikiaki, na janchadan*

<sup>43</sup> Ana uxashini Galilea mae pakea anu Jesús kanun ika yubakashina kai Felipeki nukutan Jesúsun yuikin:

—Tapin ebe kakunkainwen— aka

—Peki— ikaini <sup>44</sup> ja Felipen maedan, Betsaidadan, jabianudi Pedro inun Andrés jiwediaken Galilea anu nun Jesúsbe kai nun jikiken <sup>45</sup> Felipen jawen jaibu Natanael benakin jawen jiwe anu kaxun yuikin:

—Baa, mia yuinun, ea ninkawe. Jakidi Moisin inun Diosun jancha yuixunikabun kenenibudan, nun ma jaki nukushinaki, Joséñ bake Jesúsdan. Jawen mae Nazaretki— aka

<sup>46</sup> Natanaelin yuikin:

—Ja mae Nazaret anua tsua duapa taxnitidumaki— aka

—Ebe kaxun ibubis uinkin unanyuwe— atan iwea

<sup>47</sup> Natanael Felipebe juai uinkin Jesúsun nuku yuikin:

—Uinkanwen, ja Israelin baba kayabitun tsua jatu padainsmadan— nuku wai

<sup>48</sup> jawen jancha ninkabidan Natanaelin Jesús yukakin:

—¿Jaskakin janixun ea uinmisxun min ea unain?— aka Jesúsun Nataniel yuikin:

—Felipen mia kenadiama miban higuera ji naman tsauxun min shinain en mia unanxuki— aka

<sup>49</sup> ikunwankin yuikin:

—Yusinaan, chanima min Diosun bake kayabiki, Israelbun xanen ibu dasibi binuadan— aka

<sup>50-51</sup> Jesúsun ana yuikin:

—“Miban higuera naman tsauxun min shinain en mia unanxuki”, akin en mia yuiawaien taexun min ea ikunwaiin. Ana pepa betsa shadabu en binumai min ea uinxanaii— iwanan, ana yuikin: —Chanima en matu yuiawai. Nai bepemanai anua en matun Juchi Kayabi Iyua ea anu Diosun nai tsumabu inabainbaini butubidanbidanaibu uinkin Diosun kushipa man uinxanaii— akin nuku yuiniki, Jesúsun.

<sup>1</sup> Jesúsun ja dukun damiwakin taewani matu yuinun ninkakanwen. Ana uxashini Caná mae Galilea anu ainyain nawaibu anu jatu medabewai Jesúsun ewa juken <sup>2</sup> nun Jesúsun tsumabu Jesúsbé nukudi iabu <sup>3</sup> uva vino akin netsuaibun jawen ewan ja dukuntun unankin Jesúsu yuikin:

—Kukaan, vino ma netsuabuki. Ana jatu bena waxunwen— aka Jesúsun yuikin:

<sup>4</sup> —Ewaan, mia inun eanan jaskas nun shinanmaki. Diosun ea jatu unanmaxanaidan, idiamaki— aka

<sup>5</sup> jawen ewan ja jabun jatu pimai yuikin:

—Matu yunuayadan, axunkanwen— jatu wa <sup>6</sup> Dios pexuni pidiamma judiobu jaki mepanumisbuwen taea dintu betsa anu mishki shumuwan 50 kasmai 70 litro unpax mata wati tiubus 6 shumuwan xaka sedea <sup>7</sup> Jesúsun uinkin jatu yuikin:

—Ja 6 mishki shumuwan tibiki unpax manekin mata wakanwen— jatu wa shumuwan tibi mata wakin bupakemaibun:

<sup>8-9</sup> Jesúsun ana jatu yuikin:

—Natianan, kenchawen beaishtabain ja jatun jatu besimai xanen ibu anu buxuntankanwen, jau menunan— jatu wa ma damia unankin ja dayakapabu betsan beatan buxuanbu jaskatan unpax damixu unanma ja jatun jatu besimai xanen ibun metan jania bekanxu unanma ja xanen ibun juni ainyain kenaxun <sup>10</sup> yuikin:

—Nawai taekin jabu dukun vino pepa jatu ama netsui bechantu bestia benimaibun ana pe bexmas jatu amamisbuki. Jakia mianan, pepajaida aduxun ikis min jatu taxnimaxunaii— aka jatu inanbaunaibun <sup>11</sup> jaska wakin Caná Galilea anuxun dami atimaska taewakin Jesúsun jawen kushipa nuku uinmakin taewayaya jawen tsumabun eskadabes ikunwankin nun tae-waniki. <sup>12</sup> Januxun jatu jaska waxuntan Cafarnaúm anu jawen ewa inun jawen betsabube Jesúsbé nun bai kashian jiweyuabun

*Templo jemaintin anuxun yumetsui inananainbu Jesúsun bechitan jatu nichinikiaki, na janchadan*

*(Mt 21.12-13; Mr 11.15-18; Lc 19.45-46)*

<sup>13</sup> janua Pascuatian janu nai tsuman detekin debu wanikatun nukun xenipabu dunkebaini shinain besinun ika judiobu mae tibi anua ma bea kemaibun Jerusalén anu Jesúsbetan nun uin ka <sup>14</sup> januxun Templo jemaintin anuxun ina awa inun, chaxawan inun, deiwanwen Dios kenwankin menu keyuti juni betsabu inananainbu inun pei biananain tsauabu Jesúsun bechitushitan <sup>15-16</sup> jaska waibu jatu uinkin bechipaama bichi kapikunkin mayatan jabu inayabu jatu kusha kusha atankin Templo jemaintin anuadi jatu nichin keyukin janua pei biananainbudi jatun tapu nadabekin pei jexe jatu sa akankin deiwan inananainbu yuikin:

—Matun inabu inun matun mabu dasibiya nenua taxnidibainkanwen. En Epa Diosun jiwedan, janua ana jamapai inanananyamakanwen— jatu wa datei kaiin xadakabainbainaibun

<sup>17</sup> Jesúsun jaska wai uinkin jaska nukun xenipabu Davidin Jesúskidi yuikin: “Dios kenwanti jiwenen taea jawa dateama naxukui sinatakin en yaushix-anaii”, akin keneni atimas nun shinanyan

<sup>18</sup> judio xanen ibubu bexun Jesúsu yukakin:

—¿Min jaska waxudan, pemen? Ja kushipawen min jatu akaidan, jawen nun mia unanti wanun jawada dami atimaska wakin nuku axunwen— akabu

<sup>19</sup> junea janchawen jatu yuikin:

—Na mishki jiwe man tekekin keyuadan, xaba dabe inun besti kaya ana en benixanaii— jatu wa

<sup>20</sup> jaska janchaiwen taexun mishki jiwe shinankin xanen ibubun Jesús ja akin yuikin:

—46 año dayakunkainkin na Templo menediabumaki. ¿Jaska watan xaba dabe inun besti min ana benikin bena watidumen?— akabu <sup>21</sup> jakia jawen yuda jiwe keskakidi Jesúsun shinaniki. <sup>22</sup> Janua Jesús mawa ana besten-shinken: “Xaba dabe inun besti kaya ana en benixanaii”, jatu wani nun shinainwen taexun jakidi jaska tibi kenenibu inun Jesúsun nuku yusinidi shinankin nun ikunwaniki.

<sup>23</sup> Janua Jerusalén anu jabias Pascuatian dami atimaska wakin jawen kushipa Jesúsun jatu unanmaiwen taexun yuda ichapabun uinkin ikun-wankin taewaibun <sup>24-25</sup> jakia jaska yudabun jakidi shinankin jawada akai-wen besti benimaibu Jesúsun jawa jatu unanmayuama yudabun shinan mesten jayabuma dasibi jatu unainwen taea: “En Mesías Cristoki”, ikin bebunkidi xabakabi Jesúsun jatu unanmayuama iniki.

### 3

#### *Ana kain benatikidi Jesúsun Nicodemo yusinikiaki, na janchadan*

<sup>1-2</sup> Janua judiobun ichati jiwe xanen ibu betsa fariseo Nicodemo meshu medan june Jesúsbe janchai kaxun yuikin:

—Yusinaan, Diosun mia medabewamadan, min dami atimaska atidumaki. Jaskakenan, Dios anua yusinan, min miaki, en unanan— aka <sup>3</sup> Jesúsun ana yuikin:

—Chanima en mia yuiaii. Tsuada ana kain benama Dios xanen ibuai anu ka jiwtidumaki. Jakia ana kain benatan Dios xanen ibuaibe jiwerkankikiki— aka

<sup>4</sup> Nicodemon Jesús ninkama ana yukakin:

—¿Jaskai yuda ewabia jaskatan ana kaintidumen? ¿Jawen ewan baken nantiki nanetan ana jaska jikikaintani ana kaintidumen?— aka

<sup>5-6</sup> januxun Jesúsun yuikin:

—Jaskamaki. Chanima en mia yuiai ninkawe. Yuda kayabi medanua kaianan, yuda kayabi ikubainmisbuki. Ja inun, Yushin Pepatun kain benamatian jatuki jikitan jatu yaushikin mekekubainmiski. Ja inun, jene inun Yushin Pepawen nashiabumadan, Dios xanen ibuaiki man nukutidubumaki. Jakia ja dabewen pepakubainaibu jaki man dasitidubuki. <sup>7</sup> Jaskaken: “Jau dasibibu ana kain benanunbunwen”, iwanan, akin en mia yuia shinain: “¿Jaskada betsajaidamen?” iki jabaa! iyamawe. <sup>8</sup> Jaska inun, niwe jaikaimas xunku iki danka imiski. Jakia jawen jui ninkakin janiada juai inun janida kai min unanmaki. Yushin Pepatun tsuada yuda betsa sera waidan, jaska keskadiki— aka

<sup>9</sup> Nicodemon ninkai tapianmajaida ana yukakin:

—¿Jaskatidumen, na jaska min yuiaidan?— aka

<sup>10</sup> —Israelbu yusinbiamis ¿jaskakin en mia yuiai min ninkamamen, tap-inbainamadan?— iwanan <sup>11</sup> —Chanima en mia yuiaii. Eskaki, mia yuinun ninkawe. Nukun uinkin inun tapinmisxun Nashimanika Juan inun ean nun matu yusinmiski. Jakia nukun jancha danankin nukukidi xabakabi man shinanbumaki. <sup>12</sup> Jaskaken yudabukidi en matu yuikubainai en jancha man ikunwanbumawen taexun Dios anua jamapaikidi en matu yuiaidi man ikunwantidubumadiki. <sup>13</sup> Jaska inun, Dioskidi unantanun ika Dios anu tsua inatidumaki. Jakia eadan, matun Juchi Kayabi Iyuatun matu unanmai Dios anua sua en taxniniki. <sup>14-15</sup> Jaska inun, Diosun nukun xenipabu yusinkin

unanti wamanikidi mia shinanmanun ninkawe. Janu tsua jiweabuma anu Moisin jatu iyuima janus nukun xenipabu jiwea akeakeakin jawen jancha ninkabumaken Diosun jatu kupinun, iwanan, dunu midima ichawaxun jatu pima isin teneaibun Diosun Moisés yunua mane damiwakin dunu itsa waxun jiki netanxun nichian tsuanda uinkin ikunwain xuxanibuki. Jabiaskadi wakin Diosun ea yubani keyukin jiki matun Juchi Kayabi Iyua ea mastanxun ea benitan ea nichinxankanikiki. Jaskawen taexun tsuabunda ea ikunwankin shinain ebe jiwexankanikiki, niti ikamadan— iwanan,

*Yudabu dasibiwen Dios nuijaidakin Jesús yunua taxninikiaki, na janchadan*

<sup>16</sup> Jesúsun ana Nicodemo shinanmakin yuikin:

—Yuda betsapa dasibi jiwebaunabuwen nuijaidakin Diosun eska shinan tan ea jawen bake bestichai yununkin taxnimaniwen taexun tsuabunda ea ikunwankin jawen jiwea kayabi benutima bitan mawa kayabiama Diosbe jiwekuinxankanikiki, ikibi ikidan. <sup>17</sup> Januxun jau ewen taexun yudabu jatu kupixanun, iwanan, Diosun ea jawen bake bestichai ea taxnimama iniki. Jakia Dios daewakin jau ewen dabanan matun chakabu buaxunkubainxanun, iwanan, Diosun ea jawen bake bestichai taxnimaniiki. <sup>18</sup> Jaskaken tsuanda Diosun bake ikunwainbu Diosun kupiamaki. Jakia tsuanda jawen bake bestichai ikunwanmawen taexun Diosun jatu danantan kupixanikiki. <sup>19-20</sup> Yudabu jamapai chakabuwen kemui bechipaikin jenekatsi ikama Diosun jancha xaba keska dananmisbuki. Januxun jatun shinan chakabuwen taexun Diosun jatu kupinun, iwanan, jawen jancha xaba keska yunukin taxnimaniiki. Jaskawen taexun tsuan jawa ninkama jawen bake danankin chakabuwen besti kemumisbu Diosun jatu kupijaidaxanikiki, niti ikamadan. <sup>21</sup> Jakia tsuabunda Diosun jancha xaba keska ea ninkatan betsabu unanmakin jancha chanima yusinkubainmisbun jabun Diosun shinain keska chibankin ea ikunwanmisbuki— aniki.

*Nashimanika Juanen Jesúskidi ana jatu shinanmanikiaki, na janchadan*

<sup>22</sup> Jerusalén anua jancha menetan Jesús nukube Judea mai pakea anu kaxun nuku yusianyan betsabun Jesús janchai ikunwankin taewaibu nun jatu nashimakubainaya <sup>23-24</sup> janu jaskaitiandi Juan achixun bichidiabuma janu Jordán jene netsuisma anuxun mae betsabu Salim dapi Enón anuxun Nashimanika Juanen jancha ninkanun ika beabu jabun jawen yusian ninkatan jatun shinan betsabu wakin ikunwainbu jatu nashimadiakubainaya: <sup>25</sup> “Ja beya unpaxwen chukikin Dios xabakabi uinmai nun pepamiski”, ikin shinain judio yusinan betsabe Juanen tsuma betsabu jatun beyawen taea ja iki yuinamei menetan <sup>26</sup> Juan yuinun ika jawen tsumabu buxun yuikin:

—Yusinaan, Jordán jene kexa betsaudixun nuku yusinkin jakidi min nuku kenwainmatunan, jatundi dasibi jawenabu wakin jatu nashimaya ninkatan bechibain jadi chibankanikiki— akabu

<sup>27</sup> Juanen jatu yuikin:

—Juni betsabu Diosun yunuama xanen ibu kayabi itidumaki. <sup>28</sup> Jerusalén anua bexun ea yukaibu xabakabi chanima jatu yuikin: “Eadan, en Cristo Mesíasmaki. Jamen eadan, bebunkidi jakidi en chaninun Diosun ea yununiki”, akin en jatu yuiai man ninkaimadan, shinankanwen. <sup>29</sup> Ja inun, junin chipash bitan ainwanan, ja besti jawen beneki. Jakia jawen bene benimai jawen ainbe janchai ninkatan jawen jaibuaibudi benimachakayamamisbu keskai eandi Jesús jaskai ninkatan en benimajaidadiaii. <sup>30</sup> Jaska inun, jawen kushipawen ea binuin Jesús kushipaya janua eadan, en kushipa bextekei en bexmasaii— iwanan,

*Juanen Jesúskidi xabakabi jatu yusinikiaki, na janchadan*

<sup>31-32</sup> ana jabias shinanwen Juanen jatu yuikin:

—Tsuada mai anua baadan, mai anu jiwxun jaska dasibi mai anuadi tapin janchamisbuki. Jakia ja junidan, Dios anua taxninxun yudabu dasibi binukin Dios anua ninkakin uintan jaska chanibiaya tsuan jawa ninkama danankanikiki. <sup>33</sup> Jakia tsuabunda jawen bake danamma “Dios chani chakaismaki”, ikin jawen jancha mestenwanmisbuki. <sup>34</sup> Januxun jawen bake yunukin jawen Yushin Pepa keyuisma inankubainmiswen taexun Diosun bake ja yununitun jawen jancha yuimiski. <sup>35</sup> Epa Diosun jawen bake bechipaikin jau dasibi ibuai xanen ibuxanun jawen kushipa dasibi inaniki. <sup>36</sup> Jaska inun, tsuabunda jawen bake ikunwankin chibainbu jiwekuinx-ankanikiki, ikibi ikidan. Jakia jawen bake danankin ikunwanbuma jatu danandiakin Dios jaki sinatakin jiwekuinmama jatu kupikubainxanikiki, jiwe chakamakinan— iniki.

## 4

*Samarianawa ainbube Jesús janchanikiaki, na janchadan*

<sup>1-2</sup> Juan binunkin Jesúsun yuda ichapa jaki chiti ikabu wakin jatun jatu nashimamabiaken nun jawen tsumabun jatu nashimapakebiaya ichati jiwe xanen ibu fariseobun ninkai jaki sinataibu Jesúsun ninkatan jatube ja ikatsi ikama <sup>3-4</sup> jaska ninkabaini nukubetan Judea jenebaini Galilea anu ana kai Samaria mai pakea dunkemisbu ana janu kama dainbainkin napaibainun ika kai <sup>5-6</sup> maewan betsa Sicar dapi Jacobun jawen bai jawen bake José yununi anu unpax bana kini anua dispiwen biti Jacobun jatu pukinmaniki kemai ma badi manananbi kemaya jin iki unpax bana kini dapi Jesús tsauken <sup>7-8</sup> Sicar maewan anua piti bixuin nun kaken Samarianawa ainbu betsa juxun unpax biaidai Jesusun yukakin:

—Min unpax biaidan, ea amawe— aka

<sup>9</sup> judiobu Samarianawabube janchaisbumawen taea e itan ainbun yuikin:

—En Samarianawaki. Miadan, min judioki. ¿Jaskakin min ea unpax ea akai?— aka

<sup>10</sup> Jesúsun yuikin:

—Jawada Diosun mia inankatsi ikai inun tsuanda mia unpax yukai unankin min ea yuka unpax netsuisma en mia inankeanxuki— aka

<sup>11-12</sup> ainbundi yuikin:

—Xanen ibuun, na unpax kini pukinkinan, nukun xenipabu Jacobun anixun jawen bakebu inun jawen inabubetan apaunibudan, nuku jenex-unbainiki. Jaska nuku axunbainiwen taexun nukun xenipabu Jacob ku-shipadan, ¿min binuanmen? Ja dikabi na kini keyatapajaidaki. Shumu inun dispi chaipa min jayamaki. Unpax netsuismadan, ¿jania jawawen bitan min ea inantidumen?— aka

<sup>13</sup> —Tsuabunda na unpax kini anua biwanxun atan jawenchains tet-susinkin ana manuxankanikiki— iwanan, jancha juneawen ana yuikin:

<sup>14</sup> —Jakia tsuabunda unpax en inain atanan, ana tetsusini manuama ix-ankanikiki. Jabu tibi medan chacha unpax netsuisma keskatun jatu ji-wekuinmaxanikiki, ikibi imakinan— aka

<sup>15</sup> ainbun ninkabiakin Diosun Yushin Pepakidi janchai unanma ana yukakin:

—Xanen ibuun, ana tetsusini unpax manuama en ana unpax bi bika tenekidankidanyamaxanun ja unpax netsuisma min ea yuaidan, menan ea inandiwe— aka

<sup>16</sup> —Peki. Jaskakenan ja dukun min bene iyutanwen— aka

<sup>17</sup> —En bene jayamaki— aka

—“En bene jayamaki”, ikin min chanima yuiaii. <sup>18</sup> Ja dukun 5 min beneyabiakunkainmis natian juni betsabe min jiweadan, chanima min bene kayabimaki— aka

<sup>19</sup> ninkai e iki teku iki juinti metexeketan yuikin:

—Xanen ibuun, min Diosun jancha yuixunika en mia ninkaii. <sup>20</sup> Na mati anuxun nukun xenipabun Dios kenwankin taewapaunibuwen taexun nun Samaritanobun jabianuxundi nun kenwandiamisbuki. Jakia: “Jerusalén anuxun besti jau Dios kenwanunbunwen”, ikin man judiobun yuimiski. ¿Jadatu kenwanti kayabi pemenkain? ea yuiwe— aka

<sup>21</sup> —Ainbuun, ea ninkaidawe. Na mati inun Jerusalén anu kama jani ana kama man Epa Dios kenwanxanai ma kemaikiki. <sup>22</sup> Jakia unandiamabia Epa Dios man kenwanmiski. Jamen nun judiobu anu Dios medabenan juxanaiwen taexun unankin kaneama nun Dios kenwan kayabimiski. <sup>23-24</sup> Diosdan, yushinki, yuda kayabimadan. Jaska inun, jawen Yushin Pepatun jatu medabewakin shinanmaya Diosun yuini chanima unankin ikunwan kayabixanaibun Epa Dios duawakin kenwanxankanikiki, benimawakinan. Jaskawen taea na jabiatian ma jaska Diosun bechipai chanima man kenwankin taewaxanai ma taeikiki, Epa Diosun jawen Yushin Pepatun medabewayadan— aka

<sup>25</sup> ainbun yuikin:

—En unaiin, ja Mesías Cristo juxun dasibi nuku unanmaxanaidan— aka

<sup>26</sup> Jesúsun yuikin:

—Na jibia en mibe janchaidan, en jabiaki— aka

<sup>27</sup> jaska watanayas nun jawen tsumabu nidi itushikin Jesús ainbube janchai bextetushi e itan:

—¿Jaskai ainbube janchaimenkain? ¿Jawa yukai jabe janchai ixumen?— ikin nun yukatidububia nun jawa yukabumaken <sup>28-29</sup> ainbu jawen shumu jenebaini jawen mae anu kaxun yudabu yuikin:

—Ebe kaxun uin bukanwen. Dasibi en ipauni ea yui keyuxuki, Mesías Cristomenkainan— jatu wa jawen jancha ikunwankin ninkabidani <sup>30</sup> jatun mae anua dasibi Jesús anu bei natsekebidani taeaibun

<sup>31</sup> ja jaskaibun nun jawen tsumabun Jesús yuikin:

—Yusinaan, nun mia piti bixuntanxudan, menan pidiwe— nun akanwan

<sup>32</sup> —Piti betsai man unandiamama en jayaki— nuku wa

<sup>33</sup> yuinamei:

—Janixun juni betsai piti bexun ¿pima ikimenkain?— nun ikaya

<sup>34</sup> Jesúsun nuku ana yuikin:

—Jatun ea yununitun shinan en jayawen taea jawen daya keyui en ku-shipamiski, yani wa keskaidan <sup>35</sup> —iwanan, ana nuku yuikin: —Matun bai man banashina uinkin yuikin: “Ana uxe dabe inun dabe ka bimi jushian nun tsekaxanaii”, iwanan, man shinanbiaya ana matu yusinun ninkakanwen. Diosun bai kaiskin uinkanwen. Ma janu ikunwainbu ichawati peki.

<sup>36</sup> Tsuabunda jatu ichawakin jawen manakuti pepa bikanikiki, jatun jiwea ikibi ika bikinan. Jaskaken tsuabunda miban bana bimi jushiai jatu tseka keska waibudan, jabudi benimakanikiki. <sup>37</sup> Jaska inun, juni betsai banaima juni betsadi juxun tsekamiski, iwanan, nun yuimisdan, chanima janchaki. <sup>38</sup> Jaska inun, janiada dayakin Diosun jancha banaimabu ikunwainbu man ichawa bestinunbun en matu yunuxanaii. Jaska inun, betsabu dayai taeimabun natiandi matundi jawa bika teneama ichawa bestikin man keyuxanaii, jatube benimakinan— nuku waya

<sup>39</sup> januxun ainbun jatu yuiaiwen taexun jawen mae anuxun Samari-anawabu ichapabun ikunwain Jesús anu <sup>40</sup> bexun uinkin yuikin:

—Nukuki bayuwe— akabu januxun Jesúsun yusin uxá dabejatu anu bashikua <sup>41</sup> jawen jancha ana ichapabun ikunwankin taewakin <sup>42</sup> ainbu yuikin:

—Ja dukun min jancha besti ninkatan mia chibarbaini kaxun nun uinshinaki. Janua chanima kayabi ibubis nukunmebi jawen janchadi ninkatan Jesúsun yudabu dasibi Mekenika Mesías Cristodan, natian nun ikunwaiin—akabu

*Gobiernobe dayanika xanen ibu bexmastun bake Jesúsun xuxawanikiaki, na janchadan*

<sup>43-44</sup> januxun: “Diosun jancha yuixunikadan, jawen mae anuxun yusianyan jawenabuns kenwainsbumaki”, imisxun Jesúsun jamebi jatu kenwanmakatsi ikama uxá dabetan janua ana kai <sup>45</sup> Galilea mae pakea anu jikia Jerusalén anu Pascua nawai besiaibutian jabun uin kaxun Jesúsun dami atimaska akai uinshinabuwen taexun ikin pewa wani jaki benima-jaidakubainaibun

<sup>46</sup> januxun Caná mae Galilea anuxun unpax dami waimanu Jesús ana chintunkain jikiaya jabiatiandi Herodesin ja dayaxunmis xanen ibu betsan mae Cafarnaúm anua jawen juni bake isin teneaya <sup>47</sup> Jesús Judea anua Galilea anu ana chintunkidan jikiai ninkatan janu kaxun uinkin ea akin yuikin:

—Yusinaan, en juni bake mawakatsis ikikiki. En jiwe anu ebe kaxun ea xuxawaxunyuwe— aka <sup>48</sup> Jesúsun yuikin:

—Matunan, jawen unanmati dami atimaska en akai uianma man ea daki ikunwanbumaki— aka

<sup>49</sup> jawen bakewen nuimanun, iwanan, Jesús daewakin yuikin:

—Xanen ibuun, jaskamaki. Janun en bake mawanun jawaida ea xuxawaxuin kawe— aka

<sup>50</sup> jawen nuikin Jesúsundi yuikin:

—Nenua chintunkaini min jiwe anu kadiwe, min bakedan, mawama jiweakidan— aka ja junin Jesúsun jancha ikunwanbaini jawen jiwekidi kai <sup>51</sup> janida bai puchinin uxashini jawen jiwekidi kaya unudiadi jawen tsum-abu bei jaki nukuxun yuikin:

—Min bakedan, ma ana jiweaki— atushiabu

<sup>52</sup> ninkatan jatu yukakin:

—¿Jatian jaskai xuxai taeshinamen?— jatu wa

—Uatian ma badi kapukeaya a la 1:00 jawen yuna mainshinaki— akabu

<sup>53</sup> jabianudi: “Min bake mawama ana jiweaki”, Jesúsun ashian jabisaskadi nakushxunaibuwen taea jikitushitan jatu yuia jawenabubetans Jesús ikunwanibukiaki.

<sup>54</sup> Na jaska ana ja kachu juni bake xuxawakinan, tsuan jaska watiduma Jesúsun akinan, Judea anua chintunkidan Galilea anu jikitushishinxun ana jabianuxundi jaska waniki, jawen unanmati dami ja kachu ana akinan.

## 5

*Betzatá kexajuni isin tenei babuni Jesúsun xuxawanikiaki, na janchadan*

<sup>1</sup> Galilea anuxun Jesúsun juni bake xuxawaima ana betsatian Jerusalén anuxun judiobun jatun beya betsa chibain besi nawaibu anu Jesús ana chintunkaini kakin <sup>2-4</sup> januxun Jerusalén mae mishkiwen kenebaunibu janu jikitixui jawen kenadan, Chaxuwan Kaintidan, ja dapi janu unpax uke medan

jabai anu mishki pukinibu anu unpax tsaua jawen kenadan, Betzatádan, janu utai juindukunmisbu anu 5 utati anu bekunbu inun, tidibu inun, meyushkibu inun, isin betsa betsapa tenei maniabu anu mishki pukinibu unpax mata nai tsuman shubimaya: “Ea dukun ka en pukua en xuxatiduki”, iki maniabu anu <sup>5</sup> juni betsa 38 año badi ka jawen yuda babuni <sup>6</sup> daka Jesúsun bechitushitan badi ichapa ka isin teneai unankin yukakin:

—¿Min yuda xuxai min ana kushipakatsis ikai?— aka

<sup>7</sup> —Jaa, Xanen Ibuun. Jakia nai tsumapan jene shubimai anu tsuan ea bakebain pukutimaken en unanxubida kaya isin teneai betsan ea maemai binukain jabu dukun pukukubainmisbuki— aka

<sup>8</sup> jawen nuikin xuxawanun, iwanan, Jesúsun yuikin:

—Jaskakenan, benitan min dakati iabaini kadiwe— aka <sup>9</sup> jawaida jawen yuda dakushi kayatan benikauan sábado juindukuntitian dayatimabiaken jabiatiandi jawen dakati iabainaiwen taexun <sup>10</sup> judio xanen ibubun yukakin:

—¿Jaskakin juindukuntitian min dakati iabainkin Moisin nuku nemaní min chibanna kaneai?— akabu

<sup>11</sup> —Ea xuxawaxutun yunukin: “Min dakati iabaini kadiwe”, ea wa en kai ikaii— jatu wa

<sup>12</sup> —¿Tsuán mia jaska yunuxumen?— akaibun <sup>13</sup> janu ichabu anu Jesús jawaida nashui ikawen taexun jatun xuxawaxu unanma jadakidi jawa jatu yuitima nibai kaken <sup>14</sup> chipu Jesús Templo jemaintin anu jaki ana nukuxun yuikin:

—Uinwen, ikis en ma mia xuxawaxuki. Jaskaken chakabu shinankin Diosun jancha ana kaneyamaxanwen, min ana jamapai betsa kaneaidan, jawada chakabujaidawen min ana pikutidukidan— aka

<sup>15</sup> ja juni jaska wa kaxun judio xanen ibubu jatu yuikin:

—Na en xuxaxu man ea yukadan, Jesúsun ea akakiaki— jatu wa <sup>16</sup> juindukuntitian Jesúsun xuxawawen taea jaki sinatakin judio xanen ibubun Jesús danankin yuainbun <sup>17</sup> jatun jancha ninkatan Jesúsun jatu yuikin:

—En Epa Diosun jatu medabewai dayakunkainmiski. Eadi jabiaskadiai en dayadiakunkainaii— jatu wa

<sup>18</sup> ninkatan june judio xanen ibubu yuinamei:

—Sábado juindukuntitian yununi kaneai bestimaki. Chakabu betsa wadiai jamebi Dios keskakatsis ikin yuikin: “Dios en Epaki”, ikin yuidiaikiki— ikaiwen taea jaki sinatajaidakin Jesús tenankatsis ichakayamaibun

### *Jawen Epan Jesús jawen kushipa inanikidi yusinikiaki, na janchadan*

<sup>19</sup> Jesúsun ana jatu yuikin:

—Chanima en matu yuiaii. Diosun baken jawen shinanan besti jaska atidumaki. Jakia jamapai shadabu Epa Diosun akai uinkin jabiaskadi wakin jawen bakendi adiatiduki. Jaskaken Epa Diosun shinanan ea jawen baken en adiaii. <sup>20</sup> Jaska inun, Epa Diosun jawen bake bechipaikin dasibi akin uinmamiski. Jaska inun, ana kushipajaidawen dami atimaska betsa betsapa jawen bakewen matu uinmaya uin man e ikunkainxanaii. <sup>21</sup> Jaska inun, en Epa Diosun mawabu jiwemamiski. Jabiaskadi wakin jawen bakendi tsuabuda katutan jatu jiwekuinmediatiduki. <sup>22-23</sup> Jaskawen taexun tsuada Epa Diosun unanti waismaki. Jakia jau dasibibu jawen baken jatu unanti waxanun jawen kushipa inani jayaki. Jaskawen taexun jabias Dios kenwanmisbu keska wakin jawen bakedi jau kenwanxanunbunan. Tsuabunda jawen bake ma yununi kenwanbumadan jaskatan jawen Epadi kenwan kayabitidumaki.

<sup>24</sup> Chanima en matu yuikubainaii. Tsuanda ea ninka pewai jawen jiwea chakabukidi kai bexteketan jatun ea yununidi ikunwain jiwekuinkanikiki, ikisdan. Bikawen unanti wama mawa kayabi tenemama jiwekuiaiainbu chakabuwen nun kupiama ixanaii. <sup>25-26</sup> Chanima ana en matu yuiaii. En Epa Diosun jawen jiwemati kushipa Jamebi jayatun jabias ea inaniki. Jaskaken janu badi jawen jeneaitian mawabun en jui ninkatan bestein ana jiwe-xankanikiki. <sup>27</sup> En matun Juchi Kayabi Iyuawen taexun dasibi unanti kushipa en Epa Diosun ea yunudianiki, ean en jatu unanti wa akeakexanunan. <sup>28</sup> Na jaska jancha en matu yuiai ninkatan e iyamakanwen. Jaskaxanai matu yuinun ninkakanwen. Mawanibu dasibi en jui kushipawen en jatu kena ninkatan <sup>29</sup> mai anua janida jatu maiwanibu taxnibidanxankanikiki. Pepabu jiwekuiaiainbu jabu chakabumisbu ana bestenbiatan ana jawendi kai bika tenejaidai ikibi ixankanikiki— iwanan,

*Jesúsun ibubis jawen shinanen aki juama inikiaki, na janchadan*

<sup>30</sup> Jesúsun xanen ibubu jatu ninkamakubainkin yuikin:

—Eadan, ibubis e iskaun en shinanen en ikamaki. Jakia jaska en Epa Diosun ea yunuai besti ninkatan en akubainaii. Jaska jawen pepa ea katumaidan, en jaska shinaidwen en akama jakia jaska en Epan ea yununitun bechipaiai jaska yunuaya unanti wakin en axunkubainaii, kaneamadan. <sup>31</sup> Emebi en keanyanan, en jancha chani ikeanaii. <sup>32</sup> Jakia tsuabunda ekidi unanti watan ea kenwainan, jawen janchadan, pepaki, jaska unainan. <sup>33</sup> Nashimanika Juan Mesíaskidi man yukatanima chanima jakidi matu yuimaki. <sup>34</sup> Jau tsuabunda man ea kenwanxanunbun, iwanan, en jaskakidi shinanmaki. Jakia janu kupiaitian Diosun jau matu kupiyamaxanun na kaka pepa en matu yuiai ninkatan man benuama ixanaii. <sup>35</sup> Jaska inun, Juan bin ewapa dekua ji ikin chaxawa keskaxun matu yusiai ninkai uxe eskadabes jawen yusian bechipai man benimakunkainimaki. <sup>36</sup> Jamen Epa Diosun ea yununidan, jawen kushipawen dami atimaska wakin en matu uinmaiwen taexun man ea unanti wakin tapintidubuki, Diosun ea yununidan. Jaskaken ekidi jawen unanmati jancha Juanen matu yusinmaki. Jakia eanan, atimaska betsa betsapa wakin jaska Juanen aisma akin en binuaiin. <sup>37</sup> Ja inun, Dios man uianma inun jawen jui man ninkaismabiaken jabiatundi ea yununitun ea unankin jawen jancha jatu kenemani anuxun ekidi jatu yuini man uinkubainmiski. <sup>38</sup> Jakia matu anu Epa Diosun ea yununi man ea uinkin ikunwanmawen taea jabiaskadi wakin jawen jancha uinkin shinain ja chibain man jawen jiweabumadiki. <sup>39</sup> Jaskaken matunan, ja chibain jiwei ikibi iti jancha kenenibu bechinun, iwanan, Diosun jancha yuixunikabun kenenibu anua man benakubainmiski. Jakia jabias kenewen ekidi yuinibu uinbiakinan, <sup>40</sup> jaskawen taea matun ea ikunwantan jiwekuinkatsi ikama man ea danaiin.

<sup>41</sup> Jawada pepa ekidi yuiaibu besti en ninkakatsi ikamaki, yudabun janchawenan. <sup>42</sup> Jamen eanan, en matu unaiin, Dios nuimis keska jayama man ikunkainaaidan. <sup>43</sup> Epa Diosun kushipaya en jubianiken shinan betsatan man ea ninkamaki. Jakia juni betsa Jamebi kenkin yuiai ninkakin man chibamiski. <sup>44</sup> Jaska inun, matumebi ibubis man yudabu kenwanma bestikatsis imiski, ja besti Dios jatu kenwanmamadan. Jaskawen taexun man ea ikunwantidubumaki. <sup>45</sup> Jaska inun, Dios be bun nixun en matu ja axanai shinanyamakanwen. Jakia matun yusinan pejaida Moisés man ikunwain jatundi matu ja axanai shinain jakimayamaxankanwen. <sup>46</sup> Ja inun, Moisin ekidi keneniwen taexun Moisin jancha ikunwankin man ea

ikunwandiakeanaii. <sup>47</sup> Jakia jaska jatun kenen ikuwankin man chibandan, en janchadi man ikunwantidubumadiki— jatu waniki.

## 6

*5,000 junibu Jesúsun pimanikiaki, na janchadan  
(Mt 14.13-21; Mr 6.30-44; Lc 9.10-17)*

<sup>1-4</sup> Janua jaskakainkin Pascuatian judiobu besikin pixanaibu ma kemaya Galilea Ianenwan, jawen kena betsa Tiberias Ianenwan anu Jesúsun nun jawen tsumabube pukexun jatu xuxawakin Jesúsun jawen unanmati dami atimaska betsa betsapa wai uinshinxun ana uinkatsis iki main bukin midimabun nuku chibainbun mati mapebain tsaua nukube janchabaikin <sup>5-6</sup> yudabu ichapabun chibandanabu uinkin jawada akatsi unanbiakin Felipe unanti wakin Jesúsun yukakin:

—Nabun jau pinunbun, ¿jania nun jatu misi bixuntidumen?— aka

<sup>7</sup> shinanma Felipen yuikin:

—Bestibu tibitun jau misi eskadabe pinunbun 200 día nukun daya peidan, damaki— aka

<sup>8</sup> jaskai ninkatan jawen tsuma betsa Andrésin, Simón Pedron betsan, yuikin:

<sup>9</sup> —5 misi inun 2 bakaishtha juni baken nuku inantidukiaki. Jakia jatibun na misi eskadabes pikin jawa yani watidubumaki— aka

<sup>10</sup> Jesúsun jatu yuikin:

—Ja basiki jau tsuabaununbun jatu yunukanwen— nuku wa nun jatu yunua basi mamaki tsauui 5,000 junibu tsauabun <sup>11</sup> ja juni bake anua Jesúsun misi bitan Dios kenwantan misi tunkepakekin nuku inan ja tsauabu nun jatu inanbaunaya jabiaskadi wakin ja baka bitan tekepakekin nuku inandiaya nun jatu inan jati pikatsis ikin bitan <sup>12</sup> pikin januxun yani wai pepeaibun Jesúsun jawen tsumabu nuku yunukin:

—Ja piti texe waibu jau chakawayamanunbun ichawabaunkanwen— nuku wa <sup>13</sup> ichawakin ja 5 misi pikin texeawabu 12 kuki nun mata waken <sup>14</sup> jawen unanmati dami Jesúsun jatu axunxuwen taea uin yuinamei:

—Chanima Diosun jancha yuixunika kayabiki, jaska Moisin yuinidad, ja junidan, jabiaki— ikubaunkin <sup>15</sup> badikis xanen ibu wadinun, iwanan, achixun iyupananbu unantan jatu paxkabaini ana jawendi mati keyatapa mapebaini ja mesti jadi paxaxun shinanyui kaya

*Jesús ianenwan bemaki bepaikainikiaki, na janchadan  
(Mt 14.22-27; Mr 6.45-52)*

<sup>16</sup> ma badi jikiaya nun jawen tsumabu ianenwan kexa anu butukin Jesúsun nun xununbidana judiamaken <sup>17</sup> xaxun inatan Cafarnaúm anu nun kai besusi pukenun ika nun kai taeaya meshujaidaken Jesúsun chintundiamma <sup>18</sup> niwenwan bekin ian buspu tsaubidanbidankin jatu teawa <sup>19</sup> jaimanwen tuenshini ma chaiskabui 5 kasmai 6 kilómetro nunuxun Jesúsun ian bepaikidanaui uin nun datejaidaya

<sup>20</sup> nuku yuikin:

—En eaki. Ewen dateyamakanwen— nuku wa <sup>21</sup> ninkatan benimakin yuikin:

—Nukube xaxun inayuwe— nun wa xaxun Jesúsun inaya niwewanen xaxu tsuma maianyan jawaida kain nun keti iniki.

*Yudabun Jesúsun benanibukiaki, na janchadan*

<sup>22</sup> Uxashini penaya ja yudabu ian kexa betsaudiabun shinain:

—Jabia besti xaxuwen jawen tsumabun Jesús iyuama bushianbuki, xaxu betsa jayamabiakenan— ikaibun <sup>23-24</sup> ja jaskaibun maewan betsa Tiberias anua xaxu betsawen bei januxun Jesúsun Dios kenwantan jatu pimashina anu keti itan Jesús inun jawen tsumabu jatu benakubidani jawa jatu bechiama ana jawendi butubidani jatun xaxuki inatan: “Cafarnaúm anu kashianmenkain. Jadi benanun bukanwen”, itan jaudi bui

*Jesúsun yudadan, misi keskakiaki, na janchadan*

<sup>25</sup> ianenwan pukebaini kexa betsaudia janu ichati jiwe anu jatube ichanua Jesús bechitushitan jabun yukakin:

—Yusinaan, ¿jatian min nekedi pukeshinamen? Ukedia nun mia benabidanaidan— akabu

<sup>26</sup> Jesúsun jatu yuikin:

—Man unanti wakin kayatapinun dami jaskabiamma wakin en matu axuain uinshina ja tapinkin man shinanmawen taea jakia misi pikin yani washinxun jaskas pinun ixun man ea benai bei ikanaii. <sup>27</sup> ¿Jaskai piti chapumiswen besti kemui man mapua ikanai? Jakia en Epa Diosun ea kushipa waniwen taexun jawen kushipa en matu inanxanai ja bestiwen kemui mapukanwen, jawen jiwekuin ikibi itidan. Jaskawen taexun jabia jawen unanmati wakin Epa Diosun ea matun Juchi Kayabi Iyua ea waniki, yunukinan— jatu wa

<sup>28</sup> jabun ninka pewama Jesús yukakin:

—Diosun yunua axunkin chibankinan, ¿nun jaska wakin benimawakin taewatidumen?— akabu

<sup>29</sup> Jesúsun ana jatu yuikin:

—Dios benimawakinan, jatun ea yununi besti ikunwankanwen, en eakidan— jatu wa

<sup>30-31</sup> betsabun ninkama ana yukakin:

—Min Dios anuadán, nuku ikunwanmakatsidan, ¿jawa jawen unanmati min nuku axunkin kayati wamatidumen, nun mia jawen taexun ikunwanbunan? Nukun yusinan Moiséskidi mia yuinun ninkawe. Janu tsua jiweabumanu nukun xenipabu jatu iyuyama jadi jiweabun Dios anua maná dudu butea pikubaunibuki. Jaska wanibu kenekin: “Pimakin nai anua Moisin misi jatu pimakubaunpauniki”, iniken damiwakin ¿Moisés min binua ikai?— akabu

<sup>32</sup> —Chanima nai anua misi butunidan, ja Moiséskidi man yuiaidan, jatun jatu pimama iniki. Jakia en Epa Diosun jatu pimakubaunpauniki. Jakia ikis nai anua jabiaskadi wakin misi kayabi en Epa Diosun matu inankatsis idiaikiki. <sup>33</sup> Ja misi Diosun yudabu dasibi inankatsi ikaidan, ja nai anua butunitun jatu dasibi jiwekuinmatiduki— jatu wa

<sup>34</sup> jawen jancha ninkabuma ana yukakin:

—Xanen ibuu, jaskakenan na misidan, jawenchains nuku pimapakexanwen— akabu

<sup>35</sup> Jesúsun ana jatu yuikin:

—Jiwekuinmati misidan, jabia en eaki. Tsuabunda ea ninkakin shinan betsa watan eki chiti ikaibu en jatun yushin kushipa wa ana bunama keska ixankanikiki. Ja inun, tsuabunda ea ikunwankin en jancha ninkakubainaibu en jatu shinan chankanwan ana unpax manui tetsusinama keska ixankanikiki. <sup>36</sup> Jaska en matu yuiai keska en akai uinbiashinxun man ea ikunwanbumaki. <sup>37-38</sup> Jakia ea yununitun shinanen aki en juniki, emebi en shinanen aki juamadan. Jaskaken tsuabuda katuxun Epa Diosun ea anu jatu pexukin ekidi yunua ikunwankin ea jaibuwakubainxankanikiki. Ja inun, ea ikunwainbu en jatu danantaskama

ixanaii. <sup>39</sup> Ea yununitun shinanwen akinan, tsuabuda ea anu yununi jawen jeneai xabatian jatu benuama jatu bestenwankin en jatu taxnimaxanaii. <sup>40</sup> Dasibibun Diosun bake shinankubainkin ikunwain jiwekuian ma jayabuwen taexun jawen jeneai xabatian en jatu bestenwanxanaii, jaska en Epan shinain yubakani keska menexunkinan— jatu wakin

<sup>41</sup> “Dios anua misi butunidan, en eaki”, iki daketapai itsakin jatu yuiaiwen taea judio xanen ibubu june Jesúski ja ikin yuain <sup>42</sup> yuinamei:

—Na junidan, Josén bakeki, Jesúsdan. Jawen ibu dabedan, nukun uinbuki. Jaskai: “Dios anua en butuniki”, iki daketapaimenkain? —iake iakeaibun

<sup>43</sup> jatun shinan unantan Jesúsun jatu yuikin:

—Matunan, jadi janchakin ana ea yuanyamakanwen. <sup>44-45</sup> Epa Diosun ea yununitun jatu kenamadan, ea jaibuwatidubumaki. Jakia jatu kena ea ikunwainbu jawen jeneai xabatian en jatu bestenwanxanaii. Diosun jancha Isaíasin keneni matu yuinun ninkakanwen: ‘Diosun dasibi jatu yusinkin mextanmaxanikiki’, aniki. Jaskawen taexun tsuanda Diosun jancha ninkakin tapinkubainmisxunan, ea jaibuwakanikiki. <sup>46</sup> Epa Dios tsuan man uinsmaki. Jakia Dios anua besti taxninitun Epa Dios uiniki.

<sup>47-48</sup> Jiwekuinmati misidan, jabia en eaki. Chanima tsuabunda ea ikunwain jiwekuinkanikiki, ikibi ikidan. <sup>49</sup> Ja inun, janu tsua jiweabumanuxun Dios anua misi matun xenipabun pibiakubaini atimas bika tenei mawanibuki. <sup>50</sup> Jakia misi nai anua butunikidi en janchaii. Na misi pikubaini ana mawatidubumaki. <sup>51</sup> Nai anua butuni misi jiweadan, jabia en eaki. Tsuabunda na misi jiwea pikubaini jiwepakexankanikiki, ikibi ikidan. Na misi en jatu inanxanaidan, en yuda kayabiki. Jaskawen taea na mai anu yudabu xukuabu tibi jawen jiwedidubuwen taexun en yuda kayabi en jatu inanxanaii— akin junea janchawen jatu yuiaya

<sup>52</sup> ninkama e itan judio xanen ibubu jancha tibiwen yuinamei ja ikaibun:

—¿Jaskakin nun pinun jawen nami nuku inantidumen? Juni kuinen naman, nun pitaskatidumaki— ikaibun

<sup>53</sup> jabun shinan unankin Jesúsun ana jatu yuikin:

—Chanima matu yuinun ninkaidakanwen. Matun Juchi Kayabi Iyuatun nami piama inun en jimi akamadan, man jiwekuian jayatidumaki. <sup>54</sup> Jakia tsuabunda en nami pikin en jimi aki jiwekuinxankanikiki, ikibi ikidan. Ja inun, jawen jenea xabatian en jatu bestenwankin taxnimaxanaii. <sup>55</sup> Jaska inun, en namidan, piti kayabiki. Ja inun, en jimidán, nuxuti kayabiki. <sup>56</sup> Tsuabunda en nami pi inun en jimi akidan, ebe jiweaibun eadi jatube dasitan en jiwekunkainxanaii. <sup>57</sup> Jaska inun, Epa Dios jiwei ikibi ikatun ea yununiwen taea jawen kushipawen en jiwekunkainnaii. Jabiaskadiai tsuabunda ea pi en kushipawen jiwekubainxankanikiki. <sup>58</sup> Nai anua misi butunikidi en janchaii. Matun xenipabu jiwekin ja misi pikubauni mawanibu keskamaki, na misi en matu yuiaidan. Na misi pikubaini jiwekubainxankanikiki, ikibi ikidan— jatu wakin <sup>59</sup> Cafarnaúm anu janu ichati jiwe anuxun Jesúsun jaska jatu yusiany

*Jesús jamebi jiwea ikibi ini jayakidi jatu yusinikiaki, na janchadan*

<sup>60</sup> jawen jancha ninkatan Jesúski chiti ikabu ichapabu yuinamei:

—Na jaska yuiaidan, bikaki. Tsuan jaska chibankin axuntidumaki— ikai-bun

<sup>61</sup> jabu yuananainbu unankin Jesúsun jatu yukakin:

—¿En janchan matu dakewakin dananmaimenkain? <sup>62</sup> Janua en juni anu jawendi en matun Juchi Kayabi Iyua en ana kai uinkin man shinan betsa waxanaii. <sup>63</sup> Xabakabi matu yusinun ninkakanwen. En yushinin

jatu jiwemaxanikiki. Jamen yudabun janchawenan, jawa jatu jiwemakin kushipa watidumajaidaki. En jancha en matu yuiaidan, en yushin keskaki. Man ikunwanyan en janchan matu jiwekuinmaikiki— iwanan,<sup>64-65</sup> yusinkin taewabidanxuwen jawen jancha ikunwanbuma inun tsuanda achimaxanai unainwen taexun Jesúsun ana yuikin:

—Jamen matunan, betsabun man ea ikunwanbumaki. Jaskaken: “Epa Diosun matu kenama man ea ikunwantidubumaki”, akin en matu yuixuki— nuku wa

<sup>66</sup> jaskawen taexun Jesúski chiti imisbu ichapabu niti iki bashikutan Jesúsbé ana buama ikaibun <sup>67</sup> jakia nun jawen 12 tsumabu nun paxk-abainabumaken Jesúsun nuku yuikin:

—¿Matundi man ea jenekatsi ikimenkain?— nuku wa <sup>68-69</sup> Simón Pedron yuikin:

—Xanen Ibuun, mia jenebain tsua mia keska nun chibantidumaki. Jiwekuinmati jancha min nuku yusinmiski. Diosun bake medibi pepadan, jibia min mia nun unaiin— aka

<sup>70</sup> Jesúsun nuku yuikin:

—Eanan, en matu katubiayama bestichai yushin chakabu man jayaki— nuku wa <sup>71</sup> nun jawen 12 tsumabu betsan Jesús jatu achimaxanaiwen taea Simón Iscarioten bake Judaskidi shinankin jaska nukukidi janchaniki.

## 7

### *Jawen betsabun Jesús ikunwandiamma inibukiaki, na janchadan*

<sup>1</sup> Januxun judio xanen ibubun Jesús detekatsi ikin benaibuwen taea Judea anu ana kakatsi ikama Galilea anu besti mae tibi anu kakunkaunkin jatu uinkin yusinkubaunaya <sup>2</sup> ja uxetian ni pei mextetan peantan judiobun xenipabu uxakubaunpaunibu jawen shinanti beya nawai pi besixanaibu ma kemaya <sup>3-5</sup> jawen betsabun ikunwankin kayatiwadiabumabia Jesús yunukin:

—Nenu janus kesu kesu isama Judea anu besiaibu anu kaxun uintanwen, kaxun jadixun min damiwai miki chiti ikabu ichaxun uin jabaa! iki jau yuu! ixanunbunan. Tsuada xabakabi xanen ibukatsi ikinan jawen pepa june akin jamapai aisbumaki. Jaskaken min akaidan, pepakiaki. Jerusalén anuabu jadixundi dasibi jaska min damiwamis xabakabi jatu uinmaditanwen, mi-anan— akabu <sup>6-7</sup> Jesúsun jatu yuikin:

—Jaska en ixanaidan, kemadiamaki. Matudan, tsuan matu jawa dananbuma jamapaiaibutian man katiduki. Jakia eanan, jatun chakabukidi xabab-abi en jatu yuiaiwen taexun eki sinatakin ea danankanikiki. Jaskawen taea en daya en menediamawen taea en kayutidumaki. <sup>8-9</sup> Jaskaken en jatu uinmaxanai kemadiamaken matube en kamaki. Matun mesti uintankanwen— jatu wa buaibun Galilea anu Jesús bashikui niti iken

### *Judiobu janu besimisbutian Jesúsun jatu yusinikiaki, na janchadan*

<sup>10</sup> nawai besiaibu anu jawen betsabu bushianbun Jesúsun tsua banabimama jadi jatu ichun kai Jerusalén medan june jikiken <sup>11</sup> nawai taeaibun Jesús benakin judio xanen ibubun jatu yukakubauni:

—¿Jania man uiain, ja juni Jesúsdan?— ikaibun <sup>12</sup> yudan kaian Jesúskidi janchai yuinamei betsabun jakidi yuikin:

—Jadan, juni chakabuma pepaki— akaibun betsabundi yuikin:

—Jaskamaki. Juni pemaki. Nukunabu padanmiskiaki— adiaibun <sup>13</sup> jaskabiakin tsua ninkamama jabu judio xanen ibubuki datei Jesúskidi june janchanameakeakeaibun

<sup>14</sup> uxá dabe inun besti kaya napundiama nawaibu jatixunbukuns namakis Templo jemaintin anu Jesús ka tsauxun ichabu jatu yusinkin taewayá  
<sup>15</sup> xanen ibubun uin e itan jaki sinatai yuinamei:

—¿Jaskatan jaska yusian unanajaidai ikimenkain, nukubetan kene tapins-mabiadan?— ikaibun

<sup>16</sup> jaska janchaibu unankin Jesúsun jatu yuikin:

—Na en yusiaín man ninkaidan, enamaki. Ea jatun yununitun shinanwen en matu yusin ikaii. <sup>17</sup> Tsuabunda Diosun shinan akatsi ikinan en akai unantan jaska chanimamenkain ikin na en yusiaín: “Dios anua juimenkain, en ibubis en shinanen ikimenkain”, man unantidubuki. <sup>18</sup> Jamen juni betsa ibubis jatu kenwanmakatsi ikidan, yusinan pepai jawenduamisbuki. Jakia jatun ea yununi en matu kenwanmakatsis ikaíwen taea chakabuuma pepa besti yui en chani chakamaki. Jaskawen taexun tsuan ja yusiankidi ekidi metutidubumaki. <sup>19</sup> Chaima Diosun jancha Moisin matu yusinbiani mestenwantan matun juintinin Diosun jancha tsuan man chibainsbumaki. Jaskawen taexun jaska shinanma man ea detekatsis ikanaii— jatu waya

<sup>20</sup> ja dapi mapuxun betsan yuikin:

—Min yushin chakabu jayaki. ¿Min jaska shinainan, tsuan mia tenankatsis ikimenkain?— aka

<sup>21</sup> ninkabiai jabe janchama xanen ibubu Jesúsun ana yuikin:

—Sábado juindukuntitian juni bestichai xuxawakin en medabewaima matuki chanimabu jaska shinain man eki sinataibu en unaiin. <sup>22</sup> Jakia Moisin nuku yusinkin yuikin: “Jawen Dios unanmati wakin matun juni bake 8 xaba kaya jawen jina kubichi bikubainxankanwen”, akin nuku yununiki. Janunkain ja jina kubichi bikin Moisin taewama nukun xenipabu Abrahamnen dukun bikin taewani Moisin shinankin jabiaskadi nuku yununiki. Jaskaken juindukuntitianbiaken kaneama jina kubichi man bidiamisbuki. <sup>23</sup> Janua Moisin jancha man kanekatsi ikamawen taea juindukuntitianbiaken matun juni bake kainshina jina kubichi bi matudi man dayakubainmisbuki. Jabiaskadi keska wakin juindukuntitiandi juni betsa jawen yuda jidabi en xuxawaimawen taexun jaska shinain eki sinatakin man chakabu ekidi tanaki. <sup>24</sup> Jaskaken jawada bemakia uintan shinain jawaida janchayamakubainkanwen. Jakia jawada man unanti wakatsi ikaidan, jawa kaneama uin pejaidawatan pe shinankin unanti watan ikubainkanwen— jatu waya

### *Jania Jesús juni tsuan unanma inibukiaki, na janchadan*

<sup>25</sup> januxun Jesúsun yusiaín Jerusalén anu jiwemisbun ninkatan yuinamei:

—Ja junidan, detekatsis ikin benakubaunaibudan, ¿jabiamen? <sup>26</sup> Ununu nashui ika yusin janchaidan, jawa tsuan nemama uinanmandi! ¿Nukun Xanen Ihubunan, “Mesías Cristoki”, iwanan, shinankanimenkain? <sup>27</sup> Jakia Mesías Cristo juxanaidan, jadakidiada juxanai tsuan nun unanmaki. Jaskaken janua Jesús juni nukun nun unainwen taea Mesías Cristo itidumaki— ikaibun

<sup>28</sup> Templo jemaintin anuxun yusinkin jaska jabu janchaikidi shinain janchaibu ninkatan jancha kushipawen Jesúsun jatu shinanmakin:

—Matunan, ea unankin janua en yumediani man unandiaii. Emebi en shinanen ibubis en juamaki. Jakia padananainsmatun ea yununidan, matunan, man ja unanmaki. <sup>29</sup> Jakia ean ibubis jatun ea yununi anua en taxnikidaniwen taexun en ja unaiin— jatu wa

<sup>30</sup> janua jaskaiwen taexun achinun ixun shinanbiaibun janu mawaxanai kemadiamawen taexun tsuan meabuma iniki. <sup>31</sup> Janua jakidi jaskabiaibu ichapabun ikunwain yuinamei:

—Mesías Cristo juxun dami ichapa nuku waxunxanaikidi nuku yusinmisbu na junin jaska nuku yusinmisbu keska waikiki. ¿Chipu Mesías Cristo juxun na junin akai binutidumamenkain? Nun shinanan, atidumaki— iki

*Jesús janu kaxanai tsuan unanma jatu yuiniaki, na janchadan*

<sup>32</sup> Jesúskidi yuiaibu fariseobun ninkabain Diosbe nukunabu janchaxunika xanen ibubu anu buxun jabube yubakatan jau Jesús achitanunbun jabun Templo mekemisbu betsabu jatu yunuabun <sup>33</sup> januxun mapuabu Jesúsun ana jatu yuikin:

—Jaskaida ea wayamakanwen, uxa eskadabes besti matube en iyuaidan. Janua jatun ea yununi anu en ana chintunxanaidan. <sup>34</sup> Jaskaken matunan, janida en kai anu man unanmabia ea benakin ea bechiama man ixanaii, man jadi katidumawen taeadan— jatu waya

<sup>35</sup> jaskai ninkai judio xanen ibubu yuinamei yuka iki:

—¿Jani ka nun bechiama itidu chani ikimenkain, jadan? ¿Nukunabu nawabube chai jiwebaunabu anu kaxanun ika shinain ikimenkaintsa? ¿Griegonawabun Dios unanbumanu yusintanun ika ikimenkain? <sup>36</sup> Na jaska yuiaidan, jaskada shinain ikimenkain: “Janida en kai anu man unanmabia ea benakin ea bechiama man ixanaii, man jadi katidumawen taeadan”, ikai nun ninkaidan— ikin shinanibukiaki.

*Ikunwainbu jawenjiwekuinmati unpax jayakidi Jesúsun jatu yusinikiaki, na janchadan*

<sup>37</sup> Nawai keyui jawen jenei ma xaba dabe inun besti kaya nawai besi beshian ma kakatsi keyui dasibi ichajaidabun Jesús benikauan jancha ku-shipawen jatu yuikin:

—Unpax manujaidai man tetsusinaidan, eanu bexun aki bekanwen, ea ikunwankinan. <sup>38</sup> Jabiaskadi Diosun jancha keneni keska wakin tsuanda ea ikunwain jawen juinti medanua jiwekuinmati jene jabai netsuama ixanikiki, jatu kushipa waidan— jatu waniki.

<sup>39</sup> Jaska nuku yuikinan, Diosun Yushin Pepakidi nuku yuiniaki. Januxun Jesús ikunwainbu jawen kushipa Diosun inanun ikaya Jesús mawa bestean jawen Epanu kadiamaken Diosun Yushin Pepa nuku inanyuama iniki.

<sup>40</sup> Januxun jatiditun Jesúsun jancha ninka pewatan yuikin:

—Chanimá na junidan, Diosun jancha yuixunikakidi Moisin nuku yuindan, jaki— ikaibun

<sup>41</sup> betsabundi yuikin:

—Mesías Cristodan, jaki— akaya betsabundi yuikin:

—Jamaki. Galilea anua Diosun Mesías Cristo taxniama ixanai nuku yusinmisbuki. <sup>42</sup> Janua taxnikidanxanaidan, “Davidin mae Belén anua Davidin babadan, Cristo Mesías ixanikiki”, akin nuku kenexuniki. Jaskakenan Jesúsdan, Diosun Mesiasmaki — akaibun <sup>43</sup> Jesúsun jatun jancha ninkatan jawen taea Jesúskidi shinan betsa betsapawaibuwen taexun <sup>44</sup> jatiditun achibain bichibupananbun tsuan jawa meabumaken

*Judio xanen ibubun Jesús ikunwanma dananibukiaki, na janchadan*

<sup>45</sup> janu fariseobu inun Diosbe nukunabu janchaxunika xanen ibubu ichaxun Jesús anu jatu ynuua Templo mekenikabu jabun Jesús iweama mais beaibun xanen ibubu betsan jatu yukakin:

—¿Jaskakin Jesús achi biai kaxun man iweama ixumen?— jatu wa

<sup>46</sup> mekenika betsan yuikin:

—Jaska ja juni janchai peaya juni betsadi janchakin nematidumaki, chakabu jatu yuiamawen taexunan— jatu wa

<sup>47</sup> januxun fariseobun jatu yuikin:

<sup>48</sup> —Jabi man unainsmapabenibin, matudi padainkikidan! Nuku nun xanen ibubu inun nun fariseobunan, nun jawa ikunwanmaki. <sup>49</sup> Jakia Moisin jancha unanbumawen taea ja yudabudan, ibubis yupukunain ikanikiki— jatu waya

<sup>50</sup> janua fariseo betsa Nicodemo Jesús anu ka jabe janchatanimatun jatu yuikin:

<sup>51</sup> —Jawen jancha ninkadiama jawada dayai nun uindiamibia Moisin janchawen taexun: “Juni chakabuki”, akin nun kupidumaki— jatu wa

<sup>52</sup> Nicodemoki sinatakin yuikin:

—Galilea anua unainsmapabu keska shinanyamawe. Diosun jancha kenenibu una anua uintan Galilea anua Diosun jancha yuixunika taxniamaxanai min unanxanaii— itan <sup>53</sup> jenebaini jatun jiwe anu inun buake buakenibukiaki.

## 8

*Jawen taexun unanti wanun, iwanan, ainbu chutanamei achitan Jesús anu iyunibukiaki, na janchadan*

<sup>1-2</sup> Olivos Mati anu ka jadi uxashini penaya Templo jemaintin anu Jesús ana ka tsauken jaki ichabidanbidanaibu yudabu jatu yusinkin tae-watanaya <sup>3</sup> ainbu betsa beneyabia juni jawen benemabe chutanamei chitetan achixun Diosun jancha kenenibu yusinanamisbu inun fariseobun iwexun mapubaunabu namakis ainbu nashui akin Jesúsun besuudi nichintan <sup>4</sup> yuikin:

—Yusinaan, na ainbunan, chakabukin juni betsa chutamaya achiabu mi-anu nun iwexuki. <sup>5</sup> Ainbu jaskaxukanan: “Mishkiwen tsaka tsaka akin jau tenanunbunwen”, akin Moisin nukun xenipabu yununiki. Jaska wanikenan, ¿mianan, jaskada jakidi min yunuai?— iwanan, <sup>6</sup> ja akatsi unanti wakin yukabu jakia jatun bepadameti jancha unain janchama tinixun Jesúsun metutiwen mai kenekin taewaya <sup>7</sup> jaki sinatakin ana jabias yukadanwanbu bewenikitan jatu yuikin:

—Tsuada Dioskidi chakabu man jayamatun ja dukuntun mishkiwen tsakakin taewadikanwen— jatu watan

<sup>8</sup> ana tinixun ana mekenen mai keneaya <sup>9</sup> Jesúsun jancha ninkatan jabun iwea bestibu bui anibubu bui taei chipu jatidi bukin ichabu namakis ainbu nichianbu besti jenebainabu <sup>10</sup> ana beweninatan Jesúsun ainbu yukakin:

—Ainbuun, jabun mia tenanun, iwanan, iweabudan, ¿jania? ¿Tuan mia tsakama ixumen, kupikinan?— aka

<sup>11</sup> —Xanen ibuun, tsuan ea jaska wamabin!— aka

—Peki. Jau mia kupinunbun, iwanan, eandi en yunuamaki. Jakia ana chintunkidan chakabukunkainama ixun inun kadiwe— aka ainbu kaya

*Jesús dasibitun bin chaxajaida keskakidi jatu yusinikiaki, na janchadan*

<sup>12</sup> Templo jemaintin anuxun Jesúsun yudabu uinkin mapuabu jatu yuikin:

—Eadan, mai jidabi en bin chaxajaida keskaki, jatu tapinmanikadan. Tsuabunda ea ninkatan chibainbudan, ja binki nukui jiwea bena jayakanikiki. Jaskawen taea jawa meshu medan ana biunma niama keska ixankanikiki— jatu waya

<sup>13</sup> janua fariseobun jaskai ninkai jaki sinatakin yuikin:

—Mimebi kein min pepaidan, jawa kushipa min jayamaki— akaibu

<sup>14</sup> —Emebi en dayuikibiakin janua en juni inun janu en kaxanai en unainwen taea en dayukiaidan, jadan, kushipaki. Jakia janua en juni inun janu en kaxanai man unanbumawen taexun man kaneaii. <sup>15</sup> Yudabun shinamiswen man ea unanti waii. Jakia eanan, jaskawen en matu unanti wamaki. <sup>16</sup> Jakia jaska en Epan ea yununibetan shinankin chanima en mesti en akamaki, jawa kaneama ean unanti wakinan. <sup>17</sup> Januxun Diosun Moisés yuia matu kenexunidan, ja uinkin jawada jakidi juni dabe jabias jancha chaniaibu jawen jancha man ikunwantiduki, chanimakenan. <sup>18</sup> Jaskaken emebi ekidi en pe yuiaii. En jaskaya en Epa jatun ea yununidi jabiaskadi ekidi pe yuikiki. Ja nuku dabetan jabiaskas chanikin nun yuitiduki, jau man nuku ikunwanunbunan— jatu wa

<sup>19</sup> —Min Epa mikidi chaniai nun ninkanun, ¿jani min Epadan?— akabu Jesúsun jatu kemakin:

—Matunan, man ea unanmaki. En Epa man unanmadiki. Ea unankin en Epadi man unankeanaii— akin <sup>20</sup> Templo jemaintin anuxun na jaska yusinkinan, bau jaki nuitapaibu inankuinkin pei mistumisbu dapixun Jesúsun yusianyan janu mawaxanai kemadiamawen taexun tsuan mekin achiyuama inibuki.

*Janida en kai anudan, man katidumaki, akin Jesúsun jatu unantimaska wanikiaki, na janchadan*

<sup>21</sup> Jabianuxundi Jesúsun mapuabu jatu ana yuikin:

—Ea en janida kakenan, ea benai matun chakabuwen taea man mawaxanaii. Janu en kaxanai anu man katidumaki— jatu wa

<sup>22</sup> ninkai judio xanen ibubu yuinamei:

—Ja jaska yuiaidan, jamebi tenanmepai ikimenkain: “Ja en janu kaxanai anu man katidumaki”, ikaidan— ikaibun

<sup>23</sup> Jesúsun ana jatu yuikin:

—Matudan, man nenuabu bestiki. Jakia eadan, en manaundiaki. Jaskawen taea mai anua besti man baki. Jakia eadan, na mai anua en bamaki. <sup>24</sup> Jaskaken matu yuikin: “Matun chakabu jakimama man mawaxanaii”, akin en matu yuixuki. Ninkakanwen. Chanima en jiwei ikibi ini man ea ikunwankatsi ikama matun chakabuwen besti man mawaxanaii— jatu wa

<sup>25</sup> e itan betsabun yukakin:

—Miadan, ¿min tsua iki ikai? —akeakeabu

—¿Jaskai jamendaka en matu jancha chakawai ikai? Jabia en matu yuikin taewaxuki. <sup>26</sup> En matukidi ichapa unanti wakin en yuitidubia jatun ea yununitun chanima jancha ea yuia ninkatan jabiaskadi yudabu en yuikubainaii— jatu wa <sup>27</sup> jawen Epa Dioskidi Jesúsun yuiai jawen jancha ninkabiai jawa tapianbumaken <sup>28</sup> jaskawen taexun Jesúsun ana jatu yuikin:

—Matunan, matun Juchi Kayabi Iyua ea binikin benimaxun janu man ea unanxanaii. Natianan, jaska en shinainwen en akamaki. Jakia jaska en Epan ea yusini besti en yuimiski. <sup>29</sup> Ja inun, ea yununi eskatian ebeken jamapai betsabetsa wakin bechipaimakin en benimawamiswen taexun en Epan ea besti jenebainamaki— <sup>30</sup> jatu wai xanen ibu ichapabun ikunwankin taewaibun

*Diosun bakebu inun diablo Satanásan tsumabukidi yusinikiaki, na janchadan*

<sup>31-32</sup> januxun ja xanen ibubun ikunwankin taewaibu Jesúsun jatu unanti wanun ixun jatu yuikin:

—Tsuabunda en jancha ninkatan chanima uke medan mestenwantan man chintuanmadan, man en tsuma kayabi itidubuki. Jaskawen taexun chanima jancha unankin man tapianyan chakabun matu ana tsuma wama ixanikiki—jatu wa

<sup>33</sup> jabun kemakin yuikin:

—Nukudan, nun Abrahamnen bababuki. Nukun yuda tsuma wabiaxun nukun shinan tsuan nuku biantidumaki. Jaskaken ¿jaskakin: “Matu ana tsuan tsuma wama ixanikiki”, ikin min nuku yuiae?— akabu

<sup>34-36</sup> Jesúsun ana jatu yuikin:

—Chanima en matu yuiaeii. Diosun jancha kanekin dasibibun chakabu shinainbu jatun chakabun jatu yabumiski, jawen dayadu keska wakanan. Jaska inun, juni betsan juni betsaa bikin jawen dayadu waimakenan, ana jawenabube jiwtiduma shinankin nichinmisbuki. Jakia juni betsan bakedan, jawen bake kayabi jani nichianma jabe ikunkainmiski. Jaskaken eanan, jaska keska wakin Diosun juni bake kayabitun matun jawada chakabu man dibia keska jakimawakin en matu mekeaya chakabun matu ana yabutidumaki. <sup>37-38</sup> Jakia en jancha ninkama man Abrahamnen bababubia eki sinatakin man jatiditun ea detekatsis ikaii. Ea janchaidan, en Epan jawada akai uintan en matu yuimiski. Jakia matunan, matun ibuan akai uinkin ninkatan man mawamiski— jatu wa

<sup>39</sup> —Jamaki. Diosun katuni Abrahamnen bababudan, nun nukuki— ikabun Jesúsun ana jatu yuikin:

—Matu chanima man Abrahamnen bababudan, jaska Abrahamnen ani man adiakeanaii. <sup>40</sup> Jakia Dios anua ninkatan chanima jancha en matu yuibia danankin man ea detepai ikaii. Diosun jancha chanima Abrahamnen ninkatan man ikai keska ikama iniki, danainan. <sup>41</sup> Jaskaken matunan, matun ibuan amis keska shinain man ikaii— jatu wa jaki sinatakin yuikin:

—Nukudan, nun jusi bakemaki. Nukun ibu kayabi bestichaidan, nun jayaki, Diosdan— akabu

<sup>42</sup> —Dios anua en juniwen taexun Dios matun ibu kayabikenan, jaska shinankin man ea bechipaidiakeanaii. Eadan, en shinanen aki en juamaki. Jakia jawen shinanen Diosun ea yununi aki matube jiwei en jumiki. <sup>43</sup> ¿Jaskakin man ea ninkakin pewakatsi ikabumamen? Matu yuinun ninkakanwen. En janchadan, pata keskatun en jancha man tapin pewabumaki. <sup>44</sup> Man jaskawen taeidan, matun ibudan, diablo Satanáski. Jaska shinain keska axunkin man bechipaimamiski. Jaska inun, bai taeni anua diablo Satanás puben detenan kain taeni ikunkainmiski. Ja inun, chanima jancha jayamawen taea chani chakakunkaindiamiski. Ja inun, chani chakanikawen taea chanin epaki. <sup>45</sup> Jakia chanima jancha en matu yuibia man ikunwankatsi ikabumaki. <sup>46</sup> ¿Jadatutun bedubi en jawa chakabu akai man ea uinshinxun ea chitetidumen? Eanan, en chanima jancha yuibiaya ¿jaskakin man ea ikunwanma chitekubainkanai? <sup>47</sup> Jaska inun, Diosunabun Diosun jancha ninkamisbuki. Jakia man Diosunabumawen taexun man ninkakatsi ikabumaki— jatu waya

*Abraham jayadiama Cristo dukun jiwea ipaunikiaki, na janchadan*

<sup>48</sup> januxun judio xanen ibubun Jesúsun yuikin:

—Chanima nun mia yuiaidan, yushin chakabu jaya dikabia min Samari-anawaki, unainsmapadan— akabu

<sup>49</sup> Jesúsun jatu kemakin yuikin:

—En jawa yushin chakabu jayamaki. En Epa en kenwanbiaya man ea danaiin. <sup>50</sup> Emebi en keanmaki. Jaska inun, “Ea kenwankanwen”, iwanan,

en matu yuiamaki. Jakia jatun matu unanti waxanaitun matu ea kenwanmakatsis ikikiki. <sup>51</sup> Jaskaken jabun en jancha ninkakin jeneama mawabia mawa kayabiamma ixankanikiki— jatu wa

<sup>52-53</sup> janua jabu Jesúski sinatakin yuikin:

—Chanima min yushin chakabu jayaki. Nukun xenipabu pepa Abraham inun Dios janchaxunika dasibibudi mawakubainibuki. Jakia: “Tsuanda en jancha ninkai mawama ixankanikiki”, ikin min yuiaidan, ¿xanen ibukin min jatu binunkin keyua iki ikai? ¿Miadan min tsua iki ikai, jaska shinain ibubis keinan?— akabu

<sup>54-55</sup> —Emebi en keainan, pemaki. Jakia en Epan ea kenwanmiski. Unanmabia: “Nukun Dioski”, ikin en Epakidi man yuimiski. “Eadi en Dios unanmaki”, iki en chani chakakeanaii, matu keskaidan. Jakia en Epa Dios unankin jawen yunua en chibanmiski. <sup>56</sup> Yudabube jiwei en juai uinkatsi manakai ikunwain matun xenipabu Abraham benimaniki. Atimas ea uintan shinan chankain benmajaidaniki— jatu wa

<sup>57</sup> ninkai e itan yuikin:

—Min anibui 50 badi kadiamabia, ¿jaskatan nukun xenipabu Abraham min uinimen?— akabu

<sup>58</sup> —Chanima en matu yuiaii. Abraham jayadiama ea dukun en ikibi ini en ikunkainaii— jatu waiwen taexun <sup>59</sup> detekatsi ikin mishki biakte biaketen tsakapananbun mapubaunabu anu junei nashui itan Templo anua kainkaini

## 9

### *Juni bekun kaini Jesúsun bepexnikiaki, na janchadan*

<sup>1</sup> janua sábado juindukuntitian Jesúfbe kainkaini kakin mae anu kenebainibu janu jikití xui kexa juni bekun kaini tsauxun buanaibu pei jatu ea aki tsaua binubainkin bechitan <sup>2</sup> nun jawen tsuma betsan Jesú yukakin:

—Yusinaan, ¿jaskai na juni bekun kainimen? ¿Kaindiamaken tsuan Dioskidi chakabuwanimen? ¿Jawen ibubun animenkain? ¿Jamebi inidaka?— aka

<sup>3</sup> —Jaskamaki. Jamebi Dioskidi chakabuwamaki. Jawen ibubundi chakabuwabumadiki. Jakia ikis Diosun pepawati kushipa yuda dasibibu en uinmatiduwen taea jabiaska bekun kainiki— iwanan <sup>4-5</sup> —Na mai anu yudabube jiwea en bin chaxajaida keskaki, jatu unanmanikadan. Jaska en xaba jayawen taea jatun ea yununitun daya axundinankanwen. Ea xaba keska ma en kaken chakabu juaya ana tsua dayatidumaki, meshu beai keskayadan— <sup>6</sup> nuku watan main kemu michuxun pupus watan jawen juni bekun bepxukin <sup>7</sup> yuikin:

—Siloé janu unpax uke medan jabai anu mishki pukinibu anu unpax tsaua anu ka bechukitanwen— akadan, nukun janchawen Siloé yuiadan, ‘Jadi yunuaki’, Jesúsun jancha ninkakin ikunwain benikaini ka bechukia bepexetan uinbaini inun kaken <sup>8</sup> janua ja dapi jiweabu inun jabun pei ea ikai uinmisbun yuka idabekin:

—Ja juni bekun tsauxun jatun jatu pei ea amisdan, ¿na junidan, jabiamen?— ikaibun

<sup>9</sup> betsabun yuikin:

—Jaa, jabiaki— ikeakeaibun

januxun betsabundi uinkin yuikin:

—Jamaki. Ja itsaki— ikaibun ibubis juni bekun bepexeatun jatu yuikin:

—Jabia en eaki— ikaya

<sup>10</sup> januxun yukakin:

—¿Jaskatan min ma bepexeamen?— akabu

<sup>11</sup> jatu yuikin:

—Ja juni kenakin Jesús waibun pupus watan ea bepxuxun: “Siloe anu bechukitanwen”, ea wa ka en bechukia bepxexetan en uin taewabidanxuki—jatu wa

<sup>12</sup> yukakin:

—¿Jania ja junidan?— akabu

jatu yuikin:

—En unanmaki. Janida niaki— jatu wa

*Juni bekun kaini bepxeshina fariseobun yukanibukiaki, na janchadan*

<sup>13-14</sup> januxun sábado juindukuntitian Jesúsun pupus watan xuxawabain-shinawen taexun fariseobu anu juni bekun xuxashina iyuxun jatu yuiabu

<sup>15</sup> fariseobun yukakin:

—Min bekunidan, ¿jaskatan min ma bepxeshinamen?— akabu

—Pupuswen Jesúsun ea bepxua bechukitan en uin taewashinaki— jatu wa

<sup>16</sup> jatidi fariseobun jaska shinanbumawen taea betsabu yuinamei:

—Moisin nuku yusini chibain jaki meseama sábado juindukuanma dayamisdan, ja juni Dios anuamaki— ikaibun

jakia betsabudi yuinamei:

—Jawen unanmati dami atimaska akinan, juni chakabun jaska watidumaki— iki fariseobu jatun shinan dabe wai paxkatan <sup>17</sup> juni xuxashina ana yukakin:

—Min bedu mia xuxawashinawen taexunan jakidi ¿jawa min yuiai?— akabu

—Ja junidan, Diosun jancha yuixunikaki— jatu wa

<sup>18</sup> jawen ibubu yukadiama ja juni bekun kaini ma uin pewaiwen taexun ju-diobun ikunwankatsi ikama jenetan januxun jawen ibubu kenabu <sup>19</sup> beabu januxun judio xanen ibubun jawen ibu dabe jatu yukakin:

—¿Nadan, min bakemen? ¿Chanima bekun kaini man yuimismen? ¿Jaskatan ma uinmenkain?— akabu

<sup>20</sup> jawen ibubun kemakin jatu yuikin:

—Na junidan, nukun juni bakeki. Bekun kainidan, nun unaiin. <sup>21</sup> Jakia jaskatan ma uinshina nun unanmaki. Tsuanda xuxawakin uinmashina nun unanmadiki. Jabi yukakanwen, juni ewakidan, jamebi jaskashina jau matu yuinunan— jatu wa

<sup>22-23</sup> bebunkidi yuinamei:

—Tsuanda yuikin: “Jesúsdan, Mesíaski”, ikaibu judiobu xanen ibubun ninkatan jatun ichati jiwe anu jau ana ichayamanunbun jatu nichinkatsi yubakashinabuwen taea unain jatuki datekin jawen ibubun yuikin:

—Juni ewaki. Ja yukakanwen— jatu wa <sup>24</sup> janua ana yuinetan xuxawashina ana kenaxun yuikin:

—Chani chakamajaida Diosun besuubi nuku yuiwe. Nukun nun uiainan, ja junidan chakabuki, Diosun jancha chibanmadan— akabu

<sup>25</sup> januxun ana jatu yuikin:

—Juni chakabumenkain, en unanmaki. En bekunbiaken ikis ea uinmashina ja besti en unaiin— jatu wa

<sup>26</sup> ana jawenchains yukakin:

—¿Mia jaska kaya washina min ikai uinmakinan, mia jawawen uinmashinamen?— akabu

<sup>27</sup> —¿Jaskakin man ea ana yukai? Dama en matu yuixuki. ¿En jancha man ninkamamen? ¿Matundi daka man chibanun ika ikanai?— jatu wa

<sup>28</sup> kunyan akin jancha kushipawen yuikin:

—Min jawen tsumaki. Nukunan nun Moisés chibankapeaii. <sup>29</sup> Dios Moisésbe janchaniki. Jakia ja juni janiada kainkidanimadan, nun unanmaki—akabu

<sup>30</sup>—Man ea peidawawa, ja juni janiada taxnia man unanmadan. Jaskabia en bedu ea beplexhinken en pe uiain. <sup>31</sup> Juni chakabun Dios ea akaidan, Diosun ninkaimaki. Jakia Dioski datekin jawen jancha ikunwankin yukai Diosun ninkamiski, nun unanan. <sup>32</sup> Bai taei anua bekun kaian beplexnidan, nun jaska ninkaimaki. <sup>33</sup> Diosun yunuama jaska watidumaki. Jaskaken Diosun Jesús medabewashinaki—jatu wa

<sup>34</sup> janunkain ana sinatajaidakin yuikin:

—Mia bekun chakabujaida min kainiwen taexun min nuku yusintidumaki. Kadiwe—atan jau ana jatube ichayamaxanun nematan nichinibuki.

### *Fariseo xanen ibubu bekun keska inibukiaki, na janchadan*

<sup>35</sup> Janu ichati jiwe anuxun beplexhina nichianbu ka Jesúsun ninkatan benabauni jaki nukutan yukakin:

—Min Juchi Kayabi Iyua Diosun Katuadan, ¿min ikunwain?—aka

<sup>36</sup> —Xanen ibuun, en Juchi Kayabi Iyua en ikunwantidudan, ¿tsuamen?—aka

<sup>37</sup> Jesúsun ana yuikin:

—Min uin jabe janchaidan, en jabiaki— aka kenwain Jesús naman danti ixun yuikin:

<sup>38</sup> —Xanen Ibuun, en mia ikunwaiin—aka

<sup>39</sup> Jesúsun ana yuikin:

—Diosun jatu unanti waiwen taea yudabube en jiwekunkainaii. Tsuabunda uinsbuman beplexexun jau uinxanunbun inun natian tsuabunda shinankin uinbiai bekun keska jau ixanunbun en juniki—ikai

<sup>40</sup> fariseo betsabun jabetan ninkatan Jesús yukakin:

—¿Nun uianma nun bekun keska min nuku shinain?—akabu

<sup>41</sup> Jesúsun jatu yuikin:

—Diosun yusian unandiamma matun chakabuwen man kaneama ikeanaii. Jakia yuikin: “Nun Dios unaiin”, ikin jawa ninkama man kaneaii—jatu watan,

## 10

### *Chaxuwankidi miyuiken Jesúsun jatu yusinikiaki, na janchadan*

<sup>1</sup> ana Jesúsun jatu yuikin:

—Chanima en matu yuiai ninkakanwen. Tsuada chaxuwan meketi xuiwen jikiama jamaudi jawen keneki inakain butumisdan, yumetsubuki. <sup>2</sup> Jakia janu jikiti xui kayabi beplexhinken jikimisdan, chaxuwan mekenika kayabiki.

<sup>3</sup> Jamen kene xui mekenikatun chaxuwan uinkin beplexhuna jawen ibuan chaxuwan tibi jawen kenawen kenapakea jawen jui ninkatan kainbidanai-bun <sup>4</sup> jawenas kainmakin dasibi kenakin keyubainkin bepuaya jawen jui ninkabainkin chibankapeaii. <sup>5</sup> Januxun juni betsan jatu iyunun ixun jatu kenadiabaina jawen jui ninkama chibankapeaii paxai jamakidi bumisbuki—akin <sup>6</sup> chaxuwan miyuikidi jancha juneawen Jesúsun jatu yuikin jatu yusin-paia tsuan ninkabumajaidawen taexun

### *Jesús chaxuwan mekenika kayabi jakidi yusinikiaki, na janchadan*

<sup>7</sup> judio xanen ibubu Jesúsun ana jatu yuikin:

—Chanima en matu yuiaii. Janu chaxuwan jikiti xuidan, jabia en eaki.

<sup>8</sup> En judiama jabu dukun bea dasibibu en kenawen padananankubainmis-budan, yumetsu keskabuken chaxuwan pepabun jatun jancha ninkama

ikubainibuki. <sup>9</sup> Jakia janu jikitixuidan, en eaki. Tsuada eanu jikiaibu en jatu mekekubainxanaii, Diosunabu jatu wakinan. Chaxuwan meke pejaidawakin jatu bichitan kainmakin basi pepa pimakin en jatu ama keska wakubainxanaii. <sup>10</sup> Juni ichakanikaidan, yumetsukin detekin yamawai padananain bemisbuki. Jakia jatu jiwekuinmai ikibi imaidan, en ea juniki, unanuma ichapa jatu inankin yaushiama jatu kushipa waidan. <sup>11</sup> Eadan, en matun mekenan pepaki. Mekenan pepatunan jawen chaxuwan mekei yaushi mawaxuntiduki. <sup>12</sup> Jakia dayadun pei binun ika dayakin chaxuwanmekexunaya janua kaman inu pubenen chaxuwan pinun ika juaya bechitan jawenamawen taea chaxuwanki pechitan jenebaini paxaya inawan bestibu achiken jatidi paxai benumisbuki. <sup>13</sup> Janua dayadu chaxuwanwen nuiama pei besti binun ika mese juaya paxamisbuki. <sup>14-15</sup> Jaska inun, En Epan ea unanun eandi en Epa en unain keska wakin enabu chaxuwan keskabu en jatu unanyan jabundi ea unankanikiki. Jaskaken en mekenan pepawen taea enabu chaxuwan keskabu en jatu mawaxuntiduki. <sup>16</sup> Nenu besti enabumaki, na chaxuwan kene anuadán. Jakia chaxuwan betsabudi Diosun ea ma yununiki. Israelbumabiaken jatudi en mekekubainxanaii. En jui ninkaibu chaxuwan xukua bestichai mekenika bestichaiya keska Israelbun ea ikunwainbube Diosun enabu dasibi ea iwexunxankanikiki, jatuki dasi wakinan. <sup>17</sup> Jaska inun, jawen mawati kushipa inun jawen bestenti kushipa en Epan ea yununi en jayaki. Ana bestenkatsi en jiwea yaushiama en mawaxanaiwen taea en Epan ea bechipai ewen nuikiki. <sup>18</sup> Jaskaken tsuan ea debu watidumaki. Jakia ikatsis iki ibubis en shinanen en debutiduki. Mawakin en jiwea en jenesina en ana bitiduki, ja kushipa en Epan ea yununiwen taeidan—jatu waya

<sup>19</sup> Jesúsun jancha ninkatan judio xanen ibubun shinan dabe wai paxkakin  
<sup>20</sup> betsabun yuikin:

—Yushin chakabu jaya patapaki. ¿Jaskakin nun ninkakubaini ikanai?—jatu waibun

<sup>21</sup> betsabundi yuikin:

—Yushin chakabu jayatun pepa jancha yuitidumaki. Yushin chakabuyatunan, bekun xuxawatidumadiki. Jaskawen taea Jesúsun juni pepaki—ibaini buaibun

### *Judio xanen ibubun Jesúsun dananibukiaki, na janchadan*

<sup>22-23</sup> janua uitian Jerusalén anu Dios kenwanti Templo pewanibu shinain besi nawaibutian Templo jemaintin kexa anu janu utai juindukuin tsauti chaipa jawen kena Salomón anu Jesúsun kai <sup>24</sup> xanen ibubun bebuntexun yukakin:

—Jatixuinda nun ana jamen bika teneyamanun menan jawa kushi xababi nuku yuidiwe, jibia min nukun Mesías Cristomenkainan—akabu

<sup>25</sup> Jesúsun jatu kemakin yuikin:

—Matunan, en matu yuia man ea ikunwanma ikimaki. En Epan kushipawen jawada pepa xabakabi en amiswen taexun en tsuamenkain man ea unantiduki. <sup>26</sup> Jakia man en chaxuwanmawen taexun man ea jawa ikunwainsmaki. <sup>27</sup> En chaxuwanen ea unankin en jui ninkakin ea chibambainaibu eandi en jatu unaiin. <sup>28</sup> Eki chiti ikabu benuama en jatu jiwekuinmakubainxanaii. Padanxun tsuan jatu ea mebianma ixanikiki. <sup>29</sup> Ja inun, tsuabuda en Epa kushipa dasibi binuatun jabu ea yunua jatuwen nuikin en jatu mekejaidakubainai tsuan ea jatu mebtintidubumaki. <sup>30</sup> Ea inun en Epa Dios ja dabe nun bestichai keskaki, dapaxkanaismadan—jatu wa <sup>31</sup> mishki

tunkuwen tsakanun ixun judio xanen ibubun bitanaibun <sup>32</sup> jatuki dateama Jesúsun ana jatu yuikin:

—Epa Dios anua dami midima pepa en matu uinmamiski. ¿Jadatu damiwen taexun man ea tsakanun ika ikanai?— jatu wa

<sup>33</sup>—Pepawen taexun nun mia tsakamaki. Jakia juni bestibia mimebi min janchawen: “En Dioski”, ikin min Dios ichaiwen taexun nun mia aki ikaii—akabu

<sup>34</sup> ana jatu yuikin:

—Manakanwen. En Dios ichamaki. Diosun jancha yuixunikatun kenekin: “Ja idabeaibu pewanika jatu wakin Diosun jawen jancha jatu yunukin yuikin: ‘Man jatu medabewakubainaidan, man diosbuki’, ikin Diosun jatu yuiniki”, akin jatu kenexuniki, na kenedan, nun unankanaii. <sup>35</sup> Jaskawen taexun man danantidubumaki. Jaskaken jawen jancha jatu yunukin “Man diosbuki”, akin nixun <sup>36</sup> Diosun ea medibi waxun yudabu anu ea yununidan, ean yuikin: “En Diosun bakeki”, en ikaiwen taexun: “Min Dios ichaii”, ikin ea chitekin man kaneaii. <sup>37</sup> Jamen en Epan pepawai keska en akamakenan, en jancha ikunwanyamakanwen. <sup>38</sup> Jakia en Epan pepawai keska en akai en jancha man ikunwanma ibiakin en Epan kushipawen en dami pepawai ikunwankanwen. Ja dami ikunwankin en Epa ebe imis inun en jabedi imis man unantidubuki— jatu waya

<sup>39</sup> ana achipananbun Jesús paxai <sup>40</sup> Jordán Jene pukei januxun Nashimanika Juanen jatu nashimakin taewani anu nun jabe kaken <sup>41</sup> ana midima jadi yudan kaian jaki xukuabu jatu yusian yuinamei:

—Juanen damiwamabia dasibi Jesúskidi nuku yuishinadan, chanimaki— ikin <sup>42</sup> jadixun ichapabun Jesús ikunwanibuki.

## 11

### *Lázaro mawanikiaki, na janchadan*

<sup>1-2</sup> Janua shinan Betania anuxun Maríán chipu xeni ininipawen Xanen Ibu Jesúsun tae peukaxun jawen buwen tede axanai anu jawen betsa María inun Martabe jatun pui Lázaro jiwea janua isin teneaya <sup>3</sup> jau Jesús yuixuntanunbun jawen pui dabetan jatu yunua buxun Jesús jatu yuixunkin:

—Xanen Ibuun, min jaibu min bechipaiaidan, isin teneikiki. Nukube kaxun uin kawe— akabu

<sup>4</sup> Jesúsun ninkatan nun jawen tsumabu nuku yuikin:

—Ja isinmanan tenankin debu wamaki. Jakia Dios inun jawen baken kushipa jatu uinmaxanun ika isin teneikiki— ikaya

<sup>5</sup> María inun Marta inun jatun pui Lázaro bechipaijaidabiai <sup>6</sup> Lázaro isin teneai yuiabu ninkatan kayuama ana uxá dabei Jesús bashikushinxun

<sup>7</sup> nun jawen tsumabu nuku ana yuikin:

—Judea anu ana bunankanwen— nuku wa

<sup>8</sup> —Yusinaan, judio xanen ibubun dama jadixun mishki tunkuwen mia tsakapai ishianbuki. ¿Jaskai jadidi min ana kakatsi ikai?— nun wa

<sup>9</sup> nuku yuikin:

—Xaba tibidan, 12 hora jayaki. Badidi xabatian tsuada kai uin pewabaini tsua juti itidumaki, na en mai anu xaba chaxa jayawen taeadan. <sup>10</sup> Jakia tsuada meshu medan biunma kaidan, juti itidubuki, eauma kai keskadan— <sup>11</sup> itan,

—Nukun jaibu Lázaro ma uxaki. Datekin en bestenwain kaii— nuku wa

<sup>12</sup>—Xanen Ibuun, ja juindukuin uxadan, mawama mainkiki. Kayamawe— nun wa <sup>13</sup> Lázaro mawakidi Jesúsun nuku yuibia unanma uxa bestiakidi nun shinaniki. <sup>14</sup> Jaska nun shinain unantan xabakabi Jesúsun nuku yuikin:

—Lázarodan, ma mawashinaki. <sup>15</sup> En jadimaken ishinken en benimaii. Jaskadan peki, matunadan, ana xabakabi en matu ikunwanmai kaidan. Eki sinatabiaibu anua Lázaro uinun bukanwen— nuku waya

<sup>16</sup> jaskaya nun jawen 12 tsuma kushipaya betsa Tomás tsupibu baken nuku yuikin:

—Kawe. Jadia jabe mawadinun bukanwen— nuku waya

### *Jesúsdan, mawabu bestenwankin jiwemanikakiaki, na janchadan*

<sup>17-19</sup> jaska ninkatan Jesúsbe nun kaya Betania dapixun: “Uxa dabe inun dabe ka Lázaro maiwashinabuki”, akin nuku yuiabu Jerusalén chaima kilómetro dabe inun besti anua judio xanen ibubu ichapa bexun jatun pui mawashinken Marta inun María kaxaibu jatuwen nuikin daewakin jatu nese wai beabun <sup>20</sup> Jesús juai bana ninkatan Martan itanun ika kai Jesúski nukui kaya Maríandi jawa ninkama jiweten jiweken <sup>21-22</sup> jaki nukuxun Martan Jesús yuikin:

—Xanen Ibuun, min nenukenan, en pui mawama ikeanshinaki. Jamapai shadabu min Dios ea akai ninkatan mia medabewakin mia axunmiski, en unanan— aka <sup>23</sup> Jesúsun yuikin:

—Min puidan, ana jiwxanikiki— aka

<sup>24</sup> januxun Martan yuikin:

—Chanima jabiaskaki. Badi jawen jeneaitian mawabu Diosun yuda dasibi bestenwanxanaitian ana jiwxanai en unanaiin— ikaya

<sup>25</sup> januxun Jesúsun ana yuikin:

—Bestenwankin jiwemanikadan, jibia en eaki. Tsuabunda ea ikunwain mawabia ana jiwxankanikiki. <sup>26</sup> Jabu dasibi jiweyuxun ea ikunwain mawataskama ixankanikiki. ¿Na en mia yuiaidan, min ikunwain?— aka

<sup>27</sup> —Jeen, Xanen Ibuun, min Cristo Mesíaski. Jawen bake yudabube jau jiweyuxanun Diosun yubanidan, jibia min miaki, en unanan. En mia ikunwaiin— atan

### *Lázarowen taea Jesús kaxanikiaki, na janchadan*

<sup>28</sup> janua Marta jawen jiwe anu chintunkidan jawen betsa María june yuikin:

—Nukun Yusinan ma juaki. Mia kenaikiki. Kayuwe— aka

<sup>29</sup> Maríán ninkatan benikaini jawen betsa Martabe kainkainaya <sup>30</sup> jawen mae anu jikidiama jabianuadi Marta jaki nukuxu anuxun Jesúsun manaya <sup>31</sup> judio xanen ibubun María daewai bea jawen jiweten jabe maniabun Maríán jawa jatu yuiama benikaini jawen betsabe jawaida buaibun jatu uintan shinain:

—Mishki tanpe anua kaxai kaikiki— ikin chibainbun

<sup>32</sup> Jesúski nukutan juinti nishma ja naman danti ixun Maríán yuikin:

—Xanen Ibuun, min nenukenan, en pui mawama ikeanshinaki— atan <sup>33</sup> judio xanen ibubube María kaxai bis ikaibun Jesúsun jaskaibu uin jatuwen uke medan nuijaidai jatube kaxakatsis ikin <sup>34</sup> jatu yukakin:

—¿Jani man datanshinamen?— jatu wa

—Xanen Ibuun, uinun kawe— abainabu <sup>35</sup> Jesús kaxakainaya <sup>36</sup> xanen ibubun uin yuinamei:

—Uinwen, bechipaidiaikikidan— akaibun <sup>37</sup> jakia xanen ibu betsabu yuinamediai:

—Juni bekun xuxawabiashina jau Lázaro mawayamanun xuxawati shadashina jawawen jaska watima damapaikiki— abainaibun

*Lázaro mawashina Jesúsun bestenwan ana jiwenikiaki, na janchadan*

<sup>38</sup> Jesús jatube kai kaxakunkainaya ana nui pae tsekekidani kakin mishki tanpe medan datantan mishki ewapawen bepushinabu anu kematan

<sup>39</sup> —Bepenkanwen— jatu wa nemakin Lázaron pui Martan yuikin:

—Xanen Ibuun, jamaki. Meyamananwen. Ma xaba dabe inun dabe ka chapui pisi mayaikiki— aka <sup>40</sup> Jesúsun kemakin yuikin:

—Ewen dateyamawe. “Ikunwankin Diosun kushipa min uiaiin”, akin en mia dama yuibidanxudan, shinanwen— akaya

<sup>41</sup> januxun mishki ewapawen bepushinabu bepenxunabu Jesúsun uintan naiudi teskanxun yuikin:

—Epaan, min ea ninkaiwen taexun en mia pepawaii. <sup>42</sup> En mia yuka ninkatan min ea medabewakubainmiski. Min ea yununidan, na ebe mapubaunabun jau ea uinkin ikunwanunbun xabakabi en mia yukaii— itan, <sup>43</sup> jui kushipawen kenakin:

—Lázaroon, jadi dakama taxniyuwe!— akaya <sup>44</sup> mawa tadiwen yabu kextu wakin sebikin utsi waxun jawen besudi beyabubiashinabu ana jiwei bestenan kainkidanaya Jesúsun jatu yunukin:

—Jawen yabu dapekanwen, jau kanunan— jatu wa dapeabu jaskai Lázaro ana bestentan jiweniki.

*Jesús achitan tenankatsi yubakanibukiaki, na janchadan*

(Mt 26.1-5; Mr 14.1-2; Lc 22.1-2)

<sup>45</sup> Jatun bedubi Jesúsun jaska waiwen taexun judio xanen ibu ichapabu Mariábe bexun Lázaro mawashina Jesúsun ana jiwemai uinkin: “Jesús Diosun bakeki”, ikin ikunwainbun <sup>46</sup> jakia xanen ibu betsabun jaska waxu ikunwankatsi ikama fariseobu anu buxun jaska Jesúsun axu jatuki chaniabu <sup>47</sup> janua Diosbe nukunabu janchaxunika xanen ibubu inun fariseobu Junta Suprema kena jatube ichatan Jesúski datei yuinamei:

—Ja juninan, jatu unanti wamakin dami tsuan jaska watiduma ichapa waikiki. ¿Nun jaska watidumen? <sup>48</sup> Nun nemama nuku jenekin keyutan dasibibun ikunwain jaki chiti iki keyutidubuki. Jaskaibun romano xanen ibubun jatun soldadobu midima bexun nukun Templo inun nukunabuya nuku yamawaxankanikiki— ikaibun

<sup>49</sup> jakia na jibia baditian Diosbe nukunabu janchaxunika xanen ibujaida Caifásin jatu ninkatan yuikin:

—Matunan, man jawa unanmaki. <sup>50</sup> Nukunabu jau paxkai sa iyamaxanunbun juni bestichai nukunabu mawaxunaya man pepakunkainxanai man jaska shinanmaki— jatu wanikiaki.

<sup>51</sup> Jaska yubakaibu shinanmakinan, ibubis Caifásin shinanma jakia na jibia baditian Diosbe nukunabu janchaxunika xanen ibujaidawen taexun: “Jesús judiobu mawaxuntiduki”, akin Diosun Caifás jatu yuimaniki. <sup>52</sup> Na jaska yunuidan, jabu bestikidi ikama jakia Diosun bakebu paxka jiwea akeakeabu jabun ikunwainbu dasibi ichawaxanun ika medabewai Jesús nuku mawaxunxanai <sup>53</sup> Caifásin jaska jatu yuiaiwen taexun judio xanen ibubun Jesús tenanun ika yubakai taenibukiaki.

<sup>54</sup> Judio xanen ibubu jaki jaskaibu janua Jesús xabakabi ana niama jatu anua kainkaini mae betsa Efraín anu janu jiweabuma dapi nuku iyuxun uxichaapakin Jesúsun nuku besti yusianyan

<sup>55</sup> Pascua judiobu nawai besimisbutian ma kemaya nawai taediamma jatun beya chibain jau Dios ana jatuki sinatayamanun Dios daewai ibubis pepakatsi iki mae jatiubuma anua Jerusalén anu yudabu midima bexun <sup>56-57</sup> Jesúsun yusiain ninkakatsi ikin benabaunaibun Diosbe nukunabu jan-chaxunika xanen ibubu inun fariseobun Jesú achitan bichinun, iwanan, jatu yunushinxun jatu yuikin:

—Jesú janiada bechitan nuku yuikanwen— ikaibuwen taea mae betsapanaua beshianbu Templo jemaintin anua yuinamei:

—¿Jesúskidi jawa min shinain? ¿Juimenkain? ¿Juamadaka?— ibaunbaunaibun

## 12

### *Jesúsun tae pemaki Maríán xeni jukanikiaki, na janchadan*

(Mt 26.6-13; Mr 14.3-9)

<sup>1</sup> ja Pascua nawai besi ana 6 día ma ika kemaibun Jerusalén dapi Betania anu nukube Jesú ka Jesúsun Lázaro bestenwainma ana jiweawen taexun <sup>2</sup> jawen shinan chankankin jabun Jesú duawakin badi kaya piti midima nuku bawaxunabu tapu chanpa anu Lázaro inun jawen jaibuaibu Jesúbe daka baxti ixun piaibun Martan piti betsapabebidan bebidanaya <sup>3</sup> januxun Maríán xeni jene ininipa jawen xankama 300 gramo kesua jawen kena nardo jas kadujaida bexun Jesúsun taeki jukakin tae peuka dasibi jiwe napua iki inin shiamayaya jawen bu chaipawen tede akaya <sup>4</sup> nun jawen tsuma betsapabebidanaya Judas Iscarioten chipu Jesú jatu achimaxanaitun yuikin:

<sup>5</sup> —¿Jaskakin jatu inantan 300 xaba daya peiti bihamamen? Ja peiwen nuitapaibu medabewati shadabin!— ibiai

<sup>6</sup> ja nuitapaibuwen nuiamadi jakia jatun nukun pei nukun kapankanki nun mekemabia eskadabe bi yumetsubiakunkaini <sup>7</sup> Judasin jaska yuiai ninkatan Jesúsun yuikin:

—Ana jadi yuiyamawe, na eki tanaxun aduimaxun en mawa chaputima wakin bebunkidi duawakin ea puxaxukidan. <sup>8</sup> Nuitapaibu matube jiweabu man jatu duwapaketiduki. Jakia edan, jawenchains man ea duwapaketidumaki— nuku wa

<sup>9</sup> janua Jesú Betania anu jua judio xanen ibubun ninkatan Jesú besti uinun ikama Lázaro bestenwainmadi jabe uinun ika beabun <sup>10-11</sup> jakia Lázaro ana bestenwainmawen taexun xanen ibu ichapabun jatu jenebain Jesúsun jancha ninkakin ikunwanun ika paxkabainaibuwen taea datei Diosbe nukunabu janchaxunika xanen ibubu yubakai:

—Lázaro dikabi tenantiki— ika yubakanibukiaki.

### *Jerusalén maewan anu Jesú jikinikiaki, na janchadan*

(Mt 21.1-11; Mr 11.1-11; Lc 19.28-40)

<sup>12-13</sup> Jesú uxashini bestenkaini Jerusalénki kemai juai banabitian Pascua-tian nawai besi beshian yudabu midimabun Jesú kenwanbainkin xenpan pei mextexun sanan sanan axunkubainkin jancha kushipawen yuibainkin:

—Dios nukuwen nuikin nuku medabewamiski. Diosun kushipaya juai kenwanankanwen, nun Israelbun Xanen Ibu kayabikidan— iki jaki nukui buaibun

<sup>14-15</sup> januxun Diosun jancha yuixunikan yuikin:

“Jerusalén anuabuun, matun xanen ibu jawa keanma burro bake kamaki katsaumea juxanikiki.

Dateama uinxankanwen”, jatu watan kenenidan, jabiaskadiai burro bake Jesúsun bechitan jaki katasumekaini kai Jerusalén jikiaya

<sup>16</sup> januxun ja dukun Jesús jaskai nun jawen tsumabun nun jawa ninkakin pewama iniki. Jakia chipu Diosun Jesús bestenwainmaken shinankin jaska dasibi ikima ja kenenibu inun kenwankubidanshinabu shinankin atimas jakidi nun ninkaniki.

<sup>17</sup> Jabiatiandi Lázaro mawashina Jesúsun kenakin bestenwain uinmabun yudan kaian jabu jatuki chanikin jatu yuibaunbaunaibun <sup>18</sup> jawen jatu unanmati dami wakin bestenwanshiankidi ninkatan Jesúski nukutani beabun <sup>19</sup> fariseobun jabun ikunwanma uin yuinamei:

—Uinkanwen, nun jawawen ana jatu bepadanxun itimakidan. Dasibibun ikunwanbaini jaki dasikanikikidan— ikaibun

#### *Griegonawabu Jesúsbe janchakatsis inibukiaki, na janchadan*

<sup>20</sup> judiobubetan nawabu xuku betsa griegobun Dios kenwain jatube besi nawai Jerusalén anu beshianbu <sup>21</sup> Felipen mae Betsaida Galilea mai pakea anua griegonawabu jaki nukuxun yukakin:

—Xanen ibuun, nun Jesúsbe janchakatsis ikaii— akabu

<sup>22</sup> jatu bashiyubaini kaxun Andrés yuitan ja dabe kaxun jaskaibu Jesús yuiabu <sup>23</sup> Jesús juxun jatu yuikin:

—Matun Juchi Kayabi Iyua Diosun jatu ea kenwanmakatsis ikaidan, ma kemaikiki, ikisdan. <sup>24</sup> Chanima en matu yuiaii. Jexe mai medan banama jawa bimitidumaki. Jakia mai uke medan bana jawen nami chapui dami jukuin yumentan bimijaidamiski. Eadan, en jaska keskayuaii. <sup>25</sup> Jamen tsuabunda jawen jiwea ibubis bechipai yaushidan, ibubis benuxankanikiki. Jakia tsuabuda jawen jiwea jawa yaushi nuiama ekidi ma shinan pewa ana jiwekuinxankanikiki, ikibi ikidan. <sup>26</sup> Tsuabunda ea duawakatsi ikinan, jau ea chibankubainunbunwen. Januxun ea chibankin ea duawaibudan, ebe ji-wediaxankanikiki. Jaskawen taexun tsuabuda en Epa Diosun jatu duawayá janu en jiwxanai anu ebe idiaxankanikiki, jabun ea duawamisbudan—iwanan,

#### *Jaska wabu debuxanaikidi Jesúsun jatu yuinkiaki, na janchadan*

<sup>27</sup> jaskai nun ninkaya Jesúsun jawen Epa yuikin:

—Ikis jawenchains juinti metexekei en punu nishmajaiddaii. ¿Jawa yuipa?—itan—Epaan, na en yuda jatu mepamatán en paxanun ea nichinwen, akin en mia yuitidubia jakia jabisakanun ika en juai min ea yubaniki— atan <sup>28</sup> ana yuikin: —Epaan, ewen taexun dasibibun jau mia kenwanxanunbunwen—akaya janua nai anua Diosun jui taxniaiwen yuikin:

—En shinanwen min ma abiakubainaya ana jabisakadi wakin en kena ana kushipa wakin miwen en ana jatu kenwanmakatsis ikaii— akaya <sup>29</sup> yudabu mapubaunxun ninkatan yuinamei:

—Tin ikainkainimenkain— ikaibun jatiditun yuidiakin:

—Diosun nai tsuma janchaimenkain— ikaibun

<sup>30</sup> jaskaibu ninkatan Jesúsun jatu yuikin:

—Na jui taxniai man ninkaxudan, ea medabewanun ika jancha taxnia-maki. Jakia matu medabewanun ika jancha taxnixuki. <sup>31</sup> Na jabiatian yudabu unanti wakin diablo Satanás yudabu dasibibuwen xanen ibumis mebintan en udenxanaii. <sup>32</sup> Mai anuxun ea binikin sanankin nichinmabun jaskawen taexun dasibibu ninia keska wakin ea anu en jatu iwexanaii, jau ichapabun ea ikunwanunbunan— iwanan, <sup>33</sup> jaskai cruzkia mawaxanai jatube nukuki chanikin unanmaya <sup>34</sup> januxun mapubaunabu betsan yuikin:

—Diosun jancha kenenibu anua uinkin nun manakamisdan, “Mesías Cristo jua matube jiwepakexanikiki”, akin kenenibukenan jaskakin: “Nukun Juchi

Kayabi Iyua Mesías binikin sanankin nichinxankanikiki”, ikin ɿmin jaska nuku yuixumen? Jaskakenan, tsuamen, nukun Juchi Kayabi Iyuadan?— aka

<sup>35</sup> Jesúsun ana jatu yuikin:

—Ana uxa eskadabesi Dioskidi unanmanika xaba keskadan, matube jiweyuikiki. Jaskayuaya na jancha ninkai jiweyukanwen. Jamen bin nukawa keskai ma en kaken tsuabunda unandiabuma meshun achia keskai janida baiwen kai bai unanma man mextantidubumaki. Unaindakanwen. <sup>36</sup> Ja xaba man ebe ketaxamekatsis ikidan, man xaba jayayuaki. Ja xaba man jaya ninkatan ea ikunwankanwen— jatu watan junetan nukube kainkainiki.

*Judio xanen ibubu Diosun jancha jayabia Jesús dananibukiaki, na janchadan*

<sup>37</sup> Januxun jawen unanmati dami atimaska Jesúsun jatu uinmakin axunbiakubaina jawa ikunwanma inibuki. <sup>38</sup> Jaska wanunbadiaibukidi Diosun jancha yuixunika Isaásin yuikin:

“Yavé Diosuun, yudabu min kushipa min jatu uinmakubainmiski.

Jakia nukun jancha tsuan ikunwanbumaki”,

aniki. <sup>39-40</sup> Jaska inun, Isaásin yuikin:

“Jau uin pewayamanunbun inun jau shinan pewayamanunbun

Diosun jatun bedu bekun keska wakin

jatun juinti kushi waikiki.

Jaskawen taexun Diosun yuikin:

‘Jatun shinan betsa watan

ea ikunwainbu en jatu xuxawakeanaii’ ”,

akin Diosun jancha ikunwantidubumakidi Isaásinkeneniki. <sup>41</sup> Januxun Isaásin namai keskakin Jesúsun kushipa uintan jakidi chanikin jatu kenexuniki.

<sup>42</sup> Isaásin jaska keneniken judio xanen ibu ichapabun Jesús ikunwainbun inun xanen ibujaida binuabu jatidibundi ikunwanbiai: “Jau nukun ichati anua taxnimakin nuku nichinyamaxanunbun”, ika fariseobuki datekin yuda ichapabun Jesús ikunwainkidi xabakabi yuiama iyunibukiaki, <sup>43</sup> Jesús shinanbiakin jawenabu kenwanmayukatsis ikin Dioskidi bexmas kenwakin dateyabi shinankinan.

*Jesús danainbuwen taexun Diosun jatu kupixanikiaki, na janchadan*

<sup>44</sup> Januxun jancha kushipawen Jesúsun nuku yuikin:

—Tsuabunda ea ikunwankin ea besti ikunwanma jakia en Epa jatun ea yununidi ikunwankanikiki. <sup>45</sup> Jabiaskadi wakin ea uinkin jatun ea yununidi unandiakanikiki. <sup>46</sup> Yudabu mai anua jatu ikunwanmatanun ika xaba keska en juniwen taea tsuabunda ea ikunwain meshu medan jadi jiweama keska ixankanikiki. <sup>47</sup> Jakia yudabu kupinun ika juama jatu medabewanun ika en juniwen taexun en jancha ninkabiakin tsuabunda chibanmaken ikis en jatu kupiamaki. <sup>48</sup> Jakia en jancha danankin bechipaibuma jabuna kupiti ma jayaki. Xaba jawen jenea unantitian en janchawen taexun Diosun jabu jatu kupixaniki. <sup>49</sup> Eanan, en shinanen en matu yusianmaki. Jakia Epa Diosun ea yununitun ea yunua yusinkin en matu yuimiski. <sup>50</sup> Ean en Epan jancha en unainan, jadan jiwea keyutima jayaki. Jaskawen taexun en matu yuiaii, jaska en Epan ea yunukin yunidan— akin nuku xabakabi yuiniiki.

## 13

*Jawen tsumabu Jesúsun jatu juchunikiaki, na janchadan*

<sup>1</sup> Pascua nawai meshukidi ixanaitian yudabu jenebaini jawen Epa Diosbe ana dasi kaxanai ma kemai Jesúsun unain na mai anua jabun ikunwainbu

bechipai jatuwen nuikunkaini jaska bestiwenma jakia nun jawenabuwen taea nuiyabis mawakin nuku uinmaniki.

<sup>2</sup> Januxun badi kaya meshu medan Jesúsbetan nun piaya jabiatiandi Judas Iscarioten Jesús jatu achimaxanai diablo Satanásan Judas shinanmaya <sup>3</sup> mai jidabi anua dasibi Epa Diosun Jesús xanen ibumakatsi yununi Dios anua juni ana jawendi chintun kainxanai Jesúsun unain <sup>4</sup> nukubetan pibhai pia jetenan benikauan jawen sanpu tadi pekatan jawen datekede iti chaipa bitan chiabukukin tadankin mestenwantan <sup>5</sup> januxun kencha ewapaki unpax juxketan nun jawen tsumabu nuku juchukin taewakin jawen datekede itiwen nuku jutekede akubauni <sup>6</sup> Simón Pedroki kematan anun ikaya nemakin yuikin:

—Xanen Ibuun, min en yusinanki. ¿Jaska wakin min ea juchunun ika ikai?— aka

<sup>7</sup> —Ikis en matu akai min unanmaki. Jakia chipu min unanxanai— aka

<sup>8</sup> Pedron ana yuikin:

—Duawakin ea juchuwe, iwanan, en mia yunuamaki— aka

Jesúsun nemakin:

—En mia juchuamadan, min enabu kayabi itudumaki— aka

<sup>9</sup> Simón Pedron yuikin:

—Jaskakenan, Xanen Ibuun, ea juchu bestiama ea mechukin ea buchudawe— aka

<sup>10</sup> Jesúsun kemakin:

—Tsuabuda dama nashitani juidan, jawen tae besti jau ana juchuki bestiunbunwen. Jaskadan, man ana detsismaki. Jaska keskai en janchawen taea besti man pepaki, mawaida dasibimadan— nuku watan <sup>11</sup> Judasin jatu achimaxanai unankin jaska nuku yuinkin.

<sup>12</sup> Januxun nuku juchuxun jutekede akin menetan jawen datekede iti pekatan jawen sanpu tadi chaipa ana sawetan ana daka baxti ixun nukubetan pikin nuku ana yuikin:

—¿En dama matu axudan, shinankin man unain? <sup>13</sup> Chanima ea kenakin: “Yusinaan inun Xanen Ibuun”, akin man ea kenamisdan, jibia en eaki.

<sup>14</sup> Ea en matun Yusinan inun matun Xanen Ibubiatun en matu juchukin duawakin en matu uinmaxu keska wakin matudi duanamei juchukinain keskakubainxankanwen. <sup>15</sup> Na ean eska wakinan, jabiaskadi wakin man axanunbun en matu bebunkidi uinmaxuki. <sup>16</sup> Chanima en matu yuiai ninkakanwen. Dayakapan jawen tsuma binuinsmaki. Jaska inun, tsuada yunua jawen yunua axunkin binuinsmadiki. <sup>17</sup> Na jaska en matu yuiai tsuabunda ninkatan jawen jiwekin jabun aki benimakubainxankanikiki.

<sup>18</sup> Na jaska janchaidan, matu dasibikidi en janchamaki. Ean en matu katunixun en unaiin. Jamen ekidi Diosun jancha yuixunikatun ea dayuikin: “Ebetan pibiakin ea detenun ixun shinainkiki”, ini keskai jaska ekidi kenenibu yuiaiwen taea chanima matu bestichaitun man ea jabiaskadi wakatis ikaii. <sup>19</sup> Ea en inidan, man ikunwanxanunbun jaska ea waxanaibu bebunkidi en matu banabimai chaniaii. <sup>20</sup> Chanima tsuada en kenaya en yunua ka jabun jatun jancha ninkakin ikunwankin jatu duawakin eadi jabiaskadi wakin jatun ea yununidi jabiaskadi waxankanikiki— nuku wai

*Janubi jawen tsuma jawen kushipaya betsan jatu achimai Jesúsun jatu yuinikiaki, na janchadan*

(Mt 26.20-25; Mr 14.17-21; Lc 22.21-23)

<sup>21</sup> janua Jesús jawen juinti metexekei nishmajaidakin xabakabi ana nuku yuikin:

—Chanima jadatuda bestichaitun man ea jatu achimai kaii— nuku wa <sup>22</sup> nuku jawen tsumabu betsakidi janchai unanma e itan nun beisina akeakeaya <sup>23</sup> Jesúsun ea bechipaijaidaiwen taea en pekachu Jesú baxti ika dakaxun piai <sup>24</sup> Simón Pedro en beisa jawen metutiwen Jesú ea yukamakin:

—¿Tsukidi janchaimenkain? Yukawe— ea wa <sup>25</sup> dabekekauan texkitan Jesú yukakin:

—Xanen Ibuun, ¿tsuamen?— en wa

<sup>26</sup> baxexendi Jesúsun ea besti yuikin:

—Misi pukuxun en inainan, jaki— ea watan misi bixun tewe inun yuchi mutsaki pukutan Simónen bake Judas Iscariote inan <sup>27</sup> piaya Satanás Judasin shinan medan ma jikiawen taexun Jesúsun Judas yuikin:

—Min jaska shinainan, jawaida aditanwen— aka <sup>28-30</sup> ninkatan jawa yuiama jawaida kainkaini meshu medan janida Judas kaken jaska wakin Judas Jesúsun yunua kaken nukubetan pi unanbumabia betsan shinain yuinamei: “Judas pei mekenikadan, ‘Nawakin piti ana bitanwen’, akin Jesúsun yunuxuki”, iake iakeaibun betsandi shinankin: “‘Nuitapaibu peiwen jatu medabewatanwen’, akin Jesúsun yunuxuki”, iake iakediakin shinainbun

### *Yunua bena Jesúsun jatu bashixunbainikiaki, na janchadan*

<sup>31-32</sup> janua Judas kainkainken Jesúsun nuku yuikin:

—En jatun Juchi Kayabi Iyua en kushipa jayaki, jawen taexun natian Diosun ea jatu unanmaidan. Jaskawen taexun Diosun kushipa en jatu unanmai. En jatun Juchi Kayabi Iyua Diosun jatu unanmaikiki, ewenan. Jaskaken jau unanunbun manama jawaida akikiki— iwanan,

<sup>33</sup> —En bake kayabibuun, ana jatixuinda en matube niamaki. Jakia uxa eskadabes ka ea benakin man ea bechiama ixanai. Jaska judio xanen ibubu en yuishina keskadan, en matudi yuiai ea ninkakanwen. Janu en kai anu man katidumaki. <sup>34</sup> Jaskawen taexun jawen yunuti jancha bena en matu bashixunkin yunubainai. Jaska matuwen en nuiai keskaidan, jabiaskadiai matubus nui duanamepakediaxankanwen. Jaskai shinananain man nuibukuain <sup>35</sup> matu uinkin man jaskai en tsumabu kayabi dasibibun matu unankubainxankanikiki— nuku waya

### *Pedro: En ja unanmaki, iki kaikidi Jesúsun yuinikiaki, na janchadan*

(Mt 26.31-35; Mr 14.27-31; Lc 22.31-34)

<sup>36</sup> januxun Simón Pedron Jesúsun yukakin:

—Xanen Ibuun, ¿min jani kai?— aka

—Janu en kai anudan, ikis min ea chibantidumaki. Jakia chipu min ea chibaxanai. —aka

<sup>37</sup> Pedron ana yuikin:

—Xanen Ibuun, ¿jaskakin en mia chibantidumamen, ikisdan? Eadan, en mia mawaxuntiduki, miwenan— aka

<sup>38</sup> Jesúsun Pedro ana yuikin:

—¿Chanima min ea mawaxuntidumen?— iwanan, —Jaskamajaidaki. Chanima en mia yuiai ninkawe. Penadiama takada keui taediamma eki dakekin: “Ja junidan, en ja unanmaki”, iki dabe inun bestiki eki dakekin min yui kaii— akin

## 14

### *Epa Dios anu jawen kati baidan, Jesúskiaki, na janchadan*

<sup>1</sup> nukudi Jesúsun yuikin:

—Na jaska en chaniayadan, jointi metexei dateyamakanwen. Dios ikunwankin eadi ikunwankanwen. <sup>2</sup> En Epa Diosun jiwe anu teke xaka ichapa

jayaki. Jawen jiwe jaska jayamaken en matu yuiama ikeanaii. Jaskaken janu jiwei man niti ikama ixanun en matu pewaxuin kaxanaii.<sup>3</sup> Janu matudi ka en jiweai anu man idiatiduwen taea kaxun bebunkidi en matu pewaxuin kaxanaii. Ana juxun en matu iyuxanaii, janu nun jiwenunbunan—itan<sup>4</sup>—Matunan man unaiin, ja baiwen en kaidan—nuku waya

<sup>5</sup> Tomásin yukakin:

—Xanen Ibuun, janu min kaxanaidan, nun unanmaki. ¿Jaskatan jawen kati bai nun unanxanai?—aka

<sup>6</sup> Jesúsun kemakin:

—Jawen kati bai inun jawen chanima unanti inun jawen jiwekuintidan, jabia en eaki. Ea besti ikunwankin chibain Epa Dios anu man jikitidubuki.<sup>7</sup> Jaska inun, man ea unanti wakubainaidan, en Epa Diosdi man unankubainaianii. Natian ea tapinkubainkin Epa Diosdi man windiakubainaianii—nuku waya

<sup>8</sup> ninkatan Felipen yukakin:

—Xanen Ibuun, Epa Diosdan nuku uinmawe. Uintan nun mia ana bikawa-maki—aka

<sup>9</sup>—Felipeen, jatixun en matube jiwebiakunkainai ¿min ea unandiamamen? Chanima ea uinkin Epa Diosdi man uiaiin. ¿Jaskakin: “Epa Dios nuku uinmawe”, akin min ea yukai?<sup>10</sup> Epa Dios inun ea, nun dasiadan, ¿min shinanmamen? En shinanen akin en matu yuismaki. Jakia Epa Dios ebe ketaxamexun ea yunukin jawen daya ea amamiski.<sup>11</sup> Epa Dios inun ea nun dasiadan, ikunwankanwen. Jaska en jancha besti ninkatan man ikunwan-tidumadan, en dami matu unanti wamakin atimaska en amiswen taexun ikunwankanwen, nun dasiadan.<sup>12</sup> Chanima en matu yuiai ninkakanwen. Tsuabunda ea ikunwankin en jaska amis man adiakubainxanaii. Ja inun, en Epa Dios anu en kaxanaiwen taexun en kushipayabun ea medabewakin jatu ikunwanmakin dami atimaska ewapa wakin ea binuxankanikiki.<sup>13</sup> En kenawen taexun tsuabunda jamapai Epa Dios man yuka en jawen baken en matu axunxanaii, en Epan kushipa matu uinmakinan.<sup>14</sup> Jamapai tibi en kenawen man ea yuka en matu axunxanaii—iwanan,

### *Diosun Yushin Pepa Jesúsun jatu yubanikiaki, na janchadan*

<sup>15</sup> ana nuku yuikubainkin:

—Chanima man ea bechipaiaidan, jaska en matu yusinkin yunumis shi-nankin en jancha man chibankubainxanaii.<sup>16</sup> Man jaska wakubainaya en matu yukaxuna Medabenan Bena betsa Diosun matu anu yunuxanikiki, jau matube jiwei ikibi ipaxanunan.<sup>17</sup> Medabenan Benadan, jawen Yushin Chanima Unanmanikaki. Mai anu yudabun jawa unanbuman inun uianbu-man Medabenan Bena ikunwankin jaibuwatidubumaki. Jakia natian matu dapi jiwea chipu matube uke medan jiwexanaiwen taexun Diosun Yushin Chanima Unanmanika man ma unaiin.

<sup>18</sup> Jaskawen taexun eanan, bashikin bake ibuuma keska wakin en matu jenebainamaki. Jakia ana matube iki en ana chintunkidanxanaii.

<sup>19</sup> Mawaida jatixuinda yudabun ea uianma ixankanikiki. Jakia matu-nan, man ana ea uinyuxanaii. Ja inun, en ana matu jiwexunaiwen taea matudi man jiweiakunkainxanaii.<sup>20</sup> Ja xabatian jaskakain en Epaki en dasia man unanyan janua matuki ana nukui en matuki dasidiatan en matube nipakexanai man unanxanaii.<sup>21</sup> Jaskaken tsuabunda en yu-sian ninkakin chibankubainkin ea unanmai chanima ea bechipaikubainx-anikanikiki. Jaska inun, tsuabunda ea bechipaiaibun en Epa Diosundi

jatu bechipaidaxanikiki. Jaskaibu xabakabi en jatu unanmaxanaii, jabun chanima ea bechipaiaibudan— nuku waya

**22** Judas betsan yukakin:

—Xanen Ibuun, ¿jaskakin yudabu dasibi uinmama min nuku besti ana uinmaxanai?— akaya

**23** Jesúsun kemakin:

—Tsuabunda ea bechipaikinan, en yusian jancha chibankanikiki. En Epan jatu bechipaiaya ea inun en Epa jua nun jatuwen jiwxenaii. **24** Jakia tsuabunda ea bechipaiabumadan, en yusian jancha chibankumaki. Na jancha en matu yusian man ninkakubainaidan, enamaki. En Epa jatun ea yununitun janchaki. **25** Natian matube jiwxen en matu yusinyukubainaii. **26** Jakia jawen Yushin Pepa matun Mekenan Bena en kenaya en Epa Diosun yunua juxun jaska en matu yusinkubainmis dasibi en matu yuiai ana xabakabi matu shinanmakubainxanikiki.

**27** En janchawen datei matun juinti nishmayamakanwen. Diosun unanuma jawen uke medanu unanumati en matu inaiin. Jaska yudabu jatun shinanwen jiwekin unanumai jiwenisbu keska matu inanma jakia Dios anua daewanika kayabi unanuma en matuki bashiaii. **28** “Ka matu anu en ana juxanaii”, ikin en yuiai man ma ea ninkaxuki. Janua Epa Dios xanen ibun ea binuawen taea janu en kaxanaii. En Epa anu en kaxanai man ninkaiwen taea man benimakeanaii, chanima ea bechipai kayabidan. **29** Na eska bebunkidi en matu yuiai chipu ikai uinkin en matu jancha wai shinankin man ea ikunwanxanaii. **30-31** Jakia mai anu yudabu yununika diablo Satanás ma juaiwen taea ana jatixuinda en matube janchamaki. Satanásan ea mei ewen kushipatidumabiaken jau shinanxun ea jaska wayununwen, chanima Epa Dios bechipaikin jaska ea yunua en axunmis yudabu en jatu uinmai kaidan.

Jaskaki. Benidikanwen, nenua nun bununbunan— nuku wa

## 15

### *Jesúsdan, uva bana jawen taxu keskakiaki, na janchadan*

**1** nun benibaunaibu nuku ana yuikin:

—Ana betsya matu yusinun ninkayukanwen. Eadan, en uva bana nia jawen taxu kayabiki. En Epadan, miban ibuan mekekin meudumiski. **2** Jatidi mebi tibi bimi jayamaken mextexun putamiski. Jakia jawen mebi tibi bimiyamis ana bimijaida wakin jawen ibuan bumextekin pewamiski, jau ana katakutan bimijaidanunan. Ea ikunwainbu en Epa Diosun jabiaskadi waxanikiki.

**3** En jancha en matu yusiain man ikunwainwen taea man ma shinan betsya jaya man ma xunpinjaidaki. **4** Jakia jawen taxu anua jawen mebi betsya meskeea ana jaska bimitidumaki. Jabiaskadi wakin ea jenebainkin man Dios benimawatidumaki. Jaskaken en matu putama keska wakin eadi putayamaxankanwen. **5** Eadan, en miban taxu keskaki. Matudan, man jawen mebi keskabuki. Ebe jaibunamekin bimi ichapaya keskakin man Dios benimawatiduki. Eauma man jawayatidumajaidaki. **6** Ea jaibuwama ewen pechiadan, jawen mebi bimiuma mextetan putaima badin xana washina ichawaxun kua keska wakin Diosun chi anu jatu udenxanikiki.

**7** Janua matudan, ebe ketaxamexun en jancha shinankin unanjaidai jakimama chibankubainkin jawada bikatsis ikin man Dios yuka matu axunxanikiki. **8** Jaskai duapanankin Diosun kushipa man jatu kenwanmaidan, bimi ichapayai keskakin chanima en tsumabu kayabi xabakabi man ixankanaii. **9** Eanan en matu bechipaiaii, jaska en Epan ea bechipaikin akai

keska wakinan. Jaskawen taea ea putapakeyamaxankanwen, en nui man jayawen taeandan. <sup>10</sup> Jawen jancha en chibanyan ea bechipaikin en Epan ea putaismaki. Jaska keskadi wakin en yunua jancha man chibanyan matu bechipaikin en matu putamadi ixanaii.

<sup>11</sup> Shinan chankain man ebe benimajaidanunbun jawen benimati jancha en matu yuiaii. <sup>12-14</sup> Tsuada jawen jaibuaiwuwen nuikin bechipaikin jatu medabewai mawaxunai tsuan jaskakin ana betsan binutidumaki. En jancha man chibankubainai man en jaibuki. Eskaki, en matu yunuaidan. En matuwen nuikin bechipaimiski. Jaska chibankin betsabuwen nui bechipainamekubainxankanwen. <sup>15</sup> Jamen betsadan, jawen dayakidi jawen dayadubu xanen ibun jatu xabakabi tapinmaismaki. Jakia dasibi en Epan ea yuia en matu unanmaiwen taexun yunubiakin en dayadu wakin matu kenama en jaibuwakin en matu kenaii. <sup>16</sup> Man ea katuama ean en matu katuniki. Jaskawen taexun en matu yunuaii. Kaxun jatu yusinkin man bimi ichapa wai keska wakin en tsumabu jatu wakin jau chintunyamanunbun jatu kushipa wakubainxankanwen. Jaska wakin en kenayaxun Epa Dios jamapai tibi man yuka matu axunxanikiki. <sup>17</sup> Na jaska en matu yunuai keska wakinan, jabun ea ikunwain betsabube jatuwen nui bechipainamekubainxankanwen— iwanan,

*Yudabun Jesúis dananixun jawenabudi dananxanaibu jatu yuinikiaki, na janchadan*

<sup>18-19</sup> ana betsaa nuku yuikin:

—Jabun shinain keska man shinanyan ea ikunwanbuman matu bechipaikanaii. Jakia ikunwanbuma anua en matu katuni jabun shinain keska man ana shinamawen taexun ea dukun dananshinxun matudi danandiaxankanikiki. <sup>20</sup> En matu yuixudan, shinaindakanwen: “Dayakapan jawen tsuma binuismaki”, akin en matu yuixuki. Jaskaken ea ichakawanixun jabiabundi matudi ichakawaxankananikiki. Jakia betsabundi en jancha ninkanixun matun janchadi ninkakin adiaxankanikiki. <sup>21</sup> Jatun ea yununi jabun unanbumawen taexun na jaska tibi matu wakinan, man ea chibainbuwen taexun matu axankananikiki. <sup>22</sup> En yusin jua janchamaken jabu na mai anu jiweabun ibubis shinain: “En pepaki”, itidububia eskatian ana jaska waxun jatun chakabu ibubis juntantidubumaki, mekeidan. <sup>23</sup> Jaska inun, ea danankinan, en Epa Diosdi danandiakanikiki. <sup>24</sup> Ja inun, jatu anuxun en jawa jatu jaska waxuanma chakabu shinanma ikeankanaii. Jakia tsuan jaska jatu anuxun jaska waxuinsmabiaken Diosun kushipa jatun bedubi en ma jatu uinmabia uinbiakin ea inun en Epa danankananikiki. <sup>25</sup> Jaskaken Diosun jancha yuixunikan yuikin: ‘Jawamawen taexun ichakawakin ea dananibuki’, iwanan, keneni keska menekin ea danankananikiki. <sup>26</sup> Januxun matudi danainbun en Epa anua mekanen betsaa matu anu en yunua janua Yushin Chanima Unanmanika juxun ekidi matu unanmai ea janchaxunxanikiki. <sup>27</sup> Ja inun, matudi en taxnikidanai anua tapin man ebe ikunkidanshinadan, man ekidi janchai chaninikabudiki— iwanan,

## 16

<sup>1</sup> ana betsaa nuku yuikin:

—Chipu jabun matu ichakawabu man ekidi jakimama shinan betsaa wama man chintunyamaxanun bebunkidi en matu yuiai ninkaidakanwen. <sup>2</sup> Janu ichati jiwe anuxun matu danankinan nichinkin nukunabu matuki dakemaxankanikiki. Ja inun, betsabun shinain: “Nun Dios medabewaii”, ikin

tsuabuda matu betsa betsapa detekin <sup>3</sup> en Epa Dios unanma eadi unanbumawen taexun matu jawa unanma ichakawaxankanikiki. <sup>4</sup> Matu jaska waibuai buaibuwen taexun bebunkidi en matu yuiaii.

*Diosun Yushin Pepatun axanai Jesúsun jatu unanmanikiaki, na janchadan*  
—Matube bebunkidi nibiaxun jaska xabakabi en matu yuiama iyuniki.  
<sup>5-6</sup> Jakia natianan, jatun ea yununi anu en samama kaiwen taexun ikis en matu yuixuki. En matu yuia ninkatan matumebi shinain uinti nishmaxun: “¿Jani min kaxanai?” man ea wamaki. <sup>7</sup> Jakia chanima en matu yuiai ninkakanwen. En matu kaxuanmakenan, Mekenan Bena matu anu jutidumaki. Jakia kaxun Mekenan Bena matu anu en yunuxanaii. Jaskawen taea en kayadan, matudan, man pepakunkainxanaii. <sup>8</sup> Ja Mekenan Bena juxunan, yudabu mai anuabu xabakabi Dioskidi chakabuwamisbu inun, jabun Dioskidi chakabuwama pepa wamisbuma inun, tsuabuda Diosun unanti watan kupixanai jatu unanmaxanikiki. <sup>9</sup> ¿Tsuabumen, Dioskidi chakabumisbudan? Jabun ea ikunwanbumadan. <sup>10</sup> ¿Tsuamen, Dioskidi chakabu jayamadan? En eaki, en Epa anu en kaken man ana ea uianma ixanaidan. <sup>11</sup> ¿Tsua axanimenkain, Diosun unanti waxun kupikinan? Na yudabu mai jidabi anu maniabu jatu xanen ibuxunmis ma unanti wanixun kupixanikiki.

<sup>12</sup> Ana jancha ichapa en matu yusinkubainpanan jati man tsuma keytidumaki. <sup>13</sup> Jakia chipu Yushin Chanima Unanmanika juxun chanima dasibi matu yusinkin mextanmaxanikiki. Jawen shinanen janchama jakia ekidi dasibi ninkatan jawada ixanaidi matu xabakabi unanmaxanikiki. <sup>14</sup> Ja Yushin Chanima Unanmanika jamebi juama en kushipa bitan matu unanmakin inankin matu kushipa waxanikiki. <sup>15</sup> Dasibi en Epa jayadan, enadiki. Jaskawen taea: “Yushin Chanima Unanmanika ena bitan matu unanmaxanikiki”, akin en matu yuixuki—iwanan,

<sup>16</sup> —Jaskaida jatixuinda ka en jadi i iyamaki. Jakia samamajaida nun ana uinanxankanaii—nuku wa

*Ana punu nukama man benimajaidaxanaii, jatu wanikiaki, na janchadan*  
<sup>17</sup> mawa ana bestenxanaikidi janchai nun unanma yuinamei:

—¿Jawa nuku yuikatsi ikimenkain? “Ana eskadabes ea uianma janunkain ana uxa eskadabes kaya man ea ana uinxanaii”, ikai inun: “Dios anu en kaxanaiwen taeandan”, ikin ¿jaskada nuku yui ixumen? <sup>18</sup> “Ana uxa eskadabesdan”, ¿jawamen? Jadakidi daki yui ikikika!—nun ike ikeaya

<sup>19</sup> nun yukapaia unankin nuku yuikin:

—En janchawen taea man yuinameaidan, <sup>20</sup> chanima en matu yuiaii. En mawaken ea manui kaxai man uinti nishmaken jabun ea ikunwanbuma benimajaidaxankanikiki. Jakia matudan, en mawaken matun uinti nui jenetan man benimajaidaxanaii. <sup>21</sup> Jaska inun, ainbu tuyu bake kainkatsi punu nukai shinan chankainsmaki. Jakia kaintan: “Peki”, ika benimai isin jakimamisbuki. <sup>22</sup> Jabiaskadiai ikis man punu nukaki. Jakia en ana juaya man benimajaidaya matun benima pae tsuan matu mebintidubumaki.

<sup>23</sup> Jabiatiandi ea uinkin man ea jawa yukama ixanaii. Jakia en Epa Dios man yuka ewen taexun matu medabewaxanikiki. <sup>24</sup> Ea ikunwankin tae-wabianixun en kenawen taexun man Dios yukadijamajaidaki. Na jabiatian en kenawen taexun Dios yukakin taewadikanwen. Jaska wakin man yuka matu axuan man benimaxanaii—iwanan,

*Jatu ichakawaibu Jesúsun jatu maemaxanaikidi jawen tsumabu yuinikiaki, na janchadan*

<sup>25</sup> januxun ana nuku yusinkin:

—Jancha junea miyuiwen en matu yusinkubidanshinaki. Jakia ana jancha juneawen yusianma janu xabakabi en matu unanmaxanai ma kemaikiki. Jaskakainshinxun en Epa Dioskidi janu xabakabi kayabi en matuki chanix-anaii. <sup>26</sup> Jabiatandi Dios en ana matu yukaxunama ixanaii. Janu matumebi ibubis en kenawen taexun man yukakubainxanaii, <sup>27</sup> en Epa Dios matuwen nuikin bechipaiaiwen taexunan. Dios anua en juni ikunwankin man ea bechipaiaiwen taexun Epa Dios matuwen nuikin matu bechipaidiaikiki. <sup>28</sup> Jamen en Epa Diosun besuudia kainkidani na mai anu yudabube jiwenun ika en juni jaska ea yununi menetan natian ana jawendi kakin na yudabu en jenebainaii— nuku waya

<sup>29</sup> januxun jawen tsuma betsan yuikin:

—Chانيا na jabiatian xabakabi nuku yui ana miyui jancha juneawen min janchamaki. <sup>30</sup> Janunkain chانيا mikidi nun unaiin. Nun mia yukadiama unankin nukun shinan min unain inun jamapai tibi min unainwen taexun Dios anua min junidan, nun ikunwaiin. Jaskawen taea min Diosun bake kayabiken tsuan nun ana mia yukai bika teneamaki— aka

<sup>31</sup> jaska waya Jesúsun nuku ana yuikin:

—¿Natian janu man ma ea ikunwain? <sup>32</sup> Man ea jaska wabiae janu man datei paxaidan, ma kemakanikiki. Uindakanwen, janu dasibi sa ikin man bestibu ea dapaxkabainkin man ea jenebiabaina eadán, en emestimaki. En Epa ebe ketaxamexun ea jeneamaki. <sup>33</sup> Ea jaibuwai eki dasia man dateama unanuma jiwanexanun na jancha en matu yuixuki. Mai anuxun ea ikunwanbuman matu ichakawadiaibun dateyamaxankanwen, en ma jatu maemakin binuniwen taeadan— nuku watan

## 17

*Jesúsun jawen tsumabu Diosun kushipa jatu yukaxunikiaki, na janchadan*

<sup>1</sup> janua naiudi teskanxun uinkin nuku ninkamakin yuikin:

—Epaan, janu min ea yubanidan, januki. En min bake mawai medabe-wakin ewen min kushipa jatu uinmawe, jatu en mia kenwanmaxanunan. <sup>2</sup> Mai jidabi anua jawen yudabu dasibi yunuti kushipa min bake min ea inaniwen min jatu katuni en jatu jiwekuinmaxanaii. <sup>3</sup> Min mia besti Dioski, chanimadan. Jesucristo Mesías min yununidan, en ea bestiki. Nuku unantan na jiwekuinyanwen jiwanexankanikiki, ikibi ikidan.

<sup>4</sup> Yudabu anu en mia dayaxunun min ea nichini mia axunkin keyukin mia duawakin en mia jatu kenwanmakubainshinaki. <sup>5</sup> Epaan, eskatianan, mai nun damiwadiama min besuunbia en xanen ibui taeaitian en chaxakapa jawendua jayani keska jabias ea inanxanwen.

<sup>6</sup> Yudabu dasibi anua jatu katuxun min ea yunua min Dios kushipa dasibi binu keyua nukipakidi en mia jatu unanmakubainshinaki. Jaska inun, mina katuxun min ea jatu inanidan, min jancha ninkamisbuki. <sup>7-8</sup> Min jancha min ea yununi ma en jatu yusianki. Jaskawen taexun dasibi en jancha minadan, ma tapianbuki. Chanya min ea yunua mianua en juni unankin ikunwan chakayamakanikiki. Jaskawen taexun min kushipa inun min yusinti mianua juai unankanikiki.

<sup>9-10</sup> Jamen enabudan, en mibe jatu janchaxunaii. Jakia ea ikunwan-bumakidi en mibe jatu janchaxunamaki. Ja inun, mina watan min ea yununidan, jadan minabuki. Jaskawen taea dasibi enadan, minaki. Janua minadan, enadiki. En kushipa jatu medanua uinxankanikiki.

<sup>11</sup> Natianan, ma mia anu en mibe iki kaii. Na mai anu en ana jatube jiwekunkainamaki. Jakia enabudan, na mai anu jatube jiweyukubainkanikiki. Jaskawen taexun Epa medibi pepa bestituun, min kena kushipawen ea jatu mekexunxanwen, ja kena kushipa min ea inaniwenan, nun paxkama keskadiai jau jabudi paxkamadi idiakubainxanunbunan. <sup>12</sup> Na enabudan, mai anua jatube jiwexun min kena kushipa min ea inaniwen chakabu nemakin en jatu mekekubidanshinaki, jawa jatu benuamadan. Judas besti jaska jakidi kenenibu keska aki ma benuni iki kaxuki.

<sup>13</sup> Mianu kakatsi en benimajaidaii. En jatu putabaindiama jau jabun ea ninkakin jabias en benimai keskai jau idianunbun en mibe janchaii.

<sup>14</sup> Mikidi en jaibuaibu en jatu yusianyan jabun shinan betsa wai pepaibu jabun ea dananmisbun ea jatube dananmisbuki, nun yudabun shinan keska jayamakenan. <sup>15</sup> Jabiaskabiaken: “Ikunwanbuma anua jatu dapaxkam-abainwen”, iwanan, en mia yukamaki. Jakia jau diablo Satanásan jatu padanyamaxanun jatu nemaxunkin mekexanwen. <sup>16</sup> Ja inun, na mai anua Dios ikunwanbuma en jatu keskamawen taea ea ikunwainbudi jatube jiwebia jabu keskamadiki. <sup>17</sup> Min jancha chanima kayabiki. Ja chanima janchawen min medibiki. Min jancha jaskawen taexun jatu medibi wawe, jabun min jancha chanima chibankanaibudan. <sup>18</sup> Jaska inun, na mai anu mia unanbuma anu min ea yununi keska wakin en jaibuaibu jabiaskadi wakin na mai anuadi en jatu yunudiaii, jau mikidi jatu yusinkubainxanunbunan. <sup>19</sup> Jatuwen taea ea dukun iki en jatu medibixunxanaii. Jaskawen taea chanima jabudi jau min jancha chanima kayabiwen medibidianunbunan, jawa kanetimadan.

<sup>20</sup> Na en jaibuaibu besti shinankin jabukidi besti en mia yukaxunamaki. Jakia jabun jatun jancha kakape ninkatan ea ikunwanxanaibudi en mia jatu yukaxunaii, min jabudi mekekubainxanunan. <sup>21</sup> Jaskai mia inun ea dasia nun bestichai keska jiwea jabudi nukuki dasiabu jabiaskadi wakin min jatu medabewaxanun en mia jatu yukaxunaii. Min jatu jaska wa jabu xukuxun ea ikunwainbu mai jidabi anu min ea yununi unantidubuki. <sup>22</sup> Jaska mia inun ea dasinixun nun jabiaskas shinanmis keska wakin enabu jabiaskadi min jatu shinanmaxanun, iwanan, min kushipa min ea yununi en ma jatu yunuaki. <sup>23</sup> Mia inun ea nun dasiniken jabubedi en dasiaya jabu yuda bestichai keska jau ixanunbun en mia jatu yukaxunaii. Jaskaibu mai jidabi anuabun jatu uinkin min ea yununi inun jaska wakin min ea bechipaimis jabudi min bechipaidiaidan, jabun unantidubuki— iwanan,

<sup>24</sup> Epaan, mai damiwakin taewadiama min ea bechipaikin ea chaxakapa jawenduawakin taewani min jabiaskadi ea wai jau ebe jiwekin uinxanunbun jabu min ea yununi ebe jatu jiwemaxanwen— iwanan,

<sup>25</sup> Epaan, min kaneismaki. Mai jidabi anu yuda jiweabun mia unanbumabiaken ean, en mia unaiin. Na ebe mapuabun min ea yununi unankanikiki.

<sup>26</sup> Jaska inun, mikidi min kushipa binu keyua en jatu unanmapakeaiwen taexun ana mikidi en jatu unanmakin jeneyamaxanun min ea bechipaimis keskai jau jabudi bechipainamei jeneama ixanunbunwen, nukipaidan. Jaska jayabuwen taea ea en jatu anua kainkainama ixanaii— itan

## 18

*Jesús achitanun ika bunibukiaki, na janchadan  
(Mt 26.47-56; Mr 14.43-50; Lc 22.47-53)*

<sup>1</sup> Diosbe nuku janchaxuni menetan januxun nuku kainmabainkin paxku debu jawen kena Cederón Jesúsun nuku pukemabaini janu miban xukua mishkiwenkenenibu anu ukemedan nun jabe jikiken <sup>2</sup> janu Jesúsbe nun ichakunkainmis anu jabianu nun ana ichaken janu Judasin unanajaidai <sup>3</sup> jadi jatu iyui Diosbe nukunabu janchaxunika xanen ibubu inun fariseobubetan jatu yunuabu jatidi Templo mekenikabu inun romano soldadobu xuku betsa Judasin jatu iyua jatun detetiya mesebaini bin dekutan chaxa dakabainai-bun <sup>4</sup> Jesús achi beaibu dasibi ma unainwen taea nuku be bun Jesús nitan jatu yukakin:

—¿Man tsua benai bekanai?— jatu wa

<sup>5</sup> jabun achi beaibun betsan Jesús kemakin:

—Jesús Nazaret anuadán— akaya

Jesúsun ana yuikin:

—Jabia en eaki— jatu waya Judasin jatu achimai kai jawaidakain ma jabe niken <sup>6</sup> jaskai Jesús janchai ninkatan chixtekidi xekibaini di ikaibun <sup>7</sup> Jesúsun ana jatu yukakin:

—¿Tsuadaka man benai bei ikanai?— jatu wa ana jabiaskadi jabun yuikin:

—Jesús Nazaret anuadán— akaibun

<sup>8</sup> —“Jabia en eaki”, akin en ma matu yuixuki. Man ea besti benaiwen taexun en jaibuaibu jatu meyamakanwen, jau bununbunan— jatu wa

<sup>9</sup> bebunkidi Jesúsun yuikin: “Epaan, min ea yununi en tsua jatu benuamaki”, akin Jesúsun yuixuwen taexun: “En jaibuaibu meyamakanwen”, akin Jesúsun jatu nemaniki. <sup>10</sup> Januxun Simón Pedron jawen nupe chaipa sitan Diosbe nukunabu janchaxunika xanen ibujaidatun tsuma Malco mapexpaikin maebain pabinki yusiudia paxteaya <sup>11</sup> nemakin Jesúsun Pedro yuikin:

—Ana jatu meama min nupe ana jawendi usunwen. En Epan jaska ea yununi jabiaskadi wakin ea yumanwankanikiki. Ea yaushiyamawe— aka

### *Anásin jiwe anua Jesúski Pedro dakei padanananikiaki, na janchadan*

(Mt 26.57-58, 69-70; Mr 14.53-54, 66-68; Lc 22.54-57)

<sup>12</sup> januxun jatun xanen ibu capitánbetan romano soldadobu inun Templo mekenikabun Jesús achixun menextan <sup>13</sup> iyukin ja dukun jatun xanen ibu Anásin jiwe anu iyubun jawen dais Caifás na badi bestichai Diosbe nukunabu janchaxunika xanen ibujaidatun <sup>14</sup> bebunkidi judiobu jatu yuikin: “Nukunabu jau paxkai sa iyamaxanun bun juni bestichai nukunabu mawaxunaya man pepakunkainxanaii”, akin jatu yuimanudan,

<sup>15</sup> Jesús iyuaibun Simón Pedro inun ean june chipu kakin nun Jesús chibankubaini xanen ibu Anásin enabun ea unainbuwen taea janu ichamisbu dintu anu Jesúsbe en jikiaya <sup>16</sup> jakia Pedro unanbumawen taexun nemakin niti akabu jikiama bai kexa Pedro niken janua jemaintin kene janu jikiti xui anu ana kaxun xui mekenika ainbu yukaxuntan Pedro en bichiaya

<sup>17</sup> xui mekenika ainbu Pedro yukakin:

—Ja junin tsuma betsadan, ¿jibia min miamen?— aka

—Eadan, en jamaki— akaya

<sup>18</sup> janua ma matsi beaya janu dayamisbu inun Templo mekemisbu jemaintin chi keti watan yui mapubaunabu jatube nashui ika Pedrodi yuaya

### *Diosbe jatu janchaxunika xanen ibujaidatun Jesús yukanikiaki, na janchadan*

(Mt 26.59-66; Mr 14.55-64; Lc 22.66-71)

<sup>19</sup> januxun Diosbe nukunabu janchaxunika xanen ibujaida ikunkainima ma taxnima anu Anásin jiwe anu bichiabu jawen tsumabukidi inun jawen yusiankidi Jesús yuka taewa <sup>20</sup> Jesúsun kemakin:

—Ninkaibun en janchakunkainmiski. Janu ichati jiwe tibi inun Templo jemaintin anuxun nukunabu ichamisbu anuxun xabakabi dasibibun bedubi en jatu yusinmiski, june jatu yusianmadan. <sup>21</sup> Ea yukama jabun en jancha ninkamisbu jatu yukawe. Jawada en jatu yusinmis unanjaidakanikiki—ikaya <sup>22</sup> jadi Jesúsun kemaya Templo mekenika betsa Jesúsun dapi nixun meken pechiudi kepais akin yuikin:

—Nukun xanen ibujaida jaska yuiyamawe— aka

<sup>23</sup> Jesúsun yuikin:

—En yui chakayadan, ea unanmawe. Jakia en pe yuibiaya ;jaskakin e iskaun min ea deteai?— aka <sup>24</sup> janchawen binutiduma unantan Anásin jatu yunua Jesúsun menexekeea jabiaska Diosbe nukunabu janchaxunikajaida binua Caifás anudi iyuabun

*Ana: Jesúsun en unanmaki, ika Pedron jatu padanikiaki, na janchadan  
(Mt 26.71-75; Mr 14.69-72; Lc 22.58-62)*

<sup>25</sup> ja jaska waibun Pedro jatube chin yui nashui ika yuaya betsabun yukakin:

—¿Min jamamen, ja junin tsuma betsadan?— abaunabu

Pedron jatu padankin yuikin:

—En jamaki. En eamabin!— jatu wa

<sup>26</sup> januxun xanen ibujaida binuatun tsuma betsa Pedron patsanka jawenabundi Pedro yukakin:

—¿Miban xuku anuxunan, Jesúsbetan, en mia uianma ikidanxumen?— aka

<sup>27</sup> Pedron ana jadi padankin:

—En jamaki— itanayas jawaida jabiatiandi takada keui taeaya

*Pilato anu Jesúsun iyunibukiaki, na janchadan  
(Mt 27.1-2, 11-14; Mr 15.1-5; Lc 23.1-5)*

<sup>28</sup> januxun Caifásin Jesúsun yukakin keyutan penaya romano xanen ibu Pilaton jiwe ewapa anu Jesúsun jau iyutanunbun romano soldadobu yunuaya judio xanen ibubun shinain: “Nawan jemaintin anu jikia Moisin nuku yusiniwen taea nawan detsiswen chakabutan ana Pascua nawai besikin en pitidumaki”, iki pepai nawayukatsi jikiabuma <sup>29</sup> jaskaibun jatun beya unantan jatu anu Pilato kaintan jatu jancha wakin yukakin:

—Na juninan, ¿jawa chakabu ashian man jakidi yuiai?— jatu wa

<sup>30</sup> —Juni chakabumakenan, mianu nun iweama ikeanaii. Unanti watan nuku kupixunwen— akabu

<sup>31</sup> Pilatondi jatu yuikin:

—Iyuxun jaska matun xenipabun matu yusinpauni keska wakin matumebi unanti watan kuitankanwen— jatu wa

judio xanen ibubun yuikin:

—Nun tenanpanan min nuku nemamiski. Jau tenanunbun mian besti min yunutiduki— akaya

<sup>32</sup> jaska wakin tenanxanaibu Jesúsun nuku yuishinadan, unanmabia jabiaskadi jatu amaya <sup>33</sup> ninkatan jawen kene medan ana jikixun Pilaton Jesúsun kenaxun yukakin:

—¿Miadan, min judio xanen ibubu binu keyuamen?— aka

<sup>34</sup> Jesúsundi yukakin:

—¿Mimebi min ea yukai? ¿Juni betsan mia ekidi yunuadaka min ea yukai ikai?— aka

<sup>35</sup> e itan Pilaton yuikin:

—Eadan, en judiomaki, jaska min ea yuipananan. Minabu judiobu inun min xanen ibubu Diosbe janchanikabun mia ea inankanxuki. ¿Min jawa chakabu meshinamen?— aka

<sup>36</sup> kemakin:

—Eadan, en Xanen Ibu kayabiki. Mia yuinun ninkawe. Nenua junibu xanen ibumisbu keskai en xanen ibuamaki. Jakia en kushipadan, na nenu mai anua yudabun shinain jiweabu keskamaki. Jakia na, mai anua en xanen ibuaya judiobun ea achixun mia anu ea iweyamanunbun en tsumabu ewen taea nemakanai jatube detenamekeankanxuki. Jaskaken eadan, en Xanen Ibu kayabiki, nenuamadan. En jawa chakabu jayamaki— aka

<sup>37</sup> januxun Pilaton ana yuikin:

—Jaskakenan, chanima min xanen ibu kayabidaka— aka

Jesúsun ana yuikin:

—Min jaska jadi yuaidan, en Xanen Ibu kayabiki. Jaskanun ika yudabube jiwei en taxnikidaniki, jatu chanima kayabi mextanmaidan. Tsuabunda chanima jancha bechipaikin en jancha ninkamisbuki— aka

<sup>38</sup> romano xanen ibu Pilaton yuikin:

—Chanima janchadan, ¿jawamen?— itan

*Jesús jau mastanunbun Pilaton jatu yununikiaki, na janchadan*

*(Mt 27.15-31; Mr 15.6-20; Lc 23.13-25)*

jaska wa janu judio xanen ibubun manaibu anu ana kainkidan Pilaton jatu yuikin:

—Ja juni en unanti waxudan, jawa chakabu jayamaki. <sup>39</sup> Pascuatian badi tibi juni bestichai jawa wama en matu nichinxunmis keska wakin, ¿udio xanen ibu kayabi Jesús jawa wama matu nichinxunpa?— jatu wa

<sup>40</sup> dasibibun jui kushipawen yuukin:

—Ja nuku axuanma ja juni betsa Barrabás yumetsubiaken nuku ja kainmaxunwen— akaibun

## 19

<sup>1</sup> Pilaton ninkawanxun jatu yunua bichi kushatiwen Jesús kusha kusha atan <sup>2</sup> kaxe wakin romano soldadobun nishi muxaya maiti waxun Jesús maimaxun xanen ibun bemakia tadi tashijaida sawematan <sup>3</sup> bestibu Jesúsun besuudi nixun kaxe wakin yuikin:

—UDIO xanen ibu kayabidan, min miaki— iwanan, jawen besuki bepaistantanaibun

<sup>4</sup> Pilato ana kaintan judio xanen ibubu yuikin:

—Jesúsun jawa jatun chakabu wama ishian en matu unanmakin kainmai uinkanwen— jatu waya

<sup>5</sup> muxa maiti inun tadi pauti tashipa meshu duakabi sawemabu jawen besu jimin iduma Jesús kainkidanaya Pilaton tenankatsi ikama ana jatu yuikin:

—Na juni man iwexudan, uinkanwen— jatu wa

<sup>6</sup> uinkin Diosbe nukunabu janchaxunika xanen ibubu inun Templo mekenikabun jui kushipawen Pilato yuikin:

—Cruzki mastawe! Cruzki mastawe!— akeakeabu

jaska waxun atidubuma unanbiakin Pilaton jatu kaxe wakin ana yuikin:

—Jawa chakabu jayamaki. Matunmebi iyuxun aditankanwen— jatu wa

<sup>7</sup> Diosbe nukunabu janchaxunika xanen ibubun yuikin:

—Chani chakai: “En Diosun bakeki”, imiski. Diosun jancha Mosésin nuku kenexuni nun jayaki. Jaskawen taexun Dios yuankin kanemiswen taea nun yunuaiwen taeidan, jau mawanunwen— aka

<sup>8</sup> jaska yuiaibu ninkatan Pilato ana datekin <sup>9</sup> jawen kene medan ana chintuanbain Jesús iyuxun yukakin:

—¿Min janiamen?— aka Jesúsun ana jawa yuiamaken

<sup>10</sup> jaki sinatakin Pilaton ana yuikin:

—¿Min ea ana jancha wamamen? En kushipawen jawa wama en mia nichintidu inun en kushipawendi en mia jatu mastamatidu, ¿min unanmamen?— aka

<sup>11</sup> jaska yuiai ninkatan atimas Jesúsun kemakin:

—Diosun dasibi damiwanitun mia kushipa yunuama ekidi min kushipa jayama ikeanaii. Jaskaken jabun ea achixun mianu yunuxun ea nichianbunan, jabun chakabudan, mina binuabuki, Dios sinatamakinan— aka

<sup>12</sup> jaska wa ninkatan Pilato taxnikidan Jesús jawa wama nichinun ikaya judio xanen ibubun jui kushipawen Pilato ana yuikin:

—Tsuada xanen ibu kayabi ikatsis ikin min xanen ibu kayabi César danankin jawen kushipa mebinpai imiski. Jawa wama Jesús min nichianinan, min Césarn jaibumaki— akubainaibun

<sup>13-14</sup> janu Pascua meshukidi ixanaitian ma badi manananbi kaya jaskaibu Pilaton ninkatan Jesús taxnimabidan mishki buyakin kedan wanibu jawen kena hebreo janchawen kenakin Gabatá januxun yunuti anu tsauxun kaxe janchawen judio xanen ibubun jatu yuikin:

—Nadan, matun xanen ibu kayabiki— jatu wa

<sup>15</sup> jaki sinatakin jancha kushipawen yuikin:

—Tenandiwe! Tenandiwe, cruzki jatu mastanmatanan!— ikubainaibun

Pilaton ana jatu yukakin:

—¿Jaskakin matun xanen ibu kayabi jatu mastamapa?— jatu wa

Diosbe nukunabu janchaxunika xanen ibubun yuikin:

—Nukudan, nun xanen ibu betsa jayamaki! César besti nukun xanen ibu kayabiki. Jatu mastamadiwe!— akabu <sup>16</sup> jatun janchawen taexun Jesús jatu mastamakin romano xanen ibu Pilaton jawen soldadobu yunua iyuaibun

### *Cruzki Jesús mastanibukiaki, na janchadan*

*(Mt 27.32-44; Mr 15.21-32; Lc 23.26-43)*

<sup>17</sup> januxun jaki mastakatsi cruz Jesús iamatan xadamabainkin Jerusalén uke medanua kainmabainkin ja mati jawen kena Buxka Xau Mati anu mapematan, hebreo janchawenan, Gólgota anudan, <sup>18-20</sup> januxun jawen tadi pekaxun cruzki mastaxun: “Nazaret anua Jesús judiobun xanen ibu kayabiki”, iwanan, Pilaton jancha dabe inun besti ji bexa sapaki hebreo janchawen inun, griego janchawen, inun romano jancha latinwen kenetan jatu buma Jesúsun buxka mamaki cruzki ja mamaki mastaxun netanbu romano soldado betsabundi juni yumetsu dabedi mastaxun betsa yusiudi nichinxun betsa yusmaudi nichintan Jesús namakis wabu Jerusalén dapikea bukin Pilaton jancha Jesúsun buxka mamaki netan judio ichapabun uinbainbainkin <sup>21</sup> jaska wabu uinbain Diosbe nukunabu janchaxunika xanen ibubu Pilato anu buxun yuikin:

—Jadi min kenexun jatu netanmatidumaki: “Judiobun xanen ibujaidaki”, akinan. Jakia jaska ibubis yuimis keska jatu kene betsa waxunwen, eska wakinan: “Eadan, en judiobun xanen ibu kayabiki”, imiskididan— akabu

<sup>22</sup> Pilaton jatu nemakin:

—Jawada en ma keneadan, jau jabiaska kene nenunwen— jatu wa

<sup>23</sup> cruzki Jesús nichinxun soldado dabe inun dabetan Jesúsun tadi tibi jabu tibibun paxkatan jakia jawen sanpu chaipa jidabi kexemawen taea

<sup>24</sup> yuinamei:

—Paxkakin chakabuwayamanankanwen. ¿Tsuau bimenkain? jawen beyusti jexe putakin tsadin tsadin akin putanankanwen— iwanan, jaska bebunkidi Diosun jancha anu kenekin: “En tadi paxkakin en sanpu bikin jawen beyusti putaxankanikiki”, akin yuini unanmabia jaska kenenibu soldadobun jabiaskadi wanibuki.

<sup>25</sup> Jaska waibun Jesús mastabu dapi jawen ewa inun, jawen ewa betsá Cleofásin ain María inun, María Magdalena inun, ea nun nia <sup>26-27</sup> jawen ewa inun ea uinkin ekidi Jesúsun yuikin:

—Ewaan, ja mia dapi niadan, min bakewawe— iwanan, ea bechipai-jaidamisxun eadi yuikin: —Baa, ikis en ibu min ewa ea waxunwen. Ea uindaxunkubainxanwen— ea wa en jiwe anu iyumaxun en medabewapauniki.

### *Jaskatan Jesús mawanikiaki, na janchadan*

(Mt 27.45-56; Mr 15.33-41; Lc 23.44-49)

<sup>28</sup> Jesúsun jaska nuku yuitan dasibi jawen Epa Diosbe yubakani keyuai unain Diosun jancha anu jaska jakidi kenení menei Jesúsun jui kushipawen yuikin:

—Ma unpax manui en tetsusinaki— ikai <sup>29</sup> ninkatan jabun kenpuki uva vino muka mata tsaua jaki tsinitiki pu atan tawaki ustaxun Jesúsun kexa anu sananxunabu <sup>30</sup> tsu akin keyutan jui kushipawen Jesúsun yuikin:

—Dasibi en ma keyuaki— itan bekua tinian mawakin jawen Yushin ibu anu nichiniki.

### *Jashinwen Jesús pishipe akin chachinikiaki, na janchadan*

<sup>31</sup> Janua judio xanen ibubu yuinamei: “Meshukidi sábado janu medibijaida Pascua nawatitianki. Cruzki jatun yuda mapuabu sábadotian nun jenetidumaki, Dios jau nukuki sinatayamaxanunan. Jatun yuda jau jawaida butenunbun Pilato yununun bukanwen”, ika buxun Pilato yuikin: “Cruz anua jatun yuda jawaida butetiki. Jau jawaida mawanunbun jatun kishi jau kishtekenunbun jatu yunuwe”, akabu <sup>32</sup> Pilaton jabiaskadi shinankin jatu yunua soldadobu buxun ja dukun juni yumetsu dabe Jesúsbe mastabu kishtekedabetan <sup>33</sup> janua Jesúski kemaxun ma mawa uintan jawen kishi tekeabuma <sup>34</sup> jabiaskabiaken soldado betsan jashinwen Jesús pishipe akabu janua jakimamadi jimi jawen jene jusia jabaya <sup>35-37</sup> jakia bebunkidi Diosun jancha kenení anu yuikin: “Jawen xau tekeama ixankanikiki”, anibu inun, kene betsá anuxun yuikin: “Tsuada chachiabu jawenabun uinxankanikiki”, iwanan, kenenibudan, unanmabia jabiaskadi kenení menekin adianibuki. Matundi man ikunwanxanunbun jawada ibubis en uini en matu yuiaii. En uiniwen taea en jancha chanimaki.

### *Jesús jawaida maiwanibukiaki, na janchadan*

(Mt 27.57-61; Mr 15.42-47; Lc 23.50-56)

<sup>38</sup> Januxun juni betsá José jawen mae Arimatea judio xanen ibubuki datekin june Jesús ikunwanshinatun Jesús mawa unandiai jakia natian ana dateama Jesúsun yuda maiwakin janatanun ika kaxun Pilato ea akin yuka jawen yuda yunua José jawen tsumabube kaxun Jesúsun yuda cruz anua butexunabu <sup>39</sup> ja dikabi meshu medan Jesúsbe janchatanyama Nicodemus jawen tsumabubetan 30 kilo mirra inun áloe ininti teipa jusia bea José jawen tsumabube kaxun <sup>40</sup> jaska judiobun yuda mawa maiwakin pewamisbu keska wakin Jesúsun yuda dapuxyabi yabukubainkin ininti teipawen dapuxkubainkin tadi juxupawen yabukin keyutan <sup>41-42</sup> badi jiki ma juindukunti kemaya jin jin ikin janu Jesús mastakanxu dapi miban xukua naman janu yuda mawa datanti mishki tanpe kini bena waimabu janu yuda

mawa datandiabuma anu jawaida ja medan janakin mistutan mishki ewapa beputiwen beputan inun bunibukiaki.

## 20

*Jesús bestenkaina benanibukiaki, na janchadan  
(Mt 28.1-10; Mr 16.1-8; Lc 24.1-12)*

<sup>1</sup> Janua Jesús mawashina ana besteni matu yuinun ninkakanwen. Juindukuntitian Jesúsun yuda mishki tanpe medan dakaken uxa dabea penai taei penadiama meshuken domingotian taeaya Jesús maiwakin janashinabu anua jatube María Magdalena kakin tanpe bepemana uintan Jesúsun yuda jayama uinbidani <sup>2</sup> Pedro inun ea anu kushi chakayamakidan nuku yuikin:

—Nukun Xanen Ibun yuda janidaki nuku buanbuki. Janida datanbu nun unanmaki—nuku wa

<sup>3</sup> ninkatan Jesús maiwashinabu anu Pedrobe kai <sup>4</sup> kushidabekainkin ea dukun binukain tanpeki <sup>5</sup> kemaxun dankukain tanpe medan uinkin jawen yabushinabu besti daka bechitan en jikidiamaken <sup>6</sup> ea ichun chipu Simón Pedro jui ja dukundi jikixun jawen yabushinabu uinkin <sup>7</sup> jawen buyabushinabu sebi pewaxun ja kachu datan uindiaya <sup>8-9</sup> janua eadi jikixun jawen yuda yama uintan: “Mesías Cristo mawa ana bestenxanikiki”, iwanan, Diosun jancha una medan kenebianibu nun ninka pewadiamabia: “En Xanen Ibu Jesús ma bestenkainamenkain”, ikin ikunwankin en shinaniki. <sup>10</sup> Jaskakain uintani nun ana chintunkidaniki, janu nun jiwe anudan.

*María Magdalena Jesúsu nukui taenikiaki, na janchadan  
(Mr 16.9-11)*

<sup>11</sup> Jakia María Magdalena katani ana chintunkidan jua mishki tanpe kexa nia kaxai jeneama nixun ana uinun ika dankukain tanpe medan uinkin <sup>12</sup> nai tsuma dabe tadi juxupa sawea janu Jesús datanshinabu anu jadidi bupinshinabukidi betsa tsaua jadidi taxkunwanshinabukidi betsa tsaudia jatu bechitanaya <sup>13</sup> januxun nai tsuma dabetan yukakin:

—Ainbuun, ¿jaskai min kaxai?— akabu

—En Xanen Ibun yuda janidaki ea buanbuki. Janida datanbu en unanma benai en kaxai ikaii—jatu watan

<sup>14</sup> nasaukekauan uinbiakin tsua nia dabanan unanma Jesús bechia <sup>15</sup> januxun Jesúundi yukakin:

—Ainbuun, ¿jaskai e iskaun janu jua min kaxai ikai? ¿Tsua min benai ikai?—aka

miban taudumis ikai dabanan Maríán shinankin yuikin:

—En Xanen Ibun yuda buxun jani min ea datananxumenkain ea yuiwe, en buaidan—aka

<sup>16</sup> Jesúsun yuikin:

—Maríaan—aka

jawaida dabeketan benimajaidakin hebreo janchawen yuikin:

—Rabuni!— akin nukun janchawen kenakinan: —En Yusinaan— iwanan, ikua

<sup>17</sup> Jesúsun nemakin:

—En Epa anu kadiama uatian en matube jiwemis keskai en ana matube itidumaki. Ea tsumakin ea bashiyamawe— iwanan, —En betsabu anu kaxun en mia yuixu jatu yuiditanwen. Matu medabewai en Epa anu dasinun ika en kaxanaii. En Epadan, jabia matun Epadiki. En Dios mekenikadan, jabia matun Dios mekenikadiki—aka

<sup>18</sup> María Magdalena kaxun Xanen Ibu Jesús ana jiwea uintanxu jadi Jesúsun axu nun jawen tsumabu nuku yuia nun ninkaken

*Jesús bestenkidan jawen tsumabu uinmanikiaki, na janchadan  
(Mt 28.16-20; Mr 16.14-18; Lc 24.36-49)*

<sup>19</sup>jabias domingo meshu medan Tomás nukubemaken jiwe medan ichatan judio xanen ibubuki datekin beputi nun bexekin keyuken Jesús jikikain damitushitan nuku nashui ika nixun nuku jancha wakin:

—¿Jaska man unanumamen? Ma en juai dateyamakanwen— nuku watan

<sup>20</sup>januxun nuku jaska watan jawen meken xui inun jawen jashi xui nuku uinmaya nukun Xanen Ibu ana uin nun benimajaidaya <sup>21</sup>ana nuku yuikin:

—¿Jaska man unanumamen? En matu juxuanki. Datetima kushipa en matu bashixunaii. Jaska inun, jaska en Epa Diosun ea nichinkin yununi keska wakin en matu nichinkin yunudiaii— iwanan, <sup>22-23</sup>kushipa wakin nukukidi kunchunkain kushu atan nuku yuikin:

—Yushin Pepa jayadikanwen. Jaskatan tsuabuda Dioskidi jabu chakabu jaya man jakimawaken Diosundi jatun chakabu jatu buaxunxanikiki. Jakia jatun chakabu man jakimawamaken Diosundi jatun chakabu jatu buaxunama ixanikiki— nuku watan janidaki ana dami kainken

*Tomásin Jesús uintan besti ikunwanikiaki, na janchadan*

<sup>24-25</sup> Jesúsun 12 tsuma kushipaya betsa Tomás tsupibu bakeken jawen kenamisbu nun xukua anu Jesús jua nun uinshinken jabatiandi nukube ikama ishinken meshukidi juai betsan Tomás nun yuikin:

—Nukun Xanen Ibu jiwea nun uinshinaii— nun akeakea

nuku ikunwanma yuikin:

—Jawen meken anu mastashinabu xui en uianma jabianudi en metuti en mistuama chachishinabu jawen jashi xui en mekenwen en mekin mistuama Jesús ana jiwea en ikunwantidumaki— nuku washinken

<sup>26</sup> ana 8 día kaya Tomásbe ichaxun ana nun xui bepukin keyuken Jesús ana jikitán nuku bebun damia nashui ika nixun yuikin:

—¿Jaska man unanumamen? Ana en juai ewen dateyamakanwen— iwanan,

<sup>27</sup> Tomás jabis yuikin:

—Ikis ea uindiwe. En meken xui mewe. Meken sananbain en jashi xui mistudiyuwe. Ana ikunwanbuma keskama en jiwea ea ikunwanwen— aka

<sup>28</sup> uintans damapaikin Tomásin yuikin:

—Chanima min en Xanen Ibuki, en mekenan yushin Diosdan!— aka

<sup>29</sup>—Ea uintans min ea ikunwaiin. Jakia jabun ea uianma en jashi xui uianmabia ea ikunwanxanaibudan, Diosun jatu duajaida waya benimakubainxankanikiki— akai nun ninkaya ana jabiaskadiai damikainiki.

<sup>30-31</sup> Chanima ana jawen unanti dami ichapa Jesúsun nukun bedubi abiakubainiken dasibi en matu kenexunamaki. Jakia dasibi man uianmabia en jancha keneai uinkin ninkakin unantan: “Jesús Mesías Cristoki, Diosun bake kayabidan”, akin Jesúswen taea man jiwei ikibi ixanai man ikunwanxanunbun en matu kenexunaii.

## 21

*Jawen tsumabuki ana Jesús nukunikiaki, na janchadan*

<sup>1</sup> Jerusalén anua Jesúsun nuku bechimai janchashina ana Galilea Ianenwan jawen kena betsa Tiberias Ianenwan kexa anu nun jawen tsumabu nun ka Jesúsun eska wakin nuku uinmani matu yuinun ninkakanwen. <sup>2</sup> Galilea anu nun ka Simón Pedro inun, Tomás ‘Tsupibu bakeen’, akin nun kenamis inun, Natanael jawen mae Caná Galilea anua inun, nun Zebedeo bakebu

ea inun en betsa Santiago inun, ana Jesúsun tsuma dabe betsa nun icha mapuabun <sup>3</sup> Simón Pedron nuku yuikin:

—En baka nexei kaii— ikaya

—Nun mibe kaii— abaini jabe kai jawen xaxu ewapawen nanetan jabe kaxun jawen jisin ewapa puntebiashinkin nun jawa baka biamajaida ishi-anyan <sup>4</sup> ma penakidanaya Jesús ian kexa nia uinbiakin tsua nia dabanan nun unanmaken <sup>5</sup> jui kushipawen Jesúsun nuku yukakin:

—Bakebuun, ¿bakadan, man jayamen?— nuku wa  
nukun kemakin:

—Nun jawa biamajaidaki— nun wa

<sup>6</sup> —Ja xaxu yusiudi jisin ana puntekanwen, jaudixun man biaidan— nuku wa jaska nuku yunuxudi nun puntebauna ninibidankin baka dasibi nuku nexema jaska waxun xaxun nun nanetimaken <sup>7</sup> en ea Jesúsun bechipai-jaidamistun Pedro yuikin:

—Nukun Xanen Ibu daki ikikiki— en wa Simón Pedro jawaida ninkatan tadi pekaxun jisin punteshinai jawaida sawekin kedun atan ishchui pukutan nunakainaya <sup>8</sup> jakia 100 metro besti xaxuwen kakin jisin baka mata xadabaini nun jawen tsuma betsabu keti itan <sup>9</sup> xaxu anua butukainkin chi dekenen besti baka xuiai inun misi mania nun uiyanan <sup>10</sup> januxun Jesúsun nuku yunukin:

—Ja baka man bixudan, nedí eskadabe bekanwen— nuku waya <sup>11</sup> janua Simón Pedro kakain xaxun inatan jisinman baka ichapa bia ninikin xad-abidankin mashin mapema 153 jati baka ewapabu nanea jisin baxnekeamaken <sup>12-13</sup> Jesúsun ana nuku yuikin:

—Piyui bekanwen— nuku wa nuku baka nexemaxunwen taea: “Nukun Xanen Ibu”, ikin unantan: “¿Min tsuamen?” iwanan, nun yukama misi inun baka xuia bixun nuku inan keyutan <sup>14</sup> jaskai mawashina ana bestenkainshinxun Jesús nukuki dabe inun bestiki nukukin nuku uinmaniki.

### *Jesúsun: ¿Min ea bechipaiai? iwanan, Pedro yukanikiaki, na janchadan*

<sup>15</sup> Januxun pikin nun meneaya Jesúsun Simón Pedro yukakin:

—Juanen bake Simóneen, ea ninkawe. Nabun ea bechipaiaibun miandi ea bechipaikin jatu binunun, ixun, min yuishinadan, ¿jabiaskas min shinain?— aka

—Xanen Ibuun, en mia bechipaiaidan, min unaiin— aka

—Jabiaskadi wakin enabu chaxuwan bake keskabu jatu ea mekex-unkubainxanwen— iwanan,

<sup>16</sup> ana Pedro yukakin:

—Juanen bake Simóneen, ¿min ea bechipai kayai?— aka

—Jaa, en mia bechipaiaidan, min ea unaiin— aka

—Jabiaskadi wakin ea ikunwainbu chaxuwan keskabu ea jatu mekex-unkubainxanwen— iwanan,

<sup>17</sup> ana jawen jenekin Pedro yukakin:

—Juanen bake Simóneen, ¿min ea bechipaijaidai?— aka  
dabe inun bestiki jabias yukaiwen taea Pedro juinti nishmai punu nukatan bechipaiaiwen taexun yuikin:

—Xanen Ibuun, en shinan dasibi unankin en mia bechipaijaidaidan, min unaiin— aka

—Jabiaskadi wakin enabu chaxuwan keska jatu yusinkin jatu ea mekexuindakubainxanwen— iwanan, <sup>18-19</sup> Jesúsun Pedro ana yuikin:

—Chanima en mia yuiai ninkawe. Bedunan kushipakin tadi sawetan janida kaidan, min ma itishadashinaki. Jakia min anibu meshan dakaken juni betsan mia tadi sawemakin janu min kakatsi ikamabiaken mia

iyuxankanikiki. Jabiaskabiaken ea ninkatan ea chibapakewe, ikisdan—akin jaskatan Pedro mawakin Dios jatu kenwanmaxanai jau ninka pewanun Jesúsun yuiai nun ninkaniki.

*Pedron Jesús Juankidi yukanikiaki, na janchadan*

<sup>20-21</sup> Jesúsun jancha ninka keyutan dabekekaun ea Jesúsun bechipai-jaidakubainmis badi kaya pi dakaxun en yukakin:

—Xanen Ibuun, ¿tsuan mia akimenkain, jatu achimakinan?— en washina jawen pechiudia en juai Pedro dabekekaun ea uinkin Jesús yukakin:

—Xanen Ibuun, ja junidan, ¿jaska wadiaxankanimenkain?— aka

<sup>22</sup> Jesúsun kemakin:

—Xanen ibui en ana judiamakenan Juan jiwea mawamas ixanai keska en shinain jawen dabanan iyamawe. Mianan, jaska en mia yunumis besti akubainkin ea chibapakexanwen —akin Jesúsun Pedro yuiniiki.

<sup>23</sup> Jaska bestibianiken ikunwainbu ekidi yuinamei: “Jawen tsuma Juan Jesúsun bechipaijaidanidan, mawamas ixanikiki”, ikin ekidi kaka akeakenibuki. Jakia: “Mawama ixanikiki”, akin Jesúsun ekidi yuama jakia: “Xanen ibui en ana judiamaken Juan jiwea mawamas ixanai keska en shinain jawen dabanan iyamawe”, akin Jesúsun Pedro yuibianikenan.

<sup>24-25</sup> Ana midima Jesúsun akubaini dasibi nun kene keyuadan, jati una mai jidabi anuxun meketidubumaki. Jakia Dioskidi Jesúsun nuku unanmai uinkin ninkakin dasibi en tapiniwen taexun en jancha chanimawen ean ibubis en matu kenexunxudan, jatixuki.

Juan

## JESÚSUN KUSHIPAYABUN JASKA WAKUBAINIBUKIAKI HECHOS

*Diosun Yushin Pepa Jesúsun jawen tsumabu jatu yubabainikiaki, na janchadan*

<sup>1</sup> En jaibu pepa Teófiloon, ja dukun una en mia kenexun bumaimadan, ja dukun Jesúsun jatu yusinkin axunkin taewabidanimadan, jaska dasibi jakidi en mia kenexun bumaimaki. <sup>2</sup> Nai anu kadiama Yushin Pepaki dasia nixun jawen tsumabu kushipayabu yusinkin jau jaska katuxun chanima akubainxanunbun jatu yunuyabis xaba betsation nai anu inakainikiaki. <sup>3</sup> Janua ma mawabiashina besteinmaxun jawen yuda kayabi ana xabakabi jatu kayatiwamakin jau unantijaidawanunbun xaba 40 día jatu uinmakin jaskai Dios nuku xanen ibuxunxanaikidi jatu jancha wakubainikiaki.

<sup>4</sup> Janua Jesús jawen kushipayabube niyuxun jau Jerusalén anua kainbainyamayuxanunbun jatu nemakin yuikin:

—Jaska Epa Diosun matu yubani en matu yuishinadan, jau matu inankin yunuxanun nenua kaianma jabianuxuns manayuxankanwen. <sup>5</sup> Chanima Juanen jenewen dukun jatu nashimakubainyamaki. Jakia eanan, jabiaskadi wakin samama duakabi Diosun Yushin Pepawen en matu nashimaxanaii, matu unanti wamakinan— jatu waya

*Diosun nai anu Jesús aniai jawen tsumabun uinibukiaki, na janchadan*

<sup>6</sup> januxun jatube ichabu betsan Jesús yukakin:

—Xanen Ibuun, ¿na jabiatianan, nawabu nichintan nukunabu Israelbu ana jatu pewakin kushipa wai min jatun xanen ibui taei kai?— akabu

<sup>7</sup> Jesúsun jatu kemakin:

—Jatianda ibubis jawen kushipawen Epa Diosun jaska waxanaidan, matunamaki, man unantidubumadan. Jatun besti unainkiki. <sup>8</sup> Jaska man jawen unantidudan, jawen Yushin Pepa matu anu juaya jawen kushipa bitan Jerusalén anuxun inun Judea mai pakea inun Samaria mai pakea ja dabe jidabi anuxun inun chajaida mai kesua anu jiwebaunabu anu bukubaunkin ekidi man jatuki chanikunkainyuxanaii— jatu wai <sup>9</sup> ninkakin uiainbun Jesús jaskabiama nai anu Diosun ainikin duntanbainai nai kuin bekin bepukin juneaya ana uianbumaken <sup>10</sup> Jesús jaska kainkin jatu jenebainai uin naiudi teskanxun uinkin jenediabumaken juni dabe sanpu juxupa sawea damia jatu be bun nitushitan <sup>11</sup> jatu yuikin:

—Galilea anuabuun, ¿jaskakin man naiudi uiain? Na jabias Jesús matu anua nai anu Diosun ainiaidan, jaskakainai man dama uinxu keskadiai ana jabiaskadiakidanxanikiki, jaudiadidan— jatu wabu

*Jesúsun tsuma kushipaya betsa wakin Matías katunibukiaki, na janchadan*

<sup>12</sup> janua Olivos Mati anua Jesúsun tsuma kushipayabu Jerusalén anu ana chintunbidani kilómetro bestichai jatixun yununi besti anu juindukuntitlan katani <sup>13</sup> jaskabidani ja mae anu jikitán janu ikabu jiwe keyatapa dintu medan mapekenibukiaki, Pedron, Juanan, Santiagodan, Andrésdan, Felipedan, Tomásdan, Bartolomé dan, Mateodan, Alfeon bake Santiagodan, Simón Celote jatun nawabu nichinkatsis imisdan, Santiagon bake Judasdan.

<sup>14</sup> Jabu jaskabidiana ja dintu anu ichai Jesúsun betsabu inun, jawen ewa

María inun, ainbuaibu jabun ikunwainbu jatube ichaxun xaba tibi jau Diosun jatu medabewanun yukakubainibukiaki.

<sup>15</sup> Ja xaba tibi jaskakubainkin xaba betsatian 120 ikunwainbu jatube icha maniabu Pedron jatu yuinun ika benitan jatu yuikin:

<sup>16</sup> —En betsabu inun en puibuun, jaska bebunkidi Judaskidi Diosun Yushin Pepatun David yuia kenenidan, jabias Judasin akin meneimaki. Jaska wanikidi akin chanima jatun jatu iyuxun Jesús jatu achimaimaki. <sup>17</sup> Jamen Judasdan, ja dukun Jesúsun nukube katuxun nukube daya inandiayamaki—ikimaki. <sup>18</sup> Jaska Judasin chakabu shinankin jawen Xanen Ibu jatu achi-mashina ja pei pakabu jawen chakabuwen taexun bishianwen taexun juni betsan bai tude bitan janua Judas ibubis ikidan, manaundia maikidi besukid dan tin iki pupexekei puku jadas iki keyutan mawanikiaki. <sup>19</sup> Jerusalén anu jiweabun ninkatan ja bai kenakin: “Hacéldamaki”, akin kenakinan, jatun janchawen yuiadan: “Jimi baiki”, anibu kenamisbuki. <sup>20</sup> Chanima Salmos una medan Judaskidi Davidin bebunkidi yuikin:

‘Jawen mae jenebainaya ana tsua janu jiweama ixanikiki’,  
ani inun:

‘Jawen daya jenebaina juni betsan jau ibu waxanunwen’,  
aniki.

<sup>21</sup> —Jaska Davidin kenenikidi shinanankanwen. Nukubetan Jesús chibamisbun na junibu nun jatube paxkaisma Xanen Ibu Jesús nun chibaintian nukube ikubidanshinabu nun jayaki. <sup>22</sup> Juanen Jesús nashimai uintan ikunwanbidanibu inun nai anu Jesús inai jabun uinshinabu jau jabu bets nukuki dasitan jadi jau jaska Jesús mawa bestenkainima jau nukube jakidi chanikunkainxanun betska katunankanwen— Pedron jatu watan

<sup>23</sup> januxun juni dabe José Barsabás jawen kena betska Justo inun Matías katutan <sup>24</sup> jabun eska Dios jatu yukaxunkin:

—Xanen Ibu Diosuun, dasibibun shinan min unainwen taexun na juni dabe pepa jadatuda min katuai nuku uinmawen, <sup>25</sup> jau Judasin jawen chakabuwen taexun jawen kushipa daya benutan janu nuitapai kaken jau jawen daya kushipa betsan binunan— atan <sup>26</sup> unankatsis ikin jawen unantiwen katukatsi unanti watan putabu Matías unanti wabu kaianyan ja katuabu Jesúsun 11 tsuma kushipayabuki Matías dasitan jatube ikunkainikiaki.

## 2

### *Diosun Yushin Pepa jatu anu junikiaki, na janchadan*

<sup>1</sup> Janua ana betsatian judiobu Pentecostés nawai besiaibun Jesús ikunwainbu dasibi janus ichabun <sup>2</sup> jawaida nai anua jawen bana niwe kushipa bei danka imis keska xunku ibidani janu maniabu anu kedun kedun ikin <sup>3</sup> jaskakin Jesús ikunwainbu tibi chi jede keska xawa akeakei jatu mamaki madatamea ji ibauni jatuki jikia akeakeaya <sup>4</sup> jaskakin dasibi jatu achimakin keyuaya jaska janchatidumbumabiaken nawa betska betsapabun jancha tibi-wen Diosun Yushin Pepatun yuimakin jatu janchamakin taewaya

<sup>5</sup> mai pakea betska betsapa anua judiobu Jerusalén anu jiwei benibu jiwe-abun jabu pepakin Diosun jancha chibankin menekin jeneisbuma <sup>6</sup> jawen bana ninkabidani janu midima ichaxun ikunwainbu anu jancha betska betsapawen janchabaunaibun jadakidi shinantima jatu wa akeakeabu juni tibitun mai kesua anua jabun janchawen janchaibu ninkai jaskawen janchaisbuma ninkai <sup>7</sup> jaskakainmaibu ninkai e iki teku iake iakei janchaname-baunkin yuikin:

—Nadan, ¿Galilea anuabumamen, na jaska dasibi janchabaunkanaidan? <sup>8</sup> Nukun jancha tibiwen janchabaunaibubin! ¿Nun ninkai? ¿Jaskai ja junibu jaska janchakanimenkain? <sup>9</sup> Na nun nukubudan, Partia anuabu inun, Media anubu inun, Elam anuabu inun, Mesopotamia anuabu inun, Judea anuabu inun, Capadocia anuabu inun, Ponto anuabu inun, mai pakea Asia anuabu inun, <sup>10</sup> Frigia anuabu inun, Panfilia anubu inun, Egipio anuabu inun, Libia mai pakea Cirene dapi anuabu inun, Roma anuabu inun, <sup>11</sup> betsa judio kainibu inun, betsabun judiobun beya chibanmisbu inun, Creta anuabu inun, Arabia anuabu beimabu nukun jancha tibiwen Diosun kushipawen e imatikidi yuiaibu nun jatu ninkaii— iake iakeaibun

<sup>12</sup> jaskaibu jatu ninkatan dasibi jadakidi shinantima e iki keyutan yuka iki:

—Na eska chanii janchaibudan, ¿jawamen?— ikaibun

<sup>13</sup> jakia juni betsabun jawa shinanmadi jatu kaxe wakin ikaibukidi jatu yuikin:

—Paean daki janchai ikanikika!— ikaibun

### *Pedron jatu tapinmai janchanikiaki, na janchadan*

<sup>14</sup> janua Jesúsun 11 tsuma kushipaya betsabube Pedron jatun jancha ninkai benia nixun jui kushipawen jatu yuikin:

—Judiobu inun dasibi Jerusalén anu jiweabuun, eska en matu yuiai ninka peidawakanwen, jaska man ninkai janchaidan. <sup>15</sup> Na yudabudan, paeanbumaki, jaska man shinankin ikunwain keskamadan. Jaskai e iskaun badi keyadiamabiaken 9:00 badi paentidubumaki. <sup>16</sup> Jakia natian jaska taxnai ninkakin man uiainan, jaska bebunkidi Dios yubakanixun akikiki. Jawen jancha yuixunika Joel Diosun jatu yuimakin:

<sup>17</sup> Dios chanii:

‘Ma badi jawen jenei kaya en Yushin Pepa yudabu anu en jatu yunua jatuki dasiken matun juni bakebu inun matun ainbu bakebun ekidi yusiaint bun

bedunanbu uxa keskaxun

dami betsabetsapa uiainbun

ainbibu uxa ekidi namadiaxankanikaniki.

<sup>18</sup> Jabatiandi en tsumabu junibu inun ainbu en Yushin en jatu inan ekidi yusinbaunxankanikaniki.

<sup>19</sup> Jaska inun, nai anua jawen e imai kushipa wakin mai anuadi dami betsabetsapadi en waxanaii.

Jimi jabamakinan, chi wakinan, basnun bai kua jawen kuin keska wakin en jatu uinmaxanaii.

<sup>20</sup> En bake kushipajaidai chaxakapai xanen ibui jua kemadiamaken xaba betsabetsapaxanikaniki.

Ja jaskaitian badi ana chaxama meshu wakin inun uxe ana chaxamadi jimi keska ixanikaniki.

<sup>21</sup> Januxun tsuabunda: En Xanen Ibu Yavé Dios kushipaki, ikin ea yuiaibu jabu besti paxakin jatun jiwea ikibi ika bixankanikaniki’, aka Joelin yusintan nuku kenexuniki, iwanan, Pedron ana jatu yuikin:

<sup>22</sup> —Israelbuun, en matu yuiai ea ninkakanwen. Matunan, man unan-jaidaii. Jesú Nazaret anua jua Diosun kushipa watan jawen e imati inun jawen unanti wamakin dami itimaska tsuan atiduma wamakin jawen kushipa matu uinmakin Diosun ama akeakekin xabakabi matu uinmakubain-imaki. <sup>23</sup> Jaska yubakani Diosun ja juniwen abainai shinanma jaska wai bextenun, iwanan, matun jawen bake danankin jaki yubakatan jatu achi-matan tenanmanun, iwanan, juni chakabu man jatu mastamaimaki. <sup>24</sup> Jakia

mawabiaken Jesús Diosun ana bestenwainmaki, mawamamistun isin tene-makin bashitudubia jawen jiwea yabutiduma binumakinan. <sup>25</sup> Jamen xanen ibujaida Davidin Jesús iki kaikidi yuikin:

‘En xanen ibun ea mekekin  
en yusiudi jawen kushipawen ea medabewai en uinkubainaya  
jawa tsuan ea maematan binuntidumaki.

<sup>26</sup> Jaskawen taea juinti shinan chankain benimai nawakin kenwankin je-neama  
en jiwea dasibiwen ikunwain jawa dateama en ikunkainxanaii.

<sup>27</sup> Mawabu janu dasibi bumisbu anu ka  
min medibi min tsumapan yuda maiwati tanpe anu  
jau dakai chapuyamaxanun min nemaxanaii.

<sup>28</sup> Jaska watan janu jiwekuin kati bai ea unanmatan  
mia anu jiwemakin min ea benimawakubainxanaii”,  
akin nuku kenexuniki— iwanan, ana Pedron jatu yuikin:

<sup>29</sup> —En betsabu inun en puibuun, nukun xenipabu kayabi Davidkidi chanima xabakabi matu yuinun ea ninkakanwen. David mawa janu maiwakin jawen yuda jananibu nun uinmiski. <sup>30</sup> Jabias David Diosun jancha yuixunika jawen yudakidi jamebi janchama jakia jawen baba betsabu kaindiamakidi Dio-sun yubakin xanen ibujaida ixanai unanmakin yuimaniki. <sup>31</sup> Diosun jancha yuixunika David bebunkidi Diosun shinanmakin Mesíaskidi janchamakin jatu yuimakin: “Mesías Cristo mawa jawen yuda chapuama inun mawabu anu jawen yuda bashiama ana bestenwanxanikiki”, ika jakidi janchaniki.

<sup>32</sup> Jamen Diosun jaskakidi janchamanidan, ja Jesús mawa bestenwanshina chanima ibubis dasibibun nun uinkubainshina nun unankanaii. <sup>33</sup> Januxun ana bestenwantan Dios jau jabe xanen ibunun, iwanan, jawen yusiudi tsautan jaska yubakani jawen Yushin Pepa jawen Epan Jesús inan jatun nuku inan akeakekin nuku kushipa waikiki, na jabia ninkakin man uiainan.

<sup>34</sup> Jaska inun, Davidkidima tsuada nai anu kaxanaikidi jabias Davidin jamebi yuikin:

‘Diosun en xanen ibu yuikin: En yusiudi tsauyuwe.

<sup>35</sup> Janu miki sinataibu en mia yamawaxundiama  
ebe xanen ibukin manayuwe’,  
aka jatu yusintan nuku kenexuniki— iwanan,

<sup>36</sup> —Israelbu dasibibuun, chanima matu xabakabi shinanmanun ea ninkakanwen. Ja jabias Jesús cruz anu man jatu mastamaimadan, Diosun bestenwantan nukun Xanen Ibu kayabi nuku waxuinmaki, jawen Mesías Cristodan— jatu wa

<sup>37</sup> janu jatube ichabun ninkai ¿jaskatimen? ika jatun juinti nishmajaidai bika tenekin shinankin Pedro inun Jesúsun tsuma kushipayo betsabu jatu yukakin:

—Betsabuun, ¿jaskatan nun jaskatidumen?— jatu wabu

<sup>38</sup> Pedron jatu kemakin:

—Dios man chibankatsis ikaidan, matun chakabu jenetan matun shinan betsabu watan Dios anu bedikanwen. Jaska watan man Jesucristo ikunwain-wen taexun jawen kenawen matu tibi nun matu nashimaya matun chakabu buatan jawen Yushin Pepa Diosun matu inan man bixanaidan. <sup>39</sup> Nukuna bestimaki. Jaska Dios yubakani ma akikiki. Matu dasibibu inun matun bakebu inun chajaida manibaunabu nukun Xanen Ibu Dios jaska matukidi yubakaidan, dasibi matukidi iniki. Jaskawen taexun jatida jawenabu wakin katukin kenakatsis ikikiki— iwanan,

<sup>40</sup> ana jancha ichapawen Jesús mekenankidi xabakabi yusin pewatan Pedron jatu yusinkin yuikin:

—Ja yudabu jiwe chakabu anua paxadikanwen— jatu wa

<sup>41</sup> januxun ja xabatian jawen jancha ninkakin ikunwankin shinan betsa waibu 3,000 yudabu nashimabu jati ana jatubetan ikunwain jatuki dasinibukiaki. <sup>42</sup> Januxun Jesúsun kushipayabun jatu yusianinbu jabun jatun yusian tapinkin chintuanma jawada jatun jamapai paxkai medabenain inun, ichaxun jatubetan Jesús jatu mawaxunima shinankin misi pikin inun, jabubetan Dios kushipa yukakubainibukiaki.

### *Jabun dukun ikunwantan eskai jiwekubainibukiaki, na janchadan*

<sup>43</sup> Jabiatandi Jesúsun tsuma kushipayabun Diosun jatuwen dami atimaska ichapa akin jawen unanmati betsa betsapa akaibun dasibi Jerusalén anu ji-weabu e iki jabaa ikubainaibun <sup>44</sup> ikunwainbu dasibi paxkama medabenain jatun jamapai yaushiamma inananankin <sup>45</sup> betsabu mabuyabu inun baiyabun jawen pei bikatsi juni betsabu inantan jawen pei bitan ikunwainbu nutapaibu jawa jayama pei jatu paxkaxunkin medabewakubainibukiaki. <sup>46</sup> Janua xaba tibi Templo jemaintin anuxun kushipa yukakin jiwe anuxundi ichaxun jawa chintuanma shinan chankanbetanan jatubetan pikin Jesús jatu mawaxunima shinanmati misi pikin <sup>47</sup> Dios kenwainbun dasibibun jatukidi pe shinankubainaibun xaba tibi betsabun Jesús ikunwain yuda kaian ichai jatuki dasiaibu Diosun jawenabu jatu wakin kenakubainikiaki, jabu jiwei mekekatsi ikaibudan.

## 3

### *Juni chantu jabiaska kaini Pedron beninikiaki, na janchadan*

<sup>1</sup> Janua xaba betsation ma 3:00 badiken judiobun Dios yukamisbutian Pedro inun Juan Templo anu buaibun <sup>2</sup> jabianudi juni betsa chantu kainitun jau jatu pei ea anun, iwanan, xaba tibi Templo jemaintin mishki kene jikiti xui jawen kena Hermosa, nukun janchawen yuia Jawendua anu jawenabun iyuxun tsauntantanmisbu <sup>3</sup> Pedro inun Juan jikinun ika buaibun juni chantun jatu uinkin yukakin:

—Ewen nuikin ea pei inankanwen— jatu wa <sup>4</sup> jabun uinkin dais keyutan Pedron yuikin:

—Nedi nuku uinwen— aka

<sup>5</sup> “Ea pei inankanikiki”, ixun bedi ikama jatu uiyanan <sup>6</sup> januxun Pedron ana yuikin:

—En peiumaki. Jakia en ja jayadan, en mia inaiin. Diosun kushipa en jayawen taexun en mia xuxawatiduki. Jesucristo Nazaret anuatu kena kushipawen taea benitan nidiwe— atan

<sup>7</sup> Pedron jawen meken yusiudiawen metsunxun benia jawen tae inun jawen jupuxku jawaida mestein jukushitan <sup>8</sup> janua ja juni chantuni beni ishchui ti itan ni taekaini Pedro inun Juanbe Templo jemaintin anu jikikaini ishchui ti ti ikainkin Dios kenwankin taewabainaya <sup>9</sup> dasibibun uiainbun nikainkin Dios kenwanbainai <sup>10</sup> jabun uin e iki datekin ¿jaskai jaskaxumen? ikin: —Ja junin jatun Templo jemaintin jikiti xui jawen kena Jawendua anu tsauxun pei jatu ea amis ma xuxa unain jibia ikikiki— ikaibun

*Badi utati jawen kena Salomón anuxun Jesúskidi Pedron xabakabi jatu yusinikiaki, na janchadan*

<sup>11</sup> ja juni chantu kaini ma xuxawabu Pedro inun Juan jatu dapaxkama jatube niken dasibi yudabu kushibidan uin e ibidan ibidani Templo je-maintin kexa janu badi utati jawen kena Salomón anu jatuki dasi ichabidan-bidanaibu <sup>12</sup> jaskaibun Pedron jatu uinkin yuikin:

—Israelbuun, ¿jaskai nuku uin man e ikanai? ¿Na juni nun xuxawaxu benitan nia uinkin nukun kushipawen nun axu man shinainmenkain? ¿Dios keskakin nun juni pepajaidawen taexun nun xuxawaxu man daka shinain? <sup>13</sup> Nun jaskamaki. Matu yuinun ninkakanwen. Jabias nukun xenipabu Abraham inun, Isaac inun, Jacobun Dios kenwanpaunibun na juni ma xuxawaxuki. Ja inun, jawen bake bechipaijaidakin Diosun nukuwen taexun kenjaidawabiamisken danankin matubu jaki sinatakin achixun nawa xanen ibujaida anu man iyua januxun Pilaton shinan pewatan tenankatsi ikama nichinpanan man nemaimaki. <sup>14</sup> Januxun matundi Pilato yukakin Jesús juni pepatun jawa chakabuwaisma jau taxnimanun Pilato yunuama ja juni chakabu besti medabewakin man yuka matu jawa waxuanma nichinxuni-maki. <sup>15</sup> Jaska wakin jatun nuku jiwekuinmaxanai man jatu tenanmabia mawa Diosun ana nuku bestenwanxuinma nukubun uinkubainimaxun nun unaiin. <sup>16</sup> Jaskawen taexun Jesús ikunwankin jawen kushipawen na juni man uiymis jawen yuda jidabi kushipa wakin nun ma xuxawaxuki, jaska dasibitun man uiainan— iwanan, ana jatu yuikin:

<sup>17</sup> —Enabuun, Jesús ikunwankatsi ikama jawen kushipa unankin kay-atí wakin tapindiamabia matun xanen ibububetan ja juni unanma man tenainma chanima en unaiin. <sup>18</sup> Ja man jaska waimakididan, bebunkidi Diosun jawen jancha yuixunika dasibibu jakidi chanikin nukunabu yuikin: “Jawen Mesíasdan, nuitapatan mawaxanikiki”, anidan, jaska yuini keska wakin Diosun ma jatu menemaimaki.

<sup>19</sup> Jaska shinanma Dios man chibankatsis ikaidan, matun chakabu jenetan matun shinan betsa watan Dios anu bedikanwen, jau matun chakabu matu buaxununan. <sup>20</sup> Diosun matu jawen daewakin pepawakin benimawakatsis ikin jawen bake Mesías Cristo bebunkidi katutan matu yubaniki, jau man jaki dasixanunbunan. <sup>21</sup> Janua natianan, Jesúsdan, naiudi kayuimaki. Jaudixun Diosun mai anuabu jawen jatu pewamakin keyumakin manakamayuikiki, jaska jawen jancha yuixunika medibibu jiwxun nuku kenexunpaunibu keska wamayukinan. <sup>22</sup> Janua Moisésti jakidi nukun xenipabu jatu yuidakin: “Jawen jancha yuixunika ea keska matu anua matun Yavé Diosun kainmaxanikiki. Jaska matu yunuai ninkatan chibankubainxankanwen. <sup>23</sup> Jakia jawenabu bababun tsuabunda Diosun jancha yuixunika Mesías ninkakatsi ikabuma Diosun kupikin jatu yamawaxanikiki, ana jawenabuma wakinan”, aniki.

<sup>24</sup> Moisés besti jaska jakidi chaniama jakia jawen jancha yuixunika tibi Diosun jatu yuimakin Samuelwen taewakin jaska Diosun jawen bake yunux-anaikidi yusiin jabudi chanikubainibuki. <sup>25</sup> Jaska inun, matu jenekatsi ikama Diosun jawen jancha yuixunikabu janchamai jabuwen Dios matuki yubakaniki. Jaskawen taexun matun xenipabu Diosun yubai nukun xenipabu Abrahambe Dios janchakin matu jeneama inunbadiaikidi yuikin: “Min baba betsawen taexun min bababu inun dasibi nawa betsaa betsapabu xukua tibibu en jatu pepawadijaxanaii”, aniki. <sup>26</sup> Jaskawen taexun Diosun jawen bake bestenwainmaxun man jawenabu dukun matukidi pe shinankin matu duawakin taewaikiki, matun chakabu jenetan man shinan betsaa wanun-bunan— jatu wai

## 4

*Judio xanen ibubun Pedro inun Juan yukanibukiaki, na janchadan*

<sup>1</sup> Pedro inun Juanen yuda ichapabu jatu yusinkin menediabumaken Diosbe jawenabu janchaxunikabu inun, Templo mekemisbu xanen ibu inun, saduceobu bexun <sup>2</sup> Pedro inun Juanen yudabu yusinkin Jesús mawa ana bestenkainima jatu unanmai ninkatan jatuki sinatabain <sup>3</sup> jatu achixun ma badi kaya bichiti jiwe anu jatu bichitan: “Meshukidi besti jatu yukatiki”, ibainaibun <sup>4</sup> ja jaskaibutian ichapabun jabun Pedron jancha ninkakin kakapewen taexun Jesús ikunwankin taewaibu jatu tanakin ainbu tanama junibu besti 5,000 tananibukiaki.

<sup>5</sup> Janua uxashini Jerusalén anu judio xanen ibubu inun, mae xanen ibubu inun, Diosun jancha kenenibu yusinanamisbu Jerusalén anu ichabun <sup>6</sup> jabianudi judio xanen ibujaida binua Anás inun, Caifás inun, Juan inun, Alejandro inun, Diosbe jawenabu janchaxunika xanen ibubun enabu dasibi jatibu ichaxun <sup>7</sup> Pedro inun Juan jau iwenunbun jatu yunua iweabu jatu namakis nichintan yukakin:

—¿Tsuán kushipawen inun tsuan kenawen na juni man xuxawashinamen?—jatu wabu

<sup>8</sup> Diosun Yushin Pepatun Pedro kushipa wa jatu kemakin:

—En xanen ibubuun, <sup>9</sup> juni nuitapai isin teneai pewakin nun xuxawashinakidi tapinkatsi ikin man nuku yukai ikai. <sup>10</sup> Jaskakenan, matu inun dasibi Israelbun man ninkaya matu shinamanun ninkakanwen. Jabias Jesucristo Nazaret anua jaki sinatakin jiki man jatu mastama mawa Diosun ana bestenwainma ikunwankin jawen kushipa bestiwen na juni dasibibun man uiain nun xuxawashinaki. <sup>11</sup> Jesús Diosun jaska keska waimakidi matu xabakabi wanun ea ninkakanwen. Man jiwe wanikabun mishki dananbiaibun jabias mishki keska Diosun bixun dexun makedex wakin kene jawen mestenwankin akawaimaki, ja jabias Jesúsdan. <sup>12</sup> Ja inun, jawa tsua betsawen nun meketi jayamakiaki. Mai jidabi anuxun jawa juni betsawen Diosun jawen nuku mekekin paxawati jayamadikiaki—jatu wa

<sup>13</sup> janua Pedro inun Juan jawa dateama kushipai xanen ibubun uianbun bedubi Jesúskidi xabakabi jatu yusiaibun xanen ibubun ninkatan ja junibu unanepabuma inun escuela anuxun jawa tapinsbumabia pewen jatu jancha waibuwen taea unain e itan jakia Jesús jatube nixun jatu yusinkubainima shinantan <sup>14</sup> ja juni xuxawashinabu jatube niawen taea jaska waxun jatu jaska watima naxukukin <sup>15</sup> januxun janu ichabu anua jatun mekenikabu jatu nichinmatan jabu besti yubakai yuinamea akeakekin <sup>16</sup> yuikin:

—Na Jerusalén anu jiweabun dami atimaska wakin xuxawashinabu dasibibun unankanikiki. ¿Nun jatu jaska wai, na juni dabedan? “Jabun akamaki”, ikin nun jatu padanmatidumaki. <sup>17</sup> Jakia na jaska Jesúskidi chanikubainaibudan, dasibibu jau ana jatu ninkamakin ikunwanmayamanunbun jatu bextekin nesewanankanwen, jau unudi ana Jesúskidi tsua yusintaskayamaxanunbunan—itan

<sup>18</sup> januxun ana jatu kenaxun jatu yunukin:

—Jesúskidi ana janchakin jawen kenawen jatu yusinyamaxankanwen—jatu wabu <sup>19</sup> Pedro inun Juanen jatu ninkasama jatu kemakin:

—Dasibi nun amis Diosun unainwen taea ¿jadatu chibain pemen? ¿Matun jancha ninkaimenkain? ¿Diosun jancha ninkaidaka? Jaskaken matumebi unanti wakanwen. <sup>20</sup> Eskawen taea nun ikai matu yuunun ninkakanwen. Jawada uinkin nun ninkakubainima jakimama jatu yusinkin nun jenetidumaki—jatu wabu <sup>21</sup> jaska xuxawashinabuwen taexun yudan kaianen Dios

kenwainbu xanen ibubun uinkin jabuwen datekin jawa chakabuwama ishi-anbu jaska waxun jatu kuptima jancha kushipa bestiwen ana jatu nematan nichinibukiaki. <sup>22</sup> Ja juni chantu kaini ma 40 badi binubiaken kaya wakin damiwakin akawanibukiaki.

*Jesús ikunwainbu jatu mesewaibu datetima kushipa yukanibukiaki, na janchadan*

<sup>23</sup> Janua Pedro inun Juan jatu jawa wama jatu kainmabu kainbain jatun jaibuaibuki nukutushitan jatube ichatan dasibi Diosbe jawenabu janchax-unika xanen ibubu inun mae xanen ibubun jatu jaska wakanxu jatuki chaniaibu <sup>24</sup> jaska jatu wakanxukidi ninkatan dasibibun Dios kenwankin yukakin:

—Nukun Epa Diosuun, nai inun, mai inun ianenwan, inun dasibi janu jiweabu min damiwani nun unaii. <sup>25</sup> Jaska inun, min Yushin Pepawen min tsuma nukun xenipabu xanen ibujaida David yuimakin:

‘¿Jaskai jamenmens jawa shinanma ja yudabu yubaka besumai jaskai jamen ja iki janchanwankanimenkain, jawa shinanmadan?

<sup>26</sup> Mai kesua anua inun mae tibi anua xanen ibubu kushipabu icha yubakai Xanen Ibu Dios inun jawen Katua Mesías danain jaki sinataxankanikiki, iki janchanidan,

<sup>27</sup> —Chanima na jabiatian xanen ibu Herodes Antipas inun Poncio Pilato na mae anu nawa betsabube inun Israelbube icha min tsuma Jesús medibi min katuni Mesías min yununi min kenwanmis jaki sinataxankanikiki. <sup>28</sup> Jaska dasibi bebunkidi min jakidi yubakani jau jaska wai bununbun min yuinidad, chanima jaska keskadan, jabunan, ma akimabuki. <sup>29</sup> Nukun Xanen Ibuun, natianan, jabun nuku mese mesewaibu min uiain. Jaskawen taexun nun min tsumabu jawa datea min baken kakape nun xabakabi chanikunkaunun nuku yunuwe. <sup>30</sup> Min kushipa paewen isin teneaibu xuxawakin dami atimaska tsuan atiduma min tsuma medibi Jesús min waniwen jawen kushipawen nuku amakin nuku jatu uinmakubainwen— akin

<sup>31</sup> Diosbe janchai meneabun jabatiandi janu ichabu anu pacha sakuaya Diosun Yushin Pepatun jatu dasibi achikin kushipa wakin keyua januxun ana dateama Diosun kakape jawenabu jatu yuikubainibukiaki.

*Ikunwainbun jatun mabu paxkatan jawen jiwenibukiaki, na janchadan*

<sup>32</sup> Jabun Jesús ikunwainbu midimabun jatun shinan jabiaskas shinan-wen shinain jabun mabu tibi yui: “Ena bestiki”, ikama jakia dasibibun mekubainibukiaki. <sup>33</sup> Januxun Jesúsun kushipayabun jaska Xanen Ibu Jesús bestenkainima jawen kushipa unankin jatuki chanikubainaibu ikunwainbu dasibi Diosun jatu duajaidawakubainaya <sup>34</sup> jabu baiyabu inun jiweyabun jabu jawa nuitapabuman juni betsa inantan jawen taexun pei bitan ja pei <sup>35</sup> jau jatu inanunbun Jesúsun kushipayabu jatu inankubainaibu ja betsabu jawa jayama jau jawen binunbun bestibu tibi jatu paxkaxunkubainibuki-aki. <sup>36</sup> Jaskanibu betsakidi mia yuinun ninkawe. Janua Levín baba betsa natukan Chipre anua kaini jawen kena José jatubetan ikunwanyan Jesúsun kushipayabun kena betsa wakin Bernabé wanibukiaki, nukun janchawen kenadan: “Shinan chankanwanika bakeki”, akinan. <sup>37</sup> Ja junin jawen bai jaya juni betsa inantan jawen taexun pei bitan bexun Jesúsun kushipayabu jatu inanikiaki, jawen jau ikunwainbu betsabu jatu medabewanunbunan.

## 5

*Ananías inun jawen ain Safiran Diosun Yushin Pepa padanpai inibukiaki, na janchadan*

<sup>1</sup> Ja jaskaibutian juni betsa jawen kena Ananías inun jawen ain Safiran jatun bai juni betsa inantan jawen taexun pei bitan <sup>2</sup> jawen ainbe yubakatan paxkaxun dabukun jawena wakin adutan jatidi Jesúsun kushipayabu anu buxun inanyan <sup>3</sup> januxun Pedron yuikin:

—Ananíasiin, min bai inantan pei bitan paxkaxun dabukun adutan ¿jaskakin Satanásan mia chakabuwamaya nuku yui Diosun Yushin Pepaki min chani chakai? <sup>4</sup> Min bai min jatu inandlama minayuxuki. Ja inun, pei mia inanbu minadiayuxuki. Jakia min pei min paxkaxun nuku inankin min nuku padainan, min nuku akamaki. Min Dios padanun ika ikaii. ¿Jawai eiskidan min jaskatushiai?— aka

<sup>5</sup> Ananías jaska yuiai ninkatan tin itan mawaya jaskai ninkatan dasibibu dateaibun <sup>6</sup> janua bedunan dabe juxun jawen yuda yabutan buxun maiwai buabun

<sup>7</sup> jakimamadi 3 hora binuaya Ananíasin ainin jaskaxu ninkadiama jatun jiwe anu jikiaya <sup>8</sup> Pedron yukakin:

—Matun bai inantan ¿jati pei besti man bixu min benen ea inanxumen?— aka

Safiran kemakin:

—Jeen, jabiati besti jawen kaduki— akaya

<sup>9</sup> Pedron yuikin:

—¿Jaskai Diosun Yushin Pepa padankatsis iki man yubakadabekanxumen? Min bene padananainwen taea ma mawa maiwatani bekanikiki. Min miadi mawaya mia maiwadiai bukanikiki— akaya

<sup>10</sup> jabiatiandi jawaida jadi mawai Pedron tae naman di ikaya janua ja jawen bene maiwatani bedunan dabe jikitan jawen ain ma mawadia bechitan jawen yuda jadi buxun jawen bene dapi maiwadianibukiaki.

<sup>11</sup> Janua ikunwainbu ichapabu inun dasibibun jaskaxu kakaibu ninkatan date paepanibukiaki.

*Tsuan jaska watiduma wakin Jesúsun kushipayabun jaikaimas isin teneaibu jatu xuxawanibukiaki, na janchadan*

<sup>12</sup> Diosun jawen kushipa jatu yunua Jesúsun kushipayabun yudan kaiyan medabewakin dami atimaska jaikaimas betsa betsapa akaibun jatu bana ninkatan jatube ichai bebidan bebidanaibun janu Templo jemaintin anu janu badi kuaya utamisbu jawen kena Salomón anu ikunwainbu betsabu jatuki dasi ichakubainibukiaki. <sup>13</sup> Janua jatiditun jatun yusian ninkai ichakatsi ikabumabia jakia dasibibun ikunwainbukidi pe shinan bestikubainibukiaki. <sup>14</sup> Jaskabiaibun ana midimabun jatubetan jatun Xanen Ibu ikunwain juni ichapa inun ainbu ichapa jatuki dasikubainaibun <sup>15</sup> janua betsadan, tsuabunda jatunabu isin teneaibu jawen dakatiki iwexun bai kexa janu Pedro juai anu shinankin jau ja kauankin jawen yuda baka utawen jau xuxawaxunun isin teneaibu janakubainabu Pedro janu kakin ja isin teneaibu bestibu jatu xuxawakubainaya <sup>16</sup> janua ja dikabi janu Jerusalén dapi jiwebaunabun jatun yudabu isin teneaibu inun yushin chakabun betsa betsapawen jatu nuitapawamis jabu Jesúsun kushipayabu anu jatu iwedia-bidanbidaibu dasibibun ea akaibu jabudi jatu xuxawakin keyudianibukiaki.

*Jesúsun kushipayabun jau ana yusinyamanun bun xanen ibubun ana jatu nemapai inibukiaki, na janchadan*

<sup>17</sup> Ja jatu jaska waibutian Diosbe jawenabu janchaxunika xanen ibujaida inun saduceo jabun chibanmisbu jabianuxundi Jesúsun kushipayabu jatu uin jatun kushipawen kemubiai jatuki sinatakin <sup>18</sup> Templo mekenikabu jatu yunua achitan jatun mae meketi jiwe medan jatu bichiabun <sup>19</sup> januxun meshu medan Diosun nai tsuma juxun jabun mekeabu jatu unanmamatan bichiti jiwe beputi bepentan jatu kainmatan yuikin:

<sup>20</sup> —Nenua en matu kainma buxunan, ja Templo jemaintin anu jikitan januxun Diosun kakape jiwekuinmati jancha dasibi jatu yusinditankawan— jatu wa

<sup>21</sup> jaska jatu yuia ninkabain penaya Templo jemaintin anu buxun jatu yusinkin taewaibun

jabatiandi ma kainbainabu unanmabia Diosbe jawenabu janchaxunika xanen ibujaida jawenabube ichatan Israelbu xanen ibu betsapabu Junta Suprema dasibi jatu ichawaxun jatun meketi jiwe anua Jesúsun kushipayabu jatu bichishinabu jau itanunbun jatun mekenikabu yunuabu <sup>22</sup> buxun meketi jiwe anu jikixun ma kainbainabu jawa jatuki nukuama benatan chintunbain ja kaka jatu <sup>23</sup> yuikin:

—Janu meketi jiwe anu nun jikia beputi tibi bepui pea policiabun pe mekeabu uintan jatu iwenun, ixun jawen jikiti beputi bepentan ana tsua ja medan jayama nun uintanaii— jatu wabu

<sup>24</sup> jatu jaska yuiabu ninkatan Templo mekenikabu xanen ibu inun Diosbe jawenabu janchaxunika xanen ibubu yuka iki: “¿Jaskashinabumen?” iki jawa shinantima yuinameaibun <sup>25</sup> ja jaskaibutian jaskadapananbun juni betsan jatu uinbidan jikixun jatu yuikin:

—Ja junibu man jatu bichishinadan, un unu Templo jemaintin anuxun ma jatu yusinkanikiki— jatu wa

<sup>26</sup> janua mekenika xanen ibu jawen tsumabube buxun ana jatu itanun ika kaxun yudan kaianki datei: “Nuku mankanwen tsaka tsaka akana”, ika jawa jatu meama <sup>27</sup> Junta Suprema anu jatu iwexun jatu be bun nichintushiabu Diosbe jawenabu janchaxunika xanen ibujaidatun jatu yuikin:

<sup>28</sup> —Ja juni akimabukidi man jatu yusiaibun nun matu nemajaidabiashina nukun jancha jawa ninkama ¿jaskakin Jerusalén anuabu jatu ichawakin man ja junikidi yusinkin jeneamamen? Jaska wakin ja juni nukukidi yuikin: “Man jatu tenanmaimaki”, akin man nuku jawen taexun yuankin man nuku jatu dake wamakubainaii— ikaibun

<sup>29</sup> jaskaibun Pedro inun Jesúsun kushipayabu betsabun jatu kemakin:

—Jaska Diosun shinain nun chibun nuku yunumis nun akatsis ikaii. Junibun yunuawen taea nun bexteketidubumaki— iki <sup>30</sup> ana jancha chichibainkin yuikin: —Jesús cruzki man jatu mastamaxun jatu tenanmabia ja jabias Dios nukun xenipabun kenwanpaunibu jabiatundi tenanbu nuku bestenwanxuinmaki. <sup>31</sup> Diosun jaska watan nai anu ainitan jawen yusiudi nuku tsau xunimaken ja nukun mekenan inun nukun yusinan nun ma jayaki. Jaskawen taea nun Israelbu xukua tibi tsuabunda nukun chakabu jenetan Dios anu chintuin nun shinan betsabu nuku jawenabu wakin Diosun nukun chakabu buatan ana shinanmaki. <sup>32</sup> Na jaskadan, Diosun jaska waima nukun besti nun una in. Ja dikabi Diosun Yushin Pepatun unandiaikiki, jaska jabun nun chibainbu Diosun nuku inainmadan— jatu wabu

<sup>33</sup> jatu jaska waibu ninkatan jatu bechipaiama jatuki sinatajaidakin jatu detekatsis ikaibun <sup>34</sup> janua jabianudi Diosun jancha kenenibu yusinanamis juni betsabu fariseo dasibibun ninkakin jakidi pe shinanmisbu jawen kena

Gamaliel jatube xanen ibubu janu ichabu anudi jatube tsaua benikaun policiabun jau Jesúsun kushipayabu jatu kainmayununbun jatu yunua iyuaibun <sup>35</sup> januxun Gamalielin jabube xanen ibubu jatu yuikin:

—Israelbuun, na junibu kupikatsis ikin man jaska waidan, shinankin uindakanwen. <sup>36</sup> Eskaki, matu yuinun ninkakanwen. Juni betsaa Teudas xanen ibunun, ixun jatu binunun ikin nukunabu padanyan 400 junibun jawen jancha ninkakin chibain jaki xukuabu soldadobun achixun ja juni deteabun jabun chibainbu datei dasibi paxai sa iki keyunibukiaki, janu bextekei keyuidan. <sup>37</sup> Janua chipu César Auguston jawenabu jau jatu tana-nunbun yunua tanaibutian juni betsaa Galilea anua Judas xanen ibudianun, ika Romanobu nemanun ika mentsisipakaunkin jatu yusianyan ichapabun jawen jancha ninkakin chibainbun ja Judasdi soldadobun achixun tenan-diaibun dasibi jabun chibainbu paxai sa iki keyudianibukiaki. <sup>38</sup> Jaskawen taexun matu shinanmakin yuinun ninkakanwen. Ja junibudan, jatu meyamayukanwen. Jabun jatun yusian ibubis ikaibudan, jamen jawama binux-anikiki. <sup>39</sup> Jakia Diosun jatu yunua ikaibudan, man jawa jatu nematidum-maki. Chanima jabun Diosun jancha kayabi yusiainbu jatu nemakin man binutidumaki. Dios nemanun ika man jaskatidumaki. Jaskaken shinankin uindakanwen— jatu wa jawen yusian chibankin pe ninkatan:

<sup>40</sup> —Peki— iakeaketan Jesúsun kushipayabu jatu ana kenaxun ichakawakin ji sidiwen jatu kusha kusha ama bestitan ana jau Jesúskidi jatu yusinyamax-anunbun ja akin jatu nemajaida bestitan jatu nichinkin jeneabu <sup>41</sup> xanen ibubun besuudia Jesúsun kushipayabu kainbaini yuinamei: “Jawen bake Je-su-criston kakapekidi nun yusianyan Diosun jawen nuku unanti watan nuku duawakatsi jatu yunua jabuwen datei nun bextekenun nuku akanikiki”, iki benimabaini bushinxun <sup>42</sup> jatu yusinkin jawa jeneama Templo jemaintin anuxun inun jiwe betsaa betsapa anuxun xaba betsaa tukuma Mesías Jesu-cristokidi kaka pepakidi jatu tapinmakubainibukiaki.

## 6

### *Siete medabewanikabu katunibukiaki, na janchadan*

<sup>1</sup> Ja badi jaskaibutiandi midimabun ana ikunwain jatuki dasii ichakubainaibun jabianudi judiobubia jatun jancha griego janchawen besti janchamisbun ja jatubetandi ikunwain judiobuns jancha hebreowen besti jabu janchamisbu jatube ja ikin yuikin:

—Dasibibun nun Jesús matubetan ikunwanbiaibun xaba tibi nuku pimakin nukun ainbu beneuma enaumabu piti nexexunkinan, man jatu paxka pewaxunabumaki. Matunabu hebreobu besti piti ichapa jatu nexexun inankin nukunabu griego janchawen nun janchamis ja nukun ainbu beneumabu piti eskadabes nexexun jatu inankin man jatu nuditapawakubainaii. Jaskadan, chakabuki— ikaibun <sup>2</sup> jaskaibu jatu yuiabu ninkatan ja 12 Jesúsun kushipayabun dasibi ikunwainbu jatu ichawaxun jatu yuikin:

—Nukun nun matu piti paxkaxunkin mekexuna bestidan, nukunadan, pemaki. Ja dikabi matu jaska besti wakin Diosun jancha yusinkin nun jenea pemadiki. <sup>3</sup> Jaskakenan, en betsabu inun en puibuun, jau juni betsabun piti matu paxkaxunkin inankin pewakubainunbun 7 juni shi-nanyan inun unanepabu Diosun Yushin Pepatun kushipayabu jau jabun matu paxka pewaxununbun benakin katuxun ja daya jatu yunukanwen. <sup>4</sup> Jakia nukubunan, Diosbe janchakin jeneama januxun jawen jancha pepa matu inun betsabu yusinkin nun jenetidumaki— jatu wabu

<sup>5</sup> jaska jatu yuiabu ninkatan dasibitun jabias shinanwantan januxun jatu katukin juni shinanyan inun unanepabu Diosun Yushin Pepatun kushipayabu katukin jati anibukiaki. Esteban inun, Felipe inun, Prócoro inun, Nicanor inun, Timón inun, Pármenas inun, nawa betsa Antioquía maewan anu jiwxexun judiobun beya tapini Nicolás jati jatu katubain <sup>6</sup> Jesúsun kushipayabu anu jatu iyuabu januxun jatu unanti wakin mamepixun Dios jatu yukaxunkin jatun medabewanikabu jatu wanibukiaki.

<sup>7</sup> Januxun Diosun jancha Jesúskidi kakape jatu yusinparekubainaibun jatun jancha ninkakin Jerusalén anuxun ikunwain ichai pakubainaibun ja jaskaibun jabiatiandi Diosbe jawenabu janchaxunika ichapabundi Jesús ikunwandianibukiaki.

*Esteban jawamajaidabiaken achixun xanen ibubu anu iyunibukiaki, na janchadan*

<sup>8</sup> Esteban Diosun duawakin kushipa paeya wakin pepawanikidi mia yuinun ninkawe. Jawenabun bedubi Estebanen dami tsuan atiduma atimaska wakin jatu uinmakubainaya <sup>9</sup> janua ichati jiwe jawen kena “Esclavo Tsumawanibu Ana Tsumauma” janu betsabu ichamisbu inun, juni betsadi mae Cirene anuabu inun, maewan Alejandría anuabu inun, Cilicia mai pakea anuabu inun, mai pakea Asia anuabu jabu Estebanbe ja iki yuinameaya <sup>10</sup> Diosun Yushin Pepatun Esteban unanepa wakubainaiwen taexun tsuan Esteban maemakin janchawen binuntidubumaken <sup>11</sup> jawawen jaska watima jaki yubakatan jabu betsan juni betsabu pakakin yuikin:

—Nukun xanen ibubu padankin eska jatu yuitankanwen: “Ja Jesúskidi yusinmis Estebanen jancha chakabu yuikin Moisés inun Dios dayuikin yuainkiki”, atankanwen— jatu wa <sup>12</sup> jatu jaska wabu buxun juni ichapabu yuikin mae xanen ibubu inun Diosun jancha kenenibu yusinanamisbuki chani chakakin jabu jatu sinatamabun yudan kaian ja iki bedukui itimaskabainkin januxun Esteban achitanxun xanen ibubu dasibi Junta Suprema anu iyuxun <sup>13</sup> januxun jau Estebankidi chani chakatanunbun padan jancha katutan juni betsabu jatu padanmakin yuimakin:

—Na juninan, nukun Templokidi inun Moisin nuku yusini janchakidi yuain janchai jeneama nun ninkaii. <sup>14</sup> “Jesús Nazaret anuatun Templo yamawatan nukun beya betsa betsapa Moisin nuku yusini betsa waxanikiki”, ikai nun ninkadiakubainaii— jatu wabu

<sup>15</sup> janua xanen ibubuns Junta Suprema anu tsauxun Esteban nia uinkin jawan ikama jawen besu xabakabijada Diosun nai tsuman besu keska beisnibukiaki.

## 7

*Jatun xenipabukidi Estebanen xanen ibubu jatu ana shinanmanikiaki, na janchadan*

<sup>1</sup> Jaska uintan januxun Diosbe jawenabu janchaxunika xanen ibu binutun Esteban yukakin:

—Na jaska mikidi yuiaibudan, ¿chanimamen?— aka

<sup>2</sup> ninkaibun Estebanen jatun yukai kemakin:

—En xanen ibubu inun enabuun, matu yuinun ninkakanwen. Mesopotamia mai pakea anu nukun xenipabu Abraham Harán maewan anu kadiama bebunkidi nukun Epa Dios kushipa pepatun yubakin unanmakin janu jiwxexanai anu <sup>3</sup> yunukin yuikin: “Min mai inun minabu jenebaini mai bena en mia uinmaxanai anu jadi kaxanwen”, aka <sup>4</sup> janua Abraham kainkainkin Caldea jenebaini Harán anu kainma dakayuken janua jawen

epa ma mawaimaken januxun na jibia mai man janu jiwea anu Diosun Abraham iwexun <sup>5</sup> janu jawen mae ibubis bitan janu jiwepaketidumabiaken Abraham bebunkidi yubakin bakeyadiamabiaken jau janu jawen bababu janu jiwxanunbun jatu inanti jatuki tanamanikiaki, Abraham mawaken jawen bababu patan ibu wakin jau bixanunbun yubakinan. <sup>6-7</sup> Januxun ana yubakin: “Mai kesua betsaa anu min bababu jatube jiwei buimabu jadixun nawabun jabun esclavo dayadu jatu waxun 400 año jatu dayamakin jatu ichakawakubainaibu atimas en jatu kopiaya min bababu jadia kainbidani bexun na mai en mia yubai anu jiwxun ea kenwankubainxankanikiki”, ayamaxun januxun Abraham jawen yubaka shinanmati wakin Diosun yunukin: “Dasibi minabun juni bake tibi kaian jawen jina kubichi mextekin bikubainxanwen”, aka <sup>8</sup> jabe janchakin ninkayamaxun jawen juni bake Isaac kaian <sup>8</sup> día xabatian jawen jina kubichi binikiaki, jaska yubani taewakinan. Janua jawen bake Isaac bakeyatandi jawen bake Jacob bidianikiaki. Janua Jacob, jawen kena betsaa Israel, jawen 12 juni bakebu kaian jabiaskadi wakin jatu bidiakubainikiaki. Ja 12 juni bakebu jabu tibi anua nun jibia jawen bababuki.

<sup>9</sup> Janua ja nukun xenipabu Israelin juni bake betsaa José jawen betsabun danain jaki sinatakin jau tsuma wabain Egipto mai pakea anu iyutanunbun jawen taexun pei bikin nawa betsabu inanbu iyuyamabu jadixun Diosun duawakin José medabewaya <sup>10</sup> jabu anuxun bika tenebiaya Diosun nemakin unanepa wakin Egipto xanen ibujaida Faraón bechipaimaya jawen xanen ibu betsaa wamakin José xanen ibu wakin jawen mai jidabi inun jawen jiwe jawendua ewapa mekei jau dasibi xanen ibuxunun yununiki.

<sup>11</sup> Janua Egipto anua José xanen ibuaya Egipto mai pakea anu inun Canaán mai pakea anu dasibi ana yunu beneamaken Israelin bakebu nukun xenipabu nuitapai jawa pitibumaken <sup>12</sup> janua Egipto anu xekiwan jaya chaniabu Israelin ninkatan jau jawen bakebun nukun xenipabun jadi buxun jau piti bikin taewatanunbun jatu yunua butanibukiaki. <sup>13</sup> Ana ja kachu betsatian buni chakayamakin ana piti bitanun ika buabun januxun Josén jatu unanmakin jancha wakin yuikin: “En matun betsaa Joséki”, akin jatu unanmaya Egipto xanen ibu Faraónen ninkatan: “¿José jawa nawamen?” itan shinanshinken <sup>14</sup> chipu betsatian José xanen ibuwen taexun jau jawen epa inun dasibi jawenabu jau ixuntanunbun jatu yunua jawenabu 75 ixuntankin Egipto anu iwenibukiaki. <sup>15-16</sup> Jaskawen taea Jacob, jawen kena betsaa Israel, Egipto anu kaima jiwea janua mawa janu maiwati tanpe Hamorin bakebun jawen juchi Abraham peiwen inanibu Siquem anu jawen yuda buxun maiwanibukiaki. Israelin bakebu inun jawen baba ichapabudi Egipto anuadi mawakubainibukiaki— iwanan,

<sup>17</sup> Estebanen judio xanen ibubu jatu yuikubainkin ana yuikin:

—Abrahamnen bababu, Israelbudan, Canaán anu ana jatu chintunmakatsi Diosun yubani ja baditian ma jatu taxnimabainkatsi iki kemaya Israelbu Egipto anu jiwea pai ichai midimakubainaibun <sup>18</sup> janua Egiptonawa xanen ibu bena Faraón ikimaxun jaska wakin José Faraónen enabu jatu medabewakubaini unanma <sup>19</sup> ja xanen ibu Faraón benatun nukun xenipabu padankin jatu ichakawakin jatun juni bake dama kaiainbu jau tenanunbun jatu yunukin jatu putamakubainaya <sup>20</sup> ja jatu jaska waibutian Moisés kaian jawendua jaida pishtaken bechipaijaidakin jawen ibubun jiwe anuxun june ewa wakin uxe dabe inun besti junexun yumewai <sup>21</sup> ana jaska waxun junetima datekin jau mawanun jene kexa basi anu chichanki jene jikitima wakin buiwen pepuxtan nanetan nuntantan xununbidana Egipto

xanen ibun ainbu baken bechixun nexewanimaxun jawen bake keska wakin yumewakin <sup>22</sup> jaska wabainimaxun Egiptonawa unanepatun Moisés yusinkin unanepawakin tapinmakubainabu janchapai juni kushipakin jaska yunuabu jatu axunkubainikiaki.

<sup>23</sup> Ma janu Moisés 40 badiyatun jawenabu Israelbu shinankin uinbaunun ika baii kaxun <sup>24</sup> januxun Egiptonawan Israelbu betsaa ichakawakin kushai uinkin jawenabu medabewanun ika kaxun nemakin jatun ichakawai ten-anxuniaki. <sup>25</sup> Januxun Moisin shinankin: “En kushipaiwen Diosun ea med-abewaya enabu Israelbu jatu medabewakin Egipto anua jatu paxawatan unanuma en jatu jiwemaxanaii”, ibiaya jakidi jaska jawenabun shinanma inibukiaki. <sup>26</sup> Janua meshukidi betsation Moisés ana kaxun jawenabu Israelbu dabe ana detenameaibuki nukutan daewakin jatu nemanun ikain jatu yuikin: “Matu dabe man yuda betsamaki. ¿Jaskai man detenamei ikanai?” jatu wa <sup>27</sup> ja jatun jawenabu deteaitun Moisés tu akin xututan yuikin: “Min nuku uinun ¿tsuan mia xanen ibu wakin nukun pewanika mia washinamen, nuku anudan? <sup>28</sup> ¿Egiptonawa deteshinxun min eadi jabiaskadi wanun ika ikai, tenankinan?” aka <sup>29</sup> jaska wa ninkatan datei chai kai Moisés paxai mae betsaa Madián nawabu anu jadi kani jadia nawa keskai jiwexun ainbu bitan juni bake dabe wanikiaki.

<sup>30</sup> Jadi madianawabu anu 40 año Moisés ma jatube jiwea binukainaya Mati Sinaí janu tsua jiweabumanu Moisés kaxun uiyanan ji maxu kui menui keskai jede ji ji ikai anu Diosun nai tsuma nia <sup>31</sup> uin e itan namai keskakin xabakabi ana uin pewanun ika kemai ja dapi kaya Diosun yuikin: <sup>32</sup> “Eadan, en matun xenipabun mekenika Dioski, Abraham inun, Isaac inun, Jacobun mekenika Diosdan”, akai ninkai Moisés datei saki saki ikin jadi uinkatsi ikamaken <sup>33</sup> januxun Yavé Diosun ana yuikin: “Na min nia anu en nidiaki. Jaskawen taea na mae medibi meseki. Min bichi tae pekayuwe”, aka jutsekexunaya <sup>34</sup> ana yuikin: “Enabu Egipto anuxun bika tene chakayamai sain iki kaxai jawawen jaskatima ikaibu chanima xabakabi en uinmis jatu medabewanun ika en butuxuki. Uinwen. Jaskawen taexun Egipto anu jadi en mia yunukatsis ikaii”, akin Diosun Moisés yuiniaki.

<sup>35</sup> Uatian ja jabias Moisés danankin jawenabun yuikin: “Min nuku uinun ¿tsuan mia xanen ibu wakin nukun pewanika mia washinamen, nuku anudan?” abianibu jabias Moisés xanen ibu wakin jatun medabenan wakin jawenabu medabewamakatsi ja nai tsuma ji maxu kui menui keska jede ji ji ikai anua janchamakin Diosun Moisés yununiaki. <sup>36</sup> Diosun Moisés jaska waimaken Moisin nukun xenipabu Egipto anua jatu kainmabainkatsi ikin egiptonawabu anuxun jatu dami betsaa betsapa waxuntan janua jatu iyukin ja Ianenwan Tashipa jau pukebainunbun damiwakin jene bai wakin jatu paxkaxuntan janu tsua jiweabuma anu nukun xenipabu Egipto anua jatu iyuimaxun 40 año dami betsaa betsapa jatu unanti wamakeatanikiaki, Moisin jatu taxnimabainixunan. <sup>37</sup> Januxun jabias Moisin Israelbu jatu yuikin: “Jawen jancha en matu yusinun Diosun ea katuni keska wakin jabia matunabu anuadi Dios yuixunika betsaa kushipa ea keska matu anu yunuxanikiki”, anikiaki. <sup>38</sup> Jaska inun, janu tsua jiweabuma anu ja jabias Moisin nukun xenipabu jatu ichawabainimaxun janua ka Mati Sinaí anua Diosun nai tsumabe janchakin jaska jiwea kayabi nun bixanai Diosun jancha ninkatani nukun xenipabukidi chanikidankidanikiaki, Moisésdan.

<sup>39</sup> Jaska jatu yusinkin unanmabiakubaina nukun xenipabun chibankatsi ikama Egipto anu ana chintunkatsis ikin Moisés danankin <sup>40</sup> jawen betsaa Aarón yuikin: “Egipto anua nuku iwebiaima Moisés Mati Sinaí anu kaima

ana juamaki. Jaskaima nun unanmaki. Jaskakenan, yushin betsa dami wakin ja kenwanti nuku axunwen, jau jatun nuku yunukin iyukubainxanunan”, akabu <sup>41</sup> januxun mane damiwakin ina awa bake itsa jatu waxunshina kenwankin chaxuwan bake detexun kua keyui jatunmebi jatun mekeenen ashianwen taea jaki besikin duawai benimajaidanibuki. <sup>42</sup> Jaskaibuwen taea Dios Israelbuki sinatakin nai anua bishi besti jau kenwanunbun ja jatuwen nuiai bextenibukiaki. Jaskakubidanibukidi jawen jancha yuixunika Amós Diosun janchamakin yuima:

‘Israelbuun,  
janu tsua jiweabuma anu 40 año jiwxun  
ina awa inun chaxuwan bake detexun kua keyubiakin eadan,  
ea kenwankin man jawa ea inankin ea kenwanma ikubidanibuki.

<sup>43</sup> Eunbia jaskatimabiaken  
yushin betsa jawen kena Moloc man damiwaima kenwankin  
jawen kenwanti tadi jiwe putakatsi ikama  
iaxun bekubidankin yushin betsa jawen kena Refán kenwankin  
jawen bishi kenwanti ibubis damiwaimaxundi  
jadi man kenwankubainibuki.

Jaska wakin man chakabuwakubainibuwen taexun matu kupinun, iwanan,  
matun mai anua chajaida matu nichinkin  
nawabun mai kesua betsa Babilonia anu en matu yunuxanaii’,  
aka kenexuniki.

<sup>44</sup> Jakia janu tsua jiweabuma anu nukun xenipabu buaketankinan, Diosun  
jawen jatu yubakin shinanmati tadi inun bichi jiwe jatu amaima jayanibuki,  
jaska Moisés Diosun uinmakin yunuima keska jatu amaimadan. <sup>45</sup> Januxun  
nukun xenipabun ja tadi inun bichi jiwe mekekubainaibun Josué jatun  
xanen ibutan nawa betsa betsapabu jatube detenamemaya Diosun jatu  
medabewakin jatun mae tibi mebinkin jatu nichinmatan jatu ibu wamaya  
ja tadi inun bichi jiwe Diosun jatu amani pekaxun iatan bekubidanibuki-  
aki. Jaskaibutian ja jiwe bebunxun Dios kenwankubainibukiaki. Jabias  
jiwe jayayuken David jatun xanen ibu idiakunkainikiaki. <sup>46</sup> Janua David  
xanen ibukin Dios benimawakubainaiwen taexun ana duawanun, iwanan,  
Jacob jawen kena betsa Israel jawenabun Dioski nukuti kayabi mishki jiwe  
jawendua waxunxanun, iwanan, Davidin yukabia Diosun nemayunikiaki.  
<sup>47</sup> Jakia Davidin bake Salomón xanen ibudiatan jatun Templo mishki jiwe  
Dios jatu amaxuniki, <sup>48</sup> janu junibun jiwe wabu anu ja Dios dasibi binu keyua  
jiwetidumabiakenan. Jabiaskadi Yavé Diosun jawen jancha yuixunika jan-  
chamakin:

<sup>49-50</sup> ‘Nai anudan, en xanen ibui janu tsaua  
inun en tae janu maiki en tapakea maiki paiaki.  
Eanan, dasibi en damiwaniwen taexun ea juindukunmanun, iwanan,  
¿jaska waxun tsuan ea jawa jiwe waxuntidubumen?  
Tsuau ea jawa jiwe waxuntidumaki’,  
aka kenexuniki— iwanan,

<sup>51</sup> Estebanen Junta Suprema ana jatu yuikubainkin:

—Dasibi kushipa Dios jaya mesebiaken matun xenipabu ipaunibu keskai  
matubudan, matun besu inun, matun uinti inun, matun pabinki kushiken  
Diosun Yushin Pepatun matu yusinbiakubainaya man ninkaisbumaki,  
nawabun Dios unanbuma keskadan. <sup>52</sup> Jaska inun, Diosun Katua pepa  
juxanai Diosun jancha yuixunikabun bebunkidi jakidi chanibiakubainai-  
bun jawa ninkakatsi ikama matun xenipabun jatu dasibi danankin jatu  
ichakawakin detekubainibuki, jatu tenankinan. Janua natian Diosun Katua

juni jawa kaneisma jakidi matu yuinibu ma nuku anu juni shinanma nawabu achimatan man ja juni pepa Jesús jatu tenanmadiaimaki.<sup>53</sup> Diosun jancha jawen nai tsumabun nukun xenipabu yusini jaya tapinbiakin man chibainsbumaki— jatu wa

### *Esteban tenanbukiaki, na janchadan*

<sup>54</sup> jaska shadabu jatukidi xanen ibubu chiteai ninkatan Estebanki sinata chakayamai bene bene iki xeta yenx yenx akaibun<sup>55</sup> jakia Diosun Yushin Pepatun Esteban medabewakin kushipa waya naiudi teskanxun uinkin Dios chaxa kushipajaida anu jawen yusiudi Jesús nia uintan<sup>56</sup> dateama jatu ana yuikin:

—Uinkanwen. Teskantan nai bepemana anua Diosun yusiudi nukun Juchi Kayabi Iyuá Jesús nia en uiaiin— jatu waya

<sup>57</sup> jabun jawen jancha ana ninkakatsi ikama pabepukui keyubain jakidi kushi biski ibain achitan<sup>58-59</sup> mae anua taxnimakin xadabain jabu Estebanki chani chakaibun ja dukuntun tsakanun itan jatun tadi chaipa pekatan juni betsa jawen kena Saulomekematan ichapabubetan mankanwen tsaka tsaka akaibun Estebanen Jesús yuikin:

—Xanen ibu Jesúsuun, menan en yushin ea jadi bidiwe!— atan

<sup>60</sup> janua danti ika dakaxun bis ikin jui kushipawen ana yuikin:

—Xanen Ibuun, na ea chakabuwaibuwen taexun jatu kupiyamaxanwen— atan di iki mawanikiaki.

## 8

<sup>1</sup> Januxun Esteban jau tenanunbun Saulon jabiaskadi shinanyan anibukiaki.

### *Jesús ikunwainbu Saulon jatu ichakawakubainikiaki, na janchadan*

Jabias xabatian Jerusalén anuxun Jesús ikunwainbu jabun ikunwanbuman jatuki sinatakin ichakawa chakayamakin taewaibun Judea mai pakea anu inun Samaria mai pakea anudi Jesús ikunwainbu dasibi paxai sa ibainaibun jabu Jesúsun kushipayabu besti kaianma inibukiaki.<sup>2</sup> Janua tsuabuda juni duapabu Estebanwen nui jaya kaxabetanan maiwanibukiaki.<sup>3</sup> Ja jatu jaska waibutian Saulo jawen jaibuaibubetan Jesús ikunwainbu ichakawakin jatun jiwe tibi anu jikixun juni inun ainbu ichapa paxadiabuma jatu achixun kainmakin jatu xadabainbainkin bichiti jiwe medan jatu bichimakin jabun Jesús ikunwainbu jakimawanun, iwanan, Saulon Jesús ikunwainbu yamawakin keyupai inikiaki.

### *Samaria anuxun kakape jatu yusinbukiaki, na janchadan*

<sup>4</sup> Janua jabu Jerusalén anua paxai kainbainimaxun janida mae tibi anu jikixun Diosun Mesías Cristo mekenan jawen kakapekidi jatu yuikubainai-bun<sup>5</sup> medabenan betsa Felipe mae ewapa betsa Samaria anu kaxun Mesías Cristokidi jatuki chanikin taewakin<sup>6</sup> januxun jaska tsuan atiduma dami atimaska betsa betsapa jatu axuain uinkin ja yudabu ichaxun Felipen jancha dasibibun ninkajaidaibun<sup>7</sup> yushin chakabun yuda betsa betsapabu jatu nuitapawamis Felipen jatu xuxawakin kainma ja yushin chakabu bis iki taxnibainaibun jatu kaya wakin yuda betsabudi babunibu inun biyuxkinibu jatu kaya waya<sup>8</sup> ja mae anuxun Felipen jatu jaska waxunai uin jawen shinan chankain benimajaidanibukiaki.

<sup>9</sup> Jamen betsadan, Felipen jatu yusin kadiamaken juni betsa Simón ja mae Samaria anuxun jawen mukawen unankin jawen jatu xuun akin yudabu padain kein xanen ibukin jatu mesewamistun<sup>10-11</sup> badi ichapa jawen

mukawen jatu padankubainaiwen taexun jakidi yuda dasibi xanen ibubu inun jatube jiweabu dasibibun chibankin kenwain jakidi yuinamekin:

—Simónan, Diosun kushipa ichapa jayaki— ikin jawen jancha ninkakin axunpakemisbun

<sup>12</sup>jakia Dios xanen ibuaikidi inun Jesucriston kakapekidi Felipen jatu yuiai ninkatan ana Simón ninkama juni ichapabu inun ainbu ichapabundi Jesús ikunwainbu Felipen jatu nashimaya <sup>13</sup>januxun Simónen dikabi ikunwanyan nashima Felipebe kakunkaunkin jaska tsuan atiduma dami atimaska betsа betسا akai uin Simón e ikunkainaya

<sup>14</sup> januxun jaska jabun Samaria anuxun Diosun kakape Jesúskidi jancha ikunwankin ma chibainbun jaska kakaibu Jerusalén anuxun ninkatan Jesúsun kushipayabun jau Pedro inun Juanen jatu medabewatanunbun jatu jadi nichianbu buabun <sup>15-16</sup>tsuabunda Jesús ikunwainbu Felipen bebunkidi jawenabu unanti wamakin Xanen Ibu Jesúsun kenawen jatu nashimashina jabu betsа Diosun Yushin Pepatun jatu achidiامaken jaska jatu wabu bushinxun ja Samaria anuxun ikunwanshinabu jatukidi Pedro inun Juanen Dios jau jawen Yushin Pepa binunbun jatu yukaxuntan <sup>17</sup>januxun jawen Yushin Pepa achimakin jatu mamepixun jatu yukaxunaya ja Yushin Pepatun jatu medabewai jatuki jikia akeakenikiaki.

<sup>18</sup> Januxun Jesúsun kushipayabun ikunwainbu jatu mamepiaya Diosun Yushin Pepa jatuki jikiai Simónen uin: “Eandi ja kushipa peiwen binun”, iwanan, Pedro inun Juan <sup>19</sup>yuikin:

—Na jaska kushipa eadi en jayanun ea inankanwen, man jatu akai keska wakin yuda betsabudi mamepixun Diosun Yushin Pepa en jatu jikimaxunanan, na pei ichapa en matu inainan— jatu waya

<sup>20</sup>januxun Pedron kemakin:

—Diosun kushipa inankuinki. Peiwen taexun min bikatsis ikaiwen taea min peiya janu chiwen ikunwanbuma Diosun jatu kupixanai anu min katiduki. <sup>21</sup>Jaska inun, mianan, min shinan chakai Diosun unainwen taexun jawen kushipa min bitidumajaidaki. <sup>22-23</sup>Ean jaska en mia unaiin. Jaska yushin chakabun muka min bini min jenediamaken mia medanxun ja min chakabun mia nexayuaki. Jakia shinan betsа watan min chakabu min putaya jau Diosun mia buaxunun min yuka min chakabu mia buaxuntidumentkain— aka

<sup>24</sup>Simónen kemakin:

—Chanima en kanejaidaxuki. Ea Dios yukaxunkanwen, jau jaska min ea yuiai keska wakin ea kupiyamaxanunan— iki jaska chaniaya jau Diosun jawen chakabu buaxunun yukaxuntan

<sup>25</sup>jabianuxundi Diosun jancha yusinkin kakape Jesúskidi jatu yusin mene- tan Jerusalénkidi ana chintunbidankin mae betsа Samaria mai pakea anuxun Jesúskidi jatu yusinkubidani Jerusalénkidi chintunbaini bui jikinibukiaki.

### *Etiopianawa xanen ibu betsaki Felipe nukuxun yusinikiaki, na janchadan*

<sup>26-28</sup>Ja jaska wawanshinabutian Diosun nai tsuma betsan Felipe yunukin yuikin:

—Benitan Jerusalén anua kai surkidi ja bai tanabaini Gazakidi kawen katanwen— aka

Felipe benitan kai janu tsua jiweabuma anu bai tanabainaya bai namaki Etiopianawa ainbu xanen ibujaidatun tsuma juni jawen pei mekexunikatun Jerusalén anuxun Dios kenwantani jawen mae anu ana chintunkaini caballo

dabetañ tadanbainaiki nawa ina tsauxun Diosun jancha Isaíasin keneni yuikubidanai bechitan uiyanan <sup>29</sup> Diosun Yushin Pepatun Felipe yuikin:

—Kakain jaki kemai nukutanwen— aka

<sup>30</sup> jaska ninkatan jawaida kain jaki nukuaya Diosun jancha yuixunika Isaíasin keneni yuiai ninkakin Felipen yukakin:

—Ja kene min yuikubidanaidan, ¿min ninkai?— aka <sup>31</sup> Etiopianawan ninkatan kemakin:

—Jaskatan tsuan ea jakidi yusin pewai en ninkatidumaki. ¿Mian min unainmenkain? Ebe inatan kakin ea tapinmabainwen— aka

—Peki— itan inatan jabe tsaukainaya

<sup>32</sup> jabias kene yuixu Etiopianawan ana Felipe yuixunkin yuikin:  
‘Chaxuwan detenikatun detenun, iwanan,  
iyumis keska wakin tsuan nemama iniki.

Ja inun, chaxuwan bake dani damexteabu  
chaxuwan jawan ikama pesmis keskai jawa yuama iniki.

<sup>33</sup> Januxun ichakawakin nuitapawabu jawa yuiamaken  
tsua jawen nuikin medabewamadi iniki.

Jaska wakin bakeuma tenanbu  
tsuan janixun jawen bababukidi jakidi janchatidumbumaki,  
jaska wakin jawen jiwea mebinkin mai anua mexa keska wakinan’,  
akin yuixuntan <sup>34</sup> Felipe yukakin:

—¿Tsukidi ja Diosun jancha yuixunikatun kenenimen? ¿Ibubiskidimenkain?  
¿Juni betsakididaka? Menan ea yuidiwe— aka

<sup>35</sup> Felipen unanmakin Diosun jancha dama yuixudan, jawen yusin tae-wakin kakape Jesúskidi Etiopianawa tapinmakin ninkamakubaina <sup>36-37</sup> ma jatixunda ka ianki kemakin jaska Felipen dama yusinxu Etiopianawan yuikin:

—Uian. Ma min ea yuikubidanai en ikunwainwen taexun ¿ana en jawammen, na jene anu min ea nashimatidudan?— atan

<sup>38</sup> jatun caballo tadanmabainai jau niti anun jawen tsuma yunua niti amaya butudabekain jenen pukutan Felipen xanen ibu nashimakin mene-tan <sup>39</sup> jene anua nexekedabebidañan januxun Diosun Yushin Pepatun Felipe dami wabainkin yamawabainaya ja xanen ibun Felipe ana uianma jawen tadanbaintiki inatan ja kaikidi kai benimajaidakainaya <sup>40</sup> janua Felipe Yushin Pepatun iyuxun mae betsa Azoto anu butea janua mae tibi anu jikiakeakekainkin Diosun Katua Jesús mekenankidi kakape jatu yuikubaini atimas maewan betsa Cesarea anu jikinikiaki.

## 9

*Jesúsun Saulo shinan betsa wamanikiaki, na janchadan*  
(Hch 22.6-16; 26.12-18)

<sup>1</sup> Janua jabiañ Xanen Ibu Jesús ikunwainbuki pubenkin Saulon jatu ichakawakin tenankin jenediama jaskawen taea Diosbe jawenabu janchax-unika xanen ibujaida jatu binua anu Saulo kaxun <sup>2</sup> jaska shinain yuikin: “Damasco anu kaxun ja Bai Bena Jesúskidi jatu tapinmaibu juni inun ainbu achitan Jerusalén anu en jatu iwekatsis ikaii, nenu jatu bichinun, iwananan. Jaskaken min kushipaya kanun, iwanan, en mia yukai juaii. Ea kushipa wakin Damasco maewan anua janu nukunabu ichamisbu jiwe anu en kaken jau xanen ibubun ea medabewaxanunbun min kushipa jatu yunuwe, en buaidan”, aka: “Peki”, ixun kenexuntan jaya yunua <sup>3</sup> janua Saulo jaska wa

kai Damasco bai tanabaini ma kemaya nai anua bin kushipajaida pexekidan Saulo dachaxaya <sup>4</sup>janua Saulo main di ikaya jui taxnikin yuikin:

—Sauloon, Sauloon, ¿jaskakin min ea jatu ichakanwain?— aka

<sup>5</sup> Saulon dateyabi yukakin:

—Xanen ibuun, ¿min tsua ikai?— aka

januxun ja jui taxnaitun Saulo ana yuikin:

—Jabia ea ikunwainbu min ea jatu ichakanwainan, en eaki, Jesúsdan.

<sup>6</sup> Benikaini kai Damasco anu kaditanwen, jadixun min jaskakunkainxanai tsuanda mia yuixanikikidan— akaya

<sup>7</sup> ja junibu Saulobe buaibun jawen jui ninkabiai tsua uianma datejaidai-bun <sup>8</sup>janua Saulo main daka benikauan ma bepexebia jawa uintidumaken ja jabe buaibun metsunxun Damasco anu Saulo iyuabu <sup>9</sup>jaskakainshina jadia ma xaba dabe inun besti kaya jawa uianma datekin Saulon jawa piama jawa nuxuamaken

<sup>10</sup> ja Damasco mae anu jiwxexun Jesús ikunwain betsa jawen kena Ananías nama keskaiwen uiyanan Xanen Ibu Jesús juxun ja bebunxun kenakin yuikin:

—Ananíasiin— aka

kemakin:

—Xanen Ibuun, en nenuki. ¿Min jawa ea yuiai?— aka

<sup>11</sup> Xanen Ibu Jesúsun yuikin:

—Benikaini kakin ja bai jawen kena Kayatapia anu kaxun Judasin jiwe anu jikitán janua juni betsa Tarso anua kaini jushian jawen kena Saulo yuka itan-wen, Diosbe janchaikikidan. <sup>12</sup> Namai keskawen juni jawen kena Ananías jikitán mamepixun jau ana uin benawanun, medabewai ma uinxuki— aka

<sup>13</sup> Ananíasin ninkatan Jesús yuikin:

—Xanen Ibuun, Jerusalén anuxun minabu medibi min jatu wai ja junin mia jatu ichakanwanmiskidi ichapabun jakidi janchakin chakabu ea yuimis-buki. <sup>14</sup>Jatu jaska wakubaini Diosbe nukunabu janchaxunika xanen ibubun kushipaya beshianbukiaki. Nun jabun min kenawen taexun Dios yukaibu dasibi nukudi nenua achitan Jerusalén anu nuku iyuxun bichinun ika jushi-ankiaki— aka

<sup>15</sup> jaska yuibiaya Xanen Ibu Jesúsun ana yuikin:

—Jen iyamai dateama katanwen. Ja juni kaindiama en katunitun ekidi chanikin nawa xukua betsa betsapabu jatu yusinkin inun, jatun xanen ibubu yusindiakin inun, Israelbudi ea jatu yusindiaxunkubainxanikiki, <sup>16</sup> ea chibainwen taea jaskai nuitapakunkainxanai en unanmaxanaidan— aka

<sup>17</sup> ninkabaini Ananías kai janu Saulo ika anu jikikain mamepitán yuikin:

—Sauloon, Jesús ikunwain ma min nukun betsaki. Min bai tanabidananai jabias Xanen Ibu Jesús miki nukushinatun jau min bedu min ana uin pewan-nun inun jawen Yushin Pepatun jau mia achitan kushipa wanun mia anu Jesúsun ea yunuxuki— akaya

<sup>18-19</sup> jakimamadi jawaida Saulon bedu anua baka xaka keska nidi ikaya ana uin pewanan benikain ma jatubetan Jesús ikunwanyan nashimatan iyuxun pimabu ana kushipatan uxa eskadabes Damasco anua ikunwain-bube jiweyuniaki.

### *Damasco anuxun Saulon Jesúskidi yusin taenikiaki, na janchadan*

<sup>20</sup> Janu jatube jiweyuxun janu judiobu ichamisbu betsa betsapa anuxun Saulon jatu yusin taewakubaunkin:

—Jesúsdan, Diosun bake kayabiki— akin jatu yuikubainaya <sup>21</sup> dasibibun ninkai e iki yuinamei:

—Na juninan, Jerusalén anuxun ikunwainbu jatu ichakawamisxun nenudi juxun nun jabun Jesúsun kenawen taexun nun Dios yukaibu nukudi jabiaskadi wakin nuku achixun Jerusalén anu Diosbe nukunabu janchaxunika xanen ibubu anu nuku iyunun ika jushianan, ¿ja junidan, jamamen?—ikaibun

<sup>22</sup> janua Saulo ana jawa dateama Diosun kushipawen xabakabi judiobu Damasco anu jiweabu jatu yusinkubaibin: “Jesús Diosun Katua Mesíaski”, akin Diosun jancha kenenibuwen jatu unanmakubainaya janua judiobun uin e iki jakidi jadakidi shinantima ikaibun

### *Judio xanen ibubun Saulo detepananbun paxanikiaki, na janchadan*

<sup>23</sup> uxá ichapa jatu yusinkubainaya judio xanen ibubu Sauloki sinatakin detekatsis iki jakidi janchai yubakashinabun <sup>24</sup> Saulon ninkatan unanyan janu kainkainai achinun ika yubakashinabu badidi inun meshu medan ja maewan mishki kenebaunibu jikiti xui anu manakakin kexeabun <sup>25</sup> janua jatun mae anu mishkiwen kenekin keyatapa wanibu janu uinti xui anu Saulon jabu jatu yusian Jesús ikunwain jaki chiti ikaibu betsabun meshu medan Saulo kuki ewapaki nanetan buteabu ja mae anua kainkaini paxanikiaki.

### *Saulo ana Jerusalén anu chintunkainikiaki, na janchadan*

<sup>26</sup> Janua paxai kai Jerusalén anu ana jikishina janixunda Jesús ikunwain betsabube ichanun ika dasipanan jaska jatu ichakawa chakayamakubain-shinawen taea dasibibu jaki mesei ikunwanma ikai dabanten shinain: “Jesús ikunwanmabia Saulon nuku bepadantan anun ika ikimenkaintsa”, ika jaki dateaibun <sup>27</sup> jakidi mesebiaibun Bernabén Saulo Jesúsun kushipayabu anu iyuxun jatu unanti wamakin yuixunkin:

—Ana jaki meseyamakanwen. Damascokidi kakin nukun jaibu Saulon Xanen Ibu Jesús uin jabe janchaimaki. Januxun Jesús ikunwantan jawen kushipawen Damasco anuxun jawa dateama Jesúskidi jatu dasibi yusinbaunshinaki— jatu wakin jatu beya wamakin tapinmashinawen taea <sup>28</sup> janu jatu anu niti iyushina jaskai jiweyuxun Jerusalén anu Jesúsun kushipayabube jiwea jawa dateama nukun Xanen Ibukidi yusiin Saulo jatube janchakunkaibin <sup>29</sup> judiobu griego janchawen janchamisbube jatube janchai yuinamekin jatu yusianyan jawen yusian danain jaki sinatakin tenanun ika yubakaibun <sup>30</sup> jakidi jaska shinainbun ikunwainbu betsabun june ninkaxun Saulo medabewanun, iwanan, ianenwan kexa Cesarea anu iyushinxun jadixun jawen mae Tarso anu niwe xaxu ewapawen nichinkin yununibukiaki.

<sup>31</sup> Ja jaskaibutian ikunwainbu Judea mai pakea anuabu inun, Galilea mai pakea anuabu inun, Samaria mai pakea anuabu ichakawakin ana tsuan jatu meabuma unanuma jawama jiwei janua ikunwainbu kushipai Dios kushipaki meseaibun jawen Yushin Pepatun jatu medabewaya ana ichapabun ikunwain midimabu jatuki dasikubaini jiwenibukiaki.

### *Pedron Eneas kaya wanikiaki, na janchadan*

<sup>32</sup> Januxun Pedron ikunwainbu jatuki bakin jatu yusin kakunkaunkin mae betsa Lida anu jiweabu anudi Diosun enabu medibi anu jatuki bai jikixun <sup>33</sup> janua juni betsa jawen kena Eneas jawen yuda babuniwen taea ma 8 año kabia benisma dakasa Pedron bechitan <sup>34</sup> yuikin:

—Eneasiin, Jesucriston mia kaya waikiki. Benitan ja min jaki dakamis pewadiwe— aka

jawaida Eneas benitan jawen yuda damestentan nikaunaya <sup>35</sup> ja mae dabe Lida inun Sarón anu jiweabun ja juni Pedron kaya washina uinkin Xanen Ibu Jesúskidi ninkakin dasibun shinan betsa wanibukiaki.

*Dorcias mawa Pedron bestenwanikiaki, na janchadan*

<sup>36</sup> Ja badi jaskaitian mae betsa chaima Jope anuxun ainbu betsan Jesús ikunwain jawen kena Tabitá, griego janchawen jawen kena Dorcasdan, ainbu duapatun jawauma nuitapaibu jatuwen dabanan ikin jatu medabewakubainmis <sup>37</sup> e iskaun jawaida isin bitan mawaken jawen yuda dachuxun manaundi jiwe keyatapa dintu anu iabain mapemaxun datantanabun <sup>38</sup> ja mae udama Lida anuxun Pedron jatu yusiain Jope anuabun ikunwainbun ninkatan jau jabun ja yuixuntanunbun juni dabe nichinkin jatun jancha jatu yuikin:

—Pedro yuikinan, eska watankanwen: “Menaan, jawaidakiaki. Jope anu judiwe”, atankanwen— jatu wa buxun yuiabu

<sup>39</sup> janua Pedro iyuabu jatube kai jikitanaya janua Pedro ana uke medan iyukin janu yuda mawa datanbu anu jikimaibun ja ainbu beneuma nuitapai-bun kexebauna kaxakin Dorcas jiwxun jatu tadi waxunmis Pedro uinmai ana kaxa chakayamaibun <sup>40</sup> jatuwen nuikin dasibi jatu kainmatan danti ixun Dios yukaxuntan ainbu mawa beiskin yuikin:

—Tabitáan, benidikidanwen— aka bepexetan Pedro uintan tsauaya <sup>41</sup> Pedron metsunxun benitan januxun ainbu beneuma nuitapaibu inun ikunwainbu betsabu jatu kena bexun ma ainbu ana jiwema uiainbun <sup>42</sup> dasibi Jope maewan anu jiweabun Pedron jaska washina ninkashinxun ichapabun Xanen Ibu Jesús ikunwanibukiaki. <sup>43</sup> Jatu jaska waxunshina janu jatun ina awa bichi payukin pewamis jawen kena Simónen jiwe anu jiweyuxun Pedron jatu yusinyukubainikiaki.

## 10

*Cornelion Pedro kena jawen jiwe anu kanikiaki, na janchadan*

<sup>1</sup> Cesarea maewan anuxun Romano capitán jawen kena Cornelio inikidi mia yuinun ninkawe. Jawen 100 soldadobu xukuaya jatu kenamisbudan, Italiano wamisbu <sup>2</sup> ja juni pepa enayamistun jawen jiwe anu jatube jiweabu-betans Dios kenwankubainikiaki, januxun judiobu nuitapaibuwen nuikin medabewanun, iwanan, jatu pei inanxuni inun Diosbe janchai jeneismadan.

<sup>3</sup> Janua xaba betsatian ma badi kai 3:00 badi dakaken nama keska uiyanan Diosun nai tsuma betsa jawen dintu medan jikikainkin xabakabi Cornelio uinmabain yuikin:

—Cornelioon— aka

<sup>4</sup> jakidi besuxun uin datejaidakin yukakin:

—Xanen ibuun, ¿jawamen?— aka

januxun nai tsuman yuikin:

—Dios kenwankin min dayuimis inun jaska dasibi nuitapai jawa jayabuma min jatu medabewamis Diosun ninkatan ma miwen benimaikiki. Jaskawen taexun mia yuinun ninkawe. <sup>5</sup> Ja mae Jope anu tsuada yunudiwe, jau Simón Pedro mia ixuntanunbunan. <sup>6</sup> Ja Simón betsan jatun bichi pewakin pukumistun jiwe anu ianenwan kexa dapi Simón Pedro jabe jiwea jaki nukui bukanikiki— abaini

<sup>7</sup> ja nai tsuma jabe janchatan kaken jawen tsuma dabe inun soldado betsan Dios kenjaidawadiakin Cornelion jancha ninkaxunmis jatu kenaxun <sup>8</sup> dasibi jaska nai tsuman yuixu jatuki chanitan jatu nichian badi kabiaya Jopekidi bui

<sup>9</sup> janua bai puchinin uxashini ana bui ma Jope kemai ma badi manananbi jikidiama bui bai tanayubainaibun jabatiandi Pedro Diosbe janchanun ika mai bawa jiwe sapa xeni anu mapeketan <sup>10</sup> bunikin pinun ika ibiaya jatun bawamistun dama pewaxunaya uxa nama keskakin Pedron uinkin <sup>11</sup> nai bepenmanakainai uiyanan tadi ewapa kexema ja dabe inun dabe dexun tibi dispiwen nexabauna mai anu Pedro bebun buteaya <sup>12</sup> ja tadiki uke medan yuinaka tae dabe inun dabeya inun, main xadamisbu, inun peiyabu mata judiobun pisbuma Pedron uiyanan <sup>13</sup> januxun nai anua jui taxnikin Pedro yuikin:

—Pedroon, benitan jadatuda ja yuinaka min uiain betsа detexun piwe— aka ninkatan

<sup>14</sup> Pedron nemakin yuikin:

—Xanen ibuun, ea jaska wayamawe. Nukun xenipabun beya chibankin yuinaka betsа betsapa atimapа jaska nun pitidumajaida Moisin nuku nemani en pismajaidaki— aka

<sup>15</sup> ana jawen jui taxnimakin yuikin:

—Diosun jawada dasibi na mia pewaxunxuwen taexun ana: “Diosun mia nemamis”, yuikin ana dananyamawe— atan <sup>16</sup> ana dabeki jabiaskadi Pedro yuikin nemaya jawaida ja tadi ewapa nai anu ana jawendi ainibainaya <sup>17</sup> Pedron dama jaska uinxuwen taea “¿Jaskada ea yui ixumen?” ika shinain jawen dabanan nuijaidaya janua Cornelio anua bea Simónen jiwe yuka ikubidani jawen jiwe anu kematan <sup>18</sup> unanxubima yuka ikin:

—Na jiwe anudan, ¿Simón Pedro jiweamen?— ikaibun <sup>19</sup> ja kenaibu ninkama Pedron jaska uinxu unanun ika shinan jenediamaken Diosun Yushin Pepatun yuikin:

—Uinwen. Juni dabe inun bestitun mia benakanikiki. <sup>20</sup> En jatu yunushi-nawen taea benikain bututan jawawen nuiama jatube katanwen— aka

<sup>21</sup> Pedro bututan Cornelion jatu yunushina Pedron jatu yuikin:

—Ja man benaidan, en eaki. ¿Jawa wanun ixun man ea benai?— jatu wa

<sup>22</sup> jabun Pedro yuikin:

—Nukun xanen ibu capitán jawen kena Cornelion nuku yunushina mia anu nun juxuki. Juni duapa pepatun Dios kenwandiamiski. Jaskawen taexun judiobu dasibibun bechipaikin jakidi pe shinamisbuki. Januxun jau min jancha ninkaxanun Diosun nai tsuma betsan yunua ninkashinxun jawen jiwe anu min kanun mia kenaikiki— akabu

<sup>23</sup> jabianu Simónen jiwe anu Pedron jatu bashia janu jatube uxashini penaya Pedro jatube kaya ikunwainbu betsabu ja Jope anu jiweabun Pedro banawabainaibun

<sup>24</sup> jatube kai ana bai puchinin uxashini bui ma Cesarea anu jikitan buaibun Cornelion jawenabus inun jawen jaibu jabe duanamemisbu jatu ixun jawen jiwe anu jatu ichawaxun jatubetan Pedro manaya <sup>25</sup> jawen jiwe anu Pedro jikinun ika kaya Cornelion itanun ika kainkain kenwain Cornelio ja bebun danti itan meopia dakaken <sup>26</sup> januxun Pedron nemakin metsuntan benikin yuikin:

—Eki jaskama benidiwe. En jawamaki, mia keskadi junidan— atan <sup>27</sup> janua jabe nia janchadabetan janua jawen jiweten bichibaina jawen dintu ewapa medan yuda ichapa janu ichabu anu jatuki nukutushitan <sup>28</sup> Pedron jatu yuikin:

—Nun judiobu nukun xenipabun beya chibain judiobumabe nun ichatidumajaida inun matun jiwe anu nun jikitidumajaidadi man unaiin. Nun jaskabiamisken en ana matu dananyamanun Diosun ea unanmakin yusin-shinawen taexun <sup>29</sup> min ea kenashinken jawa matu ana danain mesei teai

niti ikama mia anu en juxuki. Jaskanun ixun min ea kenashinamenkain ea yuidiwe— aka

<sup>30</sup> Cornelion kemakin:

—Ma xaba dabe inun dabetian ka na jabia baditiandi 3:00 badiken en jiwe anua samakekin en Dios kushipa ea akaya en besuudia Diosun nai tsuma betsa tadi juxupa chaxajaida sawea nixun <sup>31</sup> ea yuikin: “Cornelioon, min Diosbe janchakin dayuimis inun jaska dasibi nuitapaibu min medabewamis Diosun uinkin shinankubainmisxun ma miwen benimaikiki. Jaskawen taexun mia yuinun ninkawe. <sup>32</sup> Ja mae Jope anu tsuada yunuwe, jau Simón Pedro mia ixuntanunan. Ja Simón betsan jatun bichi pukukin pewamistun jiwe anu ianenwan kexa dapi Simón Pedro jabe jiwea jaki nukui bukanikiki”, ea wa <sup>33</sup> jau mia itanunbun jawaida en jatu ynuua bushinxun mia iweabu chanima nukuwen nuikin min nuku pewabidanxuki. Jaskawen taea natian Diosun nuku uiyanan jawen jancha ninkanun ika nun ma ichaki. Jawada min Diosun mia ynuua min jatu yusinmis nukundi nun ninkakatsis ikai nuku yusindiwe— aka

### *Cornelio inun jawenabu Pedron jatu yusinikiaki, na janchadan*

<sup>34</sup> januxun Cornelion jiwe anu ichabu Pedron jatu yusinkin taewakin yuikin:

—Natianan, chanima mai jidabi anu xukuabu tibi nuku damiwanidan, nun jabiaskas xabakabi ea ma uinmashinaki. <sup>35</sup> Na mai anu jiwebaunabu tsuabunda Dios ninkai jaki mesekin chiban pewaibu Diosun jawa jatu danainsma ea yusinshina na jabiatian en ma tapiaiin. <sup>36</sup> Jamen dasibibun Xanen Ibu Jesucristonan, Israelbu anu dükun jau jabu yusinun Diosun yununiki. Januxun tsuabunda jawen janchawen unanuma ji-wetidubukidi Jesús juxun jatu yusinkubainyamaki. <sup>37</sup> Januxun ja dukunan, Nashimanika Juanen Diosun jancha jatu yusianyan ninkatan jatun chakabu jenetan jawenabu unanti wamaibu Juanen jatu nashimakubainaya Jesúsun Galilea anuxundi yusin taewakin Judea mai pakea anu yusinkubaunaikidi kakaibu chanima man ninkayamaki. <sup>38</sup> Januxun Jesús Nazaret anua jawen Yushin Pepatun kushipawen Diosun Jesús kushipajaidawa ja medanua medabenankunkainaya jabu diablo Satanásan ichakawakin isin betsa betsapa jatu tenemamis nuitapaibu Jesúsun jatu xuxawakin pewakin jatu medabewakubainyama man unandiaii. <sup>39</sup> Jaskadan, nukunan, ibubis nun uinkubidanyamaki. Janua Jerusalén anuxun inun mae betsa betsapa Judea mai pakea anuxun Jesúsun jaska wakubainai achixun cruzki mastaxun tenanyamabuki. <sup>40</sup> Janua xaba dabe inun bestitian Diosun ana bestenwanshina janua Jesús nuku ana uinmakin <sup>41</sup> ana yuda ichapabu jatu uinmama jatibu Diosun bebunkidi ma nuku katuni besti ana nukuki nukutan nuku uinmaya-maki, mawa ana bestenshinakidi nun jatukidi chanikubainxanunbunan. Ja Jesús mawa ana bestenkainshina jiweadan, ana jabetan pikin nun jabetan nuxukubainyamaki. <sup>42</sup> Janua badi jawen jeneaitian jaska yuda dasibi mawabu tibi inun jiweabu tibi Jesús xanen ibukin jatu unanti waxanai nun jatu yusinkubainxanunbun Jesús jabitun nuku yunubainyamaki. <sup>43</sup> Jaska inun, uatian jabias Jesúskidi Diosun jancha yuixunika dasibibun bebunkidi jatu yusinkin: “Diosun Mesías tsuabunda ikunwainbu jawen taexun jabun chakabu Diosun jatu buaxununbadikiki”— akin

### *Judiobumabiabun jawen Yushin Pepa Diosun jatu inandianikiaki, na janchadan*

<sup>44</sup> Pedron jatu yusin janchai jenediamaken janua ja jabun jawen jancha ninkaibu anu Diosun Yushin Pepa jatuki jikiaya <sup>45-46</sup> nawan jancha betsa

betsapa tsuan jatu yusindiamawen janchai taekin Dios kenwainbu ja ikunwainbu Jope anua Pedrobe bekanxu jatu ninkai: “Jabaa! Jabu judiobumabiaken Diosun jatu jaska janchamakin jawen Yushin Pepa jabudi ma jatu inanxuki”, ikaibun <sup>47</sup> judiobu jabe bekanxu Pedron jatu yuikin:

—Na judiobuma jaskaibudan, “Na yudabu jatu nashimayamananwen”, iki nemai nun itidumaki. Nuku keskadi wakin Diosun jawen Yushin Pepa ma jatu inanxuki—itan,

<sup>48</sup> dasibi Jesucristo jabun ikunwankanxu jau jawen kenawen taexun jatu nashimanunbun Pedron jatu yunua jatu nashimanibukiaki. Januxun Pedro ea akin jau uxa eskadabes jatube jiweyunun bashiyunibukiaki.

## 11

*Judiobuman ikunwanshinabukidi Jerusalén anuxun Pedron jatu yuinikiaki, na janchadan*

<sup>1</sup> Janua nawan mae anuxun judiobumabiabun Jesúskidi Diosun jancha ninkatan ikunwanshinabun kakaibu Judea anuxun Jesúsun kushipayabu inun ikunwain betsabun ninkashinabun <sup>2</sup> janua Pedro Jerusalén anu chintunkidani jikishinken ikunwainbu betsabun judiobun beya bechipajaidamisbu jaki ja ikin chitekin <sup>3</sup> yukakin:

—¿Jaskai judiobuma anu jatu uin kaxun min jatubetan pishianmen, nukun beya ana chibanma kanekinan?—akabu

<sup>4</sup> januxun Pedron jatu kemakin jaska iki taekainshina dasibi jatu yuikin:

<sup>5</sup> —Ja mae Jope anua Diosbe janchai uxa namai keskakin en uiyanan nai bepenmanaya tadi kexema ewapa dabe inun dabe dexun tibi dispiwen nexabauna ea anu buteaya <sup>6</sup> jibia tadiki uke medan yuinaka tae dabe inun dabeya betsabiananbu inun, main xadamisbu inun, peiyabu mata judiobun pisbuma en uiyanan <sup>7</sup> januxun nai anua jui taxnikin ea yuikin: “Pedroon, benitan jadatuda ja yuinaka min uiain betsab detexun piwe”, ea waya <sup>8</sup> ean kemakin: “Xanen ibuun, ea jaska wayamawe. Nukun xenipabun beya chibankin yuinaka betsabia betsapa atimapas jaska nun pitidumajaida Moisin nuku nemani en pismajaidaki”, en aka <sup>9</sup> januxun nai anua jawen jui taxnikin ana ea jancha wakin shinan tapinmakin ea yuikin: “Diosun jawada dasibi na mia pewaxunxuwen taexun ana: ‘Diosun mia nemamis’ yuikin ana dananyamawe”, ea watan <sup>10</sup> ana dabeki jabiaskadi ea yuikin nemaya ana jawendi naiudi ana ainikin buaya <sup>11</sup> en jaska uiyanan juni dabe inun bestitun Cesarea anuxun jatu yunua beshinxun en janu ikanu ea benaibun <sup>12</sup> januxun Diosun Yushin Pepatun ea yunua jawa teama en jatube kaya na <sup>6</sup> nukubetan Jesúskidi ikunwainbu ebe mapuabu ebe budiatanshinabuki. Jatube kai nawan jiwe anu nun jikiaya <sup>13</sup> januxun nawan nuku yuikin: “En jiwe anu en jiweken Diosun nai tsuma betsab juxun ea yuikin: ‘Ja mae Jope anu tsuada yunuwe, jau Simón Pedro mia ixuntanunan. <sup>14</sup> Ja juni juxun kakape min jawen paxaxanai mia inun minabuya mia yusinxanikiki’, ea wa en mia kenashinaki”, ea waya <sup>15</sup> januxun Jesúskidi kakape en jatu yusin taewayaa Diosun Yushin Pepa ja dukun nuku anu juyama keskai jabu anudi juxun jatuki dasikin jatu achishinaki. <sup>16</sup> Januxun jatu jaska waya jaska bebunkidi nukun Xanen Ibu nuku yuibaini en shinanshinaki: “Chanimá Nashimanika Juanen jenewen jatu nashimakubainshinaki. Jakia Diosun Yushin Pepatun matu nashima keska wakin matu kushipa waxanikiki”, akin Jesúsun nuku yuibaini ikai en uinshinaki. <sup>17</sup> Januxun nukun Xanen Ibu Jesucristo nun ikunwanyan jawen kushipa nuku inanyama keska wakin ja nawabundi

ikunwainbu Diosun jabiaskadi waya ean jaska waxun Dios en nematiduma ishianki— jatu wa

<sup>18</sup> Diosun jatu jaska washina Jerusalén anua ikunwainbun ninkatan ana Pedro ja akama nesetan Dios kenwankin yuikin:

—Judiobuma dikabiwen nuikin jatu shinan betsa wamakin chanima Dio- sun jatu jiwekuian inandiaikiki, ikibi imakinan. Pejaidaki— anibukiaki.

*Antioquía anuxun kaka pepa ninkakin ikunwanibukiaki, na janchadan*

<sup>19</sup> Ja xabatian Esteban tenantan jabatiandi dasibi Jesús ikunwainbudi jatu ichakawai bedukubaunaibuwen taea datei Fenicia mai pakea anu inun, Chipre natukan anu inun, Antioquía maewan anu paxai buimaxun judiobuma yusianma jatunabu judiobu besti Jesúskidi kakape jatu yusiaibun <sup>20</sup> jakia ja jaskaibun ikunwain betsabu Chipre anuabu inun Cirene mai pakea anuabu Antioquía anu buxun griegobudi Diosun kakape Xanen Ibu Jesúskidi jatu yusindianibukiaki. <sup>21</sup> Janua jabu Diosun Yushin Pepatun jatu kushipa waya jatun yusianwen taexun griegobu ichapabun jatun shinan xeni jenetan jiwea bena nukun Xanen Ibu Jesúskidi ikunwanibukiaki.

<sup>22</sup> Janua Antioquía anuxun judiobuman ikunwainbukidi Jerusalén anuxun ikunwainbun jatu ninkatan Bernabén jau jatu medabewatanun yunuabu

<sup>23</sup> Bernabé kai jikishinxun jabu Diosun jatu duawakin jatu kushipa wakin pepawai uin benimajaidakin jatu ana yusin pewakin jau dasibi jawa chakabuyabi jusiama nukun Xanen Ibu Jesús ikunwain chintuanma chibankubainkin apakenunbun jatu yusiai <sup>24</sup> Bernabé juni pepa duapa Jesús ikunjaidawamis Diosun Yushin Pepatun kushipa jayaken jawen yusian ninkai ichapabu nukun Xanen Ibuki dasikubainibukiaki.

<sup>25</sup> Jatu jaska watan tsube medabetima: “Jau Saulon ea medabewayu-nun”, ika Bernabé Tarso anu benai kashian <sup>26</sup> Sauloki nukutan Antioquía anu iyui jabe jadi kaimaxun jatu yusinkin año bestichai nichinkin yuda ichapabu kaka pepa Jesucristokidi jatu yusinkubainaibun ja mae anuxun nawabun Jesús ikunwainbu jatukidi shinankin kenakin: “Nabudan, jabun Cristo chibainbuki”, iwanan, jatu kena taewanibukiaki, nawan janchawen kenakinan, “Cristiano”, jatu wakinan.

<sup>27</sup> Ja jaskaibutian Diosun jancha yuixunika betsabu Jerusalénkidia Antioquía anu buxun <sup>28</sup> betsa jawen kena Agabo ikunwainbu ichabu anu jatu yuinin ika benixun Diosun Yushin Pepatun medabewakin janchamaya bebunkidi jaskaxanai jatu yuikin: “Mai jidabi anu piti jayama dasibibu buni-jaidaxankanikiki”, jatu wayama Roma maiwan anua Claudio xanen ibujai-daya jaska Agabon jatu bebunkidi yuiyama jaskanibukiaki. <sup>29</sup> Jaskaibun Judea anuxun ikunwain nuitapaibu jatu medabewanun, ixun, yuinetan jatu pei ichawaxunkin pei ichapayabun ichapa inankin eskadabes jayabun eskadabes inankin jatu ichawaxuntan janua <sup>30</sup> Judea anuxun ikunwainbu mekenikabu jau pei jatu jabun inantanunbun Antioquía anuxun ikunwainbun Bernabé inun Saulo katutan yununibukiaki.

## 12

*Santiago tenantan Pedro Herodesin jatu bichimanikiaki, na janchadan*

<sup>1</sup> Ja jaskaibu jabatiandi xanen ibu Herodesin ikunwainbu betsabu jatu ichakawakin taewakin <sup>2</sup> soldadobu jatu yunua Juanen betsa Santiago nupe chaipawen detekin tenanshinabun <sup>3</sup> jaska waibu judio xanen ibubun uinkin bechipaishinabun Herodesin unantan judiobun misi xaxama besikin pimis-butian Pedrodi jatu achimaxun <sup>4</sup> bichiti jiwe medan Jerusalén anu jatu bichimatan jabu tibibun jau mekekin kxebainunbun soldadobu 4 xuku

tibi jabu 4 soldadobun jabuan jau mekenunbun jatu yunutan shinankin: "Judiobu Pascua nawai besi keyuaibun Pedro unanti waxun en jatu ten-axundiaxanaii, judio xanen ibubu benimawakinan", ishinken<sup>5</sup> Pedro kene medan bichishinabu jatu kexe pejaidawamabun janua ikunwainbu jawen nuikin jau taxnimanun jakidi Diosbe janchakin yuka chakayamaxunkin jeneabumaken

*Pedro bichiti jiwe anua jaskabiamawatan nai tsuman taxnimanikiaki, na janchadan*

<sup>6</sup> janua Pedro bichixun uxanshinkin penaya yudan kaianen bedubi uiain-bun Herodesin Pedro unanti watan tenankatsi ikin manaya janua Pedro soldado dabebe mane dispi chiwetameyawen jabe menexekeea mekea jabe uxabun, janua dabedi kini jawen beputi kexexun uinjaidaibun <sup>7</sup> janua bichiti jiwe medan Diosun nai tsuma damii jikii chaxai xabakain bichiti dintu medan xaba wa nitan nai tsuman Pedro uxa bestenwankin tima tima aka bestein tekuitanai yuikin:

—Menaan, jawaida benidiwe— akaya ja Pedro mane dispi soldadobube menexekeea jawaida jamebi chudekei nidi ikaya<sup>8</sup> nai tsuman ana yuikin:

—Min nanexeketi sawetan min bichi tae sawediwe— aka  
Pedron jaska waya nai tsuman ana yuikin:

—Min tadi bemakia peyabukutan ea chibanbidanwen— aka

<sup>9</sup> jachun kakin chibanbainkin shinain: “¿En jaskai? ¿En chanima ma bestean daka kai ikai? ¿Na ea nai tsuman eska waidan, en dakauxa namai ikai?”, ixun shinanbaini <sup>10</sup> ja dukun soldado betsa dainbaini ana betsandi kexea ja kachu daindiabaini kai bichiti jiwe jawen jenea beputi anu mane beputi kushipawen bepuabuki kemaya jamebi bepenmanaya janua kainkaini taxnidabetan bai tanabainkin nai tsuman ja besti jenebaina

<sup>11</sup> januxun Pedron shinan kayatiwakin unantan:

—Herodes inun judio xanen ibubun dasibi ea jaska wakatsi ikaibu nemanun, iwanan, chanima en Xanen Ibun jawen nai tsuma yunua juxun ea taxnimaxu shinankin en unaiin— itan,

<sup>12</sup> jaska shinanbaini Juan Marcosin ewa Maríán jiwe anu ikunwain midimabu ichaxun Dios jakidi yukaxunaibu anu Pedro kaxun <sup>13</sup> jiwe jemaintin kenenibu janu jikiti xui beputi tsan tsan akaya Maríán tsuma ainbu jawen kena Rode:

—¿Tsua ikimenkain?— ika kainkain uin kaxun <sup>14</sup> Pedron jui ninkatan benimajaidai bepenxunuama kushikain uke medan jiwetan jikixun jatu yuikin:

—Pedro, ua ma beputi kexa nia en ninkatanaii— jatu wa

<sup>15</sup> jawen jancha ikunwanma jabundi yuikin:

—Jamabiaken min jumei ikaii— akabu

—En chaninwain ikai dabanan man ikaii. Jaskamaki— ikaya  
jabun ana yuikin:

—Jamaki. ¿Jatun mekea jawen nai tsuma min ninkatanamen ikai?— ikai-bun

<sup>16</sup> Pedron jatu kenakin tsan tsan akin jeneamaken janua bepenxun bechitan uin e iki teku iki keyuaibun <sup>17</sup> januxun jikitan jawen mekenen jatu nemakin jatu jancha nesematan jaska jawen Xanen Ibuan bichiti jiwe anua taxnimakin paxawaxu jatu yuitan ana yuikin:

—Jaskatan en kainxu Santiago inun ikunwainbu betsabu ea jatu yuixunx-anakanwen— jatu watan janua june kainkaini mae betsa anu iduyui kaken

<sup>18</sup> janua ma penai xabaya Pedro jaskatan kainkaina unanma bepxui bichiti jiwe anua soldado uinikabu jaskatima datejaidaibun <sup>19</sup> januxun jawen soldadobu betsa Herodesin yunua benabaunkin Pedro bechiabumaken ja

soldadobun Pedro mekeshinaibun Herodesin jatu yuka jawa yuitidubu-maken jatun jancha bechipaimajaida ja jabun meke chakashina soldadobu kupikin jau tenanunbun soldado betsabudi yunutan janua Judea jenebaini kai Cesarea anu Herodes jiwei kanikiaki.

*Jaskatan Herodes mawanikiaki, na janchadan*

<sup>20</sup> Janua Tiro anuabu inun Sidón anuabuki Herodes jatuki sinataya Tiro inun Sidón yudabun piti Herodesin maiwan anua bimisbuwen taexun xanen ibu Herodes daewakatsis iki jabe xanen ibu bexmas Herodes medabe-wamis Blasto anu bexun jau jatu medabewakin daewamaxanun jaibu watan yukashinabu <sup>21</sup> janua xaba betsatian Herodesin jatu jancha wakatsi jatu kenashina bea xanen ibu betsabudi bedia icha maniabun jatun besuudi Herodesin ichati tadi jawenduajaida sawea januxun yunumis anu tsauxun jawen jancha jatu yuikin taewaya <sup>22</sup> januxun junibun jabun jawen jancha ninkakin bechipaikin unanxubima yuikin kenwankin:

—Na Herodes janchaidan, juni keskamaki. Dios betsa keskai janchaikiki—akaibun

<sup>23</sup> Herodesin jaska waibu unankin ninkabiakin jatu jawa nemama jatundi Dios kenwankatsi ikamawen taexun jawaida Diosun nai tsuman Herodes kupikin isin tenemaya nami xenan kaianen pia mawanikiaki.

<sup>24</sup> Jaskashinken Diosun Mesías Cristo mekenankidi mae betsa betsapa tibi jiweabu anu jatu yuikubainaibun ninkakin ana ichapabun Jesús ikun-wankubainaibun

<sup>25</sup> janua Antioquía anua ja pei jatu ichawaxuntan buxun Jerusalén anu Jesús ikunwainbu mekenikabu jatu inantan jadixundi jatubetan Jesúskidi jatu yusinkubainkin keyutan chintunkidankin Juan Marcos Antioquía anu iwei Bernabé inun Saulo bunibukiaki.

## 13

*Bernabé inun Saulo Diosun jatu yunua chai yusinkin taewai buaibu jatu nichinibukiaki, na janchadan*

<sup>1</sup> Antioquía anuxun ikunwain ichaibu jabun jatu yusainan, eska jayanibukiaki, Diosun jancha mextanmanikabu inun jabun kakape Jesúskidi jancha yusinanamisbu betsa betsapabudan. Jatun kenadan, Bernabé inun, Simón jawen kena betsa Meshupa inun, Cirene anua juni betsa Lucio inun, Galilea xanen ibu Herodesbe ewani Menahem inun, Saulo inibukiaki.

<sup>2</sup> Janua ana xaba betsatian jabu ichatan samakekin Dios kenwainbun Diosun Yushin Pepatun jatu yuikin:

—Bernabé inun Saulo daya betsa ma en jatu kenani en jatu yunukatsis ikaya jau dayatanunbun medibi jatu nichinkanwen— jatu wa

<sup>3</sup> januxun samakeyabi jau Diosun jatu mekekubainxanun jabun jatu yunuaibun yukaxuntan jau dayatanunbun medibi wakin mamepixun jatu nichianbu

*Natukan Chipre anuxun Bernabé inun Saulon jatu yusinikiaki, na janchadan*

<sup>4</sup> januxun Diosun Yushin Pepatun Bernabé inun Saulo Antioquía anua nichinkin yunua jatun medabewanika Juan Marcos iyui ianenwan maikidi kexa anu mae betsa Seleucia anu jikitán natukan ewapa jawen kena Chipre anu kakatsi pakatan niwe xaxu ewapawen inatan besusi pukei kai <sup>5</sup> mae betsa Salamina bai butuatan keti itan janu jikishinxun janu judiobu ichamisbu tibi anuxun Diosun Mesías Cristo mekenankidi jatu yusin taewatan jatu yusinkubauni <sup>6</sup> janua natukan mae tibi anu Bernabé inun

Saulo uin bukubaini atimas ja natukan xanen ibun mae jawen kena Pafos anu jikiabu janu judio betsa jawen kena Barjesús, jawen griego kenadan, Elimas, juni mukayai chani chakai: “Diosun jancha yuixunika nikapai en jawen kushipayaki”, ikin jatu padanmis <sup>7</sup> janu romano xanen ibu Sergio Paulobe ja juni mukaya ja dayaxunmis jiweken ja xanen ibu unanepa shinan pepayatun Bernabé inun Saulokidi kakaibu ninkatan Diosun kakape Jesúskidi jancha ninkakatsis ikin jau jatu ixuntanun bun yunua jatu iweabu bexun <sup>8</sup> januxun jatu yuikin taewaibun romano xanen ibun Jesúskidi ikunwain nemanun ika juni mukayatun Bernabé inun Saulokidi janchai daketapakin jatu ja akaya <sup>9</sup> jakia Saulo, jawen kena betsa Pablo, Diosun Yushin Pepatun kushipayatun bedi ikama beisjaidakin <sup>10</sup> juni mukaya yuikin:

—Diablo Satanásan bakeen, padananain chani chakai dasibi pepaki min sinatamiski. ¿Jaskai Yavé Dioskidi chani chakai Dioskidi bai min nuku yuxtu wamakatsis ikai? <sup>11</sup> Min jaskaiwen taexun natian Yavé Diosun mia kupikin badi chaxa min uinyamanun mia bekunwanyukiki— akaya

jawaida meshun bepua jawa uianma janua: “¿Tsuán ea metsunbaini-menkain?” iki meshan atanikiaki, ma bekunwanan. <sup>12</sup> Jaskai uintan inun Jesúskidi yusiaín pepa ma jatu ninkatan: “Jabaa!”, ikin romano xanen ibu Sergio Paulon Xanen Ibu Jesúskidi ikunwanikiaki.

*Pablo inun Bernabé Antioquía maewan Pisidia mai pakea anuxun jatu yusinibukiaki, na janchadan*

<sup>13</sup> Janua Pablo jawen jaibuaibube Pafos anua niwe xaxu ewapaki inabaini ianenwan besusi pukei mai pakea betsa Panfilia anu kai mae Perge anu keti iki kai buaibun januxun Juan Marcosin jatu jenebaini Jerusalén anu ana chintunkidanaya <sup>14</sup> janua Perge mae anu niti ikama bui mai pakea betsa Pisidia kapukebaini maewan betsa Antioquía anu jikishinabun janua juindukunti sábadotian janu judiobu ichamisbu anu jikia jatube tsauabun <sup>15</sup> januxun Moisin kereni inun Diosun jancha yuixunikabun kenenibu una anua yusinkin jatu yui menetan jabun yusinmisbu xanen ibubun Pablo inun Bernabé yuikin:

—En betsabuun, ¿man jawa nuku yusintanun ika jushianmenkain? Yudabu benimawakin ikis nuku yuidikanwen— jatu wa

<sup>16</sup> janua Pablo benitan jau pesnunbun jawen meken sanantan jatu yuikin:

—Israelbu inun dasibi nawabu jabu man Diosun kushipaki mesemisbuun, matu yuinun ninkakanwen. <sup>17</sup> Jabias Yavé Diosun nukun xenipabu katunixun jabiatundi Egipto anu jatu iwenixun nawabu keska jiwemakin jadixun jatu pajaidawa janu jiwekubainaibun januxun jawen kushipawendi nawabu nematan ja mai anua jatu tsekabidankin <sup>18</sup> janu tsua jiweabuma anu jatu iweimaxun iake iakemakin 40 año nichinkin Dios bikawabiabu jawa jatu dananma jatu mekekubainikiaki. <sup>19</sup> Januxun mai pakea betsa Canaán anu 7 nawa xukua tibi jatu mebinmakin jatu yamawamatán ja mai nukun xenipabu ibuwani <sup>20</sup> ja jabu jaska wakubidankin 450 año nichiiñ bikanibukiaki.

Jau jatu medabewayunun mekenikabu besti wakin Diosun jabu yunukubainmis jawen jenea Dios janchaxunika Samuelin jatu mekediaya <sup>21</sup> januxun jabuan jau jatun mai jidabi mekenun juni jatun xanen ibujaidawanun ika Dios ea akaibun Benjamínen baba Quisin bake Saúl Diosun katuxun yunua xanen ibukin 40 año nichianyan <sup>22</sup> januxun Saúlon Dios ana pe chibanmawen taexun ana Diosun medabewama jawen kushipa mebintan januxun Jesén bake David jau ja mai jidabi xanen ibunun, iwanan, kenwankin Diosun yuikin: “Davidin jaska en

akatsi ikai akin ea benimawamistun en jancha chibankin jatun Israelbu pe mekekubainxanikiki”, jatu waniki. <sup>23</sup> Jaska yubakanixun Davidin bababu anua betsan Israelbu dasibi jau jatu medabewakin jatun chakabu buaxuntanmekexanun— iwanan —yuini natian Diosun Jesús yunuyamaki. <sup>24</sup> Janua Jesúsun jatu yusindiamaken Nashimanika Juanen ja dukuntun jawen kaka pepakidi Israelbu jatu yusinkin yuikin: “Matun shinan betsawatan Dioskidi man chakabumis jenedikanwen. Man jaskaya en matu nashimaxanaii”, jatu wakubaini <sup>25</sup> ma jawen daya menei kauankin Juanen ana jatu yuikin: “Ja matun medabenan Diosun yunuxanai yuinibudan, ñen, eamen man ea shinain? En jamaki. Jakia xanen ibu kushipajaidatun ea binuan chipu juxanikiki. Jaskawen taea eadan, jawen tsumapan jawen daya axunmis keska wakin en jawen jawaumajaidatun ean medabewakin en duawatidumaki, jawen bichi tae mexpun tsitauxun en pekaxuntidumadan”, jatu waniki.

<sup>26</sup> Abrahamnen bababu enabu inun dasibi nawabu man Diosun kushipaki datemisbuun, nukun chakabuwen taexun jau Diosun nuku kupyamaxanun jawen bakekidi kakape nukunaki. Matu yuinun ninkakanwen.

<sup>27</sup> Juindukunti sábado tibitian janu ichamisbu anuxun Diosun jancha yuixunikabunkenenibu jatu yuimisbu inun jabuan jatu yuibiamisbun jawa tapi-anma Jerusalén anuabu inun jatun xanen ibubun shinankin jawa unanma Jesús jau tenanunbun, iwanan, dananibuki, jaska jawen jancha yuixunikabunbebunkidi yuini keska wakin menekinan. <sup>28</sup> Januxun jawawen taexun tenantidumbabia jaska watima jau tenanunbun romano xanen ibu Pilato yunuabu <sup>29</sup> Pilaton jawen soldadobu yunua jaska bebunkidi jakidi kenenibu keska wakin cruzki mastaxun tenanbu januxun jawen yuda butetan buxun maiwanibuki. <sup>30</sup> Jakia Jesús tenanshinabu Diosun ana jiwemakin bestenwanken <sup>31</sup> Jesús Galilea anua kaya Jerusalén anu jabe buimabu jatu uinmai xaba ichapa jawenchains Jesús jatuki nukukidankidanaiwen taea ma jiwea unantan jabuan natian Jesúskidi yudabu jatu yusinkubainkanikiki.

<sup>32</sup> Na jabias kaka pepa beshinxun nun matu yuiaidan, Diosun nukun xenipabu yubanidan, <sup>33</sup> nuku ma axuinmaki, nun jawen bababu anudan. Jaska bebunkidi jawen shinanmati wakin xanen ibujaida bena Diosun katua tibi jau xanen ibui taenun jawenabun yunua jawen tsauti anu ainikubainibuki. Jaska keskadi wakin Diosun jawen bake kayabi katua juni Salmos 2 anua yuiai keska wakin yuikin: “Min en bakedan, natian en jiwea mia inankin en mia yunuaii”, anidan, nuku ma axuinmaki. <sup>34</sup> Diosun ma bebunkidi yui chaniniwen taexun jawen yuda chaputimawakin ana bestenwaniki. Jaska bebunkidi jawen janchawen pewakin yuikin: “Jawa kaneama David en yubani keska chanima en matu waxanaii”. <sup>35</sup> Jaska inun, Davidin Salmos kene betsaa anudi man jaya yuikin: “Mai anua jau jawen yuda chapuyamanun min tsuma pepa bechipaijaidakin min jeneama ix-anaii”, abiani <sup>36</sup> chanima Diosun David yunua xanen ibukin jawenabu medabewakubaini atimas mawa maiwabu jawen xenipabuki nukutan jawen yuda beniamacha puyanun min tsuma pepa bechipaijaidakin min jeneama ix-anaii”, abiani <sup>37</sup> chanima Diosun David yunua xanen ibukin jawenabu medabewakubaini atimas mawa maiwabu jawen xenipabuki nukutan jawen yuda beniamacha puyanun min tsuma pepa bechipaijaidakin min jeneama ix-anaii”, abiani <sup>38-39</sup> —Enabuun, Moisin nuku kenexuniwen nukun chakabu buakin nukun shinan shadabu pewatidumaki. Jakia Jesúswen taexun Diosun jau matun chakabu matu buaxunxanun unankin ja chibankanwen. Januxun tsuabunda Jesús jabun ikunwainbu Diosun jatun chakabu buaxunkin jatu pepawakin keyuxanikiki. <sup>40</sup> Jaska Diosun jancha yuixunikabunkenenibu keskai ibubis matun chakabuwen man Dios kupimatiduki. Uindakanwen, jaska kenenibu keska

wakin:

**41** ‘Matunan, uindakanwen.

Diosun atimaska betsa betsapa akubainikidi matuki chanibiaibun ninkabia akin  
diosun. Dio bilan sivekakidu, sivekakidu, sivekakidu.

danain Dioski kaxei xechakakin man ikunwankatsi ikamaki',  
tumayalchuk u il kaxi iktu.

atan nuku kenexunibuki— jatu watan

<sup>42</sup> janua janu judiobu ichamisbu jiwe anuxun jatu jancha menetan Pablo inun Bernabé jatube kainbainaibun Pablón jancha ana ninkakatsis ikin yudabun yukakin: “Juindukunti sábado betsatian janu nun ichamis anuxun jabiaskadi nuku ana yusinxanwen”, akaibun <sup>43</sup> januxun judiobu ichapabu inun nawabun judiobun beya chibanmis ichapabundi Jesúskidi kakape jancha ikunwankin Pablo inun Bernabé ninkakubainaibu chintuanma jau pepawen Dios benimawakubainxanunbun jatu yusinibukiaki.

<sup>44</sup> Janua ana sábado betsatian Jesúskidi kaka pépa jancha ninkanun ika ja maewan anua keyu bebiai jatidi niti ikabun jabu beabun kakape nukun Xanen Ibukidi ninkaibun <sup>45</sup> janua judio xanen ibubun jaskaibu uinkatsi ikama Pablón jatu jaska wai bechipaíama jaki sinatakin ja ichabu xabakabi jatu ja akin: “Chani chakakin matu padainkiki”, ikaibun <sup>46</sup> janua Pablo inun Bernabé jawa dateama dasibibun ninkaibun judio xanen ibubu jaskaibu jatu kemakin:

—Diosun kakape jawen bakekidi man judiobu dukun nun matu yusin taewanun Diosun nuku yunukin nichinbiaimaken nun matu yusiain nukun yusian danankin jawen pepai jiweibi jiweti man bikakatsi ikabumaki. Man jaskaya matu jenebain nawabu judiobuma anu nun jatu yusin kaii.<sup>47</sup> Jamen bebunkidi nukukidi Yavé Diosun Isaías janchamakin yuini ninkakanwen: ‘Nawa betsa betsapa chaijaida jiweakeakeabu jaskai jiwekuintidubu min jatu yusinkubaunxanun mia yunukin en mia bin keska waii, jau min jancha xabakabi mai jidabi anuxun ninkaxanunbunan’, akaya Isaásin ninkatan nuku kenexuniki— jatu wa

<sup>48</sup> januxun jatu jaska wai ninkatan judiobuman ninkai shinan chankain benimakin yuikin:

—Diosun kakape pejaidaki— ikaibu dasibi jabu Diosun katuxun jiwekuian jatu inanxanai jabuan Jesús ikunwanibukiaki. <sup>49</sup> Jaskabiaibun Diosun jancha nukun Xanen Ibukidi ja mai pakea anu nati ikin jatu yusinkubainaibun <sup>50</sup> Pablo inun Bernabén jancha judio xanen ibubun danankin jau jatu nich-inunbun, iwanan, ainbuaibu pepa inun juni xanen ibubu jatunabubetan chani chakakin jatu sinatamatan januxun Pablo inun Bernabé jatun mai pakea anua jatu putamaibun <sup>51</sup> jatu jaska wabu Pablo inun Bernabén jau jawa unanma jabiaskasi jiwekubainxanunbun jatu unanti wakin Antioquía anuabuki jatun bichi tae pekatan jatuki mai mishpu tabaini mae betsa jawen kena Iconio anu bunibukiaki. <sup>52</sup> Jakia jabun Jesús ikunwainbu Antioquía anuabu Diosun Yushin Pepatun jatu medabewaya benimajaidakubainibuki-aki.

14

*Pablo inun Bernabé Iconio anuxun jatu yusinibukiaki, na janchadan*

<sup>1</sup> Iconio anu Pablo inun Bernabé bushian janu judiobu ichamisbu anu jatube jikitan Jesús mekenan bestikidi xabakabi jaska ninkaisbuma jatu pe yusinkin mextanmaibun judiobu ichapabu inun judiobuma ichapabundi ninkakin ikunwainbun <sup>2</sup> januxun ja judio betsabun jatun jancha danankin nawabuki chani chakakin Jesús ikunwainbuki shinan chakakin jatukidi chakabu yuibaunaibun <sup>3</sup> jatu jaska wabiabu Jesúsun kushipayabu Pablo inun

Bernabé jabube xaba ichapa jiweyuxun nukun Xanen Ibuki chiti itan jawa dateama Jesúskidi chani chakama jawen janchawen jatu axunkin jaska Dios nuikipakidi chanikin jatu unanmaya, januxun Diosun jatu medabewakin kushipa wakin dami atimaska betsaa betsapaa jatu axunkin uinmaya <sup>4</sup> Iconio anu jiweabu yudabu paxkatan jatiditun judiobun jancha ninkakin Jesúsun kushipayabu Pablo inun Bernabé danainbun betsabu jatiditundi jabun jatu ninkakin ikunwainbun <sup>5</sup> janua nawabu inun judiobu mae xanen ibubube jatube yubakatan nuitapawakin ichakawakin mankanwen jatu tsakanun ikaibu <sup>6</sup> januxun Pablo inun Bernabé banabitam paxai mae Listra inun Derbe inun mae betsaa betsapaa Licaonia mai pakea anu buxun <sup>7</sup> jadixundi Diosun jancha kakape jawen bake Jesúskidi jatu yusindiaibun

*Listra anuxun mankanwen Pablo tsakanibukiaki, na janchadan*

<sup>8</sup> ja mae Listra anu juni betsaa tae dabe chakabu jabiaska kaini jawa jaska nisma tsauxun <sup>9</sup> Pablón yusiain ninkajaidaya: “Ja junin ikunwanyan en kaya watiduki”, ikin jawen shinan uinjaidatan <sup>10</sup> Pablón jui kushipawen yuikin:

—Ja min tae min jabiaska kainidan, benidiwe— aka

ja juni daxka iki ishchutan ti itan nikaunaya <sup>11</sup> yudan kaianen Pablón jaska wai uinkin kenwain jatun Licaonia jancha kushipawen yuinamei:

—Nai anua na yushin dabe junikidan nuku anu damitan butushinabuki. Pejaidaki— ikin

<sup>12</sup> Bernabé metukin yuikin:

—Jadan, nukun mekenika yushin Zeuski— akin Pablo metudiakin: —Ja jatun nuku jancha waidan, nukun mekenika yushin Hermeski— akaibun <sup>13</sup> ja Zeusbe jawenabu janchaxunikatun jawen kenwanti jiwe mae jikiti anua ina awa bene dabe juawen dauwabu bexun jawenabubetan Pablo inun Bernabé ja yushin dabe kenwankin benimawanun, iwanan, detetan kuakin jawen kenwanun ikaibun <sup>14</sup> jaska waxunaibu uinkin tapintan ja Jesúsun kushipaya dabetan yudabu jatu kenwanmakatsi ikama jatun tadi ushnitan yudabu nashui ikain nemakin jui kushipawen griegon janchawen jatu yuikin:

<sup>15</sup> —Junibuun, ¿jawakin man nuku jaska wai? Nuku jaska wayamakanwen. Nukudan, matu keskadi nun jabias juniki. Ja yushin dabe man kenwanmis tun matu jawa waxuntidumaki. Jaskawen taexun man kenwanmis jenetan Dios jiweatun nai inun, mai jidabi inun, ianenwan dasibi inun, janu jiweabu dasibi damiwani matun shinan betsaa watan man kenwankubainxanunbun jakidi jawen bakekidi kakape matu yusintanun ika nun jushianki. <sup>16</sup> U unu badi betsation mai jidabi anu yuda betsaa betsapabun jatun shinanens jawada chibankubainaibu Diosun jatu beduwens uinyukubainbiakin <sup>17</sup> jawa matu jeneama jaska pepawamiswen xabakabi naiudia ui matu imaxunkin miban man banaima matu pe benemaxunkin man piaibu matu yaniwamakin betsaa betsapawen matu benimawakubainmiski. Jaskawen taexun Dios jiwea besti kenwankubainkanwen— iwanan, <sup>18</sup> jatu jaska wabia ninkamas ina awa bene detexun yushin dabe benimawati kuaxunyupanabun betsaa wakin jatu bexteaibun

<sup>19</sup> ja jatu jaska waibun judiobu Antioquía anua inun Iconio anuabu bexun Pablo inun Bernabékidi chani chakakin yudabu padankin jatu shinan betsaa wamatian jatu itimaska wamabaunkin Pablo besti bechixun mankanwen tsaka tsaka akabu Pablo di ikaya: “Ma mawaki”, ixun chaka udenmisbu anu xadabain udentanabu dakaken <sup>20</sup> janua ikunwainbun ichaxun Pablo kebaunxun uiainbun Pablo bestein benitan june ja mae anu jikia jabianu uxashini janua bestentan Bernabébe mae betsaa Derbe anu kaxun

<sup>21</sup> jadixundi Diosun jancha jawen bakekidi kakape jatu yusian januxun Derbe anuxun jatun jancha bechipaikin ichapabun ninkakin ikunwainbun jadia chintunkidani Listra inun, Iconio inun, Antioquía anu bekubidankin <sup>22</sup> mae tibi anuxun jau jabun jatu yusinxanunbun ikunwainbu yusinkin jatu mestenwankin yuikin:

—Eskaki, ninkakanwen. Dios xanen ibuaiki nun dasixanaibu nuku ichakawakubainxankanikiki. Jabiaskaki. Jabiaskabiaken jawa datei chintuanma Jesús ikunwanpakexankanwen— akin menetan <sup>23</sup> janu ikunwainbu ichamisbu tibi anua mekenikabu jatu katutan jatube samakekin Dios dayuikin jabun Jesús ikunwainbu jau nukun Xanen Ibu Jesúsun jatu medabewakubainxanun Pablo inun Bernabén kushipa jatu yukaxunkubidanibuki- aki.

*Pablo inun Bernabé maewan Antioquía mai pakea Siria anu ana chintubidanibukiaki, na janchadan*

<sup>24</sup> Janua bei mai pakea betsa Pisidia kapukebidani mai pakea betsa Panfilia anu jikishinxun <sup>25</sup> januxun mae betsa Perge anuxun Jesúskidi kakape jatu yusintan janua mae betsa Atalía anu jikishina <sup>26</sup> janua Antioquía anuxun jau yusintanunbun Dios jatuwen nuiai anu jadi jatu yunuimabu anu bukubaunkin Jesúskidi jatu yusinkubauntani menebidani janua niwe xaxuki nanetan Antioquía anu chintubidan <sup>27</sup> keti itan mapekeshinabun januxundi Jesús ikunwainbube ichaxun bukubauni jaskatanshinabu inun jabu judiobuman jau jabundi Jesús ikunwanunbun natian Diosun jatu kenaya xabakabi jaska jatu yusinkubauntanshinabu dasibi jatuki chanitan <sup>28</sup> jabianu jatube bashikuyima Pablo inun Bernabé uxe ichapa ikunwainbu jatu yusiin jiweyuabun

## 15

*Yusian betsa betsapa jusiaibu pewai Jerusalén anu Jesúsun kushipayabu ichanibukiaki, na janchadan*

<sup>1</sup> jabiatiandi jabun Jesús ikunwain judiobu betsa Moisin yusian chibankin bechipajaidamisbu Judea anua Antioquía anu bushinxun Jesús ikunwainbu jabundi jatu yusinkin: “Judiobuman tsuabunda man nukubetan Jesús ikunwainbuden, Moisin nuku yununi beya jabun jina kubichi biabumadan, Diosun jatu meketidumaki”, iki jatukidi janchaibun <sup>2</sup> januxun Pablo inun Bernabén jaska jatu yusiaibun danain jatube yuinamei ja ichakayamai itimaskaibun jaska bechipaiama atimas ikunwainbu ichatan Pablo inun Bernabé inun ikunwain betsabu katuxun jau jaska yusian jusiaibu pewakin Jesúsun kushipayabu betsabu inun mekenikabu Jerusalén anuabubetan pewai jau jatube janchatanunbun jatu yunukin <sup>3</sup> nichianbu bui Fenicia mai pakea inun Samaria mai pakeakidi bukin judiobuman jaska jatun shinan chakabu jenetan Jesús chibanshinabukidi jatuki chanikubainaibun mae tibi anuxun ikunwainbun jaska washinabukidi jabun kaka ninkai benima chakaya- makubainaibun

<sup>4</sup> janua Pablo inun Bernabé inun jatube buaibu Jerusalén anu jikiabu Jesúsun kushipayabu inun, mekenikabu inun, dasibi Jesús ikunwainbu betsabun jatu i pewatan jatube ichabu Diosun jatu medabewaya judiobuma Jesúskidi jatu yusianyan jabundi ikunwankubainshinabukidi Pablo inun Bernabébe jatuki chaniaibun <sup>5</sup> jatu jaska yuiaibun judio xuku betsa fariseobun Moisin jancha chibanjaidabiamisbun ma jatidibun Jesús ikunwankin chibainbu betsa benikauan jatu yuikin:

—Man jaskakidi jatu yuiaidan, nawabu Jesús man jatu ikunwanmaibudan, jaska Diosun Abraham yununi keska jau jatun jina kubichi binunbun jatu yunukanwen. Ja inun, Moisin nukun xenipabu yununi beya jau chibandianunbun jatu yunudiakubainkanwen—jatu wa

<sup>6</sup> jaskai ninkatan ja beyakidi jatu jusimapaiabu ja unanepabu Jesúsun kushipayabu inun mekenikabu besti pewanun ika ana ichatan <sup>7</sup> jaikaimas shinan betsa betsapaibu Simón Pedron jatu ninka keyutan atimas jadi benitan jatu yuikin:

—En betsabu inun en puibuun, Diosun kakape jawen bake Jesúskidi judiobumandi jau ikunwanunbun matu anua Diosun ea katuxun ea yunuxun ea jatu yusinmayama man unaiin. <sup>8</sup> Ja romano xanen ibu Cornelion jiwe anuxun en jatu yusianyan jabun Jesús ikunwainbu Diosun dasibi nukun shinan unanmistun ja judiobumadi jawenabu wakin ikunwan-makin nuku keskadi wakin kushipa wakin jawen Yushin Pepa jatu inankin jatu achimayamaki. <sup>9</sup> Nukunan, nun Jesús ikunwainbu Diosun nukun juinti pepawamis keska wakin jabundi Jesús ikunwainbu Diosun jawa jatu dananma jawa nuku paxkakin betsa wama jabiaskas shinan jatube nuku waikiki. <sup>10</sup> Jaskawen taexun ja Moisin nukun xenipabu yusini beya jabun chibantiduma ipaunibuki. Jabiaskadi nun Israelbun nun chibantidubu-madiki. ¿Jaskakin Diosun jatu jaska wamabiaken matu Dios keskakin judiobuman Jesús ikunwainbu man jatu yunuai? Jatu jaska wayamakanwen. <sup>11</sup> Natian nuku inun jabukidi shinananankanwen. Nukubun nun ikunwain mekeia jayadan, jawama jamenjaida nun ikanaii. Jaska keskadi wakin jabu judiobumadi jabias nun ikai keskadi wakin nukun Xanen Ibu Jesúsun jabu duawaikiki, jawen pepawenan—jatu wa

<sup>12</sup> janua dasibibun jaska ninkai pes nesei keyutan ana jawa yui janchabu-maken januxun Bernabé inun Pablo Diosun jatu medabewaya judiobuma anuxun dami atimaska betsa betsapa jatu uinmakubainimakidi jatu yuikin <sup>13</sup> meneaya Jesúsun betsa Santiagon ichabu jantsidi jatu yuikin:

—En betsabu inun en puibuun, eandi matu yuinun ninkakanwen. <sup>14</sup> Jesús ikunwainbu Diosun jawenabu jatu wadiakin medabewani jau nukube ikubainxanunbun jaska bebunkidi tatesmakin Diosun judiobumadi katuyama Simónen ma nuku yuixuki. <sup>15</sup> Eanan, jabiaskadi bebunkidi Dio-sun jancha yuixunikabun kenenibu en jaska shinaiin, Diosun jancha jaska yuiaidan:

<sup>16</sup> ‘Israelbu kupitan ana juxun  
David xanen ibu ini keska wakin  
jawen baba betsa medabewakin kushipa wakin  
ja jiwe di ini keskabu en ana jatu benixanaii.

<sup>17</sup> En jatu jaska waya nawa xukuabu tibibu inun  
tsuabunda en Yavé Diosun kenayabun ea yukai jabun ea benatidubuki.

<sup>18</sup> Jaska bebunkidijaida en Yavé Dios janchakin jatu yubaidan,  
chanima en jatu axununbadiaii’,  
ikai ninkatan nuku kenexuniki—iwanan

<sup>19</sup> —Jaskawen taexun nun shinanunbun matu yuinun ninkakanwen. Ju-diobuman jatun shinan chakabu jenetan Jesús ikunwankin Dios chibainbu jaska nun judiobu nukun beya chibain nun jiwemis yunukin jatu bik-awayamanankanwen. <sup>20-21</sup> Jakia badi ichapa ma jadi judiobu judiobu-man mae tibi anuxun juindukunti tibitian jaska Moisin jatu kenexuni jatu yusin jatube beyamisbuwen taexun jau judiobuman judiobu jawaida jau bedabin dabeyamanunbun na besti nemakin jatu kenexunankanwen, eska besti jatu bextekinan. Yushin dami betsa kenwankin nami inanmisbu

jau piyamanun bun inun, jabu ainyankinan, jaska Moisin jatu neman iau chibunun bun inun, yuinaka tenexabu mawa jau piyamanun inun, yuinaka jimi jau ayamanun bun jaska besti jatu nemakin kenexun judiobuma dasibi anu bumanankanwen— jatu wa

*Judiobuma yusinkin jatu bikawaibukidi jatu kene bumanibukiaki, na janchadan*

<sup>22</sup> januxun Jesúsun kushipayabu inun mekenikabu inun ikunwain dasibun Santiagon jancha ninkakin bechipaitan Antioquía anu Pablo inun Bernabébe jau butanun bun jabubetan ikunwainbu anua juni dabe unanepa Judas jawen kena betsa Barsabás inun Silas katutan

<sup>23</sup> jatu bumakatsi jatu kenexunkin:

“Nun Jesúsun kushipayabu inun mekenikabu nun matubetan ikunwain bunan, nun matu kene bumai uinkin ninkaxankanwen. Judiobuma man Antioquía maewan anu jiweabu inun, Siria inun, Cilicia mai pakea anu jiweabun nukubetan Jesús man ikunwainbu nun matu shinaiin. <sup>24</sup> Jaskaken nenuadi nukunabu nun jatu yunuamabia buimaxun jatun beyakidi matu yusinkin matu itimaska waibu nun ninkashinaki. <sup>25</sup> Jaskawen taexun nukun nun matu medabewa nun ixun jabias shinan ichawatan nukubun nun shinan peken jau jabundi jaskakidi matu medabewaxanun bun ixun nuku anuadi juni dabe katutan nukun jaibu Bernabé inun Pablobe nun jabube nichiaiin. <sup>26</sup> Nukun jaibu Bernabé inun Pablon jatun jiwea yaushiamma bikajaida mesebiaken nukun Xanen Ibu Jesucristo dayaxunkin yusinkubainmis man unaiin. <sup>27</sup> Jabu nun matu anu yunuai jaska nun matukidi shinain Judas inun Silas jikitan matu xabakabi yusin pewaxankanikiki. <sup>28</sup> Jakia jaska man judiobumandi Jesús ikunwain unanuma man jiwenun bun Diosun Yushin Pepatun nuku shinanmaya ana nukun beyakidi jawa betsa matu yunuama na besti nun matu nemai ninkakanwen, man judiobube bedabinandabeyamanun bunan. <sup>29</sup> Yushin dami betsa kenwakin nami inanmisbu ana piyamakubainxankanwen. Ja inun, yuinaka tenexabu piyamadiaxankanwen. Ja inun, yuinaka jimi ayamadiaxankanwen. Ja inun, ainyankinan, jaska Moisin nuku neman iau chibandiakubainxankanwen. Jaska besti man mekeadan, jawa chakabuma man pe besti jiwxankanaii. Jau Diosun matu pe mekekubainun wen”,

jatu waxuntan

<sup>30</sup> jabu butanun bun keneya jatu nichinkin yunu pewabu Antioquía anu jikishinxun ikunwainbu ichawaxun kene jatu inanbu

<sup>31</sup> januxun ikunwainbu ja kene bitan yuii jatuwen nuikin jatu daewaibu ninkai benimaibun

<sup>32</sup> Jesúsun kushipayakin Judas inun Silasin Diosun jancha pe jatu mextamamiswen taexun ikunwainbu jatu medabewakin jatu benimawaya ikunwainbu jabun jancha bechipaijaidaibun <sup>33</sup> januxun jau jatu yusinyunun bun uxe ichapama bashimaxun ma buaibun ja jabun jatu yunuimabu anu jabu jiwei peabu jau jatu yuitanun bun, iwanan, unanuma jau butanun bun jatu nichian buaibun

<sup>34-35</sup> janua Pablo inun Bernabé Antioquía anua ana kama niti iki bashikuyuimaxun ikunwainbu betsabubetan kakape Jesúskidi yudan kaian jatu yusinpakekubainibukiaki.

*Pablo Bernabébe kunyan idabetan paxkabainibukiaki, na janchadan*

<sup>36</sup> Janua Antioquía anu uxa ichapa Pablo jiweyukin Bernabéki chanikin:

—Janu Jesúskidi nun yusinkubauntanima anu ikunwainbu jaskadamenkain ana jatu uinkubainanwen— aka

<sup>37</sup> Bernabén kemakin:

—Kakinan, ¿Juan Marcos nun ana iyutidumen?— aka

<sup>38</sup> bebunkidi jatubetan yusin ka Panfilia anuxun jatu xunubidankin jenebidanimawen taexun Pablón ana iyukatsi ikamaken

<sup>39</sup> janua jawen taea iyunun ika jabe kunyan idabetan paxkai jenenamedabetan Bernabén Marcos iyui Chipre anu niwe xaxuwen inatan kaya

<sup>40</sup> jaska wabainaya Pablón jawena medibis shinantan Silas iyukatsis ikin katutan ikunwainbuki chaniaya jabun yuikin:

—Man jaska kainaidan, peki. Man jatu yusin kaya nukun Xanen Ibu matuwen nuikin jau matu medabewakubainunwen— akin jatu nichinkin yunuabu janua kainbaini main bui <sup>41</sup> Siria inun Cilicia mai pakea kapukekubainkin Jesú ikunwainbu ichati jiwe tibi anuxun jatu yusinkin jatu benimawakubauni kai

## 16

### *Pablo inun Silas buaibube Timoteo jatube kanikiaki, na janchadan*

<sup>1</sup> janua Pablo inun Silas kakunkainkin Derbe inun Listra ja mae dabe anu yusin Listra anua Jesú ikunwain betsa jawen kena Timoteoki nukunibukiaki. Jawen ewa judio ainbun Jesú ikunwanyan jawen epa griegonawan Jesú ikunwanmaken <sup>2</sup> janua ikunwainbu Listra inun Iconio anuxun Timoteon Jesú ikunwain pe jiwekunkainmiskidi chaniaibun <sup>3</sup> Pablón ninkatan jau ea medabewai ebe kanun, ixun jawen epa judiomabiaken jawen ewa judiowen taexun jau judiobun Timoteo dananyamaxanunbun jawen bed-abintidubuken jatun beya chibankin jawen jina kubichi Pablón jatu mettemaniakiaki. <sup>4</sup> Janua bukubainkin judiobu inun judiobuman Jesú ikunwainbu mae tibi anua jau jatun beyakidi yusiin bikanameyamakubainunbun Jesúsun kushipayabu inun mekenikabu Jerusalén anuxun jatu nemakin kenexunimabu jatu yusiin chanikubainaibun <sup>5</sup> janua ikunwainbun jaska ninkatan jatun shinan pewakin mestenwankubainaibun yuda betsabundi Jesú ikunwain xaba tibi ana ichapabu jatuki dasikubainaibun

### *Pablo uxa namaya Macedonia anu jau kanun juni betsan kenanikiaki, na janchadan*

<sup>6</sup> mai pakea betsa Asia anu Pablo inun, Silas inun, Timoteo Jesúskidi jatu yusin jadi bunun ikaibun Diosun Yushin Pepatun jatu nemaya mai pakea dabe Frigia inun Galacia anuabu jatu yusiin kapukebauni <sup>7</sup> mai pakea betsa Misia kemai Bitinia mai pakea betsa anu jikinun ixun shinanyan Jesúsun Yushinin jatu ana nemaken <sup>8</sup> janua Misia kapukei bai chai tanabaini mae betsa ianenwan kexa anu bei butubidani Tróade anu jikiabun <sup>9</sup> jabianudi en Lucas en jatuki nukuken meshu medan Pablo uxa namaya juni betsa Macedonia anua damia nixun Pablo yuikin: “Macedonia anudi juxun nuku medabewayuwe”, ikai <sup>10</sup> ninkatan bestenxun ja namapan uinxu nuku yuiaya Macedonia anuxun Jesúskidi kakape nun jatu yusin kanun Diosun nuku yunuai unantan nukun mabu pewashintan

### *Filipos mae anuxun Pablo inun Silasin jatu yusinibukiaki, na janchadan*

<sup>11</sup> janua Tróade anua penaya niwe xaxu ibu peiwen pakatan nanekaini natukan jawen kena Samotracia anu kayanbis kai pukei janu keti itan janu uxashini ana bestenkaini meshukidi jabias xaxuwendi pukei mai pakea betsa Macedonia anu mae betsa Neápolis anu jiki keti itan <sup>12</sup> janua mananan mapekekaini romano mae ewapa mae tibi binua chaima Filipos anu nun

jikishina jawa wadiama janu uxa eskadabestan <sup>13</sup> janu judiobu ichamisbu jiwe jayamaken sábado juindukuntitian mae anua kainkaini jene kexaxun Dios kenwankin januxun Dios kushipa yukamisbu anu kai ainbus ichamisbuki nukutushitan jatube tsauxun Diosun Katua Jesús mekenankidi nun jatu yusinkin taewaibun <sup>14</sup> ja ainbuaibu icha betsan Dios kenwanmis jawen kena Lidia mae betsaa Tiatira anua junixun tadi pepa bixun tashi jushinipa wamis nukun Xanen Ibun medabewakin ninka pewamakin jawen shinan betsaa wamaya Pablón janchawen Jesús Lidian ikunwanyan <sup>15</sup> januxun jabubetan jawen jiwtexun ikunwainbuwen taexun unantan nun jatu nashimakin keyua Lidian nuku yuikin:

—Chanima nukun Xanen Ibu Jesús en ikunwain man ea shinainan, en jiwe anu iyui bekanwen— akin nuku ea akin ana nuku ena wanun ikaya

—Peki— itan jadi ka nun jabe jiweyuniki.

<sup>16</sup> Janua xaba betsatian janu Diosbe janchamisbu anu ana Diosbe janchanun ika nun kaya chipash yushinin bebunkidi unanmamisken ja chipash juni betsabun tsumapan jatu unanxunkin jawen tsumabu pei midima jatu bixunmisken chaima jaki nukutan nun dainbainaya <sup>17</sup> nuku chibanbainkin metubainkin mapuabu dasibi unanxubima jui kushipawen jatu yuikin:

—Ja junibudan, Dios kushipa dasibi binua jawen tsumabun ja dayaxunkanikiki. Janu kupiaitian tsuanda matu nemaxuntidu jawen chanima paxati bai matu unanmakanikiki— akin <sup>18</sup> xaba tibi jawenchains bestikima nukukidi yui janchakunkainaya Pablón jaska ninkai ma bika tenexun dabeketan ja chipashki yushin jikini yuikin:

—Jesucriston kushipawen en mia yunuai ja chipash anua kaindiwe— aka jaska was ja yushinin jawaida jenebainaya

<sup>19</sup> ana ja chipash yushinyankin pei ana jatu bixuntiduma jawen tsumabun ana jawawen jaskatima unantan Pablo inun Silaski sinatakin achibainkin jatun mae namakis jemaintin anu jatun xanen ibubu bebun iyukin xadabain <sup>20</sup> januxun xanen ibu yununikabun besuudi jatu nichintan yuikin:

—Na judiobunan, nukun mae anuxun yusinkin jadakidi shinantimawakin dasibibu nuku itimaska wakanikiki. <sup>21</sup> Jatun beya jaska jiwenmisbu nuku yusiaibun nun romanobun nun chibanbaintidubumaki, jaska nuku yusinun ika ikaibudan— jatu waya

<sup>22</sup> januxun yudan kaian mapubaunabundi jaska ninkai sinatai jabundi jatu chiteaibun jatukidi jaskaibuwen taexun jatun xanen ibu yununikabun jau jatun tadi pekatan ji sidiwen jau jatu kusha kusha anunbun jatu yunuabu <sup>23</sup> jabun jatu kusha kusha achakayamatn bichiti jiwe anu jatu bichimatan mekenikatun uin pewakin jau mekejaidanun yunubidanabu <sup>24</sup> ninkatan ana dintu uke medanjaida Pablo inun Silas mistuxun jau jaska paxayamanunbun ji xui dabeyawen jatun tae bitaux adabetan mekeken

<sup>25</sup> ja jaska wabu jabias meshu yamenapun Dios dayuikin Pablo inun Silasin jawen kenwanti Dioskidi nawaibun ja jabu dukun jatu bichimabun jatu ninkaibun <sup>26</sup> jaskabiam e iskaun jawaida pacha sakui mishki bichiti jiwe wanibu takax takax akaya ja jaska waya beputi tibi jamebi bepenmanai keyuaya juni tibi mane dispiwen menexekeabu jamebi chudekei nidi iki keyuaya <sup>27</sup> janua mekenika bestenkauan beputi tibi ma bepenmana uintan shinain: “E jee! Min jaskati kemain. Dasibi ma kainbaini paxabubin! Ibubisbin en mawai!”, itan jawen nupe chaipa sitan ibubis tenukuyupanan <sup>28</sup> jawaida Pablón jui kushipawen yuikin:

—Mimebi ibubis chakabuyamawe. Nuku dasibi nun jani kamaki— ikaya

<sup>29</sup> januxun jawen tsumabu bin yukatan Pablo inun Silaski datei saki saki iki kushikain kenwain jatu naman danti itan <sup>30</sup> januxun kainmatan jatu yukakin:

—Xanen ibubuun, janu kupiaitian en Dios daewakatsis ikaii. ¿Jaskapa, jau ea mekexanunan?— jatu wa

<sup>31</sup> januxun jabun kemakin:

—Xanen Ibu Jesús ikunwanwen. Mia inun min jiwe anu mibe jiweabubetans man jaska waya Diosun matu mekekubainxanikiki, kupiamadan— jatu waya

<sup>32</sup> jawaida bichiti jiwe mekenika inun dasibi jabe jiweabu nukun Xanen Ibu mekenankidi jatu yusiai <sup>33</sup> ninkatan meshubiaken jatu kushshinabu su ika jene jabaibu jawaida unpaxwen jatu chukatan januxun jabe jiweabubetans Jesús mekenan ikunwankanxuwen taexun Pablo inun Silasin jatu nashimabu <sup>34</sup> janua jabe jiweabubetan Dios ikunwanbaini benimajaid-abainkin jatun jiwe anu jatu iyuxun jatu pimashinaibun

<sup>35</sup> janua penaya xanen ibu yununikabun jatun tsumabu jatu jancha bu-makin yuikin:

—Ja juni dabe achiabu man jatu bichishinabudan, ana jatu jawa wama jau kainunbun yuitankanwen— akabu buxun bichiti jiwe mekenika yuiabu <sup>36</sup> januxun Pablo yuikin:

—En matu jawa wama kainmanun xanen ibubun ea yunukanxukiaki. Jaskaken unanuma budikanwen— jatu waya

<sup>37</sup> jakia Pablo kaintan xanen ibun tsumabu yuikin:

—Nuku dabe romano documento nun jayabiaken chanima nuku jawa yuka pewama e iskaun juni dasibibun bedubi nuku kusha kusha matu amatan nuku bichishinabuki. ¿Ikis natiandi junedi nuku kainmakatsis ikanimenkain? Jaskamaki, jau jabun ibubis nuku kainmai benunbun jatu yuitankanwen— jatu wa

<sup>38</sup> janua jatun tsumabu buxun jaska Pablón jatu yuia ninkabain jatun xanen ibubu yuiabu ninkatan:

—Romano documentoyabudaka— iki datei <sup>39</sup> jaska jatukidi ninkabidani bexun daewakin jawen bichiti jiwe anua kainmatan nichinkin Pablo inun Silas yuikin:

—Matu jaska wakin nun kaneshinaki. Nukun chakabu shinanma unanuma budikanwen, nukun mae jenebainidan— jatu wa <sup>40</sup> bichiti jiwe anua taxnibaini bui Lidian jiweten jikia bayukin januxun ikunwainbu jatu shinan chankawantan Pablo inun Silas buaibun Timoteo jatube kaya jakia ea Lucas jabianu en bashikuyuniki.

## 17

*Pablo inun Silas Tesalónica anuxun jatuyusianyan janua itimaskanibukiaki, na janchadan*

<sup>1</sup> Filipos anua Timoteo iyui Pablo inun Silas chipekebaini bui mae Anfípolis anu uxashini ana bui mae Apolonia anu ana uxadiakaini janua bui mae betsa Tesalónica anu jikishina janu judiobu ichamisbu jiwe jayawen taea

<sup>2</sup> Pablo ma jaskamis beyawen taea janu sábadotian semana dabe inun besti Pablo judiobube ichaxun Mesíaskidi Diosun jancha yuixunikabun kenenibu betsa betsapa yuiaibube jatube yuinamekin:

<sup>3</sup> —Diosunan, jawen Mesíasdan, jau mawayuxanun yununiki. Mawatan ana bestenxanikiki, akin jakidi kenenibudan— akin Pablón jatu yusin pe-watan ana jatu yuikin:

—Ja Jesúskidi matu yui en chanikunkainaidan, Diosun Katua Mesías Cristoki—jatu wa

<sup>4</sup> januxun judiobu jatiditun inun griegonawabun Dios kenwanmisbu ichapabu inun ainbuaibu pepa jakidi pe shinamisbu midimabundi Jesús ikunwankin Pablo inun Silaski dasiaibun <sup>5</sup> jakia judio xanen ibu betsabu jabun ikunwankatsi ikama Pablo inun Silasin jatu binuaiwen taexun jatuki sinatakin juni chakabu chikishbu jatu ichawatan jatu pei inantan yuda dasibibubetan jau jatu itimaska wabain Pablo inun Silas achixun mae xanen ibubu jau inanunbun jatu yunuabu jaskai bedukubainkin jatu mesewakin datebainkin dasibi itimaskakain Jasónen jiwe anu ja junibun Pablo inun Silas bena akeakebaini ja jiwe anu jikitan <sup>6</sup> jatu bechiamma Jasón inun ikunwain betsabu besti achibain mae xanen ibubu anu xadabainkin jatu iyuxun jancha kushipawen ja akin chitekin:

Ja juni Pablo inun Silasinan, romano mai jidabi anu buaketankin jatun yusianwen jatu itimaska wakubaunkin nenudi beshinxun jabiaskadi wai <sup>7</sup> Jasónen jiwe anu jatu ishiankiaki. Jabun nukunabu yusinkin Jesús jatun xanen ibu benakidi yusinkin nukun xanen ibu romano Césarn nemati jancha dananti wakin binumakanikiki. Chakabujaidaki— jatu wakin <sup>8</sup> yudan kaian inun mae xanen ibubu jaska jatu yuiaibu ninkatan jamenmens daketapakin Jesús ikunwainbuki jatu sinatajaidamaibun <sup>9</sup> ninkatan jau june kainbainyamaxanunbun jawen yubakati pei ichapa Jasón inun ikunwainbu betsabuna bianyuxun chipu ana jatu ninkakatsi jatu jawa wama jeneyuabu

#### *Berea anuxun Pablo inun Silasin jatuyusia in ninkanibukiaki, na janchadan*

<sup>10</sup> jaskaibun jawaida meshu medan jau junebaintanunbun ikunwainbun Pablo inun Silas inun Timoteo mae betsa Berea anu jau paxanunbun jatu nichianbu bui Berea anu jikishina janua janu judio ichamisbu jiwe anu jikitan <sup>11</sup> Diosun Mesías Jesús mekenankidi jatu yusianbu Tesalónica anua judiobu keskama Berea anu judiobu pepabun ninkakatsis ikin: “¿Pablon jancha chanimenkain? ¿Chanimamenkain?” ikin Diosun jancha kenenibu xaba betsa tukama tibi ichaxun tapinkatsis ikin bechipaikin uinkubainaibun <sup>12</sup> jaska wakin judio ichapabu inun griegonawabu junibu inun ainbuaibu pepabu jatukidi pe shinamisbundi jabun Jesús ikunwainbun <sup>13</sup> jatu jaska wamaya Berea anuxun Diosun Mesías kakapekidi Pablon jatu yusia in judiobu Tesalónica anuabun ninkakin unantan jawaidabidani bexun Pablokidi chani chakabaunkin Berea anu jiweabu jatu shinan betsa wamakin yudabu jatu itimaska wai bedukubaunaibun <sup>14</sup> jaska ninkatan ikunwainbun medabe-wakin jawaida jau Pablo paxanun ianenwan kexa anu iyuabun jakia jatu anu Silas inun Timoteo bashikuabun <sup>15</sup> janua ikunwain betsabudi Pablobe niwe xaxuwen bui maewan betsa Atenas anu chaijaida iyuxun nichintanabu Pablon jatu yuikin:

—Silas inun Timoteo jau jawaidabidan jau eki nukudi benunbun ea jatu yuixuntankanwen— jatu wa chintunbainaibun

#### *Atenas maewan anuxun Pablon jatu yusinikiaki, na janchadan*

<sup>16</sup> janua Pablo Atenas anuxun Silas inun Timoteo manakin ja maewan anu dami yushin wanibu ichapa kenwanmisbu uinkubauni jatuwen nui bika tenejaidai <sup>17</sup> jaskawen taea judiobu inun griegonawa bestibu jabun Dios kenwanmisbu jatun ichati jiwe anua xaba tibi jikitan Diosun Mesías Jesúskidi jatube yuinamei janchakunkaini inun mae jemaintin ewapa anuxundi dasibi maniabu jabiaskasdi Jesúskidi jatu yui jatube janchanamedi-akunkainaya <sup>18</sup> janua juni betsa unanepabu epicúreobun yuikin: “Tsuawen

nuiama jawada min bechipaiai besti aki pe jiwekunkaintiki”, ikin shinanmisbu inun juni betsa unanepabudi estoicobun yuikin: “Jawawen benimama, jawen yudawen nuiama pe jiwekunkaintiki”, ikin shinanmisbu Pablobe yuinamei kemanamediaibun jabu betsan chitekin yuikin:

—Na chikish janchanwainan, ¿jadakidi janchai ikimenkain?— ikaya betsan yuikin:

—Pablonan, eska yui ikikiaki. Diosun Mesías Jesúskidi inun yudabu dasibi mawa ana bestenxanaibukidi chanidan— ikaya jaskakenan

—¿Mekenika yushin betsa betsapa nun jawa unandiabumakidi jawen nuku benimawanun ika ikidaka?— ikaibun

<sup>19</sup> jaska wabainkin Mati Areópago anu janu unanepabu ichamisbu anu Pablo iyuxun yukakin:

—Nun tapinun ja yusian sera min beshianan, nuku unanmadiwe. <sup>20</sup> Jaskakidi chanikin min nuku bepxuma kayaidan, nun tapinkatsis ikai nuku yuidiwe, ¿jaskada kayakidi yuia min yui ikimenkainan?

<sup>21</sup> Jaska jabu yuka ikidan, Atenas anu jiweabu inun nawa betsa janu jatube jiweyuabu tsuanda yusian sera beabu yuiaibu ninkakatsis imisbuken

<sup>22</sup> yusinan unanepabu ichaxun kebaunabu namakis Pablo benia nixun jatu yuikin:

—Atenas anua junibuun, chanima jancha matu yuinun ninkakanwen. Yushin betsa betsapaki mesekin man kenwankubainmis en matu uiaiin.

<sup>23</sup> Januxun man yushin dami betsa betsapa tibi duawakin kenwanmis anu ja chi tapu betsakia uinbaunkin betsa jawen kene nea: “Yushin tsuan ja unanmaki”, ika netani en uinshinaki. Jaska jawen kena unandiamabia man kenwanmisdan, jawen kenadan, Yavé Dioski. Jaskakidi matuki chanitanun ika en jushianki. Ea ninkakanwen.

<sup>24</sup> Yavé Diosunan, mai jidabi inun dasibi nun janu jiweabu Diosun damiwanidan, dasibi jawenaski. Ja nai anua inun mai anua dasibi mekei xanen ibuaya junibun jaska wakin duawanun, iwanan, jatun shinanen templo jawen kenwanti jiwe waxunabu anu besti jiweamakiaki. <sup>25</sup> Ja inun, dasibibu Diosun nuku jiwe maxun juinsinamamis inun jamapai tibi nuku inankin medabewakubainmiswen taexun jawada yudabun Dios axuntidubuma-jaidakiaki.

<sup>26</sup> Shinankanwen, eskakidan. Na mai jidabi anu nun janu jiwebaunxanunbun Diosun juni bestichai dukun Adán dami watan jawen taexun dasibi nawa betsa betsapa pawanikiaki. Na nenu mai anu jatianda inun janida nun jiwxanunbun ma janu tibi nuku mae pewaxuni anu nun jatianda inun janida nun jiwxanunbun ma janu tibi nuku mae pewaxuni anu nun ikabuki, na jibia mae anu nun jiweabudan, <sup>27-28</sup> Dios benai yudabun jaki nukutidubudan. Chanima Dios nuku tibi anu benantamabiaken Dioskidi tapinun ika jawa chai kama nun janubi jaki nukutidubuki. Matunabu unanepa miyui jawendua unainbun yuikin: “Nukudan, nun diosun bakebuki”, anikiaki. Chanima jaska yuini keska nun jibia Diosunabuki. Jaskawen taea Dioswen nun jiweabu inun nun jawen jamapaiyaibu inun nun jayabuki. <sup>29</sup> Nun jaskai Diosunabukin nun jaska shinantidubumabiaken junibun shinan chakakin Dios jaska keska dababen jatun shinanwen jabun dios wakin oro inun plata inun mishki dami wamisbuki. <sup>30</sup> U unu badi betsatian yuda betsa betsapabun jawa unanbumaken Diosun jatu beduwens uinyukubainiki. Jakia natian ana jaska wama mai jidabi anu jiwebaunabun jau jatun shinan betsa watan jakidi jau shinanunbun Diosun jatu yunuikiki. <sup>31</sup> Juni betsa katuxun yudabu anu yununi mawa bestenwankin yudabu dasibi jawen kushipa jatu uinmaniki. Jaskawen taexun ja xaba ma Diosun katuni anu ja

juni katuniwen taexun yuda dasibi mai jidabi anu jiwebaunabu jatu unanti waakeakekin keyutan Diosun jawa kaneama jatu kupixanikiki— jatu wa

<sup>32</sup> mawa ana bestentidubukidi ninkatan betsabun kaxe waibun januxun betsabun kaxe wama yuikin:

—Nun ma jaska ninkaxuki. Betsatian nun ana mia ninkatiduki— akaibun <sup>33</sup> januxun Pablón jatu jenebaini kaya <sup>34</sup> janua yuda eskadabesbun chibabaini jaki dasixun ana ninka pewatan Jesús ikunwanibukiaki, Areópago anua unanepa yununika betsawen kena Dionisio inun, ainbu betsawen kena Dámaris dan, ja inun, ana jatidabunan.

## 18

### *Corinto maewan anuxun Pablón jatu yusinikiaki, na janchadan*

<sup>1</sup> Janua chipu Pablo Atenas anua kainkaini kai maewan betsawen Corinto anu jikitán <sup>2</sup> judío betsawen Ponto anua kaini jawen kena Áquila inun jawen ain Priscila dama duakabi Roma anua jau judiobu kainbainun bun romano xanen ibujaida Claudiún jatu kainma beimabu janu Pablo jatuki bai ka jadi ka jatuki nukunikiaki. <sup>3</sup> Ja Áquila jawen ainbetanan, jabias daya Pablo amisdi akin tadi jiwe wamisbuken jaskawen taea jatube dayanun ika jatu anu bashikuima Pablo jiwea <sup>4</sup> janua sábado juindukunti tibitian janu judío ichamisbu jiwe anuxun Jesúskidi jatu yusinkin jatu tapinmakin ikunwanmai judiobu inun griegonawabube Pablo janchanamekunkainaya <sup>5</sup> janua mai pakea betsawen Macedonia anua Silas inun Timoteo jaki nukui ma beshian bun januxun jawen daya jenei datan Pablo Jesúskidi besti judiobu jatu yusin-ajida bestiyunun ixun ana daya kayabi akama jatu yuikin:

—Chanima Diosun Mesías nukun Xanen Ibu nun manakubainmisbudan, Jesúski— akin jatu unanmai <sup>6</sup> ninkatan judío ichapabun ikunwankatsi ikama danain jabi aki jaki xechakai ja ibaunaibun Pablo jatu jenebainkatsis ikin Diosun jancha danain jau jabiaskasi jiwenun bun jabu unanti wakin jawen tadi anua mai kudu datakakin jatu yuikin:

—Diosun Mesíaskidi en matu yusian ninkama matumebi ibubis matun chakabuwén man benu kayabiaii. Jaskawen taexun ea akama matu besti Diosun kupixanikiki. Jaskaken judiobu ana yusianma natian unudi judiobuma besti en yusinkubainaii— jatu watan

<sup>7</sup> janua judiobun ichati jiwe anua kainkaini janu judío ichamisbu jiwe dapi juni betsawen Dios kenwanmis jawen kena Ticio Juston jiwe anu jikishinxun Pablo jatu yusinkubainaya <sup>8</sup> janua judío ichamisbu jiwe jatun mekeia xanen ibu jawen kena Crispón jabube jiweabubetans nukun Xanen Ibu ikunwanibuki. Ja dikabi Corinto anuxun ichapabundi Pablo jancha kakape yuiai ninkatan Jesús ikunwandaibun jau jatu nashimanun bun ikunwain betsabu Pablo yunua jatu nashimanibuki. <sup>9</sup> Janua meshu betsatian Pablo uxa namaya Jesúsun yuikin:

—Datei jancha neseama ekidi en kakape yusinkin jeneyamawe. <sup>10</sup> Na jibia maewan anuxun yuda ichapabu en katuaiwen taexun jawa mihi sinatakin tsuan mia chakabu watidumaki, en mia putamakidan— akima <sup>11</sup> janu Corinto anu niti ikimaxun januxun año bestichai ana betsawen namakis nichíin Pablo Diosun Mesías Jesúskidi jatu yusinkubainaya

<sup>12</sup> janua ja mai pakea Acaya anu jatun romano xanen ibu Gálion jatu xanen ibuxunaya judío xanen ibubun Pablo ja akin chitenun ixun achixun januxun Gálion tsauxun jatu unanti wamis anu Pablo iyuxun <sup>13</sup> judiobun ichati jiwe mekenika xanen ibu Sóstenes chitekin romano xanen ibu yuikin:

—Na juninan, Moisin jancha nukun xenipabu yusini ana jatu chibankama jaska wakin jau Dios kenwanunbun yusian benawen na juni kauankin nukunabu yusin chakaikiki— akaya

<sup>14</sup> judio xanen ibubu nemanun ika Pablo janchayupanan xanen ibu Galiónen jatu kemakin:

—Judiobuun, na jaska man ea jakidi yuaidan, na junin jawada chakabu washina kasmai juni deteshinken en matu ninkakeanaii. <sup>15</sup> Jakia kena betsa betsapa inun, matun xenipabun yusini jancha inun, jancha bena matu yusainwen nuikin en pewakatsi ikamaki. Matunmebi man jaska akatsis ikai pewadikanwen— jatu watan

<sup>16</sup> jawen soldadobu jatu nichinmaya <sup>17</sup> janua yudabu ichaxun judiobun ichati jiwe mekenika xanen ibu Sóstenes achixun romano xanen ibun bedubi mekenen deteaibun Galiónen uinbiakin jau shinanxun anunbun jatu jawa nemamaken

### *Antioquía anu chintunkidanima ana jatu yusiin Pablo kakunkainikiaki, na janchadan*

<sup>18</sup> janua ana uxa ichapa jatu yusiin bashikuima Corinto anua Pablo kakatsi Diosun jau jatu mekekubainxanun ikunwainbu Dios kushipa jatu yukaxuntan Priscila inun Áquilabe main kai mae betsa Cencreas ianenwan kexa anu jikitán Corinto anua kai Pablón Diosun jau ea mekekubainun, iwanan, jaska jabe yubakaima ma meneshina Pablón Dios benimawakin kenwain jawen bu chai washina maxtekei mankutan janua niwe xaxu ewapawen inatan Siria mai pakeakidi jadidi bui ianenwan pukebaini <sup>19</sup> Éfeso maewan anu keti itan jabianu Áquila inun Priscila bashibaini janu judiobu ichamisbu jiwe anu Pablo ja mesti kaxun Jesúskidi yusiin jatube janchanameaya <sup>20</sup> jabun ea akin:

—Jabianu bashikuxun nuku yusinyuwe— akin yukabu ninkatan janu niti ikatsi ikama jatu nematan <sup>21</sup> Pablón jatu yuikin:

—Jerusalén anu jatube besiyutanun ika en kayuái. Jakia Diosun ea ana yunua matuki en ana bayutiduki— iwanan, jatu yuibaini niwe xaxu ewapawen Éfeso anua Pablo inakaini <sup>22</sup> Cesarea anu keti itan janua butukaini main kai mananan mapeketan Jerusalén anuabu ikunwainbuki nukukuntan jatu banabimatan janua ana chintuin Antioquía anu main kai jikishina <sup>23</sup> jatuki dasihina semana eskadabes ikunwainbube jiwetan ana jawendi taxnikaini kakunkaunkin ikunwainbu mai pakea dabe Galacia inun Frigia mae tibi anuabu jatu shinan chankanwankubainkin jatu yusian akeakeaya

### *Éfeso inun Corinto anuxun Apolosin jatu yusinikiaki, na janchadan*

<sup>24</sup> ja jaskaitian judio betsa maewan Alejandría Egipto mai pakea anua kaini jawen kena Apolos Éfeso anu jushinxun Diosun jancha kenenibu unanajaidakin xabakabi jancha pepa jawenduawen jatu yusin pewakin

<sup>25</sup> Jesús mekenankidi unanmaimabu ikunwankin jaska Juanen besti jatu nashimani ja besti unankin jawa dateama benima paenwen yusinkin jaska Jesús jiwekunkaini mawa ana besteni xabakabi jatu yusianyan <sup>26</sup> janu judiobu ichamisbu jiwe anuxun Priscila inun Áquila Apolosin jatu yusiain ninkaxun tadi ja besti paxkabain iyuxun jaska Jesúsun kenawen taexun Jesús ikunwainbu jatu nashimamisbu inun jaska chibainbu Diosun jatu jiwekuinmamiskidi ana xabakabi Apolos yusianbu ninkatan <sup>27</sup> janua mai pakea betsa Acaya anu jawen mae ewapa Corinto anu Apolos kanun ika pukekatsis ikaya jabianuxundi ikunwainbun jau Apolos jatu anu jikiai i' pewatan jau Apolos medabewaxanunbun Efeso anuxun ikunwainbun

kenexun jaya yunuabu niwe xaxu ewapawen pukekaini Corinto anu jikishina januxun jabun Jesús ikunwainbu jatu medabejaidawanikiaki, Diosun jatu duawaiwen taexunan. <sup>28</sup> Jabu judiobun Jesús ikunwanbuma jamakidi yuiaibu Diosun jancha kenenibuwen jatu yusinkin: “Diosun Mesías Xanen Ibu man manajaidamisdan, Jesúski”, akin dasibi ichabu besuubixun judio xanen ibubun jatu yusinmis ana nemakin danantidubuma jatu wanikiaki, jatu xabakabi unanmakinan.

## 19

### *Éfeso anuxun Pablón jatu yusinikiaki, na janchadan*

<sup>1</sup> Apolosin Corinto anuxun jatu yusianyan janua Pablodi mati matipa anu kapukei Asia mai pakea anu kakunkaini Éfeso anu jikitán ikunwainbuki nukuxun <sup>2</sup> jatu yukakin:

—Janu man Jesús ikunwankin taewaidan, ¿jawen Yushin Pepatunan, ma matu achitan matuki jikimamen?— jatu wa

jabun yuikin:

—Diosun Yushin Pepakidi tsuan jakidi jawa yusinkin nuku ninkamadiamaki— akabu

<sup>3</sup> januxun Pablón ana jatu yukakin:

—Jaskatan ¿tsuan yununi kushipawen matu nashimabu man ikimamen?— jatu wa jabun kemakin:

—Jaska Nashimanika Juanen jatu nashimakin yusiniwen taexunan— akabu

<sup>4</sup> Pablón ana jatu yuikin:

—Juanen jatu nashimakin jau jatun chakabu jenekin jatun shinan betsa watan jau Dios anu benunbun aniki. Januxun jatu ana yuikin: “Kushipajaida ea kachu chipu juikiiki. Ikunwanxankanwen”, jatu wakubainikiaki. Ja kushipadan, Jesúski— jatu wa <sup>5</sup> jatu jaska wa ninkatan:

—Jaskakenan, Xanen Ibu Jesúsun kena kushipawen ea nashimawe— akabu jawenabu dasibi jatu unanti wamakin Xanen Ibu Jesúsun kenawen taexun Pablón jatu nashimatan <sup>6-7</sup> jatu jaska watan ja 12 junibuki jatuki mamepikunkaunaya Diosun Yushin Pepa jatuki butuakeakeaya janua jabutibiki nawan jancha betsa betsapawen janchaisbumabiaken jatun janchawen Diosun jancha jatu yuimakin mextanmanikiaki.

<sup>8</sup> Januxun uxe dabe inun besti nichíin janu judiobu ichamisbu jiwe anu jikitani dateama xabakabi jatube janchanamekin jawen Mesías Jesús nukun mekenanwen taea Dios xanen ibuxanaikidi Pablón jatu ikunwanmakatsis ikunkainaya <sup>9</sup> janua judiobu jatidi juinti kushikin Jesús mekenan Bai Bena ikunwankatsi ikama dasibibun ninkaibun jancha chakabukin chakabu yuiaibuwen taea janua Pablo ana jatube ichama jatu jenebainkin ikunwainbu tadi jatu iyuxun Tiranon escuela anuxun jatu ichawaxun Jesúskidi yusiin xaba tibi jatube janchanamekunkainkin <sup>10</sup> año dabe nichianyan ja mai pakea Asia anu jiweabu dasibi judiobu inun judiobuman Xanen Ibu Jesús mekenankidi yusiaín ninkakubainaibun <sup>11</sup> januxun Diosun Pablo medabewaya dami tsuan atiduma betsa betsapa waya <sup>12</sup> Pablo Diosun kushipa jaya unankin jawen tadi tuaxwen bunexekeshina inun jawen dayati tadi sawexun pekashina buxun isin teneaibu jawen jatu dakukin jawen tadiwen betsabu xuxawakin betsabu anuadi yushin chakabubu kainmakin kaya wapakeaibun

<sup>13</sup> januxun judiobu betsabun pei binun ixun bai namakixun Diosun jancha kenenibuwen yushin chakabu kainmakubainmisbu Pablón akai keskadi wanun, iwanan, Xanen Ibu Jesúsun kena kushipawen yushin chakabu yunuukin: “Jesúsun kena kushipawen Pablón amis keskadi wakin en matu yunuai kaindikanwen!” jatu wakubainaibun

<sup>14</sup> jatidi xukuabu betsabu Diosbe jawenabu janchaxunika xanen ibu Escevan 7 juni bake mukayabun jaska wakin yuda betsabu anua yushin chakabu kainmabiamisbuwen taea ana kushipanun, iwanan, Xanen Ibu Jesúsun kenawen kainmakin yunuukin:

—Jaska Pablón amis keska wakin en mia yuiai Jesúsun kushipawen taea kainwen— akin <sup>15</sup> abiamisbu betsatián yushin betsa kainmapananbun yushin chakabun jatu kemakin:

—Diosun Katua Jesúsun kushipawen en dateaíi. Pablokidi en unandiaíi. Jamen matudan, ¿man tsuabu iki ikai? ¿Tsuán kushipa man jayamen?— jatu wa

<sup>16</sup> ja jatu jaska watan juni yushin chakabuyatun jatu detekin yushin chakabun kushipawen jatu ichakajaidawakin jatu nuitapawayá tadiuma jimi jabai jiwe anua chintu kushibainabu <sup>17</sup> Éfeso anuabu dasibi judiobu inun judiobuman ninkatan datejaidakin Xanen Ibu Jesúsun kena kushipa unain itsakin: “Nun jamen datan akeaketidumaki”, ikin Jesúsun kena pawanibuki-aki.

<sup>18</sup> Janu ikunwainbu ichabu anua betsabu benixun jaska wakin chakabuwakubainima jatuki xabakabi chanikubainaibun <sup>19</sup> betsabu jabu mukayakin unanmisbun Jesú chibanun, iwanan, jawen mukayakin unanti una bexun dasibibun besuudi manchinxun tanakin jawen pei kadu 50,000 plata pei jexe tanaxun jawen nuiama kuakin keyunibukiaki. <sup>20</sup> Jaska waibun Xanen Ibu Jesúsun kaka pepa inun jawen kushipakidi betsabun jatu unanmakin dasibibu jatu ninkamakin keyukin nati anibuki.

<sup>21</sup> Januxun Pablón shinankin yuikin:

—Macedonia inun Acaya mai pakea anu kaxun ikunwainbu ana uinkubauntani Jerusalén anu ana en kaxanaii. Jadi kaxun jatu uintani Roma anuabudi Diosun ea yunuaiwen taea en jatu uin kakatsis idiaíi— itan <sup>22</sup> janua jau bebunkidi Macedonia anu bununbun jawen medabewanika dabe Timoteo inun Erasto yunutan ana uxa eskadabesi Pablo Asia mai pakea anu bashikuyuaya

### *Éfeso anuabu itimaskanibukiaki, na janchadan*

<sup>23-24</sup> ja jatu jaska wakin Jesúsun Bai Benakidi jatu unanmaibun janua plata mane juxupa dami wanika jawen kena Demetrian yushin jawen kena Artemisa jawen kenwanti jiwe dami mishtin wamistun jabe dayaibun pei ichapa bimisbuwen taexun Demetrian Pablón yusian bena bechipaiama yudabu Éfeso anuabu jatu itimaska wakin <sup>25</sup> jabu jabias keskadi dayamisbu jatu ichawaxun yuikin:

—Ebe dayamisbuun, jaska nukukidi chakabu yuiaibu matu yuinun ea ninkaidakanwen. Nukun dayawen pepai nun jiwemisbu man unaiin. <sup>26</sup> Ja yusinan Pablón jatu yuikin: “Mekenén junin damiwadan, yushin kushipa diosmaki”, akin yudabu jabun bimisbu nuku putamakanikiki. Nenu nukun maewan Éfeso anu bestima jakia Asia jidabi anuxun jatu yusinkubaunai ninkakin jatu jaska wai man unaiin. <sup>27</sup> Jaskadan, meseki. Nun damiwai dayakin nun jawen pei bimisbu nuku mexteabu nun ana jawa jayatidumaki, danainbuwen taeadan. Jaska bestimadan, nuku medabewamis yushin dami ainbu nai anua kauani Artemisa inun jawen kenwanti templodan, jabu Asia

anu jiweabu inun mai jidabi anudi jiweabundi ikis bechipaikin kenwanmisbuki. Jakia Pablón jancha ninkakin Artemisa ana kenwanma jawen kenwanti jiwebenukin dananxankanikiki, Pablón yusian besti ninkakinanjatu wa

<sup>28</sup> jatu jaska wa ninkatan Pabloki sinatakin bis iki sai ikin jui kushipawen yuikin:

—Éfeso anu nukun yushin Artemisa pepajaidaki!— ikin yui jeneabumaken  
<sup>29</sup> jaskaibu yudan kaianen ninkatan Efeso maewan jidabi anua dasibi itimaskai bedukua akeakebaunkin Macedonia anua Pablobe beimabu Gayo inun Aristarco achibainkin janu dasibi icha tsau misbu anu jatu xadabainkin iyuabu <sup>30</sup> janua dasibi ma ichabu anu Pablo nashui ikain jatu jancha wai kapanan ikunwainbun jadi nichianma nemabu <sup>31</sup> ja dikabi Asia mai pakea xanen ibubu Pablón jaibuaibun jatun jancha bumakin: —Mesekanikiki. Jau juyamanunwen— akin Pablo jabuan nemadiabu <sup>32</sup> janua ma ichabu itimaskajaidakin jancha kushipa betsa betsapa yui bis iki shan shanki iki itimaskaibun ichapabu jawa unanma bea ichabu yuka ikin:

—¿Jaskai nun icha ikanai?— ikaibun <sup>33</sup> jakia jadatutunda ichabu jau ju diobukidi jawa chakabu jayama jau jatu unanmakin daewanun judio xanen ibu betsa Alejandro ichabu anua yunukin xutubain jatu be bun nichianbu jau pesnunbun jawen meken jatu sananxuna <sup>34</sup> jakia Alejandro judio uinkin jatunabuma unantan danankin jawen jancha ninkakatsi ikama jancha kushipawen bis ikin yuikin:

—Éfeso anu nukun yushin Artemisa pepajaidaki!— ikin yui yane jeneama 2 hora jabias jancha kushipawen yuiaibun <sup>35</sup> atimas jatun mae xanen ibu betsa jatun jatu kenexunmistun jatu nesewaxun yuikin:

—Éfeso anua enabuun, matu yuinun ea ninkakanwen. Nukun yushin Artemisa jawen dami nai anua kauani inun jawen kenwanti templo jawendua nun mekejaidamis mai jidabi anuabun unan keyukanikiki. <sup>36</sup> Jaska chanimawen taea pestan shinan pewama man jaskatidumaki. Uindakanwen. <sup>37</sup> Na juni dabe man iweatunan, nukun yushin Artemisa kenwanti templokidi jawa atimapá wai inun jawa jakidi chakabu yuiabumaki. <sup>38</sup> Jakia Demetrian jabe dayamisbubetan chitekin jatu ja akatsi ikinan, na jatu jaska waibu nukun xanen ibu yunikabu ichaxun jatun jancha ninkaxun jabubetan unanti watidubuki, jaska jabuan amiskididan. <sup>39</sup> Jakia matun jawada betsa man pewakatsis ikaidan, nukun maewan xanen ibu yunikabube ichaxun jawada man bechipaíama man yuka jatubetan man pewadiatidubuki, jatube ichaxunan. <sup>40</sup> Jamen jaskawen taeama icha man itimaskajaidaibu natian jaskakidi man pewama romano xanen ibubun matu ja atidubuki. Matu jaska waibun nemakin nun jawa matukidi yuitidumaki. Ana jaska janchayamakanwen— <sup>41</sup> jatu watan jatu nichinikiaki.

## 20

*Macedonia inun Grecia mai pakea anuxun Pablón yusinkin jatu shinan chankanwanikiaki, na janchadan*

<sup>1</sup> Éfeso anua itimaskabai ma jeneabun januxun Pablón ikunwainbu jatu yusin pewanun ixun jatu ichawaxun jatun shinan mestenwamatán Dios jatu yukaxuntan Éfeso anua kainkaini Macedonia mai pakea anu kashian <sup>2</sup> januxun jatu uinkubaunkin ikunwainbu yusiin jatube janchakin jatu benimawakin shinan chankanwankin keyutan, janua juni betsa betsapa jatu iyui atimas Grecia mai pakea anu Corinto dapi jikitán <sup>3</sup> janu jatuki nukutan

jiweyukin uxe dabe inun besti nichintan jadidi Siria mai pakea anu kanun ika yubakatan niwe xaxu ewapaki inai kapanan januxun judiobun Pablo detekatsi yubakashinabu Pablón bana ninkatan shinan betsa watan ana Macedoniakidi mananan jawendi ana chintunkaini main kaya <sup>4</sup>jaska kainai jabun chibancainai Berea anua Pirron bake Sópatro inun, Tesalónica anua Aristarco inun Segundo inun, Derbe anua Gayo inun, Timoteo inun, Asia mai pakea anua Tíquico inun Trófimo jabe bui <sup>5</sup>jatidi bebunkidi pukexun mae betsa Tróade anuxun nuku manaibun <sup>6</sup>januxun judiobun misi xaxama pi besi nawai nun jatube iyuaya janua Filipos anua Pablobe en kai niwe xaxu ewapawen pukei xaba 5 día binutan keti itan Tróade anu jatuki ana nukutan 7 día ikunwainbuki bai nun janu iyuniki.

*Tróade anuxun Pablón jatu yusiniaki, na janchadan*

<sup>7</sup> Jabianuadi domingo meshu medan jaska nuku yunubaini Jesús nuku mawaxuni shinanmati misi tunkexun pikatsi ikunwainbubes nun icha meshukidi kanun ixun Pablón nuku yusin yamenapun jancha jenediamaken <sup>8</sup>jadi dintu ewapa jiwe keyatapa manaundi anu bin ichapa jadi jaya, jadixun dekuabu anu nuku ichawaken <sup>9</sup>jiwe kene kexa tapa dabe inun besti uinti xui anu bedunan jawen kena Eutico tsauxun Pablón yusin chaipawai ninkai uxa tenei janua uxachakayama manaundia kauani tin ikaya beninun ika jawaida butukidan ma mawa bechiabu <sup>10</sup>jakia Pablo butudiakidan jaki beukain teikutan ikunwainbu jatu yuikin:

—Jawen dateyamakanwen, jiweakidan— jatu wa ana jiwea uiainbun

<sup>11</sup> Pablo ana nukube inakain Jesús nuku mawaxuni shinanmati misi tunkexun nuku pimatan ana nuku yusin nukube janchashini ma xabaya jancha menetan nun kaya <sup>12</sup>bedunan kauana ana jiwea iyui dasibi benimajaidai inun buaibun

*Tróade anua Mileto anu Pablo kanikiaki, na janchadan*

<sup>13</sup> janua Pablón nuku dukun nuku nichian niwe xaxuwen kai Aso mae anu bebunkidi nun kanun Pablón nuku yunutan janua nuku yuikin:

—Xaxun buantankanwen, en kapakeaidan, jadia ea ibainkaxunan— nuku wa niwe xaxu ewapawen kai <sup>14</sup>ma Aso anu Pablo kapakea jadia nukuki xaxun inakaini Mitilene anu keti ika janu uxashini <sup>15</sup>ana kai natukan jawen kena Quío kema xaxun uxadiashini ana kai natukan betsa jawen kena Samos anu keti ika uxashini janua bestenkaini Mileto chaimaken janu jikitán <sup>16</sup>Jerusalén anu Pentecostés xekiwan bimi betsa ja dukun kanimistian judiobu besi nawamisbutian jatube besinun ika jin jin ikin Asia anu uxa ichapai ana bashikukatsi ikamawen taea Éfeso anu Pablo kama Mileto anu niti ixun manakin

*Éfeso anuabu mekenikabuki Pablo jawen jenei jatuki chaniniaki, na janchadan*

<sup>17</sup> Éfeso anua ikunwainbu mekenikabu jau Mileto anu bea jau jabe janchai benunbun Pablón jawen jancha jatu kenexun bumaken <sup>18</sup>uinbidani Mileto anu mekenikabu beabu Pablón jatu yuikin:

—Matun mae pakea Asia anu en matu anu jiki taeyama jaska en jiwenkainmis man unaiin. <sup>19</sup>Eadan, matu anuxun en shinanen shinanin chikishi jawa keanma en Xanen Ibu Jesúsun ea yununi duawai ninkabumabiaken matuya kaxai beun jene jabakin judiobun ea ichakawabiabu matu anuxun bikajaida tenei en Jesús dayaxunkunkainyamaki. <sup>20</sup>Ea jaska wabiabu dasibibun besuudia inun matun jiwe betsa betsapa anuxun matu yusinkin matu medabewanun, iwanan, jawa meseki dakeama en matu

yusin jeneama iniki. <sup>21</sup> Jaska inun, Dioskidi chakabumisbun jau shinan betsa watan nukun Xanen Ibu Jesús inun Dioskidi shinan betsa watan man ikunwanunbun judiobu inun judiobuma en matu yusinjaidaniki. <sup>22</sup> Jakia eskatian Diosun Yushin Pepatun Jerusalén anu ea yunu chakayamaiwen taea jadi en uin kaii. En jadi jikia dasibibu jaskadada eki tanabu en unanmaki. <sup>23</sup> Jakia mae tibi anu en ka Diosun Yushin Pepatun bebunkidi ea jatu unanmakin bichiti jiwe anu ea bichixanaibu inun betsa betsapawen ea bika tenemaxanaibu ea yuimisbuki. Ja besti en unaiin. <sup>24</sup> Jabiaskabiaken eadan, en jiweawen nui yaushiama en daya Jesúsun ea yununiwen taexun Dios yudabuwen nuikin jaska wakin jawenabu jatu wakatsis ikaikidi punu nukama benimai jeneama en jatu yusinkin keyukatsis ikunkainaii.

<sup>25</sup> —Jaska inun, Dios xanen ibuaikidi en matu yusinkubaunyama tsuan man ea ana uianma ixanai en matu yuiaii. <sup>26-27</sup> Jaskaken ikis matu yuinun ninkakanwen. Dasibi Diosun yudabu yubani jawa juneama xabakabi en matuki chanimiswen taexun tsuanda jabun danankin Jesús ikunwan-mabumawen taexun Diosun ea kupiama ixanikiiki. <sup>28</sup> Jaskaken ibubis mekekin Diosun Yushin Pepatun matu katua medabewakin ikunwainbu mekekubainxankanwen. Diosunabu jatu wakatsi ikin jawen bake yunua mawaxunkin jawen jimiwen jawenawakin medibi jatu wani jatu putama jatu uindaxunxankanwen.

<sup>29</sup> —Jamen betsadan, en ma kainkainiken kaman inu puben keskabu bexun chaxuwan xukua yamawamis keska wakin ikunwainbu chaxuwan keska achixun tenankin yamawanun ika imisbu keska bexankanikiki. <sup>30</sup> Matu ibubis matu anua janubi benitan xanen ibutan: “Ea chibankanwen”, ixun matu padankin matu chani yusinxankanikiki. <sup>31</sup> Jaskawen taexun badi dabe inun besti matube jiweyxun man kaneai tibi en matu mextamakubainkin matu yusinkubainkin badidi inun meshu medan matuya kaxabetanan en matu jaska wani jakimayamakanwen. Eskatianan, janun ibubis bedu mestenwandikanwen.

<sup>32</sup> —En betsabu inun en puibuun, en matu jancha wai ma jatixun en matu keyuai ninkakanwen. Natian Dios en matu yukaxunaii. Jawen jancha pepa nuimis man unanyan jaska dasibi yubakani Dios matuwen dayakin jawen kushipawen matu amaxanikiki, man jawenabu medibi ewai unanepanun-bunan—itan

<sup>33</sup> —Daketapakin ibubis matun pei inun matun mabu matu bianun ika kemuama <sup>34</sup> jakia jaskama ea en jatube dayai jawa jatu bika tenemama jaska ea inun jabun jamapai jayama bikatsis ikin mekenen dayakin en bikubainima man nuku unaiin. <sup>35</sup> Jaska inun, nukun Xanen Ibu Jesúsun nuku yusinkin yuikin: “Tsuada nuitapakin jawada bi benimamisbuki. Jakia tsuanda nuitapaibu medabewakin inain benimachakayamamisbuki”, jatu wani shinain: “Chikishama dayakin nuitapaibu medabewakubainxankan-wen”, akin en matu yusinkubainmiski—iwanan,

<sup>36</sup> jatu yusin menetan Pablo danti ikaya jabe danti iki keyuabu jau Diosun jatu mekekubainxanun Pablón jatu yukaxuntan meneaya <sup>37</sup> janua dasibitun teikuton jaya kaxabetanan Pablo tantsu atan: <sup>38</sup> “Ana man ea uianma ixanaii”, ikin jatu yuixuwen taea jawen nuichakayamai ana benimama punu nukatan jabiaskabia nichinun ika ianenwan kexa anu xaxu anu Pablo iyuabun

<sup>1</sup> januxun Jesús ikunwainbu jatu jenebaini niwe xaxu ewapaki nun ana nanekaini natukan betsa jawen kena Cos anu kayanbis besusi nun pukea janu uxashini ana kai natukan betsa jawen kena Rodas anu uxadiakaini janua ana kai mae betsa Pátara anu jikixun <sup>2</sup> niwe xaxu ewapa betsa Feni-ciakidi kanun ika nexea bechitan jawendi kanun, ika jaki maekin jawen ibu pakatan jatube nun ana kai <sup>3</sup> ana patanbainkatsi ikama besusi pukei natukan ewapa jawen kena Chipre yusiudi dainbaini mai kesua Siria anu patankubauni Tiro anu jatun mabu apakatsis iki janu jikikaun keti iken <sup>4</sup>janua ikunwainbuki nukutan janu mapekeyushina semana bestichai jatuki nun bayuaya Diosun Yushin Pepatun bebunkidi ikunwainbu yuia jabuan Pablo yuikin: “Jerusalén anu kayamayuwe”, akin keyuabu <sup>5</sup> janua 7 día ma keyuaya: “En ma kaii”, nun jatu wa nuku nichinun ika jatun mae anua jabun ikunwain junibu inun jatun ainbuaibu inun jatun bakebuya dasibibun nuku chibanbidan ianenwan kexa anu bea mashin nukube danti itan nukubetan Dios kushipa yukatan <sup>6</sup> nuku jaska waxuntan nun kai penun nuku nichinkin nuku xaxun ainitan janua jabu jatun jiwekidi chintunbainaibun

<sup>7</sup> janua Tiro anua kai mae betsa Tolemaida anu keti itan ja xaxuwen nun juai jenetan ikunwainbu nun jatu bechima benimakin nuku yukabu jatuki bayui janu uxashini <sup>8</sup> janua meshukidi Pablote bestenkaini ana kai Cesarea anu jikitán Jerusalén anuxun ja 7 medabewanikabu wakin jatu katunibu betsa jawen kena Felipen Diosun jancha jatu yuikubaunmistun jiwe anu jikitán jaki bai nun janu iyuken <sup>9</sup> jawen ainbu bake dabe inun dabe beneyadiabuman Diosun jancha jatu yuidiakubainaibun <sup>10</sup> janua xaba eskadabes kaya Judea mai pakea anua taxnikidani Diosun jancha jatu yuidiakubainmis jawen kena Agabo jua jikia <sup>11</sup> nuku uintanun ika juxun Pablón nanexeketi bitan jawen tae inun jawen meken ibubis menextan yuikin:

—Diosun Yushin Pepatun ea yuishina matu yuinun ninkakanwen. Na en akai keska wakin Jerusalén anuxun na nanexeketi ibu judiobun achixun neatan romanonawabu anu inanxankanikiki— nuku wa

<sup>12</sup> ninkatan Jerusalén anu jau ana jadi kayamanun nuku inun Cesarea anuabun nun nemakin bashibiakubaina <sup>13</sup> Pablón nuku kemakin:

—¿Jaskai ewen taea kaxakin man ea juinti nishmawakanai? Jesús ikunwankin en chibanmiswen taea Jerusalén anuxun ea achixun neax-anaibuwen en dateamaki. Jakia en Jesús dayaxunkunkainmiswen taea en jadia mawadiaxuntiduki— nuku wa

<sup>14</sup> jaska waxun jawen shinan betsa wamatima jau jaskadatanun nema jenetan yuikin:

—Nukun Xanen Ibun shinanen iwe— nun wa

<sup>15</sup> jabe kanun ixun nukun mabu pewatan Jerusalénkidi kakunkaini nun mapekeaya <sup>16</sup> Cesarea anua ikunwainbu jatidi nukube bushinxun juni betsa Chipre anua kaini jawen kena Mnasón ma badi ichapa Jesús ikunwan-pakemistun jiwe Jerusalén anu nun jabe iyunun nuku jadi iyukin

### *Pablo Santiagoki banikiaki, na janchadan*

<sup>17</sup> janua Jerusalén anu jikitán Mnasónen jiwe anu nuku iyuabu ikunwainbu nukuwen benimabidan nuku iabu <sup>18</sup> janu uxashini Jesús betsa Santiago nun jaki bai ka jabianudi dasibi mekenikabu nun jatuki nukua <sup>19</sup> jatube yuka itan janubi Pablón jatu jancha wakin jaska Diosun medabewakin dayamakin jamapai betsa tibi judiobuma anuxun Jesús jatu ikunwan-makubainai binumakubainshina jatuki chaniai <sup>20</sup> ninkabaikin januxun Dios kenwantan jabu betsan Pablo yuikin:

—Nukun betsaan, mia yuinun ninkawe. Nukunabu judiobu midimabun Jesús ma ikunwanbiakin jawen nemati inun jawen yunuti Moisin nukun

xenipabu yusini meke pewaxun jenekatsi ikama chibankemisbu <sup>21</sup> min akaikidi mia yuankin yuikin: “Nukunabu nawabube jiwea Pablón jatu yusinkin Moisin yusini jau ana chibanyamanun bun inun jatun bakesebu jau jatun jina kubichi ana mexteyamanun bun jatu yusinkin yunumiskiaki”, ibidan ibidanmisbuki, mikidi chani bexun yuikinan. <sup>22</sup> Natian min ma jua ninkatan yudabu miki sinatakin mia danantidubuki. Jaska mia uiainbun jawawen nun mia jaska watidumaki. <sup>23</sup> Min jaska wakin jatu daewanun mia yuinun ninkawe. Nukun betsabu 4 juni Diosbe yubakaima ma keyui kemai na jabia tsauabuki. <sup>24</sup> Jaskaken mia jatube kaxun Templo anu jatube pepakin Diosbe nukunabu janchaxunikabun nukun beya chibankin jau Dios ana matuki sinatayamanun Dios yubaimabu jatu pakaxuntan jabun bu jatu maxtemakin mankuamaxanwen. Min jatu jaska waxunken judiobun Jesús ikunwankin dasibibun uinkin Diosun jancha Moisin yusini kaneama min chibankmis inun jamenmens mikidi chani chakamisbu unanxankanikiki. <sup>25</sup> Jaska inun, judiobuman Jesús ikunwainbukidi jau nukun beya chibanya-manun bun nun ma jatu bebunkidi kenexunimaki, shinan besti watan eska wakinan: “Yushin dami betsá kenwankin nami inanmisbu piyamaxankanwen. Ja inun, jimi ayamaxankanwen. Ja inun, yuinaka tenexabu piyamaxankanwen. Ja inun, ainyankin jaska Moisin nuku nemakin kenexuni chibankankanwen, jau nukunabu bedabindabeyamanun bunan”, nun jatu waniki— aki Santiago jancha meneaya jawen jiwe anua kainkaini Mnasón jiwe anu nun ka

*Templo jemaintin anuxun Pablo tenanun, iwanan, achinibukiaki, na janchadan*

<sup>26</sup> janua uxashini bestenkain Pablón ja 4 junibu iyui jatube papanun, iwanan, Templo jemaintin anu kaxun jaska Diosbe jawenabu janchaxunikabube janchanamei pepatikidi jatube yubakaxu taewaibun janua ja 4 yubakaimabu jabu meneaitian ja 4 juni tibitun jawen inankuin betsá bet-sapa bui Diosbe jawenabu janchaxunikabu anu bestibu buxuanbu Pablón jatu banabima

<sup>27</sup> ma 7 xaba keyui kaya Templo jemaintin anu Pablo nikaunai Asia mai pakea anua judiobu beshinxun bechitan yudabu jatu itimaska wanun ixun pubenkain Pablo achitan <sup>28</sup> jancha kushipawen jatu yuikin:

—Israelbuun, nuku medabewai bekanwen. Na juninan, mae tibi anuxun yudabu jatu yusin chakakin nukukidi inun, Moisin yusinikidi inun, na nukun Templokidi jau shinan betsá wanun bun jatu yuikubaunmiski. Ja dikabi nukun Templo anu griegobu jatu iwexun nukun Templo medibi ma jatu atimapá wamaikiki— ikinan, <sup>29</sup> jaska yuidan, ja dukun Éfeso anua ju-diobuma griegonawa jawen kena Trófimobe Pablo Jerusalén bai tanabidanai uinshinxun ja juni Templo anu iyua dabanen madias shinankin kaneidan.

<sup>30</sup> Januxun yudan kaian itimaskai kushibidan Templo jemaintin kene medibi anua Pablo achitan xabakan kainmakin xadabainaibun Templo xui beputi mekenikabun jawaida bepuabun <sup>31</sup> jaska Jerusalén anuxun Pablo tenanun, iwanan, kusha kusha akin ma tenain buanaibu maewan jidabi itimaskaibun romano soldadobu xanen ibun jaskaibu banabimabu ninkatan <sup>32</sup> jawaida jawen soldadobu inun soldado xanen ibu bexmasbu jatu ichawatan jatube kushikain ja yudan kaian icha itimaskaibu anu maputushitan jatu uianbun Pablo kusha kusha akaibu jatu mepanmatushitan <sup>33</sup> januxun soldado xanen ibu Pabloki kematan jawen soldadobu yunua jaki nidi iki keyutan mane dispi chiwetameya dabewen menexkin junexaibun xanen ibun jatu yukakin:

—Nadan, ¿tsuamen? ¿Jawa matu chakabuwaimenkain?— jatu wa <sup>34</sup> jabun jawa unanmabia unanumas jancha betsapayuia akeakekin jawa tapinmakin pewabuma jawen soldadobu jatu yunukin:

—Janu nukun mishki jiwe kushipa anu iyukanwen— jatu wa iyuaibun <sup>35</sup> yudabu mesebainaibun Pablo soldadobun iaxun tapaitiwen mapemabainaibun <sup>36</sup> yudan kaian jaki sinatai jachun bukin jui kushipawen yuikubainkin:

—Tenankanwen! Tenankanwen!— ikubainaibun

### *Jawa chakabumakidi Pablonyuiniaki, na janchadan*

<sup>37</sup> januxun soldadobu janu mekei jiwenisbu mishki jiwe anu Pablo bichi buaibun griego janchawen Pablonyuiniaki romano xanen ibu yukakin:

—¿Eska en mibe janchatidumen?— aka

xanen ibun kemakin yuikin:

—¿Aa, min griegon janchayadaka? <sup>38</sup> Jaskakenan, miadan, egiptonawa betsaxanen ibukin nukun mae nuku mebinun ika jawen 4,000 junibu puben chachinanbu janu tsua jiweabumanu jatu iyutanimadan, min ja dabantenbin en ikai— aka

<sup>39</sup> Pablonyuiniaki kemakin:

—En jamaki. Eadan, en judiobin. Mai pakea betsacilicia anu mae kushipa Tarso anua en kainiki. Ea jaska wama ja yudabu en jancha wayuai ea jeneyuwe— aka

<sup>40</sup> xanen ibun janii:

—Iwe— akin jeneyuwa

mishki tapaiti kexaxanen jawen meken menexekedabea sanantan jatu nemakin pes wakin keyua mapuabun judion jancha hebreowen Pablonyuiniaki jatu yuikin:

## 22

<sup>1</sup> —En betsabu inun en epabuun, jaska en chakabuma ekidi matu yuinun ea ninkakanwen— jatu wa <sup>2</sup> jabun jancha hebreowen jatu yuia ninkai ana jawa banama ninkaibun Pablonyuiniaki jatu yuikin:

<sup>3</sup> —Eadan, en judiodiki. Mai pakea betsacilicia anu mae ewapa Tarso anua en kainbani na Jerusalén anu ea iwenixun na jabianuxun ea yume-wanibuki. Jaska Diosun jancha Moisin nukun xenipabu yusini Gamalielin ea yusin pejaidawakubainai tapinixun en Dios dayaxunkatsis ikunkainai, na jabiati man Dios dayaxunai keskadiaidan. <sup>4</sup> Uatianan, Dios dayaxunun, iwanan, tsuabunda Bai Bena Jesúskidi ikunwainbu jatu tenanun, iwanan, junibu inun ainbuaibu achixun bichiti jiwe anu jatu yuikin en jatu ichakajaida wakin en jatu nuitapa waniki. <sup>5</sup> En jatu jaska waya Damascokidiadi Jesúskidi ikunwainbu benabaunkin achitan nenu iwetan en jatu kupixanun ea kushipa wakin Diosbe nukunabu janchaxunika xanen ibujaida inun nukun mekenikabun Damasco anu xanen ibubukidi ea kenexun ea inantan jadi ea nichinibuki. Na jabiabu Diosbe nukunabu janchaxunika xanen ibujaida inun nukun mekenikabun ea yununibun en jaska akubaini unankin matu yuitidubuki.

<sup>6</sup> Janua ea kushipa wakin kene ea inanbu bui jaya kai Damasco bai tanabaini ma en kemaya badi manananbi nai anua bin chaxa kushipajaida pexekidan ea dachaxaya <sup>7</sup> en main di ika dakaxun ninkaya jui taxnikin ea yuikin: “Sauloon, Sauloon, ¿jaskakin min ea ichakawakubainai?” ea wa <sup>8</sup> eandi yukakin: “Xanen ibuun, ¿min tsua iki ikai?” en wa januxun ea ana yuikin: “Jabia ea ikunwainbu min jatu ichakawakubainaidan, en Jesúskidi Nazaret anuaki”, ea waya <sup>9</sup> ja junibu ebe bukin bin chaxai uinbiai

jawen jancha ninkabumaken <sup>10</sup> eandi yukakin: “Xanen Ibuun, ¿jaskapa?” en aka en Xanen Ibun ea yuikin: “Benikaini kai Damasco anu kaditanwen, jadixun min jaskakunkainxanai tsuanda mia yuixanikikidan”, ea akaya <sup>11</sup> ja bin chaxapan ea bedu nuka wakin ea meshu bepue en ma bepexebia en uianmaken en jaibuaibun metsunxun Damasco anu ea iyunibuki.

<sup>12</sup> Janu en jikishinken juni betsaa jawen kena Ananíasin Moisin jancha pe chibamis judio betsabun janu jiwexun kenwanmisbu <sup>13</sup> Ananíasin ea medabewatanun ika jua ea dapi nixun yuikin: “Sauloon, Jesús ikunwain ma min nukun betsaki. Ana min beduwen uin bena wadiwe”, ea waya samama en bedu kayatiwatan en ja uiyanan <sup>14</sup> ana ea yuikin: “Ja nukun Dios nukun xenipabun kenwanpaunibu jabiatundi mia katunixun mia unankin jau jawen shinanwen jawen bake pepa Jesús min uinun jawen juiwen mia jancha washinaki. <sup>15</sup> Jaskawen taexun mianan, jawada uinkin min ninkashina yudabu mai jidabi anu jiweabu min jatuki chanikunkainxanaii”, iwanan, <sup>16</sup> “Jaskakenan, ana jatixunda manama min Dioskidi chakabukunkainmis jau mia buaxunun Jesúsun kenawen taexun en mia nashimai kanun benidiwe”, ea waniki.

<sup>17</sup> Janua Jerusalén anu en ana chintunkidanshina Diosbe janchanun ika Templo jemaintin anu ka en jabe janchai nia namai keskakin <sup>18</sup> Jesús en uiyanan ea yuikin: “Nenuxun min ekidi jatu yusianyan mia ninkama ixankanikiki. Jaskaken menan jawaida Jerusalén anua taxnidikaintanwen”, ea wa <sup>19</sup> ean yuikin: “Xanen Ibuun, janu ichamisbu jiwe tibi anuxun mia ikunwainbu achixun bichiti jiwe anu jatu bichimaxun jatu kupikin en jatu kusha kusha amakubainshina dasibitun ea unankanikiki. <sup>20</sup> Ja inun, min jancha yuixunika Esteban mankanwen tsaka tsaka akaibu uinkin jabun akai keska shinankin jatun tadi en jatu mekexunshinaki”, en wa <sup>21</sup> en Xanen Ibun ea nemakin: “Chaijaida yudabu betsaa betsapa judiobuma anu en mia yunuaii. Jadi kaditanxanwen!” ea waniki— jatu wai

### *Pablo romano documentoya jatu unanmanikiaki, na janchadan*

<sup>22</sup> ja judiobu ichabun jatixun besti Pablón jancha ninkaxuntan ana judiobumakidi ninkakatsi ikama jakidi sinatakin unanxubima yuikin:

—Ja junidan, nun ana jiwea uinkatsi ikamaki! Tenankin yamawadikanwen!— iki

<sup>23</sup> jeneama keketikubainkin jaki sinatai naxuku paepakin jatun

peyabukumisbu tadi pekatan mai bekush bekush akin kudu sa sa akaibun <sup>24</sup> jaskadawen taea dasibibu jaki sinataibu unankatsis ikin romano xanen ibu comandanten soldadobu yunuokin:

—Nukun meketi jiwe uke medan mistuyukanwen. Jadixun jaskai jaki sinatai biski ikanimenkain jau nuku yuinun bichi kushatiwen kusha kusha akin chanimakanwen— jatu wa <sup>25</sup> bichixun jawen nea pekatan januxun kushakatsi pewaibun janua xanen ibu bexmas capitán ja dapi nia Pablón yukakin:

—Romano juni documentoyabiakenan, ¿unanti wadiama man kusha kusha atidumen? ¿Ja dikabi jawa chakabu washina unanmadi man adiatidumen? ¿Jaska man yunuai? Eadan, en matun documentoyakidan— aka

<sup>26</sup> jaska wa capitánen ninkabain jawen xanen ibu comandante anu ka jaki chanikin yuikin:

—Ja junidan, romano documentoyakiaki. Chanimamenkain, yukatanwen— aka

<sup>27</sup> xanen ibu comandante kaxun Pablo yukakin:

—¿Chaima min romano documento jayamen? Ea yuidiwe— aka

Pablón kemakin:

—Jawaikika! En jayabin!— aka

<sup>28</sup> januxun xanen ibu comandanten Pablo yuikin:

—Ena bikinan, pei ichapawen pakatan en biniki— aka

Pablón ana yuikin:

—Enadan, jaskamaki. Romano en kaian jawa pakama en documento ea inanibuki— ikai

<sup>29</sup> ninkatan datei kushatiyabun jenebainaibun jatu neamaxunwen taea romano xanen ibu comandante datebetanan Pablo jawa wama duawakin jau pe mekenunbun jawen soldadobu yunubaina

*Junta Suprema judío xanen ibubuki Pablo chaninikiaki, na janchadan*

<sup>30</sup> janua xanen ibu comandanten uxashini penaya jaskaya Pablo chiteshinabumenkain, iwanan, tapinjaidakatsis ikin mane dispi chiwetameyawen nexashinabu comandanten jawen soldado jatu pekamatán Diosbe jawenabu janchaxunika xanen ibubu inun Junta Suprema dasibi jatu ichawatan Pablo kainmabain jatu anu iyuxun jatun besuudi nichian

## 23

<sup>1</sup> Junta Suprema ichabu dasibi xabakabi beiskin Pablón jatu yuikin:

—En betsabuun, matu yuinun ninkakanwen. En jawa Dioski chakabu nima natian Dioski dateama unanuma en jiweaki, Diosun ea unanyanan— jatu waya

<sup>2</sup> ja dapi niabun jau betsan kepais atanun Diosbe jawenabu janchaxunika xanen ibujaida Ananásin jatu yunua betsan kepais aka <sup>3</sup> sinatakin Pablón kemakin:

—Bemakis min bepadamebiaya min uinti chakabu unantan Diosun mia kupikin mia kepais adiaxanikiki. Min jadi tsauxun Diosun jancha kenenibuwen ea unanti wabiakin jau ea kepais anunbun jatu yunui na jabia Diosun jancha min kaneaii— aka

<sup>4</sup> ja dapi mapuabun jawaida nemakin yuikin:

—Diosbe nukunabu janchaxunika xanen ibujaidaki dateama min jaki sinataii— akabu

<sup>5</sup> Pablón yuikin:

—En betsabuun, Diosbe nukunabu janchaxunika xanen ibujaidama dabanen en unanma ikaii. “Matunabu xanen ibukidi jancha chakabutimaki”, ibianiken en kanexuki— itan

<sup>6</sup> xanen ibubu ichabu Junta Suprema anu jatidi saduceobu inun jatidi fariseobu Pablón unankin jui kushipawen jatu yuikin:

—En betsabuun, eadan, en fariseoki. En epa inun en xenipabu fariseobu idianibuki. Mawa ana jiwxanaibu ikunwankin en manaya ea unanti wakin man daka ea danain ikai— jatu wa

<sup>7-8</sup> “Mawa ana besteanbuma ixanai inun Diosun nai tsuma inun yushin jayamaki”, ikin saduceobun yuimisbun janua fariseobu jaskama: “Mawabu ana bestenxanai inun Diosun nai tsuma inun yushin jayaki”, akin yuimisbukén Pablón ja jamebi jaskakidi jatu jancha wai ninkatan fariseobu inun saduceobu ja iki janubi kemanamei ja ichabu anua paxkaibun <sup>9</sup> jaskaibun unanxubima dasibibun yui kemanamei keketikubaunaibun janua Diosun jancha kenéniyu yusinanamisbu fariseobu betsa benitan fariseobu janchaxunun, iwanan, jatu yuikin:

—Na juninan, jawa chakabuwamaki. Yushin kasmái nai tsuma jabe janchai daki ishianki— jatu waibun

<sup>10</sup> pubenjaidai kemanamei jancha bedukuaibuwen taexun Pablo yaushikin ninia akeakekin paxka paxka akana ika datekin romano soldado comandanten jau i benunbun jawen soldadobu yunua ichabu anua Pablo iyuxun jawen meketi jiwe kushipa anu soldadobun ana bichiabun

<sup>11</sup> uxashini ana meshu betsation Pablo anu nukun Xanen Ibu juxun yuikin:  
—Pabloon, dateama benimawe. Na Jerusalén anuxun ekidi ikunwankin min jatu yuishina keskadi wakin Roma anuxun jabiaskadi ekidi jatu yuiditanxanwen— awani kaken

### *Pablo tenankatsi yubakanibukiaki, na janchadan*

<sup>12-13</sup> janua penaya judiobu ichapajaida 40 binua icha Pablo tenankatsi yubakai yuinamei:

—Pablo tenanun ika tenandiama ana nun jawa piama inun nun jawa nuxuama ixanaii. Jakia adiama jawada nun piken Diosun jau nuku kupix-anunwen— iki jaskakidi shinain janchabaini <sup>14</sup> buxun Diosbe jawenabu janchaxunika xanen ibubu inun xanen ibu bexmasbu anu buxun betsan jatu yuikin:

—Nukubunan, Pablo tenanun ika nun jakidi yubakaxuki. Adiama ana nun jawa pitiduma inun nun jawa nuxutiduma nun yubakaxuki. Jakia ten-andiama jawada nun piken Diosun jau nuku kupixanunwen, iki 40 junibu binua jaskakidi shinain nun janchakanxuki. <sup>15</sup> Jaskaken dasibibun man ana unanti pejaida wakin Pablo jau ana iwenunbun bepadantan romano soldado xanen ibu comandante yukakanwen. Januxun iweaibun janu man ichamisbu anu jikidiama nun tenanxanaii— iwanan —Nun yubakakanxu nun ma peki— ikaibu <sup>16</sup> Pablon puin juni baken jaskaibu ninkabaini jawaida kain soldadobun meketi jiwe anu kaxun jaska yubakakanxu Pablo yuia <sup>17</sup> romano soldado xanen ibu bexmas capitán betska kenaxun Pablon yuikin:

—Min xanen ibu comandante jau jawada ninkaxukidi banabimanun na bedunan iyutanwen— aka

<sup>18</sup> janua jawen xanen ibu comandante anu capitánen bedunan iyuxun yuikin:

—Jawa daki jau mia yuinun na bedunan mianu en iwenun ja Pablo nun bichishinatun ea yunuxuki— aka

<sup>19</sup> romano comandanten metsunxun tadi bedunan ja besti iyuxun yukakin:

—¿Jawa min ea yuinun ika ikai?— aka

<sup>20</sup> bedunantun yuikin:

—Pablo ana yukanun, iwanan, mia bepadantan meshukidi jabu Junta Suprema anu min Pablo jatu iyuxunxanun mia yukai bekatsi ma xanen ibubu yubakakanxuki. <sup>21</sup> Jakia 40 junibu binuatun Pablo tenankatsi yubakakanxun junexun manakanikiaki. Tenandiama ana jawa piama inun jawa nuxuama iyukanikiaki. Tenandiama jawada piaibun Diosun jatu kupixanikiaki. Jaskakanxu mian besti: “Peki”, min jatu wanun mia yukai bekanikiaki. Jatun jancha ikunwanyamaxanwen— aka

<sup>22</sup> comandanten ninkatan bedunan yuikin:

—Jaska min ea yuixu tsua kakawayamatianwen— axun nichian bedunan kaya

### *Jatun xanen ibu Félix anu Pablo yununikiaki, na janchadan*

<sup>23</sup> januxun romano comandanten jawen capitán dabe jatu kena beabu yunukin:

—200 soldadobu main buaibu inun, 70 caballoki katsaumea buaibu inun, janua 200di jatun jashia buaibu ichawakin jatu pewakanwen. Meshu medan

9:00 badiken Cesarea anu nichintankanwen,<sup>24</sup> nukun xanen ibu Félix anu iyukanan. Medibi caballo betsaki katsaunxun Pablo jawama meke pewaxun piskumatankanwen— jatu wa kakatsi soldadobun pewaibun<sup>25</sup> jau keneyabi butanunbun comandanten kenexunkin:

<sup>26</sup> “En ea comandante Claudio Lisiasin min en xanen ibu pepajaida Félix, en mia jancha bumai uindaxanwen.<sup>27</sup> Ja juni jawen kena Pablo jaki sinatakin judiobun achipakebaun tenanpananbun romano documento jayaken tapintan jatu nemanun ika en soldadobube kaxun en jatu mepanmashinaki.<sup>28</sup> Januxun jaskai jaki sinatakin ja akani-menkain tapinun ixun dasibi judio xanen ibubu Junta Suprema ichabu anu iyuxun<sup>29</sup> jatun xenipabun yusini Pablón betsawamis jaki sinatakin chitekin kunyan akaibu en ninkashinaki. Jakia jawa chakabu jayamawen taexun jaska ja juni tenantima inun jaska bichiti jiwe medan bichitimaken en jatu nemashinaki.<sup>30</sup> Jakia tenanun ika jaki yubakaibu ninkatan ja juni jawaida mia anu en yunua iyukanikiki. Mian mekeyuwe. Jabu jaki sinataibu judiobu buxun jau jadixun chitenunbun mia anu en jatu yunudiaxanaii, jau jabun chiteai miandi min ninkaxanunan. En xanen ibu pepajaida Félix, jatiski, en janchadan”,

axun jatu bumaya

<sup>31</sup> jaska wakin soldadobu yunua meshu medan Pablo iyushinkin mae betsawamis kena Antípatris anu bichiabun<sup>32</sup> jadia jatuki pena soldadobu meshukidi main beshianbu ana Jerusalén anu chintunbidanaibun jatidi soldadobu caballowen bushianbun Pablo jabun iyukubaini<sup>33</sup> Cesarea anu jikitán Félix anu iyuxun kene inankin Pablo yunuabu<sup>34</sup> kene uinxun Félixin Pablo yukakin:

—¿Min janiamen?— aka

Pablón yuikin:

—Cilicia anua en kainiki— ikai<sup>35</sup> ninkatan Félixin yuikin:

—Min jaskaya jabun mia chiteshina beabitian jatubetan en mia ninkaxanaii— atan jawa wama Herodesin jiwe itamama anuxun jau Pablo mekeyunbun jatu yunushinken

## 24

### *Jawa chakabuwama ishiankidi Pablón Félix yuinikiaki, na janchadan*

<sup>1</sup> janua ma 5 día binukainaya Diosbe jawenabu janchaxunika xanen ibujaida jawen kena Ananías maewan Cesarea anu kakin judio mekenika betsabu inun juni unanepa pe jatu janchaxunika jawen kena Tértulo Jerusalén anua jatube kai jikitán Pablo chitenun ika xanen ibu Félixin besudi ichabun<sup>2</sup> Pablo iweabu Tértulon jakidi chitekin taewakin xanen ibu Félix yuikin:

—Nukun xanen ibuun, min pejaidaki. Dasibi pewai duapai unanepai min xanen ibuaya miwen taea unanuma nukun mai pakea anu nun pe jiwekunkainmiski.<sup>3</sup> Min nuku jaska waiwen taea shinan chankankin enabun mia kenwankubaunmisbuki, min nukun xanen ibu duapajaidadan. Ean en mia jabiaskadi waii, Félix. <sup>4</sup> Jatixunda jancha chakayamakin mia bikawama eskadabes en mia yuiái ea ninkayuwe.<sup>5</sup> Na juni Pablo-dan, chanimajaida jakidi pemajaida nun uiáiin. Jesús Nazaret anuatuun yusian chibainbu jatu bebunxunkin mai jidabi anua judiobu manibaunabu bikawakin jatu yusin chakakin paxkakin jatu itimaska wakubainmiskiaki.

<sup>6</sup> Jaska besti wama nukun Temploki meseama nuku chakabuwanshinaki.

Jaska waya nukunabun achiabu nukun xenipabun beya chibankin unanti watan nun kupipanan <sup>7</sup> soldado comandante Lisias jawen soldadobube kaxun jawen kushipawen taexun nuku mebinshinxun <sup>8</sup> nenu mia anuxun nun chitenun nuku yunushinaki. Januxun min mian Pablo yukaxun jaska en mia yuixu chanimamenkain min unantiduki— akaya

<sup>9</sup> ninkatan ja judio xanen ibubu jatube ichabun Tértulon jancha bechipaikin Félix yuikin:

—Chanima jabiaskaki— akaibun <sup>10</sup> januxun jau Pablondi jatu jancha wanun xanen ibu Félixin yunukin tewexuna januxun Pablón xanen ibu Félix yuikin:

—Badi ichapa xanen ibukin enabu min pe jatu mekekubainmis unain benimakin jaska en jawa chakabuwaisma jamen ea chitealbu jatun jancha nemakin en mia tapinmai ninkawe. <sup>11</sup> Dios kenwantanun ika ma 12 día Jerusalén anu en jikishinaki, jaska chanima mia yuka ikin min unantiduki. <sup>12</sup> Januxun Templo anua inun janu ichati jiwe anua inun janida janchai nixun yudabu en jatu itimakawai tsua en jaska wai ea jawa ninkabuma ishianbuki. <sup>13</sup> Jaskawen taexun ja junibun mia jaskakidi yuiaibuwen taexun jatun jancha kayabi jawa jayamaki. <sup>14</sup> Jakia jaskakidi ekidi mia yuiaibudan, xabakabi mia yuinun ninkawe. Jesúsun Bai Bena nun chibanyan: “Dioskidi kanekanikiki”, iwanan, nuku aki ikanikiki, jaskamabiakenan. Jesú ikunwankin nukun xenipabun Dios kenwanpauni en duawapakemiski, Moisin yusini inun Diosun jancha yuixunika betsabundi kenenibu dasibidi ikunwankinan. <sup>15</sup> Jaska wakin yuda pepabu inun chakabubu kupikatsi Diosun jatu ana bestenwanxanai ikunwankin en manaii. Jabiaskadi na judiobu nukube ichabun jabiaskadi manadiakanikiki. <sup>16</sup> Jaskawen taexun Dioski inun junibuki en shinan chakaismaki, jaskai jiwei pepanun ixunan.

<sup>17</sup> Jaska inun, betsadan, badi ichapa mai jidabi mae tibi kakunkauntani enabu inankuin jatu bexuin inun Dios kenwankin chaxuwan jatu kuanmatanun ika en ana chintunkidanshinaki. <sup>18</sup> Januxun nukukidi Dios pepa shinanmatan Templo jemaintin anuxun chaxuwan en inankuiyanan eki jawa juni ichabuma inun tsua itimaskabumaken Asia anua judio betsabu eki nukuxun ea jabun itimaska wakin taewashinabuki. <sup>19</sup> Ea jabun jaska washinabu ja Asia anuabu jabu betidubuki, mia be bun xabakabi nixun ea chiteidan, en jaskashinken eki sinatai ishianbumenkainan. <sup>20</sup> Beabumaken nukun xanen ibubu Junta Suprema ichaxun ea unanti wakin jawada en chakabuwamis ea tapinshinxun na xanen ibubun mia jaska yuikeankanaii. <sup>21</sup> Jakia Junta Suprema xanen ibun jatun besuudi nixun jancha kushipawen jatu yuikin: “Mawabu ana bestenxanaibu en ikunwainwen taexun natian man ea unanti waii”, akin Jerusalén anuxun en jatu yuishinawen taea eki sinatai ikanimenkain. Jatu yukawe— aka

<sup>22</sup> Jesúsun Bai Benakidi unanjaidakin Pablón yuiai ninkatan judiobu manamakin Félixin jatu yuikin:

—Jatiada comandante Lisias Jerusalén anua juaya en ana matu unantijaidawaxunxanai, matunaki. Manayukanwen— jatu waya

<sup>23</sup> janua jawen jaibuaibun Pablo duawakin jau pimayuxanunbun jawa jatu nemama jau Pablo jawa wama mekeyununbun romano capitán jatu yunushinxun

<sup>24</sup> januxun xaba betsaki chipu jawen ain judio ainbu jawen kena Drusila iyui Félixin ana Pablo ninkakatsi jatu kenama Pablo iweabu Jesucristo ikunwainkidi jatu yuikin <sup>25</sup> jiwea pepatikidi inun ibubis pe meketikidi inun dasibi

chakabu Diosun kupixanaikidi Pablon jatu jancha wakin yusiain ninkai datekin Félixin nichinkin yuikin:

—Kayaue, shinanxun ana en daya jayamatian ana mia ninkakatsis ikin en mia ana kenaxanaidan— atan <sup>26</sup> Felixin Pablokidi shinan betsa waidan: “En jawa wama nichinxanun pei ichapa jau ea inanxanunwen”, ikin Félixin Pablo jawenchains kenai jabe janchabiakunkainkin <sup>27</sup> jawen jancha ninkabiakin judio xanen ibubu daewakatsis ikin Pablo jawa nichianma ma badi dabe ka janua Félix jawen daya menetan kainkainaya Roma anua xanen ibu betsa jawen kena Porcio Festo Cesarea anu xanen ibui taeniki.

## 25

### *Jawa chakabuwama iyamakidi Pablon Festo yuinikiaki, na janchadan*

<sup>1</sup> Janua xanen ibui Cesarea anu Festo jikishinxun xaba dabe inun besti ma binuaya Jerusalénkidi baii kayushinken <sup>2</sup> jadixun Diosbe jawenabu jan-chaxunika xanen ibubu inun judio xanen ibu betsabu yubakabain Festo anu buxun Pablo chakabuwakatsi padankin:

<sup>3</sup> —Jaskai min ma nenuki. Nuku pewaxunkin Pablo miandi min nuku unanti waxunkatsi ¿nenu Jerusalén anu jau itanunbun min jatu yunutidu-men?— akabu, jaskadan, eska Pablokidi yubakabain bai tanabidanai nun tenanunbun ika inibukiaki. <sup>4</sup> Jakia Feston jatu nemakin yuikin:

—Cesarea anuxun Pablo ma pe mekexun uinkanikiki. Jaskaken uxa eskadabestan en ana chintunkainaya <sup>5</sup> man jaska ea yuiaidan, matun xanen ibubu Cesarea anu ebe buxun ja junin jawada chakabuwayama chitekin unantidubuki— jatu washina

<sup>6</sup> Jerusalén anuxun 8 día kasmai 10 día daki nichintan Cesarea anu ana chintunkaini jikishina janua meshukidi januxun xanen ibui tsauxun unanti wamisbu anu jadi Festo tsautan jau Pablo itanunbun jatu yunua <sup>7</sup> iweabu Jerusalén anua beshian judio xanen ibubun kebaunxun jawen yusian betsa betsapakidi Pablo chitebiakin jawen jaska watima kayakidi Festo yuiaibun <sup>8</sup> januxun jantsedi Pablon jawa chakabuwama ikimakidi unanmakin Festo yuikin:

—En jawa chakabu jayamatian ena mia yuinun ninkawe. Diosun nukun xenipabu yusini chibankin en kaneama inun Jerusalén anuxun Templo en jawa chakabuwama inun romano xanen ibujaida Césarki en jawa jakidi chakabu yuismadiki— ikaya

<sup>9</sup> janua judio xanen ibubun jau Festokidi pe shinanunbun, iwanan, Pablo yukakin:

—¿Jerusalén anudan, min kakatsis ikai, jadixun min jaskayama jau en mia unanti waxanunan?— aka

<sup>10</sup> Pablon kemakin:

—Jaskamaki. Juni betsa tibi mian min unanti wanun romano xanen ibujaida Césarn min jabiaska watanun mia yunuimaki. Jaskaken na jabiatian min ea unanti watiduki. Jaskaken enabu judiobu en jawa chakabuwama iyama en mia tapinmaxuki. <sup>11</sup> En jawada chakabuwayamawen taexun jau ea tenanunbun en jatu jawa nemama ikeanaii. Jakia mia padainbun jau ea tenanunbun min xanen ibun jancha kanekin min ea jatu yunutidumaki. Jaskawen taexun maiwan kesua xanen ibujaida Césarn jau ea unanti waxanun Roma anu ea yunuxanwen— aka

<sup>12</sup> januxun unanepa medabenabube Festo janchatan Pablo yuikin:

—Peki. Césarn jau mia unanti waxanun min ea yukaxuki. Jadi en mia yunuxanaii— ashian jiweyuken

*Pablokidi Feston Agripa yuinikiaki, na janchadan*

<sup>13</sup> chipu xaba eskadabes kaken romanobube xanen ibumis judion xanen ibu Agripa jawen pui Berenicebe Cesarea anu xanen ibu bena Festo uinkin jancha wakin benimawanun ika jaki bai bushian <sup>14</sup> jabe jiweyuabun Feston Pablokidi Agripa jadi banabimakin:

—Nenu juni betsa mekexun Félixin eki jenebainshinaki. Mia yuinun ninkawe. <sup>15</sup> Nenua Jerusalén anu en ka Diosbe jawenabu janchaxu-nika xanen ibubu inun jabun mekenikabun chakabu jakidi yuitan ja en kupinun jaki sinatakin ea yunuabu <sup>16</sup> jakia ean jatu kemakin: “Nun romanobunan, nukun yunua kushipawenan, e iskaun detenunbun nun jaska beyamaki. Jakia jau detenunbun yunukanan, ja jaki kayai jadatuda chakabu ja dabe unanti wadabetan nun jatu nematiduki, ja ikaibudan”, akin en jatu washina <sup>17</sup> en jatu jaska wabidana ea chibanbidanshinabu manakatsi ikama meshukidi januxun nun jatu unanti wamis anu tsauxun ja juni en jatu yunua iweabu <sup>18</sup> jabu beshianbu benixun jaska jakidi kayakin jawa jatun chakabu tibi waima jaskakidi chiteaibu dabanan jaska en shinainkidi jawa yuiabuma <sup>19</sup> jakia jaska judiobun jiwea beya kenwanmisbu jatu maewamai inun juni betsa Jesús mawabiani ana jiweaki, akin Pablon jatu yuimis besti jakidi chiteaibu en ninkaimaki. <sup>20</sup> Jaska jakidi yuiabun jawawen en jaska watima ea unantimaska kaya wabu shinantan Pablo yukakin: “Jerusalén anuxun ana jadixun jatubetan en mia unanti wai kaxanun ¿jadi min kakatsis ikai?” en wa <sup>21</sup> januxun jatun ea akin: “Jamaki. Xanen ibujaida César jau ea unanti waxanun Roma anu ea yunuxanwen”, ishinken jadi ea yukashinanu yunukatsi jau bichixun meke bestiyununbun en jatu yunushinaki— aka

<sup>22</sup> januxun Agripan Festo yuikin:

—Ja junidan, eandi en ninkakatsis ikai— aka

Feston kemakin:

—Peki. Meshukidi mintsidi min ninkatiduki— aka

<sup>23</sup> janua uxashini meshukidi jatun tadi pepa sawea jawenduabidanaibu jatu kenwanbidankin tepe dewe mawabainaibun xanen ibu Agripa jawen pui Berenicebe inun romano soldado xanen ibubu inun Cesarea anua xanen ibu bexmasbu januxun unanti wamis dintu anu jikibaina maniabun Feston jatu yunua Pablo iweabun <sup>24</sup> januxun Feston jatu yuikin:

—Xanen ibu Agripa inun nukube ichabuun, na junikidi matu yuinun ninkakanwen. Jerusalén anuxun inun nenuxundi judio ichapabun jakidi chakabu kayakin ea tenanmanun ika biski ikubainshinabuki. <sup>25</sup> Jakia jaska jakidi yuibiaibun ean en ninkashinadan, jaskawen dabanan en tenantiduma shinantan en jaskada wayupanan jamebi ea yukakin: “Jau matun xanen ibu kaya César Roma anuxun jau ea unanti waxanun ea jadi yunuwe”, ea washina jadi yunukatsi en shinanshina en yunuxanaii. <sup>26</sup> Jakia jawada chakabuwayamakidi tapin pewamabia xanen ibujaida César anu ja junikidi en jawa kenexun bumatima en shinaiin. Jaskawen taexun jawa chakabuwayamamenkain, Agripan, natian min besuudi en nichianki, jau miandi min ea unanti waxununan, jaskakidi kenetan en bumakatsis ikaidan. <sup>27</sup> Jamen jawa jawen chakabukidi unanma en yunua: “Jabitiduma benibin!” ixun ekidi shinantiduki— akaya

## 26

*Pablon ikunwainbu ichakawabiaya Jesúsun katunikidi Agripayui chaniniki-aki, na janchadan*

<sup>1</sup> januxun Agripan Pablo yuikin:

—Jani min jawa chakabuismakidi nuku yuiwe— aka

—Peki— iwanan, jatu meken sananxuntan Pablón jatu yuikin:

<sup>2</sup> —Xanen ibujaida Agripaan, jaska ekidi kayaibukidi mia be bun nixun en jaskakunkainmis en mia jancha wainwen taea en benimaii, na jaska judio xanen ibubu ekidi chakabu chani chakakin eki kayaibudan. En jaska jayamaki. <sup>3</sup> Mianan, dasibi judiobun beya unankin jaska betsa betsapa shinain nun ja idabemis min unanjaidaiwen taexun chanima en jancha min ninkatiduki. En jancha tenexun ea ninkayuwe.

<sup>4</sup> Dasibi judiobun ea unan keyukanikiki, en jatube jiwekunkaunidan, en mae anuabu inun janua en yumeni Jerusalén anuabunan. <sup>5</sup> Ja dikabi en bedunantun Moisin nukun xenipabu yusini jabuns shinan paxkama chibanjaidakin nun mekejaidamis en fariseo ikunkaini ea uinkubainixun mia yuitidubumenkain. Jakia ekidi shinain janchatidubumamenkain.

<sup>6</sup> Jaskawen taexun en jaskadaken daki ea unanti watan kupikatsi jaska nukun xenipabu Diosun yubani ikunwankin en manai ea aki ikanikiki. Januxun mawabu ana jatu bestenwain kai Diosun nukun xenipabu yubani en ikunwainwen taexun ea kupikatsis ikanikiki. <sup>7</sup> Israelin bakebu 12 xukuabu tibitun jaska uinkatsi manakin badidi inun meshu medan Dios kenwankin duawakubainmisbu keska wakin jaska manakabu keskadi eandi en ikunwainwen taexun jaska bestiwen taexun jabun ea chitei kyanamei ikanikiki— iwanan, ichabudi uinbaunkin ana jatu yuikin:

<sup>8</sup> —¿Jaskakin man ikunwanbumamen, matubunan, mawabu Diosun ana jatu bestenwanxanaidan?— iwanan <sup>9</sup> —Eanan, chanima jaskakidi shinan pewadiaman, en jatu ayuniki, jatu yamawakatsis ikinan, Jesús Nazaret anua ikunwainbuki sinataidan. <sup>10</sup> Na jaska akinan, Jerusalén anuxun en aniki, Diosbe nukunabu janchaxunika xanen ibubun jatu kushipawen ea yunuabudan. Jesús ikunwainbu ichapa achixun bichiti jiwe medan en jatu mistukubainiki. Januxun jatu tenairnbun ean jatu nemama jabiaskadi shi-nankin pesxun en jatu uins bestikubainiki. <sup>11</sup> Jatu jaska wakinan, jawa betsa tukama janu ichamisbu jiwe tibi anuxun Jesús ikunwainbu jau jenenunbun jatu ichakawa chakayamakin bextejaidakatsis iki en jatuki bene bene ikin jawa jatu jenekatsi ikama judiobuman mae anudi paxaibu jabiadia jatuki sinatajaidakin jatu achinun, iwanan, en jatu kachibankubainiki.

<sup>12</sup> Diosbe nukunabu janchaxunika xanen ibubun jaska nun akai keska nun anun ea jatun kushipaya wakin yunuabu Damasco bai tanabaini ma en kemaya <sup>13</sup> bai puchinin ma badi manananbibiaken kakin en uiyanan naiudia bin kushipajaida badi binuatun ea inun en jaibuaibu nuku dachaxaya <sup>14</sup> janua dasibi main nun di ikaya nukunabun jancha hebreowen tsuanda ea yuikin: “Sauloon, Sauloon, ¿jaskakin min ea ichakawakubainai? Mimebi min chakabuiaii, tsuki ikama ibubis muxaki iki ikasidan”, ea wa <sup>15</sup> eandi yukakin: “Xanen ibuun, ¿min tsua iki ikai?” en wa januxun ea yuikin: “Jabia ea ikunwainbu min jatu ichakawakubainaidan, en Jesúski. <sup>16</sup> Benidiwe, en mia anu juxukidan. Mia katutan jaska min ekidi dayakunkaini chanikunkainx-anun en mia uinmaxu inun chipu betsa en mia uinmaxanaidan. <sup>17</sup> Ena mia watan judiobu anu inun judiobuma anu janu en mia yunuai anu min ka en mia mekepakexanaii, mia chakabuwatidubumadan. <sup>18</sup> Jabu anu en mia ynuua kaxun jatu shinan betsa wamakin jau unainsmapakin Satanás ana chibanyamanunbun en Epa Diosun jancha min jatu yusinkubaunun judiobuma betsa betsapabu anu en mia ynuuaii. Jadixun jatu bedu bepexa keska watan ana meshu medan kama keska jakia binwen kai keskaibu min jatu waya jatiditun ea ikunwainbun jatun chakabu en jatu buaxunaya

Diosun jatu jiwekuinmaxanikiki, jawa jatu kupiamadan, jawenabu medibi wakinan”, ea waniki.

<sup>19</sup> Xanen ibujaida Agripaan, jaska nun uinsma nai anua namai keska en uinshina chibankixun en chibankubainmiski, shinan betsa wamadan. <sup>20</sup> Jadixun Damasco anuxun dukun kakape jatu yusin taewatan chipu Jerusalén anuxun yusindiatan Judea mai pakea jidabi anuabu judiobu inun judiobuma en jatu yusinkin: “Shinan betsa wakanwen”, en jatu wa tsuanda shinan betsa watan Diosun bake ikunwankin jatunmebi jatun jiwea bena jayakin uinkubainimabuki, en jatu unanmakubainadan. <sup>21</sup> En jatu jaska wamiswen taexun Templo anuxun judiobun ea achixun ea tenanun ika iyamabuki. <sup>22</sup> Jaskaken Diosun ea medabewaya jawa shinan betsa wama xanen ibubu inun xanen ibuma jatuki chani Moisés inun Diosun jancha yuix-unika betsabun jaska bebunkidi kenenibu ixanai <sup>23</sup> yuikin: “Mesíasdan, nuditapatan mawai kaikiki. Janua ja dukun mawa bestenkaina ja dukun nuku bebunxuni kaikiki. Jaskashinxun nun judiobu inun judiobuma jawen paxati bai xaba kayabi ibubis Mesías chani kaikiki”, inibu jabiaskadi jaskakidi en jatu yusinkubainmiski— akaya

### *Xanen ibujaida Agripa Pablón Jesús ikunwanmakeanikiaki, na janchadan*

<sup>24</sup> Pablón jaska jawen jiweakidi yuiai ninkai romano xanen ibu Festo e itan unanxubima yuikin:

—Pabloon, min patapaki. Kene ichapa unain min unainsmapakunkainai— aka

<sup>25</sup> Pablón kemakin:

—Xanen ibu pepajaida Festoon, en unainsmapakidi janchamaki. Chanima xabakabi jancha kayabi besti en matu yuiaii. <sup>26</sup> Jaskadan, ja xanen ibu Agripán Diosun jancha unainwen taexun dateama jaskakidi janchakin en yui ikaii. Jaska ean en jakidi shinanan, unan keyudiaikiki. Chanima Jesús jawa juneama jabiaskadiai jiwekunkainiki— iwanan, <sup>27</sup> Agripakidi besuxun yuikin: —Xanen ibu Agripaan, ¿Diosun jancha yuixunikabun kenenijaskakidi en mia yuaidan, min ikunwain? En shinanan, min ikunwaiin— aka

<sup>28</sup> Agripán kemakin:

—Min shinanan, ¿min jawaida ea Cristo chibankatsis ikai?— aka

<sup>29</sup> Pablón ana yuikin:

—Jawaida kasmái chipu kasmái mia inun dasibibun natian jabun ea ninkaibu en ikunwain keskakin man Jesús jaibu wadianun Diosun jau matu kenadianunwen, jakia na en ika keskai mane dispiwen matu tsuan menexamadan— jatu wa

<sup>30</sup> januxun jatu jaska wai ninkatan judio xanen ibu Agripa inun romano xanen ibu Festo inun Berenice inun xanen ibu betsabu jatube tsaua <sup>31</sup> tadi medibi benibain jamaudia Pablokidi jabu janchanamekin yuikin:

—Ja juninan, jawa chakabuwaismawen taexun tenantima inun bichiti medan bichitimaki— ikaibun

<sup>32</sup> januxun Agripán Festo yuikin:

—Ja juni jawawama min nichintidubia jamebi: “Jau César ea unanti waxanun”, ikin mia yukashinadan, jadi nichinyuxanwen— akabu

## 27

### *Roma anu Feston Pablo yununikiaki, na janchadan*

<sup>1</sup> januxun romano maiwan kesua Italia maewan Roma anu xanen ibu dasibi binuatun jau Pablo unanti wanun jadi nuku nichinkatsi shinanshinxun jau nuku iyunun capitán Julio soldado jawen xukua ewapa kena César

Augustonadan, Pablo inun jabu bichimisbu betsabu jatu Feston inankin yunukin:

—Roma anu iyukin jatu mekejaidakubaintankanwen— aka <sup>2</sup> mae Adramitio anua niwe xaxu ewapa Asia anu kaiwen jaki nuku naneabu mai pakea Macedonia mae betsa Tesalónica anua nukun jaibu Aristarco nukube kaya ianenwan kexa patankubaini <sup>3</sup> janu uxashini kai mae betsa Sidón anu nun keti ikaya capitán Julion Pablo duawakin jeneyua januxun Jesús ikunwainbu jawen jaibuaibuki jau jatuki bayutanunbun, iwanan, nemama kaken bechitan pimakin duawashianbu <sup>4</sup> janua Sidón anua bestenkaini kai natukan ewapa jawen kena Chipre nun kapanan niwe beaiwen taea dunkebaini <sup>5</sup> mai pakea dabe Cilicia inun Panfilia besuudi ianenwan dunkebaini kai atimas mai pakea betsa Licia anu jawen mae betsa Mira anu nun jikia ja xaxu nun jawen kai jenetan

<sup>6</sup> janua maei niwe xaxu ewapa Italiakidi kai romano soldadobu capitán Julion benabaunkin betsa Alejandría anua kai bechitan ana jawen kakatsi jaki inatan nun kai <sup>7</sup> unanxubidajaida kakunkaini uxakunkaini ianenwan patankubaini daya chakayamakubaini mae betsa Cnido besusi niwen nuku niti aka nuku jaska wa yusmaudi natukan betsa Creta dunkebauni mae betsa Salmoda natukan kesua binubaini <sup>8</sup> niwen nuku kamama texkitan unanxubida kai bikajaidakunkainkin natukan Creta kexa patankubaini atimas mae betsa Lasea dapi jawen kena Buenos Puertos anu nuku keti akabu nun jikiken

<sup>9</sup> niwe pepa manakubaini uxa ichapakunkaini jawaida kainama judiobu samakemisbutian ma binuken ui pakei taei niwewan bei meseaya jaskawen taexun bebunkidi jatu nemakin Pablon yuikin:

<sup>10</sup> —Junibuun, jaska en shinain matu yuinun ninkakanwen. Ean en uiainan, ninkamas nun kaya niwe mesejaida bekin nuku xaxu bichia matun xekikan inun nukun mabu dasibi xaxuyabi benui keyutiduki. Nukudi jasai nukun jiwea nun benudiatiduki. Buyamayunankanwen— jatu wa

<sup>11</sup> januxun jatun xaxu bumis inun xaxu ibu niti ikatsi ikama capitán Julion jabu besti ninkaniki, Pablon jancha ninkamadan. <sup>12</sup> —Nenu Buenos Puertos bai butua chakabuki. Jaskanuxun nun matsu binutidumaki— ikaya dasibibun jabiaskasdi shinain: —Jaskakenan, nenua buidan, Creta natukanu Fenice mae anu bunankanwen, janu bai butua peki, noroestekidi inun sudoestekidi uiankidi janu bashikutan nun ui binuyununbunan— ikaibun

### *Niwewanen jamakidi jatu iyunikiaki, na janchadan*

<sup>13</sup> janua ana bunun ixun shinantan buaibun niwe kushipama duakabi surkidia pe xunku ikaya:

—Peki. Eskawen nun katiduki, jawa bikamadan— ika ana kai taei natukan Creta jawen kexa jawama nun patankubainaya <sup>14</sup> janua jawaida natukankidia niwe meshupa kushipa bekin ian namakis nukun xaxu nuku tu akubainaya <sup>15</sup> jaska waxun ana tsitsunwantun ana ja kaikidi butima niwewanen chishtekidi buaiwen taexun xaxu jawen tuenbainti jeneabu niwen besti xaxu bini bini abainaya <sup>16</sup> janua natukan jatiuma jawen kena Cauda junea jaudi niwe xunku ikamaudi dunkebainkin jawen jasai paxati xaxu pishta danexekeka kai ntitapatan dayajaidatan mapemakin nun nanea: <sup>17</sup> “Nukun xaxu ewapa mushitiduki”, iwanan, xaxu ibu dayaxunmisbu dispi kushipawen xaxu dawexekubainkin keyutan nespa jawen kena Sirte anu texke itiduki ika datekin ja xaxu dakedexkain bichai jau jaki teanun, iwanan, ji keku pukuabu jatun mestenwanken niwen tu abainmis tadi ewapadi jawen ji maxkenanyanbi pekaxun butekin nun peka niwewanen xaxu

tu akubainaya <sup>18</sup> janua ana penaya niwewan ana kushipa bekin xaxu dabe dabe achakayamaya xaxu nadabeketiduken datekin xaxu xanka duakabi wanun ixun ja mabu buaibu jatidi ian medan datekin pukukin taewaibun <sup>19</sup> januauxa dabeshina ana penaya niwewan maindiamaken ja niwen jawen tu abainmis tadi ewapa inun jawen chibu inun jawen nabe inun maxkenan dasibi dispiyabi xaxu anua jatubetan mekenen dasibitun xutukin ian medan nun pukuabu <sup>20</sup> januxun niwen nuku ichakawakubainaya meshu tibi bishi uianma inun xaba tibi badi uianmadi: “Nun peamaki, janiada jasakin nukun jiwea nun benui kaii”, ikaibun

<sup>21</sup> natian datekin jawa piabuma ikubainaibun janua Pablo jatu nashui ika benikaun jatu yuikin:

—Junibuun, en jancha ninkatan Creta anu man bashikushianan, bika chakabu man meama ikeanaii. <sup>22</sup> Jaskabiaya punu nukayamakanwen. Natianan, xaxu besti benuaya nuku dasibi nun mawama ixanaii. Matu yuinun ninkakanwen. <sup>23</sup> Meshu medan en Dios ja en dayaxunmis ea mekemistun jawen nai tsuma yunua juxun <sup>24</sup> ea yuikin: —Pabloon, dateyamawe. Romano xanen ibujaida min uin kanun Diosun mia medabewakin ja dasibi xaxun mibe buaibu miwen taexun jatu tenanma en jatu paxa waxanaii— akin ea yuixuki. <sup>25</sup> Junibuun, ana punu nukama benimakanwen. Eanan, en Dios ikunwanyan jaska ea yubaxu axanai en ja shinaiin, nun jaskai kai jawen nai tsuman ea yuixudan. <sup>26</sup> Jakia natukan betsaa nuku teawai kaikiaki— jatu wa

<sup>27</sup> janua Creta anua buimabu ma 2 semana kaya meshu betsatian ianenwan dexun betsaa jawen kena Adriático anu niwen nuku xutukubaunaya ianenwan buspu tsaubainkin nuku dabe dabe akubainaya xaxu ibu dayaxunmistun unanxubida bana ninkatan shinain: “Nun ma mai kemaii”, ixun <sup>28</sup> jawen nua meti dispiwen mea 36 metro tanatan ana ja kachu xekekainaya ana mekin 27 metro tanadiatan <sup>29</sup> mishkiki keti ikin tsakai kaya datekin jawen xaxu tsumakin mai betanti xankama dabe inun dabe xaxu chixukidi pukuabu niti iken jau Diosun penaya uinmakin jatu medabewanun manai manishinaibun <sup>30</sup> xaxu pishta butetan paxanun, iwanan, xaxun dayamisbun jatu padain xaxu debukidia jawen mai betanti betsadi pukui itsai padananantan paxai bupananbun <sup>31</sup> jakia jaskaibukidi unankin capitán Julio inun soldadobu Pablón jatu yuikin:

—Jabun xaxu ibu dayaxunmisbu jabu besti paxaibunan, matudan, man jaskatan paxatidubumaki. Jatu nemakanwen— jatu wa

<sup>32</sup> jawen bupananbun capitán datekin jawen soldadobu yunua ja dispiwen xaxu pishta nexabu mexteabu ianen pukukainaya

<sup>33</sup> ma pena kemaya jau pinunbun Pablón shinankin jatu yunukin:

—Menan dasibitun jawada pidikanwen, man jaskai ikai ma semana dabe kabiauxa tenekin uinkubainkin man jawa piama en matu uiainan. <sup>34</sup> Jaskaken en matu yunuaii. Punu nukama man paxakatsis ikaidan, pidikanwen. Man nuitapabiai man jawa chakabui benuama ixankanaii. En jancha en matu yuiai jakimayamakanwen— jatu waxun

<sup>35</sup> jaska jatu yuitan Pablón misi bixun dasibibun besuudia dakeama Dios kenwantan misi tunkexun pikin taewaya <sup>36</sup> januxun unanxubida benimabaun jabundi piaibun <sup>37</sup> ja xaxuwen nun jawen kaidan, nukubudan, 276 yuda nun iniki. <sup>38</sup> Januxun yaniwatan xaxu ana xankawakin xekiwan putakin texe washinabu ana jawen jenekin pukukin keyuabun

*Xaxu ewapa jawen buaibu dabekeajaxkajaxka inikiaki, na janchadan*

<sup>39</sup> janua penaya uinbaunkin xaxu ibu jabu dayaxunmisbubetan janida kexa betsaudi janu unanbuma anu buabu jawa unanma jakia jawen dexun anu mashi uintant:

—Mashiudi nun teai katidumenkain. Jaudi bunankanwen— jatu wa <sup>40</sup>jabun jabiaskadi shinankin jawen tsitsunti jaiman nea pekaxun xaxu debu anu ja niwen tu abainmis tadi pishta ana puntetan ian anu jenekin jawen mai betanti dispi jaki nexea mexteabu mashikidi tu iki nunukaini kemai taeaya <sup>41</sup> jakia jene janus kushibidanai anu uke medan mashi tsakai janu uianma texke ika ana jadakidi katima jene kushipai buspu tsaubidankin xaxu chixu tsaka tsaka akin jaxka jaxka akin taewaya <sup>42</sup> juni bichiyamabu nunai jau paxai junebainyamanun bun yubakatan soldadobun jatu detekat-sis ikaibun <sup>43</sup> jakia Pablo jatu mekemakatsis ikin soldado capitán Julion jatu nematan nunanikabu jabu dukun jau pukubain mashin mapekenun bun jatu yunua <sup>44</sup> nuna unanbumadi ja kachu xaxu nabe inun xaxu tuax ikai-wen jau bunun bun dasibi nuku yunua jaskai dasibi nun nunubaini mashi metsatan nun mapekebidanbidani keyuniki, paxai tsua jasamadan.

## 28

### *Natukan Malta anu Pablo niti iyuniaki, na janchadan*

<sup>1</sup> Janu dasibi jasama mashin nun mapekei keyuken natukan jawen kena “Maltaki”, ikin nuku yuiabu nun ninkaya <sup>2</sup> ja uian nuku aka xunska nun matsi teneaya janu yuda betsa jiweabu dasibi nukuwen nuikin nuku duawakin kadu ichapa kuaxun nun yui bunun bun nuku kenabu <sup>3</sup> jadi kaxun Pablom metax ichawaxun chi anu manchinkin kuaya metax anua chi kuai anu xana mebidani dunu pianan taxnikidan ishchukidan jawen mekenki pikin mukua dunuken <sup>4</sup> ja janua yudabun jawen meken anu dunu dunua uin jawen datei yuinamekin:

—Na junidan, pubenkin yuda betsa tenainmamenkain. Ianenwan anua paxabiaxuken dunu yunukin nukun mekenika yushin pepatun jiwea inanma kupikikidan— ikaibun

<sup>5</sup> jakia jawaida Pablom jawen meken meishkukin chi anu dunu putatan jawa meama kayaken <sup>6</sup> januxun dasibibun shinankin: “Mexaxatan jawaida mawaaimenkain”, ixun manajaidabiaibun jawama kayaken jaskaya shinan betsa watan jabun yuikin:

—Ja junidan, yushin kushipamenkain, dunun pibia isin teneama kayabin!— akaibun

<sup>7</sup> janua jabia ianenwan kexa chaima natukan xanen ibu jawen kena Publio jawen mae ewapa kesuakea anua juxun nuku iwankin mapemashinxun <sup>3</sup> xaba jawen jiwtexun nuku pimakin pewakin nuku duajaidaway <sup>8</sup> jatu jaska waitian Publion epa yuna inun chixu tenei dakaken Pablo yuiabu uin kaxun jau medabewanun Diosun kushipa yukaxuntan jau xuxanun jaki mepitan mea jawaida maianyan <sup>9</sup> natukan Malta anuxun ninkakin keyubauni jau eadi xuxawanun ika isin teneaibu bebidan bebidanaibu jatu xuxawai uxé dabe inun besti Malta anu nun jiweyuniki.

### *Roma anu Pablo jikinikiaki, na janchadan*

<sup>10-11</sup> Malta anuxun nuku duajaidawaibun ui inun niwe chakabu mainkunkainaya niwe xaxu ewapa betsa Alejandría anuadi romano yushin ji dami dabe jatun kena Cástor inun Pólux xaxu jawen debukidi netanibu ma niwe pepa taeaya ja xaxuwen ana nun inai taekainaya nun jaya katanun tadi inun piti nuku inankuintan nuku jaya nichianbu

<sup>12</sup> janua jawen pukei kainkaini natukan ewapa Sicilia anu mae betsa Siracusa anu jikitan janua 3 dia xaba nun manayuaya <sup>13</sup> janua ana kakin ianenwan patankubaini Italia mai pakea anu mae betsa Regio anu jikidiatan uxashini surkidia niwe pepa ana bei taeaya ana kai uxa dabetan janida jawen mabu mapemakatsi mae betsa Pozzuoli anu jikixun xaxu anua bututan <sup>14</sup> janua Jesús ikunwainbuki nun nukua nuku pimayuaibun semana bestichai jatuki nun bayua januxun Romakidi main soldadobun nuku iyukin taewaibun <sup>15</sup> Roma anuxun ikunwainbun nun juai bana ninkatan bai pu-chinin nukuki nukukatsi beaibun janua inanananmisbu jawen kena Apio anu nun jatuki nukua nukube ana bui chintunbainaibun mae betsa jawen kena Tres Tabernas anu ikunwainbu betsa beaibukidi nun jatuki nukudia jaibu ichapabu uin Pablo benimai shinan chankankin Dios kenjaidawaya <sup>16</sup> ana kai maewan Roma anu nun jikia juni bichinibusu betsabu romano xanen ibubun jau jatu ana bichinunbun jatun soldadobu yunutan jakia Pablo jaska wama jau tadi medibi jiwe betsa anu soldado bestichai jabe menexekedabetan jau mekekubainxanun yunuabu

*Pablon Roma anuxun jatu yusinkubainikiaki, na janchadan*

<sup>17</sup> jikishina uxa dabe inun besti binukainaya Roma anu judio xanen ibubu jiweabu jau jabe ichai benunbun Pablon jatu kena bea ma ichabu jatu yuikin:

—Enabuun, ekidi matu yuinun ninkakanwen. Nukunabuki inun nukun xenipabun beya en jawa wama kayabiaken Jerusalén anuxun ea achixun romanobun jau ea bichinunbun ea jatu meshui akimabu <sup>18</sup> ea unanti watan jabun ea ninka jaska tenantimaken ea nichinpananbun <sup>19</sup> nukunabu xanen ibubun ea betsa betsapawaibun enabube yuananain kyanamekatsi ikama jau nenuxun romano xanen ibujaida Césarn ea unanti waxanun Festo en yukayamaki. <sup>20</sup> Jaskawen taexun man ea uin ebe janchai benunbun en matu kenashinaki. Nun Israelitabun ja Diosun nuku yubani nun manakaibuwen taexun jaskadawen dabanan ea mane dispi chiwetameyawen soldadobe ea menexshinabumenkain, man eki nukuyununan— jatu wa

<sup>21</sup> ja ichabu betsan Pablo yuikin:

—Judea anuxun mikidi kene nuku bemabumaki. Ja inun, nukunabu jukin mikidi jawa chakabu nuku yuiabumadiki. <sup>22</sup> Na jaska yusian bena min ikunwain mae tibi anuxun bechipaiama dananmisbu nun ninkabiamis jaskada min shinain nun ninkakatsi ikai— aka

<sup>23</sup> jawatianda ana ichaxanaibu xaba katutan: —Janu nuku axanwen— abainshinabu judio ichapabu janu Pablo jiwe anu ichai beabu Dios xanen ibuaikidi yusinkubainkin Moisés inun Diosun jancha yuixunka betsabundi kenenibuwen Diosun Mesías Jesúskidi Pablon jatu ikunwanmakatsis ikin badi chai jatu tanamakin jatu yusinbaiaya <sup>24</sup> jaska Pablon jatu yusian jatiditun ikunwainbun jatidi betsabundi danankin ikunwanbumaken <sup>25</sup> jaskakidi shinanma jatunmebi itimaskatan inun bui beni taebainaibun Pablon es-kakidi jatu yuikin:

—Xabakabi matun xenipabukidi Diosun Yushin Pepatun janchamakin Isaías yuimakin:

<sup>26</sup> ‘Kakain ja yudabu yuiditanwen.

Jabun jancha ichapa ninkabiakubainmisbu jawa unanma ixankanikiki. Ichapa uinbiakubainmisbu jawa uianma ixankanikiki.

<sup>27</sup> Jau uinyamanunbun jatun bedu bekua keskabuki.

Jau ninkayamanunbun jatun pabinki pabepukua keskabuki.

Na yudabu buxka kushibun jawa tapinkatsis ikabumaki.

Jau en jatu medabewakin xuxawapanan ea danain

ea anu bekatsis ikabumaki', aka matun xenipabu yusintan Isaíasin nuku kenexuniki. <sup>28</sup> Jaskaken nukunabu ninkabumaken natian unudi Diosun judiobuma jatu mekekatsis ikai jau jabun ninkanunbun janudi buxun jatu yusinxankanikiki, jawa niti ikamadan. Jaskanikidi matundi shinankanwen— jatu wa <sup>29</sup> Pablon jaska jatu yusian ninkabiatan jabe kemanamebaini inun buaibun

<sup>30</sup> jiwe inanyuimabu pakakubainkin januxun badi dabe nichiin janu jaki bai buaibu dasibi jaska jabe janchakatsis iki buaibu jatu i pewakubainiki. <sup>31</sup> Tsuan jawa nemama Dios xanen ibuxanaikidi xabakabi jatu yusinkin Dio-sun Mesías Jesucristo mekenankidi Pablon jatu yusinpakekubainiki, tsuan jawa bika tenemamadan.

Teófiloon, jatiski, Jesúskidi jawen tsuma kushipayabu dayakubainibukidi janchadan.

Lucas

## ROMA ANUABU PABLON JATU KENE BUMANIKIAKI ROMANOS

### *Pablón jatukidi shinanikiaki, na janchadan*

<sup>1</sup> Man Jesucristo ikunwainbu Roma anuabu en Pablo jawen tsumapan ¿man jaskadamenkain? ixun en matu kene bumai uindakanwen. Jawen kakape en chania akeakexanun jabistun jawen kushipaya ea wakin Diosun ea medibi watan ea yununiki. <sup>2</sup> Bebunkidijaida ja dukun Diosun jancha medibi kenenibu anu jawen bakewen yubakanikidi jawen jancha yuixunikabu Diosun jatu kenemani nun unaiin. <sup>3</sup> Jaska nukun Xanen Ibu kushipajaida, Diosun bake Jesucristodan, juni kayabi judiobun xenipabu Davidin baba kainxanaikidi Diosun jancha yuixunikabun kenenibu jayaki. <sup>4</sup> Janua Jesús tenanbu mawashina jawen Yushin Pepabetan jawen kushipawen Diosun bestenwantan: “Nadan, en bake kushipajaida dasibi binuaki”, akin Jesucristokidi nuku xabakabi unanmaniki.

<sup>5</sup> Jaskawen taexun Jesucristo en ikunwaniwen ea duawakin Jesúsun kushipaya Diosun ea waniken yuda betsa betsapa tibitun jau jabundi Jesucristo ninkatan chibankin kenwanxanunbun jawen daya axunkin en jatu tapinmakubaunaii. <sup>6-7</sup> Jadi man Roma anua jiweabun Jesucristo man ikunwainbudan, matu dikabiwen Dios nuikin katunixun jawenabu medibi matu waikiki. Man jaska jiweabuwen taexun nukun Epa Dios inun nukun Xanen Ibu Jesucriston duawakin jau unanuma matu jiwemakubainunbunwen.

### *Jesucristo ikunwainbu Pablón shinankin jatuwen taexun Dios kenwankubainikiaki, na janchadan*

<sup>8</sup> Ja dukun matu yuinun ninkakanwen. Jaska wakin man Jesucristo ikunwakin pe chibankubainaibu mae betsa betsapa tibi anuxun matukidi chanimisbuwen taexun Jesucristobe janchakin matu dasibikidi dayuikin en medabenan Dios en kenwankubainmiski. <sup>9</sup> Jaska inun, Dios besti duawanun, iwanan, jawen bakewen nukun chakabu Diosun nuku buaxunkatsis ikai jawen bakekidi dasibi en kushipawen jatuki chanikunkauni matu jakimama matu ea axunkin Dios en yukubainmis Diosun unainkiki. <sup>10</sup> Jaska inun, matuki en bakatsi ikai jau Diosun jawen shinanen ea bexpawaxunxanun janu matuki ea bamakatsis ikin ea yunuxanai Diosbe janchakin matukidi en ea akubainaii. <sup>11</sup> En shinanan, matu uin kaxun en matu yusinkatsis ikaii, jau Jesús ikunjaidawai man kushipakubainunbunan. <sup>12</sup> Jaska en matu yuiaidan, nun Jesús chibainbu nuku dasibi medabenamei nun juinti kushipanametidubuki, matubu inun eadan.

<sup>13</sup> En betsabu inun en puibuun, jaska judiobuma mae betsa betsapa anu jiweabu en jatu yusinmis keska wakin matukididi shinain man Roma anuxun Jesús ikunwainbu ana matu ikunjaidawamakin inun betsabun ikunwandiabuma Jesús jatu ikunwanmanun ika man Roma anu jiweabu en matu yusin kakatsis ikaii. Matu uinun ika en yubakabiakunkainaya jamapai betsa betsapatun ea teawa matu anu en kadiamaki. <sup>14</sup> Yuda betsabu tibidan, griegonawabu inun, griegobuma, unanepabu inun, unanepabuma Diosun ea yusinmakatsi ea yununiki. <sup>15</sup> Jaska en shinainwen taea man Roma anu jiweabu anudi Jesúskidi kakape matu yusiin kakatsis iki en matukidi bepexea en shinan chankan chakayamaii.

### *Diosun kakapedan, kushipakiaki, na janchadan*

<sup>16</sup> Tsuabunda Diosun kakape ninkatan ikunwainbu Diosun jabun chakabu buakin ana shinanma jawen kushipa paewen jawenabu jatu wamisxun mekepakexanikiki. Jaskawen taea ja dukun judio jatidibun ikunwankin taewanibuki. Januxun ja kachu judiobuma betsabundi ikunwandiakanikiki. Jaskaken Diosun kakape Jesucristokidi yuikin datan akin jawa jawen dakeama en jatu yusinkubainaii. <sup>17</sup> Jaska inun, jawen jancha yuixunikatun Diosun kakapekidi kenekin yuikin: “Tsuabunda Diosun jancha ikunwankin chibainwen taea pepai jiwxexankanikiki”, aniki. Jaskawen taexun jawen bakekidi kakape Diosun jawen jatu mekekin jatun chakabu buanixun ja besti ikunwainbu jatu paxawaxanikiki.

*Dios chibankatsi ikabuma ana Diosun jatu mekeamakiaki, na janchadan*

<sup>18</sup> Yuda jidabi jiwebaunabu jatun chakabuwen chakabukubainkin jancha chanimawen jiwekatsi ikabumawen taexun betsabun ikunwantidubun jau ninkayamanunbun chanima jancha junekin nemamisbuki. Jabun jatu nemamisbu Dios nai anu jiwea jatuki sinatakin natian jatu kupikin jabu tenemaikiki. <sup>19</sup> Jawada Dioskidi unantidubu jabu Diosun unanmakin jamebi jatu uinmamiski. <sup>20</sup> Januxun Dios tsuan uintidubumabia Diosun mai damiwani anua jaska niti akama jawen kushipa inun jaska watanda dasibi pewa akeakekubainmis Diosun yudabu uinmaya jawada damiwani uinkin dasibibun Dioskidi xabakabi unantidubuwen taea tsuabuda Dioski meseama yuikin: “Dioskidi tsuan ea yusianmaki”, iki chani chaka bestikanikiki. <sup>21</sup> Januxun yuda ichapabun Dioskidi tapinbianixun jawen jancha danankin duawama inun kenwanma inibuki. Jakia jaki pechitan jatun shinanen besti chakabu shinain unainsmapakin ana chanima jancha tapintidubuma ikubainibuki. <sup>22-23</sup> Ja Epa Dios kushipajaida mawatiduma ana kenwanma jabun shinan kushitan ja dami uintidu kenwankatsi ikin juni mawatidu betsabun dami waibu tsuabunda ja dami bitan kenwainbu betsabun peiyabu dami waibu bitan kenwainbu betsabun yuinaka piti inun pitima tae dabe inun dabeya dami waibu bitan kenwainbu betsabun nutawen xadaibu dami waibu bitan kenwankin jaska shadabu besti kenwankubainun ikin Dios danankin yuikin: “En unanepaki”, ibiai unainsmapabu ipaunibukiaki.

<sup>24</sup> Jaskawen taexun yudabun jaska shinain aki jiwekatsis ikaibu jawaki ana dakeama jau jabun yuda mekeama chakabukubainunbun jabun shinan chakabu inun jawada chakabuwakatsis imisbu akeakeaibu ana nemama ana jatu mekeama jatuki pechitan Diosun jatu jenea jaska jiwenibukiaki. <sup>25</sup> Yuda betsabun Dioskidi jancha kayabi danantan chanijancha ikunwankin chibankin Dios kayabi ana shinanma jawada Diosun damiwani besti uinkin kenwankubainibukiaki. Jakia nun ikunwainbunan, nukun mekenika Dios jatun nuku damiwani kenwankubainankanwen. Jaskakidan.

<sup>26-27</sup> Jaska chakabu besti shinankubainaibuwen taexun Diosun jatu jenekinan, yudabu ana bechipainamekayabiama jatun chakabuki dakeama dake-tapaibu jatu uinkin anikiaki. Jawadawen yuda pepabu dakeaibu ana dakeama ainbuaijunibun chutamakatsis ikama jakia jabe ainbu betsabe chutanamei itsai menamei ibunananbu, inun junibudi ainbuwen ana kemukin chutakatsi ikama jabe juni betsawen kemui jabe chutanameaibuwen taexun jau jaskai besti jiwekubainunbun Diosun jatu ana nemama jenenikiaki. Jaska jiwei dakeisbumawen taexun jatun yuda isin betsawen temekakin Diosun jatu kupikin taewaniki. <sup>28</sup> Jabun Dioskidi shinan chanima kayabi ana shinankatsi ikama ikubainaibuwen taexun jatun jointinin shinan chakaibu jaska bechiapai jiweaibu Diosun jabu ana nemamaki. <sup>29</sup> Eska

tibi matawaibuwen taexunan, jawen atimapaidan, chutanamechakaibudan, yaushiaibudan, ja pewen jiweama chakabuwen jiweaidan, betsabu jatun jawada jayawen jatuki sinataibudan, yuda betsa tenainbudan, detenameaibudan, chani chakabaunaibudan, bepadameaibudan, yuananainbudan, jaskai jiweabuki. <sup>30</sup> Ja inun, xechakai jancha chakabumisbudan, jabun Dios danankin bechipaisbumadan, jawen nuibiabu benunun ikin tsua ninkaismadan, jamapai atidukidi keainbudan, chakabu betsa betsapa benawaidan, jaskakin jatun ibuan jancha danankin ninkaisbumadiki. <sup>31</sup> Jaska inun, jancha chanima ninkakatsi ikamadan, janchabiatan aisbumadan, tsuawen nuisbumadan, tsua medabenanma jiwemisbuki. <sup>32</sup> Ja inun, jaskai jiwea jau jawen besti mawanunbunwen, Dios ibianiken jaska unanjaidabiai ana jawaki meseama jabias chakabuwakubainkin betsabun jabias akaibu uin benimakubainmisbuki, jabu juni chakabu tibidan.

## 2

### *Yuda dasibibu unantantiosun chanima jatu kupixanikiaki, na janchadan*

<sup>1</sup> Jaska chakabu tibiwen yuda betsabu ikai tsuanda uintan shinankin ja akin chitenun ixun man amis kasmai man atidudan, jabias chakabu man jaya matumebi man daketapatidubuki. Jabiaska tibi jabubetan man abiamiswen taeandan, jaskawen taexun xanen ibu bebunxun matu chiteaibu man jawa nematidubumaki. <sup>2</sup> Jamen tsuabunda chakabuwakubainmisbu kaneama Diosun unanti watan jatu kupixanai nun unaiin. <sup>3</sup> Jamen matunan, tsuabunda chakabuwadiaibu uinkin man jatu kunyan akatsis imisbudan, matundi jabiaskadi chakabu man adiamiswen taexun unantantiosun matu kupixanai: “En paxatiduki”, ikin shinanyamakubainkanwen. <sup>4</sup> Jakia Dios pepajaida man dananbiaya matun chakabu tanabiakubainkin jau ana ja shinamma Diosun buanun tsuabuda jakidi kakin shinan betsa watan man yukaxanunbun matu shinain matuwen nuikin jatianda man jakidi yukaxanai jin jin ikama Diosun manakubainikiki. <sup>5</sup> Jaska inun, man jatiditun chakabu betsa betsapa akin jenekatsi ikama Dios shinamma chakabu ibubis mat san akeakebainkin Dios sinatamamisbuwen taexun yudabu dasibi unanti waxanaitian ana manama Diosun matu kupixanikiki. <sup>6</sup> Jaska yudabu tibi jiwexun amisbuwen taexun Diosun jatu kupia akeakeaxanai matu yuinun ninkaidakanwen. <sup>7</sup> Diosun jau nuku kenwanxanun jiwekuinkatsi nun jatiditun jawen jancha chibankin jeneama pepawakubainaibu pepawen manakukin mekekin nai anu Jesùsbe Diosun nuku jiwekuinmaxanikiki, ikibi imakinan, nun jabu jaska jiwekatsi benamisbudan. <sup>8</sup> Jamen yuda betsa pubein sinatai ja idabenamekin Diosun jancha chanima danankin ja chibankin chakabu betsa betsapa wakubainmisbu jabuki Dios sinatakin kupixanikiki. <sup>9</sup> Jaska wakin Diosun jatu isin tenemakin nuitkaajida wakin keyuxanikiki, ja dukun jabu judiobun chakabu wamisbu kopi taewatan januxun jabu judiobuman chakabu wadiamisbu kupikinan. <sup>10</sup> Jakia man jatidi pe jiwemisbu kenwankin niti akama unanuma Diosun matu jabe jiwekuinmaxanikiki, ja dukun judiobu manakutan januxun judiobuma jatu manakudiakinan. <sup>11</sup> Januxun Diosun jatu xabakabi unanti wakinan, yudabu chakabu inun pepabu dasibi uinmisxun jabias shinanwen besti jatu unanti wakin kanetidumaki.

### *Dasibi yunuti unainbu inun unanbuma Diosun jatu unanti waxanikiaki, na janchadan*

<sup>12</sup> Dasibibun Diosun yunuti inun jawen nemati jancha Moisin keneni jaska jayama dabanen unanma chakabuwakubainaibu jawen yunuti inun

jawen nemati jancha jaska yununi Diosun shinanma jatu kupixanikiki. Jamen betsabun Diosun yunuti inun jawen nemati unanbiakin chibanma chakabuwakubainaibu jawen yunuti inun jawen nemati jancha shinankin Diosun jatudi kupixanikiki. <sup>13</sup> Ja inun, tsuabunda jawen jancha ninka bestikin Dios benimawatidubumaki, jawa chibanmadan. Jakia tsuabunda jawen jancha yununi ninkatan jabias chibankubainmisbu jatuwen benimakin jatun chakabu ana shinanma Diosun jatukidi pe shinanxanikiki. <sup>14-15</sup> Tsuabuda jatun shinan chakabu wakatsi ikama Diosun Moisés yusinmani keska jatun juinti medan ja kene nea keskaxun jatu unanmaya chanima jawa jatun shinan medan jawa chakabu jayabuma jatu unanmamiski, jaska neatun jatun shinan ibubis chakabuaibu jatu ja akin inun jatu nemakin unanmakinan. Jaskawen taea judiobuma Diosun Moisés yusinmani kene jayamabia jatun beyawen jawada chakabu unanmisbu inun jawada pepa amisbu jaska Diosun Moisés yusinmani unain keskakin chibanmisbudan, jabu jatunmebi jatun yunuti inun jatun nemati jaya keskabuki. <sup>16</sup> Jaskawen taea janu badi jawen jeneaitian Diosun Jesucristowen taexun jaska judiobu inun judiobuma jawada chakabu inun pepa june akubainmisbu dasibi jatu unanti wakin keyuxanikiki. Na jaska waxanaikidi jawen kaka pepa jawen meketi Jesucristokidi en jatuki chanikunkainaii.

*Jawen yunuti inun jawen nemati Diosun Moisés judiobu yusinmanikiaki, na janchadan*

<sup>17</sup> Man judiobu kenmis matu yuinun ninkakanwen. Chanima Diosun matu katuxun jawen jancha Moisés matu kenemaxuni jaki chiti ika matun Dioswen man kenmiski. <sup>18</sup> Jawada Diosun bechipaiai unankin jawen jancha man unainwen taexun jaska janchan matu yusian tapinkin man pe katukubaintidubuki. <sup>19</sup> Januxun matunan, yuda betsan juni bekun iyumis keska wakin yuda betsabun Dioskidi unandiabuma yusinkin man jatu tapinmatidu man shinandiaii. <sup>20</sup> Jaska inun, jawen yunuti inun jawen nemati Diosun Moisés yusini man jayawen taexun dasibi jancha kayatapia unankin jabun shinan benua inun jabu juinti babubu man jatu tapinmatidubudi man shinandiaii. <sup>21</sup> Jakia jaskabia yuda betsabu yusinkin mextanmabiai ¿jaskai matumebi man yusinanaisnmamen? Jaska inun, yuda betsabu yumetsukidi jatu yusinkin chitebiai ¿jaskai ibubis jatu bepadantaran man yumetsudiamismen? <sup>22</sup> Jaska inun, junibu jawen ainmabe jau chutanameyamanunbun, ainbuaibudi jawen benemabe jau chutanameyamanunbun, iwanan, nemakin jatu yusinbiamis ¿jaskakin kanekin man jabiaskadi akin chakabuwamismen? Jaska inun, yushin dami betsabu kenwanma man dananjaidabiamis dami itsa jawen kenwanti templo anu mabu beabu mania yuda betsan bitan jawen pei binun itan inananain man yumetsumiski. <sup>23</sup> Jaska wakin Diosun yunuti inun jawen nemati janchawen kenbiai jawada Diosun bechipaiai akama ikunkainkin matun shinan man tapiskuamawen taexun yuda betsabu Dioskidi man jatu dananmamiski. <sup>24</sup> Jaska Diosun jancha yuixunikatun kenekin yuikin: “Man jaska jiweiswen taea judiobuma Dioski meseama en jen imakin man jatu kaxe paepawamaii”, jaska keneni keska jabias kanekin man jatu amakubainaii.

<sup>25</sup> Jaska inun, dasibi jawada Diosun Moisés judiobun xenipabu jatu yusinmani jabun chibankin yuikin: “Jawada Diosun bechipaiai dasibi nun chibankubainaii”, ikin matun jina kubichi man mexteaidan, ja chanima man pewaii. Jakia jabun matun jina kubichi mextebiatan jawada Diosun judiobun xenipabu yusini jabun man chibanma matun jina kubichi

jamen mextekeyabia man jawenabu kayabimaki, man jawen jancha chibamawen taeadan. <sup>26</sup> Jaska inun, jawada Diosun bechipaiai judiobuman pe chibankubainkin jawen yunuti jaya keska jabu jatun jina kubichi mextekeumabia Diosunabu kayabi jatu wamiski, jina kubichi mextekeya keska wakinan. <sup>27</sup> Jaska inun, jawada Diosun yusini man judiobu jayabiabun ja ninkabiakin chibana man kanealbun januxun judiobuman jatun jina kubichi mextekeumabia Diosun yusini jaya keskakin jawada Diosun bechipaiai chibankubainmixun matu binujaidatan matu jabun unanti waxanikiki. <sup>28</sup> Jaska inun, judiobun beya chibain jawen jiwekin jabun bakebu jatun jina kubichi mexte bestimisbu judio kayabi itidubumaki, bemakis bestidan. <sup>29</sup> Jakia judiobu kayabitunan, uke medan jawen shinanwen Dios chibamisbuki. Diosun Yushin Pepawen jatu kaya wakin pewakubainmiski, jawenabu kayabi wakinan, bemakis besti jawen yunuti chibankin jatun jina kubichi mextekeea bestiwenmadan. Tsuanda jaskabudan, Diosun jatu uke medan unainkiki, bemakis junibun uiain keskamadan.

### 3

<sup>1</sup> Jaskawen taexun judio jatiditun ea yukakin: “Dasibi Diosun yusini judiobun nun unankin chibainwen taexun Dios benimawakin ¿judiobuma nun jatu binuamen?” ea wamisbuki. <sup>2</sup> Xabakabi matu yuinun ninkakanwen. Chanima ja dukun man judiobu jawen jancha Dios man axuntidu matuki chiti iniki. Matu jaska wani pejaidaki. <sup>3</sup> Ana jabiaskadi jadatutunda ea yukakin yuikin: “Judiobu betsabun Diosun jancha ana chibana danainbuwen taexunan, ¿jawada Diosun nun judiobu nuku yubani betsawaxanimenkain, nuku danankinan?” ea wabu: <sup>4</sup> “Jaska man shinantidubumajaidaki”, akin en jatu yuimiskidi matu yuinun ninkakanwen. Dasibi yudabu jawada yuui yubakatan chani chakabiamisbun Diosun jawen jancha kayabi matu yubaniwen taexun Dios chani chakakin betsawaismadiki. Jaskawen taexun Diosun jancha yuixunika Davidin Dios dayuikin:

“Diosuun, tsuanda min pepawen jancha kaneama mikidi yuimisdan, min jawa kaneisma unanxankanikiki.

Miki ja ibiamisbu  
min jatu binu keyuxanaii,  
janu yudabun mia unanti waitianan”,  
itan keneniki.

<sup>5</sup> Yuda betsan shinan chakai janchatidu keska matu shinanmanun ninkakanwen. Yuda betsan ea yukakin: “Nun chakabu betsawasapa wamiswen taexun Diosun jawen yubakawen nukuwen nuibiai ¿jaskai Dios pepama ikaskin nuku kupimismen? Jaskakenan Diosdan, chakabudaka”, ikaya <sup>6</sup> en Pablon kemakin: “Jaskatidumajaidaki. Diosun yudabu kupikinan, kanetidumaki. Jaskawen taexun Dios pepa bestiwen taexun yuda dasibi mai jidabi anu maniabu jatu unantan jabun chakabu inun jabun pepawen jatu kupikin keyuxanikiki”, aka <sup>7</sup> ana yuichakakin: “Jaskakenan, nun chakabuwaya jaska Diosun pe bestiwakubainmisdan, yuda betsabu nun jatu unanmaya jabun Dios kenwanmisbuwen taexun ¿jaskakin nun chakabuwakubainaiwen Diosun nuku kupixanimenkain? <sup>8</sup> Jau yuda betsabun Dios kenwanunbun nukubunan, chakabuwadiakubainankanwen”, ikaibu jadi shinan chakakin yuiaibuwen taea Dios jatuki sinatakin chanima jatu kupixanikiki. Jakia nuku yuain: “Pablo inun jawen jaibuaibun jaska yusinmisbuki”, iki jabu jaskakinan, Diosun kupiti ibubis bi yupukunankanikiki.

<sup>9</sup> Jaskakenkain nukubu judiobunan, ¿Dios benimawakin jabu judiobuma nun binuamen? Nun jaskamajaidaki. Chakabuwakin nun judiobu inun matu judiobuman nun jamapai kemu paewen chakabukin nuku dasibibun jatu uinmachakakin nun kanemisbuki, chakabun nuku tsumawen taedan.

<sup>10-12</sup> Ja jaskakidi jatunabukidi Diosun jancha yuixunikatun jabukidi yuikin: “Mai jidabi anu yuda bestichaitun Dios jaibu wanun ixun benamis jayamaki, tsua nun bestichai kaneisma pepa jayamadan.

Tsua unanepamaki.

Tsuan Dioskidi tapinkatsi ikamaki.

Dasibibu bai chakabuwen buidan,  
chakabui atimapai jiweabuki.

Tsuan pepajaida aki jiweamaki.

Tsua yuda bestichai pepa nun bechitidumaki.

<sup>13</sup> Yuda mawa pukintan bepuama janamisbu keska  
jawen tepun pisi maiyai keskaki,  
jawen jana padananain chani matadan.

Jawen kexawen dunun pae adua keskaki.

<sup>14</sup> Jawen jaxpawen yupukunain kunyan imiski.

<sup>15</sup> Jawen taewen kushikainkin yuda betsa detekin  
jimi chada chada imamiski.

<sup>16</sup> Janida niake niakekin

pubenkin nuitkaawakin jawada yamawamiski.

<sup>17</sup> Jani unanuma kati bai tapia jayamaki.

<sup>18</sup> Diosun uinbiaya jawen bedubi dateismaki”,

jatu jaska watan kenenibuki. <sup>19</sup> Jaskaken Moisés inun Diosun jancha yuixunikabun yusini unanajabianibu: “Man pepaki”, akin Diosun jatu jaskakidi shinankin yuiamaki. Jakia jaska yuda dasibi mai jidabi anuabun chakabuwakin nun kanemis nuku unanti waxanai dasibibu Dios bebunua nun jawa janchatidumaki. <sup>20</sup> Diosun jancha kenenibu tapinmixun: “Eanan, en jawa kaneismaki”, ikin yui Dios unanti wamai pepatidubumaki. Jakia jaska Diosun jancha kenenibudan, jaska jawen nun chakabuwakubainmis dasibibun nun jawen besti unantidubuki.

*Jesús nun ikunwainwen taexun Diosun nuku pepawamiskiaki, na janchadan*

<sup>21-22</sup> Eska wakin Diosun yudabu pepawamis xabakabi jatu uinmani matu yusinun ninkakanwen. Judiobu inun judiobumadan, tsuabunda Jesucristo ikunwain nukun chakabu jatun nuku buaxuniken: “Jaska Diosun bebunkidi yubani tsuabunda nun ikunwainbu besti chakabu jayama pepabuki”, ikin Diosun nukukidi pe shinamiski. Jaskakidi Diosun jancha Moisin kenenin inun Diosun jancha yuixunikabun kenenibudan, jabiaska dabes shinan jakidi kenenibu kaneama ini uintidubuki. <sup>23</sup> Ja inun, yuda dasibibun chakabuwakubainmisbuwen taea jaskatan ibubis Dios pepaki nun tsua kematidubumaki, kanei jiwei peisbumawen taeandan. <sup>24-25</sup> Dios nun jawa waxunkin daewatidumabiaken Dios duapatun jawen pepa jatu uinmakin jawen bake jawa yaushiamma jamen inankuinkin Diosun Cristo jatu nuku tenanmaxunkin jawen jimi jabawanidan, Jesucriston nukun kupiti biniwen taexun tsuabunda man Cristo ikunwain jawen nukun chakabu buati waniki. Jaska shinankin tsuabunda nukun chakabu nun buamakatsis iki jaki chaniaya chanima Dios pepa kaneismatun nuku unanmakin nun jawen bake ikunwainwen taexun besti nukun chakabu buaxuntiduki. Cristo mawakin nukun chakabu besti nukuna buaxunama jakia uatian jiwexun ikunwanibudi jatun chakabu jatu buaxundianiki. <sup>26</sup> Nukuwen nuikin jin

jin ikama nuku manamiswen taexun na jabiatian jaska Dios pepa bestitun matudi pepa wakin nuku unanmakin tsuabunda Jesús ikunwainbu bedu mestenwanmakin natian Diosun nuku unanmediakubainikiki.

<sup>27-28</sup> Jaskaken nuku jaska wakubainai ninkakanwen. Diosun nuku pepawaihan, jawen yunuti inun jawen nemati nun chibankubainmiswen taeama jakia Criston nukun kupiti biniwen taea tsuabunda nun ja ikunwain jaskai pe ikasi jiwea nun kenmis Diosun shinanma jawen pepawen besti nuku jawenduawamis nun unaiin. Jabiaskadi Diosun yunuti inun jawen nemati nun chibankubaini ibubis pepakin nun binutidumaken jakia jaska Jesucristo nun ikunwainwen taexun Diosun nuku pepawamiski. Jaskaken jawada pepa ibubis nun amis shinain ana nun kentidubumaki.

<sup>29-30</sup> Ja inun, ¿nukun mekenika Diosdan, judiobuna bestimen? ¿Jaskawen taea yuda dasibi xukua betsa betsapa jiwebaunabu jatu mekeismamen? Jaskamaki. Chanima dasibi Jesús ikunwainbu nuku mekemiski, judiobu inun jancha betsa betsapa tibiyadan. Nukun mekenika Dios bestichai jayaki.

<sup>31</sup> Jaskaken tsuabunda Jesús ikunwantan jawen yunuti inun jawen nemati betsa wakin nun maewamaki. Jabiawen nun matu yusinkubainaiii. Jakia ja kene jatu yusini unankin jaska Diosun nuku pe jiwemakatsis ikai xabakabi ninkakin nun mestenwaiin, jadi Diosun jancha jaya betsa wamadan.

## 4

### *Diosun yuba jancha Abrahamnen ikunwanikidi yusinikiaki, na janchadan*

<sup>1-3</sup> Diosun jancha yuixunikatun nukun xenipabu Abrahamkidi keneni eska yuiaki. Diosun jancha Abrahamnen ikunwaniken taexun Diosun shinankin: “Abraham juni pepaki”, akinan, Abrahamnen Dios ikunwankubainai anikidi matu yuinun ninkakanwen. Abrahamkidi Diosun shinankin: “Abraham pepai jiwekunkainaiwen taea juni pepaki”, ikaya Abraham ibubis kenkeaniki. Jakia pepai jiwekunkainaiwen taeama jakia jawen janchawen Diosun yubai ninkakin tapintan ja besti Abrahamnen chibankubainiken taexun Diosun Abrahamkidi pe unanti wakin shinaniki.

<sup>4</sup> Jaska inun, tsuabunda yuda betsa dayaxunabu jatun daya pei inankuin keska jamen inanma jakia jatu dayamatán dibixun pakakin inanmisbuki.

<sup>5</sup> Jamen tsuabunda Dios duawanun, iwanan, jatun juinti medan Dios ikunwainbu Diosun jatun aka pepawen jatun pepa wama jakia jatuwen nuikin yudabun jatun shinan betsa wawen taexun jatun shinan chakabu jatu buaxuntan: “Ja yuda pepabuki”, akin jaskaben Diosun jatukidi shinankubainmiski. <sup>6</sup> Jaska pepa inun chakabu yudabun amisbukidi tanama jaska Diosun bechipaiai aki pepakin Dios unanti wamamisbukidi Davidin ibubis unankin shinain janchai:

<sup>7</sup> “Tsuabuda jatun chakabu Diosun ma jatu buaxuntan ana shinanmaken shinan chankanmisbuki.

<sup>8</sup> Tsuada jawen chakabu Xanen Ibu Diosun ana jakidi shinanmaken ja yuda benimadiamiski”, iniki, Davidan.

<sup>9</sup> Na Davidin eska kenekinan, ¿judiobun jatun beya chibankin jatun jina kubichi mextemisbukidi besti animen? ¿Jabu judiobuma dikabiki akama inidaka? Matu yuinun ninkakanwen. Abrahamnen Diosun jancha ninkatan ikunwankubainiken taexun Diosun unanti watan yuikin: “Juni pepaki”, anikidi kenekin en matu shinanmaxuki. <sup>10</sup> Jakia ¿jatian Diosun Abraham jakidi pepa shinanimen? ¿Jawen jina kubichi ma mexteken animen? ¿Mextediamabiaken anidaka? Ana matu shinanmanun ninkakanwen. Jawen jina kubichi mextediamama Dios ikunwankubainiken taexun Diosun Abrahamkidi

pe shinaniki. <sup>11</sup> Januxun Abrahamnen Diosun jancha ikunwainwen taexun unanti wakin jawen shinanmati wakin jawen jina kubichi mextenibuki, jaska ikai tsuabunda xabakabi jau unanunbunan. Diosun jaska waniken dasibibun Diosun jancha ikunwainbu Abraham jatun epa ikunkaintiwaniki, jabun jatun jina kubichi mextemisbu inun jabun mexteabumadan. Jaska tibibu Diosun jatudi unanti wakin: “Yuda pepabuki”, jatu waxanikiki. <sup>12</sup> Jaska inun, jaska Abrahamnen jawen jina kubichi mextediamma Dios ikunwankubaini keska wakin judiobu inun judiobuma jadatubunda Dios ikunwainbuwen taea ja ini keskabu jabu dikabi jatun xenipabuki.

*Diosun Abraham yubanikidi Pablon jatu yusinikiaki, na janchadan*

<sup>13</sup> Jaska inun, jawen yunuti inun jawen nemati Diosun Moisés kene-madiama Diosun jancha Abrahamnen ikunwankubainaya Diosun Abrahamkidi shinankin: “Juni pepaki”, aniwen taea jatiditun ja keskakin jawen bababun Diosun jancha ikunwankubainaibu mai jidabi jatu ibu wamakin yunuxanun, iwanan, Diosun Abraham jatukidi yubaniki. <sup>14</sup> Ja dukun jawen yunuti inun jawen nemati jancha Diosun Moisés yusinmanikenan, ja besti chibankin jaska Diosun Abraham yubani bi bestitidubudan, jabun Jesús nun ikunwainbu jamen ikeanaii. Ja inun, jaska Diosun Abraham yubani jawa kushipa pema idiakeanaii. <sup>15</sup> Jamen jawen yunuti inun jawen nemati jancha Diosun Moisés yusinmani kaneaibu jatuki Dios sinatakin kupimiski. Jakia janu yunuti inun nemati jancha jayamaken jawawen taexun tsua kupididumaki.

<sup>16</sup> Jawada Diosun bechipaiai Abrahamnen ikunwankin ani keska wakin Diosun jawen jancha man ikunwainan, jawen jancha benutima wakin nuku mestenwanxuniki, jawa pakama jawen inankuin ikunwankin nun bixanunbunan. Ja Diosun Abraham yubani shinankin tsuabunda jawen yunuti inun jawen nemati nun chibankin Jesús nun ikunwainbu inun, tsuabunda Moisin jancha chibanma Abrahamnen ikunwani keskakin man ikunwainbu mai jidabi nuku yunuxanaidan, Diosun Abrahamwen nuku dasibi yubaxuniki, dasibi ikunwainbu xenipabu wakinan. <sup>17</sup> Jaska inun, ja Abrahamnen ikunwankubainai Diosun yudabu mawa bestenwantidu inun jawen shinanen jawada shadabu dami jayadiama damiwamistun Abraham yuikin: “Yudabu betsa betsapabun jatun xenipabu en mia waii”, iniken Moisin jakidi keneniki.

<sup>18</sup> Jaska Abraham inun jawen ain Sara anua besti jatun juni bake kayabi inun jawen bababu midima tsuan tanatiduma jayatan yuda betsa bet-sapa xanen ibuxanaibu bebunkidi Diosun yubani anibujaidakin jaska shinanma Diosun jancha ninkatan manakakin jawa dateama Diosun jaska waxunxanai ikunwankin shinankubainiki. <sup>19</sup> Anibujaida 100 badi kemai mawatidubia inun bakewatidumabia jawen nuiama inun, jawen ain Sara yuxabujaida ma mawa kemadiaitun bake bitiduma jawen nuiamadi Abraham jawen shinan babuama Diosun jawen juni bakekidi yubani ikunwankubainkin jawada Diosun axunxanai jawa jakimama mestenxun uinkin kenwankubainiki. <sup>20</sup> Diosun Abraham yubani axunxanai jawa shinan betsa betsapa wama inun, shinan dabeama manakin ana ikunjaidawakin Dios kenwankubainiki. <sup>21</sup> Jaska Dios kushipatun yubanixun uinmaxanai Abrahamnen shinankubainai <sup>22</sup> jaskai Diosun uinkin shinankin: “Abrahamnen ea ikunwainan, juni pepaki”, anikiaki.

<sup>23</sup> Jaskawen taexun Diosun Abrahamkidi jatu kenemakinan, jakidi besti shinankin akama jakia yuda betsabukidi <sup>24</sup> inun nukukididi shinankin

axuniki, jatu kenemakinan. Jabiatundi nukun Xanen Ibu Jesús bestenwani ja shinanwen nun ikunwanyan Diosun jawenabu nuku wamiski. <sup>25</sup> Jau nukun chakabu nuku buaxuni nukun Xanen Ibu mawanun Diosun yunua mawashina ana bestenwaniki, jau jawen taexun yuda pepabu nuku wakubainxanunan.

## 5

### *Jesús ikunwainbu Diosun jawen jaibuaibu nuku wamiskiaki, na janchadan*

<sup>1</sup> Jawen jancha nun ikunwainwen taexun Diosun nuku pepa wakin shi-nankubainikiki. Nukun Xanen Ibu Jesucriston Diosbe nuku jaibunamemaya unanuma jiwei nun benimakunkainai. <sup>2</sup> Janua jaskawen nun benimaibudan, chintuanma Jesucristo ikunwain Diosbe jaibunamei nun jiweabuki, ikisdan. Ja inun, na jabiatian bestima jakia betsatiandi Diosbe jiwei jawen kushipaki nukutan nun jawenduaxanaii, ikibi ikidan. <sup>3</sup> Jaska bestimaki. Natian Cristo nun ikunwainwen taexun jamapai mei nun bika teneaiwendi Diosun jawen kushipa nuku uinmakubainaiven jawen shinan chankain nun chintuanma nun kushipakunkainai nun unaiin. <sup>4</sup> Diosun nuku kushipa wakinan, jaska shinain keska nun akaibu nukukidi pe shinainkiki. Januxun Diosun kushipa nun jayawen taea jaska nuku yubani manaidan, nun benutiduma nun shinankubainaii. <sup>5</sup> Jaska nun manakatidu Dios nukuwen nuimis nuku unanmakin jawen Yushin Pepa nuku inan jawen taexun Dios ikunwankin chibankubainkin jaska nuku yubani manai jamen nun manakamaki. Jaska shadabuwen taexun jamapai bika nun teneaidan, jawen taexun Dios nun kenwankubainaii.

<sup>6</sup> Yuda dasibibu Diosun nuku kupinun ikunkainaya jaska ibubis paxai nun meketidubumaken jatianda janu Diosun Cristo yunua taxnitan yudabun Dioskidi shinanma chakabukubainmisbu jatun chakabu dasibi Criston jatu bua keyuxunun ika debuniki. <sup>7</sup> Tsua jaskadiay yuda betsawen taea jawen nuikin jawen kupiti bixuin: “Ea awe”, ikidan, tsuan jaska shinantidumaki. Jakia yuda betsa pekunkainai jawa kaneisma tenanun, iwanan, ichakawaibu tsuandi jawen kupiti bixuin mawaxutidumadiki. Yuda betsabu medabewakubaunmis nuikipa tenanun, iwanan, ichakawaibu jawen kupiti bi yuda betsa jawen dabanan iki madiastun bixuin mawatidudaka. <sup>8</sup> Jaska keska binumakin Dios dasibibuwen nuikin nuku bechipaiai nuku unanmanidan, dasibibu nun chakabu jusia jiwebiaken ja shinanma Diosun Cristo yunua taxnitan nukun kupiti nuku bixuin ja besti nuku mawaxuniki. <sup>9</sup> Cristo mawakin nukun kupiti ma nuku bixunken Diosun nukukidi yuikin: “Man ana chakabu jayamaki”, iniwen taea Cristo Xanen Ibujaidai janu jawen jenei yudabu kupinun ika juxanaitian Dios nukuki sinatabiamis jawen kupiti nun jawa ana jayamajaida ixanaii, Cristo nukuwen jiwekunkainkin nuku paxawamiskenan. <sup>10</sup> Jaska inun, Dios dasibi yudabuki sinataya nun jabe jaibunamediamabiaken jawen Epa daewakin nukun kupiti nuku bixuin Cristo nuku mawaxunkin nukun chakabu bua keyukin ana shinantima watan pepa keskabu nuku waniki. Jawen bake jiwekunkainkin chanima nuku mekexanikiki, nun ma Diosun jaibuaibuke-nan. <sup>11</sup> Natian nukun Xanen Ibu Jesucriston jawen Epa Dios jatun nuku jaibu wamakin daewamani unanuma jiwekin chanima jawen taexun benimakin Dios nun kenwankubainaii.

### *Adán inun Cristokidikiaki, na janchadan*

<sup>12</sup> Mai anua ja juni bestichai ja dukun Diosun damiwaxun nemabiabaina ninkama chakabu jikimakin tateskin taewaken jawen taea jau mawaxanun

Adán anibuai Diosun kupikin nemama inikiaki. Jaska waniken yudabu dasibi Adán keskadiai Dios ninkama kanemisbuwen taea anibui inun yuxabui mawadiakubainmisbuki, Adán ini chibainan. <sup>13</sup> Ja chakabudan, ma yudabu anu mai anu jaya inikiaki. Jawen yunuti inun jawen nemati Diosun yunukin jayawadiamabia ja yudabu chakabuaibu jatun chakabu shinankin Diosun jatu kupikubainikiaki. <sup>14</sup> Jaskaken Diosun Adán damiwaxun jadi jiwemaní anua inun janu Moisés jiwenitian Moisin Diosun jancha yudabu yusinkin taewadiama jawen yunua keskawen chakabui yudabu ibubis mawakubainibukiaki, Adán keskakin Dios ninkama inun chakabu betsa betsapa wakubainidan.

Ja dukun juni Adán Diosun damiwaniki. Jatun chakabuwaniken janua juni betsa pepa Adán binua ja kachu jau juxanun Diosun yubani juxun jatun jiweti bai bena nuku waxuniki. <sup>15</sup> Ja Adánen chakabu taxnimaniwen taeandan, Diosun jawen aka nuku unanmaidan, jaskasmaki. Ja juni bestichaitun chakabuwaniwen taea jaska keskadiai ja chibain ichapabu mawakubainibuki. Januxun Diosun jawen aka betsa nuku inankuinkin juni bestichai Jesucristowendi ichapa binumaniken taexun ichapabudi pe-wakin jatu medabewaikiki, jawenabu jatu wakinan <sup>16</sup> Ja inun, Diosun nuku inankuini inun jaska Adánen chakabuwani ja dabe jaskas dabemaki. Juni bestichaitun chakabuwaniwen taea dasibi yuda betsabudi chakabukubainmisbuki. Jaskawen taexun yuda dasibibu jatu kupixanai Dios dibiabu keska manakanikiki. Jabiaskabiaken jatidi yudabu chakabubiakubainaibu Diosun jatu duawakin tsuabunda jawen bake Cristo besti ikunwainbu jabu ku-piama: “Jawa chakabu jayama pepabuki”, iwanan, jatukidi pe shinanmiski. <sup>17</sup> Janua Adán juni bestichaitun kanekin chakabuwaniwen taea jabiaskadiai yuda dasibi mawadiakubainmisbukan, chanimaki. Jakia Dios nuikipatun Jesucristo juni bestichai nuku jamen inankuini jabun nun ikunwainbu duawakin Diosun nuku pepabu waya jawada Jesucriston nuku axunkin binumaniken taexun jiwea bena bitan ja juni betsa Cristonan, dasibibudi medabewakin jatu binumaxuniki.

<sup>18</sup> Jaskaken juni bestichai Adánen chakabuwani, jawen taea jatun kupitiwen jau mawakubainxanunbun yuda dasibibu Diosun jatu yupuniki. Jabiaskadi wakin juni bestichai jawa kaneismatun nukun kupiti nuku bixundiai mawaniwen taexun yuda dasibibun nun ja ikunwainbu Diosun nuku pepawatan jabe niti akama nuku jiwekuinmaxanikiki. <sup>19</sup> Jaska inun, juni bestichai Adánenan, Diosun nemati chibanma iniki. Jabiaskadiai yuda dasibibu Adán ini keskabuwen taexun: “Yuda dasibi chakabukin jabias chibankanikiki”, iwanan, Diosun jatukidi pe shinainsmaki. Jakia juni bestichaidi Jesucristonan, jawada Diosun yunua chibankubainiken taexun yudabu ichapabundi Cristo chibainbu jatu medabewakubainai pepabun chibankanikiki.

<sup>20</sup> Janua jaskai yudabu chakabu bestiwen jiwei mesei atimapajaidakubainaibun Diosun jawen yunuti inun jawen nemati nukun xenipabu Moisés yusinmakinan, ana jatun chakabu ewawati waniki. Janua chakabui pikubiaibun Dios jatuwen nuikin jatun chakabu binumakin jawen pepajaida jatu unanti wamakin jatu duawaniki. <sup>21</sup> Chakabu jikinixun ja xanen ibukin yudabu tenankubainmiski. Jaska keskadiai Dios xanen ibukinan, jawen nuikipawen jawen bake Jesucristowen taexun jawenabu nuku wakin: “Ja enabudan, pepabuki”, ikin nuku jiwekuinmaikiki.

<sup>1</sup> Janua yudabun chakabuwakin Diosun yusian chibankubainabumawenan, nukunan ja shinanma yuikin jatun Dios pepabia kemain jau ana xabakabi jawen duapajaida nuku uinmanun nukubunan, ¿chakabuwakin jeneyamakubainankanpa? <sup>2</sup> ikin jaskakidi shinain janchatimajaidaki. Jakia tsuada ma mawa maiwabu ana chakabuwatidubuma keskakin Satanásan padanti jancha chibanma dasibi nun Jesucristo chibainbun nukun chakabu jenetan nun ana chakabuwen jiwekunkaintidubumaki. <sup>3</sup> Jaska inun, Jesucristo nun ikunwankubainaya yuda betsan nuku nashimabudan, Jesúski nun dasia jabe mawani keska Diosun nukukidi pe shinanmis ¿matunan, man unanmamen? <sup>4</sup> Ja inun, nuku nashimabudan, Cristobe nun mawa keska nuku jabe maiwanibu keskaken nukun shinan chakabu putai nun jiwei benaxanun jawen Epa kushipatun Jesucristo bestenwani keska wakin jiwea bera betsajaidawakin nuku bestenwan keska wamiski.

<sup>5</sup> Nuku nashimabu Cristoki dasia nun jabe mawani keska ana Cristo besteni keskaidan, jiwea benawan nun jawen jiwekunkainaii. <sup>6</sup> Ja dukun nun jawen jiwechakani xeni Cristobe cruzki netantan nun jabe mawani keskaki. Nun jaskaya nukun shinan xeni Diosun nuku betsawamaken chakabun nuku bexetan jawen tsumawakin ana nuku yunutidumaki. <sup>7</sup> Janua tsuada mawakenan, ana jaskatan xanen ibukin chakabun tsumawatan yunutidumaki. <sup>8</sup> Nukubudan, Cristobe nun ma mawani keskaben taea chanima dateama nun jabe ana jiwekuinkunkainxanai nun unaiin. <sup>9</sup> Ja inun, Cristo mawatan ana besteni ana mawatiduma nun unandiaii. Ja yushin padanananmistun ana tenankin maemakin ana binutidumajaidaki. <sup>10</sup> Ja inun, Cristo bestiwai mawakin dasibibun chakabu betsawamaken binu keyuniki. Natian jawen jiweawen Dios besti duawanun ika jabe jiwekunkainikiki. <sup>11</sup> Jaskaben taea matundi shinan bera wai mawa keskatan dasibi chakabu jenebaini Jesucristoki dasitan Dios benimawanun ika jaskakidi besti shinain jiwekubainkanwen.

<sup>12</sup> Jaskaken matun shinan chakabu kemuwen jau matu tsumaxun jamapai betsawamaken binu keyuniki. Natian jawen jiweawen Dios besti duawanun ika jabe jiwekunkainikiki. <sup>13</sup> Jaska inun, matun yuda ana chakabu tsumawamayamakanwen, ja jamapaiwen nukun yuda jawen chakabu watimakidan. Eska wakinan, matun shinan pe mekekin matun yuda jidabi Dios inankin mekemadiakubainkanwen. Ja inun, yudabu mawatan ana bestean keskatan matun yuda pe mekekin matun jiwea Dios inantau pepaxunkubainkanwen, matun yuda jidabiwen Dios duawakinan. Jawa kaneama ja bebxun pepakin akubaikanwen. <sup>14</sup> Man Cristo ikunwanyan Diosun matu pepawaiwen taexun chakabun matu ana bexetan tsumatidumaki. Jaska inun, Dios duawanun, iwanan, jawen yunuti inun jawen nemati Diosun Moisés yusiniwen matu ana mekeamaki. Jakia Dios duapatun matu ma mekeikiki, man jawen daya akaibudan.

### *Chakabu jenebain pepatikiaki, na janchadan*

<sup>15</sup> ¿Jaskai jadidi janchamisbumen?, eska yuidan: "Jaskakenan, Diosun nukun xenipabu jawen jancha yusinitun nuku ana tsumama jakia jawen bake nun ikunwainwen taexun nuku duawakin nukun chakabu buaxanaidan, nun chakabuwaidean, jawamaki. Jamapai chakabu betsawamaken binu keyuniki. <sup>16</sup> Yuda betsawamaken inan januxun jawen xanen ibu ja besti jau dayaxunkin jawen yunua besti axumisdan, man unaiin. Jakia jabiaskadi wakin matun chakabun matu tsumawaken jaskai ja chakabu chibain man jawen mawa kayabi man benuxanaii. Jakia

jaska binumakin Dios man ninkakin chibain jawen jaibuaibu matu wakin jiwekuinmakin jawenabu matu waxanikiki. <sup>17-18</sup> Ja dukun chakabun matu tsumawakin taewaniki. Januxun Diosun matu medabewaya nun matu yusinkubaina ninka pewatan matun juinti jidabiwen nun matu yusiain man ikunwaniki. Natian ana chakabu dayaxunama janua kainkain Dios dayaxunkin pe besti man axunkubainaii. Matu man jaskai ninkai juinti shinan chankankin Dios en kenjaidawakubainaii. <sup>19</sup> Ja inun, dasibi man tapin keyudiamaken matu xabakabi yusinkin jancha bikamawen matu yusinun ninkakanwen. Jawada chakabu pepama Diosun dananmis betsapa betsapa anun ika jawen kemui matun yudawen chakabu idumai man atimapakunkainiki. Jakia jabiaskadi wakin matun yuda Dios inantan pepakin Dios dayaxunkubainkanwen, jawenduai pepakinan. Jaska wakin matun chakabu putai tadi medibi paxkatan man pe besti jiwekunkainxanaii, Dio-sunabuidan.

<sup>20</sup> Jaska inun, chakabun matu tsuma wayukenan Diosun jaska bechipaiai shinanma man jiwekunkainiki. <sup>21</sup> ¿Jawen jaskati man ikunkainimamen? Ja chakabun yudabu jatu debuwamis jawen benuti bai man chibankubainimadan, natian shinan betsya watan man jawen dakeaai. <sup>22</sup> Jakia chakabun matu tsuma wapauni man ma jeneima jakia natianan, bai pepa bechitan jawama Dios besti man dayaxunkunkainkatsis ikaii. Jaskaken na jaska pepa Dios man dayaxunaidan, jiwekuian pepa man ichawai, natian man jawen medibi jiwekunkainai inun atimas jawen jenekin jiwekuianwen jawen manakukin Diosun matu inanxanikiki. <sup>23</sup> Jaskaken tsuabunda chakabuwakubainmisbu jatun kupiditan, Diosun meketi jayama mawa kayabi bixankanikiki. Jakia nukun Xanen Ibu Jesucristo nun ikunwain nun jaki dasiken jawen taexun Diosun nukun jiwekuinti pepa inan nukun Xanen Ibube dasitan nun jabe jiwei ikibi ixanaii.

## 7

*Jawen yunuti inun jawen nemati xenin ana nuku tsumamakiaki, na janchadan*

<sup>1</sup> En betsabu inun en puibuun, Diosun yunuti inun jawen nemati man unanjaidaii. Jaskawen taexun ja Diosun yununiwen xanen ibubun yunukin nemakin jatu mekekinan, jabu mawabu akama jakia jiweyuabu besti yudabu yunutidu man unandiaii. <sup>2</sup> Jaska ainbu beneyakidi miyuiwen matu xabakabi yusinun ninkakanwen. Diosun nuku yunukinan: “Tsuabuda beneyabu jawen bene jiweyuken jau jabe besti jiweyukubainunbunwen”, nuku waniki. Jaskaken ma jawen bene mawaken ainbu ana tsuan tsumamaken bene betsya jayakatsis iki beneyatiduki, Diosun ana nemamadan. <sup>3</sup> Jaska inun, jawen bene mawadiama ja ainbu juni betsabe uinanain atiyai chakabumisbuki. Jakia tsuada jawen bene ma mawaken janu juni betsabe xabakabi ana jiwekatsi ikai jawa chakabumaki.

<sup>4</sup> Man ebetan Jesús chibainbu, en betsabu inun en puibuun, matudan, man jaska keskaki. Matu yuinun ninkakanwen. Diosun bake mawa ana bestenwani jaki dasi man jabe mawani keskabudiki, ana jawen yunuti inun nematiwen matu tsumamadan. Jakia jawenabukin jamapai Diosun bechipaiai jawen daya axunkin man benimawa bestikatsis ikaii. <sup>5</sup> Janua nun jiwei taeaitianan, jawen chakabu unanti Diosun jawen yunuti inun jawen nemati yununiki. Ja shinankin nun tapinbiaya chakabu betsya betsapa nuku anua kemu taxniaiwen nun chakabupauniki, jaska jawen jiwestima chakabu mawa kayabiti besti bidan. <sup>6</sup> Jakia ma nun Cristo ikunwainbu nun ma jabe mawa keskaken ja dukun Moisés Diosun jawen yunuti inun nemati

kenemaniwen nuku ana yunuamaki. Jakia natian ana kene xeni ana paema nun chibankamen Yushin Pepa kushipatun besti nuku yusinkin nuku pe mekekubainikiki, bai bena nuku chibankamen.

### *Chakabun yudabu padanmiskiaki, na janchadan*

<sup>7</sup> Jaskaken nun shinankin yuiaidan: “Diosun yunuti inun jawen nemati ¿jawen chakabukin dananmatimen?” Jaskamaki. Jaska Diosun Moisés jawen yunuti inun jawen nemati kenemabianiken jawen yusian en ninkaisma chakabu jakidi en tapianma ikeaniki. Jakia Diosun nukun xenipabu yusinkin: “Jawada yuda betsana shinain jawen kemuyamakanwen”, ini ja en tapianma jawen kemuti chakabu en unanma ikeaniki, kemu Diosun nemabianikenan. <sup>8</sup> Nukun shinan chakabu kainkinan, nuku eska wamiski. Ibubis nukun shinan shinain jawada taxniai uin shinan chankankin kemukin ibubis nukun yudan yunuaiwen benimakin nun chakabuwamiski. Jaskaken jawen yunuti inun jawen nemati jayamaken chakabu jamen jawen kushipa jayama mawa keska ikeanaii. <sup>9</sup> Jaska inun, Diosun yunuti inun jawen nemati en tapindiamen jiwei pea keska en ikunkainiki, jaska wakin Diosun ea kupixanai unandiamadan. Jakia jawen yusian en ma tapiyanan en shinan chakabun ea jiwmachakaxun yunumis jatun tenankin ea benui kai en unaniki. <sup>10</sup> Jaskaken ja yununi pepatun ea jiwea inain dabanen en ikai en jawen tenan mea keska en uiniki. <sup>11</sup> Janua Diosun bemakis jawen jancha yununiwen chakabun ea bepadantau ea kanemaniki. Ja Diosun yununi pe dabanen en ikai jatun ea tenan kayabi waniki.

<sup>12</sup> Jaskaken Diosun jancha kenenibudan, jadan, medibidiki. Ja inun, jawen yunuti inun jawen nematidan, medibi jawen kanetima pepa bestiki. <sup>13</sup> Ja yusian pepa jawenduabiatunan, ea mawa kayabi anu iyuaidan, ¿pemen? Jaskamajaidaki. Ja en chakabu amisdan, jaska chanima xabakabi kayabi en chakabu taxnikin chakabun ea padankin yabutan ea kanemakin jatun ea tenan keska waniki. Chanima jawada Diosun bechipaiama nemani aki nun chakabumisdan, jadan, pemajaidaki. Chakabudan, Ðiosunamaki. Jaskadan, danamiski.

### *Jamebi Pablon chakabu maematiduma inikiaki, na janchadan*

<sup>14</sup> Dios anua yunuti yusian pepa Moisin jatu yusinbianiken Criston kushipa shinanma babukin Diosun jancha en chibankamen. En jaskaya chakabun ea achikin tsumaxun ea yabumiski. <sup>15</sup> Jaskaken jawada pepa besti en akatsi ikai akama jawada ja danankin en bechipaiamabia ja en bechipaiai akin itsa wakin babutan en amiski. En jaska akeakemisdan, en unanmajaidaki. <sup>16</sup> Jaska inun, chakabu en akatsi ikamabia Jesúsun kushipa jakimakin en akaya jaska Diosun yunuti inun jawen nemati jiwea pepa besti yusinmiswen: “Yusian peki”, iwanan, en shinankubainaii, en chakabuwen dabin tenekin shinainan. <sup>17</sup> Jaskawen taexun ean en akamabia en shinan chakabun ea tsumayuxun jawada pepa jakimawatan ewen jiwxexun ea amamiski, chakabu amakubainikan. <sup>18</sup> Ja inun, Yushin Pepatun kushipa shinanma jawada pe en akatsis ikai emebi en shinan kushipawen taexun en akaidan, babuki. Jaska en yuiaidan, eskaki. Jawada pepa anun ixun emebi en shinanen ja bechipaiai en atidumaki. <sup>19</sup> Jaskawen taexun jawada pe besti en akatsis ikai ja akama ja chakabu en danamis en pe akaitun besumiski, natian e iki en jawen dakeaidan. <sup>20</sup> Jaskaken en juinti medan chakabu jiweken jawada en bechipaiama en akaidan, ean en akama jakia en juinti chakabun shinanmakin ea chakabuwamamiski.

<sup>21</sup> En pe bestibiakatsis ibiaya chakabu betsapa ewen jiwea ja taxniai uinkin en shinan pema en uinkubainaii. <sup>22</sup> En shinan uke medanwenan,

Diosun yunua besti bechipaikin en akatsi ikunkainaii. <sup>23</sup> Jaskabiaken en akubainai uin chakabun ea bexetan ea tsumawatan en shinan kayabi nematan ea jenekatsi ikamaken jaska Jesús en dayaxunai en pe besti shinantiduma xabakabi en unankubainaii.

<sup>24-25</sup> Jaskawen taexun ekidi matu shinanmanun ea ninkakanwen. Eadan, en pemajaidaki. Iubis en jiweawen Diosun yununi en tapinkin jawen jancha chibain en peai dabanan en imisdan, jaskamajaidaki. En shinan babu chakabun ea yunumiski. Ea en pe jiweismadan, tsuan en yudawen ja Diosun yununi en chibanbiaya chakabun tsumatan en jiwea ea benumakin ea tenainan, tsuan ea medabewatidumabiaken nukun Xanen Ibu Jesucriston ea medabewakin en chakabu ea buaxuniwen taexun Dios besti jawen taexun en kenwankubainaii.

## 8

### *Diosun Yushin Pepa nuku medan jiwxexun nuku mekemiskiaki, na jan-chadan*

<sup>1</sup> Jaskaken natian nun jabu jiwxexun Jesucristo ikunwainbu nun ma jaki dasiabun nukun chakabuwen taexun Diosun nuku dasibi kupiama ix-anikiki, nun ma jawenabukenan. <sup>2</sup> Jesucristo man ikunwainwen taexun Diosun yunua benawan jawen Yushin Pepatun matu ma mekeikiki. Jaskawen taexun matu tibitun matun shinan chakabu taxnimatan man ma shinan betsabunan, jaskawen taexun Satanásan jatun mawa kayabi anu matu yunukatsis ikai Yushin Pepatun nematan matu mekexanikiki, jiwekuin-makinan. <sup>3</sup> Diosun Moisés yunukin jawen jancha kenemanidan, yudabu jatun shinan babuwen taexun jaska waxun chibantidubumaken jaska bebunkidi yubani yudabu babubu jau jatun chakabu jatu buaxuni mawayunun, iwanan, jawen bake yuda babu nukuna keska bimatan Diosun yununiki. Jesús jaskakidanixun jawen mawa kayabimati Satanásan kushipa mebinkin Diosun baken maemaniki. <sup>4</sup> Jaska Diosun Moisés jawen jancha yununi nukubun nun jawa chibankin menetiduma shinankin Diosun jawen bake jatun jau meneyunun yununiki. Nuku jaska waniwen taexun ana jaska yudabu chakabun bechipaiai jiwemis akama jakia jaska Yushin Pepatun nuku yunuai chibain nun jiwekunkaintiduki.

<sup>5</sup> Tsuabuda jiwxexun chakabu tibi ibubis shinain jiwei jawen nuikin jenekatsi ikama ja besti chibamisbuki, Dioski sinatakin jawen yusian chibamna inun jawen jamapai chibantidubumadan. Jakia jawada Diosun Yushin Pepatun nuku amakatsis ikai tsuabuda jaska ikatsis ikai bechipaikin jaskanun ixun Yushin Pepa chibandiakubainmisbuki. <sup>6</sup> Jaska inun, jawada chakabun nuku amakatsis ikai nukun uinti babukin tsuabunda ja besti chibankubainmisbukan, jawen mawatan Diosbe jiweama ixankanikiki. Jakia tsuabunda Diosun Yushin Pepatun bai chibain unanumati jawen nun jiwenun ikai ja besti shinainbu nuku duawakin jawama unanuma nukun jiwea nuku inankubainikiki. <sup>7</sup> Ja inun, tsuabunda Dios shinanma jawada jatunmebi jatun shinanens akatsis ikaibu jaska chibamisbu Diosun jatu shinanma inun Dioskidi shinanbumadiki, jaki pechiabudan. Jabunan, Diosun yusian chibamna inun jawen yunua axuntidubumadiki. <sup>8</sup> Jaskawen taexun tsuabunda jatun kemu pae chakabun jatu mekemisbu jabun Dios kenwankin benimawatidubumadiki.

<sup>9</sup> Jakia natianan, Diosun Yushin Pepa man jaya matuki dasixun matu mekeaya chakabuki pechitan man ana ja chibamaki. Jamen tsuabuda Jesúsun Yushin Pepa jayama jaki dasiama Cristonabumaki. <sup>10</sup> Jakia Cristo matube dasikenan, Yushin Pepa matube jiweaki. Chakabun benukin nuku

tenantidubiaken ja juni Dios nukuwen nuikin nuku pewaniki, jawenawakanan. <sup>11</sup> Janua Diosun jawen bake Jesucristo mawa bestenwanitun man mawa matudi bestenwanxanikiki, jiwea bena matu inankinan. Diosun Yushin man jayawen taexun matun yuda mawatan chapui keyubiamisken ja Yushin matuki dasiatun matu ana jiwemaxanikiki, nai anudan.

<sup>12-13</sup> Jaskaken, en betsabu inun en puibuun, jawada Diosun bechipai iai tsuabunda man shinanma jawada matumebi man akatsis ikai man akubainaiwen taea Dios matuwen nuiama man mawa kayabixanaii. Jakia Diosun Yushin Pepatun matu medabewaya jadatutunda ja chakabu man jeneai matu tenanxuna man janunkain shinan kayabiwen man jiwekubainxankanaii. Jaskaken tsuabunda Jesús chibain ana nukun shinan chakabu babuwens ikama natian jaska Diosun nuku jiwemakatsis ikai jaska bechipaikin yunuai chibantiki.

<sup>14</sup> Ja inun, tsuabuda Diosun Yushin Pepatun medabewakin pe nimamidan, jabudan, Diosun bakebuki. <sup>15</sup> Matudan, ja yushin jatun matu date pae inanmis ja yushin ana matu inankin yabumama jakia Diosun Yushin Pepatun jawen bakebu matu wamamis matu inaniki. Ja Yushin Pepatun nuku janchamakin: “Epaan, En Epa nuikipatuun”, akin kenamakin nuku yuimamiski, <sup>16</sup> jaska wamakin nukun yushinki dasi nanetan nun Diosun bakebu xabakabi nuku unanmakinan. <sup>17</sup> Jaskaken Cristoki nun ma dasabuwen taea nun ma Diosun bakebuki. Jaska inun, yuda betsabun jawada bika nuku tenemaibu Criston tenekubaini keska wakin jawa yuiama nun tenekubainaii. Jaskawen taea naiudi jawa ana bika teneama nun jabe jiwxanaii.

*Dasibi Diosun damiwanin jawen benimati uinxanun ixun jabundi manakanikiaki, na janchadan*

<sup>18</sup> Jaska inun, natian Jesús nun ikunwainbu jamapai bikawen bedubi tenei nun nuitkapayuaibudan, Diosbe nun jiwxanai betsajaida nun ixanaii. Na jiwxun nun teneai inun, na bika nun tenekubainai chipu jawama keska ixanikiki. <sup>19</sup> Mai jidabiki dasibi jabu Diosun damiwan: “Jadatu jawen bakebu kayabimenkain?” ixun xabakabi uinkatsis ikin jin jin ichakayamakin manakanikiki. <sup>20</sup> Jatianda jaskaxanai unanma mai jidabi anu Diosun damiwan bika tenei itimaskakanikiki. Jaskaidan, jatun chakabuwen ikabumaki. Jakia jaska Diosun shinani jabu damiwanibu unanmaken jaska Dios yubakani keska jatu axunxanikiki. Dasibi mai jidabi Diosun jatu damiwan <sup>21</sup> Diosun kupikubainkin jau keyukin yamawaxanun manakanikiki. Diosun jawen bakebu duawakin mai jidabidi duawaxanaiwen taexun dasibi damiwan benimaxankanikiki, mibanan, yuinakadan, bishidan, yudabudan, dasibi betsabu betsapadan. <sup>22</sup> Jaska inun, dasibi Diosun jatu damiwan chakabuwen taea jamapai betsabu betsapu tenekubainkanikiki, jawada isin teneai jau Diosun medabewakin jatu nemaxunxanun manakayuidan, jaska ainbu bake kainkatsi isin betsabu tenei tsekeden imis keskaidan. <sup>23</sup> Jabu bestima nuku dikabidan, nun Diosun bakebunan, jawen Yushin Pepawen jaska Diosun nuku duawaxanai jawen unanti wati yubani nun jaya jawen bake kaya keska wakin yuda bena nuku inanxanai bixanun ika jawada jawen bakebu yubabaini Diosun nuku inanxanai juinti detsupe ixun bika tenekin nun manayuui. <sup>24</sup> Jaska nun manaiwen taea nun ma mekeamaki. Na bika nun uiainwenan, nun jawen mekeamaki. Jakia nun uindiaman ja manakai jiwea jaki nukui nun jawen mekexankanaii, jawada ja Diosun nuku yubanidan. <sup>25</sup> Jabiaskabiaken jawada Diosun mae nai anu kaxun nun uindiaman

nun jawen nuiama Diosun jancha ikunbestiwakin shinan mestenwantan nun manayukubainaii.

<sup>26</sup> Jaska inun, nukun jointi babuwen taexun Diosbe janchakin nun jawa yuitidumabiaken jawen Yushin Pepatun nuku medabewamiski. Jadi Diosbe janchati unanma: “¿Jadakidi ea akin Dios jawa yukaxanpa?” ikin nun shinanyan jawen Yushin Pepa Diosbe janchakin nuku yukaxunmiski, jaska nun yuitidumawen nuku ea axunkinan. <sup>27</sup> Jaska inun, nun Jesús ikunwainbu Diosun nukun jointi unainkiki. Ja dikabi jawen Yushin Pepatun unankin Dios ea akin jabias nun shinain dasi watan nuku yukaxunkubainmiski.

### *Jamapai chakabu Diosun nuku binumaxanikiaki, na janchadan*

<sup>28</sup> Jaskaken matu yusinkubainun ninkakanwen. Jabu Diosun bechipaikin kenakin katuni jawen bake Jesús pepa keskai jau ixanunbun Diosun bebunkidi jatu shinanixun medabewakin jamapai chakabu jatu binumakubainmiski. <sup>29</sup> Janua Diosun bake iyua nukun Juchi Kayabi Iyua Jesucristo ja dukun iniki. Janua jawen betsabu midima ixanaibu bebunkidi Diosun unankin kaindiabuma Jesucristo keskakin nun ja chibanxanunbun bebunkidi Diosun unaniki. <sup>30</sup> Jaska inun, tsuabuda Diosun bebunkidi jatu kabekin katuni Jesúswen taexun chakabuuma wakin pewatan jawada Diosun jawen bake Jesucristo yunutan ani keska wakin jabudi duawakin Jesucristobe jatu xanen ibuwaxanikiki.

<sup>31</sup> Jaskaken Diosun jaska shadabu nuku axuniwen taexun jadatubunda chakabuwakin nuku tenemaibu jabu jawauma keskabuki, Dios kushipajaidatun nuku mekekin binujaidawen taeidan. <sup>32</sup> Jaska inun, jawen bake jawa yaushitaskama yunua taxnitan mawakin nukubu nukun chakabu nuku buaxuniwen taexun nun jabu Jesucristoki dasiabu jawen taexun nuku duawakin jamapai tibi jawen bakewen nuku axunixun Diosun nuku axunkubainikiki. <sup>33</sup> Diosun ma nuku katunixun ma nuku pepawabianiken Dios bebunxun tsuan nuku ja akin nuku chitetidumaki. <sup>34</sup> Jaska inun, Jesucristo debutan jaska bestiama ana jiwei bestenkain nai anu Diosun yusiudi tsauinxun Jesucristo jabe xanen ibukin Dios nuku ea axunbiaya tsua betsa kushipatun Criston nuku pewaxuni nematidumaki. <sup>35</sup> Jaska inun, Jesucriston matu bechipai matuwen nuiaya tsuan matu paxkatidumaki. Na eska shadabunan, na dasibi nuku jatun bika tenemamistun inun, nuitkapiwen inun, tadiumawen inun, pitiumawen inun, nuku bikawaibuwen inun, nuku ichakawaibuwen inun, nuku dedaibuwen inun, mesewatan nuku tenanbiaibun Jesucristo nukuwen nuikin nuku duawai jabun nuku mesewakin dapaxkamatidubumaki. <sup>36</sup> Jaskakidi Diosun jancha yuixunikatun kenekin: “Epaan, nun mia chibankubainmiswen taexun badi tibi nuku ichakawakin tenankatsis ikubainkanikiki. Chaxuwan samama detekatsis imisbu keska wakin nukudi ichakawakanikiki”, aniki, Davidin yuikinan.

<sup>37</sup> Jakia jamapai chakabu betsa betsapa jadatutunda nuku bikawabiaya Jesucriston nuku bechipaiaiwen taexun jamapai chakabu tibi nun binujaidakubainaii. <sup>38</sup> Jaska inun, Dios nukuwen nuimiswen taexun en matu yuiai ninkakanwen. Dios nukuwen nuikin nuku bechipaiaidan, jawa eska shadabun nuku dapaxkamatidubumaki. Eska tibiwenan, mawawen inun, tsuabuda jiwechakabiabun Dios nukuwen nuikunkainaya Satanásan nai tsumabu inun yushin betsabun Dios nukuwen nuikunkainai jabun nematidubumadiki. Ja inun, natian inun uatian ixanai Dios nukuwen nuiai jabun nuku dapaxkamatidubumajaidadiki. <sup>39</sup> Jaska inun, jawada

kushipabu manaundixun inun naman uke medan mai medanxun inun, jabu Diosun jatu damiwanibun jaska shadabun nuku dapaxkamatidubumaki. Nukun Xanen Ibu Jesucristo Dios jawen nuiai jawa dapaxkamama ini nuku uinmanixun nukudi bechipaikin jawen nuiwen nuku jawa dapaxkamadi ixanikiki.

## 9

### *Israelbu kayabidan, Diosunabukiaki, na janchadan*

<sup>1</sup> Jesucristo ean en ikunwainwen taea jaki dasixun ikunkin chanima jancha en matu yuiaii. Yushin Pepatun en shinan mestenwanxun ea yuimai en jawa matu padain chani chakamaki. <sup>2</sup> Eskaki, matu yuinun ea ninkakanwen. Enabu judiobuwen jatuwen nuijaidai juinti nishma punu nuka en jatuwen kaxakatsis ikunkainaii. <sup>3</sup> Jaskaken enabu Israelbun jau Cristo ikunwanunbun jatu medabewanun ika ean eska en jatukidi shinankubainaii. Ea kayabis Diosun jau jatuwen ea kupinun ika jatuwen taea Cristo dapaxkatan jaskatan enabu kayabi en jatu medabewatidu daka ixun jatukidi en shinankubainaii, jau enabun Cristo ikunwanunbunan. <sup>4</sup> Enabu Israelbudan, nukun xenipabu anua Diosun ana jatu ibu wakin jawen bakebu keska watan jatube jiwekin jawen kushipa jatu uinmai jawenduai jatu bebunga chaxajaidakunkainikiaki. Jatu jaska wakin Diosun jawen yunuti inun jawen nemati Moisés yusinmakin jau ichaxun Dios ken kayabi wakubainunbun jatu yusinkin Mesíaskidi jatu yubani jaska manakakin jau chibankubainunbun betsa betsapakidi jatube Dios yubakakunkainikiaki. <sup>5</sup> Jabiadi nukun xenipabu Israelbu anua Mesías Cristo yuda kayabitan taxniniki. Nukun mekenika Diosun dasibibu mekei xanen ibujaidamisan, kenwankin jeneyamakubainankanwen. Jaskakidan.

<sup>6</sup> Jaska Dios Israelbu jatu yubanidan, Diosun jawa betsa wama jawen jancha kushipa jawa benuamaki. Jaskabia Diosun jatu yubani ikunwankin ja Israelin baba ichapabun chibanbumawen taea jabu Israelbu kayabi itidubumaki. <sup>7</sup> Jaska inun, Diosun Abraham yuikin: “Jaska en mia yubaidan, Isaacwen taea min bababu kayabi besti inunbadixankanikiki”, aniwen taea dasibi jabun chibanbuma Abrahamnen bababu jawen bababu kayabi itidubumadiki. <sup>8</sup> Eska jakidi janchani nuku shinanmaikiki. Diosun bakebu yuikinan, jabu jawen xenipabu Abraham inun jawen bake Isaac shinanma jakia jabu jatu yubani jawen yubakani jancha jaska tsuabunda ikunwankin shinankin jakimama axunkubainaibu Abrahamnen bakebu itidubuki. <sup>9</sup> Ja jaska waxanaikidi Diosun yubakin yuikinan: “Chanima ana badi betsatián chintunkidan en matu medabewaya min ain kayabi Saraki min bake wa juni bake kainxanikiki”, aniki.

<sup>10-12</sup> Jaska bestimaki. Betsa Diosun anidan, eska waniki. Jawenabu Diosun katukin jawada pepa inun jawada chakabu yudabun akubainmis shinanma jakia jadatubuda Diosun jawenabu wakatsi ikai besti shinankin jatu katumis man xabakabi unanunbun nukun xenipabu Isaacun bakebukidi matu shinanmanun ninkakanwen. Rebeca tsupibu bake wakin Isaacun nanemaima kaindiamma jawa pepa inun jawa chakabuwadiabumaken bebunkidi Diosun Rebeca yuikin: “Min bake dabe kaintan ja ja kachu Jacob kaiantun jawen betsa ja dukun kaian Esaú tsuma waxanikiki, xanen ibukinan”, aniki.

<sup>13</sup> Januxun chipu ana Isaacun bakebukidi Israelin baba Yavé Diosun yuikin: “Jacob besti bechipaikin Esaú en dananiki”, akin Diosun jatukidi yuiai Malaquíasin keneniki.

### *Tsuanda Diosun shinan yunutidumakiaki, na janchadan*

<sup>14-15</sup> Jaska inun, Diosun Moisés yuikin: “Jadatudawen en nuikatsis ikai jatuwen nuikin jadatuda en duawakatsis ikai en jatu duawakubainmiski”, ikin jadatuda dukun kaini shinanma ja dabetan juinti unankin bestichai katukin ¿Diosun kanenimenkain, pepa wamadan? Jaskamaki. Jawen shinanen besti akubainiki. <sup>16</sup> Yudabu jatun shinanwen jaska bechipaikin jawada ibubis binun ika jin ikai Diosun jadi shinainsmaki. Jakia tsuabudawen nuikin Diosun jamebi jatu katumiski. <sup>17</sup> Jaska inun, chipu Diosun xanen ibu Faraón kupikatsi shinanbiakin yuikin: “Faraónen, en kushipa miwen jatu unanmakatsis ikin mia katukin dasibi Egipto nawabun xanen ibu en mia waniki, jau miwen taexun en kushipa inun en kena mai jidabi anu jiweabun jau unanxanunbun”, ikin jakidi Diosun Moisés janchamai Moisin ninkatan jakidi <sup>18</sup> kenenidan, yuda betsabu Faraón ani keska wakin jabu ja keskabuwen nuiama Diosun jatu besu kushi wakin juinti ninkaisma wakatsis ikin jatu jaska wamiski. Janua jadatudawen Dios nuikatsis iki jatuwen nuimiski, bechipaikinan.

<sup>19</sup> Diokid man shinain: “Jawada Diosun nuku amakatsi ikai tsuabunda jawen shinan nun bextetidumaki, jaki kayakinan.” <sup>20</sup> Ja inun, matunan, jaskakin Diosun jamapai wamis jawen shinan unanmabia ¿jaska jawada wamiskidi chitekin man yukatidumen? Na keskaidan, mai kenti janchakin mai mabu dami wanika yukakin yuikin: “¿Jaskakin min ea jaska waimamen?” itidumaki. <sup>21</sup> Jakia jaska ainbun mai mabu wakin jabias mai kenti dabe wakatsi ikin betsabu jaki jamapai wati shumu jawendua medibi wakin inun betsabu kenti kayabi jawendua bexmas dasibituna jatu waxunmis tsuan nematidumaki. Jaska keskadi wakin Diosun jatu akeakemiski.

<sup>22</sup> Jaska yudabun jatun chakabuwen Dios danainbu Dios jatuki sinatakin mawa kayabiwen jatu kupixanai inun, ja besti kushipajaida Diosun yudabu unanmakatsi ikin jaska jawen kushipawen jawaida akama tenexun manayukubainikiki. <sup>23</sup> Jabatiandi bebunkidi Diosun nuku duawakatsis ikin jawen kushipa nuku uinmanun ixun nuku tibi nuku katukin shinanmisdan, nun ma jawenabu nuku unanmaikiki. <sup>24</sup> Jaska tibi nukukidi akinan, nun judiobu bestima judiobumadi Dios jatuwen nuikin jatu duawakatsi ikin bebunkidi jaska tibi nuku dasibi katuniki. <sup>25</sup> Jaska nawabuwendi Dios nuikin jatun chakabu buatan jawenabu wakatsis ikin jaska waxanaikidi jaska kene jaya Diosun Oseas yuia kenekin:

“Nawa betsabu en jatu katuama ibiani jatukidi yuikin:  
‘Enabuki’, akin en jatu katutan kenaxanaii.

Jatukidi shinankin en jatu bechipalama ibiani  
janu ana jatu dananma jatu bechipaikin jatukidi yuikin:  
‘En ma jatu bechipaiai enabuki’, akin en jatu kenaxanaii”,  
iniki, Diosdan. <sup>26</sup> Ja inun, jabianuxuns ana jatu yuikin:

“Matudan, man enabuma ibiani jakia en matu katukien:  
‘Man Dios jiweatun bakebu’, matu kenaxankanikiki”,

aka ninkatan Oseasin kenexuniki. <sup>27-28</sup> Jaska inun, Israelbukidi Isaíasin yuikin: “Unanxubida akama jaska jawen janchawen yubakani jawaida menekin axanikiki, mai jidabi anu jiwebaunabu jatun chakabuwen Diosun jatu kupikinan. Januxun Israelbu midimajaida mashitibiabun eskadabes Diosun jawenabu watan jabu mekepakexanikiki”, <sup>29</sup> iwanan, Diosun jatu kupidiamma Isaíasin ana yuikin:

“Nukun Epa Dios kushipajaidatun nukunabu Israelbu kupikin  
texe wama inidan, nun jayamadi ikeanaii,  
jaska Sodoma maewan anuabu inun Gomorra maewan anuabu

Diosun jatu kupikin yamawani keskadan”,  
itan Isaíasindi keneniki.

<sup>30</sup> Jaskaken Diosun yunuti judiobuman chibankin Diosun paxati benamabia jabun Jesucristo jatun shinanen besti ikunwainbu jatun chakabu Diosun ma jatu buaxuntan ana jatukidi chakabu shinanma ikunkainikiki.  
<sup>31</sup> Jamen Israelbu ikidan, jabu Diosun yunuti inun jawen nemati Moisés jawenabu yununiwen jatun chakabu jatu buaxuntan pewatidubu dabanen jaska shinankin Jesucristo ikunwanbumawen taexun Diosun jatun chakabu buaxuntidumaki. <sup>32</sup> Jaskaidan, ¿jaskai inibumen? Jabun ikunwanti pepa jayabumawen taeadan. Eskaki, matu yuinun ninkakanwen. Bai namaki mishki daka nun uianma kai jaki juti itan ja mishki tsakabain nun tin itiduki. Jabiaska keskadiai Diosun yunuti inun jawen nemati judiobun chibankubainai pebiaken jaska shinanma jatunmebi jatun shinanens jiwekin Mesíaskidi jancha danain mishkiki juti ika keskanibuki.

<sup>33</sup> Na jabias yusian Mesíaskidi Diosun jawen jancha yuixunika Isaías yuimakin:

“Uian. En jaska yubakani  
en kushipa mishki keska Jerusalén anu en nichinxanaii,  
jaki juti iki ichapabu tsakabainbaini tin ikubainxankanikiki, ikunwan-  
madan.

Jakia tsuabunda jawen jancha ikunwankin chibainbu  
en jatu jawa dake wama ixanaii”,  
aka ninkatan jadi kenedianiki.

## 10

### *Israelbu Diosun jatu katubiani jawen kakape chibanma inibukiaki, na janchadan*

<sup>1</sup> Jaska inun, en betsabu inun en puibuun, enabu Israelbu jatukidi ean shinain jabuwen nuikin Dios en jatu yukaxunkubainmiski, jau Diosun kupiti mese binukin Jesucristo chibankin ikunwainbu jau Diosun jatu mekexanunan. <sup>2</sup> Israelbun Dios duawakin dayaxunkatsi imisbuwen taexun en jatu kenwantiduki. Jakia jaskai pepabiai jawen jancha kayabi unankin chibanma kanemisbu ean en unaiin. <sup>3</sup> Jakia jaska Diosun nuku pepawamis ja chibankin ikunwanma jatun shinan besti chibain kein ibubis pepai bepadamei xabakabi kenmisbuki, Diosun besti tsuada ma pewaxun jakidi pe besti yuitidu unanmadan. <sup>4</sup> Jaska inun, jawen yunuti inun jawen nemati jancha besti chibankin Dios benimawapaibiabu nuku dasibibun nun atidumaken ja yusini Cristoki jikia jatun xabakabi betsa wakin nukun chakabu buai mawakin ja yununi ana jawen jiwestima wakin Cristo besti nun ja ikunwainbu jau Diosun nuku pepawaxanun Dios benimawai Cristo nuku ixuniki, Diosun jancha Moisin jatu yusini chibain ibubis pepai ana nun jaskayamaxanunbunan.

<sup>5</sup> Jakia jaska Diosun yunuti inun jawen nemati chibain pepawen jiwestidubukidi Moisin yusinkin: “Tsuabunda jawada Diosun yusini chibankubainkin kaneama Dios benimawai jawen yusianwen taea jiwestakanikiki”, iwanan, jatu kenexuniki. <sup>6</sup> Jaskaken tsuabunda shinan betsa waxun Jesús ikunwankatsis ikin yuikin: “Nai anu mapeketan jau nuku mekeyunun Mesías Cristo jaudia nekedidi butekin i bunankanwen”, iwanan, jau jaska shinankin yuiyamakubainunbunwen. <sup>7</sup> Jaska inun, betsadan, betsandi shinan betsawen yuikin: “Janu mawabu bumisbu anu kaxun jau nuku mekeyunun Cristo nedidi mawabu anua xabakan taxnimai bunankanwen”, iwanan, jau jaska shinankin yuiyamadianunbunwen.

<sup>8</sup> Jakia jaska Diosun jancha nun chibantidukidi jawen jancha yuixunikatun yuikin: “Diosun yusian man jayaki, matun uinti medan man jakidi shinamis inun, matun kexawen jakidi man janchamisdan”, iniki. Jabias kaka nukundi yusiin nun jawen janchadiakunkainaii. <sup>9</sup> Jaskaken jawada jawen bakekidi jawen jancha yuixunika Diosun nuku kenemaxuni jadatubunda chibankin xabakabi dateama yuikin: “Jesucristo en Xanen Ibuki”, iwanan, jaska Jesús mawa Diosun ana bestewani ikun kayabi waibu jawenabu watan niti akama Diosun jabu matu mekekubainxanikiki, jiwekuinmakinan. <sup>10</sup> Januxun Jesús chibankin matun uinti medan ikunwankin shinain Diosun matu ma pepawaya dateama jaska xabakabi taxnimakin yuikin: “Chanima kayabi Jesucriston en chakabu buaniwen taea en Xanen Ibuki”, ikaibu Diosun matu jawenabu wakin niti akama jabe matu jiwemadiaxanikiki.

<sup>11</sup> Jaska inun, Diosun jancha yuixunika Isaísin kenekin: “Tsuabunda Mesíasin jancha ikunwankin chibainbu en jatu jawa dake wama ixanaii”, aniwen taexun <sup>12</sup> judiobu inun judiobumadan, tsuabunda Mesías ikunwain nukun chakabu jatun nuku buaxunkin betsa tibiwen nuku axuinsmaki. Jabias Xanen Ibu Diosun jatun dasibi meke keyua inananan chakaisma kenwankin man ea akubainaibu jawa yaushiamat uawakin inankubainmiski. <sup>13</sup> Ja inun, Diosun jancha yuixunika Joelin jaskakididi yuikin: “Jadatubunda jawen mekenika ikunwankin ea akin: ‘Yavé Diosun, en chakabu buatan mina ea wawe, mekekinan’”, ikaibu Diosun dananma jatu mekekubainxanikiki. <sup>14</sup> Jaskakenkain jau Diosun jatu mekekubainun jabun Cristo ikunwandiabumanan, jaskatan Cristo ea atidubumaki. Ja inun, tsuabunda Cristokidi yusianbu jawa ninkadiabumanan jawen kakape ikunwantidubumadiki. Ja inun, jatu yusindiabumanuxun Cristokidi jawa tapintidubumadiki. <sup>15</sup> Ja inun, Diosun jancha yusinanbu jabu anu Diosun jatu yunuama kakape Cristokidi jatu yusintidubumaki. Jaskaken Dios yuixunkin jawen jancha yuixunikatun jaskakidi kenekin: “Diosun kakape yusinmisbu jikishinxun Diosun kakape jatu yusain ninkai ja jushianwen taea benimai shinan chankxankanikiki”, iniki.

<sup>16</sup> Jaskabianiken Isaísin yuikin: “Xanen Ibu Yavé Jiweatuun, midimabu mikidi nun jatu yusian nukun jancha ninkatan danankanikiki”, itan kenenii keskai nukundi midimabu Diosun kakape Cristokidi nun jatu yusian ninkabiakin ikunwanbumadiki. <sup>17</sup> Jaskakidi Diosun jancha yusinmisbun Jesucristokidi kakape yusinkubainaibu besti jancha pepa jawendua ninka pewatan yudabun Cristo chibankin ikunwantidubuki, jatun janchawenan.

<sup>18</sup> Jawada Diosun jancha yuixunika Davidin kenekin yusini matu ana yusinun ninkakanwen.

“Yudabu mai jidabi anu manibaunabu Diosun jancha yusinmisbun jabun jatu yusian ma jabun ninka keyuabuki”, iniwen taexun Israelbun dasibi ma ninkakin keyunibu nun unaiin. <sup>19</sup> Jaska inun, emebi ana yuka iki Israelbuman Mesías chibankin Israelbu binuxanaikidi kenekin Moisin Diosun jancha ja dukun yuikin:

“Israelbuma jabu enabuma ibianibun  
matun Mesías ikunwankin chibain ma enabuwen taea  
man jatuwen kemuxanaii.

Jakia matu Israelbu man enabu ibiani  
matu jabuwen kemumakin  
jabu unainsmapakidi man shinanbiamisken  
en matu jaki sinatamaxanaii”,

iniki. <sup>20</sup> Janua badi ichapa kaken jancha kushipawen yuda betsabukidi Diosun Isaías yuimakin:

“Tsuabunda ea benabuma jaska en jatuwen nuimis  
jatu xabakabi en uinmaya  
jabun ea ikunwanxankanikiki.

Jabun ea benamabia eki nukuxankanikiki.

Ekidi jawa yuka ikabumabiaken  
en kushipa en jatu uinmaxanaii”,

iwanan, <sup>21</sup> Israelbukidi yuimakin: “Juinti kushitan jatun besuwen dakeama ea ninkaisbumawen nuikin en jatu medabewapaibia ea ninkabumaki”, aka keneniki.

## 11

*Diosun jawenabu wakatsi ikin Israelbu bebunkidi jatu katunikiaki, na janchadan*

<sup>1</sup> Nukun xenipabu katukin jawenabu jatu wanixun nuku danainsmaki, chanimadan. Jaskawen taea eadan, en xenipabu kayabidan, Abrahamki. Janua jawen baba betsa Israel en xenipabudiki. Ja jawen bake betsa Benjamín anua en jabiadiki. Jaska Diosun nuku yubani shinankin Jesucristo en ikunwainwen taexun ea dananma en chakabu buanixun ma ea mekeikiki, jaska Israel tibi anuabun tsuabunda Jesucristo ikunwainbu jatumekexanai keska wakinan.

<sup>2</sup> Bebunkidijaida Israelbu jabu katukatsis ikin Diosun katunixun nuku dananma imiskidi matu xabakabi yusinkin jawen jancha yuixunika pepa Elíaskidi en matu yuiai ninkakanwen. Bababukidi jawada Elías Dioski ja ikin jaki chania jawen jancha yuixunika betsan kenexunkin: <sup>3</sup> “Yavé Dios Jiweatuun, min jancha yuixunikabu tenankin keyutan januxun mishki chi tapu sa akin keyutan ean besti en mia ikunwain ea tenandiabuma ma ea tenankatsis idiakanikiki”, <sup>4</sup> aka Diosun Elías yuikin: “Dateyamawe. Min mimestimaki. Bababu betsa jabu en jatu mekea 7,000 jayabuki, jabun ea chibain chintuanbuma ja yushin betsa Baal dami ja naman danti itan jabun kenwanbumadan”, akin Elías yuini. <sup>5</sup> Jaskawen taea na jabiatiandi Israelbu ana jatidama jatuwen nuikin Diosun jawen duapawen jawenabu wakatsi ma nukudi katuniki, jau Jesús jabun nun ikunwanxanunbunan. <sup>6</sup> Na jaska nun jabun chibainan, jawen yunuti inun jawen nemati chibain nukunmebi nun pepaiwen taeama jakia jawen pepawen nukuwen nuikin Diosun nuku kenakin nuku katukubainikiki, jau jabun Jesús nun ikunwanunbunan. Jaska nuku wamadan, Diosun pepa jayama ikeanaii.

<sup>7</sup> Jaskaken Israelbu pepatidubu midimabun tapinpaibiabu kanei juinti kushikin unanbuma Diosun jancha jawen jiwekainti biama inibuki. Jaskabiaibun jatidi Diosun katuabun jabun jatun jiwea binibuki. <sup>8</sup> Jaska Dios ninkama juinti kushibukidi Diosun jancha yuixunikatun kenekin: “Jatun pabinki pata keska jatu wakin jatun bedu bekun keska jatu wakin jatun shinan Diosun bexekin jatu jaska waniwen taea natiandi jabun jawen yusian chibantidubuma ikubainkanikiki”, jaska yuini keskaidan. <sup>9</sup> Jaska inun, ana Dios chibabuma ixanaikidi Davidin yuikin:

“Jamapai piti betsa betsapa jaya  
jawen besti beyusi unainsmapai jadakidi paxai kaintidubumaki,  
nawatikis ikabu jau Diosun jatu kupinunwen.

<sup>10</sup> Ja inun, jau jawa ana uinyamanunbun  
Diosun jau jatu bexux wanunwen.  
Ja inun, jamapai bika tenei dayakin

xankamajaida ia kakui tininkunkaini  
jau ana tenejadiakubainunbunwen”,  
iniki.

*Jabu Israelbumabiaken Jesús ikunwainbuwen taexun Diosun jawenabu jatu wakubainikiaki, na janchadan*

<sup>11</sup> Janua man shinanan, Israelbun Jesús danainbun ¿Diosun jatu jene keyunimen? ana ikunwantidubumadan. Jaskamajaidaki. Jakia Israelbu jawenabubia jabun Jesús danainbun januxun Diosun jabu Israelbuma jawen kakape Jesucristowen jatu mekekin taewaniki, jatu jaska wa Jesucristo Israelbuman ikunwainbu uin jau jatuwen kemukin Israelbundi ana shinan betsa watan jabun mekenan Jesucristo jau ikunwandianan unbunan.

<sup>12</sup> Jaskaken jawada Diosun bechipaiai Israelbun danankin betsa betsapa wabiaibun ja jabu Israelbuman jawen bake Jesucristo dananma jabun bechipaikin Diosun kakape Cristokidi ninkatan jabun akai Israelbun shinain chanima jabuwen taexun Israelin baba midimabundi jawen jancha ikunwain bepexexankanikiki, Diosun jatu ana duajaidawakin ibu wayadan.

<sup>13-14</sup> Man ebtan Jesús ikunwain Israelbumaan, en eskaki, matu yuinun ninkakanwen. Jau Israelbuma betsa betsapabu anu en jatu yusinkubaunxanun Diosun jancha yuixunika jawen kushipaya Jesúsun ea waxun ea nichiniwen taea en jawen daya pe jaya axuin en benimakunkainaii. Jaskaken matu yusinkubaunkin jaska Jesucristo man ikunwainbu enabu Israelbu jatu ikunwanmakatsis ikin jaska man ikunwain jawenduai benimaibun jawen jatu kemumakin jatidibudi jatun shinan en betsa wamakatsis ikunkainaii, jau Diosun jatu mekediajanunan. <sup>15</sup> Jaska enabu Israelbun Jesucristo danainbuwen taexun yudabu mai jidabi anu manibaunxun Diosun kakape jabun Jesucristokidi ikunwanbaunaibuwen taexun enabun ikunwankin tae-wadiakin jatun chakabu jenei jaki pechitan yuda mawa ana bestean keskai jiwe kuian bidiae benimaxankanikiki. <sup>16</sup> Jaska inun, misi kapamanai ma bai keyua ja dukun tude Dios inankatsi ikin paxkabu medibi inantiken jabias ja misi kapamanadia jabiaskadi jidabi medibidiki. Jaska keskadi ji tapun betsa yumei ja Dios ibu wamakin medibi wa jawen punyandi Diosunamiski, medibidan. Jaska keskai Abraham inun, Isaac inun, Jacob jabu medibi pepabuwens taea jabun bababudi medibi ixankanikiki.

<sup>17</sup> Nun judiobudan, olivo ji kayabi keskabuki. Jakia jawen punyan babu betsa mextetan olivo mebi betsa kushipa jaki tsamintan nea dasibi jabias tachanua jawen xuku jawen namibe jusitan jabias yumemis keska Abrahamnen bababu Diosun jatu watan Israelin baba betsabun Dios chibankin ikunwanbuma Diosun olivo punyan mextea keska wakin jatu danantan matudi Diosun jawenabu wakin Abraham matun xenipabu keska matu wadia akeakekikiki. Jaskaken Dios jawenabu Israelbuwen nuikin jatu duawakubainxanai Diosun Abraham yubani keska wakin man Israelbuma matubudi Abrahamnen bababu keska watan matuwen nuikin matu duawaikiki, olivo kushipaki tsamian jaki nea keskawakinan.

<sup>18-19</sup> Janua tsuabuda janchai: “Eadan, en Israelin babamabia Diosun jawenabu ea wakaksis ikaiwen taexun jaki ea dasiwanun, iwanan, Israelbu danantan jawenabu ea waniki”, iki matumebi kenkin shinan chakai jatukidi enjen iyamakanwen. Jakia man tacha ibumabia man jawen punyan besti man jaki neaki, jawen tachan matu jiwemaidan. Diosun besti jawenabu matu waiwen taea keanma Dios besti shinankin duawakin kenjaidawakubainkanwen.

<sup>20</sup> Eskawen taexun jatu mextea keska wanidan, matu yuinun ninkakanwen. Jabunan, Diosun jancha ikunwanbumawen taexun jatu jeneniki. Jakia matubu madiastun man ikunwainbudan, jawenabu matu waikiki. Jaskawen taea jawen keanma Dios bestiki mesekubainkanwen.

<sup>21</sup> Chanima Diosun Israelbu dukun katubianixun jatu dananiki. Man jabu keskadiken matu jabiaskadi wakin danantiduki. Shinaindakubainkanwen.

<sup>22</sup> Uinkanwen, Diosdan, nukipa jawenduaki. Jaskabia jawen yunua mesten binumaismaki. Jabu chintuainbu danankin jatu kupimisxun matu man Israelbumabiaken matuwen nuikin duawakin jawenabu matu wa akeakekubainikiki. Jakia jaska ji punyan babu mextexun putamisbu keska wakin matundi jawen shinan chibana man chintuainbu Diosun matu danantan matu kupidaxanikiki.

<sup>23</sup> Jaska inun, Israelbu jadatubunda jatun shinan chakabu jenetan chintunkidan ana ikunwankatsis ikaibu ana Abrahamnen bababu kayabi wakin Diosun ana jawenabu jatu waxanikiki, jiki ana netan keska wakinan.

<sup>24</sup> Jamen man judiobuman badi ichapa Dios man dananbiakubainaya atimas Dios matuwen nuiaya jawen kakape Jesucristokidi nun matu yusianyan shinan betsa watan man ikunwainbundi ana jabiaskadi wakin Israelin baba kayabibun shinan betsa wadiatan ichapabun ana chintunkidan chanima Jesús ikunwandiaxankanikiki, bebunkidi Diosun jatu katunibunan.

*Israelbu Jesucristowen taexun atimas ikunwainbu Diosun jatu mekexanikiki, na janchadan*

<sup>25</sup> En betsabu inun en puibuun, Diosun kushipawen unanepai jawen man kenyamaxanun bun jawada Diosun matu axunkatsis ikai jaska jawen yubaka junea janchani man unan keyuxanun bun matu yuinun ninkakanwen. Jaskai Israelbu jointi kushikin ichapabun Jesús ikunwanbumaki. Jaskaken Israelbuma jatida Diosun meketan januxun ichapabu Diosun Israelbu jabu ana mekediaxanikiki.

<sup>26</sup> Jabu jaskabaunaibun Israelbu midimabun ikunwandaibun Diosun jawenabu jatu watan jatu mekediaxanikiki. Jaska wai kaikidi jawen jancha yuixunikatun kenekin:

“Matun mekenan Mesías Israelin baba Jerusalén anua kaintan Jacobun bababu jatun shinan chakabu betsa wamakin

<sup>27</sup> jaska ea Dios en jatukidi yubakani  
jabun chakabu buatan en ana shinanma ixanaii,  
jatun mekenan Mesías jukenan”,  
iniki.

<sup>28-29</sup> Januxun tsuabuda Diosun katutan jabuwen nuikin duawamis inun jawada jatuki tanani jawen shinan Diosun betsa waismawen taexun Abraham inun Isaac inun Jacob jatu katuni jabun bababun kakape Cristokidi danainbu Dios jatuki sinatayuikiki. Jaskawen taea ja jatu maebaun matu jawenabu wadiayuikiki. Jaskabia jatun xenipabun ikunwanibun jakimama jatuwen nuikin Diosun Israelbu jeneama jatu shinandiaikiki.

<sup>30</sup> Uatian jawa Jesucristokidi unanma Dios man ninkama iyupaunibuki, matubunan. Jabiaska keskadiai natian Israelbun Jesucristokidi shinankin Dios ninkabumadiki, man ini keskakinan. Jaskaken Dios natian matuwen nuikiki.

<sup>31</sup> Jaska inun, natian jawen nuiwen Diosun matu jawen duapa uinmakin matu duawaikiki. Jabiaska keskadi wakin ja Israelbu jatuwendu nuidiaxanikiki.

<sup>32</sup> Dasibi yudabu chakabubiaken Diosdan, dasibiwen nuikin janu jawen nui jatu xabakabi uinmakatsis ikikiki, tsuada Israelbu inun tsuada Israelbumakidi jawa shinanmadan.

<sup>33</sup> Jaskaken nukun Epa Diosdan, jawa yupaismaki. Dasibi ninkai inun shinain unanepajaidaki. Ja inun, jaska wakatsis ikin Diosun shinankin jamapai akubainmisdan, jawen akadan, nun jaska waxun tapintidumajaidaki. <sup>34</sup> Ja inun, jaskadada Diosun shinanmis jawen jancha yuixunikatun kenekin: "Diosun shinanan, tsuan ninkatidumaki. Ja inun, Diosun jadakidida shinanyan tsuan medabewakin xabakabi ana jaska waxun yusintidumaki", <sup>35</sup> iwanan, ana yusinkin: "Jamapai betsapa betsapa tsuanda Dios axunbiatan jawen dayawen taexun duawakin jau eadi inanxanun, iwanan, jaska shinantimajaidaki, menan akinan", iniki. <sup>36</sup> Jaskaken betsya tukama tibi Diosun damiwanidan, jawenaski. Jawen kushipawen dasibibu maniabuki. Dasibibu ja jiweabuwen Dios benimakunkainxanun, iwanan, jabu tibi damiwaniki. Jaskaken kenwankin jeneyamakubainankanwen, Diosdan. Jaskakidan.

## 12

### *Jiwea benawen jiwei medabenamekunkaintikiaki, na janchadan*

<sup>1</sup> En betsabu inun en puibuun, nukuwen dabanan ikin Diosun nuku duawakubainmiswen taexun jawada shinankin bechipaiai natian man axunkubainunbun xabakabi en shinain matu yununun ninkakanwen. Jaska Dios kenwankin yuinaka detetan menukin inankin apaunibu keskama jakia natian matun jiweawen Dios duawanun, iwanan, medibi paxkai pepatan Dios matun yuda inankuan keska wakin jawen kemu tapai benimawakubainkanwen. Jaska wakinan, chanima kayabi man Dios kenwaiin. <sup>2</sup> Jaska jabun ikunwanbuma natian mai anu jiwe bestixun jamapai tibi akin shinamisbu keskakin ana shinanma jakia shinan betsya watan jaska Diosun matu jiwemakatsi ikai jaska bechipaiai besti tapinkubainkanwen. Eska jiweidan, jaska Diosun bechipaimis man tapinkubainxanii, pepakinan, Dios benimawai kemu tapakinan, kanei jawa chintuanmadan.

<sup>3</sup> Jaskaken Dios ewen nuikin ea duawakin jawen jancha yuixunika kushipa ea waniwen taexun matu yusinun ea ninkakanwen. Jaska matu tibibu Diosun duawakin matu ikunwanma akeakea shinankin unantan matumebi shinan chakakin yuikin: "En juni pepaken Diosun ea katuniki", iwanan, shinain ibubis kenjaidayamakubainkanwen, betsabube janchaidan. <sup>4</sup> Jaska inun, nukun yuda jidabi ja pabu tibi nebauna daya betsya tibi jayaki, jaskamadan. <sup>5</sup> Jaska keskadi nun yuda ichapabubia Cristoki dasia nun yuda bestichai keskaki, nun jabun Cristo dayaxunai pabu betsya tibibia nun jabias yuda bestichai keskabuki.

<sup>6</sup> Nun jaskawen taexun nuku tibi jawen dayati kushipa nuku inanmiski, jaska nuku tibi nuku inankatsis ikin inankinan. Jaskaken Dio- sun jawen jancha yuixunika jadatuda matu katua ikunjaidawai jawen kushipa jayakin xabakabi jawen kakape jatu yusiin janchakubainkanwen.

<sup>7</sup> Jaska inun, tsuabuda jawen medabenanti kushipa jatu inanken jau jabias medabenanti kushipawen ikunwain betsabu jau jatu uinmakin medabewakubainunbunwen. Jaska inun, tsuabuda Dios jancha yusinan kushipa inanken ikunwainbu kushipa wakin jatu yusinkin jau tapinmakubainunbunwen. <sup>8</sup> Jaska inun, tsuabuda Dios anua shinan chankanwen jatu chibamatidu kushipa bitan ikunwainbu betsabu medabewakin jau Jesucristo jatu chibamakubainunbunwen. Jaska inun, tsuanda jawada bitan medabenankatsis imisbudan, yaushiamaa jau jatu inankin uinmakubainunbunwen. Jaska inun, tsuabuda ikunwainbu betsabu medabewakin meketidu kushipa wakin jaya wabudan, kaneama jau uindakubainunbunwen. Jaska

inun, tsuabuda yuda betsa nuitapaibuwen nuimis kushipa jaya shinan chankanwen jau jatu medabewadiakubainunbunwen.

*Jesús chibain jaskai jiwitikiaki, na janchadan*

<sup>9</sup> En betsabu inun en puibuun, yuda betsabuwen nui bechipaikin tsua padanma chanima kayabi uinmakin jatu medabewakubainkanwen. Jaska inun, jawada pe besti beya wakin jawada chakabu akama jenekin danankubainkanwen. <sup>10</sup> Ja inun, matun betsa kayabi keska wakin ikunwainbu betsabu jawada pepa man amis shinanma jakia ikunwainbu betsabube medabenamekin jabube nuinamei duanamekubainkanwen.

<sup>11</sup> Ja inun, jawada nukun Xanen Ibun bechipaiai dayaxunkin ibubis chikishama jamapai tibi shinankin jointinin shinain benima paewen axunkubainkanwen.

<sup>12</sup> Ja inun, Diosun matu yubani jawa betsa wama ixanai unankin man manaiwen taea benimai jiwekubainkanwen. Ja inun, matu ichakawaibu bika tenei chintuanma mestenkubainkanwen. Jaskakin Diosbe janchakin jamapai tibikidi yukai jeneyamakubainkanwen.

<sup>13</sup> Ja inun, matubetan ikunwain betsabu mabu yupaibu jawada man jaya paxkaxunkin jatu medabewakubainkanwen. Ja inun, ikunwain betsabu janiada matuki bai beabu matun jiwe anu ixun pimatan jatu uxankubainkanwen.

<sup>14</sup> Ja inun, tsuanda matu ichakawaibu jabiaskadi ana shinanma jatukidi pe besti yuikin jatu jancha wakubainkanwen. Jaska wakin pepakidi Dios jatu yukaxunkubainkanwen, chakabukidi yupukin Dios jatu yukaxunamadan.

<sup>15</sup> Ja inun, tsuada juinti benimai shinan chankainbube jabiaskadiai jatubedi benimai shinan chankankubainkanwen. Ja inun, tsuada bika teneai juinti nishma punu nukaken jabiaskadi jabetan shinandiakubainkanwen.

<sup>16</sup> Ja inun, man jatubetan ikunwain jabube jiweadan, jatube ja ikama duanamei unanuma jiwekubainkanwen. Matunmebi keanmadan, jabun jawada jatun jamapai shinanma jakia jabu shinan pepa jaya keinsbumabe jaibunamekubainkanwen. Tsuanda shinain: “Ea besti unanepakin en pwamiski”, ikin jatu mesewakin dakewayamakubainkanwen.

<sup>17</sup> Ja inun, yuda betsabun matu ichakawabu ana jatube manakunanya-makubainkanwen. Ja inun, jawada pepa yuda betsabun bechipaikin matu yunuabu chibankin man jaskadi akaidan, jatu bebunxun xabakabi axunkin uinmakubainkanwen. <sup>18</sup> Ja inun, yuda betsabu duawanun, iwanan, dasibi pepa man akubaintidubu besti aki jatube unanuma jiwei pekatsis man ikaidan, dasibibu daewakubainkanwen. <sup>19</sup> En betsabu inun en puibuun, matuwen nuikin matu yuinun ea ninkakanwen. Yavé Diosun jatu yuikin: “Tsuanda matu chakabuwai ibubis en jatu kupixanaii”, ikaya nuku kenexuniki. Jaskawen taea tsuanda matu chakabuwakin ichakawayadan, jau Diosun jatu kupixanun ibubis jatu kuplama teneyukubainkanwen. <sup>20</sup> Jakia Davidin bake Salomón unanepatun jatu yusinkin: “Matuki pubenbiamisbu jabu buniaibu jatu pimakubainkanwen. Ja inun, unpax manudiaibu amadiakanwen. Man jatu jaska waidan, pepa besti man jatu axunkubainkatsis ikai uin dakei besu xanabidi ixankanikiki”, anikidi jabiaskadi shinankin chibandiakubainkanwen. <sup>21</sup> Ja inun, jau chakabun matu maemakin binuyamanun jaskawen taea matunan, pepawakin chakabu binumakubainkanwen.

## 13

*Matun gobieno xanen ibubudan, Diosun katumisken ninkakubaintikiaki, na janchadan*

<sup>1</sup> En betsabu inun en puibuun, unanuma nun jiwenunbun jaska juni kushipabu matun xanen ibubu man ninkakubainunbun matu yusinun ninkakanwen. Jaska Diosun amis jabun unanbumabiaken dasibi xanen ibu betsa betsapa mai anua katuxun Diosun jawen kushipawen jatu yunukin mistukubainmiski. Jaskawen taexun jatun yusian chibankin jatun yunuti inun jatun nemati dasibibun ninkakin jau chibankubainunbunwen. <sup>2</sup> Ja inun, Diosun jawen shinanen tsuada katukin kushipa wakin yunukin jatu xanen ibu wabiaken tsuabunda jabun jatun xanen ibu yunua danankin chibankatsi ikabumawen taexun jatun xanen ibun jatu kupimaxanikiki. <sup>3</sup> Janua yuda kushipabu matun xanen ibubu Diosun jatu wadan, jau jabu man pepaibu jawen matu datekin mesewati akamaki. Jakia jabun chakabu akin jabun jancha chibanbuma jaskaibuwen taexun nemakin jatu jabu kupikatsi amiski. Jaskawen taea man dateyabi jiwekatsi ikamadan, jatun yunuti inun jatun nemati jancha ninkai pe jiwekin chibankubainkanwen. Januxun xanen ibun chanima man jawa chakabuma unankin jawa chakabu matukidi shinantidubumaki. <sup>4</sup> Jaska inun, man chakabukubainaibun matun shinan man betsa wanunbun yudabu Diosun jatu katua matun chakabuwen jabuan Dios matu kupixunxanai unain gobiernon jatu yunuabuki mesei jatuki datekanwen. Jamen ikabumaki. Jaska kenu chaipa sawea mapuabudan, jatun dau bestimaki. Jakia chakabuaibu jatuki tanadan, kaxemaki, jabun chakabuaibudan. <sup>5</sup> Ja inun, jau Diosun matu kupiyamaxanun, iwanan, matun gobierno xanen ibubu Diosun matu chibanmakatsis ikaiwen taexun jatu kushipa wakin matun xanen ibu wa jabun yunuti inun jatun nemati ninkatan man chibainan, matu kupiai nemati bestimaki. Jakia jaska Diosun bechipaiai akaibu ninkakin man shinantidubuki. <sup>6</sup> Ja inun, matun gobierno xanen ibu Diosun katuatun matu mekekin Dios dayaxunaibuwen taexun matun xanen ibubun jawen medabewati pei jawada matun daya pei man biai matu yukaibu xabakabi inankin jatu pakakubainkanwen, yuda dasibibun pei ichawaxun jatunmebi jatun jawada jamapai biti pei bixun adutan pei texewen jau yuda dasibibu medabewakubainunbunan.

<sup>7</sup> Ja inun, jaska tibi gobierno xanen ibun daya jaya tibi axunkubainkanwen. Jawen medabewati pei jawada mabu bikin inun mae betsa anu piskumakin xanen ibu jau impuesto pakanunbunwen. Xanen ibu duawai jau jaki mesenunbunwen. Ja inun, Xanen ibubukidi shinan chakama shinan pewakubainkanwen.

### *Duapai inun nuikipatikiaki, na janchadan*

<sup>8</sup> Jaska inun, yuda betsabu dibitan jawaida jatu paka keyukubainkanwen. Jaska keskadi shinankanwen. Matube jiweabuwen nui medabenain man jatu dibia inain keskai duanamekubainkanwen. Jaska wakin jatukidi jaska shinankin ja Diosun yununi chibankin matun akin menekin ma kaneamaki. <sup>9</sup> Jaska inun, yuda betsawen nuikin jatu medabewakin Diosun yunuti inun jawen nemati dasibi man chibandiakubainnai. Eskaki, matu yusinun ninkaidakanwen. Diosun jawen nemati yuikin: “Juni ainyanbia ainbu betsabe chutanametimaki. Ainbu beneyabia juni betsabe chutanametimadiki. Mimebi pubenkin yuda betsa kupikin tenantimaki. Tsuanda jamapai yumetsutimaki. Tsuada jamapai mabu jawendua jaya kemutapa bechitan jawen kemutaskayamaxankanwen”. Ana jancha juneama xabakabi uinmatidan, Diosun yunuti binu keyuadan, eska yuiniiki: “Mimebi nui min mekeai keskakin yuda betsa mibe jiweawen nuikin mekekin jatu shinaindakubainkanwen”, aniki, Moisinan. <sup>10</sup> Jaskaken tsuabuda jatube jiwe-

abuwen nuimisdan, jabudan, jawa chakabuma jatuwen nuikin dasibi Dio-sun yunuti inun jawen nemati chibankubainkanikiki, jawa kaneamadan.

### *Jesús ma jua kemajaidakiaki, na janchadan*

<sup>11</sup> Jaska inun, Jesucristo chibankin taewakin Diosbe nun jiwxanai jawen jancha ninkakin nun unanidan, ma ana chaima kemaiwen taea ana jatixuinda jaki chikishama yuda betsa betsapabuwen nuikin jawada Dio-sun bechipaiai menan jawaida tapin jawen mekedikanwen, uatian nun jiweshina keska jaskas shinanmadan. <sup>12</sup> Jaska inun, ana badi ichapama mai anu nun jiweyuaiwen taea jamapai chakabu ewakainaya menan bestentan shinandikanwen. Nai anu Diosbe nun jiwxanai ma kemaiwen taexun chakabu jenedikanwen. Eska keskakinan, soldadobu tsakanamenun ika jawen mane tadi kushipa sawemis keskakin Diosun kushipa bitan jawa dateama Satanás nemakubainankanwen. <sup>13</sup> Jaska inun, jawada chakabu june ana akama nukun jiwea xabakabi jatu uinmai pe besti jiwenankanwen, eska tibi ana akamadan, piti pepa kemutapa ichawatan pichakayamandan. Jaska inun, ana paenyamanankanwen. Kemui ana chutanamebaunyamanankanwen. Jamapai chakabu bechipai kemui jawenchains jakidibis ayamakubainankanwen. Ja inun, jawadakidi ana chitenamei ja iyamanankanwen. Ja inun, jawada yuda betsa jaya uin jaki sinayamadiakubainankanwen. <sup>14</sup> Ana jaska chakabu tibi shinankin akama nukun Xanen Ibu Jesucristoki dasitan jawen kushipawen kushipakin jawen bai kaya tapia besti chibankubainankanwen, pepaidan.

## 14

### *Nun jabubetan Jesús chibainbu yuantomakiaki, na janchadan*

<sup>1-2</sup> Jesús chibainbu nun betsa betsapabuken Diosun nukukidi shinamis matu yusinun ninkakanwen, eskakididan. Jesucristo jabun man chibainbu betsabu ma uinti kushipa jaya shinankin dasibi piti betsa betsapa man pimiski. Janua betsabudi jabun tapin taewaibu uinti babu mestendia-buman nami pisbumaki. Jaskawen taexun tsuada ja yudan ikunwankin taewai jaibu wakin jawada pimis inun jawada pismakidi yuinamei jabe ja idabeama uindakubainkanwen. <sup>3</sup> Ja inun, jadatubunda jamapai piti betsa betsapa dananma pimisbun ikunwain betsabundi piti betsa danainbu jatu ja akin dakewayamadiakubainkanwen. Jaska inun, jabiaskadi wakin yuda betsabun jamapai betsa betsapa pimisbu jadatubunda piti betsa danainbun jatu ja akin dakewadiayamakubainkanwen, Diosun jawa jatu danainsmawen taexunan. <sup>4</sup> Ja inun, jabu xanen ibukin jatu yunuai tibibun jawen dayadu tibi ja akin pewamis inun kenwanmiskenan, tsuada ibumabia madiastun man jatu ja atidumaki. Jabiaskadi wakin nukun Xanen Ibu Jesucriston jamebi jawen dayadubu jatu kushipa wakin jawen bai kayatapia jatu chibanmakin jatu pewakubainmiski. Jaska jatu yunuai shinankin jau axuin jiwekubainunbunan.

<sup>5</sup> Jaska inun, betsakididan, Jesús chibainbu betsabunan, semana tibi jadatuda xaba medibi watan janu ichaxun Dios kenwanun ika ikubain-misbuki. Jakia ikunwainbu betsabun xaba tibi kasmai meshu medan tibi ichaxun Dios kenwanmisbuki, xaba medibi tibi jabisbiakenan. Jaska wakinan, jawatianda xaba betsatian ichatan ikunwain tibitun Dios kenwankin kaneabumaki. Jaska shadabu wakin man ikunwain unantan dakeya-makubainkanwen. <sup>6</sup> Ja inun, jadatuda xaba betsa medibi watan janu nukun Xanen Ibu kenwankin Dios duawakatsis ikin jau janu akubainunbunwen. Ja inun, tsuabunda nami inun jamapai piti betsa betsapa dananma pimisbun

Dios duawanun, iwanan, jau kenwantan pikubainunbunwen. Ja inun, tsuabunda yunu besti pimisbunan, Dios duawanun, iwanan, kenwantan jau jaskas pidiakubainunbunwen.

<sup>7</sup> Janua nukubu tibidan, ana ibubis nun jiweamaki. Ja inun, nun ibubisdi mawama ixankanaii. <sup>8</sup> Jakia nukun Xanen Ibuki ma nun dasiadan, nun ja jiwxexunaii. Ja inun, mawaiidan, nukun Xanen Ibu duawakatsis iki nun mawaxanaii. Natian nun jiweyuabu inun nun mawaxanaibudan, ma nukun Xanen Ibuki nun dasia nun ma jaskadan, nun jawen yudaki. <sup>9</sup> Jaskawen taea Cristo mawatan ana bestenidan, chانيا dasibitun xanen ibunun ika iniki, natian nun jiweabuna inun jabu mawabunadan.

<sup>10-12</sup> Januxun Diosun yuikin:

“En jancha chanima matu yuinun ninkakanwen.

Yuda dasibibu unantan en jatu kopiaya

danti itan ea kenwankin

jaska ea besti kushipajaidatun en jatu kopiaya

ea yuia akeakexankanikiki”,

aka jawen jancha yuixunikatun keneniki. Jaskawen taexun tsuabunda Jesús chibain betsabu jatukidi nun jatu yuainbu inun tsuabunda Jesús chibain betsabu nun jatu danamisbu nun jaska jatukidi janchamis Dios be bun nia nun jaki chaniaya nuku tibi unanti wa akeakexanaiwen taea nukubetan Jesús ikunwainbu ana jatu yuankin dananyamakubainankanwen, nukunmebidan.

*Jawada piti tibi chakabumabiaken ikunwain betsa babu kanematiduken ana pitimakiaki, na janchadan*

<sup>13</sup> Jaska inun, tsuanda Cristo ikunwainkidi jatube ana yuanananya makubainkanwen. Ja inun, nun jatu uinmachaka jau jaska shinain ana nukukidi jancha chakabu yuiyamanunbun jamapai piti tibiwen jabun ikunwain betsa jatu babu watidu inun jamapai piti tibiwen jatu kanematidu ana meama jenekubainkanwen. <sup>14</sup> Jamen ean en Xanen Ibu Jesús en ikunwain en jaki dasiawen taea en shinanan, jamapai piti tibidan, jamebi jawa chakabumaki. Jakia tsuanda jawen shinan mekei jaska shinankin pikatsi ikamadan, jau meyamakubainunbunwen. Chanima jawenadan, chakabuki. <sup>15</sup> Jaskaken Jesús man chibainbu betsabunan, jawada ja piti pisbuma pikin man jatu ichakawaidan, ja piti ana meama jatuwen nuikin ana jawen kein kemuama jenedikanwen. Man jaska wamaken ja ikunwain betsabu Cristo jatu mawaxunbianiken juinti babubu chintuin piti pishta bestiwen benutidubuki. <sup>16</sup> Jaskaken jawada piti shadabu man pimis Diosun matu nemamabiaken Jesúsunabu betsabun ja piti danamisbun jau matukidi jancha chakabukin yuanyamakubainunbun ja piti pebiaken jatu uinmakin ana piyamakubainkanwen. <sup>17</sup> Dios xanen ibuai nun ikunwainbudan, jawada nun pikatsis ikai inun, jawada nuxuti nun akatsis ikai shinain jawen nutimaki. Jakia nukuwen Dios xanen ibuaidan, jawen Yushin Pepatun jaska bechipaiai nuku kanemakatsi ikama inun, nuku unanuma jiwemai inun, nuku shinan chankanwankin benimawakin nuku jiwemaikiki. <sup>18</sup> Ma jaska jiwekin Cristo duawakin jawen Epa Dios benimawayu yudabundi matu uinkin kenwantidubuki.

<sup>19</sup> Jaskaken jawa chakabu ana piama medabenamekin ana jatu kushipa wakin unanuma jiweti benakubainankanwen. <sup>20</sup> Jaska wakin Diosun daya man benuama ixanaii, piti nun pimis shinain ja ikamadan. Chanima dasibi piti pepa bestibiaken jawada pitiwen Jesúsunabu chintunmatidu jadan, chakabuki. <sup>21</sup> Ana ja meyamakubainkanwen, nami betsa pikinan. Ja

inun, jamapai jene paepa akin Jesús chibainbu betsabu man jatu kane-matidudan, ana meyamakubainkanwen. <sup>22</sup> Jaskaken nami piaibukidi inun jamapai nuxuti aka paentidubukidi jaska Diosun matu nemakin yusian jaska man shinain tsuabuda yuiyama jaska Diosun matu yusian besti chibankin shinankubainkanwen. Tsuada Diosun kushipa jaya yudabun nematiki meseama dasibi jawen yudawen jamebi mekei jawa bika teneama benimakunkainmiski. <sup>23</sup> Jakia tsuanda pitikidi shinankin: “Nami en ana pihamaki”, ibiakin pikin kanekanikiki. Jamen betsan pihamadan, jatun shinan kushipa watidubuki. Jamen jaskama jatun shinan babu jayabia pidan, kanei Dioskidi chakabukanikiki.

## 15

### *Matunmebi besti nuiama Jesús chibankin betsabuwen nuikin jatu duawatikiaki, na janchadan*

<sup>1</sup> Ikunwain betsabu juinti babuaibu jaska Diosun nuku jatu medabewa-makubainkatsi ikaikidi matu yuinun ninkakanwen. Cristo jabun ikun-wainbu juinti babuaibu jau kushipadianun bun nun ma nuku dukun jaska jayai nun juinti kushipamis jaska shinankin jatukidi pechiama jatuwen nuikin jatu jakimama jatu medabewakubainankanwen, nukun besti jaska nun shinain keska nun iyamanun bunan. <sup>2</sup> Ja inun, nun ikunwain dasi-bibunan, nuku dapi jiwebaunabuwen nuikin jamapai tibiwen jatu med-abewakin jatu ikunwanmadiakubainankanwen. <sup>3</sup> Eska shinanankanwen. Cristo jamebi jaska ikatsis ikaikidi shinankin katuama iniki. Jakia jaska bebunkidi Diosun jancha jakidi kenenibu menei ikunkainikiki. Jaska Diosun jancha yuixunika Davidin kenekin: “Epaan, mia danankin ea ichakawabu en mia tenejaidaxunaii”, ini keskakin Criston menekin teneniki. <sup>4</sup> Jaska dasibi Diosun jancha yuixunikatun bebunkidi kenenibudan, jaska ja ke-neni tapinkin shinain nun jawen jiwekubainxanun bun nuku axunibuki. Jaskawen taea ja Diosun jancha uinkin tapin nun chintuanma nuku med-abewaya jawen taea benimai nun jiweibi jiwxanai nuku manakamaikiki. <sup>5</sup> Jaskaken Dios matuwen nuikin matu medabewaya jaska matu jiwe makat-sis ikai jawen nui pepa jau matu uinmakubainun wen, jaska Jesucristo jiweni keska matu chibanmakinan. <sup>6</sup> Diosun matu jaska waya matudi dasibibu medabenamekin nukun Xanen Ibu Jesucriston Epa Dios dasibibun jabiaskas shinankin jau kenwandiakubainun bun wen.

### *Israelbuma jawenabu Diosun jatu wakatsis inikiaki, na janchadan*

<sup>7</sup> Januxun jaska Criston matu jaibu wani keska wakin ikunwain betsabube jaibunamekin jatu beyawakubainkanwen, jaskai man pekunkainaya jau dasibibun Dios kenwankubainun bunan. <sup>8</sup> Jaska bebunkidi nukun xenipabu Diosun yubaniwen taea jaska Dios chani chakaisma jaska yubai janchani jaska shadabu Dios yubakani menei Cristo nun Israelbu anu taxnini ki, duawakin nuku medabewanun ikadan. <sup>9</sup> Jaska nukukidi bestima man Israelbumawendi taea Cristo taxnidianiki. Jaskakidaniwen taexun man Israelbuman Dios duapajaida man kenwandiakubaintidubuki. Jaska be-bunkidi Diosun jancha yuixunika David jadidi nawai kenekin: “Jaskawen taexun nawa xukua betsa tibibun mia kenwain bun jatubetan mia shinankin kenwankin jui kushipawen nawati pepawen en mia kenwankubainxanaii”, iyamaken <sup>10</sup> ana jawen jancha yuixunika betsa Moisin yuikin: “Nawa xukua tibibun, Diosun Israelbu katunibe jatube benimakubainxankanwen”,

iyamaken <sup>11</sup> ana betsandi yuikin:

“Nawa xukua tibi man manibaunabuun,  
nukun medabenan jiweibi jiwea kenwankubainxankanwen”,  
iyamaken <sup>12</sup> jaskakididi Isaíasin yuikin:

“Davidin epa Jesén baba kaintan  
nawa xukua tibbu mekei jatun xanen ibuaya  
jawen taea jabudi Diosunabui  
jaki chiti ikin manaxankanikiki”,  
iniki.

<sup>13</sup> Jaska jakidi kenenibu keska wakin man Jesús ikunwainbu Diosun jawen Yushin Pepatun kushipawen unanuma matu jiwemakin benimawaya jawa chikishama jawen matu duawaxanai pepa manakakubainkanwen.

### *Jesúsun kushipa jaya Pablo dayanikiaki, na janchadan*

<sup>14</sup> En betsabu inun en puibuun, yuda betsabuwen nuikin man jatu medabewamis inun, Diosun yusian man unanjaidai inun, matubetan ikunwain betsabube man pe yusinanamis en jawa chakabu matukidi yuitiduma en unaiin. <sup>15</sup> Jakia matu kenexun bumakinan, chanima kayabi jawada jawen yusian betsa kanei man jakimayamanunbun, iwanan, matu ana shinanmanun, iwanan, en jancha kushipawen kenexunkin en matu yuiaii. Jaska Diosun ea duawakin jawen kakape yuixunika ea yunukin <sup>16</sup> man Israelbuman jawama man Jesucristo ikunwanxanunbun ea jawen kenwanika betsa Diosun ea nichinkin jawen kakape jawen bake Jesúskidi en matu yusinbaunun man Israelbuma anu ea yununiki. Jaskawen taea man Israelbumadi Diosun Yushin Pepatun matu medibi wa jawa chakabuma inankuin pepa keska Dios bebun matu nichintan Dios en matu uinmakatsis ikaii.

<sup>17</sup> Jaskaken Jesucriston daya en bini en axunmiswen taea jaska Diosun ea yununi chintuanma en akubainmiswen taea chani chakama en kentiduki. <sup>18</sup> Jaska kakape bui ea janchaidan, jamapai shadabukidi en janchai kaismaki. Cristokidi besti man Israelbuman man Dios chibanunbun matu yusin en kamiski. Jaska jatu yusin taewakinan, jancha bestiwenma jatu axunkin uinmakin <sup>19</sup> Diosun Yushin Pepatun kushipawen jawada atimaska yudabun atidubuma dami betsa betsapa jaskabiamawakin ea wama en akeakeaya jawen taea kushipakin kakape Jesucristokidi jatu yusinkinan, jaska Israelbuma betsa betsapabudi en jatu chibanmakubainima besti en matu yuiaii. Januxun taewakinan, Jerusalén maewan anuxun en tae-washina mae tibi iake iaketankaini jadi mai pakea betsa Iliria anu en chintuntanyamaki. <sup>20</sup> Jatu yusin kaidan, januxun tsuan Jesucristokidi jatu yusindiabumanu besti en kakunkaunkatsis imiski, januxun Jesucristokidi kakape yusinan betsan ma jatu yusinma anu nashui iki kamadan. <sup>21</sup> Diosun kakape Jesucristokidi man ninkaxanaibukidi Diosun jancha yuixunika Isaíasin kenekin:

“Nukun mekenankidi tsuan jatu banabimadiabumanuxun  
jaska shinainsbuma damas ninkaxankanikiki.

Ja inun, jabun jakidi jawa ninkadiabuman tapindiaxankanikiki”,  
ini keskai en ikunkainaii.

### *Roma anu Pablo jatuki bai kakatsi jatu banabimanikiaki, na janchadan*

<sup>22</sup> Jaska matukidi bai kanun ika jawenchains en shinaniakubaini jaska Diosun ea amai aki yusinkubauni matu anu en kadiamaki. <sup>23</sup> Jakia badi betsatian jaska en shinanyama mae tibi anuxun ma en jatu yusin keyuawen taea natian ana en matukidi shinaiin, <sup>24</sup> samama en matu uin kakatsis ikaidan. Jadi kaidan, España mai pakea anu kakatsi man Roma anu abu janu dukun matube uinanain benimatan jabianua eskadabes matube

medabenantan janua unudi en kaya matundi matun jawadawen man ea medabewa Espana anu en katidu en shinaiin. <sup>25</sup> Jakia natianan, Jesus ikunwainbu Jerusalén anuabu jatu medabewakin jatu pei ichawaxunshinabu jatu buxuin en kayuaii, <sup>26</sup> eska jatu waxunshinabu en jatu buxuainan. Jabubetan nun Jesus ikunwainbu Macedonia mai pakea anuxun inun Acaya mai pakea anuxun jatu medabewakatsis ikin jatukidi yubakatan jatun pei ichawatan Jesucristo ikunwainbu nuitapaibu Jerusalén anuabu inankin jabun ea yunushinabu en jatu buxunyukatsis ikaii. <sup>27</sup> Ja inun, jaska jatukidi shinan pewatan chanima jatu axunshinabuki. Eska shinankinan, jawada jawen katuabu Israelbu Diosun jatu yubani jatu inankin Israelbumadi inankubainaiwen taexun Israelbuman jawada pepa Israelbu jatube manakunankin Macedonia anuabu inun Acaya anuabun jabuan jabu mabuyabun jatun jamapai biti pei yaushiabuma paxkaxun Jerusalén anu nuitapaibu duawakin jatu inankatsi jatu manakamabuki. <sup>28</sup> Jaskaken jatun pei ichawaimabu ja dukun Jerusalén anuabu en jatu pei bumayuaii. Jaska wakin jatu pewaxuntan janua Espana anu jatu yusin kai matu dainbaini en matuki bayuxanaii. <sup>29</sup> Chanima en jaska shinain keska en matuki nukuayadan, jaska Jesucriston jawen duapawen nuku duawamiswen en matube benimakatsis ikaii.

<sup>30</sup> En betsabu inun en puibuun, nukun Xanen Ibu Jesucristowen ja Diosun Yushin Pepan betsabuwen nuiti nuku inanmis jaskawen taea man ea jakimayamanun en matu ea akaii, en daya bikakidi man ea Dios yukaxunkubainunbunan. <sup>31</sup> Jaska inun, jabun Dios danaibn Judea mai pakea anuabun jau ea meyamakubainxanunbun ea yukaxunkin Jesucristo ikunwainbu Jerusalén anuxun jau ja pei jatu ichawaxuinmabu danandiayamaxanunbun Dios jatu yukaxuindaxankanwen. <sup>32</sup> Jaska Diosun ea yunuaya matu anu kai jikitan janua benimai en juindukunyuxanun jaskakidi Dios ea yukadiaxunxankanwen. <sup>33</sup> Diosun jau matu unanuma jiwanmanun jaska en matukidi shinaiin, jaskakidan.

## 16

### *Pablon jawen jaibuaibu anu jawen jancha jatu bumanikiaki, na janchadan*

<sup>1</sup> Cencreas mae anuxun ainbu dayadun ja ikunwainbu medabewamis jawen kena Febe Roma anu kaya jakidi en matu yuiaii, <sup>2</sup> jikiai ikin jaska Jesusunabu man duawamis keska wakin Febe itan jamapai tibi jayama inankin medabewaxankanwen, ea inun nun ikunwainbu betsabuwen nuikin nuku medabewakubainmis kaikikidan.

<sup>3-4</sup> Jaska inun, Prisca inun jawen bene Aquilan ebetan Jesucristokidi yusimisbu en jatu shinamiski. Yudabun ea ichakawaibu jabun ea medabewai ea mawaxunkeanibu inun ewen taea jaskanib bestima nukube ichamisbu Israelbumadi jatubetan nun jatu kenwankubainmisbu Diosun jau jatu duawanun en jancha ea jatu yuixunxankanwen. <sup>5</sup> Ja inun, jabetan Jesuschibain jatun jiwe anu ichamisbudi jabiaskadi en jancha ea jatu yuixundiaxankanwen. Ja dikabi Asia mai pakea anuxun ja dukun Cristo en ikunwanmani en jaibujaida Epénetodi en jancha ea yuixundiaxankanwen. <sup>6</sup> Ja inun, Marían matu dayajaidaxunkainaldi en jancha ea yuixundiaxankanwen. <sup>7</sup> Ja inun, enabu Andrónico inun Junias jabube ea bichinibudan, en ikunwan-diamaken jabun dukun ikunwanibun jaskawen taexun dasibi Jesucriston kushipaya yununikabun jatu unankin jatukidi shinankin kenwanmisbudi en jancha ea jatu yuixunxankanwen.

<sup>8</sup> Jaska inun, en jabetan en Xanen Ibu dayaxunmis en jaibujaida jabe en bechipainamemis Ampliato Diosun jau duawanun en jancha ea yuixundiaxankanwen. <sup>9</sup> Ja inun, Urbanon ebetan Jesucristo dayaxunmis inun en jaibujaida Estaquis xunsa en jancha ea yuixunxankanwen. <sup>10</sup> Ja inun, Jesucristo dayaxuni bika betsapa mebiai chintuinsma Apeles en jancha ea yuixundiaxankanwen. Ja inun, Aristóbulo jawenabube jiweabu jabudi en jancha ea jatu yuixundiaxankanwen. <sup>11</sup> Ja inun, enabu Herodión xunsa ea yuixundiaxankanwen. Ja inun, jawenabubetan Jesús chibainbu Narcisoobe jiweabu en janchadi ea yuixundiaxankanwen. <sup>12</sup> Ja inun, ja ainbu dabetan nukun Xanen Ibu dayaxunkubainmisbu Trifena inun Trifosadi en janchadi ea jatu yuixunxankanwen. Ja inun, ainbu betsapa nukun jaibujaida Pérsiden nukun Xanen Ibu dayaxunkunkainmis ea yuixundiaxankanwen. <sup>13</sup> Ja inun, Dios pejaida dayaxunmis unan keyuaibu Rufo inun jawen ewa en ibu keskadi en jancha ea yuixundiaxankanwen. <sup>14</sup> Ja inun, Asíncrito inun, Flegonte inun, Hermes inun, Patrobas inun, Hermas inun, Jesúsunabu betsabu jatube ichamisbu Diosun jau jatudi duawanun en jancha ea jatu yuixundiaxankanwen. <sup>15</sup> Ja inun, Filólogo inun, Julia inun, juni betsapa Nereo jawen puibe inun, Olimpas inun, Jesús chibainbu dasibibu jatube ichamisbu en jancha ea jatu yuixundia akeakexankanwen.

<sup>16</sup> Jaska inun, Jesús chibainbu dasibibu tibi jatuki nukutan jatu dananma yuka iki jatube ikukunankubainxankanwen. Jaska inun, na nenu jiweabu Jesucristo chibainbu ichati jiwe tibi anuabun jabun janchadi matu bumakanikiki, Diosun jau matu dasibi duawakubainunan.

### *Roma anuabu Pablon ninkatan jatu kenwanikiaki, na janchadan*

<sup>17</sup> En betsabu inun en puibuun, jaskaibu man uinunbun en matu yunuaii. Yusinan betsabun jabun matu padankin nun jaska matu yusinmis betsawakin matu shinan betsamakin matu paxkatidubuki. Uindakanwen. Jaska nun matu yusian man ninkamis keskamaken jatu danankin jatun yusian ana ninkama ana jatube ichayamakubainkanwen. <sup>18</sup> Jaska jabu padananankin nukun Xanen Ibu dayaxunaibudan, jamen ikanikiki. Jaska jabun shinain besti bechipaikin jatun jancha jawendua chenxwen besti jatu jancha wakin yuda betsabu Cristokidi kakape unanjaidadiama bepadankanikiaki. Jaskaken jatuki kemama dunkekubainkanwen. <sup>19</sup> Eska matukidi dasibi pe chaniaibu en matu ninkamiski. Jaska man Dios dayaxunaidan, jawada Diosun bechipaiai unantan man amis inun, jawada Diosun danankin bechipaiai unandiakin man shinan jusiama akeakemis matun shinan unain en matuwen dateama jaska matukidi shinain en benimaii. <sup>20</sup> Man jaskai jiweawen taexun nukun Epa Diosun nuku unanuma jiwemamistun matu medabewaya man Satanás chitekin ja aka jawaida babutan matun mae anua kainkainxanikiki. Man jaska waya nukun Xanen Ibu Jesucriston jawen pepawen jau matu unanuma jiwemakubainunwen.

<sup>21</sup> Ja inun, Diosun jau matu duawanun Timoteo ebe dayamistun jawen jancha matu yunudiaikiki. Enabu Lucio inun, Jasón inun Sosípatron jatun jancha matu yunudiakanikiki.

<sup>22</sup> Ea Tercion Pablon jancha en matu kenexunaitun nukun Xanen Ibu Jesús en ikunwandiaiwen taexun en janchadi en matu yunudiaikiki.

<sup>23</sup> Ja inun, nenu Corinto anuxun ikunwainbu Gayon jiwe anu ichamisbu inun jawen jiwe anu ea jiwematun jawen jancha matudi yunudiaikiki. Ja inun, na maewan jidabi pei mekemis Eraston jawen jancha matu yunudiakiki, Jesúsunabu Cuarton xunskatunan.

<sup>24</sup> Nukun Xanen Ibu Jesucriston matu medabewakin jau matu dasibi duawakubainxanunwen. Jaskakidan.

*Roma anuxun jabun Jesús ikunwainbukidi Dios kenwanikiaki, na janchadan*

<sup>25</sup> Nukun Epa Diosun matu bechipaikin jawen kakape Jesucristokidi datan akin en yusinmis man ikunwambiaibuwen taexun Epa Diosun matu chin-tunmatiduma ja kenwanankanwen. Mai jidabi damiwadiama na jaskakidi Diosun nuku mekei kai badi ichapa junekin tsuabuda yanedi unanmama ibiakunkaini <sup>26</sup> natian ja jancha jakidi jatu kenemakin xabakabi wama ini jaska Dios ikibi initun yununi chanima natian yudabu xukua tibibun ninkatan tapin keyutidubu wani ma nun unaiin, jau Diosun jancha ikun-wakin chibanxanunbunan.

<sup>27</sup> Dios ja besti unanepajaida kenwankubainankanwen, niti ikamadan, jawen bake Jesucristowen taexunan. Jaskakidan.

Jatiski, en janchadan.

Pablo

## CORINTO ANUABU JA DUKUN PABLON JATU KENE BUMANIKIAKI 1 CORINTIOS

### *Pablón jatukidi shinanikiaki, na janchadan*

<sup>1</sup> Jesucriston kushipayawakin Diosun ea shinankin ea katuniken Cristowen taea nukun betsa Sóstenesbetan en Pablón en matu kene bumakin taewaii. <sup>2</sup> Diosun katua Corinto maewanu man jiweabu Jesucristo matu mawaxunkin medibi wakin matu pepawaniwen taexun Diosun jatudi katua nukun Xanen Ibu Jesucristo jabun chibanmisbu dasibibubetan man ikunwainbu ichamisbu tibi anu en matu kene bumai uinbaunxankanwen. <sup>3</sup> Nukun Epa Dios inun nukun Xanen Ibu Jesucriston jau matu unanuma jiwemakin pewakin duawakubainunbunwen.

### *Jawada Diosun jatū axunmiswen taexun Pablón Dios kenwankubainikiaki, na janchadan*

<sup>4</sup> Man Jesucristo chibainbuwen taexun Diosun matu pepawakin duawayá en Epa Diosbe janchakin en matuwen kenwankubainmiski. <sup>5-6</sup> Ja inun, Cristokidi nun matu yusintani man ma ikunwankin chibankubainaya Dio- sun xabakabi matu unanmakin pe janchamakin jakidi matu tapinmakin jawen pepawen Diosun matu duajaidawakubainikiki. <sup>7</sup> Jaskaken man Dios ikunwainbun jamapai jawen aka tibi Diosun matu inankubainai jayatan man axunkubainmiswen taea nukun Xanen Ibu Jesucristo naiudia ana butuai man uinxanai man manakubainaii. <sup>8</sup> Jaskawen taexun Diosun jawa jeneama matu kushipa wakubaini Cristo ana juaya jawa chakabu matukidi yuitidubuma ixankanikiki. <sup>9</sup> Ja inun, Diosun bake nukun Xanen Ibu Jesu- cristobe man jiwekubainxanunbun Diosun matu katunitun duawakin jawa matu jakimakin jenebainama ixanikiki, jaska yubakani amis betsa wakin kaneismawen taeidan.

### *Ikunwain shinan tibiwai paxkatimakiaki, na janchadan*

<sup>10</sup> En betsabu inun en puibuun, nukun Xanen Ibu Jesucriston ku- shipawen en matu yunuai ninkakanwen. Matunmebi paxkanameama shinan betsa betsapa wama unanuma Jesús ikunwainbube jiwekubainkan- wen. <sup>11</sup> Man shinan chakai ja ikin ana unanuma jiweama man shi- nananain paxkanameaibu Cloen enabun ea banabimashinawen taexun en betsabuun, en matu yuiaii. <sup>12</sup> Matu tibikidi ea yuikin: “Nukun betsabu ja idabekin yuikin: ‘Eanan, Pablón nuku yusinmis besti ikunwankin en chibankubainaii’, ikaya betsadi: ‘Eanan, Apolosin nuku yusinmis besti ikunwankin en chibankubainaii’, ikaya betsadi: ‘Eanan, Pedron nuku yusinmis besti ikunwankin en chibankubainaii’, ikaya betsadi: ‘Eanan, Criston nuku yusini besti ikunwankin en chibankubainaii’, ikin jaska yuikubainkanikiki”, ea washinabuki. <sup>13</sup> Ea jaska wabu, Jabaal! ¿Cristodan, nun jaska watan paxkatidubumen? Nun jaska waxun paxkatidubumajaidaki. Man ja ikunwanunbun cruzkia ea Pablo en matu mawaxunama iniki. Ja inun, en Pablo man ea ikunwainwen taexun en kushipawen matu nashimabu- madiki. <sup>14</sup> Jaskaken juni betsabudi en nashimamawen taexun tsuabunda yuikin: “Pablón ea nashimani jawada Pablón besti yusiaín en chibaiin”, itidubumawen taexun Dios en kenwaiin. Eska unankin matun maewan Corinto anuxun Crispo inun Gayo besti en nashimaniki. <sup>15</sup> Jaskawen taexun: “Pablo en chibanyan jawen kushipawen ea nashimaimaki”, ikin tsuan

yuitidubumaki. <sup>16</sup> Jamen betsadan, en jakimadan, Estéfanasbe jiweabu en jatu nashimadianiki. Yuda betsaa en nashimani en ana shinantidumaki. <sup>17</sup> Jamen ea yunukin: “Ea ikunwantan jatun chakabu jenekatsis ikaibu nashimakubainwen”, iwanan, Criston ea yunuama iniki. Jakia ea yunukin: “Ekidi kakape besti datan akin jatu yusinkubainwen”, akin ea nichiniki. Matu yusin kaxun yusinan betsabu jancha jawendua besti janchamisbu keskakin eadi matu anu kaxun Cristo kenwanma man ea kenwanunbun en matu yusinidan, jamen Cristo cruzkia nukuwen taea mawanidan, jawen kushipa jakimawakin jamen en matu yusinkeaniki.

*Cristodan, yudabun jawen unanepati inun jawen kushipatidubukiaki, na janchadan*

<sup>18</sup> Yudabun chakabu buanun ika cruz anua Cristo mawatan ana besteni ikunwain nun jawenabuwen taexun nun jabu Diosun jawen kushipawen nuku mekexanai nun ma unanyan, jaska shinanma yuda betsabun yuikin: “Nuku tatima yuimisbudan!”, jabun Jesús jaibuwakatsi ikama nukun yusian dananmisbuwen taea jabu mawa kayabi tenexankanikiki. <sup>19</sup> Jaskaken ja yudabukidi yuikin jawen jancha yuixunika Isaías Diosun yuikin: “Jabu unanepabu unainsmapa keska wakin, dasibi tapinkin kaneisbuma unandiamma keskabu en jatu waxanaii, jawadawen unanepamis jawauma keska wakinan. Manayuwe”, aka nuku kenexuniki. <sup>20</sup> Jaska inun, yuda betsabu unanepabiabun Diosun jatu binumiski. Betsabundi Diosun nemati inun jawen yunuti yusinanbiamisbun Diosun jatu binudiamiski. Betsabudi yuda betsabe ja idabekin binubiamisken Diosun unankin dasibibu binumiski. Jaskaken Diosun dasibi unanjaidakin jaska yudabun shinantidu binukin unainsmapabu keska jatu wamiski. <sup>21</sup> Jaska inun, yuda betsaa betsapa unanepabiakin Dios unanbumaken nukun Epa Diosun dasibi unanjaidakin kakape nuku jatu yusinmaya ichapabun danankin: “Tatima ikanikiki!”, ibiaibun nun matu yusianyan Cristo man ikunwainbu jawenabu Diosun matu waniki, niti akamadan. Jaskakin man shinan betsaa watan ikunwanyan matuwen Dios benimakunkainikiki.

<sup>22-23</sup> Jaska inun, dami itimaska besti judiobun uintan besti ikunwantidubuwen taexun Mesías Cristo yumetsu keska mawakin jatun nukun chakabu buani nun yusinmis danankin jabun shinankin: “Jaskai e iskidan nukun Xanen Ibu jua mawakeanamaki”, akin yuimisbuki. Ja inun, ikunwandiamma judiobuman dasibi unankatsis imisbuwen taexun jabun shinankin: “Diosun bake cruz anua mawashina ana besteni tatimabun besti ikunwantidubuki”, iwanan, yuimisbuki. Jaskabiaibun nukun chakabu buakin jawenabu nuku wai cruz anu yumetsu imis keskai Cristo nuku mawaxunikidi nun yusinkubainaii, jatuki e iki dakeamadan. <sup>24</sup> Jaskaken na kakape Mesías Cristokidi betsabun dananbiaibun nun judiobu inun nun judiobuma Diosun nukun katuniwen taexun Diosun jawen kushipa Cristo yunukin jibia keskadi wakin dasibi unanjaidamani ja besti shinankin nun ikunwaiin. <sup>25</sup> Diosun jaska wamis ninkama betsabun kanekin yuikin: “Diosdan, tatimaki, unainsmapadan, kushipa jayamadan”, amisbuki. Jakia dasibi unanjaidakin Diosun yudabu dasibi binumiski. Jawada yudabun ikunwanma dananmisbudan, Diosun jawen kushipa nuku uinmanmiski, nun babubiakenan. Jaskai Dios kushipajaidakin yudabun kushipa binumiski.

*Tsuabuda Diosun katuni ibubis kentidubumakiaki, na janchadan*

<sup>26</sup> En betsabu inun en puibuun, Diosun matu katukin eska matu wakubainmisdan, ninkakanwen. Unanepabu eskadabes besti katukin kushipabudi

eskadabes besti katukin xanen ibubudi eskadabes besti katudiakin yununikabun enabu eskadabesdi matu katua akeakeaniki, jaska yudabun matu uinkin kenwanmis katuamadan. Jaska wakin Diosun nuku katumis jakimama shinankubainkanwen. <sup>27-29</sup> Jaskaken tsuabuda: “En juni pepawen taexun Diosun ea katuniki”, iwanan, shinanyamakubainkanwen. Unanepabu jawauma wakin dakewanun, iwanan, Diosun ja matu tatima waibu matu katumiski. Kushipabu jawauma wakin dakewanun, iwanan, tsuabuda babubu jabu jakidi pechitan yuankin: “Mitanumabuki”, jatuki imisbu Diosun matu katukubaindiaikiki. Tsuabuda yudabun matu danankin pe shinainsbumadan, Diosun matu katukubainmiski. Dasibibu binunun, iwanan, tsuabuda yudabu jaki pechitan shinainsbumadan, Diosun matu katudiamiski. Jaskaken nukunmebi nun pepaumabiaken Diosun matu katuniwen taea nukun pepakidi Dios yui tsua jamebi jawa kentidubumaki. <sup>30</sup> Jaska wakin matu katukin Jesúski matu dasiwakin Diosun jamebi matu katuniki. Jaskaken Jesucristonan, jawen shinanwen nuku unanepa wamiski. Ja inun, jabiatundi nukun chakabu buakin Dios nuku daewaxunmiski. Ja dikabi nuku medibi wakubainmiski. Ja inun, jabiatundi nukun chakabu buatan Satanás anua nuku mebikinaniki. <sup>31</sup> Nuku jaska wanunbadiaikidi bebunkidi Jeremíasin keneni ninkaidakanwen: “Tsuabunda kenwain jamebi keanma nukun Yavé Dios besti jau kenwankubainunbunwen”, iniki.

## 2

*Jesucristo cruzkia nuku mawaxuni kakape Pablon jatu yusinkubainikiaki, na janchadan*

<sup>1</sup> En betsabu inun en puibuun, matun maewan Corinto anu jikitan jancha jawendua kemu paewen matu yusin keanma Diosun kakape uatian junebianiken xabakabi jakidi besti en matu yusinkubainiki. <sup>2</sup> Jesucristo cruzkia mawakin jawada nuku axuni man ninkakin ikunwanunbun ana jamapai miyui tibi betsa betsapakidi shinankatsi ikama Jesucristo bestikidi jas shinankin yusiin en matube jiwekunkainiki. <sup>3</sup> Janua en Jesúsun kushipaya matu anu kaimaxun jaska bebunkidi kenkin kanekatsi ikama babua dateyabi uinti xudubiaxun en matu yusinyukubainiki. <sup>4-5</sup> Janua yusinan betsan jancha jawendua yuiaya ja ninkatan jatun jancha bechipaikin ichapabun jawaida chibantidubuki. Jakia ea matu anu kaxun yusiin janchaidan, unanepa janchamis keskawen en matu yusianma iniki. Jamen jaskama Diosun Yushin Pepa inun Diosun kushipa bestiwen ea amakin matu medabewamaya jaska yudabu unanepakin yusinmisbu keskamawen en matu ikunwanmani man unaiin.

*Diosun jawen shinan juneni jawen Yushin Pepatun nuku inan jawen nuku unanmanikiaki, na janchadan*

<sup>6</sup> Jaskaken man unanepabun Jesú ikunwantan ma pe tapinkin man mestenwain ja unanepa janchawen jaska wakin nun matu jaska yusianan, jawa chakabumaki. Jakia na mai anua jaska xanen ibukin unanepabun ibubis jatun shinanen amisbu keskama inun jabu xanen ibu kushipakin yunubaunmisbu keska jaska kushipa shinanwen nun matu yusinsmaki. Jatun kushipa inun jatun unanepa keyuaya nukuna Diosun nuku inankubainai keyuismaki.

<sup>7</sup> Jaska mai damiwadiama Diosun jawen unanepati jawen shinan juneyunixun nuku matu yusinmaidan, eskaki, ninkakanwen. Chanima Diosun jawen bakewen taexun nuku jawenabu wakatsi nukuki tana yubakaniki.

Jaskawen taea nukubudi jatuki dasitan nun jatu keskadi ipakexanaii, jawendua kushipa chaxakapa buidan. <sup>8</sup> Na jaska xanen ibubun Diosun jatu unanmadan, jaska shinankin nukun Xanen Ibu mastama ikeanibuki. Jakia jawa xabakabi shinanbumawen taexun nukun Xanen Ibu kushipa duapa cruzki nuku mastaxunkin shinanma kanekin itsa wanibuki. <sup>9</sup> Jaskakidi Diosun jancha yuixunika Isaásin Diosunabu kenexunkin:

“Jawada tsuan uinsma inun,  
jawada tsuan ninkaisma inun,  
jawada tsuan shinantiduma  
bebunkidi jabu Diosun bechipaikin ma jatu pewaxuniki”,  
aniki. <sup>10</sup> Nukun Epa Diosun nuku jaska wanunbadiai nun tapintidubumabi-  
aken jawen Yushin Pepatun nuku tapinmaniki. Ja jawen Yushin Pepatunan,  
dasibi unankin Diosun shinain yubakanidi unan keyudiaikiki.

<sup>11</sup> Yuda betsan shinan uinti anuadan, tsuan nun jawa unantidubumaki. Jakia unankinan, jamebi jawen yushinin unainkiki. Jaska keskadi Diosun Yushinin Dios anua unan keyudiaikiki. <sup>12</sup> Yudabun jabun ikunwanbuman yushin nun biamaki. Jakia Diosun jawen Yushin nuku inani jatun Dios anua jawen duapa nuku inankin nuku tapinmaikiki. <sup>13</sup> Nukunmebi jancha tapin unanepanixun nun matu akama jakia nuku janchaidan, jaska Diosun Yushin Pepatun nuku yusinmiswen nun matu amiski, jaska matu mextamakinan. Diosun Yushin Pepatun shinan inun jawen jancha besti nun matu yusinkubainnaii.

<sup>14</sup> Jaskawen taea jabu Yushin Kayabi jayamadan, Diosun Yushin Pepatun Jesúskidi chaniai dananmisbuki, tatimakin jakidi shinankatsi ikamadan. Jaska inun, jaska Diosun Yushin Pepatun bechipaiai jatun shinan unanti wai ninkatidubumadiki.

<sup>15</sup> Tsuabuda Yushin Pepa jayatunan, chakabu inun pepa unantidubuki. Jamen ja Yushin jayamatunan, Yushin Pepa jayabu unanti watidubumaki, chakabu inun pepa waidan. <sup>16</sup> Na jaskakidi Diosun jancha yuixunika Isaásin yuikin: “Diosun shinan tsuan unanmajaidaki. Ja inun, tsuan Dios yusintidumadiki”, abianiken nukubudan, nun ma Criston shinan jayaken jawen Yushin Pepatun nuku yusinkubainmiski.

### 3

#### *Dios dayaxunkin jawen kakape yusinibukiaki, na janchadan*

<sup>1</sup> En betsabu inun en puibuun, en matube jiweyukin jabun Jesús ikunwankin jawen Yushin Pepa ninkakubainmisbu man jatu keskamaken matu yusinkin dama ikunwankin matun shinan mestendiamma man bakeishta keskabuken unanxubida Cristokidi en matu unanmakubainiki. <sup>2</sup> Bakeishta pimakin piti kushi memayuama chuchu dukun jatu beyawamamisbu keska wakin matu tapinmakin unanxubida nun matu yusinkubainiki. Jaska wakinan, ¿jaskadawen taexun nun matu animen? Man jawa nami kushi pia unandiamma keskabuki. Na jabiatianan, man jabiaskaski, jawa piti kushi pitidubuma keskabudan. <sup>3</sup> Man kushipai beyadiama jabias matun jiwea keska shinain man babuwen taea ikunwain betsabube ja iki jatu dabain binunananun ika inun betsakemutapaya ja shinain sinai ikunwanbuma keska shinain man jiweabukiaki. <sup>4</sup> Jaska jancha akeakekin yuikin: “Eanan, Pablon nuku yusinmis ikunwankin ja besti en chibankubainnaii”, ikaya betsadi iki: “Eanan, Apolosin nuku yusinmis ikunwankin ja besti en chibankubainnaii”, ikeakei ikunwanbuma jiwemisbu keskai man betsakemutapaya ja shinain sinai ikunwanbuma keska shinain man jiweabukiaki. <sup>5</sup> Nun jaskadawen taexun ¿man nukukidi shinain ikai? ¿Tsuamen, Apolosdan? ¿Tsuamen, Pabloden? ¿Man jaska nukukidi shinainan?

Nuku dabedan, nun Jesúsun dayadu bestiki. Jaskawen taexun jawen daya nun axuanyan nukuwen taexun man ikunwaniki, jaska nukun Xanen Ibun nuku yununiwenan. <sup>6</sup> Nun Diosun tsuma dabe bestiki. Nuku ana kenwanyamakubainkanwen. Ea dukun matu anu kaxun en matu yunu banakin akawaniki. Januxun Apolosdi kaxun en banatanyama matu miban nashimakin akawayamaki. Nukun dayawen nun matu jaska wabiyaya jakia Diosun ja miban ewawakin kushipa wamis keska wakin ja bestitun matun shinan betsa wamakin ewawakubainikiki. <sup>7</sup> Matu yusinkin matun juintiki Diosun kakape en bana keska watanima miban nashima keska wakin Apolosin chانيا matu medabewatanimaki. Jamen nuku dabedan, nun jawamaki. Jawen kakape matun uinti anu Diosun besti ewawakin yume-wamiski. Jaskaken ja daya nun amisdan, nukunamaki. Epa Diosun daya bestiken ja besti kenwankubainkanwen. <sup>8-9</sup> Jamen matudan, Diosun jawen kakape jexe banamis keska man jawen baiki. Jakia nukudan, nun bai anu dayai keskakin nuku dasibibun nun Dios medabewakubainaii. Betsabun kakape banai inun betsabun nashimabiaya jamapai daya nuku ynuua dasibibun nun pe akubainaiwen taexun Diosun nuku pakakin manakuxanikiki, nukun daya tibi pepawenan.

Junibun jiwe wamis keska wakin Diosun matu wakatsis ikin <sup>10</sup> ea dukun Diosun ea katutan duawakin jiwe wanika unanepa keska ea waken jiwe tekeismawakin ja dukun xantu ewapa watan pukinbaunkin jaki tsam-abidankatsi mishki ewapa en datanbaunkin itsa waniki, matukidi kakape yusinkin taewakinan. En jaska waniken jiwe benibaunmisbu keska wakin juni betsan matu yusinpakeikiki. Jiwe pepawai dayamisbu keska wakin juni tibitun matu ana yusinkin kanemama jau matu pejaidawakubainun-bunwen. <sup>11</sup> Ja inun, ma en mishki buya pewabianiken ana yusinan betsa juxun ana betsa wakin taewatidumaki. Jaska keskadi wakin Jesucristokidi en matu yusin taewanikidi tsuan yusian benawen matu yusinkin ana betsa watidumadiki. <sup>12</sup> Na mishki en bebuyakin taewani anu tsuanda jiwe wakin menenun ixun oro mane kasmai plata mane kasmai mishki jawen daya kaduwen amisbu keskadan, jabun Jesucristo ikunwantan jawen jiwekin matu yusiaibun jatun jiwea keskaki. Jamen juni betsabundi jabias mishki mamaki jiwegianun ixun ji tabla tuax kasmai jepe kasmai tawa akaibu keskadan, jabun Jesucristo ikunwanbiatan jaska Jesúsun bechipaiai keska jiweama jatun jiwea ji tabla tuax inun jepe inun tawa besti keskabuki.

<sup>13</sup> Nai anua nukun Xanen Ibjaida Jesús jukidan jaska jawen yusian chibain nun jiwmis nuku tibi xabakabi nuku unanti waxanikiki. Janu nuku unanti waitianan, nukun jiwea inun nun jawen taea nun dayamis chiwen nuku unanti waxanikiki. <sup>14</sup> Tsuada jiwe kushipa chin menuisma keska jiwmisbudan, jawa chin menuismawen taea jatun manakuti pepa bixankanikiki. <sup>15</sup> Jakia tsuanda jiwea kushipa akama jawen jiwea ji tuax inun tawa inun xenpan besti keskawen taexun chin menukin yamawax-anikiki. Jaska jiwe menuai anua jawen yuda besti paxabiati nai anu Jesucristobe jiweai bitan jawa manakuti jayama jabe besti jiwxankanikiki.

<sup>16</sup> Jaskawen taexunan, ¿matunan, man unanmamen? Man ikunwainbu Dios matubeken man jawen jiwe keskawen taea Diosun Yushin Pepa matuki dasia jiweaki. <sup>17</sup> Tsuanda ja Diosun jiwe chakabu wakin nuitapawamis ja yudadi Diosundi nuitapawadijanikiki. Jakia ja Diosun jiwe medibi pepadan, jibia man matuki, jiwe keskadan.

<sup>18</sup> Betsa betsapabu man unanepakatsis ikaii. Jakia jaska unanepabun ibubis shinankin kanemis Diosun bechipaismaki. Man ibubis kein unanepaibu-

dan, matun shinan danantan ana kenkin jaska shinanma chintuntan jaska Diosun bechipaiai keskai unanepa kayabikubainkanwen. <sup>19</sup> Na mai anu jiwea unanepaibudan, Diosun jatu danankin unainsmapabukidi jatu shinannmiski. Jabiaskadi shinankin en xenipabu Jobun yuikin: “Unanepabun betsa padantan binunun ikaibu Dios unanepa kayabitun jatu bextekin jawauma jatu wamiski”, jatu waya juni betsan kenexuniki. <sup>20</sup> Januxun Davidin yuidiakin: “Jaska unanepabun shinanmis unankin danankin: ‘Jawa unanbumaki’, iwanan, Diosun unanmiski”, iwanan, keneniki. Jaskaken ibubis padanananyamakanwen.

<sup>21-22</sup> Jaskawen taea nun yudabu nun matun yusinan bestibiaken dake-tapakin nuku kenwain junibun tsumabu nuku wayamakanwen. Jamen Dios jawa yaushiamma nukun nun matu medabewanun, iwanan, en Pablo inun, Apolos inun, Pedro inun, juni yusinanbu tibi nuku yununiki. Ja inun, man jiwea inun man mawabu inun na jabiatian inun badi betsa u unuatian dasibi inun mai jidabi Diosun matu yununi man jawen jiweadan, matunaki. <sup>23</sup> Dasibi matu ibuwamabiani, na jaska dasibi man jiweadan, man Cristonaki. Ja inun, Cristodan, Diosunaki, jawen bake kayabidan. Jaskawen taexun Epa Diosun jancha shinankin nuku nun yuda bestibiaken ana nukukidi janchakin nuku kenwanyamakanwen, nukun Xanen Ibu besti kenwankinan.

## 4

### *Jesúsun kushipayabu dayanibu danain eskai jiwenibukiaki, na janchadan*

<sup>1</sup> Nukudan, nun eska bestiki nuku shinankanwen. Criston daya axuin nun jawen medabewanika bestiki. Jaskawen taexun nukun shinan benawatan nuku yununiwen taexun Diosun jawenabu matu wakatsis ikin jawen kakape yubakani junekubidani ma xabakabi nuku matu yusinmakubainikiki. <sup>2</sup> Tsuada xanen ibu betsan jau jawen daya axunun yunuadian, jawen jancha ninkatan chibankin jau uinmakubainunwen, kaneamadan. <sup>3</sup> Man ea danan duakabiaiwen taea jaska bestikidi en shinanyan matun besti man ea atiduki, jaska man yuda ichapabubetan ea unanti wakatsi ikaidan. Emebidan, jaskatan en shinan emebi en unanti watidumaki. <sup>4</sup> Jaska man ekidi shinannbiaya en jaska jiwxun shinanmis en chakabu amismenkain, en pemismenkain, jaska shadabun ea bika tenemamaki. Ean en shinanan, Diosun en chakabu buatan ea pewani jatun besti ea unanti waxanikiki. <sup>5</sup> Janu unantiwati idiamabiaken matumebi nuku tibi unanti wakin ja akin nuku chiteyamakubainkanwen. Janu nukun Xanen Ibu juaitian mananankanwen. Jatun besti dasibi june nun amis xabakabi taxnimaxanikiki, na jaska juinti medan nun jaya nuku bepenxun uinmakinan. Januxun Diosun nukun daya unankin betsa kenjaidawakin betsa bexmas kenwankin ikunwainbu tibi Diosun kenwan akeakexanikiki, manakukinan.

<sup>6</sup> En betsabu inun en puibuun, Diosun jancha jakimama yusinan betsa ichakawama jau betsadi kenwanyamanunbun matu kene bumakin en Pablo inun Apolos jaska nun jiwiemiskidi besti en matu kenexunaii, jau nun imis keskai nuku mawai man jiwekubainunbunan. Jaska Diosun jancha kenenibu besti shinankin matumebi akama yusian betsawen ja kenenibu binumayamakanwen, tapinkinan. <sup>7</sup> Matunmebi shinan chakakin: “Ikunwainbu betsabu nun jatu binuaki”, ikin man kaneaii. Man tsua binuamawen taea jaskayamakubainkanwen.

<sup>8</sup> Jaska inun, matun shinankin: “Dasibi unain jamapai Diosun jawenabu inanmis jaya nun ma xanen ibubuki”, iwanan, ea Pablo inun Apolos man nuku ana shinanma jaskayadan, chanima kayabi matumebi man xanen ibu

mentsisipa kayabiayadan, ana nuitapama nun daka matube xanen ibuxanti. <sup>9</sup> Nukun nun shinanan, nun Jesúsun kushipayabiabudan, Diosunan jawen jenekin nuku nexa daka januxun nuku tenankatsis ikinan, dasibibun nuku uinkin danainbuwen taea nun atimapaki, Diosun nai tsumabu inun yudabun bedubidan. <sup>10</sup> Nukudan, ¿man jaskada nukukidi shinain? Cristowen taea nun tatinmakenan, jakia matudan, Cristowen taea man unanepakiaki. Jamen nukudan, nun babuki. Jakia matudan, man kushipakiaki. Nukudan, nuku ichakawakanikiki, nukuki meseamadan. Jakia matudan, matu kenwain matuki mesemisbukiaki. <sup>11</sup> Na jabia eskatianan, jawa nun pe jiwediamaki, eska teneidan. Nun bunimiski. Nun unpax manumiski. Nun tadi chuka sawea nimiski. Ja inun, yuda betsabun nuku ichakawamisbuki. Medibi jiwe jayama nun jiwemiski. <sup>12</sup> Jaska tenebiai nukun mekenen dayai nun jeneismaki, babuamadan. Nuku yupukin xuun abiaibun nukun jatu kemakinan, pewen besti nun jatukidi xuun amiski. Nuku ichakawakin bika tenemabiaibun nun jawa yuiama tenemiski. <sup>13</sup> Jamapai chakabu nukukidi yuibiaibun unanxubida jancha pewen nun jatu kemamiski. Chaka inun jawada chapuai yudabun putamisbu keska wakin nuku dananmisbuki. Na jabiatian nukun jeneabuma nun ninkakubainaii.

<sup>14</sup> Na eska matu kenexun bumaidan, matu dakewanun ixun en matu akamaki. Jakia matu yusin pewai man en bakebu kayabi matuwen nuikin bechipaiai keska wakin en matu akaii. <sup>15</sup> Natian matun yusinan 10,000tun Cristokidi matu yusinbiaya ean dukun Jesús mekeakidi en matu yusintaniwen taea ea dukun en matun epa kayabi keskaki. Ea jakimayamakanwen. <sup>16</sup> Jaskawen taea en matu yunuai en aka ea chibankanwen.

<sup>17</sup> Man jaska shinanun Timoteon ebetan Cristo chibain en bake keska chintuinsma jau matu medabewanun matu anu en nichiaiin. Ja en bechipaimis-tun nukun Xanen Ibu ikunwankin chibankin jawen yunuti inun jawen nemati axunkubainkin ikunwainbu ichati tibi anuxun jaska en yusinkubauni keska xabakabi Timoteon matu yusin kaikiki. Ninkaidaxankanwen. <sup>18</sup> Matu anu en kama dabanan shinain matumebi patapai xanen ibui man jameen keaiin. <sup>19</sup> Jamen nukun Xanen Ibun ea yunua matu anu jikitan ibubis keainbu unankin jatun jancha danankin jatun kushipa en unanxanaii, jaska man jancha unain ikimenkainan. <sup>20</sup> Janua matu anua Dios xanen ibuaidan, janchawen besti man jatu uinmatidumaki. Jakia matun jiwea Diosun ma betsa waken jawen kushipa man ma jaya uintidubuki. <sup>21</sup> ¿Jaskada en matu wai kaxanai, man bechipaiai? ¿Kaxun jiyaxun daka en matu kupi kaxanti? ¿En daki matu medabewakin duawai unanxubida janchai kaxanti? Jaskaken ewen dateama pe jiwekubainkanwen.

## 5

*Juni betsan jawen aniwai ainwankin ikunwainbu dasibi jatu chakabuwanikiaki, na janchadan*

<sup>1</sup> Ikunwain betsa matu anuxun chakabujaidawai jadi matu anua kaka juai nun ninkaidan: “Ikunwain betsan jawen ibuan ain mebinkin ainwainmaki”, ikaibun jabaa! ¿Ikunwanbiai jawai man jaska jiweamen? Man mesejaidaii. Tsuabuda ikunwanbumabiadan, jaskai jiweabu nun ninkaismaki. <sup>2</sup> Matu anua jaskabiaya matumebi man jawen keaiin, ja juni ja akin juinti nish-mawamadan. Jawa yuiama man jabe jiwea ichakunkainaidan, jaska ja junin matu waidan, nichintiki. Nematan taxnimadikanwen. <sup>3</sup> Natian jadi en yuda en matubemabia en shinanwen en matu anu keskaxun unantan man jaskai jiwea ja juni jawen aniwabe jiwea en matu yunuai ninkakanwen.

<sup>4</sup> En matu anu keskaken Jesús ikunwain matubus ichatan nukun Xanen Ibu Jesucriston jawen kushipa matu inanyan <sup>5</sup> jau Diosun Yushin Pepatun ana mekeyamanun ja junin chakabuwaima kupikin Satanás yunukin inankawan, Satanásan jawen yuda jau jawada tenemanunan. Jaska waniken nukun Xanen Ibu Jesús jukin jau jawen yushin mekei kanunan.

<sup>6</sup> Man eska keskaki. Matu yuinun ninkakanwen. Misi wamisbu man unaiin. "Misi wakin jawen xaxa wati eskadabes kapan xaxai ewapamiski". Jaska keskai jawada chakabu ja junin matu anuxun akin matu daunkin akawabia unanbiai pepai man keaiin, jaskatimabiakenan. <sup>7</sup> Jamen Diosun nai tsuma debuwanikatun judiobun bakebu dunkebaini Egiptonawabun juni bake iyuabu tenanitian shinain Pascua nawakin xaxa wati dasibi judiobun putatan xaxa watiuma misi waxun chaxuwan bake detetan pi nawakubainmisbuki. Jamen nukudan, chanima nun xaxa wati bena keskaki. Jaskawen taea Cristo chaxuwan detenibu keskai nuku mawaxunkin nukun chakabu nun jenexanubun nuku ixuniki. Man ma shinan betsawadan, jamapai chakabu man jayadi jenedikanwen. Jaska waxun xaxa wati misi xaxa wamisbu keskawen matun shinan chakabun matu ana chakabuwatidumaki. <sup>8</sup> Jawada chakabu man amis jenetan ana ichakanikama duapakin jancha kayabi yuikin jawada Jesúsun nuku axuni shinain nawakubainkanwen.

<sup>9</sup> Ja inun, badi betsation kenewen matu yuikin: "Jabu dakeisma chutanamebauni itimaskaibu jatube mapuyamakanwen", akin en matu yusinma ana jadidi matu yusinun ninkakanwen. <sup>10</sup> Matu kene bumakin ikunwanbuma chutanamebaunmisbukidi en keneama inun yuda betsawadan jamapai jayanun ika kemuaibu inun yuda betsawadan padantan yumetsumisbu inun dami yushin itsa bitan kenwanmisbu jadi en matu kenexunama ikimaki, jaska tibi manibaunabu tsuan man dasibi dainbaintidubumakenan. Ja ikunwanbuma keska man ana jiweyamanunbung jaska en matu kenexunimaki. <sup>11</sup> Jakia jatidi man eska jayabuwen taexun en matu yui ikai ninkakanwen. Tsuabuda janchai: "En Jesús ikunwain en matun betsaki", ibiai jaska jiweama chakabui chutanamebauni inun mabu tibiwen kemui inun yushin dami betsawadan padantan yumetsumisbu ja jaskai bepadamemisbukan, ana jatubetan piama dainkubainkanwen, ana jatube mapuamadan. <sup>12-13</sup> Jaska ikunwanbuma ikaibudan, jaska nukun dayamaki, nun jatu unanti wapananan. Diosun besti ikunwanbuma jatu unanxun kupixanikiki. Jakia nukun dayadan, Jesús ikunwainbu nuku inun matun man atiduki, unanti watan jatu kupikin pewakinan. Jaskaken ja juni jawen ibuan ainbe jiwea chakabuken matube ichai menan nemakin taxnimadikanwen.

## 6

*Ikunwain dabe ja iki kayanameaibu ikunwanbumanu jatu pewakin iyutimakiaki, na janchadan*

<sup>1</sup> Min jabetañ ikunwain betsan mia chakabuwaya jaki sinatai min kayanameai jau matu dabe pewanun ¿jaskai ikunwainbu anu kama ikunwanbuma anu man kamismen? Jaskatimaki. <sup>2</sup> Cristo ana juaya man ikunwainbun jabetañ yuda dasibi man unanti waxanaidan, ¿man unanmamen? Man jatu jaska waxanaiwen taexun natiandi ikunwain dabe sinatai jawada kayanameaibu jau medabewanunbung ikunwanbuma anu jatu yunuama matumebi ja dabe pewakin ¿man unanti watidumamen? Matunmebi unankin man pewatiduki. <sup>3</sup> Diosun nai tsumabun jawada

chakabuwanibu nun jatu unanti waxanaiwen taexun Jesús ikunwainbu ja ikaibu chanima natian nun unanti wadiatiduki, jatu daewakin pewakinan. <sup>4</sup> Jaska ikunwanbuman shinamis man danamiswen taexun man ja ikaibu jau matu unanti wakin medabewanun ana ikunwanbuma anu kai jatuki ana chiti iyamakubainkanwen. <sup>5-6</sup> Ja inun, Jesús ikunwainbu ja ikaibu jau ikunwanbuman unanti wanunbun man yunumisbuwen taexun en matu dakewaii, jaskatimabiakenan. Matubudan, ¿matu anua unanepa betsa man jayamamen, jaska matu pewatidan? Man jayadiki.

<sup>7</sup> Ikunwain betsan mia chakabuwaya ikunwanbuma anu man pewanun ika kakin matumebi jaskakainkin chakabujaidakin man kanekubainaii. Mia chakabuwabiaya ana jabebis manakunama tenekubainwen, jau ja besti inunan. Ikunwain betsan min jawada yumetsubiashinken ja shinamis ibubis bextekekanwen, ana jabebis yumetsuamadan. Man jaskaidan, peki. <sup>8</sup> Jakia matudan, man jaskamaki. Matubetan Jesús ikunwainbu janubi ichakawakin jatu bepadantan jatun jamapai bi man yumetsukunkainaii.

<sup>9</sup> Tsuanda Diosun jancha ninkama chakabukubainmisbu nai anu Diosbe jiweama ixanaidan, man unaiin. Jaskaken man ikunwan kayabidiamakidi ibubis bepadamei padanananyamakanwen, man eska jusia jiweawen taeadan. Ja betsa betsapabu chutakin chutabaunmisbu inun, yushin damiwakin ja itsa betsa wabu bitan kenwanmisbu inun, juni ainyanbia ainbu betsa jawen ainma chutamisbu inun, ainbu beneyabia jawen benemabe chutanamemisbu inun, juni ainbu ikasi chutanamemisbu inun, ainbu dabe menamei chutanamei itsamisbu inun, jabu chakabui bextekeisbumadan, Diosbe jiweama ixankanikiki. <sup>10</sup> Ja inun, yumetsumisbu inun, jawada betsana uin kemujaidamisbu inun, paenmisbu inun, yupukunamisbu inun, yuda betsa padantan yumetsumisbu jabudi bextekeabu madi nai anu Diosbe jiweama ixankanikiki. <sup>11</sup> Matudan, betsabu ja ikaibu keska jiwebiakunkainkin Jesucristo man ikunwainbu nukun Xanen Ibu Jesucriston kushipa inun Diosun Yushin Pepatun kushipawen matu shinan betsa wamaya ikunwain betsan matu nashimabu matun chakabu detsis daxkia keska wakin medibi jabias besu keska wakin Diosun Yushin Pepatun matu pepawaniki.

### *Nukun yudadan, Cristonakiaki, na janchadan*

<sup>12</sup> Jawada Diosun nema keyuama ini en atidubia jawanda medabewakin en juanti ea kushipa wama en jeneaii. Jawada Diosun nemama en atidubia jawanda ea beyawatan ea yabutidudan, en jenediaii. Jesúsun ea yunua besti en axunkubainkatsis ikaii.

<sup>13</sup> Jamen betsadan, piti pikin yaniwai nun jiwenun Diosun piti nuku waxuniki. Ja inun, nukun jatudan, jaki piti nanekin nun yaniwa jiwenun nukun jatu nuku waxuniki. Jabiaskabiaken betsatianan, piti inun nukun jatu ja dabe yama waxanikiki. Jaska inun, nukun yudadan, eskaki. Ninkakanwen. Nukun yudawenan, jawen jamapai betsa betspabube chutanametima Diosun nuku waniki. Jakia nukun Xanen Ibu Jesúsunaki, nukun yudadan. Na nukun yudawen nukun Xanen Ibu nun dayaxuntiduki. <sup>14</sup> Ja inun, nun mawa nukun yuda chaputima bestima jakia jaska nukun Xanen Ibu mawa Diosun bestenwanixun jawen kushipawendi nuku bestenwandiananikiki.

<sup>15-16</sup> Diosun Moisés yuia kenekin: “Juni jawen ainbe jiweadan, yuda bestichai keskatiki”, akin jaska keneniwen taexun tsuabunda ainbu betsa ati wai jabe yuda bestichai keskakin jawena wamiski. Jakia nun Criston enabubia nukun yuda jabe nexebia jenetan ana nukun yuda betsa ibu wamakin nexenun ika atibe nexeidan, ana jaskakubainyamakanwen. <sup>17</sup> Jaskawen

taea nukun Xanen Ibube nukun yushin nun nexea jawen shinan nun jayadan, jabe pe jiwekubainankanwen.

<sup>18-20</sup> Cristo nuku mawaxunaya paka keska watan Diosun nuku ibu wakin Jesúsun yuda nuku waniki. Jawen Yushin Pepa nuku inan nukube dasia jiweawen taexun nukun yudadan, ana nukunamaki. Jaskaken nukun yuda medibi pe mekekin jawen Dios kenwanankanwen. Jamapai chakabu nun amis Diosun bechipaimabiaken jakia ibubis nukunmebi chakabu aki nun chutanameaidan, nukun yuda ibubis nun chakabuwaii. Janua ainbu min ainma chutakin min yuda detsis keska wakin Diosun Yushinin jiwe man chakabuwaii, detsis keska wakinan. Jaskaken tsuabunda ainbu min ainma chutanun, iwanan, ja shinan jenetan ana jadi mapuyamakubainkanwen.

## 7

### *Juni inun ainbu biakanantikidi Pablon jatu yusinikiaki, na janchadan*

<sup>1</sup> Ea kene bemakin jawada man ea yuaima matu yuinun ninkakanwen. Junin ainbu bikatsi ikama inun chutakatsi ikamadan, jaska peki. <sup>2</sup> Jamen dasibibu chutanamekatsi ikidan, juni tibi jau medibi ainyanunbunwen. Jabiaskadai ainbu tibidi jau medibi beneyadianunbunwen. Jamen man jaskabumadan, atimapa jiwei man chakabuskubaintidubuki. <sup>3</sup> Jaskakatsi ikama ainbube biakanantanan junin jawen jina yaushiamma inun ainbundi jawen xebi yaushiamadi jau chutanamekubainunbunwen. <sup>4</sup> Ainbun xebidan, jawenabia jawen benenaki. Janua junin jinadan, jawen ainenaki. Jaskaken yaushidabeama jau jabe chutanamekubainunbunwen. <sup>5</sup> Jaskaken jabu dabe janchanamei petan matun mabu yaushiamma man chutanametidubuki. Janua man Dios kenwain Diosbe man yubakatan man jabe janchayukatsis ikai ana menameyuama man itiduki. Janua keyutan ana man chutanametidubuki. Jamen man yubakai peama xaba ichapa kaya Satanásan matu padankin kanemakin matu chakabu watiduki, betsawen kemumakinan.

<sup>6</sup> Na jaska matu yusinkinan: “Ainyankanwen, benayakanwen”, iwanan, yunuama inun en matu nemamadiki. <sup>7</sup> Eadan, aiunma jiwea en ainyankatsi ikamaki. Tsuabuda ea keska jiwtidubudan, jaska peki. Jamen Diosun juni tibi jaskas nukun aka nuku inanma betsa tibi nun ja dayaxunun nuku inanmiski, ynuukinan.

### *Jau jaskai jiwenunbun Pablon jatu yusinikiaki, na janchadan*

<sup>8</sup> Tsuada ainyandiamma inun, jawen bene ma mawaima inun, jawen ain ma mawaimaken jaska ana shinanma jiwekatsis ikaibudan, jaska man pe meaidan, jabiaska jiwekubainkanwen, ea en jiwea keskaidan. <sup>9</sup> Ainyan inun beneya peken jau biakanankubainunbunwen. Jamen tsuabuda ainbuwen kemukin man shinan jeneama chutakatsis ikaidan, jau ainbu bikubainunbunwen. Ainbudi jau beneyadianunbunwen.

<sup>10</sup> En shinanenma nukun Xanen Ibun ea yusiniwen en matu ynuuaii, enawenmadan. Man ma biakanani jiweabukidi matu yusinun ninkakanwen. Ainbuaibuun, matun bene jenebainyamakanwen. <sup>11</sup> Jamen ikunwandabebiai man jawawenda taea man ma jenenameyuadan, shinan betsa watan man ana jaki nukutidu inun man jaki nukukatsi ikama ana beneyayamakanwen. Junibuun, matun ain sinayukainkenan, ja shinankin jene kayabiya makubainkanwen.

<sup>12</sup> Jaska tibi man ainyan inun beneya man jiweabu matu shinankin jaska nukun Xanen Ibun ynuama ibianiken jaska matu tibikidi ean shinankin en matu ynuai ea ninkakanwen. Jesúis ikunwandiamma betsa ainyanbu

inun betsa beneyabukidi eska jiwekanwen. Min ainen ikunwanmabia mibe jiwexun mia medabewakatsi ikaidan, nichinkin jeneyamakanwen. <sup>13</sup> Ja inun, min benen ikunwanmabia mibe jiwexun mia medabewakatsi ikaidan, nichinkin jeneyamadiakanwen. <sup>14</sup> Jaska inun, min benen ikunwanmabi-aken min ma jabe biakananiwen taexun Diosun mia dananma jakia min ikunwainwen taexun min benen ikunwantiduken duawaikiki. Jabiaskadi wakin min ainen ikunwanmabiaken Diosun dananma jakia min ikunwain- wen taexun min ainen ikunwantiduken duawadiaikiki. Juni inun ainbun Jesús ikunwanbuman bake yumediamadan, medibi pepatidubumaki. Jakia junin Jesús ikunwain kasmai ainbun ikunwain kasmai ja dabe bakeya jatun bake yumediamadan, Dios jatuwen nuiaya jabun baken ikunwan- tidiuki, Diosun duawaiwen taexunan. <sup>15-16</sup> Ainbuibuun, min benewen min nuibiaya mia jenekatsis ikaidan, jaska watan min paxamatidudan, tsuan unanmaki. Junibuun, min ainen mia jenebainkatsis ikaya min jawen nuikin jaska watan min paxamatidudan, tsuan unanmadiki. Jaskawen taexun junin ikunwanyan jawen ainen jabetan ikunwankatsi ikama jamapai shadanun ika kayadan, junin jawa yuiamaken jau ainbu kanunwen. Jabiaskadiai ainbun ikunwanyan jawen benendi jabetan ikunwankatsi ikama jamapai shadanun ika kayadan, ainbun jawa yuiamaken jau juni kanunwen. Ikun- wanma ma jaskakainken Diosun matu nemamabia ja man ikunwainwen taexun matu unanuma jiwemakatsis ikikiki.

<sup>17</sup> Mae tibi anuxun ikunwainbu janu ichamisbu tibi anu kakunkaunkin jaska en yusimis jabiaskadi matu yuinun ninkakanwen. Jaska bebunkidi man jaska beyawen jiwea nukun Xanen Ibun matu jiweamaxanun, iwanan, Diosun matu tibi katukin kenaniki, jaska Diosun jawen shinanen jaska matun jiwea matu betsawamani jawa ana shinanma jau man Jesús chiban bestikubainunan. <sup>18</sup> Ja inun, judiobu kaintan Jesús ikunwankin judiobun beya jau dananyamakubainunbunwen. Judiobuma kaintan Jesús ikun- wankin judiobun beya jau chibandiayamakubainunbunwen. <sup>19</sup> Judiobun beya chibankin nun jina kubichi mextemis inun judiobun beya chibamadan, nun jaskai jiwekin Dios benimawatidumaki. Jakia Diosun jancha besti chibankin nun Dios benimawatidubuki. <sup>20</sup> Jadatuda jiwea chibain min jawen jiwekatsis ikai anua Diosun matu tibi katunidan, ja beyawen Dios jiwexunkubainkanwen. <sup>21</sup> Ja inun, Diosun matu katudiamia junin matu esclavo dayadu waken jawen bika teneyamawe. Jakia min tsumapan mia ana bikatsi ikama kasmai ibubis peiwen min paka mia nichianyan benimadi kainxanwen. <sup>22</sup> Jaska juni betsan esclavo dayadu man ibianiken nukun Xanen Ibun matu katuxun matun chakabu buakin matu jaibuwaiwen taea esclavobia Jesús man ikunwainwen taea man yudan esclavoma keskaki. Jakia min tsuan esclavo dayadumabia Jesúsun mia katutan yunuawen taea matun shinanwen man jawen esclavo dayaduki, Cristonadan. <sup>23</sup> Jesucristo matu mawaxunkin matun chakabu matu buaxunaya Diosun ibuwakin jawena matu wakin biniwen taexun ana juni betsan matu esclavo wai keska wakin shinan betsaa matu yusiaibudan, danankanwen, man Cristonawen taeandan. <sup>24</sup> Esclavo inun esclavoma man ebetan ikunwainbuun, man jaskadada jiwea Diosun matu katuni jawa jaskatan man betsatidumaki. Jabiaskas ikubainkanwen, man Dios chibainbudan.

### *Jau jaskai jiwenunbun Pablon jatu yusinikiaki, na janchadan*

<sup>25</sup> Jamen betsadan, beneyadiabumakidi man ea yukaima jaskakidi nukun Xanen Ibun ea yunuamabia ewen dabanan ikin ea duawa jawen ku- shipawen yununikai en chintuanmawen taexun matukidi jaska en shinain

matu yusinun ninkaidakanwen. <sup>26</sup> En shinanan, natian nun jiweatianan, nun bika teneaii. Jaskawen taea jaskadada man bestibu jiweadan, jabi-askayukanwen. <sup>27</sup> Tsuada man ainyanan, matun ain nichinyamakanwen. Tsuada man aiunma ainbu benayamakanwen. <sup>28</sup> Jamen man ainyandiamma ainyainan, jawa chakabumaki. Ainbu beneyadiama beneyadiaidan, jawa chakabumadiki. Jaskabia man janu biakanaitianan, man bika tenetidu en matu nematidubia jaska man ikatsis ikai ibubis katukin shinankanwen.

<sup>29</sup> En betsabu inun en puibuun, ma badi keyui kemaya ainyankin matun ainkidi besti shinanma nukun Xanen Ibuli shinankubainkanwen. <sup>30</sup> Minabu mawaken juinti nishma man kaxamisdan, jadan keyumiski. Jaska besti shinanma benima keyuismadan, nukun Xanen Ibu anu bestiki, jaska shinankanwen. Jamen betsadan, beyusi man shinan chankanbiamisdan, ja dikabi keyumiski. Ja inun, betsabu man mabu ichapayabia ja shinanma Jesús dasibi mabu ibudi jakimayamakubainkanwen. <sup>31</sup> Jaskadada na mai anu dayakin mabu jayai inun mabu jayama man jaskai jiweadan, ana jaska tibiwen benimayamakubainkanwen. Jatiada nukun Xanen Ibu Jesús juaitian na jaska nun jaya tibi dasibi yamawaxanikiki. Jaska shinankanwen.

<sup>32</sup> Jaskawen taea man ana bika tenei itimaskayamanun bun en matu yuiai ninkakanwen. Tsuabuda aiunmabun jawen Xanen Ibu Jesús dayaxunkin ja besti chibankin benimawatiduki. <sup>33-34</sup> Jamen ainyanbun jawen ain medabewakin jamapai tibi akin jawen Xanen Ibu inun jawen ain dikabi benimawatiduki. Jaska inun, beneyabun jawen bene medabewakin jamapai tibi akin jawen Xanen Ibu inun jawen bene dikabi benimawatiduki, ja dabetun jaska wakinan. Jakia ainbu ewa ana beneumatun inun chipash beneyadiama jawen Xanen Ibu Jesús besti dayaxuni jasnun ika jawen yudawen inun jawen juintiwen benimatidubuki. <sup>35</sup> Nemakin matun jiwea bextekin ana bikawakin itimaska wakatsi ikama jau man unanuma jiwenun bun matu medabewa bestikatsis ikin nukun Xanen Ibu besti matu duawamanun ixun jaska en shinain en matu yuiai.

<sup>36</sup> Tsuanda bebunkidi jatun ainbu bake ja juni bimakatsi yubaima ma ja dabetan Jesús ikunwainbu ma pekenan, bechipainamedabeidan, ma ainyain inun beneyatidubuki, jawa chakabuwamadan. <sup>37</sup> Jakia betsadan, tsuanda jatun juni baken ainbu shinankin bitidubia ibubis jaska shinamadan, jawen shinan mestenwantan Jesús besti dayaxunun ikaidan, jau ainyanyamanun wen. Jaska shinain, peki. <sup>38</sup> Janua ja jatu yubaimabube ainyain inun beneyai biakanantan medabenainan, pediki. Jakia aiunma jiwea inun beneuma jiweadan, pejaidatiduki, en jancha chibainan.

<sup>39</sup> Jamen ainbun ikunwain jawen bene jiweken dapaxkama jabe jau jiwenun wen. Jawen bene mawaya ana beneuma keska jiwea beneyakatsis iki ikunwain betsya benewatiduki. <sup>40</sup> Jamen ainbu jawen bene mawaken ana bene betsya bikatsi ikama ikunwan besti benimai jiwitiduki. Jaska Diosun Yushin Pepatun ea shinanmaya jaska shinankin en matu yusiaiin.

## 8

*Dami kenwanti betsya medibi watan nami inanmisbukidi Pablon jatu yusinikiaki, na janchadan*

<sup>1</sup> En betsabu inun en puibuun, man ea kene bemakin ja yuinaka detexun dami yushin nami inantan pikin matu pimakatsis ikaibukidi man ea yukaima matu yuinun ea ninkakanwen. Ja nami dami yushin kenwankin inanmisbu pidan, jawa chakabumaki. Chanima jaskabiaken jakia ikunwainbu betsya babubu ja nami pikin man jatu uinma ana babutidubuki,

pi man keainwen taeadan, jaskakin tsua kushipawakin man jatu medabewatidumaki, man nui jayamadan. <sup>2</sup> Tsuanda jaska tibi aki: “En unan keyuaii”, man ibiaidan, jaskai unanepati kayabi man unan keyudiamaki. <sup>3</sup> Jamen tsuabunda Dios bechipaikin duawakin jawen yunuti akaibudan, jadan, Diosun jatu unainkiki.

<sup>4</sup> Yushin dami kenwanti betsa kenwankin jawen kenwanti nami inananainbu bitan man piaibudan, jaskadan nun unandiaii. Jawen kenwanti yushin dami jiwea jayama inun jawa kushipa jayamajaidaki. Jakia nukun mekenika Dios bestichai jiwea nun unaiin. <sup>5</sup> Jesús ikunwanbuman yushin kushipa betsa betsapa nai anua inun mai anua jayakiaki, iwanan, jabun shinankin kenwanmisbuki. Kanekin dios ichapa inun yushin xanen ibu ichapa shinankin ikunwanmisbuki. <sup>6</sup> Jamen nukubun ikunwankinan, nukun Epa Dios bestitun dasibi bawani inun nuku jatun damiwani nun jawen jiweaki. Ja inun, Xanen Ibu bestichai nun jayaki, Jesucristodan. Jawen taexundi Jesúsun jawen Epa Diosbetan dasibi damiwakin keyuniwen nun jiweiaki, nukubudan.

*Ikunwain babubuwen nuikin medabewatikidi Pablon jatu yusinikiaki, na janchadan*

<sup>7-8</sup> Chanima jaska tibi nukun Epa Diosun dami wani tsuan tapin keyuamaki. Jaskawen taea Jesús man ma ikunwanbiai betsabun yushin dami betsa jawen kenwanti namikidi piaibu ninkakin xabakabi man unandiabumaki. Yushin dami betsa kenwankin jawen kenwanti piti pikin: “Nukun yushin dami betsa nun duawaii”, iwanan, apaunibu ana shinankin jamapai nami nun piaiwen taexun Dios nun duawatidumaki, iwanan, pikin nukunmebi pepama inun piama nun pepamadiki. Yushin dami betsa kenwankin man ma beyawanidan, jatiditun matubetan Jesús ikunwankin yushin dami betsa jawen kenwanti nami pikin jaska jawen kushipa yukapaunibu jakimama shinain uinti babukubainkanikiki. <sup>9</sup> Jamen yushin dami betsa jawen kenwanti nami jawa jayama unankin jawa dateama pikin ikunwain betsabu uinti xubu man jatu uinma matu uintan chintunkin kanetidubuki. Matu yusinun ninkakanwen. <sup>10</sup> Yushin dami betsa kenwanti jiwe anuxun man ikunwainbu kushipabun piaya ikunwain betsa babubun matu uinkin jaska yushin dami betsa kenwankin jenebianixun man ana jawen kushipakidi shinain dabanen jabundi jawen kushipatikidi pinun ixun shinantidubuki. <sup>11</sup> Jaskaken matunan, matun shinanwen besti unanepabiakin yushin dami betsa jawen kenwanti nami pikin ikunwain uinti xubu jabudi Jesucristo jatu mawaxunbianiken man jatu benutiduki. <sup>12</sup> Jaska wakin Cristonabu uinti babubu jatun shinan chakabuwamakin man Cristo chakabuwadiaii. <sup>13</sup> Jaskakenan, eanan, ja nami betsa pikin en betsabu en kanematidu shinnankinan, ana jatu kanemakatsi ikama ja nami en ana metidumajaidaki, jatu chakabuwakatsi ikamadan.

## 9

*Pablo Jesúsun kushipayatun jatu yusinkubainaya jabun dibibiaken jabuna jawada biama inikiaki, na janchadan*

<sup>1</sup> Jamen enakididi matu yuinun ninkakanwen. Damasco baiwen en kai Jesús janu eki nukutan ea uinmashinxun nukun Xanen Ibun jawen tsuma kushipayaya betsa ea wakin ea yunuuniwen taexun tsuan ea yunuamawen taea jaska matu anu en dayai kaxun nukun Xanen Ibun daya en matu uinmakin Diosun kaka pepa matu yusinkubaunkin man Corinto anuabu Jesús en matu ikunwanmaniwen taexun en Jesúsun kushipayaya betsabu keska jabias daya

en jayabiaken matun man ea danantidubumaki. <sup>2</sup> Mae betsa anuabun ea unanti watan: “Jadan, Jesúsun kushipaya betsamaki”, akin ea dananbiaibun matunan, en matu yusian nukun Xanen Ibu ikunwantan man jaki dasiniwen taexun en Jesúsun kushipaya chanima man unaiin. <sup>3</sup> “¿Jaskakin Pablon nukun medabe bismamen?” iki ekidi janchaibu eska en jatuki chanimis matu yuinun ninkakanwen. <sup>4</sup> Ea inun Bernabén nun matu yusinkubainkin matu anua piti inun nuxuti nun bitudubia nun matu ea aismaki. Jakia nun Jesúsun kushipayabuwen taea nukudi nun jaska ea itiduki. <sup>5</sup> Jesúsun kushipaya betsabu inun, nukun Xanen Ibun betsabu inun, Pedron yusinbaunkin jatun ain iyumisbu keska wakin nukundi ainbu nukubetan ikunwainbu nun iyudiatiduki. Nun jatu jaska wabainaya Jesúsun nuku yununiwen taexun jatuna bidiatidubuki. <sup>6</sup> Matu anu jaska Jesúsun kushipayabu betsa jaskabainaibu piti inankin tadi inankin janu jiweyunun bun dintu betsa inankin man jatu medabewabiamis ¿ea inun Bernabé jaska wama nuku besti man nuku medabewamatidumamen? <sup>7</sup> Jakia soldadobu detenamei bukin ibubis jatun jamapai pakaisbumaki. Ja inun, uva bai anu dayakin jabun ja uva bimi pimisbuki. Ja inun, ina chaxu mekekubainmisbun jawen chuchu tsinitan amisbuki. <sup>8</sup> Jaska wakin yuda betsa betsapabu dayakin jatun jamapai bimisbu besti shinankin en matu yuiamaki. Jakia jawada Diosun nuku yusini matu yuinun ninkakanwen. <sup>9</sup> Moisin kenekin: “Min jemaintin anuxun min ina awan jawen taewen min xekiwan pema pema akin mia xemexunaya dispiwen kunexyamakanwen, jau pinunan”, aniki. Na ina awakidi kenenidan, jaska keska shinanti wakin <sup>10</sup> Dios nukuwendi nuiti Moisés jaska kenemaniki. Jakia mai pukinxun yunu banabu yunu ewatan kaniai tsekaxun betsa pimisbu keska wakin xekiwan xemenikatun xekiwan xemetan jatidi bumisbu keskai Dios dayaxuni nun nuitapayamanun bun medabewakin man nuku pakanun bun ina awakidi Diosun Moisés nun jawen dayakapabu nukukidi kenemaniki. <sup>11</sup> Jaskaken ana betsa matu yuinun ninkakanwen. Bai bana keska wakin Diosun jancha Jesúskidi nun matu yusinkubainaya nuku manakukin jawada man jaya piti kasmai tadi kasmai jiwe kasmai pei betsa man nuku dibiaki. <sup>12</sup> Yaushiama yusinan betsabu man pakamiski. Nukun dukun Jesucristokidi nun matu yusia in man ikunwainmawen taexun ichapa man nuku dibipakemiski. Na jaskakidi nun matu jaska wa matun yuikin: “Nuku yusinmisxun nukun pei bikin nuku pakamakin taewaikiki”, iwanan, nukukidi man shinan chakayamanun bun jawada man nuku dibia jawen nuiama Criston kakape besti man chibanun bun jawada man nuku dibia matu yukama nun jabiaska jiwekunkainaii.

<sup>13</sup> Ja inun, Templo anuxun ja jabu dayanikabun yuda betsabun inankuin Dios inainbu ja nami menuxunkin jamapai betsa betsapa wakin jabi-anuxundi jatidi kuakin jatidi bikin jatun piti dasibi bixun jawenabu jatu pimamisbu man unaiin. <sup>14</sup> Jaska jabun amis keska wakin tsuabunda Jesúskidi kakape yusinkubainmisbun jabun jatun piti inun tadi inun pei man jatu inankubaintidubu nukun Xanen Ibun jabis jawen tsumabu jatu yununiki, jau betsabudi jabiawendi jiwekubainxanun bunan. Jaska keska shinankubainkanwen.

<sup>15</sup> Na jaska tibi yunuti jayabiaken ja shinankin en matu jawa ea aismaki. Jaska inun, kene matu bumakin: “Matun jawada ea inankanwen”, en matu wakin yukamaki. Jaska en matu yuiai keska wakin ekidi shinan chakakin: “Pablo pakakin taewanankanwen”, iwanan, shinanyamaxankanwen. Man ea pakaisma keska besti ikubainkanwen. En matu yusianyan man ea jawa inainsma benimajaidai en keaiin. En jaskakunkainaidan, en bechipaijaida-diaii. Matu bedabinwankatsi ikama en jawaida mawakatsis ikaii.

Eskaki, matu yuinun ninkakanwen. <sup>16</sup> Diosun ea katukin Jesúsun kushipaya ea wa jawen kakape yusinbauni en jawen kenun ea yunuama iniki. Jakia en shinanen akidan, en kentiduki. Jakia jaskama jawen kushipawen ea yunu yunu aka en akubainaii, enamawen taexunan. En yusianmaken Dios eki sinatai ewen benimama ixanikiki. <sup>17</sup> En shinanen Diosun kakape yusinbaunun, iwanan, emebi en akin taewaniwen taexun man ea dibikeanaii. Jakia en jaska en shinan medibi en akama Diosun ea kenatan ea chai putani ja en dayaxunxanun ea katukin nichiniken jaskakin matun jamapai tibi biantibiaken en tsua matu yukaismaki. <sup>18</sup> Matun man ea jaska waismaken tsuan ea pakama Diosun daya en akubainaya jaska en matu yusinmis Jesúsun kushipaya betsabu pakakin yusinan betsabu pakadiakin man ea pakaismaken jawen benimawatiwen Diosun ea manakumiski, ea shinan chankanwankinan.

<sup>19</sup> En tsuan esclavo dayadumabia ichapabu Jesús jatu ikunwanmanun ika dasibibun esclavo dayadu jikini keskakin yuda tibi en jatu dayaxunkunkainaii. <sup>20</sup> Jakia peparan, iwanan, Moisin yunuti inun jawen nemati en unanbiai ana jatun ea tsumamabiaken judiobu Jesús ikunwanmanun ika jatube dasitan jaska Moisin yunuti inun nemati chibanmisbu jatu yabuni jenemanun ika jatu keska en jiweyumiski. <sup>21</sup> Diosun yusian dananma Jesucriston yusian jeneama chibankubainkin judiobuma jabun Moisin yusian chibankubuma Jesús ikunwanmanun ika jatube jiwea jatun beya keska chibain en jatube jiwediamiski. <sup>22-23</sup> Ja inun, Jesús ikunwankatsis ibiai ikunwain kayabi idiamma babubu medabewai kushipa wakatsi iki jatube jiweyexun yusian bika yuiama jatu keskadi eadi babu keska en jiweyemiski. Jesús ikunwainbu ichapabu Diosun jatu duawakin eadi jau ea duawaxanun, iwanan, jawen kakape yusinkubauni tsuabuda yuda betsabu betsapa ikunwanmanun ika jaska jiweabu keska jatube jiwekunkaunkin en yusintamiski, kaneamadan. Jaska tibi kakape en jatu yusinmiswen taea jabias nun chibanmiswen taexun jatubetan manakuti pepa en binunbadiaii. <sup>24</sup> Jamen matubudan, beyusi ichapa kushibaini jawaidabainaibu bestichaitun jatu binutan maemamis man unaiin. Ja bestichaitun jatu binukin keyutan jawada pe bimis keska wakin Jesús ikunwantan duawakin ninkajaidai chintuanma ja besti chibankubainkanwen, jaska keskai matu tibi man pe jiweawen taexun jau Diosun matun pepawen taexun matu manakuxanunan. <sup>25</sup> Beyuskin betsabu binutan ni pei maiti jawenduabia chapuxanai binun ika jamebi jawen yuda kushipa wakin jamapai piti tibi chakabuwamis piama jatun yuda pe mekemisbu keska wakin Diosun jawenabu manakuti jawa chapuisma matu inankin matu jiwekuinmaxanaiwen taexun matun shinan pe mekediakubainkanwen. <sup>26</sup> Ean en shinanan, kushikainkin en binukatsis ikai keskaki. Beyus betsai detenamekin betsabu maemanun, iwanan, tsuanda mekenen kaneama detenamemisbu keska wakin ean Jesús chibankubainkin <sup>27</sup> jamapai chakabu en jayadi jenekin en juinti kushipa keska wakin en yuda en mekejaidaii, betsabu Jesucristo ikunwanmatan en manakuti pepa en benuyamaxanunan. Jesucristo besti chibain man pe jiweawen taexun matudi pepawen Diosun matu manakuxanikiki.

## 10

### *Yushin dami betsabu Jesús ikunwainbun kenwantimakiaki, na janchadan*

<sup>1</sup> En betsabu inun en puibuun, judiobun xenipabukidi jaska Diosun jatu wani man jakimayamaxanunbun matu shinanmanun ninkakanwen. Egipto anua kainbainaibun Diosun en xenipabu iyukin chi kuin puei maya kai anu butukaini jatube kai Ian Tashipa nuajaidabiaken jawen kushipawen

jene paxkakin bai watan dasibi jatu pukemanikiaki. <sup>2</sup> Janua Diosun jatu yunua kuin pueaiwen inun, Ian Tashipa pukeaibuwen ja dabewen taea dasibibu Moiséski jau chiti inunbun Diosun jatu nashimabainikiaki. <sup>3</sup> Jaska inun, janu piti jayamaken nai anua piti Diosun jatu inankubaina dasibibun pidiakubainibukiaki. <sup>4</sup> Ja inun, en xenipabun unpax manujaidaibun jabi-atundi mishki anua unpax tuexun jatu amani jatube kakin dasibibu unpax pepa amadiakubainikiaki, ja Yushin kushipa Cristo yuda kayabi jayadiama mishkiki damitan jatu amakinan. <sup>5</sup> Jaska wakin Diosun nai anua pitiwen inun unpaxwen jatu duawabia jawen jancha ninkabumawen taexun eskad-abes pepabu dananmabia ichapabuki sinatakin janu jiweabumanu jatu ima atanbaunaya Egipto anua kainibu juni ewabus debui keyukubainibukiaki.

<sup>6</sup> Na jaska dasibi Diosun jatu akubidanidan, jau chakabuwen nun kemuya-manunbun Diosun nuku yusinkin jaska jamapai chakabuwen en xenipabu kemui janu jiweabumanua debunibu nukundi xabakabi nun jawen unanx-anunbun jatu akubainikiaki. <sup>7</sup> Januxun Moisin kenekin: “Oro ina awa bake damiwabu ja dami uin tsauxun pi inun mabex aki benibaun beyuskin ja dami kenwanibuki”, jatuki keneniki. Jaska judiobun dami betsa waxun ken-wanibu keskadan, matundi ana jaska jusiayamadiakubainkanwen. <sup>8</sup> Jaska inun, Israelbu ainbu jatun ainmabe chutanameaibun Diosun jatu kupiaya xaba bestichaitian 23,000 debunibukiaki. Jatu keskakin ainbu nukun ain kayabima ana metaskayamakubainankanwen. <sup>9</sup> Ja inun, jatiditun Moisés ja akin Dios unanti wakin yuikin: “Jaskakin min nenu nuku iweima ikai?” iwanan, yuikin: “Piti jayamaki. Unpax jayamaki. Ja inun, piti nai anuadan, nismaki”, iwanan, Dios unanti waibun dunu midima Diosun jatu pima debunibukiaki. Jaskanibu keskakin nukundi Cristo unanti wayamanankanwen, mesekidan. <sup>10</sup> Ja inun, jatiditun Moisés inun Aarón june jaki ja ikin yuainbuwen taexun nai tsuma Diosun jatu tenanmanikiaki. Jaskanibu keskakin Diosdi xabakabi jaki ja ikin yuanyamakubainankanwen.

<sup>11</sup> En xenipabu chakabukubidanaibu Diosun jaskaibu jatu kupinikidi jau jabiaskadi nun iyamaxanunbun bebunkidi jaska ikaibukidi Diosun jancha nuku kenexunibuki, nukudi badi jawen jenei keyuaitian jiwea nun jaskadiyamaxanunbunan. <sup>12</sup> Jatu jaska waniwen taexun tsuabunda: “Jesús chibankin duawai en chintuanmaki”, iki keanma mestentan jau uindakubainunbunwen, chakabu tibi juayadan. <sup>13</sup> Tsuabunda jawada chakabu ma juni man mediamma inun chakabujaidatun matu achima ana matu achimakatsis ikai nukun yuda babun nun tenetidumadan, shinankanwen. Jaskawen taexunan, min yuda babubiaken Dios putama jaki chiti ikubainkanwen, nuku babu watan jau nuku bika tenemakin jaska tsuan tenetiduma nun jaskatan binutidumaki. Matu jaska tenemabiaya jawen bashikuama Diosun jawendi jawen kushipa matu unanmakin matu jawen taxnimakin matu binumaxanikiki, chakabu tenekin man binuaiwen taexunan.

### *Cristo kenwanmisbun yushin dami betsa jusikin kenwantimakiaki, na janchadan*

<sup>14</sup> En betsabu inun en puibuun, Diosun jaskawen matu mekekatsis ikai-wen taea yushin dami betsa chakabuken kenwain ana jadi buyamakanwen, man ma Cristo jayadan. <sup>15</sup> Na eska matukidi jancha yuikinan, man juni unanepatan matumebi unantinantan man shinantidubu en matu yuiyii.

<sup>16</sup> Nukun betsabube ichatan jatubetan medibi uva bimi jene watan akin Cristo nuku mawaxuni shinamatidan, shinankin nun amiski, Dios ken-wankinan. Ja inun, misi tunke tunke axun nuku mawaxunkin Cristo jawen yuda nuku inankuini ja misi jawen shinamatii nun pidiamiski. <sup>17</sup> Nun Jesús

ikunwainbu nun yuda betsa betsapabia dasibibun ja misi nun pimisbuwen taeadan, Jesús nuku mawaxuni shinain nun jabias yudabuki.

<sup>18</sup> Israelbukidi matu yuinun ninkaidakanwen. Jabun jawen chakabuwen taexun kenwanti piti Dios inanbu nami texe Templo anu dayanikabun buxun pimisbudan, jibia dabetan Dios kenwankanikiki, na jabun inainbu inun Templo anu dayamisbunan. <sup>19</sup> Jakia yushin dami betsa kenwainan, dami jawauma inun jawen kenwanti piti jawauma nun unaiin, nukubunan. Jakia jabun shinanen ja yushin dami kenwainbudan, unanma jaska shinainbudan, jayaki. <sup>20</sup> Eskaki. Matu yuinun ninkakanwen. Dios ikunwanbuman yushin dami betsa jawen kenwanti piti yushin chakabu inankin Epa Dios inanbumaki. Jaskawen taexun yushin chakabu kenwainbubetan jawen kenwanti piti piama jatubetan kenwandiayamakanwen. <sup>21</sup> Ja inun, Dios kenwankin Jesús nuku mawaxuni shinanmati nuxuti akatsis ikin yushin dami betsa jawen kenwanti nuxuti inainbu ayamakanwen. Jesúsun yuda shinanmati misi pikatsis ikin yushin dami betsa jawen kenwanti inainbu piyamadiakanwen. Jaska inun, ma Dios kenwanbiai ana jusikain yushin dami betsa kenwantimajaidaki, chakabu idumai keskaidan. <sup>22</sup> Ja inun, ¿yushin dami betsa kenwankin Dios daka man sinatamanun, iwanan, aki ikai? ¿Matun kushipawenan, man Dios binuamen? Jaska yushin dami betsa kenwankin man jusia akeakeaidan, ana jaska tibi akin Dios sinatamaya-makanwen.

### *Ikunwain betsabuwen nuikin jatu medabewakubaintikiaki, na janchadan*

<sup>23</sup> Tsuanda jamapai tibi atidudan, tsuan jatu nemamaki. Jaskadan, chanimaki. Jaskabia nuku medabewatidumaki. Jaska shadabudan, en jeneaii. Dasibi tsuan nuku nemama nun atidubia ikunwainbu dasibi medabewamadan, jenediatiki. <sup>24</sup> Jamen jamapai pepa bikin ja dukun matuna binun ika ana jatu maemai nashui ikama jakia yuda betsabu dukuntun jau katuyunun-bun pes ikama manakubainkanwen.

<sup>25-26</sup> Jaska inun, betsadan, mai dasibi Diosunaki. Ja inun, dasibi betsa betsapa mai anua damiwanidan, jawenadiki. Jaskaken nami inanmisbu jiwe anua nami bi yuka iki: “Nadan, ¿yushin dami betsa jawen kenwanti namimen?” iwanan, tapinkin tsua yukai meseama bitan pikubainkanwen.

<sup>27</sup> Jamen ikunwanbuman matu jaibuwatan pimakatsi ikin matu iabu man kakatsi ikai namikidi yuka ikama jaska jatun piti matu kainmaxuna shinan chakama jatubetan man pitidubuki. <sup>28</sup> Jakia betsan mia bebunkidi yuikin: “Na namidan, yushin dami betsa jawen kenwanti namiki”, matu waya jawen uinti babu ana babu wakatsi ikama jawen nuikin ja nami piyamakanwen.

<sup>29-30</sup> Yushin dami betsa jawen kenwanti tsuabunda man nami piadan, matumebi man chakabumaki. Jaskabiakin ikunwain betsa uinti babuwen nuikin ja nami jatu medabewakin man pitiduma en matu yuiaii. Jaskadada Diosun ea nemamaken en pitiduki. Jakia yuda betsa en uinmachakaiwen taexun ena pemaki. Dios kenwantan jamapai tibi en pibia pebiaken jabu jatu mesewakatsi ikama dasibiwen Dios duawanun, iwanan, en ana jaska tibi meamaki. <sup>31</sup> Jamapai pikin nuxuti akin jamapai betsa betsapa akinan, Dios duawanun, iwanan, akubainkanwen. <sup>32</sup> Jaska jamapai tibi akin jawada danainbu jatun bedubi akin jatu uinmachakayamakanwen, judiobu kasmai judiobuma kasmai ikunwain betsabu jiweabudan. <sup>33</sup> Jamen ea en shinanen ikidan, dasibibu medabewanun ika emebi jaska en shinain benama dasibi jatu kenwanmakin Jesús jatu ikunwanmanun ika jawada danainbu jenekin jaska dasibibu jiweabu en jatu medabewakubainaii.

## 11

<sup>1</sup> Jaska Cristo jiweni ean en mawai jiwemis keskai matundi en jiwemis ea mawai jiwekin eadi chibankubainkanwen.

### *Ainbuabu ichati jiwe anua jaskatikiaki, na janchadan*

<sup>2</sup> En matu yusintani jabi chibain man chintuanmawen taexun benimakin en matu kenwaiin. <sup>3</sup> Jaskabia Diosun jancha ninkai ichatan Dios kenwankin jaska ainbuabu jau ikubainun bun matu yuinun ninkakanwen. Ja dukunan, Criston junibu mekekin yunumiski. Junibundi jawen ain mekekin yunudiamisbuki. Jabiaskadi wakin Diosun Cristo mekekin yunudiamiski. <sup>4</sup> Jakia juni betsan jatun maiti mabikiama sawea Diosbe janchai kasmai Diosun jancha jatu yusinkinan, Cristo duawama ichakawaikiki. <sup>5</sup> Jakia ainbu bet-sandi jawen buxka mayabukuama Diosbe janchai kasmai Diosun jancha jatu yusinkinan, jawen bene duawama ichakawadiaikiki, jawen bu maxtekei keyua mankuia nia keskakinan. <sup>6</sup> Jaskawen taea mayabukukatsi ikamadan, jau maxtekei keyununbunwen. Jamen man dakei maxtekei keyukatsi ikamadan, bachi tuax ewapawen mayabukukubainkanwen. <sup>7</sup> Jamen junidan, jawawen jawen buxka mayabukutidubumaki, Diosun juni ja dukun damiwakin jawen kushipa unanti wati ja itsa Diosun juni waniwen taeidan. Jakia ainbudan, junibu itsa Diosun jatu waniki, jau jawen benen kushipayakin duawanunbunan. <sup>8</sup> Ja dukun juni damiwanan janubi jawen pishi bitan ainbu damiwaniki. Ainbu anua jawen pishi bitan juni damiwanama inikiaki. <sup>9</sup> Juni damiwanin ainbun jau benewanun, iwanan, damiwanama iniki. Jakia ainbu damiwanin, junin bitan jau ainwanxanun, iwanan, damiwanxuniki. <sup>10</sup> Jaskawen taexun junin jawen ain mekemiswen taexun ainbun Dios kenwankin jawen jancha xabakabi yuikin jatun buxka junekin tadi tuaxwen jau mayabukukubainunbunwen, jawen benen kushipa unanmati wakin duawaidan, jaska wakin Diosun nai tsumabun jatun Xanen Ibu duawamisbu jatu keska wakinan. <sup>11</sup> Jaskaken nun Jesús ikunwainbudan, junibus ainbuuma jiwtidubumaki. Ainbusdi junibuumma jiwtidubumadiki, ja dabe paxkatan jawawen jaskatidubumawen taeidan. <sup>12</sup> Jaskawen taexun shinankanwen. Chanima junin pishi bixun Diosun damiwanin ainbu wanikiaki. Jaska inun, jabias ainbu anuadi juni inun ainbu bake kainmisbuki. Jaska dabes dukun Diosun jatu damiwaniken taea yuda dasibi jiwebaunabuki.

<sup>13</sup> Jamen betsadan, ainbu Diosbe janchaidan, ¿jawen buxka tadi tuaxwen mayabukuama itimen? ¿Mayabukutan iti daka? Matunmebi shinankanwen. <sup>14</sup> Jaska inun, ainbu itsai junin bu chaipa waidan, jaska nukun jiwea nuku wabiani ibubis betsai daketapai bu chaipayai nun jawen daketidubuki. <sup>15</sup> Jamen ainbuabudan, jatun bu chaipa wai jawenduakin jatun bu beneai mexteaman jau bu chaipanunbunwen, mayabukui keskaidan. <sup>16</sup> Na yusianwen man ja ikatsis ikaidan, ja ikanwen. Jakia na jaska en matu yusianin, jabias keskadi Jesús ikunwainbu ichamisbu tibi anuxundi jabiaskadi shinankanwen yusinkanikiki.

### *Jesús nuku mawaxuni jawen shinanmati piti pikin chakabuwanibukiaki, na janchadan*

<sup>17</sup> Na en matu kenexun bumaiwen matu ja akin chitenun ninkakanwen. Ikunwainbu betsabube ichatan pewama man jatu ichakawaiwen taexun en matu kenwanmaki. <sup>18</sup> Ja dukun matukidia juxun ea yuiabu en ninkaidan, man ikunwainbu ichaidan, man xukui paxkakanikiaki. Jaska chanima paxkatan man pewaidan, man jaskaiwen taexun eskadabes en matukidi ikunwaiin. <sup>19</sup> Matunmebi paxkai man unantinankeakeaidan, jaskatimaki.

**20-21** Ikunwainbu ichaxun pibiakin yuda betsabun bebunkidi jabun piti bexun paxkama jawaida keyuaibun ja jabu piti eskadabes jaya buniaibun janua betsabu paenkin jaska tibi wakin nukun Xanen Ibu nuku mawaxuni shinanmati piti pinun, iwanan, man jaska shinanbetanan akamaki, jaska watimabiakenan. **22** Matun jiwe anu piti jayamaken ikaskin bebunkidi yaniwakatsi ikama ja piti bawabidan bexun dabukun jatu paxkaxunkin inankatsis ikama yaushikin jawaida keyukin ikunwainbu betsan piti eskadabes beabu jatu dakewakin Jesús ikunwainbu dabinwankin Jesús nuku mawaxuni shinanmati piti pinun ikaibu man jatu dakewaibu matukidi yui benimakin en matu kenwantidumaki.

*Jesús nuku mawaxuni jawen shinanmati pitikidi Pablón jatu xabakabi yusiniaki, na janchadan*

*(Mt 26.26-29; Mr 14.22-25; Lc 22.14-20)*

**23** Jesús nuku mawaxuni shinanmatikidi nukun Xanen Ibun ea yusini en matudi yusintani unanbiakin man akin pewamawen taea en matu kenwanmaki. Ana matu yuinun ninkakanwen. Jabias meshutiandi Judasin Jesús jatu achimakatsi ikaya jatubetan pikin Jesúsun misi bitan tsumaxun

**24** Dios kenwantan misi namakis tunketan jawen kushipayabu inankin yuikin: “Nadan, en yudaki. Matuwen dababen matu mawaxunkin en yuda en matu inanxanai keskaki. Pikanwen. Ea shinanbetanan jabiaskadi akubainxankanwen”, iwanan, **25** misi inun chaxuwan bake nami jatubetan pitan kencha uva vino mata tsumaxun Dios kenwantan jatu yuikin: “Yuba benawakin en matu mawaxuni kai shinanmati inankin na uva vino en matu amaidan, mawakin en jimi en matu jabaxunxanai keskaki. Ikunwainbube ichaxun ea shinanbetanan jabiaskadi akubainxankanwen”, jatu wanikiaki. **26** Jesús ana judiamaken jawen shinanmati misi pikin inun jawen shinanmati uva vino akin nukun Xanen Ibu nuku mawaxuni man jatu shinan benawamakubainxanaii, kaneamadan.

*Ikunwainbu tibi jaskatan nukun Xanen Ibun yuda inun jawen jimi atikiaki, na janchadan*

**27** Jaskaken tsuabunda Jesús nuku mawaxuni shinanmati uva vino inun misi pikin jaska nukun Xanen Ibun shinanmati nuku waxuniki meseama jawen yuda inun jawen jimi achakai man ibubis atimapakubaikanaii.

**28-29** Matunmebi ibubis matun shinan pe unantan jawa chakabu jayama man pitiduki. Jamen chakabu pewadiamatunan, man piyutidumaki. Man jawadashina matun shinan man pewadiamatunan, ¿jaskakin eistan Jesúsun yuda jawen jaskakatsi man piai? Man shinanma jaki meseama piaiwen taexun Diosun matu kupixanikiki. **30** Ikunwainbun jaska kanemisbuwen taea matumebi betsapa babui betsabudi isin betsabudi tenei betsabudi man debukubainkanaii. **31** Nukun shinan ibubis pewai nun ma unanti waken nukun Xanen Ibun nuku kupiama ixanikiki. **32** Jakia nukun Xanen Ibun nukun yuda kupikinan, nuku jawen tapinmanun, iwanan, nuku akikiki. Nuku kupibiati ja Jesús ikunwanbumabe nuku tenan kayabiama ixanikiki.

**33-34** Jaskaken en betsabu inun en puibuun, ikunwainbu betsabubetan pikin Jesús nuku mawaxuni shinanmati man pikatsis iki bunijaidakin matun jiwe anuxun bebunkidi pitan jatube ichakubainxankanwen. Januxun jatubetan pi matun betsabu manakin jawaida piyamakanwen. Man jaska wakin ana kaneamaken Diosun matu kupiama ixanikiki. Ana betsakidi man ea kenexunimadan, matun mae anu kaxun jaska man ikai pewakin en matu yusin kaxanaii.

## 12

*Diosun Yushin Pepatun jaska jatu yuimatidukidi Pablon jatu yusinikiaki, na janchadan*

<sup>1</sup> En betsabu inun en puibuun, jaska Diosun Yushin Pepatun matu tibiki jikiton jawen aka kushipa tibi matu amamiskidi jau man tapin pewanunbun matu yuinun ninkakanwen. <sup>2</sup> Jesús man ikunwandiamma yushin chakabun ja dami betsa chakabu jiwea jayama inun jancha jayamatun jawa shinanma jaskati dabanten matu iyua man kenwankubainidan, jaskadan, man unaiin.

<sup>3</sup> Jamen betsadan, Diosun Yushin Pepa jayatun jawen jancha yuixunikan Jesús yuputidumajaidaki. Ja inun, yuda betsandi chanima yuikin: “Jesucristo en Xanen Ibuki”, iwanan, yuitidumaki, Yushin Pepatun kushipawen medabewamawen taeandan. Jaskaki, shinaindakanwen.

*Diosun Yushin Pepatun jawen kushipawen Diosun daya nuku ama akeakemiskiaki, na janchadan*

<sup>4</sup> Janua nun ikunwainbu tibi nun jawen kushipanamei inun nun medabenamenunbun Yushin Pepatun jawen kushipa betsa tibi nuku yunua akeakekin jabias Yushinin nuku yunumiski. <sup>5</sup> Ja inun, medabenanti betsa betsapa nuku akeakekinan, jabias Xanen Ibu Jesucriston nuku tibi nuku yunumiski. <sup>6</sup> Epa Dios nun dayaxunaidan, jaska nuku tibitun jawen daya nun axuain betsa betsapa nuku tibiwen kainmamiski. Jaska wakin jabias Epa Diosun nuku amakin jawen kushipawen nun jawenabu nuku tibi yunua akeakemiski. <sup>7</sup> Diosun nuku yunukin chanima xabakabi jawen Yushin Pepawen nuku tibi medabenanti shadawakin ikunwainbu dasibibu paxkattima wakin nuku yunua akeakemiski. <sup>8</sup> Yushin Pepawen yuda bestibu tibi jawen kushipa yunukin Diosun shinanwen xabakabi jau janchanunbun unanepa kayabibu jatu wamiski. Jabias Yushinwen bestibu tibi xabakabi pe yusinti shadawakin ichapa unanjaidaibu yusinanbu jatu wadiamiski. <sup>9</sup> Betsa jabias Yushinwen jawen kushipa yunukin jawa dateama shinan betsa betsapama ikunjaidawanikabu wakin betsa isin teneaibu jatu kaya wakin xuxawanika wakinan, <sup>10</sup> betsa jaska tsuan atiduma jawen kushipa unanmati dami betsa betsapa wanikabu wakin betsa jadatuda yushin chanima chaniai inun jadatuda yushin chani chakai unantidubu jatu wakin betsa jancha tapindiamawen janchatidubu wakin betsandi jabun jancha ninkatan matun janchawen jatu xabakabi maewaxunika wakin Diosun nuku tibi yunua akeakediamiski, <sup>11</sup> jaska tibi nuku wakin Diosun Yushin Pepatun jawen kushipawen Diosun daya nuku amakin jaska bechipaiai keska yuda tibi jawen kushipa yunua akeakekinan.

*Jesús ikunwain dasibibudan, pabu tibi yuda keskakiaki, na janchadan*

<sup>12</sup> Nukun yuda bestichaibia nukun pabu tibi tsamia akeakeadan, dasibidan, yuda bestichaiki. Jaska keskai nun Cristo ikunwain betsa betsapabia nun jawen yuda bestichai keskaki. Eskaki, matu yuinun ninkakanwen. <sup>13</sup> Jabiaskadi wakin nun jabun ikunwain tibi judiobu inun judiobuma inun, esclavo dayadu inun tsuan dayaduman nun Jesús ikunwanyan nuku duawakin jabias Yushin Pepa Diosun ma nuku inan akeakeken ikunwain betsabuki dasinun nun ikaya jenewen nuku nashimabu ja Yushinin nukun yuda bestichai keska wamiski.

<sup>14</sup> Jaska keskadan, nukun pabu paxka tibi jayamaki. Jakia pabu midima nun jayaki. Jaska matu yuinun ninkakanwen. <sup>15</sup> Januxun nukun taen meken shinankin yuikin: “En mekenmawen taea en jawen yudamaki”, iwanan, yuibiaya dasibi ja yudaki tsamiaki. <sup>16</sup> Ja inun, pabinkin bedu shinankin

yuikin: "En bedumawen taea en jawen yudamaki", iwanan, yuibiaya dasibi ja yudaki tsamidiaki. <sup>17</sup> Yuda dasibi beduskenan, ¿jawawen ninkatidubumen? Jaska inun, yuda dasibi pabinkiskenan, ¿jawawen xetetidubumen? Yuda pabu tibi jawen daya jaya keska ikunwain tibi jawen daya jayadiki. <sup>18</sup> Januxun nuku tibi Diosun katutan jaska bechipaiai keska wakin nun ja dayaxunun-bun jaska daya nuku yunua akeakemiski, yuda pabu tibi keska wakinan. <sup>19</sup> Nukun pabu tibi nun bestichaiyadan, nun yudauma ikeanaii. <sup>20</sup> Jakia chanima nukun punyan inun nukun kishi inun nukun tae inun nukun buxka inun dasibi betsapa nun jayadan, nun yuda bestichai jayaki.

<sup>21</sup> Ja inun, bedun meken yuikinan: "En mia jayakatsi ikamaki", atidumaki. Ja inun, buxkapandi tae yuikin: "En mia jayakatsi ikamaki", atidumadiki. <sup>22</sup> Jaskadada dasibi ikunwainbu nun medabenamemis yusinkin nukun yuda kayabikidi yusinkin en matu ninkamaidan, ea ninkakanwen. Jawada nukun yuda anu nebiaken nun shinainsmadan, nukun mentsis inun nukun beshpi inun nukun dekin inun nukun bu inun nukun dani ja tibi jayama nun bika tenei jiwtidubuki. <sup>23</sup> Jaska inun, dakekin jawada yuda betsabu nun uinmakatsi ikama yaushikin ja junenun ika tadi sawekin achimai nun jawenduamiski. <sup>24</sup> Jakia jawakida nukun yuda dakeama junekatsi ikama nun jawa bepuismaki. Jamen jawakida nukun yuda dakeai inun ibubis nun dakemis Diosun nuku achimakin jawendua nuku wamiski. <sup>25</sup> Jaska nukun yuda paxkaisma keskai ikunwainbu dasibi shinan betsabu betsapa nun jayama jabiaskas nun shinainbu jabube duanamei ikunwain betsabu uinkin jatun jamapai tibi jayabumawen jatuwen nuikin nun medabenanunbun Diosun nuku katumakeakemiski. <sup>26</sup> Jaska inun, nukun pabu betsan jawada bika teneaya dasibi yuda isin tenemiski. Jaska keskadiai ikunwain betsabu betsapa nun jayama chakabu teneaya dasibibun jabetan tenetidubuki. Ja inun, nukun pabu betsaki jawada jawendua nun sawemaya nukun yuda jidabi jawenduamiski. Jaska keskadiai ikunwain betsabu tsuanda kenwankin duawaibun dasibi jawen nun benimamiski.

<sup>27</sup> Jamen matu dasibi man yuda betsabu tibibiaken Diosun Yushin Pepatun medibi tibi matu kushipa waya daya betsabu betsapa Diosun matu yunua akeakeadan, man jabias Criston yuda keskabuki. <sup>28</sup> Jaska tibi nun jayanunbun Diosun jaska bechipaikin jawen daya tibi nuku yunukin ja dukun Jesúsun kushipayabu wakin ja kachu Diosun jancha kakape yuixunikabu wakin ja kachu yusinkin tapinmanikabu wakin janua ikunwain betsabu jabun tsuan atiduma dami wanikabu inun jabun isin teneaibu xuxawanikabu inun jabun medabewanikabu inun xanen ibu keska wakin yununikabu wakin januxun jancha betsabu tapindiamawen janchatidubu wakin jaska tibi nuku yunua akeakeniki. <sup>29</sup> Nun dasibi jaskabia ikunwainbu tibi nun dasibi Jesúsun tsuma kushipayabuma man unaiin. Ja inun, dasibibudi Diosun jancha kakape yuixunikabumaki. Ja inun, dasibibundi yusinkin tapinmabumadiki. Ja inun, jaska tsuan atiduma dami wai dasibibundi atidubumaki. <sup>30</sup> Ja inun, dasibibundi isin teneaibu xuxawabuma inun dasibibundi jancha betsabu tapindiamawen janchabuma inun dasibibundi jatun jancha nukun janchawen yuda betsabu yuixuntidubumadiki. Man jaska jaya tibi man unaiin. <sup>31</sup> Jaska tibi man jayawen taexun unankin matunabu medabewakubaini pe jiwekin jawen Yushin Pepatun kushipawen jawada pepa Diosun bechipaijaidai jayakatsis ikin yukakubainkanwen.

### *Nuikipa kayabidan, eskakiaki, na janchadan*

Man jaskai pepai jiwtidubiaken jatun ja binua en matu yuiai ninkakanwen.

## 13

<sup>1</sup> Jaska jawen pepai jiwekunkaintidan, eska shinantiki. Jamapai yuda betsabun jancha tibiwen en janchatidu inun Diosun nai tsumabun janchawen en janchatidubia en jawa nuikipama janchaidan, jawada mane kushakin tain tain amisbu keska inun mane dabe tsumaxun tsakama tsakama abainkin juiyawamisbu mimawati keskaki, jawauma jamen janchawan bestidan. <sup>2</sup> Jaska inun, en Diosun kakape xabakabi yuunikabia inun Diosun shinan en unanbiamis inun jamapai betsa betsapa junea en unanjaidabiai inun Dios ikunjaidawakin mati en maewatidubia en nuikipama en jawamajaaidaki. <sup>3</sup> Jaska inun, jamapai en jaya inantan jawen pei bitan ja nuitapai yumainbu pimai inun, Jesucristo ikunwankin en jawen kakape yusinkubaunaya juni betsan ea achixun en ninkai ea kuabiabudan, en nuikipamaken Diosun ea jawawen manakuama ixanikiki.

<sup>4</sup> Nuikipa kayabi jayadan, eskaki. Ninkaidakanwen. Bika tenebiai pes ikama tenemisbuki. Ja inun, duapananmisbuki. Ja inun, jawada juni betsa jayawen nui kemuismaki. Ja inun, xanen ibubia: "Ea duawakanwen", isbumaki. Ja inun, jawada pepa amisbukidi tsua yui jatunmebi keinsbumaki. <sup>5</sup> Jaska inun, metukin yuda betsabu dakewama janchai pemisbuki. Ja inun, jatun shinanens besti ikatsi isbumaki. Ja inun, jawaida sinataisbumaki. Ja inun, jawada jakidi chakabuwaimabu ana jas shinainsbumaki. <sup>6</sup> Ja inun, jawada wai chakabu akaibuwen benimaibumaki. Chanima jawada pepa besti taxniaya uin jawen benimamisbuki. <sup>7</sup> Tsuabuda nui jayadan, bika tenemabiabu ana jatube kemanameama tene keyumiski. Ja inun, tsuabunda jatun jancha ikunwankatsi imisbuki, yui kaya keskakenan. Ja inun, jadatuda pepa kaiai manakubainmisbuki. Ja inun, jawada pepa tibi mei tenemisbuki.

<sup>8</sup> Yudabun Diosun jancha xabakabi yuimisbu Diosun jatu jenemai inun, yuda betsabudi jancha tapindiamawen janchai Diosun jatu jenemaxanai inun, jamapai shadabu unankin keyubiakubainshinabu jaska tibi Diosun yamawaxanikiki. Jakia Jesúswen taea nuikipabu betsawen nuikin medabewakin jeneisbuma jaska besti keyuama ixankanikiki. <sup>9</sup> Natian Diosun jancha eskadabes tapintan nun unaiin. Jakia Dios janchaxunkin nun yusinbiai mawaida nun kati akin keyuamaki. Jadan, keyuxanikiki. <sup>10</sup> Jaskaken Jesús jabi ma juken dasibi januxun ana juneamaken jakidi tapinkin nun unankin keyuxanaii.

<sup>11</sup> Eskaki. Ninkaidakanwen. Bake mishtinbun pexeishta unankin jawen janchawen yuikin jawen shinanen shinankin jawada bake mishtinbun unanmis eandi en unaniki. Jakia juni ewatan bakeishtan shinan jenetan juni ewan shinanen en shinamiski. <sup>12</sup> Jaska inun, ja mane chaxa beisiti keskawen uinkin nukun yuda pe bexmas nun uinmiski. Jabiaskadi Diosun shinan pexeishta nun unanmisken Jesús ana juaya jaska Diosun en jointi unanmiswen eadi Diosbe beisinandabekin en unan bexmas wamis en unan keyuxanaii.

<sup>13</sup> Ja inun, na shinan dabe inun besti keyuismaki, ikunwainan, yubakani dateama manatidan, nuikipa kayabidan. Na shinan dabe inun besti jatun binu keyuadian, nuikipa kayabiti bestiki.

## 14

### *Jancha jatuna tapindiamawen janchaidan, eskatikiaki, na janchadan*

<sup>1</sup> Ja dukun yuda betsabuwen duapai man nuitidu tapinkubainkin Diosun Yushin Pepatun kushipawen jawada Dios man dayaxunkatsis ikai yukakubainkanwen. Jakia Diosun Yushinin matu dayamai jau jawen

jancha xabakabi Dios yuixunkin jawen yudabu yusinkubainkin jenetima yukakubainkanwen. <sup>2</sup> Yushin Pepatun jancha matu inan man jawen janchaidan, Dios man yuiaii. Man jaskabiai jawen jancha matu anua taxniai junea tsuan man jawa ninka pewatidubumaki. <sup>3</sup> Ja inun, tsuanda Diosun kakape Dios jatu yuixunkin jabun ja jancha ninkaiwen yuiaya ninkaidan, jawen jatu ja akin kushipawai inun, jawadawen dateai punu nukabu jatu benimawatidu inun daewakin jatu duawatidu yuiai ninkamisbuki. <sup>4</sup> Diosun jancha xabakabi yuixunikabun ikunwainbu ichapa yusinkin jawen jatu kushipa watibiaken jancha tapindiamawen jawen janchamawen janchai ibubis besti shinan chakanmisbuki, tsuan ninkamabiakenan.

<sup>5</sup> Tsuabuda matun janchamawen Dios yuixuni man janchaya juni betsan matun janchawen jaska yuiai matu maewaxuanmadan, ja jancha taxniaiwen tsua medabewatidumaki. Jamen betsadan, matun janchamawen Diosun Yushin Pepatun matu janchamai peken matu dasibi man jaska janchai en bechipaiaii. Jakia Diosun jancha xabakabi yuixunkin ikunwainbu ichapa man kushipa wa pejaidaya Yushin Pepatun kushipawen ja dukun Diosun jancha yuixunti yukakubainkanwen. <sup>6</sup> Janua en betsabu inun en puibuun, matu anu yusin kaxun jancha man ninkatidumawen matu yusinkin jawa en matu pe medabewatidumaki. Matu jaska wama jawada Diosun ea unanmai inun jawada chanima en unain en matu yuitiduma inun jawen jancha en matuki chanitiduma inun jawada yusian betsawen en matu medabewatiduma iniki.

<sup>7</sup> Ja inun, tepe dewe inun arpa jawen mimawati tapianmabia beyuskin mimawaiidan, jawa dunkemakin jawendua wai unantidubumaki, jawen jui kaiainan. <sup>8</sup> Jaska inun, xanen ibun jabe sinatanamemis beaibun jau jawaida jawen soldadobu benunbun ichawakatsi juni betsya yunua jatu kenakin trompeta mawachakaya jaska ninkabiai soldadobu unantimas jawa ninkatan betidubumaki. <sup>9</sup> Jabiaska keskadiai matubu matun janchamawen xabakabi Jesúskidi man chanibiaya jawa matu ninkatidubumadiki, jawa man jatu yuiai dabananen. Jaskaidan, jamen niwe besti taxnimai man janchakanaii. <sup>10</sup> Mai jidabi anu jiwebaunabu jancha betsya betsapa tibi jayabuki. Jaska inun, nawa betsya betsapabun jawena ninkatidubiaken <sup>11</sup> yuda betsabun ea janchawabiabu jatun janchawen jawada yuiai en ninkamaken: “Nawaki”, ika eki dakeaibun eadi: “Nawaki”, idiai eadi en jatuki dakemiski. <sup>12</sup> Jadatuda matun aka pepawen Yushin Pepatun matu medabewatidudan, ja jayakanwen, ikunwain tibidan. Jaskawen taexun Dios man dayaxunkatsis ikin ja dukun ikunwainbu betsabu medabewashadakatsi man ikaidan, jawen kushipa yukakubainkanwen.

<sup>13</sup> Jaska inun, jancha matun janchamawen Yushinin matu janchamaidan, ichati jiwe anuxun yusiin janchakatsidan, bebunkidi Diosbe janchakubainkanwen, jau ibubis kasmai juni betsan matun jancha maewaxuntidu matu inanunan. <sup>14</sup> En janchawenma jancha betsawen en Diosbe janchakin kenwanyan en yushinin ja kenwanbiaya en shinan unanepawen emebi en jawa ninkatidumaki. <sup>15</sup> Jaskakenan, ¿jaskaxanpa? En daka eskati. Dios kenwankin en yushinwen inun en shinanendi en akaii. Jaska inun, Dios kenwain nawai en yushinwen inun en shinanendi en idiaii. <sup>16</sup> Dios kenwankin matun yushin bestiwen man akayadan, yuda betsabu matube ichaxun matun jancha ninkamawen taexun matubetan Dios kenwanpaibia jawa yuitidubumaki. <sup>17</sup> Ja inun, Dios kenwain jawenduabiaibun matube ichabun matubetan Dios kenwantidubumaki. <sup>18</sup> Ja jancha en janchama en ja tapindiamawen janchakin matu dasibi en binuawen taexun en Dios kenwaiin, <sup>19</sup> iwanan, ikunwain betsabube ichaxun

ichapabu yusinun, iwanan, 10,000 ja jancha ea ninkabuma janchawen en yusinkatsi ikama jakia jancha xabakabi meken bestiti dasibibun ninkatidubu en yusinkatsis ikaii.

<sup>20</sup> En betsabu inun en puibuun, matubunan, jaska bakeishtan jawa unanma shinanmis keska ana iyamakanwen. Jakia bake mishtinbu padananain chakabuwama imisbu keskai tsuabuda man ma ewadan, ana unainspama jaskakidi shinaindakubainkanwen. <sup>21</sup> Israelbu Judea anu-abukidi Diosun Isaías yuikin: “Junibun jatun janchama Judea anuabu en jatu janchamaya nawan janchawen ekidi yuiaibu jabun jatun jancha ninkabiatan eadi chibanma ixankanikiki”, aka keneniki. <sup>22</sup> Jaskaken Yushin Pepatun janchamaya tsuada jancha betsawen janchaidan, jaska yudabun atiduma amakin jatun janchawen ninkakin ikunwandiabuma jatun shinan e itidubuki, jaskawen shinain janchai unanmadan. Jakia Diosun jancha jatun janchawen yusinkinan, jabun ma ikunwainbu medabewatiduki. Ikunwanbuman ja jancha ninkai eskadabes medabewadiatiduki. <sup>23</sup> Jaskaken matu dasibi ichatan Yushin Pepatun kushipawen jancha betsa tibiwen dasibibu janchakin man yuibaunaibun yuda betsa jaska janchatiduma inun ikunwanbuma jikixun man janchai ninkakin unanmabia yuikin: “Jesucristo ikunwainbu jadi jaska janchatimawen janchakanikiki”, iwanan, matu yuikin danantidubuki. <sup>24</sup> Jakia Diosun matu medabewaya matun janchawen man xabakabi jatu yusianyan yudabu ikunwanbuma jikixun ninkakin jatun shinan chakabu unankin ikunwanun, iwanan, jaska jiweisbu unantan matubetan ikunwankatsis ikin shinan betsa watidubuki. <sup>25</sup> Jatun shinan chakabu junea xabakabi wamakin Diosun jatu unanmaya ana jawawen jaskatima datei Dios kenwanun ika danti iki beutan yuikin: “Chanim Dio matuki dasia jiweaki”, ixankanikiki.

### *Ikunwain ichaxun jaska tibi akin jawendua wakin pewatikiaki, na janchadan*

<sup>26</sup> En betsabu inun en puibuun, jaska man ikunwainbu ichatan jawada Diosun matu amai medabenain kushipai man eskakubainunbu matu yuinun ninkakanwen. Diosun matu tibi unanepa waya juni betsan Dios kenwankatsi ikidan, nawakanwen. Ja inun, juni betsandi yusinkatsi ikinan, yusintidubuki. Betsadi Diosun jawada dama unanmaxu chanikatsi ikidan, chanitiduki. Betsadi jatun janchamawen janchakatsis ikidan, jau jawen janchamawen janchanunwen. Betsan ja jancha yuiaya xabakabi jawen jancha maewaxunkin yuixunkatsis ikaidan, jau jatu maewaxuni janchanunwen. Jabu tibi jancha akeakekin unanxubida ikunwainbu medabenain man kushipanamekubaintidubuki. <sup>27</sup> Jakia Yushin Pepatun kushipawen matun janchamawen man janchakatsis ikaibudan, dabe kasmal dabe inun bestitun dukun man yuia akeakeaibu jabiatiandi juni betsa Yushin Pepatun kushipa jayatundi jau jatu maewakin xabakabi yuixunkubainunbunwen. <sup>28</sup> Jakia juni betsa Yushin kushipa jancha maewaxuntidu jayamaken jau tsuada Yushin Pepatun kushipa jancha betsawen janchai matu anu jayabia ichamisbu bebunga jau matu janchaxunyamanunwen. Jakia jamebi Dios kenwain janiada tsuan ninkama Diosbe janchatidubuki. <sup>29</sup> Jabiaskadi tibidi Dios yuixunikabun jawen jancha xabakabi yusiaibun yusinika dabe kasmal dabe inun bestitun jatun jawada yuitidubuki. Yusianyan yusinika betsabun ninkakin jawen jancha ¿jancha kayabimenkain? jau yukakin unankubainunbunwen. <sup>30</sup> Janua tsuada juni betsa matube icha tsuanua Diosun jawen jancha xabakabi taxnimakin yuimakatsi ikaya ja dukuntun yusinkin jau jawaida keyununwen, janua ja kachu betsandi jau anunwen.

<sup>31</sup> Jaska wakin matu tibitun inun dasibitun jawada Diosun matu yuimakatsis ikai jawen jancha jatu yusinkin man akaya jaska tibi dasibun matu anua tapiin benimakubaintidubuki. <sup>32-33</sup> Man ichatan kenwainbu Dios unanuma jiweatun matu itimaska wakin jusimakatsi ikamawen taea man Diosun jawen jancha xabakabi yuixunmisbun matun kushipa meketan uinda jawen dayakubainkanwen.

Jaskai nun ichai beyamis tibi ikunwainbu ichatan <sup>34</sup> juni yusinanbun yusinkin keyuaya junibun ninkatan yuka ikeakeaibun ja ichabu anua ainbuaibudi yuka ikatsis ibiai jau janchayamanunbunwen. Jawen benen mekeawen taea ainbuaibu jau pes tsauununbunwen, Diosun Moisés kene-makin jabiaskadi yununiwen taeidan. <sup>35</sup> Jawada yuka iti tenebai kaxun jawen jiwtexun besti jawen bene kasmai jawen epa inun jawen juchi jau yukakubainunbunwen.

<sup>36</sup> Diosun kakape yusinkin taewakin matu anua dukun taxnimama inibu man unaiin. Ja inun, junibun yusinkin matu anu besti yusianma idianibuki.

<sup>37</sup> Jaskaken tsuabunda shinankin: “Diosun Yushin Pepa jaya jawen jancha en xabakabi yuixuntiduki”, iwanan, en kene uinkin: “Nukun Xanen Ibun Pablo nuku yusinmaniwen taea yusian pepaki”, iwanan, unanxankanikiki. <sup>38</sup> Jakia tsuanda en yusian dananyan Jesúsun ja yusinandi danandiaxanikiki.

<sup>39</sup> Jaskaken en betsabu inun en puibuun, tsuada Diosun Yushin Pepatun kushipawen jancha jawen janchama janchakatsis ikai jatu nesewakin nemayamakanwen. Jakia Dios yuixunkin jawen jancha xabakabi jatu yusinkatsi ikinan, Dios yukakubainkanwen. <sup>40</sup> Janua ichatan Dios man kenwankatsis ikaidan, dasibi Diosun Yushin Pepatun kushipawen jawendua wakin jaska en matu yusinmis chibankin akubainkanwen.

## 15

### *Jesús mawashina Diosun bestenwan uinibukidi yusinikiaki, na janchadan*

<sup>1-2</sup> En betsabu inun en puibuun, Diosun kakape Jesúskidi en matu yusianyan ninkakin shinan chakayamakin unanxubida bechipaikin Jesú man ikunwanixun chibankin shinankubaini chintuanma man kushipakunkainaya ja kakapewen Diosun matu mekeawen taea mestentan man jamen ikunwanma ini unankin matu ana yuinun ninkaidakanwen.

<sup>3</sup> Jaska dukun ean unankin tapinxun en matu yusintanidan, eskaki, ninkaidakanwen. Jaska Diosun jancha yuixunikabun kene tibiwen yuini keskai yusinkin: “Nukun chakabu buanun ika Mesías Cristo mawaxanikiki”, inibu jaska kenenibu meneni keska nun matu yusinkubaintaniki. <sup>4</sup> Ja inun, Jesú mawa maiwabu xaba dabe inun besti kaya Diosun bestenwanikiaki, jaska bebunkidi Diosun jancha yuixunikabun jakidi kenenibu keskadiaidan.

<sup>5</sup> Jaska washinabu janua Simón Pedro, jawen kena betsa Cefasdan, jaki dukun Jesú taxnitan uinmatan janua jawen kushipayá 12 junibu jatudi uinmadianikiaki. <sup>6-7</sup> Januadi jawen betsa Santiago jakidi nukutan Jesúsun kushipayá betsabudi jabukidi nukutan jatu uinmashinken janua jabun chibankin ikunwanmisbu midimajaida 500 binuabutikidi Jesú jatuki nukutan uinmadianikiaki. Jatidi ma debua inun ichapa jiwediayuabuki.

<sup>8-9</sup> Januxun Jesú ikunwainbu ichakawakin en jatu mesewakin itimaska wakubainaiwen taea en atimapá chakabubia Damascokidi en kaya jawen jenei eki nukui Jesú taxnitan ea uinmadianiki. En bake atimapá kaian kaunma jiwemis keska en ikaya jawen kushipayá betsa tsuabunda ea kenatidumabiaken en jawen tsuma betsabu kushipayá keska Jesúsun ea wani jatu keskabia en shinanan, en bexmaski. <sup>10</sup> Eadan, chanima en jawen tsuma

kushipaya betsaki. Jaska ea wakatsi Diosun ea duawakin ea katunixun jamen ea katuama jawen daya akin Jesúsun kushipaya betsas dasibibu en jatu binumakubainaii. Jakia emebi dayama Diosun ea duawakin ea medabewaya en dayaxunkunkainaii. <sup>11</sup> Nun tsuabuda Jesúsun kushipaya betsabu inun ea nuku dasibibun Diosun Jesúskidi kakape nun matu yusinkubainaya ea kasmai juni betsabu matuki chaniaibun man Jesús ikunwankin taewaniki.

*Jesús bestenwani keska wakin ikunwainbu mawakubainaibu Diosun jatu bestenwandiaxanikiaki, na janchadan*

<sup>12</sup> Jamen betsadan, Cristo mawashina Diosun bestenwanikidi nun matu yusinbiamisken ¿jaskakin: "Mawabun yuda ana besteanma ixanikiki", iwanan, jatiditun shinankin Corinto anuxun yuimisbumen? Man jaska shinainbu matu ana yusinun ninkaidakanwen. <sup>13</sup> Mawabu jawen yuda ana besteanma ixanaibunan, ¿Cristodan, jawen yuda ana besteanma inidaka, man shinain? <sup>14</sup> Diosun Criston yuda ana bestenwanma inikenan, jaska Cristokidi jawen kakape nun yusinmisdan, jawama inun man Jesús chibainan, matun shinanwen man ikunwainan, jawamadi ikeanaii. <sup>15</sup> Ja inun, Diosun Criston yuda bestenwani nun jawen kushipayabun matu yusinkin mawabu jatun yuda ana besteanbuma ibiaxanaya ja-men matuki chanii nukun janchawen matu padain nun chani chaka bestikunkainkeanaii, Dios jaska yubakabianiken nukunmebi jawen jan-cha betsawakin Dios dananmaidan. <sup>16</sup> Mawabun jabun yuda besteanma ixanaya Cristodi Diosun bestenwanma idiakeaniki. <sup>17</sup> Jaska inun, Cristo besteanma iniken man Cristo ikunwain jawamawen taexun matun chak-abu tsuan buama man jabiaskas jiwekeankanaii, jawa kushipa jayamawen taeandan. <sup>18</sup> Jaska inun, Cristo besteanma iniken Cristo ikunwainbu jamen mawatan benukeankanaii. <sup>19</sup> Ja inun, na jiweawen besti Cristo ikunwankin nun manakaibudan, nun nuitkaachakayamekanaii, jaska betsabun nuku danankin nukukidi shinantidubudan.

<sup>20</sup> Jancha chanima matu yuinun ninkaidakanwen. Cristo mawashina ja dukun Diosun bestenwaniwen taea yudabudi mawakubainaibu jawen taeadi bestein keyuxankanikiki. <sup>21</sup> Adánen chakabuwakin yudabu dasibi mawati baiwaxuniki. Jaska keskadiwakin Cristo mawa ana bestenixun jabiawendi taea yudabu dasibi mawa bestenxankanikiki. <sup>22</sup> Adán ini keskadiai yudabu dasibi mawaxankanikiki. Jakia Cristo bestentan ana jiweniken jaska keskadiai yudabu ikunwain ana bestentan jiwedioxankanikiki. <sup>23</sup> Janua Cristo jawen yuda Diosun bestenwaniken ja jabun ikunwainbu jawenabu mawabu jaska Cristo ini keskai ana Cristo juaya dasibi jatun yuda Diosun bestenwankindi keyuxanikiki. <sup>24-26</sup> Janua dasibi pewakin keyunun ika Cristo Xanen Ibujaida juxun dasibi jatun kushipa tibi jatu mebinkin xanen ibu betsabu mitanumabu wakin dasibi yununika kushipabu yamawakin dasibi yushin yamawakin dasibi jawen jaibuaibuma maemakin yamawakin keyutan atimas jawen yudabu mawamis keyu maematan Cristo ana Xanen Ibuama jenetan Epa Dios besti yunua ja bestitun dasibi mekei Xanen Ibu-anikiki. <sup>27-28</sup> Dasibi Diosun damiwani Criston jatu maemamakin keyutan jaska jabe yubakai yuinanmeni jawen Epa Dioski xanen ibuama Epa Diosun ja damiwani mekekubainmissun yunua Criston jatu maemakin binumatan dasibi betsawakin jabetan damiwani Epa Diosun mekekin dasibibu binui ja besti xanen ibujaidaxanikiki, Epa Diosdan.

<sup>29</sup> Jaska inun, betsadan, en jaska matu yusinsmabiaken yudabun ikunwain nashidiama debuabu jatidi yuda betsabun medabewanun ika nashixunmis-

buki. Mawabu Diosun ana bestenwanma ibiaxanaya, ¿jaskai ja yuda mawa man jatu nashixunmisbumen, ana bestenxanai man ikunwanmabiadan? <sup>30</sup> Jaskabiaken Diosun kakape nun yusianyan chakabu mese tenei nun ikunkainaya mawa nun ana besteanma ibiaxanaya, ¿jaskakin jiwea bika badi tibi nun tenekubainkanai? <sup>31</sup> En betsabu inun en puibuun, nukun Xanen Ibu Jesucristo man ikunwanyan chanima benimajaidakin jancha kayabi matu yui: “Badi tibi en mawakeankunkainaii”, ika en chani chakamaki, jaska en ikunkainaikan. <sup>32</sup> Nun ana besteanma ixanaya en jamen jiweawen taea Éfeso anua pubenjaidabube jatube ja iki en shinanen besti ¿en jawa maemama ini man shinain? Chanima mawabu nun ana besteanma ixanayadan, jaska yudabun ikunwanbuma janchai: “Beyus bestikin pinankanwen, vino anankanwen, meshukidi mawatan nun jawa piama ana beyusama ixanaidan”, ikaibun nun jabiaskadi shinandiakeanaii. <sup>33</sup> Jaska shinanbiakubainaibun jancha kayabi matu yuinun ninkaidakanwen. Jau matu padanyamanun bun tsuabunda nukun yusian danankin man beya pepa chibanbiaya jamakidi shinanmakin matu chakabuwamakin jenemakatsis ikaibu ana jatube jai-bunameyamakanwen. <sup>34</sup> Matu dakewanun, iwanan, na jaska en matu yuiali. Yudabu Diosun bestenwanxanai betsabun ikunwanma kanekanikiki. Matubu niti itan jatun jancha ana ninkai chakabuwama matun shinan bestenwantan pe besti Dioskidi shinankubainkanwen.

*Yuda mawakubainaibu bestein jaskaxanaibukidi Pablon jatu yusinikiaki, na janchadan*

<sup>35</sup> Jamen tsuada yuka iki: “¿Jaskada ixankanimenkain, yuda mawabu Diosun bestenwanan?” iki: “Jatun yudadan, ¿jaskada jayaxankanimenkain?” ikin nuku yukamisbuki. <sup>36</sup> Jaska man yuka ikaidan, jawa unanmabia man ikaii. Jexe banakidi yusinkin jaska nukun yuda bestenxanai en matu ninkamatiduki. Eskaki, ninkaidakanwen. Yunu jexe bana jawen bimi chapuaya jawen jexe pexei jukuin betsai ana jiwemiski. <sup>37</sup> Janua xachiwan jexe bana jukuin jawen ji damii beneama jakia jawada jexe tibidan, xachiwan keskadan, jawen bimi damimisbuki. <sup>38</sup> Jexe tibi Diosun jaska benemanixun jaska tibi betsawama yumewamiski.

<sup>39</sup> Ja inun, yuda dasibidan, betsawama tibi jaskas nami jayamaki, juni kuin nami inun, yuinaka nami inun, peiyabu nami inun, baka namidan. <sup>40</sup> Jaska keskadi nai anua inun mai anua yuda jaska keska dabs wama iniki. Ja inun, yuda besu naiudia jawendua wakin mai anuadi yuda besu jawendua betsawama wadianiki. <sup>41</sup> Jaska inun, badi inun uxen chaxadan, jaskasmaki. Ja dikabi bishi dasibi jaskas chaxamadiki. Betsawama tibia inun betsawama chaxaya Diosun dasibi chaxamamiski.

<sup>42</sup> Nukun yuda bestenwankin betsawama waxanaidan, jabiaskadi tibi nuku waxanikiki. Mawa maiwabu yuda chapumiski. Jamen bestenwankin yuda bena chapuisma nuku tibi inanxanikiki, Diosun. <sup>43</sup> Mawabu jawen nami bechipaiama maiwakin putabiabu janua jawen yuda ana besteaintian yuda bena chapuisma bi bestenxanknikiki. Yuda mawa nami babu maiwabiabu Diosun chipu bestenwan jawen kushipa inan jayaxanikiki. <sup>44</sup> Yuda kayabi Jimia mawa maiwabu ja yuda besteinan, Yushin Pepaya nun bestenxanaii. Yuda kayabi nun ma jayaken yuda bena jawen Yushin Pepatun jiwemaya nun jayaxanaii.

<sup>45</sup> Diosun yunua Moisin kenekin: “Juni wakin taewakin Adán damiwatan Diosun jiwemaniki”, aniki, Moisinan. Jamen Criston yuda Adán keskadi bia nuku mawaxunkin jiwekuian Diosbe niti ikama jawen Yushinwen jiwei nuku waxuniki. <sup>46</sup> Nuku damiwakin taewakinan, ja dukun yuda kayabi

Diosun nuku waniki. Ja kachu Diosun nuku bestenwanyan jawen Yushin Pepatun yuda bena nuku inanxanikiki. <sup>47</sup> Ja dukun juni Adán wakin Diosun mai mishpu bixun jawen yuda damiwanikiaki. Jamen yuda Cristodan, nai anua jui juni kuin yuda bitan kainiki. <sup>48</sup> Mai mishpu bixun damiwakin Adánen yuda wani jabias nukun yuda mai mishpuken ja yuda nun mawabu chapui keyui nukun yuda ana jawendi mai mishpu besti ixanikiki. Jamen Cristo nai anua juni jabiaudidi kani keskai nukudi nai anu jabe jiwei kai nukun yuda Yushin Pepatun kushipa jaya yuda benaya nun jiwekuinxanaii, niti ikamadan. <sup>49</sup> Ja dukun mai anu jiwea Adán damiwani jawen yuda keska nun jiwea Diosun nuku bestenwankin nuku betsa wa Criston yuda keska nun ixanaii. <sup>50</sup> En betsabu inun en puibuun, ana matu yusinkubainun ninkaidakanwen. Nukun yuda kayabi chapumiswen taea jiwekuin niti ikama nun jawen itidumawen taea jabias yuda kuin nai anu Diosbe jiwedidumaki.

<sup>51</sup> Yubakatan Diosun jawen jancha juneni matu xabakabi yuinun eskaki, ninkakanwen. Jesús nun ikunwainbudan, mawaida jatida nun mawama ixankanaii. Jesús ana juaya nuku tibi betsa waxanikiki, yuda bena betsa nuku wakinan. <sup>52-53</sup> Badi jawen jenei keyuaitian jawaida nun betsupe imis keskai Jesucristo juaya Diosun nai tsuman trompeta chaan akaya mawabu Diosun bestenwanyan yuda kayabi chapumistun jawada chapuisma bikin yuda bena ana mawatiduma biaya nuku nun jiweyuabu nuku dasibi dami wakin betsa wadiaxanikiki. <sup>54</sup> Jaskai kaikidi Dios yuixunika Isaíasin kenekin: “Ana tsua mawama iki kai Mesíasin mawa maemaxanikiki”, ini xabakabi chanima ani nun unaiin. <sup>55</sup> Diosun jancha yuixunika betsa Oseasindi kenekin: “Diosbe jiwea niti ikamadan, nun mawamawen taea nun ana jawa tenetiduma ixanaii”, ini man ninkadiatiduki. <sup>56</sup> Eskaki, matu yuinun ninkaidakanwen. Chakabukunkaini chakabuwen mawai nun datemiski. Jaska inun, dasibi Diosun nemati inun jawen yunuti Moisés kenemani nun chibantidumawen taea shinan chakabun nuku achixun nuku chakabuwamakubainmiski. <sup>57</sup> Jaska binumakin nukun Xanen Ibu Jesucristo nuku mawaxunkin nukun chakabu buaniken mawai nun jawa ana dateama ixanaiwen taea Dios kenwankubainankanwen, benimawakinan.

<sup>58</sup> Jaskaken en betsabu inun en puibuun, jawada nukun Xanen Ibun matu yunua jeneama akin man jamen dayama man unainwen taea Jesús chibain chintuanma shinan betsa wama nukun Xanen Ibuki xukua pejaida dayakin apakekanwen.

## 16

*Jaska watan Jerusalén anua ikunwainbu Pablon jatu medabewakatsi iniki-aki, na janchadan*

<sup>1</sup> Yunuti betsa matu yuinun ninkakanwen. Jesús ikunwainbu Jerusalén anuabu nuitapakanikiaki. Nun jatu medabewanunbun jaska ikunwainbu Galacia anuabu en jatu yunuyama keska wakin en matudi yuiai ninkakanwen. <sup>2</sup> Matu anu en kadiama ea manama domingo tibi matun dayawen man pei biai ichapa man biaitun pei ichapa aduaya eskadabes man biaitun pei eskadabes adukin ea manakanwen. Man ma ichawashinken <sup>3</sup> janua en kai jikiaya pei man ichawashina Jerusalén anu man bumakatsis ikin juni betsabu katutan en kene jatu bumaxanaiyabi ja medabewati pei man ichawashina jatu inain butidubuki. <sup>4</sup> Jamen ean dikabi en jaska shinain en kayadan, jabu ebe butidubuki.

<sup>5</sup> Nenua kainkainidan, Macedonia mai pakea anu kakunkaini janua atimas Corinto anu en matu anu jikixanaii. <sup>6-7</sup> Matu anu kabia en jin jin

ikainkatsi ikamaki. Jamen nukun Xanen Ibun ea nemama uxe dabe kasmui debuaya matube jiwekatsi iki jawaida en kakatsi ikamaki. Januxun ea duawakin ea medabewakin jadakidida en kaya man ea nichinkin pe-watidubuki.

<sup>8</sup> Ja Pentecostés jabatiandi ikunwainbu ichabuki Yushin Pepa jatuki butuni besiaibutian uxe junio keyuaya nenu Éfeso anu en jabianu bashikuxun jatu uinyuaii. <sup>9</sup> Éfeso anuxun Jesúskidi kakape yuui en dayai ichapabun ea nemai eki sinatabiaibun Diosun jancha betsabu en yusinkubainaya ichapabundi ea ninkakanikiki.

<sup>10</sup> Nukun betsabu Timoteo matu anu jatiada kaya nukun Xanen Ibun daya en axunmis keskadi akaiwen taexun jikiai ixun duawaxankanwen. <sup>11</sup> Matubun tsuanda dananma duawakin jamapai tibi bikatsis ikai medabewakin inantan benimawakin unanuma jau ea anu junun nichinxankanwen, nenuxun ikunwain betsabubetan jatubetan en manaidan.

<sup>12</sup> Ea kene bemakin Apoloskidi man ea yukaima matu yuinun ninkakanwen. En yunubiakubaina natian matu anu kayutidumakiaki. Janu jatiada jawen shinanen kaxanikikidan.

### *Jatun jancha jatu bumanibukiaki, na janchadan*

<sup>13</sup> Kushipai jawaki teama Jesús chibain chintuanma jamapai chakabu danain pepakubainkanwen, niti ikamadan. <sup>14</sup> Jamapai tibi man akaidan, yuda betsabuwen nuikin jatu duawakin axunkubainkanwen.

<sup>15</sup> En betsabu inun en puibuun, Acaya mai pakea anuxun Estéfanas inun jabe jiweabun jabu dukuntun Jesús ikunwankin taewanibun ikunwainbu dasibiwen nuikin jatu medabewakubainmisbu man unaiin. <sup>16</sup> Jabu keska ninkakin ikunwainbu betsabun nukun Xanen Ibu Jesúskidi kakape dayamisbu jatu ninkadiakin dasibi jatu medabewakubainkanwen.

<sup>17</sup> Man chai jiweken matumaki Estéfanas inun, Fortunato inun, Acaico ea anu beshinxun jawada man ea axuntiduma ea axuainbuwen taea en benimajaidaii. <sup>18</sup> Jabun man ea axuntidu keska wakin ea anu beshinxun en juinti shinan chankanwankin ea benimawakanikiki. Ikunwain betsabu jaska keskabu duawadiakubaibainkanwen.

### *Jawen kene Pablon keyunikiaki, na janchadan*

<sup>19</sup> Ikunwainbu Asia mae pakea anuxun matukidi pe shinankin jabun jancha matu yunukanikiki. Ja inun, Áquila inun Prisca inun dasibibu jatun jiwe anu ichamisbun matukidi pe shinandiakin jabundi jatun jancha matu yunukanikiki. <sup>20</sup> Nenuxun ikunwain dasibibun jabun jancha matu yunudiakanikiki. Ikunwain betsaki nukutan jatube benimai yuka iki ikunkubainkanwen.

<sup>21</sup> Kenekin keyukin en tsumapan ana ea axuanma en Pablon emebi en matu kene keyuxunaii.

<sup>22</sup> Tsuabunda nukun Xanen Ibu bechipaiamanan, jau Diosun yupununwen.

Nukun Xanen Ibu nun manai jawaida jau ana menan judinunwen.

<sup>23</sup> Nukun Xanen Ibu Jesúsun jau jawen pepawen matu duawakubainunwen. <sup>24</sup> Matubetan en Jesucristo ikunwainwen taea matu shinain en matuwen nuikunkainaii.

Jatiski, en janchadan.

Pablo

## CORINTO ANUABU PABLON JA KACHU JATU KENE BUMANIKIAKI 2 CORINTIOS

*Pablón jatukidi shinanikiaki, na janchadan*

- <sup>1</sup> En Pablo Jesucriston kushipayawakin Diosun jawen shinanen ea katuniken nukubetan ikunwain nukun betsa Timoteobetan en Pablon en ana matu kene bumaii. Diosunabu Corinto maewan anuxun man ikunwainbu inun dasibi nukubetan Jesús chibainbu Acaya mai pakea anu manibaunabu en matu kene bumai uindaxankanwen, jaska man unanumamenkainan.
- <sup>2</sup> Nukun Epa Dios inun nukun Xanen Ibu Jesucriston jau matu unanuma jiwemakin pewakin duawakubainunbunwen.

*Ikunwainbu betsabu bika tenei juinti nishmabu jatuwen nuitikiaki, na janchadan*

- <sup>3</sup> Nukun Xanen Ibu Jesucriston Epa Dios, jabias nukun Epadi nukuwen nuikin nukun juinti punu nukai tsiuñ ikai nuku daewakin benimawakubainmisdan, kenjaidawakubainankanwen. <sup>4</sup> Jamapai tibi mei nun bika teneaya Diosun nuku daewakin nuku benimawamiski. Nuku jaska wamiswen taexun Jesucristo ikunwain betsabu jawada mei bika tenei juinti nishmaibu Diosun ma nuku medabewamisen jatuwendi nuikin nun jatu benimawadiatidubuki. <sup>5</sup> Jaskaken jaska Cristo bikajaida jiwekin tenekubaini keska nun jawenabudi jawen taea dayadiai bikabiaken nun jiweabudan, tsuabuda jabundi ikunwain dayaxunkin tenediaibu Cristo jau jatuwendi nuinun jabu juinti nishmabu binumakin jatu benimawakin shinan chankawankubainankanwen. <sup>6</sup> Ea inun Timoteo jamapaiwen nuku bika tene-maibun nukuwen taea nukukidi shinan chakai man juinti nishmama man Jesucristo ikunwanunbun nun tenekubainaii. Ja inun, Dios nukuwen nuikin nukun juinti tsiuñ ika nishmabiaken nuku benimawamisxun jaska matudi memaibu medabewati shada nun tenemiski. Jaskaken jawa dateama jabiaskadi matudi akaibu man tenediaidan, jawen kushipakubainkanwen, maemaidan. <sup>7</sup> Jaska inun, nun imis keskai bika jiwekin man teneaibun jaska medabewai nukuwen nuikin nukun juinti nishma Criston nuku benimawamis keska wakin jabiadi matuwen nuikin matun juinti nishma benimawaxanai matukidi dateama nun manakubainaii.

- <sup>8</sup> En betsabu inun en puibuun, eska Asia mae pakea namakis anuxun nun jatu yusiaiwen taexun jaska bikajaida nuku jiwemaibu nun tenekubainyama matuki ana chaninun ninkakanwen. Jawada bika nukunmebi jaska nun tenetiduma inun nun binutiduma jamapai chakabu tibi tenei nukun jiwea ma benua keska <sup>9</sup> shinain: “Natian daki nuku ma tenankanikiki”, ikin jawada nukunmebi nun atiduma ibubis nun shinanbiaya Diosun nuku yusinkin jaska jatun mawabu bestenwanxanaitun nukun jamapai tibi nuku axuntidu nun ikunwantidubu Diosun nuku jaska binumakubainyamaki. <sup>10</sup> Ja inun, nun mawapanan jaska Diosun nuku mekeyama keska wakin nuku axunkubainxanai jawa dateama ikunwankin nun manakubainaii. <sup>11</sup> Nun jaskamisen nukukidi shinankin medabewakin Diosbe janchakin nuku yukaxunkubainkanwen. Ichapabun man nukukidi Dios yukakubainaibun Diosun nuku mekekin duawayu ichapabundi nukukidi ninkakin Dios kenjaidawatidubudiki.

*Jawawen jaskatima jawen yuba betsa Pablon jatu banabimanikiaki, na janchadan*

<sup>12</sup> Jamen nukukididan, jaska yudabun Dios unanbuman shinain kenmis keskama jakia Diosun nuku shinan betsa wamatan juinti pepa nuku waniven taexun jaska Diosun bechipaimis nuku shinanmaya tsua padanma duapa bestikunkaini matuwen nuijaidai nun kenkunkainaii, matuwen taea chanima benimaidan. <sup>13</sup> Matu kene bumakinan, jancha juneawen matu kenexunama jancha xabakabi man uinkin pe ninkatidubu besti nun matu kenexunkubainmiski. Ana man ninkakin pejaidawaken eandi matu ninkai en benimaxanaii. <sup>14</sup> Nukukidi man ninka bexmas waii. Jakia nukun Xanen Ibu Jes s ana juaya man pepaibu matuwen kein nun benimaya nun matu yusin pewamiswen taea inun nukuwendi taea benimakin man nuku kenwandiaxanai en manakubainaii.

<sup>15</sup> Jaskawen taea matuki chiti ikin jaska en shinaiin. Jaska matu anu kaxun matu uinkatsis ikin ja dukun en shinainma keska dabeki matuki bai kai <sup>16</sup> Macedonia mai pakea anu jiweabu dukun uiantanbaini janua matuki bakin matu benimawatan janua chintunkidani jui matuki ana bakin ana en matu benimawaya janua Judea mai pakea anu jiweabu anu en kaya matundi man ea medabewatidu shinain: “En matuki bai kaxanaii”, matu watan en jaska matu kenexunimaki. <sup>17</sup> Matu anu bai kanun ika chanima en yubakaimaki. Jaskawen taea en shinan dabewaisma man ekidi shinantidumaki. <sup>18</sup> En shinan betsa betsapa en maewama Diosun unainkiki. Jaskawen taexun man nuku ana ja atidubumaki. <sup>19</sup> Ea inun Timoteo inun Silvanonan, Diosun bake Jesucristokidi besti nun matu yusinmiski. Jawen bake Jesucristokidi yubakai janchani Diosun betsa waisma jaska menenixun betsa wama akubainmiski. <sup>20</sup> Ja inun, Dios yubakani jawen bakewen dasibi xabakabi kaka kainmaniki. Jaskaken yudabun Dios kenwanyan jabun jancha bechipaikin Criston kushipawen yuikin: “Jancha chanimaki. Jabiaskaki”, ikin nun kenwanmisbuki. <sup>21-22</sup> Jaska inun, nuku dasibibun Cristo nun chibainbudan, jawen kushipawen Diosun Yushin Pepawen unanti shadawatan jawenabu benutimawakin nuku ibuwaniki. Jaska wanixun nuku jeneama duwapakexanai mestenwain Dios yubakaniki. <sup>23</sup> Jaskaken matu dake tenemakatsi ikama jaskai man Corinto anuabu en kadiama jau nukun Epa Diosun matu xabakabi unanmanunwen, en chani chakama ea unainkikidan. <sup>24</sup> Ja inun, nukun Jes skidi nun matu ikunwanmamisdan, nukudan, nun ibumaki. Jes s ikunwain ibubis matun shinan ewai mestenant kushipai man benimakubainunbun matu medabe bestiwai nun matu dayaxunkunkainmiski.

## 2

<sup>1-4</sup> Jaska matukidi shinankin matun juinti punu nukawakin tsiu akatsi ikama jaska en matuwen nuijaidai man ea unanunbun, iwanan, matu shinankin kaxabetanan matu medabewanun, iwanan, en matu kene bu-maimaki. Matu anu jikitushitan tsuabuda en matu juinti punu nukawakin tsiu akaya tsuan eadi benimawatidumaki, en matu punu nukawatushikenan. Janua man ma pewashinken ea benimawaya matudi ewen man benimaxanaii. Jaskaken natian matu anu en kakatsi iyuamaki.

*Junin ikunwanbiai chakabuwayama anajas shinanmajkimawatikiaki, na janchadan*

<sup>5</sup> Ja junin kanekin ea punu nukawakin ea besti akama matu dasibibudi akima chanima man unaiin. <sup>6-8</sup> Na besti en matu yuiai ninkakanwen. Jawen

chakabuwen taexun man ja taxnimaima matube ana ichatiduma tene-jaidakubainkin jatixun ma bika tenemaima jenetan ikunwain jau jeneyama-nun matu man jawen nuiai jau unanun ana itan beyawakin daewadikan-wen. Jakidi jawen chakabu ana shinanma jakimawakin matudi jaki-madikanwen.<sup>9</sup> Jaska inun, en matuki chiti itan jaska en matu yusinkubain-mis ja chibankin man amis unanun, iwanan, matu kenexundi bumakin jakidi en matu jaska yunuimaki. <sup>10-11</sup> Jaska Satanásan nuku padankatsis ikai nun unanjaidaya jau nuku chakabun maemayamanun jawada ja junin akubainyama jakimakin jadi jakimawatan man ana shinanbumaken matun shinan pe unankin eadi jakimai en ana shinanmadiki. Medabewakin en matu kushipa wakatsi ikaii. Criston en shinan ea bebunxun unanyan jawada chakabu man jakimaimaken eandi ja junin chakabuwayama en ana jaska jakidi shinantidumadiki.

*Diosun Cristoki nuku dasiwaran jamapai bika nuku binumamiskiaki, na janchadan*

<sup>12</sup> Ja inun, Diosun kakape Cristokidi datan akin yusinkatsis iki Tróade maewan anu en jikiaya yuda ichapabu Diosun ea ninkamaya tsuabunda ea nemamabiaken <sup>13</sup> Cristowen taea en betsa Titoki en nukudiamma inun matukidia jawa bana ninkadiama en juinti punu nuka kayaxun jatu yuikin: "En ma kaii", itan Macedonia mai pakea anu Tito benai en kainkainimaki.

<sup>14</sup> Jakia Cristoki nun dasia nun jawenabuken jamapai bika Diosun nuku jabetan binumakubainmiski. Ja inun, nukuwen jawen kakape yudabu Cristokidi mae tibi anua yusinmakin nuku jatu unanmamiski. Nukubudan, nun nis jawendua keskabuki. Jaskawen taexun Epa Dios kenwanankan-wen. <sup>15</sup> Ja inun, jawen Epa benimawakin Criston jawen jiwea xeni ininipa keska inankubaini jaska keska yusinkin Epa Dios benimawakin yudabu anu nun bumiski, Cristokidi yudabu dasibi, betsabun Cristo ikunwainbu inun betsabun ninkabiakin ikunwanbuma benuxanaibu anudan. <sup>16</sup> Jaska shinainbutunadan, nukun yusianan, ikunwanbuman nuku ninkamadan, atimapa yuda mawa pisi mayai keska xetekin aka wakanikiki, nuku danankinan. Jakia dasibibun nukun yusian ninkakin Cristo ikunwankin nukun yusian ininipa keska bechipaikin benukatsi ikama jaska niti ikama Diosbe jiwekuinxanaibu bikubainkanikiki. Jakia Cristokidi xabakabi yusian mesekenan, ¿tsuabunda nun shinan chakai, ja jiweakididan? <sup>17</sup> Jaska shinanbuma yusinan betsabu Diosun janchaki meseama kemukin pei besti binun, iwanan, bukubaunkin yusinmis keskama nukubudan, Diosun nuku yunukin jawen kushipa nuku inanken matu padanma jancha chanima nun matu yusianyan jawen janchawen taea nun Cristoki dasiabun chanima Diosun nuku pe uiyanan Jesucristokidi nun yusinkubainmiski.

### 3

*Corinto anua ikunwainbu uinkin Pablon jatu yusinmiskidi unantidubuki-aki, na janchadan*

<sup>1</sup> Na jaska en ana matu yuaidan, ana nukunmebi nun kenkatsi ikamabia chanima besti en matu yuiai ninkakanwen. Tsuanda jatu yusintanun ika jukin jabun keneya bemisbuki. Jamen nuku ikidan, juni betsan keneya nun mapuisbumaki. Janua matun mae anuadi nun kaya jau medabewakin nuku ii pewaxanunbun matun keneya nun kaismadiki. <sup>2</sup> Nun ma matu yusinmiswen taea matun shinan betsa watan matun jiwea betsa watan man ma pepa besti jiwea jatu uinmaidan, jaska nun matu yusinmis unaki kenea keskama nukun juintiki kene nea keska dasibibun ja kene uian

keska wakin matu uinkin unankanikiki. <sup>3</sup> Diosun jawen yunuti inun jawen nemati Moisés inankin mishkiki Diosun kenekin netani keska wakin natian xabakabi matu uinunbun nukun yusianwen Criston jawen Yushin Pepawen chinta tuxkutimawen matun juintiki kenea keska wakubainikiki. Jakia Dios jiweatun Yushinin matun shinan betsa wamakin matun yudaki jawen kene netan keska waikiki.

<sup>4-5</sup> Ja inun, nukunmebi nun ikai keskai nun kentiduma inun nukunmebi nun jawa atidumabia jawada dasibi nuku amakin Diosun jawen kushipawen nuku amamiski. Na jaska en matu yusinmisdan, Cristowen taea Dios nun ikunwanpakeaai, nun ana chintuanmadan. <sup>6</sup> Jesucristo mawaiwen Diosun jawen nuku yuba bena wai maewakinan, ana jakidi kenewen akama iniki. Jakia ja binumakin jawen Yushin Pepawen aniki. Jaskawen taexun tsuabuda Diosun jawen taexun nuku tapinma nun jawen dayadubu besti nuku wamiski. Jamen Moisés Diosun yusinkin jawen yunuti inun jawen nemati inankinan, tsuanda ja yuba meneamaken jawen jatu kupikatsi amaniki. Jakia Diosun Yushin Pepatunan, nuku jaska wama ja binumakin jawen yuba benawen nuku jiwea inankubainikiki, nun jabe jiwepakexanunbunan.

<sup>7</sup> Diosun jawen yunuti inun jawen nemati mishkiki kenexun Moisés inan jatu unanmakin yuikubainun ika mati anua Moisés butuken jawen besu chaxakidankidanai mainbiaya jawen datekin Israelbun Moisés beistidubuma inikiaki. Jaska jatu wabiani dasibi Diosun yunuti inun jawen nemati Moisés inani tsuabunda chibantidubuma ja dayani kanemisbu Diosun jawendi jatu kupixanikiki, niti akama Diosuma mawa kayabi tenemakinan. <sup>8</sup> Jakia jaska nukun chakabu Criston buakatsis inikidi Diosun Yushin Pepatun nuku yubakin jawada Diosun Moisés yusian yusin jawen besu chaxa chaxa iki kushipai chani pejaidabianiken jawen Yushin Pepatun jaska wani ana binumaikiki. <sup>9</sup> Eskati wakin aniki, ana matu yuinun ninkakanwen. Jawada Diosun Moisés yusini pebiaken tsuanda: “Dasibi Moisin jancha en chibantidumaki”, ixun chakabuwaibu jawen taexun unantan jatu kupiti kaka waniki. Jaska jawada Moisés yuini kushipabiaken Diosun jawen bakewen taexun binumakin Diosun nuku ma pepawaikiki. <sup>10</sup> Jaska inun, jaska Diosun Moisés yusini pebia jawauma keska jawen yuba benawen binujaidaikiki. <sup>11</sup> Ja inun, jawada mishkiki Diosun Moisés kenexun inani jawen yuba pebia bextekei bexmasaya janua Cristowendi nuku ana yuba bena wani nun ma tapian pejaidakunkainxanikiki, niti ikama ikibi ikidan.

<sup>12-13</sup> Eska Israelbun Moisin besu uinkin jawada chaxajaida maiin bexmasai jau uinyamanunbun Moisin tadi tuaxwen jawen besu junei bepukukunkaini keskama jaska nukundi nun ikunwainbu Cristo manakakin nukun jancha jakidi juneama jawa dateama xabakabi nun yusinkubainaii. <sup>14-16</sup> Jaska Moisin jancha danankubidanaibu jatun juinti Diosun kushiwani keska wakin natian jabias yubani jancha betsabun danandiaibu jatun juinti Diosun kushiwadiamiski. Moisin jancha keneni yuiaibu jatu ninkamamakin bepukin junemiski. Tsuabunda Cristo danankin Moisin jancha ninkatidubumaki. Tsuabunda na jabiavian Dios kenwanun, iwanan, benakin Dios unankatsis ikaibu jancha xabakabiwen Diosun jatu ninkamamiski. Jaskaken Cristo ikunwanun ikaibu Diosun jatun juinti ana kushiwama inun Moisin jancha ana bepuama xabakabi tapinkin ninkatidubuki. <sup>17</sup> Janua nukun Xanen Ibu inun jawen Yushin Pepatun jabiaskas shinainbun jawen Yushin Pepatun nuku mekeaya chakabun nuku ana tsumama inun pepanun, iwanan, jawen yunuti inun jawen nemati Diosun Moisés yusiniwen nuku ana bikawatidumaki. <sup>18</sup> Jaskaken dasibi

nun Jesucristo ikunwainbudan, ja yusiniwen nukun besu inun nukun shinan nuku ana bepuamaki. Nukun Xanen Ibun nukun shinan nuku betsa wakubainaya jawen kushipawen ja itsa nuku wakubainikiki. Unanxubida nukun jiwea betsa wakin nuku pewakubainikiki. Nuku jaska wakin nukun Xanen Ibun jawen Yushin Pepawen nuku jatu uinmakubainikiki.

## 4

### *Jesucristokidi yusinkubauni eskanibukiaki, na janchadan*

<sup>1</sup> Jaskaken Dios nukuwen dabanan ikin jawen yuba benakidi nun yusinun ixun nuku yununiwen taea jawen babui punu nukai nun bextekeisbumaki. <sup>2</sup> Jakia jawa dakeama jawada junexun nun aisma inun, machupakin tsua nun padainsma inun, Diosun jancha jamakidi yuikin nun betsa waismaki. Nun jaska wamiswen taea jiwekin nun yusinmis Diosun unanyan jawen jancha nun matu xabakabi yusinkubainmiski, jau dasibibun nukun yusian ninkatan jatun shinan pewanunbunan. <sup>3</sup> Cristokidi nun jatu yusiain ja jancha tsuanda ninkamadan, jancha bepukuaki. Jabu jatun chakabuwen benuxanaibun ninkatidubumaki. <sup>4</sup> Tsuabunda jabun ikunwanbumadan, na mai anuxun jatun xanen ibu Satanásan jatu padankin jatun shinan nemakin bekun keska jatu wamiski. Jaskawen taexun Cristo, Dios itsa jiwea mekenika kushipa yudabu mawaxuntan jatun chakabu ana shinanma buakatsis ini ninkabiakin kaka pepa xabakabi ikunwantidubumaki. <sup>5-6</sup> Jaska inun, mai damiwakin Diosun yuikin: “Meshu anua jau xabayununwen”, anixun jabiatundi nukun juinti anu xaba pexani keska wakin Diosun Cristo nuku unanmaya jawen kaka pepa Cristokidi nun xabakabi matu unanmakubainikiki. Jaskaken yusinkin: “Jesucristo nukun Xanen Ibu kayabiki”, ikin, “Jesucristo bechipaijaidakin nun matun dayadu bestiki”, ikin xabakabi dasibibuki chani ibubis nun keinsmaki.

### *Bika tenebiakin Pablon Dios ikunwankubainikiaki, na janchadan*

<sup>7</sup> Ja inun, Diosun yusinkin jawen pepakidi nuku tapinmaya dasibi kushipa Diosuna inun nukunmebi nun jawauma jau man unanunbun nukun yuda babujaida, mai shumu pusimis keskabianu jawen kakape nukun juinti medan nukun netantan jawen tsumabu Diosun nuku waniki. <sup>8-10</sup> Jaska inun, Jesús anibu keska wakin nukudi ichakawakin tenankatsis ibiaibun jamapai bika betsa betsapa nuku waibu tenekin Jesucristo nukun Xanen Ibu jiweatun nukun medabewakubainai chintuanma dasibibu nun jatu uinmakubainaii. Jaska tibi Jesucriston nukun medabewamis matu yuinun ninkakanwen. Jamapai bika betsa betsapa nuku tenemakin jadakidi nuku paxatimawabiabun nukun Xanen Ibu bai nun manaka besumawamaki. Ja inun, nuku tenankatsis ibiaibun jatuwen datekin nukun Xanen Ibu nun jenebainsmaki. Nuku nemanun ixun kuxakin nuku di abiaibunan, jawen taexun nuku yamawatidubumaki. <sup>11</sup> Natian nukudi jiweyuxun Jesús nun chibainwen taexun nukun tenankatsis ibiaibun Jesús ini keska jiwediakin nukun yudawen nun jaskaxunai dasibibu nun jatu uinmakubainaii. <sup>12</sup> Jaskaken xaba betsa nun matu mawabiaxunxanaya Jesucristokidi nun matu yusinmiswen taea niti ikama matudi benuama man jabe jiwepakexankanaii.

<sup>13</sup> Jaskakidi Davidin kenekin: “Dios ikunwain jakidi en janchakunkainaii”, ini keskai nukubundi Dios ikunwandai jawada nun ikunwain nun jakidi yui janchadiakunkainaii. <sup>14</sup> Ja inun, Jesús mawa Diosun bestenwanixun nukudi bestenwankin matudi bestenwandiatan Diosun ibubis nuku jabis beismakin nukun iyuxanai unankin jawen jancha nukundi nun yusinkubainaii, jawa dateamadan. <sup>15</sup> Jaska inun, Diosun matu pepawaya midimabun Jesucristo

ikunwantan benimakin man Dios kenjaidawanun bun jawada matuwen taea bika tenekin matu medabewanun ika nun ikunkainaii.

<sup>16-18</sup> Jawada bika xabakabi mekin nun teneai jawaida keyuxanaiwen nuiama jaska Diosun mekekin niti akama nuku jabe jiwemaxanai uindiamabia shinankin nun uinkatsis ikaii, ikibi ika junea keskadan. Ja inun, natian na jiweawen nun jiweaidan, bikaishtha nun teneai jawama keskaki, jawaida jayabiatan keyumisdan. Jakia jaska jawen taea nun bika teneaidan, Diosun pewen kupikin nuku benimawa chakayamaxanai akunjaida bikatsi nun manaii. Jaskaken nukun yuda ewanai babui mawabiaya badi tibi Diosun nukun jiwea tibi uke medanua benawakubainaya punu nukai nun chintuntidubumaki.

## 5

<sup>1</sup> Jaska inun, na mai anu nukun yudawen nun jiwea pean xubuwen nun jiweyua keskabukiaki, jatiada jawaida nun debuxanaidan. Jakia nai anu nukun jiwe nun janu jiwei kaxanaidan, Diosun ma nuku akibi axuniki, yudabun jiwe wamis keskamadan. <sup>2</sup> Jaskaken na mai anu nukun jiwea chakabuwen nun nuitapayuaii. Janua chipu nai anu nukun jiwe pepa anu jiwei kakatsi iki nun manayukubainaii. <sup>3</sup> Na nukun yuda mawa chapuken jawaida nun jawa saweama keska ixanai nun unaiin. Jakia yuda sera chipu Criston nuku inanyan nun tadi sera sawekin akawaxanaii. <sup>4</sup> Natian nun jiweadian, jawawen jaskatima nun bika teneyuaii. Mawatan nun chapukatsi ikamabia nun ma mawa kasmai nun jiweyuan, Jesùsun nai anu nuku ainitan jiwea sera inankin nukun yuda sera nuku inanxanai nun manaii. <sup>5</sup> Diosun nuku jaki maewakatsi bebunkidi yubakatan jawen Yushin Pepa jawen unanti watan kanetima nukun inani jawen taexun nun bixanaidan, nun jayaki.

<sup>6</sup> Jaskawen taea nun benimakunkainaii. Na nukun yudawen nun jiwea nukun Xanen Ibube benanta nun jiweyua nun unaiin. <sup>7</sup> Ja xabakabi nun uianmabia uke medan shinankin nun ikunwaiin. <sup>8</sup> Na nukun yuda nun jenebainxanaii, nukun Xanen Ibube jiwei kakinan. Jawa dateama punu nukama nun jiweyukunkainaii. <sup>9-10</sup> Ja inun, dasibi nukubudan, nun jamaiki kama nukun Xanen Ibujaida Cristo janu tsauxun unanti wamis anu jaki nukutan nuku tibibun jabis nun beisxankanaaii. Nuku tibi unankin Criston nuku manakua akeakexanikiki, na yudawen jiwxexun nun pepa amis inun nun chakabu amis unantan nuku tibi kupikinan. Jaskaken na mai anu nun jabe jiwediamma kasmai nun jabe jiwei kaxanaidan, nukun yudawen nukun Xanen Ibu nun benimawakatsi ikaii.

### *Criston Dios nuku daewaxunkin nuku jaibuwananikiaki, na janchadan*

<sup>11</sup> Jaskaken nukun Xanen Ibu kushipa meseki datekin jawen kaka pepakidi yudabun jau Jesùs ikunwanun bun nun jatu yusinbaunai jaskai nun jiwe mis Diosun nuku unanjaidaikiki. Jaskawen taexun jau man tapindianun bun pe jiwekin jancha chanima nun matu yusinmis unankin man shinantiduki. <sup>12</sup> Jaska yudabun shinanmis keska shinain nukunmebi nun keanmaki. Jakia nukukidi janchakin nukukidi pe shinankin man nuku kenwantidubuki. Betsabun yuda bemakis uinkin unanti wamisbuki, jatun juanti jatu xabakabi uianmabiadan. Jaska nun yusinmis besti en matu yuiai ea ninkakanwen. <sup>13</sup> Nun patapa unainsmapa keskabukiaki. Jakia bechipaikin nun Dios duawaibu yuda betsabun nuku uinkin jaska nun dayamis ninkama yuikin: “Pablo inun jabetan yusinmisbu patapa unainsmapabuki”, ikaibudan, jaskakin Dios nun duawamis yuda betsabun unanbumaki. Jatuwen nuiyamakanwen. Ja inun, yuda betsabun nuku

uinmissun nukukidi yuikin: "Xabakabi jatu yusinkanikiki", man imisbu-dan, matu medabewanun, iwanan, nun akubainaii. <sup>14</sup> Cristo nuikipatun nun jawen kushipayabu nuku ma mestenwanixun nuku chixukubainikiki. Dasibibuwen taea juni bestichai nuku mawaxuni ikunwanixun nun unaiin. Jabiaskadiai jabun ikunwanxanaibu ichapabudi jabe mawanibu keskaki. <sup>15</sup> Cristo mawaidan, dasibi jatu ixuniki. Jamen ikama jabu jiweabu ixuinan, jau ana jatunmebi jatun shinanen besti jiweyamanun bun jau ja jiweyexun-xanun bun jatu ixuniki, mawatan ana jatu bestenxunidan. <sup>16</sup> Jaska inun, nuku-nan, jaska ikunwanbuman shinain janchamisbu keska nun ana jatun shinan keskamaki. Ja dukun Cristokidi shinankin: "Yuda kayabi bestiki", iwanan, nun shinanbiaya Diosun nuku ma betsa waken betsajaida Cristokidi nun ma shinaiin. <sup>17</sup> Januxun tsuabunda Cristo ikunwain jaki nukui dasiayadan, jabun shinan xeni Diosun betsa waya jawada mekin chakabuwamis jenetan jatun Xanen Ibu Cristo chibanun ika yuda bena keskabuki.

<sup>18</sup> Na jaska Diosun daya tibidan, Cristo jamebi jawen Epa daewakin jawen jaibuaibu nuku wamaniki. Jaskawen taea nun daenamei jaibunamenun-bun nuku katunixun jawen kakape nuku yusinmakubaunmiski. <sup>19</sup> Na jabias Diosun shinani en matu ana yuiai ea ninkakanwen. Cristowen yudabun chakabu ana shinantimawani Cristobe Dios dayakin yuda dasi-bibu jatu jaibuwakatsis ikin jabun Cristo unantan ikunwain jau unanuma jiwekubainxanun bun na chanima jancha nun jatu yusinkubainun nuku yununiki. <sup>20</sup> Jaskaken Criston kushipa nun jayawen taea nun jawen jancha buxunikabuki. Nukuwen Dios janchai keskaya Cristo ea axunkin nun matu yukaxunmiski. Eskaki. Matu yuunun ninkakanwen. Nukuwen taexun Diosun jancha ikunwain Cristo matu mawaxuniwen Dios daewai jabe jaibunamekanwen. <sup>21</sup> Jesucristo jawa chakabu meamajaidabiaken jakia nukun chakabuwen taexun chakabu memis keska wakin Diosun Cristo aniki. Nun Cristowen taea pepa keskabu Diosun nuku ana kupikatsi ikama: "En jaibuaibu chakabu jayama keskaki", iwanan, Diosun nukukidi jaska shinanmiski. Jaskaken Cristo matu mawaxuniwen taea Diosbe jai-bunamekubainkanwen.

## 6

<sup>1-2</sup> Ja dikabi yuda tibi Diosun yuikin:  
 "En tsuada ninkakatsis ikaya  
 min ea kenaya min jancha ninkatan  
 ja xaba ikaitian en mia mekekin medabewaxanaii",  
 ikaya ninkatan Isaásinkeneniki. Jaska xabakabi en matu shinanmai  
 ninkakanwen. Natianan, Diosun matu ninkakatsis iki kiki. Ja inun, natian  
 matu mekekatsis idiaikiki. Jaskaken man Diosbe dayakin axunmis matu  
 yununun ninkakanwen. Jamenmens Diosbe jaibunamei bepadameama  
 ikun kayabi Diosun jawen pepa ma matu uinmaki. Dananyamakanwen.  
 Jaskawen taea nukudan, nun Diosun daya axunkin medabewai dayaxu-nikabuki.

*Jamapai bika Pablo tenemabiabu chintuanma xabakabi jatuki chaniniki-aki, na janchadan*

<sup>3</sup> Dios nun dayaxunaiwen taexun jau tsuabunda: "Man kaneaii", iki jau nukukidi janchayamanun bun pe jiwekunkainkin nun tsua kanekin uin-machakaismaki. <sup>4</sup> Jakia nun jaskai Diosun tsuma ikinan, eskawen nun matu uinmamiski. Jamapai bika nuku tenemaibu mei jawa jayama nu-itapakin nun jawa jatu kemama tenekubainmiski. <sup>5</sup> Eska tibi nuku wabu meidan, nuku unanbuman nuku kusha kusha akinan, nuku bichikinan,

nukuki xukubidan jancha chakabuidan, daya kushipa meidan, uxa tenekin buni tenetan nun Dios dayaxunkunkainmiski. <sup>6</sup> Jaska inun, nukun jiwea pepa kayabi nun jatu uinmaidan, tsua padanma inun, unanepai sinatama chanima nun ikun kayabi ikai Diosun Yushin Pepatun kushipaya nun Diosun tsumabu chanima nui kayabi nun jiwekunkainmiski. <sup>7</sup> Ja inun, Diosun kushipa nuku medan nun jayawen taea kaka chanima nun yuimiski. Jabias Diosun kushipa pepawen unanmakin nun jatu achimamiski. Ja inun, jabiawendi jakidi chakabu yuibiaibun nun jatu nemamiski. <sup>8</sup> En janu jaska wakin jatu medabewa bestiaitian yuda betsabun nuku kenwainbun jatiditun yuankin nuku kenwainsbumaki. Ja inun, yuda betsabun nukukidi xechakaibun betsabun nukukidi pe yui janchamisbuki. Ja inun, yuda betsabun nukun yusian danain: “Machupaki”, nuku wabiaibun chanima yui besti nun janchakunkainmiski. <sup>9</sup> Yuda ichapabun nuku uinsma akawabiaibun betsabun nuku unanjaidamisbuki. Danankin nuku debu wapaibiabu jabiaskabia nun jiweyukunkainaii. Nuku ichakawabiakin jawa nuku tenandiabumaki. <sup>10</sup> Ja inun, jabun nuku shinan nun punu nuka dabanen shinankanikiki, Cristo chibain nun shinanchankain nun benimabiakunkainaya nun jamen nia nuitapai keska shinamisbuki, nun jatu tapinmai ichapa enayabiakenan. Nukubudan, nun jawa jayama keskabia dasibi Diosun nuku jaya wamiski.

<sup>11</sup> Corinto anuxun ebetan ikunwainbuun, jancha matu bumai jawa juneama jancha xabakabi besti nukun shinanen jawa texewama nun matu yuiaiwen taexun <sup>12</sup> jaska man nukukidi shinamis shinaindakanwen. Nun matuwen nuikin nun matu dananmabiaken matundi matun nui uinmakin man nuku jawa waismaki. <sup>13</sup> En matu yuiai ea ninkakanwen. Man en bake keskabu en matu waii: “Medabewai jaska en matuwen nuimis keskai duapai ewendi nuikanwen”, iwanan, en matu kenexunaii.

### *Ikunwanbumabe ketaxametimakiaki, na janchadan*

<sup>14</sup> Jaska matubun man ikunwainan, ja jabun ikunwanbumabe Diosun matu ana jatube ketaxamekatsi ikama shinanixun shinamiskidi matu yuunun ninkaidakanwen. Jawada Diosuna pepadan, ¿ja danain pepabe jusitudumen? ¿Xaba pebiaken mexun jaibuai xabatidumen? <sup>15</sup> Jabiaskadiai Cristo Satanásbe jaibunain pepatidumaki. Ikunwainbu betsadi ikunwanbumadi jatube jaibunain pepatidumaki. <sup>16</sup> Januxun Dios kenwanti Templo, januxun yushin dami betsa ja medanxun kenwantidubumaki. Nukun yudadan, januxun Dios jiwea kenwanti Templo keskaki. Jaska Diosun jamebi ibubiskidi yuini ninkakanwen:

“Jabu anu jiwei jatube nikukaini  
ea en jatun mekenika Dios ikaya,  
jabudan, enabu ixankanikiki”,

<sup>17</sup> ikaya kene betsawen ana jabias janchawen Dios Yavén yuikin:

“Jabun ea danainbu anua kainbainkin jenebainkin  
ana chakabu mei atimapayamakanwen.

Man jaskakunkainaya matuwen benimakin en matu beyawaxanaii,

<sup>18</sup> matu jaska watan en bakebu matu wai  
matun epa en ikunkainxanaii”.

Dios kushipa dasibi binuatun yuiai jawen jancha yuixunikabun ninkatan  
keneniki.

Jabiaskadi en matu yuiaii.

## 7

<sup>1</sup> En betsabu inun en puibuun, jaskaken Dios nukuki jawen pepa yubakani jawen jancha nun jayaki. Jaskawen taexun nukun yuda inun nukun yushin mekei Dioski mesekin ana jawada chakabun nuku atimapa watidu ana akama jenetan pepai jawenas ikubainankanwen. Jaskai nun jawama dasibi Diosunabu itidubuki.

*Pablon yunua chibankin axuainbu benimajaidanikiaki, na janchadan*

<sup>2-4</sup> Man pe jiweabuwen taea matukidi ninkatan shinain jawa dateama matukidi xabakabi janchakin en matu kenwaiin. Jamapai bika nun tened-abebiai jaska man pe jiweabu ninkai en juinti benimajaidaii. Matun chakabu jenetan nuku keskakin Dios duawanun ika man jiweaya matuwen nuijaidai en matuki ana ja ikamaki. Jaskadan, ma bebunkidi en shinanwen en matukidi chanimaki, en matube jiwekatsi ikai inun en matube mawakatis ikaidan. Janua nun tsua chakabuwaismabiaken yuda eskadabes matu anuxun nukukidi shinan chakakin: “Pablo inun jabetan yusinmisbun nukun jamapai biankin nuku nuitapawakin ichakawakin nuku padainmabuki”, ikaibu nun jatu jaska waismawen taexun jatu ikunwanyamakanwen. Jakia nun matun jaibuaibuwen taea matuwen nuijaidakin nun matu pe shinanmis keska wakin nukukididi pe shinankanwen.

<sup>5</sup> Macedonia mai pakea anua nun juai yuda ichapabun nuku yuman-wankin nuku jaska wakubidanimabu matu yuinun ninkakanwen. Dios danankin nuku ichakawakin bikawakin nuku deteaibun jadakidi jaskatima date paepai nun jani jaskatan juindukuntidumajaida ikimaki. <sup>6</sup> Jakia jaska yuda babu punu nukabu Diosun benimawamistun nukun jaibu Tito nukuki nukumakin Diosun nuku benimawaimaki. <sup>7</sup> Ja Tito jikitushikin nuku benimawai bestiwenma jakia jaska matube pe jiwetan matube jaskashina chaniai ninkai inun jaska ja juni jawen ibuan ainbe jiwea nichinmaxun ikis man ja juni medabewai inun, jaska man ea uinkatsis ikai Tito nukuki chaniaya en shinan chankain matuwen en tse ikunkainimaki.

<sup>8</sup> Januxun en kenewen en matu dakewakin juinti nishmawakin en matu tsiun akima en unaiin. Ja inun, matu jaska bumai eadi en juinti tsiun idiyuimaki. En matu jaska waima en ana jaskakidi matu shinanmaki.

<sup>9</sup> Januxun en matu jaska waya matun chakabu unantan shinan betsa watan jawada Diosun matu amakatsis ikai dateama man akimaki. Ja inun, matu ja abiakin nun jawa matu chakabuwama ikima man unaiin. Jakia nukun jancha ninkabiatan matun shinan man betsa wamakenan, Diosun matu kupikeanimaki. Jaskawen taea natian matuwen en benimaii. <sup>10</sup> Tsuabunda ikunwankin nun chakabu wai unantan jenenun ikin shinan betsa wai nukun juinti nishmaya jau nukun chakabu nuku buaxunun Dios benakin nun ea akaya benimakin nukun chakabu ana shinanma nuku jakimawakin Diosun nuku buaxunmiski. Jakia jabun Cristo ikunwanbumanan, jatun chakabu unain punu nukabia jatun shinan betsa wama Diosun jatu medabewama mawa kayabi jayapakexanikiki.

<sup>11</sup> Jakia matudan, matun chakabu jaska Diosun matu unanmaiwen matun juinti nishmabiatan pepanun, iwanan, en yusian chibain en jaska bechipaiai ea uinmai eki mesekin ja junin chakabukin matu chakabuwaima jaska waima en matu shinanma matu datei jaki sinatatan pewai jawa kushi dakewakin man nemaimaki. Jaska en matu waima ja juni pewai man jawa jawen chakabu ana jabe jayama nun unaiin. <sup>12</sup> Eskawen taexun en matu ja aniki. Ja juni jawen ibuan ainbe jiwea medabewanun, ikama inun junin jawen ain ma mebian medabewanun ika-madi jakia jaskama nukuwen nuikin jaska nukun yusian man chibankatsis

ikai Diosun matun shinan unanmaya man unanunbun: “Man ichamis anua ja juni nichindikanwen”, iwanan, matu anu kene bumakin en matu jaskakidi shinankin bumayamaki.

<sup>13</sup> Jawaida en yunuti chibankin man akimaken ana juinti nishmama matuwen janunkain nun shinan chankaiin. Jaska bestiwenma Tito matube janchakin matun shinan pe unantan matuwen shinan chankankidani nukuki ana nukutan matukidi nukuki chaniaya jaska tibi matukidi ninkatan nun benimajaidakunkainaii. <sup>14</sup> Jaska jancha chanima nun matu yuimis keska wakin Tito matu anu en nichindiamatukidi kenwankin en kaneama ikimawen taea en jawa matuki chakabumaki. Jaskawen taea chanima jawada matukidi en yuima man jabiaskaki. Jaska en Tito yuima keska uinmakin man beyawaimawen taea nun matu kenjaidawaii. <sup>15</sup> Ja inun, jaska eki inun en keneki mesekin Tito beyawakin man iakeakekin en kene en matu anu bumayama ninkatan en yunuti man chibanmis shinain matu uintanyamaxun Titon ana matu bechipaijaidakubainikiki. <sup>16</sup> Man chintuinsmawen taea en matuwen benimajaidadiakunkainaii.

## 8

### *Jawada man jaya yaushlama nuitapaibu paxkaxunkubaintikiaki, na janchadan*

<sup>1</sup> En betsabu inun en puibuun, Macedonia mai pakea anua ichamisbu Diosun jawen nuiwen jau Jerusalén anuabu nuitapaibu jatu medabewannunbun, iwanan, Diosun jatu duawamaimakidi ana en matuki chaniaii. <sup>2</sup> Jatu bika tenemabiaibun yumanbiakin jaska shinanma jatun juinti nishmama nuitapabiai benimakubainkin jawa yaushlama jatun pei ichawakin: “Eskadabes nun jayabun jawada nun jaya jatu inankin Jesús ikunwainbu Jerusalén anua medabewanankanwen”, iwanan, ichapa ichawaimabuki, pei ichapa jayabu keskakinan. <sup>3</sup> Jaska wakin jatun shinanen inankuinkin jawa yaushlama jati inantidumabia binumaibu ean en jatu uinma en matuki chaniaii. <sup>4</sup> Nun jaska jatu yunuamabia nuku ea akin: “Nukundi nukun betsabu nun jatu medabewakatsis ikaii”, ikin nuku yuikubainimabuki. <sup>5</sup> “Jati bikanwen”, ixun nun jatu manakamamabia jaska Diosun bechipaimis keska wakin jatun yudawen nukun Xanen Ibu dukun duawanun ikin nukudi ja kachu medabewaimabuki, jatun inankuinwenan. <sup>6</sup> Jaskaken pei ichawakin Macedonia mai pakea anu ichamisbu anuxun Titon jatu taewamaima keska wakin matu anu kaxundi jau matun medabewati pepa man ichawashina jau matu ichawamakin pewai kaxanun Tito nun jaska yunushinaki. <sup>7</sup> Matunan, ikunwankin betsabu man jatu binumiski, Criston kakape ikunwankin inun, Diosun jancha xabakabi unankin inun, xabakabi unanepakin inun, jamapai Dios man axuntidu akin inun, jaska medabewati nuku anua nui man tapinmiswen taea ikunwainbu betsa man jatukidi shinainan matun nuikipa uinmakin Jerusalén anuabu nuitapaibu jatu medabejaidawanwen, betsabun akima binumakinan.

<sup>8</sup> Jaska matu yuikin en matu yunuti mese waxunamaki. Jakia Macedonia anuabun jatu axuinmabu keska wakin Jerusalén anua nuitapaibu ikunwainbuwen matudi man nuijai xabakabi dasibibu man uinmatidubuki, iwanan, en matu jaska shinanmai. <sup>9</sup> Ja inun, nukun Xanen Ibu Jesucristo nai anua jawen Epa Diosbe jiwea jabe xanen ibujaidabia dasibi jawenabia jenebidan jawen pepawen matu pepawanun ika matuwen taea nuitapai matuwen nui mawaniki, jawen taea man nuitapama dasibi jaska yubakani man ibu waxanunan. Jaska matu waxuniwen taexun man jatu medabewatiduki. <sup>10</sup> Jaska inun, na jaska medabenantikididan, ean jaska en matukidi shinain matu

yuinun ea ninkakanwen. Jatu medabewakatsis ikin badi betsation matun pei ichawakin taewakin benimayabi man ayamaki. <sup>11</sup> Natian ana matun pei ichawakin jaska man jatu medabewakatsis iyama keska wakin benimai man yubakai taeyama keska jabias shinanwendi ana benimakin matun pei jaki dasiwakin ichawakin keyutan jatu inanxankanwen. <sup>12</sup> Januxun tsuabunda chانيا kayabi yuda betsabu medabewakatsis ikaibu Diosun jatun shinan nuima unankin jatuwen Dios benimamiski. Jawada jaya inun jawada jayama shinanma jakia jaska jawada pepa nun jaya nun inantidubu Diosun nukukidi shinanmiski.

<sup>13</sup> Jaska medabenantikidi en matuki chaniaidan, betsabu man medabewamatidu jidabi matun mesti man atidumaki. Chipu man nuitapatiduki. Jaskaken jawada man jayama idiyaya jabias keskadi wakin matu manakutidubuki, iwanan, en matu yuaii. <sup>14</sup> Natianan, Jerusalén anuabu ikunwainbu nuitapai piti eskadabes jayabuki. Jakia matudan, ichapa man jayaki. Jaskawen taexun chipu jabudi ichapa jayabun matudi eskadabes man jayaken matu medabewatidubudiki. Jaskai man binunanantidubu maki, senenbukuinan. <sup>15</sup> Jaska Moisin keneni ninkakanwen: “Nai anua dudu Diosun nidi akai jabun ichapa tupikin ichawaibun januxun betsabundi eskadabes tupikin ichawadiatan jabun ja piti pi jawa bika teneama ipau-nibukiaki”. Jaska keska shinankanwen.

### *Titobe buaibukidi Corinto anuabu Pablon jatu banabimaniaki, na janchadan*

<sup>16</sup> Januxun matu medabewakatsi iki nun matuwen nuihai keskai Titodi jabias shinan jaya matuwen nuidiae kakatsis iki kaya benimakin Dios pepa wakin en kenwaiin. Jau matu anu kanun nun nichian jawaida matu anu kaikiki. <sup>17</sup> Jabiaska shinanyan daki en yunua jawaida ea ninkatan jamebi matu medabewakatsis iki matu anu kaikiki.

<sup>18</sup> Tito matu anu kaya nukun betsan Diosun kakape datan akin pe yusin jeneisma jakidi dasibibun pe uinkin yuimisu Titobe nun ja nichindiaii. <sup>19</sup> Jaska inun, jau Jerusalén anu nukube kakin nukubetan ja inankuin pei buxanunbun, iwanan, Macedonia anuxun ikunwainbu ichaxun ja juni katuimabuki. Ja inun, nukunan, ikunwainbu betsabu nuitapaibu nun medabewakatsis ikai jabun nuku uinkin nukun Xanen Ibu nun duawai medabenain nun jaska bechipaiai nun jatu uinmakatsis ikaii, jaska daya beyaidan. <sup>20-21</sup> Yudabun nukukidi yuikin: “Ikunwainbun pei ichapa Jerusalén anuabu ichawaxunimabu ¿jaska Pablon inun jabe buaibun bukin jaska waimabumen?” iki jau nukukidi shinan chakai ja iyamaxanunbun dasibi xabakabi pewakin jaska Dios inun yudabun nuku amakatsis ikai jatu uinmakin nun pewanunbun jawada yaushama man jatu inankuin xanai benuama adu pewatan nun jatu buxunxanai.

<sup>22</sup> Ja inun, betsadan, jabube en nichiainan, nukun betsabu ikunwain pepa ma kaya tapini chintuinsma jamapai betsabu betsapa pewanika ja dikabi man jaki chiti itidu en ja matu nichinxundiaii. <sup>23</sup> Jamen Tito ebe dayakin ebetan matu medabewamis man unaai. Jamen ja nukun betsabu Macedonia anua ikunwainbun katuimabudan, jabe en jatu nichiainan, Criston kushipa jayabudi bukanikiki. <sup>24</sup> Jaskaken jabu ja ikunwainbun matu uiyanan jaska man jatuwen chانيا nuihai jatu uinmakin beyawaxankanwen. Man jatu jaska waya jaska wakin nun matukidi kenwankubainmis man jatu uinma kayabixanaii.

## 9

<sup>1-2</sup> Man Corinto maewan Acaya mai pakea anuabun ua badi betsatian nuitapaibu Jerusalén anuabu matun inankuijan man jabun inankatsis ikai ninkatan dasibi Macedonia mai pakea anu manixun ikunwainbu man akai kaka ninkatan midimabun jabunadi bumakatsi idiaibuwen taexun matukidi kenwankin nuitapaibu man medabewati shinaniken en ana jaskakidi chanikin matu kenexunamaki. <sup>3-4</sup> Jakia en matukidi kenwanbi-amis dasibi matun pei man ichawaxun adudiamaken Macedonia anuabu ebe bukin man jaska adiama dama tapin keskakin jatu uinmai janis akin jau matu dakewakin eadi dakewakin chakabuwayamaxanunbun, iwanan, matu medabewakin nukunabu dabe inun besti matu anu bebunkidi en jatu nichiaiin. <sup>5</sup> Jaskaken jaska matun pei man bebunkidi inankuinkatsi man yubayama keska wakin man jabun inandiamatun nuiama man inankin keyukanwen, matun yaushi jatu uinmamadan. Jawada man inantidu jawaida man inanunbun matu anu nukunabu dabe inun besti jabun matu medabewaibununbun dasibi bebunkidi jatun bedubi man pewakin keyununbun en jatu nichiaiin.

*Jawa yaushiamma jatun inankuin jau inanxanunbun jancha pewen jatu yuinikiaki, na janchadan*

<sup>6</sup> Janua jaska junin eskadabes mibainmatun yunu ewai kaniai eskadabes tsekamis inun, junin midima mibainma jawen yunu ewai kaniai akunjaida tsekamisdan, jaska keska shinankanwen. <sup>7</sup> Jaskaken yaushiamma jatu medabewakin nukun jawada benimayabi nun jatu inanyan Diosun bechipaimiswen taexun tsuan matu yunuamabia bestibu jaska man yubaima keska jatu medabewai yaushibetanan inun sinatabetanan inain shinamma jawada man paxkakatsi ikai jatu inankuinxankanwen. <sup>8</sup> Ja inun, medabewakin jamapai betsa betsapa yuda betsabu axunkin matun jawada paxkaxun man jatu medabewaya Diosun matu duawakin akunjaida pawamakin matuna binumakin inankin matu axuntiduwen man du-anametidubuki. <sup>9</sup> Diosun jaska shinamiskidi Davidin keneni matu yuinun ninkakanwen.

“Chikishama dayabiamis dasibi jayamaken

Diosun jawen pepa keyuismawen

jatu duawakubainmiski”,

aniki. <sup>10</sup> Jaska keska Diosun nuikipabu jatun jawada inamistun matudi matuna inamisken yaushiamma paxkaxun man jatu inainbu ana akunjaida matu inankin binumakin Diosun matu medabewamakubainxanikiki.

<sup>11</sup> Jaska inun, Diosun ichapa matu inamisken paxkaxun matundi yuda betsabu man inainbu nun matu jaska yusinmiswen taexun yuda ichapabun Dios kenwanxankanikiki. <sup>12-13</sup> Jawada Diosun matu amakatsi ikai chibankin Cristo ma ikunwainwen jawen kakapewen matu betsa wa yuda betsabu xabakabi medabewakin man jatu uinmaxanaii. Ja inun, na man jatu medabewaxanai nukun betsabu Jerusalén anua jawa jayabumaken nun jatu buxuan bitan benimakin Dios kenjaidawaxankanikiki, matun pepawen taexunan. <sup>14</sup> Ja inun, jaska bestiwama jaska duaajaidawakin matuwen Diosun jatu medabewai jabun unankin matu bechipaikin Dios matu yukaxunkubainxankanikiki. <sup>15</sup> Jaska waxun nukun janchawen nun Dios pepawakin keyutidumaki. Jaska Diosun binumakin nuku dasibi duaajaidawakin jawen inankuinwen Diosun jawen bake nuku mawamaxuniwen jawenabu nuku waiwen taexun Dios kenjaidawakubainankanwen.

## 10

### *Pablo yuanmisbu xabakabi jatu unanmanikiaki, na janchadan*

<sup>1-2</sup> Jaska bestibu man ekidi janchamis en Pablon en matu yuiai ea ninkaidakanwen. Matu anuxun betsabun yuikin: “Pablo nukube jiwea janchajaidaisma yunuama unanxubida nuku jancha wabiamis chaikexun nuku kenexunkin jancha kushipawen yunukin nuku ja amiski”, iwanan, man ea yuanbiamisbun jaska duapakin en shinamis matu yuinun ninkaidakanwen. Jaska man yuibiaya jancha kushipawen en matu kunyan atidubia jaska duapakin unanxubida Criston yudabu yusinkubaini keska wakin jancha xankamawen yuikin matu kunyan akatsi ikama matu anu en ana kaken jabun ea xeninkamisbu en jatube janchakatsi ikamaki. Jatun shinan betsawamakin jau ana jamakidi shinan chakayamanun bun jatu mextanmakanwen. <sup>3</sup> Januxun tsuabunda nukun Xanen Ibu chibankatsi ikabuman yuda betsabu padankin jawada ibubis akatsi ikai akin yuda betsabu binunun, iwanan, jatube sinataibube detenamei jatun mabu kushipa tibiwen jaki chiti itan detenamei jawen kushipai jiwemisbuki. Jakia jabu keskama <sup>4</sup> nuku ikidan, jawada Diosun nuku amakatsis ikai akin Dios inun Cristo danainbu ja chakabuki chiti ika jawen kushipaibu binumai Diosun kushipawen jatu ja akin nun jatu nuitapawatiduki, detenamei keskakinan. <sup>5</sup> Jaska inun, jaska Dios danain unanepabun shinamis jawauma wakin Dios nun jatu unanmakatsis ikaii, jatun chakabu bexteketan shinan betsatan jau Cristo chibanunbunan. <sup>6</sup> Cristokidi nun matu yusinbia man nuku chibanmakenan, nun matu kupikatsi ikamaki. Menan jawaida nuku ninkatan chibankin pewadikanwen. Man ma pewaken tsuabuda juinti kushibu nun kupixanaii.

<sup>7</sup> Jatiditun shinan chakakin yuikin: “Cristoki dasia nun jawenabuwen taea en unanjaidaii”, man ikaibunan, nukudan, nun jabias Cristoki dasia nun jawenabudiki, uinkin jau shinanunbuwen, xabakabi nun ikunwainan.

<sup>8</sup> En matu jawenchains jaska Criston jawen kushipa ea yununikidi jawa dakeama en chanimis jawen taexun matu bextekin chintunmakatsi ikama jakia jawen medabewakin nukun Xanen Ibun kushipawen ikunwanmakin en matu kushipa wakatsis ikunkainaii. <sup>9</sup> Na kene en matu bumaiwenan, jawen taexun matu datenun, iwanan, en matu bumamaki. <sup>10</sup> Jamen bestibun en kene uinchakakin yuikin: “Jancha bika inun kushipa kenexun nuku yunubiai Pablo nuku anu jiwea unanepa keskama juni babu jawen jancha jameain tsuan kenwantidumaki”, man imiski. <sup>11</sup> Jaska jadi bestibu yui man janchamisdan, nun chaikexun matukidi kenewen nun matu yunumis keska wakin kaxun matu bebunxundi jabiaska man imis jancha kushipawen nun matu xabakabi yui kaxanaii.

### *Yusinan betsawenkenmisbu Pablon jatu chitenikiaki, na janchadan*

<sup>12</sup> Jaska nun yusinmis yusinan betsabun jatun yusianwen matu nuku dananmakin putamakatsi ikanikiki, jaska jatunmebi yusinchakai kanei enjen iki atimapakinan. Ja binunanain keainbu keska nun jaska jayamaki.

<sup>13</sup> Janida kaxun jawen daya nun axunun jatixun besti Diosun tanaxun nuku yununi anu besti dayai nun kentiduki. Jakia janu nuku yunuama anu ibubis dayama jaskawen taea ja binumai nukubu nun keanmaki. Diosunan, jaska tibi janu kesua anu nun kanun nuku jenea nun kamiski. Jaskawen taea matu Corinto anuabu man ikunwandiabuma anu nuku yununiki.

<sup>14</sup> Jaskawen taea nuku dukun matu anu Diosun nuku ynuua kaxun nukun dukun Diosun kakape Cristokidi datan akin nun matu yusin taewaniki. Jamen jadi Diosun nuku yunuama inidan, nukudan, jaskadada nun matube ikeanaii. <sup>15</sup> Nukubudan, juni betsabu ma dayani anu jikitai nun kenkatsi

ikamaki, nukun dayamawen taeidan. Jakia nuku ikidan, matube dayakin nun taewaniwen taea matun mae anuxun man nuku medabewaya ana ichapabu matu ikunwanmakin nun ewawakatsi ikai nun matu manaii. <sup>16</sup> Jaskawen taea nuku kaidan, man nuku medabewaya Jesúskidi kakape bui man Corinto anuabu bestima jabu chai jiweabu anu tsuan jatu yusindiamu anu yusiin nun dayakatsis ikaii. Nun jaska dayakunkainaian, yusinan betsan yusianwen nun kenkatsi ikamaki. <sup>17</sup> Jaskaken tsuada kenkinan, jau nukun Xanen Ibu besti kenwankubainunbunwen. <sup>18</sup> Janua ibubis jawen shinanan besti jamenmen keainan, Diosun bechipaaima jume jumepamiski. Jakia tsuada ja nukun Xanen Ibukidi pe janchaidan, jakidi pe shinankin kenwanmiski.

## 11

### *Yusinan betsabun yusinmis Pablón dananikiaki, na janchadan*

<sup>1</sup> Jaska janchai en patapamisdan, tenetan man ea ninkatidumenkain. Jaskakidi en matu yuiai ea ninkakanwen. <sup>2</sup> Jaska matukidi shinain nui en matu yaushimisdan, ibubis en yudawen matu yaushiamu jaska Diosun matu bechipaiai ea matu imamiski. Matu jaska wakatsi ikin jawenabun Cristo man jawa jeneyamaxanunbun en jaska matu yuiaii. Juni betsan jawen bake chipash tsuan pesediamu juni betsaa yubamis keska wakin eandi Cristokidi matu yusinkinan, jawa chakabu jayama keska Cristo en matu beismakatsis ikin en matube yubakayamaki. <sup>3-4</sup> Jesúskidi nun ma jaska matu yusinbianiken yusinan betsabu buxun matu padankin jaska Jesúskidi nun matu yusinsma Jesús betsaa keska wakin matu yusiaibuu jawaida jatun jancha jawendua bechipaikin man jatu ninkakubainmiski. Ja inun, nukubun Diosun Yushin Pepa matuki nun ma matu dasiwabiayamaken yushin betsakidi matu yuiaibu man jawaida achimamiski. Ja inun, jaska kakape nun matu yuiaama ibiayamaken kaka betsaa man jawaida chibainwen taea matuwen en dateaaii. Jaska Edén bai anuxun dunun Eva padani keska wakin jawada pepa Cristokidi man ma jayabia jeneten jabun chakabu chibain man jamakidi benuaibuwen en matuwen dateaaii. <sup>5</sup> Jaska inun, ean en shinanan, jabu chipu kabiaxun jancha jawenduawen matu yusinkin ea binunkatsis ikaibudan, jawa ea binutidumbajaidaki. <sup>6</sup> Jabun matu padainbu unanepabu jabun jancha jawenduabiaken ea en jui kushipamabia nukun Epa Dios inun nukun Xanen Ibukidi tapinixun matu axunkubainkin en matu uinmamis keskawen jabun ea binutidumajaidaki.

<sup>7</sup> Matu anu kayamaxun Diosun kakape datan akin matu yusinkin en jawada jayamabia pei inun mabu matu yukakin ¿en matu chakabu wayamamen? En matu jaska wama iyamaki. <sup>8</sup> Jamen matu anuxun matu yusinkin matu duawanun, iwanan, en jawen dayatidu mae betsaa anuxun ikunwain betsabun pei jatu mebinkin akawatan jawen matu medabewai en dayayunun jatun pei ea inanibuki. <sup>9</sup> Janua matu anu yusiin jiweyui kaxun en jawa jayamabia matu daketapa wakatsi ikama en shinanyan nukun betsabu Macedonia anuxun jaska en jayama en binun jatun pei ea bumayamabuki. Man ma ea jaska wayamawen taea matu anu ana en kakenan, man ea ayama keska besti ea wakubainxankanwen. <sup>10</sup> Matu medabewakatsi iki matuwen nuikin matun pei en bisma yuikin jancha chanima besti en yuiai Criston unanyan jawada en yusinmis en jawen keain Acaya mai pakea anu maniabu tsuabunda en jancha nematidubuma ixankanikiki. <sup>11</sup> ¿Jaskai jaska en janchai? ¿En matuwen nuiamawen taexun en yuiai? Jaskamajaidaki. En matuwen nuikin bechipaijaidai Diosun unainkiki. <sup>12</sup> Diosun daya en amis

keska jabun ea mawapaikin jau jawawenda kenyamanunbun jatu nemakin jaska matun pei bikin en matu ichakawaisma en jabiaska besti ikunkainxanaiii. <sup>13</sup> Jamen jabudan, Criston kushipayakatsis ibiai yusinan kayabibumaki. Nuku keskakatsis ibiai peiwen kemui padanananmisbuki. <sup>14</sup> Jaska inun, Satanásandi nuku padanun, iwanan: “En Diosun tsumaki”, iwanan, nuku uinmaidan, jaska <sup>15</sup> taxnixanai yuini jatuwen Satanás padananain dayaikiki, “Nun Diosun tsumabudiki”, ikidan. Jaskakin jabun nuku padanmisbu Diosun jatun chakabu unantan jawen jatu kupixanikiki.

*Pablon yusinbauni jawada bika teneni jawen kein jatuki chaninikiaki, na janchadan*

<sup>16</sup> Jaska en tatima keska ekidi shinankin tsuabunda man jaska shinamisken jaska man jabun shinamis en tatima ibubis en kentidu man ana ekidi shinanyamanunbun matu yui en jawen kein janchai ea ninkakanwen. <sup>17</sup> Jaska nukun Xanen Ibu ea yunuamabia emebi en shinanen en janchaii. Tsuada jamebi kein janchai tatima ikasmis en unain en jaskakidi kein janchai eadi ninkakanwen. <sup>18</sup> Jabu kein ibubis jatun unanepawen binunananmisbun eadi jaska keskadai en imiskidi en keinmenkainan. <sup>19</sup> Ja inun, matu unanepabia tatimabu janchai benimakin nemama man jatu ninkamiski. <sup>20</sup> Jaska inun, jabundi matu dayadu watan matu yunuabu man jatu dayaxunmiski. Matu padanbetanan, ichakawakin matun jawada matu biainbu man jatu inamiski. Jabun matu tanpais akabu man tenemiski, jaskatimabiakenan. <sup>21</sup> Jakia nukudan, ja dukun matu anu kai taeidan, nun babu kaintanyamaki, dakekin jaska yuitimabiaken en matu yuiaidan. Jakia natian betsabun jancha kushipawen matu jancha wamis keska wakin eandi natiandi en jancha tatima kushipawen en matu yuiaii.

<sup>22</sup> Matu padanmisbun jabun xenipabukidi kenkin yuikin: “Nun hebreonawabu inun, nun Israelbu inun, nun Abrahamnen bababuki”, ikin chanima yuiaibunan, eadi en jabiadiki. <sup>23</sup> Ja inun, jabun yuikin: “Nun Criston tsumabuki”, iki Cristo dayaxunaibudan, en idiakunkainaiii, Cristo dayaxunkin jatun daya binumajaidaidan. Man eki janchai man ea tatimawabianun ean en jatu binumiski. Ja inun, Diosun kakape en yusianyan ichapaki ea bichimisbuwen ean en jatu binujaidaki. Ja inun, jatikida ea kushanibu tsuabunda tanatidubumawen taexun en jatu binujaidaki. Ja inun, en mawakeankunkainiwen en jatu binujaidadiaki. En jaska tibi memis en matuki chaniaidan, ¿eadan, en tatimamen? En tatimamaki. <sup>24</sup> Diosun kakape Cristokidi en yusinbaunmiswen taexun ea nemapaikin janu ea akaibutian judio xanen ibubun meken bestitiki ea jatu kupimakin awa bichi kushatiwen jawenchains 39 tibiki ea jatu pekush pekush amakubainabu en mawakeankunkainyamaki. <sup>25</sup> Jaska inun, Cristokidi en yusinbaunmiswen taexun ea nemapaikin romano xanen ibubundi dabe inun bestitun ji kushatiwen ea jatu pekush pekush amayamabudiki. Jaska inun, ea tenanpaikin mankanwen ea tsaka tsaka akin ea shinan nemanibuki. Ja inun, Cristokidi en yusinkubaunaya niwe xaxu dabe inun besti jabu tibi chakabua akeakeaya en jasakeaniki. Ja xaxu betsa anua meshu bestichai inun xaba bestichai ian batapa anu xaxuuma nunai tsuan ea nexetima ji tuaxki mepia en nunukunkauniki. <sup>26</sup> Jaska inun, Jesúsun kakapekidi yusiin nun kakunkaunai jaska tibi mese en binukubainmis matu ana yuinun ninkakanwen. En jene pukei kaya jawaida bai mata bekin ea xaxu nadabea inun main pukei nua maexbain jasai en mawakeankunkainiki. Ja inun, main en kaya yumetsubundi ea mesewatan en jamapai ea bianibuki. Ja

inun, enabu inun enabuman ea ichakawakin ea date date akubainyamabuki. Ja inun, maewan tibi anuxun inun janu jiweabumanuxun junibun ea ichakawanun bun yuinaka piananbun ea pikeanyamaki. Ja inun, ianenwanu niwe xaxuwen en kaya niwewan mese bekin ea datekubainyamaki. Ja inun, nukubetan ikunwainbu jabun ikunwanchakaibun ea bikawakin ekidi chanichakubainyamabuki. <sup>27</sup> Ja inun, en dayachakayamakunkainmiski, bika betsa betsapa tenebiakubainidan. Meshu betsa tukama en ux a tenemiski. Ja inun, buni tenea inun unpax tenea piama en ikunkainmiski. Ja inun, matsi tadi jayama jawa dakukuti jayamadi en matsi tenekubainmiski.

<sup>28</sup> Jaska tibi ena tenebiakin ja shinanma en betsabu mae tibi anuxun man ikunwainbuwen en matuwen nuijaidakunkainmiski, jaska tibi binuidan.

<sup>29</sup> Yuda betsan bika tenei babuaya jawen nuikin en jabetan teneai keskamiski. Ja inun, yuda betsan ikunwainbu babu wakin chakabuwamaya tsuanda jatu chakabuwamaiwen en jatuki sinatajaidamiski. <sup>30</sup> En jawa jayama emebi en jaska kentidumabia jaska en babumiswen taea en keaiin.

<sup>31</sup> En jaska chani keanyan nukun Xanen Ibu Jesucriston Epa Diosun en jancha ninkakin chanima jancha besti en yuiai unainkiki, ja ikibi ini yudabun kenwankubainxanaibunan. <sup>32</sup> Cristo en ikunwankin taewabidanshina ea jaska wanibu ana matu yuinun ninkakanwen. Xanen ibujaida Aretasin Damasco maewan yunumistun jawen soldadobu ea achimanun, iwanan, ja mae jawen mishki kene xexekaian janu kainbainti tibi anuxun ea jatu achi-makatsi iniki. <sup>33</sup> Jaska jatu wamabiaya ikunwainbu betsabu en jaibuaibun januxun uinti kene xui anu kukiki ea nanetan dispiwen kukiki duntantan ea janu buteabu ea achipananbun en paxakainiki.

## 12

### *Jamapai tibi Diosun Pablo amanikidi jatu yuinikiaki, na janchadan*

<sup>1</sup> Nama keskawen jawada nukun Xanen Ibun ea uinmani en matuki chanii jaskawen en kentidumabia ekidi matu unanmajaidakatsis ikin jawada nukun Xanen Ibuan ea xabakabi unanmani en matu yuiai ninkaidakanwen.

<sup>2-4</sup> Ma 14 badi kaken nai binua keyatapajaida anu Dios jiwemis pepantu en yuda kasmai en yushin besti Diosun ainitan ja jancha tsuan xabakabi yuitiduma Diosun ea yuiniki. Jaskada watan ea aininidan, en yuda kasmai en yushin besti ea uinmani Diosun besti unainwen taexun ean en matu yuitidumaki. <sup>5</sup> Jaska en ini en jawen kentidubia en jawen jawa keanmaki. Jakia jaska babukin en tenemis bestikidi chanikin en yuitiduki, keinan, nukun Xanen Ibun ea medabewamiswen taeandan. <sup>6</sup> Jaska inun, tatimabia en kein jawada Diosun ea axunmis yuikin jancha chanima en yuiaya jawada emebi en akai inun jawada emebi en yuiai besti ikunwankin jawada betsa betsapa Diosun ea axunmis en ana matu yuikatsi ikamaki, man tsuan ekidi jaska shinankin yuitidumbakenan. <sup>7</sup> Ja inun, jaska pepajaida en uiniwen taea kein en jawenduayamanun Diosun nemama Satanásan ea isin betsa inankin ea muxa tekea keska ea wani en teneaii. Ja inun, jawanda ea isin tenemaima tenekin <sup>8</sup> jau en Xanen Ibun ea xuxawanun, iwanan, dabe inun bestiki en ea aka <sup>9</sup> dabe inun bestikidi ea yuikin: “Miwen nuikin en mia duawamisdan, jatiwen besti min benimatiduki. Isin tenei min babubia min ea dayaxunkunkainkin en kushipa min unantiduki”, ea waniki. Jaskaken yuda babu jaya Criston kushipa jayakatsis iki jaska emebi en jawawatiduma en jawen kentiduki. <sup>10</sup> Jaskaken babui Criston kushipawen en kushipatiduwen taea Cristo duawanun, ika en shinan chankanmiski, eska tibiwenan, en babuaiwen inun, eki sinataibuwen inun, en yumain jawaumawen inun, ea

tenanun ixun ea ichakawaibuwenan, Cristowen dayai en bika tenekubainai-wenan. Janu en babujaidaitianan, Criston kushipa en mekubainmiski.

<sup>11</sup> Jaska tatimai en keain en jawaumaki. Jakia man ea kenwanma danainbuwen taea ibubis kenkin en matu jaska yuiaii. Ja unanepabu padananankin bemakis matu uinmakin jaska ekidi jawauma matu yuimis-budan, jatun jawawen ea binutidubumaki. <sup>12</sup> Ja inun, bika betsap mebiakin en tenekubainimaki. Jaska inun, matube jiwxun jaska dasibi Jesúsun kushipayabun amis keska wakin eadi jabiaskadi Diosun kushipa en jaya xabakabi matu uinmakin dami betsap mebiakin en wakubainimaki, matun bedubidan. <sup>13</sup> Ja inun, jaska ikunwainbu maniabu dasibi du-awakin en yusinmis matudi axunkubainkin jatun pei en bibiamis matuna en matu yukama ikimaki. Matun pei man ea inankatsi ikama shinankin matu bikawakatsi ikama matun medabewati yukama en kaneimamenkain. Matube jiwxun matun jamapai medabewati biama matun juinti en nish-mawaimamenkain. En jaskakin kaneimaken en chakabu ea jakimakanwen.

*Dabe inun bestiki Pablon ana jatu uin kakatsi jatu banabimanikiaki, na janchadan*

<sup>14</sup> Dabeki en matu yusintanima samama ana matuki banun ika en kakatsis ikin en matukidi ana shinantanaii. Jakia jaska bakebu yumiabuman jatun jamapai shadabu jatun ibubu mekexuinsma jakia ibubun jatun jamapai jatun bakebu mekexunxun jatun jawada bixunmis keskakin ean dukun Cristokidi en matu yusintani en matun ibuki. Matu jaska wakin en bakebu keska en matu aniwen taexun matun jamapai en matu menkatsis ikamaki. Jakia man Cristoki dasiabun en yusian ikunwankin chibanmisbun man ekidi shinantiduki. Jaskawen taea Cristo besti man chibanunbun en matu ana yusin kakatsis ikaii. <sup>15</sup> Matu anu jikitan matun ibu keskakin matuwen nui-jaidakin matu medabewakatsis ikin en jawada bikin dasibi en pei putakin en keyuxanaii. Ja inun, matu bechipaijaidakin en jeneama ibiakunkainaya ¿matunan, man ea bechipai midinkin jenekubainxanai?

<sup>16</sup> Jabiaskabiaken matun pei biankin en matu daketapa waismabiaken ekidi tsuanda yuikin: “Nuku padankin nukun pei Pablon june biankubainmiski”, iwanan, jadatuda eki bepadamekin man ea yuqiduki. <sup>17</sup> Yusinan betsabu en matu anu yunushinabunan, jabun matun pei ichawakin: “Ea bixuntankanwen”, iwanan, en jatu yunuamaki. <sup>18</sup> Ja inun, Tito inun ikunwain betsabu matu anu en yunushinabunan, ¿pei matu biankin matu padanshinabumen? Jaskamaki. Jabu ebetan yusinmisbu keska shinainbun jabiaskadi yusinkin eandi en jatu yunumistun en matu padainsmadiki. Jabukidi chakabu shinanyamakanwen.

<sup>19</sup> Na eska en matu yuiaidan, jawada nun matubetan kaneima ¿en ibubis nemakanai ikimenkain? Jaska ekidi man shinan chakatidubumaki, en matu jaska waismabiakenan. Jakia nuku janchaidan, Diosun nuku unanti wakubainaya Cristoki dasitan nun jawenabun matu medabewakatsis ikin matuwen nuikin jawada inun jaskada Diosun nuku amakatsis ikai xabakabi matu axunkin dasibi nun matu uinmamiski. Jaskaken en betsabu inun en puibuun, jawada nun matu yuiai chibankin matun jiwea pewatan Cristoki chiti itan kushipai ewadikubainkanwen. <sup>20</sup> Ja inun, tsuabunda en jancha man jabun danain man jaskadada en matu uin kaxanai inun, matundi jaskadada man ea uinxanai matuwen en dateaai, eska man jiweamenkain ikadan, man dananananbukuainwen inun, juni betsap ikaiwen uin man

jatuki sinatamiswen inun, man pubeainwen inun, man ibubis kein bin-unanainwen inun, june man yuananainwen inun, man xabakabi chitenamemiswen inun, "Ean besti en jatu binuaki", man ikaiwen inun, man medabenameismawenan. <sup>21</sup> Jaska inun, matun maewan anu ana en kaken jabun chakabu betsapa wakin kanekubainkin shinan betsawadiabumawen taexun Diosun ea dakewaxanaiwen en datea. Uatian man chakabu jenediamma en matu uintanima keska ana jabiaskaswen man jiwea uin juinti nishmajaida en matuya kaxatushitiduki, eska tibiaibu uinan, tsuabuda man jabun chakabu jenediamma jaikaimas chakabuwen jabun shinan chakaibu inun, juni dabe chutanameaibu inun, ainbudi yuda tibibube chutanameaibu inun, atimapakin jatun shinan benutan chakabu bestiwakubainaibuwenan. En betsabu inun en puibuun, en matu anu kadiamaken matun shinan betsawai bebunkidi pepadikanwen.

## 13

*Corinto anuabun jau jatunmebi unantinanunbun Pablon jatu yununiaki, na janchadan*

<sup>1-4</sup> Yudabu mai jidabi anu mekenun ika Jesús babuyuniken junibun achixun cruzki netantan tenainbu Jesúsun jatu nemamaken janua ma tenanbu Diosun jawen kushipawen ana bestenwaniki. Jaskaken nukun Xanen Ibu keska babuyui jawen kushipa Diosun nukuwen matu unan-mamiswen taea niti ikama Cristobe nun jiwekuinkunkainxanai. Jabiask-abiaken Criston kushipawen en matu yunumismenkain man unankatsis ikaibu matu anu ana kaxun Criston jancha chanima kushipawen en matu ja atidu en matu uinmai kaxanai. En matu yusintani ana matu yusiin matube ana ka jiwea en yubakayama keska chai jiwebia matu dapixun en yuai keska ana en matu banabimai ninkaidakanwen. Jadatubunda ikunwainbun chakabuwakin jatun juinti ana pewadiabuma en ana jatuwen nuiama iki kaxanai. Eska Diosun yunua Moisin jatu yununiwen besti nun jatu unanti watiduki: "Tsuanda chakabuwai jawen jancha unankin yuda dabe kasmai dabe inun bestitun jakidi chanii pikuaibun jabun jancha ikunwantidubuki", ini ja yusian chibain matun ichati anu ichaxun jabu chakabumenkain jaska unantinain chitenamei penamebukunkanwen. <sup>5</sup> Jaskaken matu anu en ana kadiamaken Jesucristo matuki dasia man jaska ikunwankin pe waimenkain. Matunmebi uinkin matun shinan uke medan unankanwen. Betsabun man ikunwainmenkain. Betsabun man daki ikunwanbumaki. Matunmebi ibubis unantinankanwen, jaska man kaneamamenkainan. <sup>6</sup> Jamen nun jabun matu yusinmisdan, jawa chakabu wakin daka kanekin nun matu uin-machakai jawa chintuanma nun Jesús ikunwain man nuku unantidubuki. <sup>7</sup> Nukukidi shinankin unanti wakin jatibunda nukun yusian man bechip-iamabiaken jaska nukukidi man shinain nun jawen nuiamaki. Jakia man pe besti jiwenunbun nun matuwen nuikunkainai. Jaska man jiweabu jau jawa chakabun matu achiyamanun Diosun kushipa nun matu yukaxunkubainai. <sup>8</sup> Jaska wakin chanima jancha nun danantidumaki. Jakia chanima jan-chawen xabakabi nun matu axuankeakemiski. <sup>9</sup> Jaska inun, Diosun matun shinan kushipa waya jau niti ikama man pepaki nukununbun nun babubia benimakin Dios nun matu yuka jenexunama ikunkainai. <sup>10</sup> Jaskaken matu uin kaxun matu ja akin nishmawakin en matu ana babu wayamaxanun jakia medabewakin en matu kushipa wakubainxanun nukun Xanen Ibun jawen kushipa ea inaniwen matu yamawama man ikunwainbu en matu kushipa wakatsis ikai. Jaskawen taea matu anu kadiama bebunkidi en jancha kenexun en matu bumaiwen taexun shinaindakanwen.

**11** En betsabu inun en puibuun, matu kenexunkin ma en keyuai ninkaidakanwen. Epa Diosun duawakin medabewakin unanuma matu jiwemakatsi ikaya matun juinti benimakin jawada Diosun matun jiwea matu pewamakatsis ikai adikanwen. Ja inun, punu nuka pesbudan, jau medabenankin matu benimawanunbun Dios jatu yukaxunkanwen. Man jaskai jiweabu Diosun matu bechipaikin matu unanuma jiwemai matube jiwekunkainxanikiki. **12** Ja inun, nukunabu matuki nukuaibu Jesúsun kennawen yuka iki benimai ikukunankubainkanwen. Ja inun, ikunwainbu Macedonia anuabun jatun jancha matu bumadiakanikiki.

**13-14** Nukun Xanen Ibu Jesucriston jawen pepawen jau matu duawakubainunwen. Ja inun, matuwen nuikin Diosun jau matu medabewakubainunwen. Ja inun, Diosun Yushin Pepatun jau dasibibu matu jaibunamemakubainunwen.

Jatiski, en janchadan.

Pablo

## GÁLATAS ANUABU PABLON JATU KENE BUMĀNIKIAKI GÁLATAS

### *Pablon jatukidi shinanikiaki, na janchadan*

<sup>1</sup> Jesúsun tsuma kushipaya betsa eadan, en Pabloki. Jawa junibun jatun shinanen katuxun ea yunuama inibuki. Jakia katukinan, Jesús tenanbu jatun bestenwani jawen Epa Dios inun ja kayabis Jesúsun jamebi ea katinixun ea yunukubainmisbuki. <sup>2</sup> Na nenu jiwxexun dasibi nukun betsabu Jesús ikunwainbubetan jadi Galacia mai pakea mae tibi anu man dasibi nukun betsabu ichamisbu tibi anua en matu kene bumai uinkubaunxankanwen. <sup>3</sup> En kene uintan man jaskaya man unanuma jiweaibun Epa Dios inun nukun Xanen Ibu Jesucristo matuwen nuikin jatun pepawen jau matu duawakubain unbunwen. <sup>4</sup> Jaskaken nukun Epa Diosun jaska shinain keskawen nuku ikidan, natian jiweabun chakabujaida wakubainaibube jau nuku kupiyamaxanun jaskawen taea Jesucristo mawai jawen jiwea yaushiamma nukun chakabu buanun ika iniki. <sup>5</sup> Jaskaken nukun Epa Dios kushipa jau kenwankubain unbunwen. Jaskakidan.

### *Dioskidi yusian meketi betsa jayamakiaki, na janchadan*

<sup>6</sup> Cristo nuikipa pepawen taexun Diosun matu katukin unanmabianiwen taea kanekin jawaida jenei yusian betsaki maekin man jadakidi ea shinnantima kayawai e ikin en ninkaii. <sup>7</sup> Chanima en matu yuiaii. Yusian betsabu naexuma kushipa jayama keskawen matu yusinkanikiki. Juni betsabu jumepakin matu padankin Criston matu mekeakidi kakape betsabu wakin jabias janchawen matu yusianbumaki. Jatun yusian janchadan, jamen jaki bepadamekanikiki. <sup>8</sup> Jaskaken tsuanda yusian betsabu nun matu yusin taewani keskama bexun matu yusiainbudan, Diosun yupukin kupiti wani anu bunun ika ikanikiki. Jadatuda shinamma ea kasmai naiudia Diosun nai tsuma juu jatun janchawen chanichakayuadan, jawa jatu ninkayamakubainxankanwen. <sup>9</sup> Ja dukun en matu yuitani keska na jabiatian ana en matu yuiaii: “Tsuabunda yusian betsabu, jawada man ikunwani keskama, jabun matu yusinkin padankin matu betsabu wakin ichakawaibudan, Dio sun jatu yupukin jatu kupiti wani anun jau mexanunbunwen”, iwanan, en matu ana kenexunaii. <sup>10</sup> Matunmebi shinan pewakanwen. ¿Tsua en benimawai menkainan? Ea ikidan, yudabu en datan akin kenwanmakatsi ikamaki. Jakia Dios besti datan akin en jatu kenwanmakatsis ikaii, yudabun jau ea kenwanun jatu bechipaimaidan. Jaska bechipaiaibu keska en jatubetan pewakeanaii. Jatubetan jaska akidan, en Criston tsuma ikeanamaki.

### *Pablo eska ibiani Jesúsun kushipaya inikiaki, na janchadan*

<sup>11</sup> En betsabu inun en puibuun, matunan, ninkaidakanwen. Diosun yusini Jesús mekenankidi kaka wakin datan akin en matu yuikubainidan, yudabun ea jawa tapinmama inibuki. <sup>12</sup> Jakia junibun katutan ea yusianbumabiaken Jesucristo bestitun ibubis jawen meketi xabakabi ea unanmaniki. <sup>13</sup> Jaskati dabanen en Israelin babawen taexun judiobun beya dasibi chibankubainkin Jesús ikunwainbu badi betsatian en jatu ichakajaidawakin en jatu yamawakin keyukatsis ikai man ekidi ninkanibuki.

<sup>14</sup> Eadan, tsua jaskamabiaken en xenipabun beya chibanjaidakin juni ewai unanepakin betsabu ea keskabu en jatu binujaidakubainiki.

**15-16** Jamen judiobumadi jau Diosun jatu kupiyamaxanun nukun mekenan Mesíaskidi ean en jatu yusinkubaunxanun en kaindiamabiaken bebunkidi Diosun ea katuniki. Janua jawen pepawen ewen nuikin ma en juni ewa ea unanmakin ana xabakabi ea katuxun jawen baken daya en axunkubainxanun ea kenaxun jawen bake ea unanmaniki. Januxun jawen medabewati jancha jau tsuanda ea yusinun yuda betsaa en jawa yukama iniki. **17** Ja inun, Jerusalén anu dikabi Jesúsun kushipayabube dukun en janchai kayuama iniki. Jakia Damasco maewan este badi juaikidi Arabia mai pakea anu en katanima jadia Damasco anu en ana chintunkidaniki. **18** En Jesucristo ikunwankin taewabainima jadixun 3 año nichintan Damasco anu chintunkidan Pedro uinun ika Jerusalén anu en ka 15 xaba besti jaki bakin daewakin unanti wai en jabe jiweyuniki. **19** Jakia Jesúsun kushipayaa betsabu uianma nukun Xanen Ibun betsaa Santiago besti en uindianiki. **20** Diosun en shinan chanima unanyan en matu kenexunkin yuiaidan, chanimaki.

**21** Pedro uinshina janua kai mai pakea dabe Siria inun Cilicia anu en kaken **22** jakia Judea mai pakea anuxun ikunwainbu nukun puibu inun nukun betsabun ea uinsmabia **23** tsuanda ninkaxun jatu yuikin: “Pablon nuku ichakawakubainitun Jesúsun kakape yamawapaiaya Dios jawen nuikin jointi benawaima ikis jawen kakape dasibibu yusinkubaunikiaki”, iwanan, ekidi ninkakin **24** ewen taexun Dios kenwankubainibukiaki.

## 2

### *Pablo Jesúsun kushipayaa betsaa inikiaki, na janchadan*

**1** Janua ma 14 año binukainaya chipu Jerusalén anu ana kakin Bernabébetan Tito en iyuni. **2** Jaskakaini kaidan, en shinanenma Diosun jaska ea unanmaya en kaniki. Jerusalén anu Jesúsun kushipayabu yununikabube jatube besti ichatan jaska jatumaki Jesúskidi kakape judiobumakidi kaxun en jatu yusintanmis en kanemismenkain ika datebetanan en jatuki chaniniki, jau ea ninkatan unanunbunan. **3** Jaska en jancha dananma inun betsadan, Tito griegonawabiaken uinbiakin jau jawen jina kubichi mextenunbun jawa nuku yunuama idianibuki. **4-5** Janua betsadan, nun ichanu nukun betsabu jatidi nukubetan ikunwain kayabibumadi june nuku unanti wanun ika jikia manixun ninkakin jawama Jesucristokidi ninkatan chibain ma mekei pepabiaibun janua jabun Moisin jatu yusini jatun beya nuku ana jusimakin chibanmanun ika ikaibun jawa jatu ninkama binumakin ja Jesúskidi jancha chanimawen taea jawa beya tibiwen jusikin matukidi nuku kanemama inibuki, man jaska betsatan maetidubumakididan.

**6** Jesúsun tsumabu unanepabu jabu jatu ninkamisbu xanen ibubiabun jabun jawa jancha bena betsaa ea yuama inibuki. Jakia chanima bemakis nun jatu uinkin shinankin kenwanbiamisken jaska Diosun bemakisa shinankin unanti waismaki. Jaska katukinan, jatun jointi uke medan uinmiswen taea jaskawen en nuiamaki. **7** Jaskawen taea ja beya dabekidi nun unantinanibuki. Jaska Jesúskidi kakape nun jatu pe yusinunbun Diosun nuku yununiki, ea nichinkin yunukan. Judiobuma anu kaxun Jesús mekenankidi en jatu tapinmanun bebunkidi ea unanmaniki. Jabiaskadi wakin Jesúsun Pedrodi judiobu anu yunukin nichindianiki, jau jakididi jatu unanmakubainunan, jawen mekeakididan. Nun jaska dayamis nuku ninkakin nukun xanen ibubun nuku unanibuki. **8** Diosun bake Jesúsun Pedro katuxun yunudianiki, jau jawen kushipayaxun jawenabu judiobu jau jatu yusinkubainxanunan. Jabiaskadi wakin Diosun bake Jesúsun eadi katutan jawen kushipayawaxun judiobuma anu eadi yununiki, jabudi en

jatu yusindiakubaunxanunan. <sup>9</sup> Jaskawen taexun en jawa pepamabiaken ewen nuikin Jesúsun ea katuxun ea yununi en jatuki chanikin mextanma ninkatan jabu dukun Jesúsun jatu katuni binuabu Santiago inun, Pedro inun, Juanen en jaskamis chanima unantan ea jaibuwakin nuku dananma ea inun Bernabébe ea jabe metaka anibuki. Nuku jaska wakin jaibuwabu ea Bernabébe paxkakain judiobuma anu nun yusin kaya janua jabudi jawenabu judiobudi jatu yusinunbun jatube yubakatan nun ana dayai kaniki. <sup>10</sup> Eska besti nuku yununibuki, nuitapaibu nun jatu jakimayamanunbunan, ean ma en jabiaska wabiamisken ana nuku shinanmakinan.

*Antioquía anuxun Pablon Pedro ja anikiaki, na janchadan*

<sup>11</sup> Janua Jerusalén anu nun ichashina menetan ana Antioquía maewankidi nun chintunkainima jiweken jabiatiandi Pedro nukuki bai kashinxun jatu yusinkin kaneaya en ja bebunxun ja ani matu yuinun ninkakanwen. <sup>12</sup> Ja dukun Pedro kaxun judion beya unanbiakin Santiagon jaibuaibu bediabumaken Jesús ikunwainbu judiobumabetan pikubainaya jabun judiobun beya chibankin jenekatsi isbuma Jerusalén anua bei ma jikiabun jatuki mesekin jau jakidi chakabu shinanyamanunbun jatu bepadani ana ikunwainbu judiobumabetan Pedron piama jatu jeneyuniki. <sup>13</sup> Januxun Jesúis ikunwainbu judiobu betsa Antioquía maewan anuabun judiobumabetan piaibukidi pe shinanbiakin jaska Pedron kanekin taewai keska wakin jabundi jabiaskadi wakin kanediakubainibuki, en jaibu Bernabén dikabidan. <sup>14</sup> Jaska wakin Jesúsun yusian kayabi chibankin pewama kaneaibu ean uinkin Pedro jawen jaibuaibube nia jatu chitekin: “Pedroon, judiobia uatian judioma keskai min jatube nixun pikubainshinaki. ¿Jaskai natian jatu bepadani ana chintunkidan judiobun beya jau judioma min jatu uinmachakai? <sup>15</sup> Nukuba na nenu mapuabudan, judiobumabun Diosun yunuti inun jawen nemati unanbuma keskama judiobu kaintan nun yumeniki.” <sup>16</sup> Jabiaskabiaken Moisin yunuti inun jawen nemati chibainbuwen taeama tsuabunda Jesucristo ikunwainbuwen taexun Diosun jatun chakabu buatan ana shinanma nun unaiin. Nukundi judiobun beya nun chibainwen taeama Jesúis nun ikunwanyan nukun chakabu Diosun buaxun nuku ma pepawani nun unandiaii. Jesúis jaibuwama judiobun beya besti chibainbun tsuabunda chakabuwai Diosun buaxunkin pepa waismaki.

<sup>17</sup> Jamen nuku ikidan, Moisin yusian chibain nun chakabu iyunibuki. Jaskawen taexun en mia yuiidan, Cristonan, nuku chakabu amaismaki, chanimadan. Jaskaken nun pepakatsis ikin jatu unanti wamaidan, jau nuku unanti wanununbun Cristowen taea besti nun pepatidubuki. <sup>18</sup> Ja inun, judiobun beya danankin jenebiatan ana chintunkidan en bena waidan, eadan, en chakabu ikeanaii. <sup>19</sup> Jaskaken Moisin keneni chibanjaidabiai eadan, jawen taeidan, en mawa keska iniki. Jaskawen taea Jesucristo mawaya en jabe cruzki dununi keskawen taea jatixunda en jiweawen Dios duawai en jiwxeyunuaii. <sup>20</sup> Natian na en yudawen en jiweyuaidan, Diosun baken ea bechipai ewen taea mawanixun ea shinan betsa wamani ja ikunwain en jiweyuaii. Jaskawen taea eadan, en ana emebi yunui en jiweamaki. Jakia Cristo bestitun ea yunuai ewen jiweyuikiki. <sup>21</sup> Jaska inun, Moisin keneni chibain en pepa bestiaya Cristo jamen nuku mawaxunkeaniki. Jakia natianan, en ana jaskamaki. Dios ewen nuiaya Criston ea mekeawen taexun en xenipabun beya jenetan Cristo besti en chibankubainaii”, akin en Pedro yusiniki, dasibitun ninkaibunan.

## 3

*¿Jadatu yusian pemen? na janchadan*

<sup>1</sup> Galacia anua unainsmapa tatinabuun, ¿tsuan matu dauinmenkain, padan paepa wakinan? Jesucriston matu pepawanun ika cruzkia matu mawaxunikidi en matu unanmakubainbiaya juni betsabun jatun yusian bena matu yusinkin padankubainkanikiki. <sup>2</sup> Jaskaken na besti matu yukanun: ¿Jaskadawen taexun Diosun Yushin Pepa man binimen, Moisin keneni chibankindaka? ¿En yusian Jesúskidi ikunwankindaka? <sup>3</sup> Unainsmapajaidabuun, jaskakin Diosun Yushin Pepa bikin taewabiayama jakimatan ana pepanun, iwanan, junibun beya man chibankubainkanaii, kanekin chakabuwaidan. <sup>4</sup> ¿Jamen Diosun kushipa man binimen? Man jaskayadan, en jadakidi shinantimaki. <sup>5</sup> Diosun jawen Yushin Pepa matu inanxun jawada dami itimaska jawen kushipawen junibun atidubuma matu amakubainmisdan, ¿jadatu chibankin matu amamismen? ¿Moisin keneni man chibanmiswen taexundaka? Jaskamajaidaki. Uindakanwen. Diosun jancha ninkakin man ikunwainwen taexun besti jawen kushipawen matu amamiski.

*Abraham pepakin ikunwaian Diosun: Juni pepaki, anikiaki, na janchadan*

<sup>6</sup> En xenipabu inikidi matu yuinun ninkakanwen. Abrahamnen Dios ninkatan ikunwainwen taexun Abrahamkidi janchakin Diosun yuikin: "Juni pepaki", aniki. <sup>7</sup> Jaskaken tsuabunda Dios ikunwankin Jesús chibanmisbu Abrahamnen bababu kayabibuki. <sup>8</sup> Janua judiobuma dikabibun jatun shinan betsa watan jatun chakabu jenetan Jesús ikunwanxanaibuwen taexun Diosun unankin jawen jancha yuixunika Diosun Yushin Pepatun Abraham kenemaxunkin yuikin: "Dios min ikunwainwen taexun yuda xukua tibibu dasibibun jawen bake ikunwainbu jiwekuinmakin Diosun miwen taexun jatu duawaxanikiki", aniki. <sup>9</sup> Jaskaken Abrahamnen ikunwanyan Diosun duawani keska wakin tsuabunda jawen bake ikunwainbu Diosun duawadimiski, jiwekuinmakinan.

<sup>10</sup> Januxun Diosun janchakidi jawenabu Moisin yuikin: "Jawen yunuti inun jawen nemati en matu kenexunai tsuabunda dasibi chibanjaidabu-maken Diosun jatu yupukin pe jiwekuinxankanikiki", jaska watan jatu kenexuniwen taea chibanmabia jatunmebi pepapaikin jawen yunuti inun jawen nemati chibarpaikin pewabumaken Dios jatuki sinatamakin yupuxanikiki.

<sup>11</sup> Jaska inun: "Ikunwain pepabu jiwekuinxankanikiki", iwanan, Diosun jawen jancha yuixunika kenemaniwen taexun jawen yunuti inun jawen nemati besti chibankin Dios daewatidubumaki, nun unanan. <sup>12</sup> Jawen yunuti inun jawen nemati Diosun Moisés inani chibainan, jawen jiwea kayabi Dios anua bitimaki. Jakia Moisin yuikinan: "Tsuanda Diosun yunuti inun jawen nemati chibankubaini ja yusian janchawen kaneama jawen jiwejanikiki."

<sup>13</sup> Diosun jawen yunuti inun jawen nemati yunukinan, jawen yupukunankatsi aniki. Jatun nukun chakabuwen nuku yupubiaya Criston nuku mexpamanun ika nukun chakabu kupiti bi nuku mawaxuniki. Jaskai kaikidi bebunkidi Moisin yuikin: "Tsuada jatun chakabuwen taexun tenankin jiki netanbu mawaya Dios jawen nuiama yupumiski", iniki. <sup>14</sup> Jaskawen taexun jaska Diosun Abraham duawakin pepa yubani Jesucristowen taexun judiobumandi man ikunwanyan Diosun Abraham yubaniwen taexun jawen Yushin Pepa Diosun ma matu inani dasibi man ma jayaki.

*Jaska Diosun Moisés yununi inun Abraham yubani Pablon jaska jatu yuiniaki, na janchadan*

<sup>15</sup> En betsabu inun en puibuun, jaska yudabu yubakai shinain jan-chamisbu keska matu yuinun ninkaidakanwen. Yudabu yubakanametan shinanma tsuan jenetiduma inun tsuan betsa watidumaki. <sup>16</sup> Na jaska en xenipabu Abraham Diosun yubakinan, jawen baba bestichaikidi aniki. Jakidi kenekin jawen bababu ichapakidi yubakai janchama jakia ja jaska jawen baba bestichaikidi yui yubakaidan, Jesucristokidi iniki, nukubun ja nun ikunwanxanunbun nuku anu juxanai yubakinan. <sup>17</sup> Janua ma ana 430 badi kaya jawen yusian Moisés yuibia dasibi Diosun Abraham bebunkidi yubani maewamakin chipu Moisés jawa betsa wamama iniki. Jaskaken jawada Diosun Abraham yubani jawa betsa wama axunkubainxanikiki. <sup>18</sup> Jaska inun, Moisin yusian chibain nun pepaya jawada Diosun Abraham yubani man jawama ikeanaii. Natianan, jaskamaki. Diosun Abraham yubanidan, tsuan betsa watidumaki.

<sup>19</sup> Jaskaken jaska Diosun jancha Moisés yununidan, matu yuinun ninkakanwen. Kanekin jaska jabun chakabu waibukidi jau xabakabi unanunbun Diosun jawen yunuti inun jawen nemati Diosun jawen nai tsumabu Moisés yuimakubainiki. Jaska bebunkidi Abraham jawen baba betsakidi Diosun yubani judiamaken jau Moisin yusian chibankubainunbun yudabu jatu yusinkubainibuki. Diosun nai tsumabun jawen yunuti Moisés yuimabiakubainxanai <sup>20</sup> ja dukun Dios Abrahambe yubakakin ibubis Dios bestitun anikiaki, tsua janchaxunamadan.

*Diosun Moisés yusinidan, Cristowen taea nuku ana jawen mekeamakiaki, na janchadan*

<sup>21</sup> Ja dukun Abraham Diosun yubani inun ana ja kachu Moisés yusin-manidan, ¿jaska ja dukun Abraham yuini Diosun betsa wakin nematidu-men? Jaskamaki. Dios daewakin jawen nemati inun jawen yunuti jancha pe chibankubainkin tsuabunda jiwekuian bikeankanaii. <sup>22</sup> Diosun jancha Moisin keneni uinkin dasibibun chakabuwakubainaibukidi ibubis unanbiai pe jiwtidubumaken jaska Diosun jatu yubani Jesucristo ikunwanmisbun besti jiwea kayabi bixankanikiki.

<sup>23</sup> Nun ja ikunwanxanai judiamaken Diosun Moisés yusian keneniwen jawen nuku bichikin akawaxun nuku tea wayuniki, jawen taexun Jesucristo manakakin nun jawen unanti wayununbunan. <sup>24</sup> Jaska inun, Cristokidi unankin ikunwankin nun chibainbu nukun chakabu buatan jau pepabu keska Diosun nuku waxanun, iwanan, jawen yunuti inun jawen nematiwen nuku mekeyukubainiki. <sup>25</sup> Jakia natian nun Jesús ikunwainbu jabias yunuti inun nematiwen nuku ana tsumamaken <sup>26</sup> dasibi man Jesucristo ikunwain man ma Diosun bakebuken jatun besti matu mekekubainikiki. <sup>27</sup> Jaska inun, man Cristo ikunwankin jatu unanti wamanun ikaya matu nashimabu man tadi sawemis keska wakin Cristoki dasikin man ma tadi sawekein akawaniki. <sup>28</sup> Jaskai man yuda bestichai keskaki. Judiobu kasmai judiobuma inun, tsumayabu kasmai tsumabuuma inun, junibu kasmai ainbuaibu shinanma jakia man Jesucristo ikunwainbu besti dasibi man yuda bestichai keska man jaki dasia shinankubainkanwen. <sup>29</sup> Man Cristonabudan, jabia man Abrahamnen bababu dikabiwen taea jaska Diosun Abraham yubaniwen matudi jawenabui man jiwea kayabi jayadiaxanaii.

## 4

*Nun ana dayadu esclavo keskama nun ma Diosun bake kayabibukiaki, na janchadan*

<sup>1-2</sup> Na miyuiwen en matu yusinkatsis ikaii. Juni betsa juni bakeya jawen ibu mawakin jamapai shadabu jaya jawen bake jenexunbainmisbuki. Jakia jawen bake ewadiama jawenabun yumewaibun juni betsan jawen epan mabu mekexunuabu jawen epan mabu inun dasibi jawen jamapai shadabu jamebi jawen baken ibuwaitian jawen epan janu yuini kemadiama ja jawen bake ewatan jawen mabubia ibubis jawena wadiamawen taea dayadu esclavo nuitapai keskai jiweyumisbuki. <sup>3</sup> Jaskaken nukudi bake mishtinbun shinan keska nun ewadiama keska junibun yusianwen inun jatun beyawen nuku mekenibuki. <sup>4-5</sup> Dios yubakakin janu jawen bake yunutiwani menekin Diosun jawen bake yunua sua ainbukia kaintan Moisin yusiniwen yumentan jatun Moisin yusini chibankin ja yudabu jawen mekeabu jatun kupiti nuku bixuanyan chanima kayabi Diosun bakebu benimai nun pepaxanunbun jawen bake xabakabi dami watan taxnimaniki. <sup>6</sup> Jaska inun, nun ma Diosun bakebukenan, Diosun jawen baken Yushin nukun juinti medan yunua Dios jatun nuku kenamakin: “En Epa nukipatuun”, nuku amamiski. <sup>7</sup> Man jaskaya ana Moisin yusianwen man dayadu esclavo keskama ikis man Diosun bake kayabiki. Jaska inun, Diosun duawakin jawen bakebu wakin jiwea kayabi matu inankuinxanikiki.

### *Pablo ikunwainbuwen nuinikiaki, na janchadan*

<sup>8</sup> Uatian Dios kayabi unandiamma matun mekanen dami yushin betsa betsapa kenwain jatun esclavo tsuma man inibuki, jaskatimabiakenan. <sup>9</sup> Jakia natian Dios man unain bestima Diosundi duawakin matu unandi-aikiki. Jaska unanbiakin ana chintunkidan jawanda matu pepawatidubuma chibain ¿man ana jatun dayadu esclavo ikatsis ikimenkain? <sup>10</sup> Jawen pepa-nun, iwanan, Moisin yusian chibain judiobun besi betsa betsapa man imiski, janu nawatitian inun, uxe benatian inun, uitian inun, baditian inun, badi benatianan. <sup>11</sup> ¿Man jaskawen taea jamen dayakin en matu medabewama ikimamenkain? ika en datea.

<sup>12</sup> En betsabu inun en puibuun, matu Jesús ikunwanmakin taewamai judiobun beya chibanma matun beya chibain en matube jiweyuniki. Ea ninkakanwen. Natian en jiwiemis keskadiai jiwekubainkanwen, en matubetan jawa chakabu waismawen taeidan. <sup>13</sup> Jaskaken matu yusinkin en taewaitian isin chakabun ea achia en nuitapaya <sup>14</sup> en yuda en isin tenei atimapakin matu unanti wamabia man ea jawa dananma Diosun nai tsuma keska wai ewen benimai Jesucristo kayabi keska wakin man ea duawaimaki. <sup>15</sup> Januxun matun bedu en matu ea akaya ea medabewanun, iwanan, matun bedu tsekaxun man ea inankeanimabuki. Ea jaska wai man benimakubain-imawen taexun ¿jaskai man ana jaskamamen? <sup>16</sup> Jancha chanima en matu xabakabi yuiaiwen taeidan ¿jawai en ana matun jaibumamen, natian man eki sinatakunkainaidan?

<sup>17</sup> Jaskakin Jesús ikunwain machupabu juinti chakabuyabun judiobun beya matu chibanmakatsis ikin tadi matu paxkanun, iwanan, matu jawenawakin jabun yusian besti matu chibanmakin jawen tsumabu matu wakatis ikanikiki. <sup>18</sup> Jakia ichapabu medabewakin man jatu pe mekeabudan, jaskadan, pejaidaki, en matube jiwxen en matu yusian shinankin man amis keska bestima jeneama jatu axunkubainkanwen. <sup>19</sup> En bake keskabuun, ¿jaskakin man ana ea bika tenemai? Cristo matu ikunwanmakin en matu medabewaya man ea ani keska wakin man ana ea bika tenemai, ainbu bake kain isin tenemis keska ea wakinan. <sup>20</sup> Jaskadada man shinain ikai en matu unanmaki. Jamen natian ea kayabis en jadidan, jaska en shinain jancha pewen en matu yui kapanan en katidumaki.

### *Agar inun Sarakidi unantikiaki, na janchadan*

<sup>21</sup> Moisin yunuti inun jawen nemati man bemakis chibannmisbuun, ¿Moisin yusian man ninkaisbumamen? <sup>22-23</sup> Jakia Moisin keneni uinkin ja Abrahamnen juni bake Ismael inun Isaackidi nun uimis matu yuinun ninkaidakanwen. Abrahamnen ain Sara jau Sara dayaxunkunkainun peiwen Agar bikin jawen dayadu esclavo wabianixun janubi ainwandiatan jaki Abrahamnen bakewa jawen bake Ismael jawen yubakati jayama kainikiaki. Jakia Abrahamnen jawen ain Sara peiwen biama ain kayabi wani Diosun medabewaya Sara yuxabujaidabiaken jawen bake Isaac jaki bakewaima kaindianikiaki, jaska Diosun Abraham bebunkidi yubani meneidan. <sup>24-25</sup> Abrahamnen ain betsa esclavo Agardan, jaskakidi yuiadan, ja ainbu esclavo Mati Sinai Arabia mai pakea anu keskaki. Ja mati anuxun Diosun Moisés yusinkin jawen yunuti inun jawen nemati inanikiaki, jau kenexanunan. Jabun ninkatan yubakai: “Ja Diosun yunuti inun jawen nemati nun chibannxanaii”, iki Israelbu Diosbe yubakai janchanibukiaki. Januxun Agar esclavo ini keskakin jabun ja yunuti inun nemati Moisin keneni chibannmisbudan, esclavo keskabuki. Jerusalén anu jiwebiabu Mati Sinai jatun ewa keskaki. <sup>26</sup> Jakia nukubudan, nun Diosun bake kayabibuwen taea Jerusalén nai anua nukun ewa keskaki. Diosun nuku mekeawen taea nun esclavon bakemaki. <sup>27-28</sup> En betsabu inun en puibuun, matubudan, Diosun Isaac yubani man ja keskabuki, Diosun bake kayabibudan, man jawen yuba jayabudiki. Jaska inun, Diosun jancha yuixunika Isaíasin yuikin:

“Bake bisma man nuitapabiai baba jayakin  
ainbun bake bimis man binumaxanaii.

Jaskaken jabun man bake bitiduma benimajaidakubainkanwen.

Bake bi isinmisbu keskai man isin teneisma man unaai.

Ja inun, betsadan, beneyabia matun benen matu jenebaina  
bake ichapa bikin ja beneyabu man jatu binumadijanaii,  
bakeyakinan. Jaska shinankanwen”,

atankeneniki. <sup>29</sup> Jakia jawen esclavon baken Diosun yubakin bake inani Isaac Ismaelin ichakawani keska wakin natiandi Diosun Yushin Pepatun daya nun akai Moisin yusian bemakis chibainbun nukuki sinatakin nuku ibu wakin esclavo wanun, iwanan, nuku ichakawadiakanikiki. <sup>30</sup> Jakia jawada Saran Abraham yuini Moisin nuku kenexuni matu yuinun ninkakanwen: “Isaac besti en bakeken min dayadu esclavon bake en bakebe ewatan nun mawaya jau nukun mabu biama iyanun menan Agar inun Ismael jatu nichindiwe”, akin Saran Abraham yuuniken yuuniki. <sup>31</sup> Jaskaken natian en betsabu inun en puibuun, Moisin yusianwen jawanda nuku ibu wakin amamisdan, jawen esclavo keska ana iyamakanwen. Jakia esclavo keskama Abraham jawen bake kayabi yubani keska ikubainkanwen, tsuan tsumamadan.

## 5

### *Jesús besti chibain chintuntimakiaki, na janchadan*

<sup>1</sup> Jaska inun, Moisin nemati inun jawen yunuti nun ana chibanyamanunbun Criston nuku kainmaniki, Moisin yusian chibain nun ana jatun esclavo iyamanunan. Matu jaska nemaniken Jesús besti chibain ana shinan betsa wama judiobun yusian danain ana jatun dayadu esclavo iyamakubainkanwen.

<sup>2</sup> Jaskaken jawada en Pablon en matu yuiai ninkaidakanwen. Ja dukun judiobun jatun beya matu chibannmakin matun jina kubichi matu mextematan januxun Jesús matu ikunwanmaibudan, jamen Cristo nuku mawaxuni

man jamen ikunwankananaii. <sup>3</sup> Ana matu xabakabi yuinun ea ninkakanwen. Tsuabuda judiobun jatun beya matu chibamanun, iwanan, Moisin yusiniwen matu ninkamas kemumakin matun jina kubichi matu mextemaibudan, jaska Moisin yununi inun nemani man jawen pepakatsis ikaidan, jatubetan jaska besti menekin chibankubainkanwen.

<sup>4</sup> Jaska Moisin yusian chibain papanun ika chintunkidan Dios matuwen nuini pepa danain Cristo jenei man jawenabumaki. <sup>5</sup> Janua nukunan, Jesúski dasitan nun ikunwainwen taexun Diosun Yushin Pepatun nuku medabewaya Dios kaneismatun nukun chakabu nuku buaxuniwen pepai nun jabe jiwekuinxanai jawa teama nun manayukubainkanaii. <sup>6</sup> Jaska inun, Jesús ikunwankin jina kubichi mexteabu inun mexteabuma jamen ikanikiki. Jakia Jesucristo ja besti ikunwain nui benimai nun jaki chiti ikubainaibu besti nun jawenabuki. <sup>7</sup> Jaskaken jancha kayabi man ninkajaidakubainaya ḥpadankin tsuabun ja jancha chanima man chibanyamanun bun matu nemakubainkanimenkain? <sup>8</sup> Jabun matu padainbun jatun yusianan, Diosunamaki. Diosun matu katunitun jaska jancha matu yusinsmaki. <sup>9</sup> Jakia misi wakin jawen xaxa wati eskadabes kapan aka xaxai keskai tsuabunda chani jancha eskadabes shinankin chibankin ja kachu chani jancha midima chibankankanikiki, Jesúskidi ana shinanmadan. <sup>10</sup> Jaska yunukin en matu kenexunai uintan jabiaskadi man ikunwandiakubainxanai Dios en ikunwaiin. Jamen tsuabuda mapuxun matu shinan betsa wamakin jabuan matu itimaska waibudan, Diosun jatu unantan kupixanikiki.

<sup>11</sup> Man en betsabu inun en puibuun, junibu dasibibun jau jatun jina kubichi mextenun bun en jatu yusinmiswen taexun ea ichakawama ikeankananaii. Jakia ean yusinkinan, Jesús juni chakabu keska cruzkia mawani en jatu yusianmaken ea dananbumadi ikeankananaii. <sup>12</sup> Jaskaken judiobun beya chibankin juni betsabun jina kubichi matu binun, iwanan, yusin mapuxun matu bikawaibudan, jatun jina jidabi jau mexte keyudianun bun wen.

<sup>13</sup> En betsabu inun en puibuun, man judiobun beyauma jawama man jiwekubainun bun Diosun matu katuniki. Jaskai jiwekin matun yuda meke chakabuwama nukunabube duanamei jatube nui medabenamékubainkanwen. <sup>14</sup> Ja inun, Diosun jawen nemati inun jawen yunuti Moisin nuku yusinmakin ichawani matu yuinun ninkaidakanwen: “Mimebi min nuimis keskawen juni betsa nuitapai jawaumawen nuikin jatu medabewakubainkanwen”, iwanan, Diosun Moisés kenema nukun xenipabu nuku yusinxuniki. <sup>15</sup> Jakia yuinaka jawen betsabe keyunamekin tenan keyumis keskakin, matudan, ikunwain betsabube man binunkatsis iki yuananain matudi man bextekei yamatidubuki. Pe mekekin uindakubainkanwen.

### *Diosun Yushin Pepatun nuku mekekubainmiskiaki, na janchadan*

<sup>16</sup> Eska en matu yusinmis ana matu yuinun ninkakanwen. Jawada Diosun Yushin Pepatun matu yusian ninkatan jaskai besti pepai jiwekubainkanwen. Jamen jaska shinan chakakin matun yudan jaska bechipaiai matu amanun, iwanan, yunuaiwen matumebi chakabukin shinanyamakubainkanwen. <sup>17</sup> Jakia jawada chakabu man bechipaiai Diosun Yushin Pepatun danamiski. Jaska inun, jawada jawen Yushin Pepatun bechipaiai chakabundi danandiamiski. Ja dabe binunanaibun matudi pepapaikin jadatuda man jeneama man kanemiski, ibubisdan. <sup>18</sup> Jakia Diosun Yushin Pepatun besti ma matu mekeaya Moisin yunuti inun jawen nematiwen Diosun matu ana jawen mekeamaki.

<sup>19</sup> Jaska inun, jexe chakabu banabu chakabu jukunmis keskai tsuabuda chakabun jatu mekeea jabun akin xabakabi chakabuwakubainaibu jatu uintidubuki, jatun kemu chakabuwen ainbuaibube inun junibube chutanamekinan, atimapa betsapa betsa wakinan. <sup>20</sup> Jaska inun, yushin chakabu kenwankin jawen kushipawen daunanankinan, yudabu janchaibu jatu nemakinan, kunyan ikidan, jawenabuwen nuiamadan, jawada betsapa jayawen taexun jatu binunkatsis ikin danankinan, yuda betsabuki jawaida sinatakinan, jatuki ja ikin jatu sa akin keyukinan, ibubis jawada pepa bikin shinan betsapa wai jiweabuki. <sup>21</sup> Jaska inun, jawada tsuada betsapa jaya binun, iwanan, jawen kemuidan, beyuskin nuxuti paepa aki paeinan, pikejaida bestinun ika yushin betsapa kenwain nawakin jamapai chakabu betsapa wamisbu janu Jesús juaitian ja yuda jaskabu jabe buama ixankanikiki. Jaskaken bebunkidi badi betsati en matu yusinkin yuima: “Jamapai chakabu betsapa akaibu dunkekubainkanwen”, iwanan, jabiaskadi en ana matu yunuaii.

<sup>22</sup> Jamen betsadan, jexe pepa banabu pepa jukunmis keskai tsuabuda Diosun Yushin Pepatun mekexun amakin jatu pe jiwemabainaikan, eska xabakabi jatu anua taxnimiski, bechipainamei jawenabuwen nuidan, benimakin Dios kenwainan, unanuma jiwea tsuki sinatamadan, jin jin ikama jawada teneamadan, jatu chikishwabu kunyan akamadan, jatu duawaidan, yaushiama jawada pepa jatu inankubainidan, jawada yubakaxun kaneama akidan, <sup>23</sup> babutan janchaisma inun xechakaismadan, jamebi jawen yuda pemekemisdan. Man jaskakunkainaiwen taexun Moisin yusianwen tsuan matu jawa nematidubumaki. <sup>24</sup> Jakia Jesucristo cruzki mastabu mawani keska wakin nun Jesús ikunwainbu nukun chakabu ichawatan Jesúsbe cruzki nuku mastaxunibu keskaki, ana chakabu nun meyamanunan. <sup>25</sup> Jaska inun, natian Diosun Yushin Pepatun nuku jiwemaiwen taexun jawada ja bestitun nuku yunukin amai ninkatan jiwekubainankanwen.

<sup>26</sup> Jaskaken nukubudan, ibubis keanma betsapa binunkatsis ikama jawada yuda betsan bimiswen kemuama inun jawen nuiama jiwekubainankanwen.

## 6

### *Medabenankunkaintikiaki, na janchadan*

<sup>1</sup> En betsabu inun en puibuun, nukunabun jamapai chakabuwakin kaneaibu uintan matun man ikunwainwen taexun pewakin jatu medabewakin jancha pepawen unanxubida jatu yusinkubainkanwen. Jakia matundi chakabuwakin man kaneyamanunbun, Diosun Yushin Pepatun matu mekeaya ibubis mekediakubainkanwen. <sup>2</sup> Jaska inun, matunabun xankama iabidanaibu man jatu medabewamis keska wakin tsuabunda jawada bika teneaibu inun tsuabunda kaneaibu jatu medabewadiakubainkanwen. Jatu jaska wai jaska Criston nuku yusinkubaini keska axunkin jawen jancha man menexunxanaii.

<sup>3</sup> Jaskaken tsuanda jatu medabewamis shinain jawen pepakidi janchamibudan, kanei kein ibubis padanananmisbuki. <sup>4</sup> Jakia jatiditun kenkin kanekatsi ikama pepa akubainmis unankin yuikin: “En pepaki”, iwanan, yuda betsapa binumanun ixun shinantimaki. <sup>5</sup> Jakia tsuanda jabun bika betsapa man tenebiaidan, jas shinanma tenekubainkanwen. Jabiaskas nun jaya Diosun unainkiki.

<sup>6</sup> Jaska inun, tsuabunda matun yusinan Diosun jancha matu yusiaibun man jabu ninkaibun matun jawada man jaya, piti inun mabu inun peidan, ja paxkatan matun yusinan juni jatu inankubainkanwen, medabewakinan.

<sup>7</sup> Jaskaken chanima jancha matu yuinun ninkaidakanwen. Jamapai wakin Dios nun padantidumaki. Jawada nun amiswen taexun Diosun kaneama nuku kupixanikiki. <sup>8</sup> Tsuabunda ibubis chakabu shinankin kanemisbu Jesús ana juaitian Diosun kupikin mawachakamakin jatu isin tenemajaidaxanikiki. Jakia tsuabunda Diosun Yushin Pepa ninkakin kanebiatan jawen yusian chibankin jeneabumaken Jesús ana juaitian Diosun jatu jiwekuinmaxanikiki, ikibi imakinan. <sup>9</sup> Jaskaken pepakunkainkin jeneyamanankanwen. Jatiada Diosun janu kupiaitian medabenankin pepawakubainkin nun jeneamaken Diosun duawakin pepawendi nuku kupixanikiki. <sup>10</sup> Jaskawen taexun jawada nun jayawen dasibi nukubetan ikunwainbu nuitapaibu jatu medabewakubainankanwen, ja kachu betsabudi ikunwandiabuma jatu medabewadiakinan.

*Jawen jenekin jancha jatu kenekin keyuxunikiaki, na janchadan*

<sup>11</sup> Jawen keneti mebintan ibubis matu kenexunkin kene ewapabuwendi en akai uinkanwen.

<sup>12</sup> Ji cruzkia mawakin nukun chakabu Criston buaniki jaska jadi jan-chakatsi ikama ja yusinanain padananainbun jau judiobun jatu dakewakin danankin jatu bika tenemayamanunbun ixun jau jatukidi pe shinanunbun, iwanan, ninkamas matudi jina kubichi mextekatsis ikanikiki. Jatu uindakanwen. <sup>13</sup> Jaska inun, Moisin nemati inun jawen yunuti jabun chibankin keyuamabia matun jina kubichi ninkamas matu bitan matuwen taea besti ibubis kenkatsis ikanikiki. <sup>14-15</sup> Janua tsuabunda jau Diosun ea duawanun, iwanan, jatun jina kubichi mextekinan jamen akanikiki. Jaska inun, tsuabunda mexteama jamendi ikanikiki. Jakia nukudan, Dios duawanun ika shinan betsa watan besti Dios nun benimawakubainaii. Jesús ea mawaxuniwen taexun shinan benawatan: “Mabu ichapa besti binun”, iwanan, ana en shinanmaken chakabun ea ana achiamadiki. Jaskaken keanma nukun Xanen Ibu Jesucristo ji cruzkia mawaxun jawada ea axunikidi besti yuikubainkin Dios en kenwaiin. En jawauma iniwen taea en jawa kentidumaki. Jakia Jesúswen taea besti en kentiduki. <sup>16</sup> Jaska en matu yuiai keska shinan betsa watan Jesús besti ikunwain man jawen dasibi jiweaibu chanima man Diosunabu kayabiki. Janua Dios matuwen nuikin jau unanuma matu jiwemadiakubainunwen.

<sup>17</sup> Jesúski dasinxun jakidi en yusinkubainaya ea ichakawakin detekin ea baka kextuwa akeakenibuwen taexun en yusian ea yuankin ana ea bikawayamakanwen. <sup>18</sup> En betsabu inun en puibuun, nukun Xanen Ibu Jesucriston jau matu duawakubainunwen.

Jatiski, en janchadan.

Pablo

## ÉFESO ANUABU PABLON JATU KENE BUMANIKIAKI EFESIOS

### *Pablón jatukidi shinanikiaki, na janchadan*

<sup>1</sup> Ea en Pabloden, Diosun jawen shinanen Jesucriston jawen kushipaya ea wakin ea katuniwen taexun tsuabuda Éfeso maewan anuabu Diosun jawenabu medibi matu wani man jabun ikunwain Jesucristobe ketaxamei man jaki dasia shinankin en jancha en matu bumai uindakanwen. <sup>2</sup> Nukun Epa Dios inun nukun Xanen Ibu Jesucriston jau matu unanuma jiwemakin pewakin duawapakekubainunbunwen.

### *Diosun Jesúswen nuku duawakubainikiaki, na janchadan*

<sup>3</sup> Nukun Xanen Ibu Jesucriston Epa Dios kenwankubainankanwen, Diosun bake Cristo nun ikunwainbuwen taexun naiudixun jawen pepawen nuku manakukin Diosun jawen bakewen jamapai tibi pepa nun uiain inun nun uianma jawen shinan chankanmati yushin nuku inankubainaiwen taexunan. <sup>4</sup> Diosun Cristowen taexun nuku katununbadikatsi mai damiwadiama jaska shinaniki. Jaskaken jawen besuudi nun chakabuma pe besti nia nuku uinunbadikatsi iniki. Nuku bechipai nukuwen nuikin <sup>5</sup> nuku mebikinanxun jawenabu nuku waxanun, iwanan, bebunkidi Jesucristowen jawen bakebu nuku wakatsi jawen duapawen nuku katuniki, jawen shinan nuku inan nun ikunwanxanunbunan. <sup>6</sup> Jaska nuku wakinan, Dios duapajaida nun jawen kenwanpakexanunbun nuku jaska waniki, jawen bake bechipainiwen nukudi jawen duawanun ixunan. <sup>7</sup> Jaskaken Jesús mawakin jawen jimi jabaniwen taexun Dios nuku daewaxunkin nukun chakabu ana shinanma buaniki, jawen shinan duapa nun jaya tsuan bextetiduma jawen taexun nuku mekekinan. <sup>8</sup> Diosun nuku jaska wakinan, dasibi binuatun nuku unanepa wakin jaska nuku pe ninkanika wakin jawa yaushiama Diosun nuku axuniki. <sup>9</sup> Cristowen nukun chakabu buakatsi badi ichapa jawen shinan Diosun junenixun jawen duapawen ma xabakabi nuku taxnimaxuniki, nuku unanmakinan. <sup>10</sup> Diosun janu menenunbadikatsi jaska bebunkidi yubakani kaneama aniki. Jaskawen taexun Diosun Cristo xanen ibuwani ja mekemakin keyuxun yunumakatsi dasibi nai anua inun mai anua jaki dasiwaran tsumamaxanikiki, Diosun jatu ichawanunbadiaitinan.

<sup>11</sup> Jaska wanunbadikatsi Diosun bebunkidi Cristowen nun judiobu dukun nuku katuniki, jaska Diosun jamebi shinain keskawen nuku duawayu nun jawenabu ipakexanunbunan. <sup>12</sup> Diosun nuku dukun katukinan, ja dukun nukun shinanwen Cristo nun manaxanunbun nukukidi shinanmati waniki, jaskawen taexun dasibibun jawen kushipa pepa nun kenwankubainxanunbunan. <sup>13</sup> Cristowen taea man judiobuma dikabitun jawen jancha chanima Diosun bake Jesús mekenankidi kakape ninkatan ikunwainbu jawen nuku tibi unanti wati yubanixun jawen Yushin Pepa nuku inantan ja dabe jawenabu nuku inun matu wadianiki. <sup>14</sup> Diosun jawen Yushin Pepa matu inankin jaska bebunkidi matu yubakin nai anu jabe matu jiwemakatsi matuki tanani jawen unanti man ma jayaki, jawen Yushin Pepadan. Jaskaken jawatianda nuku menexunkin jawenabu nuku wanixun nuku xabakabi bepenxun uinmaxanaiwen taexun dasibibun Diosun kushipa pepa kenwankubainankanwen.

*Jau Dios unanajaidanunbun ikunwainbukidi Diosun kushipa Pablon jatu yukaxunikiaki, na janchadan*

<sup>15</sup> Jaskaken nukun Xanen Ibu Jesús man ikunwain inun man dasibi Jesúsunabu medibibu man jawenabu man nuinameaibu ean jaska en matukidi shinaiin. <sup>16</sup> Jawa matukidi jakimama Dios dayuikin matu yukaxunkin jeneama matuwen taexun Dios en kenwankubainmiski. <sup>17</sup> Jaska inun, nukun Xanen Ibu Jesucriston Epa Dios nun kenwanmis en matu yukaxunmiski, jau jawen Yushinin ana matu ninkamakin unanepawakin matu medanxun jau chanima kayabi Dios matu unanajaidamanunan. <sup>18</sup> Dios matu yukaxunkinan, Diosun jau matun shinan junemawatan xabakabi ninkamakin manakamanun inun, jau tsuabuda jawenabu kayabi katutan jawen pepawen duajaidawakin matu unanmaxanun en matu yukaxunmiski. <sup>19</sup> Ja dikabi Dios matu yukaxunkin jaska jawen kushipa binu keyua keyuisma nun ikunwainbu nuku medabewamis man unanunbun Dios en matu yukaxundiakubainaii. Ja kushipa Dios jamebi jayadan, jaska dasibi watidu jaya nuku unanmakin <sup>20</sup> Cristo mawabiaken Dios kushipajaidatun ana bestenwantan nai anu jawen yusiudi tsamaniki. <sup>21</sup> Jawen bake kushipajaida ja kaya watan januxun xanen ibu kushipabu inun bexmasbu dasibi maemamatian, na jabiatiian inun betsation idiamadan, dasibibu Diosun Jesús jawen kushipawen jatu <sup>22</sup> babu watan mekemaniki, jamapai betsabu betsapadan. Januxun Diosun Cristo ja ikunwainbu jawen xanen ibujaida jatu waxuniki, ja jatun buxka wakinan. <sup>23</sup> Nun Cristo ikunwainbu dasibidan, nun Criston yudaki. Jawada nuku medabewatidu nun yuka jawa yaushiama nuku inanmiski, jamapai shadabu dasibi tsumakin mekexunan.

## 2

*Diosun Cristowen nuku jawenabu wamiskiaki, na janchadan*

<sup>1</sup> Uatian matu jiweadan, chakabu betsabu betsapa aki Diosuma paxka mawawen datei man jiwenibuki, <sup>2</sup> na mai anuxun yuda chakabubun akai chibain yushin chakabu xanen ibun xaba natukan anu nixun jawen shinanan jatu yunuaitun jabun benimawai keskai shinankin Dios ninkakin chibanmadan. <sup>3</sup> Jaskawen taea uatian nukubu nun jiwea jabiaskasdi nun iyunibuki, nukun shinanan chakabu bechipaikin chibain jiwea kemu pae tibi nukun yudan yunuai shinain ja axunkin meneidan. Jaskawen taea jawen nuiti nukukidi nun jayamaken chanima Diosun nuku kupididu nun inibuki, betsabun ikunwanma ikaibu keskaidan. <sup>4</sup> Jakia Dios nui jeneisma nukuwen nuichakayamakin nuku duajaidawakin <sup>5</sup> nukun chakabun nuku bexea nun mawa keskabiaken Cristo Diosun yunua juni mawa ana bestenwantan jawen taexun nuku jiwea inaniki. Jawen pepawen taexun Diosun matun chakabu buaniken januxun matun man ma mekeia biaki. <sup>6</sup> Jaskakinan, nun Jesucristo ikunwankin chibain ana mawabu keskama jaki jabe dasia nun ma besteni keska mai anu nun jiweyuabu nai anu ja dapi nun ma tsaua keskabuki. <sup>7</sup> Jaska wanunbadikatsi jawen pepa nuku unanmakatsi ikinan, Jesucristowen taea nukuwen nui kai nuku axuniki. <sup>8</sup> Jiwekuian bikinan, nun jawawen ibubis nukun kupiti bi paxatidumabiaken Jesús nuku mawaxuni nun ja ikunwankubainaiwen taexun Dios pepajaidatun nuku duawakin nuku inani ikunwain nun ma mekeaki. <sup>9</sup> Jaska nuku waya jawada pepa tibi aki nun imiswen ja shinain nun kentidumaki. <sup>10</sup> Diosun jaska nukukidi shinankin jatun nuku damiwakinan, jawen bake Jesucristoki dasitan jawenabun jawen daya pepa inun jawen baii pepa chibankin axuin nun jiweyukubainxanunbun Diosun bebunkidi nuku katukin pewaniki.

*Jesúsunan, yuda xukua bestichai wanun ika junikiaki, na janchadan*

<sup>11</sup> Jaskaken man judiobuma ja judiobun jatun jina kubichi mextemisbu matukidi janchakin: “Dios yubakani jayama jabun jatun jina kubichi mexteabumadan, nukunabumaki”, iki ibubiskidi janchakin: “Diosun yubani chibankin nukun jina kubichi nun mextemis nun Diosunabuki”, iki janchadiakanikiki. <sup>12</sup> Uatian matu jiweadan, Cristouma inun, Israelbube danananain inun, jawa Diosun jatu yubakin matu yubama iniki. Jaska man jiwea iyuniki, shinankanwen. Jaskawen taea Dios unamma inun jawa manakati pepa jayama na mai anu man jiwepauniki. <sup>13</sup> Uatian Dioski man kematiduma iniki. Jakia natian Jesucristo mawakin jawen jimi jabawaniwen natian chai man ibiani man ma ja dapiki. <sup>14</sup> Cristodan, ja besti nukun unanuma jiwemanikaki. Ja Cristonan, nun judiobu inun man judiobuma jabias jawenabu wakatsi ikin jaskawen taea nun danananain paxka jiwemisbu ja kene Templo anua jawen kenekin kebenibu keska jawen yudawen ja kene kebenibu keska yamawakin ana shinantima waniki, nun ana sinatanameyamaxanunbunan. <sup>15</sup> Diosun Moisés yunua jawen jancha kenekin jawen yunuti inun jawen nemati jaska chibain nun danananandabei jiwxexun shinain nun ibiakubainmisbun ana nuku jaska jiwemakatsi ikama natian yuda xuku dabe wama jawenabu bestichai keska nuku waniki, yuda bena nuku wakinan, nun judiobu inun man judiobumadan. Jaska wakin nuku unanuma jiwtiwaniki. <sup>16</sup> Cristo jamebi jaska nuku dasi wakatsi meneidan, nun ja xuku dabe sinatai nun danananandabei jiwemis Cristo cruzkia mawakin Dios nukuki sinatai nuku ja dabe daewaxuniki, nun judiobu inun man judiobumadan. Nuku jaska wakin nuku yuda bestichai keska waniki.

<sup>17</sup> Criston jawen kaka pepa bei jukinan, unanumati beniki, man judiobuma man chajaida Diosuma jiweabukidi inun nun judiobun Dioskidi chaima unanbiakin nun ikunwainsma nuku yusin pewakin medabewaidan.

<sup>18</sup> Natian Cristowen taexun judiobu inun judiobumandi jabias Yushin Pepawen Dios beyawai nun jaki kematidubuki. <sup>19</sup> Jaska inun, uatian Dioskidi unanma jadidi man shinanma ibiani natian jaska Diosun nuku yubani ikunwain nun jayabu matubudi man Diosbe jaibunametidubuki, jaska judiobun Jesús ikunwain keskai man ma Diosun enabudiki. <sup>20</sup> Jaskaken man ikunwainbu dasibidan, man mishki jiwe keskabuki. Jabu dukuntun mishki jiwe wakatsi bepxukin buyamisbu keskadan, Jesúsun kushipayabu inun jawen jancha yuixunikabun yusinkin Jesucristokidi besti akaibu chanima Cristo jamebi jawen mestenwanti kayabiki, mishki ewapa madatanxun tsaminkin mestenwanmisbu keskadan. <sup>21</sup> Jabu dasibitun nun Cristo ikunwainbuden, mishki jiwe wakin benibainmisbu keskaki. Mishki tibi tsamabainmisbu keska wakin nukun Xanen Ibuki yuda betsapabube jusia akeakekainkin Templo medibi nun jiwe wa akeakekanaii. <sup>22</sup> Ja dikabi matudan, Diosun Yushin Pepa man jaya Cristoki dasiadan, man jawen kenwanti Templo keska Dios matube jiweikiki.

### 3

*Diosun jawen yubaka pepa juneni Pablon jatu xabakabi yuinikiaki, na janchadan*

<sup>1</sup> Jesúsun ea yunua man judiobuma Jesucristokidi en matu yusianyan matuwen taexun en jawamabiaken nenu ea nichinmaxun mekeyuabuki.

<sup>2</sup> Jakia Dios matuwen nuikin jawen kakape ea matu yusinmaimadan, jaskakidi en ikaidan, man daka unain. <sup>3</sup> Jaskaken jawen shinan junea

Jesucristokidi ea xabakabi unanmani eskadabes en dama matu kenexunxu <sup>4</sup> uinkin jawada Diosun shinan junea Cristokidi en ikai shinain: “Chanimaki”, man itidubuki. <sup>5</sup> Uatian nun jawa unanma inibuki. Jakia natian Jesúsun kushipaya medibibu inun jawen jancha yuixunikabu jabu jawen Yushin Pepawen Diosun xabakabi ma jatu unanmayamaki. <sup>6</sup> Uatian Dios yubakakin junenidan, xabakabi matu yuinun ninkakanwen. Yudabu betsapta tsuabunda Jesucristokidi kakape ninkakin ikunwainbu Diosun jiwekuian jatu inankatsi ma jatu kenaikiki, jabias yuda inun jabias yubani Israelbube jawenabu axanai keska wakinan. <sup>7</sup> Ja jaska waniwen taea Dios duapa ewen nuikin jawen kaka pepa en yusinkubaunun ea yununiki, jaska wakin jawen kushipajaida ea uinmakinan.

<sup>8</sup> Jamen en ikaidan, Cristo chibainbu medanua en bexmasjaida jawamabikan jaskadaki watan Diosun ea benimawakin duawakin jau jawen bake Cristokidi jawen pepa betsapta jayawen nuku pejaida mekekubaintidu matu judiobumaki en chanikunkainxanun ea katutan nichiniki. <sup>9</sup> Dios dasibi damiwanitun jawen shinan medibi badi ichapa junenitun en matu dasibi unanmanun jaska xabakabi wakatsis ikin Diosun matu anu ea yununiki. <sup>10</sup> Jau jaska Dios besti unanepatun unan keyuai yushin kushipabu inun nai tsumabu nai anuxun jaska Diosun juneni natian juni chakabubun jawen bake ikunwainbun Diosun jatu unanmakin jatu binumaikiki. <sup>11</sup> Januxun mai damiwadiama Dios ikibi ini yubakani anunbadiai akinan, nukun Xanen Ibu Jesucristowen nuku axuniki. <sup>12</sup> Criston nuku jaska waxuniken jawa ana dateama jaki chiti itan ikunwain kematan nun yukatidubuki. <sup>13</sup> Jaskaken kakape en yusinkubaunmiswen taexun ea bichiabu matu medabewanun ika matuwen taea nuitapai en bika teneaii. Jakia ekidi shinain punu nukama benima bestikubainkanwen, ewen taexun Diosun matu duawaiwen taeandan.

*Cristo ikunwainbu jau chintunyamanunbun Pablon Dios jatu yukaxunkubainikiaki, na janchadan*

<sup>14</sup> Jaskawen taea man judiobumakidi nukun Epa Dios bebun danti itan en matu kushipa yukaxunmiski, <sup>15</sup> jatun dasibi jawenabu nai anua inun mai anua ma jatun kena jaya mekeadian. <sup>16</sup> Dios matu yukaxunkinan, jau jawen shinan ewapa keyuisma matu anu yunukin jawen Yushin Pepawen matu kushipa wakin jau matu mestenwanmakubainun en matu axunkubainmiski. <sup>17</sup> Ja dikabi Cristo matube jiwea man jayadan, jawen nui kayabiwen matu mestenwanma man jawen ikunwainan, ja matun jointi medan shinankin jau man chibankubainunbun en matu yukaxundiamiski. <sup>18</sup> Eskaki, matu yuinun ninkakanwen, Criston nui kayabidan. Jaxpajaida inun, chaipajaida inun, keyatapajaida inun, uke medan bismajaida keska tibi Criston nui man tapintidubuki, man ja ikunwainbunan. <sup>19</sup> Jaska jawen nui man unainan, pexeishta besti jawen nui unankin jaska jawen nui betsapta mexti akin man jawa tanatidubumaki. Diosun jawen kushipa pepa jaska tsuan bikin nun keyutidubumakidi man unanunbun en matu yukaxundiamiski. <sup>20</sup> Jaska inun, jamapai nun yukamis inun jamapai betsapta betsapta nun shinandiam inun nun yukadiama jawen kushipajaidawen Diosun nuku axuntiduwen taexun niti ikama kenwanankanwen. <sup>21</sup> Jesucristo nun chibainbu ikunwain betsabubetan Dios kenwankin jeneama duawakubainankanwen, niti ikanmadan. Jaskakidan.

<sup>1</sup> Nenu eska en bika tenei jiweyuxun meaidan, nukun Xanen Ibun ea yununi en akubainaiwen taexun ea achitan ea mekeimaxun ea jeneabumaken jau man ikunwainbu Diosun matu kenani jiwei pepai jaskakin man unankubainunbun en matu yunuai shinaindakubainkanwen. <sup>2</sup> Eskaidan, bebukaini keanma betsa binuanma inun, duapai betsabu bechipai inun, jin jin ikin jawada bebunkidi anun ika jawaida sinama ikunwain betsabube nui uinanain tenexun uindakubainkanwen. <sup>3</sup> Ja Yushin Pepatun matu dasi waiwen taea unanuma jiwei ikunwain dasibibube putanameama jaskas jiwekubainkanwen. <sup>4</sup> Matudan, jabias yuda matu wakatsis ikin Diosun matu kenanixun jabias Yushin Pepa matu inantan jawen kushipawen jabias jiwekuian matu manakamaikiki, Jesús man ikunwainbudan. <sup>5</sup> Jaskawen taea nun Xanen Ibu bestichai jayaki. Ja inun, ja besti nun ikunwain inun jawen besti shinan betsatan yuda betsabu unanti wamanun ika man nashia akeakemisbuki. <sup>6</sup> Ja dikabi Dios bestichaidan, dasibi ikunwainbun Epaki. Dasibi jawenabu xanen ibuxunkin jawen kushipa dasibi matu uinmakubainikiki.

<sup>7</sup> Januxun nuku tibi duawakin jawen kushipa nun jayanun nuku inankatis ikin Criston nuku tibi bechipaikin inanpakeikiki, ja kushipawen nun dayanunbunan. <sup>8</sup> Jaska Jesús xanen ibukin jaki sinataibu binutan jawenabu pepa manakumiskidi Diosun jancha Davidin keneni yuikin:

“Jabu binukin maematan iyuniki.

Jakia jabun chibanmisbu pepabu pepawen jatu manakumiski”, iniki. <sup>9</sup> Na inakainikidi kenekin jaskadadakidi Davidin shinankin yuini matu yuinun ninkakanwen. Mesías Diosbe nai anu jiwea mai anu ja dukun butui taeniki. <sup>10</sup> Ja dukun jabias butua ana jawendi inakaini nenuma nai binutan jaska juyama ana jawendi jawen kushipa jaki dasi keyuniki. <sup>11</sup> Ja jaska jamebi juyamaxun betsabu jawen kushipayabu jatu wakin betsabu jawen jancha yuixunikabu jatu wakin betsabu jakidi kakape chanikubaunikabu jatu wakin betsabu yusinanain mekenikabu jatu watan jatu yunu akeakebainiki. <sup>12</sup> Jatu jaska wabainkin jawenabun jawen daya tibi jau axununbun jatu pewatan jatu yunubainiki, jau kushipanamei jaska Diosun bechipaiai jakidi ana tapin Criston yudai nun mestenepakubainunbunan. <sup>13</sup> Jaskakunkaini dasibi putanameama ikunwainbuki dasitan Diosun bakekidi tapinkubainkin Cristo ikunjaidawai jawa shinan betsa wama Cristokidi unanepai dasibibu nun itidubuki. <sup>14</sup> Jaskaken ana bake mishtinbun shinain keska ana jiweyamakubainankanwen. Eskaki, matu yuinun ninkakanwen. Juni betsa betsapabun bake mishtinbu bepadanabu jawaida ninkamisbuki. Nuku jabiaskadi wakin yuda betsa padananankin Diosun yusian kayabi chibanma yusian bena watan matu yusiaibnu jatu ninkakin jatun jancha ikunwankin bake mishtinbun jamapai tibi chibain imis keskai ana iyamakubainankanwen. <sup>15</sup> Jakia bechipainamekin jancha kayabi yui nukun Xanen Ibu Cristo keskai ewai jiweyukubainankanwen, Cristo nukun buxkaken jaki dasi tsamitan nun jawen yuda ewawaiidan. <sup>16</sup> Janua Cristo nukun Xanen Ibuwen taea dasibi ikunwainbu nuku dasiwa nuinamekin, ikunwainbu tibitun daya betsa Dios axuainbu inun ikunwainbu dasibi medabewakin Cristowen taexun nukunabu dasibi man jatu kushipa wakubainaii, nukun pabu tibi ewai nun kushipamis keskakinan.

### *Jesús ikunwainbudan, jiwea bena jayabukiaki, na janchadan*

<sup>17</sup> Nukun Xanen Ibun kenawen eska en matu yuikin yunuai ea ninkakanwen. Jabun Dios unanma benuabu ikaibu keskai ana jiweyamakanwen, jabun shinan chakabu benuawen jaska jiwea unanma jamakidi kane

kanekanikikidan. <sup>18</sup> Jabu meshu medan nia keskaxun shinan chakakin pe shinantidubuma unainsmapabuki, jabudan, jawa benima pae Dios anua juaiwen benimama jaska jawa tapianma unainsmapa besti jabu jointi kushibudan. <sup>19</sup> Ana jawa dakeama chakabu jamapai atimapai tibi jawen yuda inankin jawen kemujaidai jointi kushi jiweabuki, tsua ibubis e ikamadan. <sup>20</sup> Jakia matudan, Mesías Cristo ikunwankinan, jabu jiwemisbu keskakin man tapianma iniki. <sup>21</sup> Jaskawen taexun bebunkidi Diosun Katuakidi jawen kakape en matu yusinma jaskai ja jiwenikidi tapinkin man ninkaimadan, chanima Jesús anua ja besti yui kayaki. <sup>22</sup> Jaskawen taexun matubunan, matun jiwea xeni xabakabi yuikin chitedikanwen. Jaska uatian chakabui jiwekunkainkin chakabu betsa betsapawen kemukin ibubis padananan man ikunkainaian, putai bextedikanwen. <sup>23</sup> Matun shinan bena watan jaska Diosun bechipaikin matu katumai besti shinankawan. <sup>24</sup> Matun jiwea bena tadi bena sawea keskakin matun yushin bena wakin Diosun matu damiwani jawen Yushin keskadikanwen. Jaska chakabu paxkatan medibikunkaini jiwea pepaswen chanima jancha besti man chibankubainxanaii.

*Jesús ikunwan kayabidan, eskai mestentikidi Pablon yusinikiaki, na jan-chadan*

<sup>25</sup> Eskatianan, nun Jesús ikunwainbudan, nun yuda bestichai keskaki. Jaskawen taea jawada yui man janchaidan, ana chani chakai padanananma matunabube xabakabi yuinamekubainkanwen.

<sup>26</sup> Ja inun, matudan, tsuada man sinatamisdan, ana jawen chakabuyamakanwen. Tsukida sinatabiatan ana manai jatixuinda badi chai tanama uxadiama daenamekubainkanwen. <sup>27</sup> Man jaskabumaken Satanásan matu padankin kanematiduki.

<sup>28</sup> Ja inun, metimai man yumetsumisbudan, janun matun yumetsu jenetan shinan betsa watan janun matun mekenen daya shinanbaun jamapai tibi dayakin pawadikanwen. Januxun ja dabukun paxkaxun yuda nuitapaibu man jatu inantidubuki.

<sup>29</sup> Jaska inun, ana jancha chakabu yuiama jancha pepawen besti janchakin matunabu ana kushipa wakin ikunjaidawamakin medabewakin jatu benimawakubainkanwen, jabun matu ninkaibudan. <sup>30</sup> Jaskaken jabe matu jiwemakatsis ikin jamebi Diosun nai anu matu iyuxanun, iwanan, jawenabu wakin matu unanti wakatsi matu inani jawen Yushin Pepa ma jayadan, ana chakabukin jawen Yushin Pepa punu nukawayamakubainkanwen.

<sup>31</sup> Jaska inun, jadakidida matu chakabuwabu jas shinain man amua nimis, inun man pubenjaidamis inun, man sinatamis inun, man kunyan ichakayamamis inun, xeti ikama man ja imis inun, jamapai chakabu betsa betsapa matun jaxpa anua kainmisdan, matubunan, puta keyudikanwen. <sup>32</sup> Jakia matudan, man pepakatsis ikaidan, matunabuwen nui bestikubainkanwen. Jawada man jatube chakabumis daenametan duanameidan, matun chakabu jakimadabetan ana shinanma pepakubainkanwen, jaska Criston matun chakabu buaniken Diosun ana shinainsma kesaidan.

## 5

<sup>1</sup> Matubu man Diosun bakebu kayabi pepabunan, jaska Diosun bechipaiai jaska besti chibankin mawakubainkanwen. <sup>2</sup> Jaska inun, Criston nuku bechipaikin Dios duawanun ika Diosun kupiti nuku bixuin mawai inti jawendua keska puekin Dios benimawaniken jaska Cristo nuku ixuni keskadiakin nukubetan ikunwainbu dasibibube nui bechipainamei jiwekubainkanwen.

<sup>3</sup> Januxun ikunwanbuman jatu ati wakin jawa chakabuki dakeama yuikin jamapaiwen kemujaidakubaini jiwemisbuki. Jakia matubudan, ana jatu keska jiweama jaska ikunwain jiwei betsajaida jiwekin chutanamebaunmisbukidi ana shinain janchama inun chakabu atimapa tibi ana shinain janchamadi inun kemu paekidi ana shinain janchama jaska Diosun jawenabu uinkatsi ikai keska besti chibain janchakubainkanwen. <sup>4</sup> Ja dikabi nukun kexawen janchaidan, ana dakewati jancha chakabu yuiama inun, jancha jamapaiwen yuiama inun, jancha tsua medabewatimawen ana janchama jaska tibiwen jancha ana kainmama matun kexawenan, Dios besti kenwankubainkanwen. <sup>5</sup> Ja inun, chanima tsuabuda jaska dakeama jamapai tibibe chutanamebaunmisbu inun, jawada atimapa tibi amisbudan, Cristo inun Dios xanen ibuaya jatube jiwedidubumaki. Ja inun, tsuabuda jamapaiwen kemumisdan, dami yushin itsa waxun kenwanmisbu keskawen taea ja jaskamisbu Cristo inun Diosbe jiwedidubumadiki.

*Cristo chibainbu ma xabaki pesea keska jiwekunkaintikiaki, na janchadan*

<sup>6</sup> Tsuabunda matu bepadankin jamen matu yusinkin padainbudan, jatu ninkayamakanwen. Tsuabunda Dios ninkama jawa medabewatimakidi yusinmisbudan, Diosun jatu kupichakayamaxanikiki. Uindakubainxankanwen. <sup>7</sup> Ja inun, jawada chakabuwaibube ana jatube dasiyamakubainkanwen. <sup>8</sup> Ja inun, uatianan, nukun Xanen Ibu unankin ikunwandiamma chakabui meshu medan ika keska man jiwenibuki. Jamen eskatianan, Cristo ikunwain jaki dasitan matun shinan maewatan man betsajaidawa man ma xabaki pesea keska jiweabuki. Jaska man ma tapian shinain pe jiwekubainkanwen. <sup>9</sup> Ja xabapan nukun shinan betsa wamatan nuku tapinmai tsekekainkin mia imaidan, nuku duapamai inun, nuku kayatapimai inun, nuku chani chakatimawaikiki. <sup>10</sup> Jawada Diosun bechipaiai unantan jeneama axunkin benimawakubainkanwen. <sup>11</sup> Tsuabuda meshu medan nia keskaxun chakabu shinantan matu amakatsis ikaibudan, jawa pe jayabumaki. Ana jatuki dasiamma matuin jatu dakewakin xabakan kainma keska wakin xabakabi pepakidi jatu yuikubainkanwen. <sup>12</sup> Jawada chakabujaida june ikaibu xabakabi yui daketiki. <sup>13</sup> Jatun chakabukidi man jatu unanmaya jawada june chakabu betsa betsapawamisbu dasibibun xabakabi unantidubuki, ana jaska waxun junetimadan. <sup>14</sup> Jaskaken jaska shinan betsa watidubu shinankin Dioskidi nawati yuikin:

“Chakabun matu tsumadan,  
mepamadikanwen.

Man mawabiani janun benidibidankanwen.

Matun chakabu man jeneaya

Mesías Criston jawen chaxawen matu yusinkin matu unanmaxanikiki”,  
ikaki.

<sup>15</sup> Jaskaken matun jiweadan, uindakanwen. Jawada man akai chibain pe bestikubainkanwen, unainsmapamadan, jakia unanepaidan. <sup>16</sup> Natian chakabu betsa betsapa juaya menan manama matun jiwea pewadikanwen. <sup>17</sup> Jaska inun, ana jawadawen unainsmapama jawada nukun Xanen Ibun matu amakatsis ikai ninka pewatan jaska shinainkidi tapindikanwen. <sup>18</sup> Jaska inun, man nuxuti pae shadabu beya wanidan, jawen kemui shinan chankain pe mekeama man chakabumisdan, ja jenetan natian Diosun Yushin Pepa bestiwen kemukin nuxukin akawakin mata wakin matun juinti benimai shinan chankakubainkanwen. <sup>19</sup> Eska tibi bestiwen yuikin kenwankubainkanwen. Man jatubetan ikunwainbube Dioskidi nawati tibiwen nukun Xanen Ibu kenwain juinti jidabiwen benimawakubainkanwen.

<sup>20</sup> Jawada man jaya inun jawada man jayama Epa Diosun dasibi nuku inanmis shinankin yuikin: "Jaska jamapai shadabu min ea inainwen taexun en mia kenwaiin", akubainkanwen, nukun Xanen Ibu Jesucriston kena kushipawen yuikinan.

### *Jaskai duanamekunkaintikiaki, na janchadan*

<sup>21</sup> Jaska inun, Cristokidi pe shinankin man duawakatsis ikaidan, ikunwainbu betsabube binunanankatsis ikama jatube yununananma ninkakanankubainkanwen.

<sup>22</sup> Beneyabuun, matu yununun ninkakanwen. Nukun Xanen Ibun matu yunua ninkaxun man akai keska wakin matun benen matu yunua jabebis yununamei jen iyamama axunkubaikanwen. <sup>23</sup> Jaska inun, Cristo man ikunwainbudan, Cristodan, matun buxkaki. Matudan, man jawen pabuki. Matun buxka matun mekenikaki. Jabiaskadi man ainbu beneyabudan, matun benedan, matun buxkaki, jatun matu mekemisdan. <sup>24</sup> Jaskaken nun Cristo ikunwainbun jawen yunua tibi ninkaxun nun amis keska wakin matun benen jamapai mia yunua ninkaxun ainbu tibitun matun benedi ninkasama jau jatu axundiakubainunbunwen.

<sup>25</sup> Ainyanbuun, matudi yununun ninkakanwen. Cristo jabun ikunwanx-anaibuwen nuikin bechipai jawen jiwea jatu inani keskai matudi matun ainwen nuikin padanma jatu bechipaijaidakubainkanwen. <sup>26</sup> Criston nuku jaska wakatsi ikin nun jawen ikunwainbu nuku mawaxunkin jawena med-ibi chakabuuma nun xunpinunbun jawen kakape nun ikunwainwen taexun nuku nashimamisbuki. <sup>27</sup> Cristo jabun nun ikunwainbu pepajaida jawa detsis neama jawa tadi chunpima ana jawa chakabu betsa tibi jayama nukun jiwea xeni jenetan pepa medibi besti jaska jatun besu uinkatsis ikikiki. <sup>28</sup> Jabiaskadiai jawen bene jawen ainbe ketaxamexun bechipaidan, jawen yuda keskawen taea junibun jatun ainwen jau nuikubainunbunwen. Jaska shinankinan, jatunmebi jatun yudawen nui keskakin jatun ain bechipaikanikiki. <sup>29</sup> Tsuabunda jatun yuda dananma pimakin mekemis keska wakin jabiaskadi wakin Criston jawen ikunwainbu mekemiski, <sup>30</sup> jawen yudakenan. Nukubudan, ja yudakidan, nun jawen pabu tibiki. <sup>31</sup> Jaskawen taea jaska juni inun jawen ain yuda bestichai keskatikidi Moisin kenekin yuikin: "Jaskawen taea junin jawen ibubu dapaxkabain jawen ainbe ketaxametan ja dabe jiwei ana yuda dabema yuda bestichai keskatiki", jatu waniki. <sup>32</sup> Ainyain inun beneyai yuda bestichai keska jiweadan, min tapintidudan, bikaki. Jakia jabiaskadiai Cristo inun dasibi ja ikunwainbu jaki dasia jabiaskadiki, Cristoki nun jaki dasia nun yuda bestichai keskabudan. <sup>33</sup> Jabiaskadi wakin jaska juni tibitun jawen yuda ibubis mekemis keska wakin jau jawen ain pe mekekin duawakubainunbunwen. Jaska inun, jatun ainin jawen benen yunuai jau ninkaxunkubainunbunwen.

## 6

<sup>1</sup> Bakebuun, matu yununun ninkakanwen. Matun ibubu ninkatan jawen yunua axunkubainkanwen. Jaska wakin nukun Xanen Ibu benimawakin man kaneamaki. <sup>2</sup> Ja dukun nuku yubakin Diosun yununidan, eska jayaki: "Matun epa inun matun ewa kenwankin duawakubainkanwen, <sup>3</sup> na mai anu benimai badi ichapa pe jiweyukunkainkatsis ikidan", aniki.

<sup>4</sup> Bakeyabuun, matudi yununun ninkakanwen. Matun bakebu tapinmakin jau matuki datei sinatayamanunbun yunuchakayamakin nemajai-dayamakanwen. Jakia jiwea tapinmakin Diosun jancha tapinmakin jawen

yunuti jancha inun jawen nemati jancha unanmakin pe yusinkin jaska nukun Xanen Ibu bechipaimis keskawen jatu yumewakubainkanwen.

<sup>5</sup> Esclavo dayadubuun, matu yununun ninkakanwen. Matubunan, matun tsuma mai anuabuki datei dayai penun, iwanan, jatu duawakin jaska matu yunua ninkatan chibankubainkanwen. Jaskakinan, Cristo duawakin man akawai. <sup>6</sup> Jaskaken matun tsuma pe dayaxunkin duawaidan, jatun bedubi uiain bestiwenma jakia uianmadiken pe dayaxunkubainkanwen, Criston dayadukin jawada jawen Epa Diosun bechipaimis jaska shinain axunkinan. <sup>7</sup> Jawada daya man akaidan, chikishbetanan akama nukun Xanen Ibu man duawai keska akubainkanwen, yudabu uinmakin axuanmadan. <sup>8</sup> Tsuabuda esclavo inun esclavoma man dayamiswen taexun jadatuda man pe dayamis inun chikishi man dayamis matu tibi unanxun nukun Xanen Ibu matu manakuxanikiki.

<sup>9</sup> Yununikabuun, matudi yununun ninkakanwen. Jabias Xanen Ibu nai anuatun yuda dasibi unankin yununikabu inun matun tsumabudi jabiaska dabenewen nuikin matu kupimistun xanen ibu inun xanen ibuma ja dabe jabias senen shinanmiski. Jaskaken matun dayadubu pe mekekin ana jatu kunyan akama ana miki jatu datewama pewen besti jatu yunukubainkanwen.

### *Ikunwainbu soldadobu keskai kushipakunkaintikiaki, na janchadan*

<sup>10</sup> En betsabu inun en puibuun, nukun Xanen Ibu kushipa paepa man jayadan, jawen kushipa ewakanwen. <sup>11</sup> Diosun jawen mia mekeai nemati kushipa bikanwen. Ja jayatan man chintuanmaken diablo Satanásan matu padantidumaki. <sup>12</sup> Na jaska nun jatube detenameaidan, yudabun kushipawen nun ikai keskamaki. Jakia yushin chakabubu inun jampai xanen ibu chakabu na mai anua inun manaundi namakisxun nuku kexebaunxun yunuaitun nuku achiabube nemai jeen iyamai nun jatube detenamei keskai. <sup>13</sup> Januxun romano soldadobukidi matu shinanmanun ninkakanwen. Detenamei bui tsakanamenikabu chintunkatsi ikama jawen meketi mabu kushipa tibi sawe keyutan detenamei bumisbuki. Jaska keskadai matundi diablo Satanás nemai jeen iyamai unanepakatsi dasibi Diosun kushipa jayai keyutan matu bikawaibutian chintuanma maemai kushipakubainkanwen.

<sup>14</sup> Janua jancha chanima besti yuikin jawa dateama mestenwankanwen. Jaska wai nun pe jiweabu Diosun nuku mekekubainmiski. <sup>15</sup> Matunan, Diosun jancha kakape unanuma jiwitikidi man yusin bukatsis ikaibidan, bebunkidi matun jiwea pewakubainkanwen. Jaska wakin man ma pewa jaska soldadobu detenamei bunun, iwanan, bebunkidi jawen bichi tae sawemis keska wakin kakape yuibaunkin Dioski sinataibu man mae-maetidubuki. <sup>16</sup> Jaska inun, Dios ikunjaidawakubainwen. Nun jaskawayaya soldadobun jatun ji bexa tuduwen jatun yuda junemis keska wakin Dioski sinataibun jatun chakabuwen nuku binupaiabu nukun nun nematiduki. <sup>17</sup> Diosun nuku mekemisdan, soldadobun jawen mane maiti sawea jawen mekemisbu nukudi nun jaska keskaki, Dioski sinataibun jau nuku padanyamanunbunan. Jaska inun, Diosun jancha tapinjajidakubainkanwen. Jawen janchadan, nupe chaipa jawen detenameti keskaki. Jawen Yushin Pepatun nuku medabewaya ja Dioski sinataibu nun jawen nematiduki. <sup>18</sup> Matubunan, Diosun Yushin Pepatun matu shinanmaya Diosbe janchakin jatu yukaxunkin jatu ea axunkin jeneyamakubainkanwen. Jaskai jawa punu nukama inun babuama bedu mestenwantan jiwekubainkin ja dikabi Jesús ikunwainbu dasibibu Dios yukaxun-

diakubainkanwen. <sup>19</sup> Eska en matu yukaii. Jau Diosun ea medabewakin jadi janchati ea inankin inun en jancha ea kushipa waya jaskawen taexun jaska Diosun uatian juneni xabakabi jawen bakekidi en jatukidi chanikunkainun ekididi Dios yukaxunkubainkanwen. <sup>20</sup> Jaska inun, Diosun ea katuxun jawen kushipaya janchaxunika ea wani en jawen kakape yusinbaunmiswen taexun jabun nenu ea iweimaxun ea bichikin akawaimabu nenuxun en bika tenebiakin jawa dateama nukun Xanen Ibukidi janchai en chanikunkainun ea Dios yukaxunkanwen.

*Jawen jenea nuiti janchakiaki, na janchadan*

<sup>21</sup> En jaskadada jau matu anu kaxun ekidi matu unanmai chani kaxanun, iwanan, nukun Xanen Ibuwen taea nukun betsa Tíquicon, ikunwain chin-tuinsma jabiatundi nukun Xanen Ibun daya axunkin nuku medabewamis matu anu en nichiaiin. <sup>22</sup> Jaskawen taexun jaska matuki chanikin nenu ebe maniabu inun ekidi janchakin jau matu shinan chankanwain kanun nukun jaibu matu anu en nichiaiin.

<sup>23</sup> Nukun Epa Dios inun nukun Xanen Ibu Jesucristo man jabun ikun-wainbu jaska tibi jabu jaya matu inan bikubainkanwen, ikunjaidawakinan, ikunwainbu betsabuwen nuikinan, unanuma jiwekunkainkinan. <sup>24</sup> Jaska inun, tsuabunda nukun Xanen Ibu Jesucristo bechipaikin betsa waisma jau Dios jatuwen nuikin duawakubainunwen.

Jatiski, en janchadan.

Pablo

## FILIPOS ANUABU PABLON JATU KENE BUMANIKIAKI FILIPENSES

*Pablon jatukidi shinanikiaki, na janchadan*

<sup>1</sup> En Pablo inun Timoteon, Jesucriston tsumapan, man jabun Jesucristo ikunwainbu Filipos anuabu inun, jabun matu mekemisbu inun, matu medabewamisbu man dasibi Jesucristoki dasiabu nun matu kene bumai uindakanwen. <sup>2</sup> Nukun Epa Dios inun nukun Xanen Ibu Jesucriston jau matu unanuma jiwemakin pewakin matu duawapakekubainunbunwen.

*Pablo ikunwainbuwen nuikin Dios jatu yukaxunkubainikiaki, na janchadan*

<sup>3</sup> Jawenchains matukidi shinankin matuwen taexun en Epa Dios en kenwankubainmiski. <sup>4</sup> Januxun jabe janchai benimakin matu dasibikidi en matu yukaxunkubainmiski. <sup>5</sup> Diosun kakape jawen bakekidi matu anu jiki taexun en matu yusian ninkakin ikunwantan ebetan chibankin ea medabewanixun jawa jeneama natian man apakeaii. <sup>6</sup> Ean en matukidi shinanan, jaska Diosun jawen daya matu anuxun taewanixun jaska bechipaiiai keska man ikunwain Jesúsun matu jiwemakubainkin niti akama matu pepa wakubainxanikiki, janu Jesucristo chintunkidanaitianan. <sup>7</sup> Chanimaean en matukidi pe shinainan, matuwen nuikin en matu bechipaijaidaii. Matudi dasibi man ewen nuiaya Diosun matuwen ea duawaikiki. Natian ea bichimabu keska nia xanen ibubu be bun jawa jatun yunutikidi en janchaima eska besti yui en chakabuisma pekidi janchai Diosun kakape Jesucristokidi jatu unanmakin jakidi xabakabi en chanikunkainaya man ea medabewai ebetan teneai keskakubainkanaii. <sup>8</sup> Jaska inun, matube dasibi jaibunain nun pekubainibudan, Diosun nuku unainkiki, Jesucriston nui duapa ea inan en matu axuniwen taea matukidi en jakimaismaki. <sup>9</sup> Dios yukakin matu ea axunkinan, jau jawen nui ichapawen matu ewawakin jau apakenunwen, jeneamadan. Jaska wakin Diosun matu unanepa wakin ninkanika jau matu wakubainun, iwanan, en matu yukaxunmiski, <sup>10</sup> jaska pepa besti bechipaiiai man katukubainunbunan. Jaskai jiwekin matun jiwea xunpin jawa chakabuma ewakaini jawa chakabuki juti ika keskama nukun Xanen Ibu Cristo judiamaken man pepa jiwekubaintidubuki. <sup>11</sup> Ja dikabi matu man jatu bebuxunaibunan, Jesucristowen taexun jawada pepa man akai tsuabunda uinkin Epa Dios duawakin kenwanxankanikiki.

*Pablon Jesucriston kakape yusinkubainikiaki, na janchadan*

<sup>12</sup> En betsabu inun en puibuun, en bika betsa betsapa teneai anu bebidan bebidanaibu chanima kayabi jaska yuda betsa betsapabun Diosun kakape Jesucristokidi ninkabidanbidanmisbukidi matu yuinun ninkakanwen. <sup>13</sup> Jaska Roma xanen ibun jatu binuantun jiwe ewapa jawendua anuabu soldadobun ea mekemisbu inun yuda betsa betsapabun ea uinkin janu ea pewayamabu anuxun Cristokidi kakape en jawen jancha chaniai dasibibun ea ninkamisbuki, ja meketi jiwe anu en jiwe anuxunan. <sup>14</sup> Na ea nenu eska wayamabu ewen dateama ichapabun Cristo ikunwankin jawen kakapewen benimakin dateama juinti kushitan nukun Xanen Ibuki chiti itan Diosun kakape jatu yusinkubaunkanikiki.

<sup>15</sup> Juni betsa betsapabu jatun juinti pepa jayabu Cristokidi yuda betsabu ikunwanmanun, iwanan, pe yusinkanikiki. Jakia jatiditun ea binunun

ika eki sinatai kein paxkatan yusinanandiakanikiki. <sup>16</sup> Chanima nenuxun Diosun bakekidi en pe yuikubainun Diosun ea nenu yunuyamaken jabu ewen nuikin ja Cristokidi daya en jenebidanima jabun ea medabewakin kakape datan akin jeneama yusinbaunkanikiki. <sup>17</sup> Jakia jatiditun akinan, anikabia kenkin mestenwantan akama pepabiakin ea binunun ixun jabun jaska wakin ea ana bika tenemakubainkanikiki. <sup>18</sup> Jaskaibuwen taeadan, eadan, en jatuwen nui en jatuki sinatamaki, shinan pepawen chaniaibu kasmai shinan pe midinwen Cristokidi kakape chaniaibudan. Jaskabaunkin ea benimawakanikiki.

En benima keyudiamadan, <sup>19</sup> man ea Dios dayaxuniwen taea tsuki en dakeamaki, jatun ea mekeawen taeadan. Jaskaken tsuabunda bedubi jawa jakidi dakeama natian en jiweawen inun en mawaxunxanaiwen Cristo kushipajaida ewen dasibibu en jatu uinmayukatsis ikaii. Jaskawen taexun Jesucriston Yushinin ea medabewakin ea kainmaxanai shinain en benimakunkainaii. <sup>20</sup> Jaska inun, Dios dayaxuni tsuki en dakeamaki, jatun ea mekeawen taeadan. Jaskaken tsuabunda bedubi jawa jakidi dakeama natian en jiweawen inun en mawaxunxanaiwen Cristo kushipajaida ewen dasibibu en jatu uinmayukatsis ikaii. <sup>21</sup> Natian en jiweyuadan, Cristo en jiweyunkunkainaii. Jakia jawen taea en mawadan, en nenu jiweis binuaki. <sup>22</sup> Na en yudawen en jiweyunkunkainkinan, jawen dayakin yudabu ichapa en jatu ikunwanmatiduki. Jaskaken ja dabe en katutidumajaidaki. <sup>23</sup> Ean ibubis jaska dabe en katuadan, bikajaidaki. En shinanan, mawatan en Cristobe ma jiwei kai pejaidaki, enadan. <sup>24</sup> Jamen betsadan, matu medabewayunun ika en jiweyuadan, peyuaki. <sup>25</sup> En jaska matukidi shinainwen taea jaska man Jesucristo chibainkidi matu medabewakin matu benimawakatsi iki en matube ana jiweyui katidu en shinaii. <sup>26</sup> Matu anu ana jaska kainshinxun en matu yusianyan ewen taea benimai man tse ixanaii, Jesucristo kenjaidawaidan.

### *Jesucristo ikunwain bika tenetikidi Pablón jatu yusinikiaki, na janchadan*

<sup>27</sup> Natian man jiweaidan, Diosun jawen bakekidi kakape unain jaska jiwekunkaintikidi benai na keska bestiwen jiwekubainkanwen. Jaska en matu uinkatsis ikai inun matu anu en kamaken matukidi matun kaka juai en matukidi ninkakatsis ikaii, jaska man chintuanma inun man ma dasi keyuxun bika tenebiai jeneama matun shinan kushipawen ikunwain man Jesucristo chibainbunan. <sup>28</sup> Jabu matuki sinataibuki e iki dateyamakubainkanwen. Jabu matuki jaskabiaibun man pe jiwekin jatu uinmakubainmiswen taexun Diosun janu xabakabi jatu kupikin jabiatiandi matu besti mekexanikiki. Diosun jaska wakin xabakabi jatu unanti wamaxanikiki. <sup>29</sup> Diosun jawen pepawen matu kenakin katuxun ikunwanmanidan, ja besti ikunwain pepa bestitimaki. Jabiaskadiai Cristowen bika mei nitapadiatiki. <sup>30</sup> Jaskaken ea inun matudan, nun bika tenekanaii. Jaska uatian en ikai man uinidan, na jabiatiandi Cristo dayaxunkin jamapai bika betsapena tenekubainai man ekidi ninkakubainaii.

## 2

### *Ikunwainbu shinananain jiwezikidi jatu yununikiaki, na janchadan*

<sup>1</sup> Criston jawen kushipa matu inankinan, jawen shinan chankankainti matu inaniki. Man nui jaya matun betsabu ja shinanwen matu yunua man jatu daewatiduki. Tsuada man Cristoki dasiadan, jabias Yushin man jaya ikunwain betsabuwen jatuya nui man kaxakunkaintidubuki. <sup>2</sup> Jaska dasibi binunananma jabiaskas paxkama man jiweadian, jabias nui man jaya

inun, jabias Yushin man jaya inun, jabias shinan man jaya ea ninkamakin ea benimawakubainkanwen. <sup>3</sup> Na jaska jiwekainkinan, yudabu binunun iki keanma jakia babutan bestibu: “Ea dukun en bebui pepakainaii”, ikin shinanma: “Betsabundi ea maemai en jawamaki”, ikubainkanwen. <sup>4</sup> Jaska inun, betsadan, jawada man akai inun man biaidan, matunas bestikidi shi-nankin man amis akama jakia ikunwain betsa xabakabi jatu uinmediakin jawada akaibu jatu medabewakin axundiakubainkanwen.

*Jesús Dios keskabia jawen tsuma keska jiwekunkainikiaki, na janchadan*

<sup>5</sup> Tsuabunda Jesucristokidi jaska man shinainan, jaska Criston shi-nankubaini keska betsabukidi shinaindakubainkanwen.

<sup>6</sup> “Cristo Dios itsabia jaskas shinain keanma jiweniki.

<sup>7</sup> Jawen kushipa bextekedin jeneyubidan  
nuku keskakin nukun yuda bitan  
na mai anua dasibibu medabewai  
jabun tsuma ikunkainikiaki.

<sup>8</sup> Jamebi babutan jawen Epan yunua chibankubaini  
mawanun ika ikunkaini cruzki dunua mawaniki.

<sup>9</sup> Jaskawen taexun Diosun kenjaidawakin jatu binu keyumakin  
kena kushipa pepa tsua jaska jayama Jesús inaniki,

<sup>10</sup> jau ja Jesúsun kena ninkatan dasibibu nai anua inun,  
mai anua inun, januxun mawabun yushin manamisbu anuxun  
jabun kenwain danti itan

<sup>11</sup> dasibibun unankin:  
‘Jesucristodan, chanima dasibibun Xanen Ibu Yavéki’, ikin  
Epa Dios kushipa kenwanxankanikiki”.

*Criston nuku jiwea inan jenetimakidi Pablon yusinikiaki, na janchadan*

<sup>12</sup> En betsabu inun en puibuun, matuwen en nuiaya man en jancha chibammis jeneama akubainkanwen, en matu uianyan man amis keska inun, en matu uianma chaijaida en jiwebiaken ea ninkakin chibandiakinan. Jawa kaneama uke medan jawada matun jiwea Cristona wamakin man inani Cristoki mesekin jeneama jawen mekepakekanwen. <sup>13</sup> Matun jiwea man ma Cristo inaniwen taexun shinan betsawen Diosun matu benimawakin jaska matuwen dayakin jawen shinan pepa taxnimaya jaska bechipaiai keska matu amakin medabewaya xabakabi axunkubainkanwen.

<sup>14</sup> Man ma jaskadan, ana tsuabuda nantakeabuki ninkabumabiaken matun jancha jamen ja ikin chakawama inun ana ja idabeama pe ji-wekubainkanwen. <sup>15</sup> Man jaskai jiwea matu tibi man chakabuma inun man kaneisma jaska Diosun bakebui ja yuda chakabubu inun atimapabu anua meshu nea keskama man jatube jiweadan, bishin kushipa chaxai jawen unanbainti keskakin <sup>16</sup> matubunan, Diosun kakape jiweakidi jancha jatu unanmakubainkanwen. Man jaskaya ea en matu anu jamen dayai kama iniwen taea ea matuwen kein en tse iki en benimaxanaii, janu Cristo ana juaitianan. <sup>17</sup> En jiwea en matu inani keska wakin en matu ikunwanmaniki. Matundi ikunwankin matun jiwea man Dios inankuinyaiin. Jaskawen taea en jiwea yaushlama mawakinan, jau man ikunwankin jeneyamanun en jiwea Dios en matu inankuinxuntiduki. En matu jaskaxuni en benima paewen dasibi en matu yuiaii. <sup>18</sup> Matudi benimadikanwen, en ikai keska shinain ewen benimaidan.

*Filipo anu Timoteo nichinkatsi inikiaki, na janchadan*

<sup>19</sup> Nukun Xanen Ibun jaska shinanyan matu anu Timoteo yunukatsi jaska en shinauin, jau matu ninkatankin matun kaka bexun ea benimawayuxanunan. <sup>20</sup> Jaska matukidi en matu shinain keska inun en matuwen nuimis keska tsuan matukidi pe shinanma chanima tsua betsa jayamaki. <sup>21</sup> Ja betsabun Jesús chibantiai jatunas bestiwen nuikin shinankanikiki, jaska Jesucriston bechipaiai keska akamadan. <sup>22</sup> Timoteo en bake keskai ebe jiwea dayakunkainkin kakape Jesúskidi ebetan yusinkin ea medabewakubainmis jawen jiwea man unaiin. <sup>23</sup> Ea jaskada waxanaibu jatun matu unanmai jau ekidi matuki chani kanun ja en matu anu nichinkatsis ikaii. <sup>24</sup> Jaska kasmai ea kayabis kaxun en matu uin katidumenkain ixun jaska nukun Xanen Ibun shinan besti en manaii, jawaida kanun ixun shinainan.

### *Filipo anu Epafroditu ja dikabi nichinkatsi inikiaki, na janchadan*

<sup>25</sup> Ja dikabi ja dabe en jatukidi shinainan, nukubetan ikunwain Epafroditon jau ea medabewanun man eanu nichinma ea medabewai ebe dayai bika tenekunkainai Cristokidi kakape yusinmis ana matu anu en nichinyukatsis ikaii.

<sup>26</sup> Jaska isin teneaikidi man ninkaimabu jawen taea jakidi shinain man jawen punu nukashina jaska shinain matuwendi nui jadi matu jakimamadiki. <sup>27</sup> Chanima ikimaki, isin paepa bitan tenei mawakeanidan. Jakia Dios jawen nuikin ewendi nuidiakin jau ana ea bika betsa tenemayamanun Diosun xuxawaimaki. <sup>28</sup> Jaskawen taexun matu anu jawa ana tea wama en matu nichinxunaii, ana matu uinma uin man benimaya ana en matuwen punu nukuyamanunan. <sup>29</sup> Nukun Xanen Ibuwen taea nukun betsa Epafroditu kai benima paewen ikin peidawaxankanwen. Ja inun, tsuabuda ja keskabudi bechipaikin jawen jancha ninkanun ixun jatu ikubainkanwen. <sup>30</sup> Tsuan man ea jaska watidubumajaidabiaken Epafroditu ewen taea jawen jiwea yaushiamma mesebiaken Cristo dayaxunaiwen taea ea medabewai juima isin paepa bitan mawakin chanima nuku xununkeanimaki.

## 3

### *Pablon jiwea xenidan, jamenkiaki, na janchadan*

<sup>1</sup> En betsabu inun en puibuun, Jesúsun nuku mekeawen taea benimanakanwen. En matu yuiyamadan, jabiaskadi en ana matu kenexunaidan, enadan bikamaki. Matu kenexunkinan, man jawen jiwenun medabewakin en matu axuaiin. <sup>2</sup> Ja juni yusinan meketikidi padananain ichakanikai daya pepa wanikapaikin matu yusinkin judiobu keska matu jiwanemanun ika ikanikiki, dateyamakain matun jina kubichi mextemanun ikadan. Matu jaska wanun ikaibu uindakanwen. <sup>3</sup> Jaska nun yunu kayabiabudan, nun nukuki, nun jabun Dios ken kayabi waibudan. Jesucriston ma nuku pewaxuniwen taexun Diosun Yushin Pepatun nuku kushipa wakin medabewaya jawada nukunmebi nukun yuda anua jina kubichi bemakisa nun mextemis keskawen nun kentidubumaki.

<sup>4</sup> Eadan, jaska shinanti dabanan emebi kein en yudakidi inun en jiweakidi dasibibu en binutiduki. <sup>5</sup> Diosun Abraham yununiwen taexun en kainshina 8 xabatian en jina kubichi ea mextenibuki. En Israelin baba betsa Benjamín xukua anua eadi en kainiki. Jaskawen taea en ibubu hebreoken eadi en hebreoki. Ja inun, jawen jancha Diosun Moisés yusini chibain dasibi betsabu binui en fariseo iniki. <sup>6</sup> Ja inun, Dios duawanun ixun Jesucristo ikunwainbu en jatu ichakajaidawayukubainiki, jaska dabanan en shinan en unanepaiwenan. Ja inun, Diosun Moisés yusini ikunwankin chibain jawa kaneama en pepajaidakunkainaya ekidi jawa chakabu tsuan yuitiduma inibuki.

<sup>7</sup> Na jaska tibi Moisin yusian chibainan, en jaki chiti ikadan, enadan, ewapa benuisma en shinaniki. Jakia natian Cristowen taeidan, en ana jawen teatidumaki. <sup>8</sup> Jaska tibi jayai en jawen kushipa biakunkaini natian en uianan, jamenki. Jesucristo en mekenan wakin en unainan, jawenadan, binujaidaki, en Xanen Ibu kayabidan. Jaskaken Cristowen taexun dasibi jamapai eanua chakabu en benu keyuniki. Jaska wakinan, en jiwea xeni chaka keska wakin jenetan janua jaki maei en jawen yudaniki, <sup>9</sup> jaki nukutan jaki dasidan. Jaska inun, Moisin jancha chibain jawen nuku ibubis nun pepajaidakunkainkatsis ikaiwen ea akama Cristo ewen nui eki nukutan ea shinan betsa wama en ikunwaniwen taexun Diosun jawena ea wakin en chakabu ea buaxuniken Jesús besti en chibankubainaii. <sup>10</sup> Jaskakin Cristo ana en unanjaidakatsis ikaiii. Jaska inun, jawen Epa Diosun mawabu ana bestenwanti kushipa en jayakatsis idiaii. Jaska inun, ana jaki dasijaidanun ika ja nuitapawanibu keska eadi dateama mei mawakin en chibankatsis ikaiii. <sup>11</sup> Chintuanma en jaskakunkainaya Jesúsun enabu jiweabu inun mawabu mai anua nai anu jatu iyunun ika juaya jatube dasikatsi en manakubainaii.

### *Jesús chibain pepakunkaini jaki nukutikiaki, na janchadan*

<sup>12</sup> Jesús besti chibankatsis ibiai en pepai keyudiamma inun en tapin keyudiamadiki. Jakia pepa besti en ikunkainxanun Jesucriston ea bechipaikin ea katuniwen taea jawen shinan chibain pepatan jaki nukukatsis iki jeneama manai en chintunkidanamaki. <sup>13</sup> En betsabu inun en puibuun, en pepai keyudiamabia jaska en jiwea xeni en ikunkaini jakimai chipu watan unudi en jiwekuinkatsis ikaiwen taea jadidi uinbaini bikabiaken ninkamas en chintuanmaki. <sup>14</sup> Jaska Jesucristowen nuku Diosun yubani jaska nai anua jaki nukukin jadia bixanun ika ninkamas Jesús en dayaxunkunkainaii.

<sup>15</sup> Tsuabunda nun ma ikunwan kayabai pepabunan, jaska shinanankanwen. En shinain keska tsuabunda jabias keska man jaska shinanmaken jaska ja jamapaikidi Diosun yusinkin matu uinmakin matu unanmatiduki. <sup>16</sup> Nun ma jaska tapinmabudan, jaskas shinankin betsa wama chibankubainkin jeneyamanankanwen.

### *Jesúswen taeidan, nukun mae kayabi nai anukiaki, na janchadan*

<sup>17</sup> En betsabu inun en puibuun, jaska ea inun ea medabewamisbu nun jiwekunkainkin nun matu uinmamis nukun aka nun jaskai jiwemis nuku shinankin chibankin nuku mawakubaikanwen. <sup>18</sup> Tsuabuda ichapa matube jiweabun jatun jiwea xeni jenekin betsa wakatsi ikama Cristo cruzki jatu mawaxuni shinanma jaki sinatai keska jiweabu jaskabukidi jawenchains en matu yuimiski. Natian jaska shinain kaxayabi ana jatukidi en matuki chaniaii. <sup>19</sup> Ja yudabu jaskabudan, nukun Dioskidi shinanma jabun diosdan, pikekin pi bestimisbudan, ja inun, jawen kenmisbudan, yudabu jawen dakebiaibun jabu dakeama jamapai chakabu na mai anua besti shinankin bechipaikin akubainmisbu janu badi jawen jeneaitian jabu benununbadikanikiki, Diosun jatu kupiadan. <sup>20</sup> Jakia nuku ikidan, nun jaskamaki. Nukun mae kayabi nai anuki. Jaska nun manakaibudan, nukun mekenika nukun Xanen Ibu Jesucristo ana juxanai nun manakakubainaii. <sup>21</sup> Janua juxun jabiaskadi kushipawen jamapai dasibi meke keyumistun nukun yuda babu atimapá betsa wakin benawaxanikiki, jawen yuda chaxa keska nuku wadiakinan.

**4**

<sup>1</sup> En betsabu inun en puibuun, en matu bechipaichakayamai inun, en matuwen nuiai inun, en matuwen benimaiwen inun, matuwen taexun Diosun ea manakua en bixanaiwen taea shinain en matu ana uin kakatsis ichakayamaiii. En matu jaska shinanyan chintuanma nukun Xanen Ibu chibapakekanwen.

*Ikunwainbu jaska shinainjiwetikidi Pablon jatu yununikiaki, na janchadan*

<sup>2</sup> Evodia inun Sintiqueen, nukun Xanen Ibu ikunwain man nukun puibu matuwen nuikin en matu shinaiin. Nukun Xanen Ibu ebe man dayax-unbiamis man yuananandabeai en matu ninkaidan, jaskama menan daenamedikanwen, en matu yunuaidan. <sup>3</sup> Jaska inun, Sízigoon, miadan, min chintuinsmawen taexun mia yununun ninkawe. Nukun pui dabe Evodia inun Sintique ea jatu medabewaxunxanwen, jau daenamenunbunan. Clemente inun medabenanika betsabu ja ainbu dabebetan Cristokidi kakape en yusianyan jabun ea putama ea medabewai bika tenediakubainibuki, jabudan, jatun kena tibi ja jiwekuinti unaki ma jatun kena Diosun jatu kenekin netanikidan.

<sup>4</sup> Nukun Xanen Ibu ikunwainan, benimadikanwen. Ana jabias en matu yuiai. Jeneama benimadikanwen! <sup>5</sup> Jau dasibibun matu unanunbun ikunwain pepabu ikubainkanwen, ma nukun Xanen Ibu jua kemaikikidan.

<sup>6</sup> Jaska inun, ana jamapaiwen dabanan iyamakanwen. Jakia Diosbe janchakin yukai inun kenwainan, min jamapai jakidi xabakabi yui chanikubainkanwen. Januxun Diosun matu ninkaxun axunken jawen duapa kenwankubainkanwen. <sup>7</sup> Man jaska waibu Diosun unanuma matu jiwmakin jaska tsuan shinankin ninkatidumawen Diosun jawen unanumawen matun juinti inun matun shinan mekekubainxanikiki, Jesucristo ninkakin man chibainwen taexunan.

<sup>8</sup> En betsabu inun en puibuun, kenekin en ma matu keyuxunai ea ninkaidakanwen. Eska tibi pepa shinankanwen. Dasibi jancha kayabi inun, dasibiwen pepa wai nun jaki mesetidu inun, dasibi nun kanetiduma inun, dasibi pepas inun, dasibi jawen nun shinan chankantidu inun, dasibibu tsuada jawen pepawen kenwanmisbu inun, jaska tibi jatukidi shinan kayabikubainkanwen, jaskakin Dios benimawakinan.

<sup>9</sup> En jancha ninkakin ea uinkin jawada man tapini inun en matu yusinkubainima jeneama chibankubainkanwen, man jaskaibu nukun Epa Dios unanumatun matu jeneama medabewapakexanikikidan.

*Filipos anuabu Pablon jatu kenwanikiaki, na janchadan*

<sup>10</sup> Badi betsation man ea medabewani keskai man ana ewen dabanan ikaya en Xanen Ibuwen en benimachakayamaiii. Jaskaken man ea jaki-makidi en shinanmaki. Jakia matun jawada man ea bumatiidubia natian en chaiken jaska waxun man jawaida ea medabewatidubumaki. <sup>11</sup> Jaska inun, na jaska matuki chanidan: “En nuitapaikidi ea medabewai bekanwen”, ixun en matu yuiamaki. Jakia jawada en jaya inun jawada en jayama shinain benimai jaska tibi mei en ma beyakunkainaiii. <sup>12</sup> Jaskai jiwtidana, ma en unaiin, nuitapai jiwei inun, nuitapama piti ichapaya jiwei inun, jamapai bika betsaa betsapa mei benimai inun, buni tenei inun, janu piti ichapa jayaken nun texewai inun jawa jayamaken en nuitapaidan, jaska en beyakunkainaiii, jawawen nui kemuamadan. <sup>13</sup> Januxun Criston ea kushipa waya jawen taexun dasibi tenexun en akin keyuxuntiduki. <sup>14</sup> En jaskabiaya matubunan, ewen nuikin en bika teneai ma ea medabewakubainidan, man ea jaska wayamadan, matukididan, peki.

<sup>15</sup> Janu matun mai pakea Macedonia anua kaxun Diosun kakape en matu yusinbaini ana mae betsa tibi anu en yusinkin taewakubainaya janua matu anua en kainkainaya ikunwainbu betsabun ea medabewabumabiaken man Filipos anuabun besti matun pei ea bumakin man ea medabewaniki, jaskai medabenanti en matu yusinma jaska en yusian chibankin jiwea en matu tapinmaima januxun jawen taexun matundi man ea medabewanibuki. <sup>16</sup> Eska ea wakinan, Tesalónica maewan anuxun en jatu yusianyan janu jawenchains man ea pei bumakubainibuki, jawen en jamapai tibi en binunan. <sup>17</sup> Jaskaken pei en matu ea akamabia man ea medabewamiswen taexun matun pepa Diosun jau matukidi ana shinanxanun jaska en matukidi shinaiin. <sup>18</sup> Epafrodito yunukin matun pei man ea bumaima dasibi en bimaki. Jawen en jamapai en paka keyubia texe en jayayuaki. Jaska inankuin ea yunukinan, Templo anuxun ininti pepa ininjaida kuakin Dios inanbu jaska xetei Dios benimamis keskai eadi matuwen en jabiaskadiaii. <sup>19</sup> Man ea medabewakin ea jawa yupawaismakenan, en Epa Dios pepajaidatun matu manakukin matun jamapai tibi matu inankubainikiki, jawen bake Jesucristowen taexun matu duajaidawakinan. <sup>20</sup> Jaskaken nukun Epa Dios pepajaida duawakin kenwanankanwen, jeneamadan. Jaskakidan.

<sup>21</sup> Ea en Pablonan, en matukidi pe shinankin man ma dasibi Jesucriston enabu medibiken en jancha en matu bumaii. Nukubetan Jesús ikunwainbu ebe jiweabundi matukidi shinankin jatun jancha pepa matu bumadiakanikiki. <sup>22</sup> Ja dikabi dasibi jabun Jesús ikunwainbu inun Roma xanen ibujaidatun jiwe anu dayaxunaibundi jatun jancha matu bumadiakanikiki, matu shinain matuwen nuikinan.

<sup>23</sup> Nukun Xanen Ibu Jesucriston jau matu duawakin shinan chankawankubainunwen.

Jatiski, en janchadan.  
Pablo

## COLOSAS ANUABU PABLON JATU KENE BUMANIKIAKI COLOSENSES

*Pablón jatukidi shinanikiaki, na janchadan*

<sup>1</sup> Ea en Pabloden, Diosun jawen shinanen Jesucriston jawen kushipaya ea wakin ea katuniwen taexun nukun betsa Timoteobetan <sup>2</sup> tsuabuda Colosas maewan anuabu Diosun jawenabu medibi matu wani man nukubetan Cristo ikunwain man chintuinsmaken jabetan en jancha en matu bumai uindakanwen. Nukun Epa Diosun jau matu unanuma jiwemakin duawakin jau matu shinan chankawankubainunwen.

*Jesucristo ikunwainbu Pablón jatu shinankin jatuwen taexun kenwankin  
Dios jatu ea axunkubainikiaki, na janchadan*

<sup>3</sup> Matukidi shinankin nukun Xanen Ibu Jesucriston Epa Diosbe janchakin matu yukaxunkin nun matukidi kenwankubainmiski. <sup>4</sup> Matukidia kaka juai en ninkamiski, man Jesucristo ikunwain nukubetan ikunwainbu betsa jatube bechipainamei man jatuwen nuimis ninkaidan. <sup>5</sup> Man jaskaidan, Jesucristokidi kakape chanima ninkatan benimakin matun jiwea nai anu Dios anu man jaya man manakaibu nun matu unaai. <sup>6</sup> Jaska inun, mai jidabi anuxun Diosun kakape jawen bakekidi ninkatan ikunwanbauni pakin yudabun jatu uinmabaunaibu keskai man ikaidan, chanima jabias jabiaskadi matu anudi taxniai man jayaniki, jaska Dios duapakidi janchaibu ninkai: "Chanimaki", itan man ikunwanibudan. <sup>7</sup> Man jaska ikaibudan, nukun jaibujaida Epafrasin nuku keska Criston tsuma nukube dayakin matu anuxun chintuanma matu nuku yusinxunkubainmis <sup>8</sup> jatun matukidia kaka bexun nuku yuikin jaska Yushin Pepatun matu medabewakin amai man bechipainamei nuaibu nukuki chanishinaki.

<sup>9</sup> Jaskawen taea man bechipainameaikidi ninkatan Diosbe janchakin nun matu yukakin jenexuinsmaki, Diosun jau jawen shinan xabakabi matu unanmakin jaskai unanepati tibi inun ninkati shada matu wamakin jawen Yushin Pepatun jau matu inanmakin unanmakubainunan. <sup>10</sup> Man jaska jabun nukun Xanen Ibu chibainbunan, jaskai jiwekin jaska bechipaiai benimawakin axunkubainkanwen. Jaskakin yuda betsabu uinmakin jawada daya pepa betsabu betsapa akin Dioskidi tapin unanepai ewakubainkanwen. <sup>11</sup> Jaska inun, eska en matu yukaxunmiski. Diosun jawen kushipa paepawen jau matu mestenwanunwen. Jaska kushipa man jayawen taexun jamapai bika tenebiai kushipatan jin jin ikama inun benimakin <sup>12</sup> Epa Dios kenwankubainkanwen. Jatun matu katunixun ikunwainbu dasibibube nuku mekekubainkin nai anuxun jawada nukuki tanani nuku inankuijan jawen xabaki peseten nun bixankanaii. <sup>13</sup> Uatian nun Dios unanma meshu chakabun nuku tsumabiaken Diosun nuku putamaniki, jawen bake ja bechipaiaitun jawen xanen anu nuku iyukinan. <sup>14</sup> Cristo mawakin Satanásan nuku tsumani jawena wakin nuku mebikinantan nukun chakabu nuku buaxuniki, ana shinanmadan.

*Cristo nuku mawaxuniwen taexun Diosun jawenabu jawen meketi wanikiaki, na janchadan*

<sup>15</sup> Dios tsuan uintidumabiaken Cristo ja itsa xabakabi uinkubainibuki. Jawa dasibi dami wadiama jawen bake kayabi bestichai jayaniki. <sup>16</sup> Cristowenan, Diosun dasibi nai anua inun mai anua nun uintidu inun

nun uintiduma yushin betsa betsapa kushipayabu inun paepabu Cristowen damiwanikiaki. Jaska damiwakinan, Cristowen taexun atan Diosun Cristo jawena wamaniki. <sup>17</sup> Jaska inun, jamapai betsa betsapa Diosun damiwadiama Cristo jiwepauniakiaki. Jawen taexun dasibi damiwanixun pewakin keyunixun jeneama mekekubainmiski. <sup>18</sup> Ja dikabi Cristo jawen jiweawen nukun Xanen Ibuxanun ika kushipai jawen buxkai nuku ixuniki, nun ikunwainbun jawen yuda nun iyanunbunan. Ja dukun jiweniwen taea mawamisbu kushipa binui ja dukun mawabu anua bestein taekin dasibi jatun dukun binu keyuniki. <sup>19</sup> Diosun jawen bake jaska wakinan, ja jawen kushipa inan keyukinan, jaki dasibi chiti iyukatsi anikiaki. <sup>20</sup> Jaska inun, Jesús cruzkia mawai jawen jimi nuku jabaxuniwen taexun nukun chakabu Diosun buaxun jakimakin nuku jakimawatan ana nukuki sinatakatsi ikama Dios nuku daewamakin jawen jaibuai nuku wamatana jiweabu mai jidabi anu inun nai anu Cristoki dasitan janus nuku xukuwakatsi Diosun jatu dasibi pewakin keyukin daewanikiaki, yudabu inun yudabumadan.

### *Criston Dios nuku daewamanikiaki, na janchadan*

<sup>21</sup> Matudan, uatian jawa unanma matun shinanen matun juintinin chakabu bechipaikin akidan, chajajaida jiwea keskaxun Dios man sinatamapau-nibuki. <sup>22</sup> Jamen natianan, Diosun bake Cristo ma juni jawen yudawen nuitkapatan matu mawaxunkin jawen mawawen Dios matu daewamaxuniki. Jaska matu wakinan, jawen besuudi jawa chakabuma inun jawa meshu tsamama inun tsua chakabu matuki chanitiduma matu nichinkatsi iki matu ixuniki. <sup>23</sup> Man jaskakatsi ikaidan, matu tibidan, Diosun kakapekidi ninkatan man ma Cristo ikunwani jenekin putai chintuanma junti mes-tentan jaska man ikunwainbu manakakubainkanwen. Jaska Diosun jawen bakekidi jawen kakape yudabu mai pakea ichapa anuabun jau unanunbun yusinkin ea en Pablon en jatu medabewakubaunmiski.

### *Pablon ikunwainbu uianmabia jatukidi nuikunkainikiaki, na janchadan*

<sup>24</sup> Natian matuwen taea nuitkapatan, en benimaii. Jau jawen taea nun bika tenekunkainxanun Criston nuku yunutan ja dukun chanima jawen yudawen ja ikunwanxanaibu medabewanun ika jatu bika tenexunkin jaskawen taea eadi ibubis en yudawen menei en ixundiaii, man ja ikun-wainbuwen taeandan. <sup>25</sup> Ja inun, Diosun janchadan, dasibi jiwebaunabu en jatu yuikubaunxanun ea katutan ea yununi jaskawen taea man Cristo ikun-wainbu matuwen nuikin en matu medabewakubainxanun Diosun jawen tsuma ea matu waxuniki. <sup>26</sup> Na jaska en matu yuiaidan, Diosun jawen kakape Cristokidi badi ichapajaida juneni yuda betsa betsapa badi betsatián jiwekubidanibu jatu yusianma junenixun natian jabu Cristowen Diosun medibi jatu waidan, Diosunan, ma xabakabi nuku uinmaikiki. <sup>27</sup> Tsuabuda man judiobuma Diosun jawen shinan duapa jaska bebunkidi Cristokidi yubakabiatan juneni ja xabakabi wakin matu unanmakatsis ikikiki, jau mai jidabi anuabun matundi man unanunbun jaska ja jawen shinan dasibikidi junenidan, jadan, Criston aniki. Jaska matundi man Cristo ikunwainwen taea man judiobumabia Cristo ma matuki dasiaki. Jaska inun, nai anu Diosun mae pepajaida anu Dios inun Cristobe matudi man jiwexanaii, man jaskakidi shinankin manakaibudan.

<sup>28</sup> Jaska Cristokidi matuki chanikin matu yusinkin nema pewakin dasibi matu unanepa wakin jaska Cristo be bun man pepa mapuxanunbun nun matu yusinmiski. <sup>29</sup> Na jaska matukidi dayaidan, Criston jawen kushipa ea inani en jawen dayachakayamaxunmiski.

**2**

<sup>1</sup> Man ikunwainbu Colosas anuabu inun jabu Laodicea anuabu inun dasibi betsabube nun uinanandiabumabia matuwen nui en dayachakayamamis man unanunbun ixun matu shinankin en matu yuiaii. <sup>2</sup> Jau man shinan chankain jenetima binunbun inun, jawa betsaa shinanma ikunwain betsabube ketaxamei nuinamei man bechipainamenunbun inun, unanepakin Diosun jawen yuba betsaa juneni Cristokidi natian jau xabakabi man ninka pejaidawanunbun en matu dayai jenexunamaki. <sup>3</sup> Eskaki, matu yuinun shinaindakanwen. Jawen unanepati pepa inun jawen tapinti dasibidan, Cristo anu jayaki, jaska Diosun jakidi junenidan. <sup>4</sup> Jaska matu yuikinan, jau ana tsuanda yusian betsawen ana matu padanyamanunbun Cristo besti unanepajaidakidi en jaska matu banabimaii. <sup>5</sup> Jaska inun, en yuda en matubemabia en shinan matu anuki. Man ma Cristo ikunwanixun jawen daya axunkin chibankubainkin man pewai man ma peken matuwen nui en benimaii.

*Cristokidi ikunwain shinan betsaa wanibukiaki, na janchadan*

<sup>6</sup> Jaskaken man ma Jesucristo ikunwankubainaibudan, matun Xanen Ibu Cristo jiwxenidan, jaska bechipaiai keska ixunkubainkanwen. <sup>7</sup> Jaska matu yusinmisbu chibankin badi tibi jeneama ana uke medan ikunjaidawakubainkin Cristokidi tapiin ewakainkin matu pepawaikidi Dios kenwankubainkanwen.

<sup>8</sup> Juni betsabun jatun yusian beya betsawen matu unanepa wapai matu jatu chibanmakatsis ikaibu jatun yusian pe itsa kayatapiamaki. Uindakanwen, tsuabunda Criston yusian danankin jakidi shinain janchaxunabumakidan. Jakia jabu ikidan, na mai anuxun yushin kushipabun yunuai chibankin yusian betsan ani jawen yusinanain kanenibu chibankin matu amakatsis ikubainkanikiki, jaska jabu yusinanankinan.

<sup>9</sup> Cristodan, Diosuna jasbia nukun yuda keskatan na mai anu uinti shadai taxnikidaniki. <sup>10</sup> Cristo ma man jaki dasitan ikunwainbudan, Cristona dasibi man jayaki, Diosun jawen kushipa jabiasdi inaniwen taeandan. Ja dikabi yushin dasibi inun, nai tsuma pepa inun chakabu dasibi inun, xanen ibubu mai anua xanen ibujaidakin jatu binu keyuaki. <sup>11</sup> Jamen, betsadan, Abraham Diosun yununi chibankin Dios unanmanun, iwanan, judiobun jatun juni bake kaian jatun jina kubichi mextemisbu keska wakin natian man judiobuman Cristo man ikunwainbu matu jaki dasiwakin matun jina kubichi mextea keska wakin matun shinan chakabu inun matun beya chakabu Diosun mextea keska wakin matu putamaniki, shinan betsaa wamakinan.

<sup>12</sup> Jaska inun, Cristo man ikunwanyan yuda betsabu jatu unanti wamai man nashinibudan, eska tibi jawen shinamatiki. Ninkaidakanwen. Nashimakin matu jenen bichiabudan, Cristobe matu mai wanibu keskaki. Januxun jene anua matu benibidankin taxnimakin kainmaibudan, Cristobe bestean keska wakin matu akawanibuki, jaska wakin Diosun jawen kushipawen Cristo bestewani ja kushipa man ikunwainwen matu imakinan. <sup>13</sup> Jamen uatian matu jiweadan, matun chakabu man jenediamawen taeandan, man mawa keska jiwenibuki. Jakia natian tsuabunda Cristo man ikunwainbu dasibi matun chakabu Cristowen matu buaxuniwen taexun Diosun Cristoki ma matu dasiwaran jawen taexun jawen jiwea kayabi matu inaniki. <sup>14</sup> Jaska wakin jawen yunua inun jawen nema Diosun nukubukidi mese wanixun jawen nukun chakabu tibi Diosun tanakin netankubainixun jawen taexun Diosun nuku kupidubiaken ja binumai Cristo cruzkia nuku mawaxunkin nukun chakabu mastakin nuku bepu keyuxuniki. <sup>15</sup> Cristo mawa Diosun ana bestewaniwen taexun jatu uinmakin Satanás inun jawen tsumabun

kushipa Diosun mebinmakin jatu maematan jatu dakewakin keyumaniki, yuda dasibi jabukidi xabakabi unanmakinan.

<sup>16</sup> Judiobu jatun beya tibi jayabuki. Jaska inun, jatun beya betsa chibankin piti dasibi pitidubumabia piti betsa besti pitidubuki. Jaska inun, jatun beya betsa chibankin jawen nuxuti betsa atidububia betsa atidubumaki. Jaska inun, jatun beya betsa chibain ichatan besi betsa betsapawen besimisbuki, uxe benatian inun juindukunti sábado tibitianan. Jaska tibi chibankin amisbunan, jau matukidi jaska shinain ja iyamakubainunbunwen. <sup>17</sup> Na beya betsa betsapa tibiwen jawen Cristokidi shinanmati besti ikubainibuki. Jakia Cristo ma juniken ja beya ana kushipa jayama jamenki. <sup>18</sup> Jaskaken tsuabuda pepa kayabitikidi shinain keinsbuma inun, tsuabunda nai tsumabu kenwanmisbu inun, jaskamabia uxu namai keskakin jawada taxnikidanai xabakabi uin jatun shinan medan kein shinan chankamisbuki. Jaskamisbun jau jabun matu chitekin dakewayamanunbun uindakubanxankanwen. <sup>19</sup> Ja jabu jaskamisbuden, Cristodan, jatun buxkamaki. Jamen nukubudan, nukun buxkadan, Cristoki. Jaskaken nukun yuda ewakaini pitiwen nun kushipamis keskadiai jabun nukun Xanen Ibu Cristo ikunwainbuden, pabu tibi jaki dasikin nun ewawaidan, jawada nun unandiamma tapinmakin jaska Dios yubakani Criston jaska shinankin nuku amaikiki.

### *Cristobe nun jiwxanaidan, junibun yunua keskamakiaki, na janchadan*

<sup>20</sup> Tsuabunda Cristo man ma ikunwainbuden, man ma Cristobe mawani keskabuki. Jaskawen taexun na mai anuxun xanen ibukin jatun kushipawen beya betsa betsapa yunuaibun ana jabun matu tsumatidubumaki. Jaskabia <sup>21</sup> jaskai ikunwanbumabe jiwxun jabun matu yunuai ninkakin man chibankin jenediabumamen, jabu keskakinan? <sup>21</sup> Jabun yunua eska chibankinan: “Ja meyamawe”, ikaibu inun: “Ja piyamawe”, ikaibu inun: “Ja min mekenen meyamawe”, imisbuden, <sup>22</sup> jaska tibi jatun yunuadian, junibun jaska shinankin jatu yusinmisbu besti akaibuden, ja mabu inun ja pitikidi matu yusinkin unanmakin tapinmaibuden, jawen jiwekubainaibu jawaida keyuxanikiki. <sup>23</sup> Ja jaska chanima keska wakin yusinanamisbuden, unanepakatsis ikin yusian bera bika ibubis yusinkin chibanjaidakin jatun jiwea pe mekekatsis ibiae tsuan jawen shinan chakabu nemakin jenetidumaki. Jaska akinan, jaska bechipaiaibu besti jatun shinanwen besti kushipakin yuikubainmisbuki.

## 3

<sup>1</sup> Cristo mawa bestenwantan Diosun jawen yusiudi tsau manixun jabe xanen ibu waiwen taexun matun shinan betsa watan man ma ikunwainbu man ma jabe besteni keskawen taea jawada naiudia Cristowen Diosun pepa benakubainkanwen. <sup>2-3</sup> Cristobe man ma mawani keskawen taexun matun jiwea Diosun nai anu matu mekexunaki, jadi Cristobe man jiwxenai anudan. Janua na mai anu man jawen jiwea mabukidi besti shinanma Diosun jaska bechipaimiskidi shinankubainkanwen. <sup>4</sup> Jaskawen taea Cristo xanen ibui benima paeya ana juaya matudi jabis kadiai man jabe benimachakayamaxanai. Cristodan, jabis matun jiwea kayabiki.

### *Cristoki dasikatsi jiwea bera katutikiaki, na janchadan*

<sup>5</sup> Jaskaken na mai anua matun kemudan, tenankin akawadikanwen, eska tibi Diosun nemani jeneidan. Ana ainbu betsa tibiwen kemuama inun, ana jamapai tibibe chutanamebaunama inun, jawada kemu atimapa betsa betsapa man akatsis ikai inun, ana pei inun mabu betsa ichawanun, iwanan,

yaushikin kenwanti betsa keska wakin pei inun mabuwen kemukin kenwanyamakubainkanwen. <sup>6</sup> Jakia jaska tibi chakabu aki man Dios ninkama sinatamamiski. Jawen taexun ja ninkaisbuma Diosun jatu kupijaidaxanaiwen taea <sup>7</sup> chakabu jabiaskadi matun jiwea xeniwen man abiapauni <sup>8</sup> natian ana jaska meama menan jawaida dasibi jene keyudikanwen, man eskamisdan, man sinatamisdan, man kemumisdan, man chakabu wamisdan, man xeti ikama kunyan imisdan, xedabiama man jancha chakabu yui xechakamisdan, <sup>9</sup> man chani chakamisdan. Natian jaska tibi man ma jeneamenkain, matun jiwea xenidan. Jaskaken ana jaska Diosun bechipa-  
iama chakabu tibi ayamakubainkanwen. <sup>10</sup> Tadi bena sawea keska wakin matun jiwea man ma benawaki. Matun jiwea ma benawaidan, jaska Diosun bechipaimis keska jiwxunbainkanwen, jatun matu damiwani keskaidan. Jaskakin ichapa man jakidi unanxanaii. <sup>11</sup> Man ma jaskadan, tsuabunda Cristo ikunwainbu jawenabukidi eska shinain man janchatidubumaki, griegonawabudan, judiobudan, jabun judiobun beya chibankin jabun jina kubichi mextemisbudan, jabun judiobun beya chibainsbumadan, nawa xukuabu tibidan, pubenbudan, jabun jabu dayaxunmisbudan, tsuan tsumamadan. Nun jaska betsa betsapabubia jaska shinain jatukidi janchayamakubainankanwen. Cristodan, dasibikidan, dasibibun xanen ibui keyuaki.

<sup>12</sup> Jaskaken Diosun matu bechipaikin jau jawenabu medibi tadi man inunbun matu katunikenan, matun shinan pepa kainmakinan, tadi bena sawea keska wakubainkanwen, yuda betsabuwen nuidan, pepaidan, babutan keanmadan, duapaidan, jin jin ikama manakaidan. <sup>13</sup> Jaska inun, tsuabunda matu chakabuwaya jawaida jaki sinatama tenetan medabenain jatun chakabu jakimatan ana jakidi shinanyamakubainkanwen, nukun Xanen Ibun matun chakabuwen Dios matuki sinatai buaxuni keska wakinan. <sup>14</sup> Jaskaken na yusian jaska tibi dasibi chibain bechipainamei jeneama inun putanameama pepai man jiwekubaintidubuki. <sup>15</sup> Jakia Criston unanuma matu jiwemayadan, ja matun juinti uke medan xanen ibu wamakanwen. Matu jaska wakatsi ikin Diosun ma matu katunixun jabias yuda matu wakatis ikikiki. Dasibi ma jatun matu axuni shinankin kenwankubainkanwen.

<sup>16</sup> Matubunan, Criston kakape jiwestikidi ichapa man ma tapianan, jeneama akubainkanwen. Eskaidan, jawen yusinanainan, jawen unanepakin betsabun kaneaibu jatu ja akin pewakubainkinan, matun juintin benimai shinan chankankin: “Peki”, ikin Dios kenwain Dioskidi nawati betsa betsapawen nawakubainkanwen. <sup>17</sup> Jawada tibi man akai inun man yuiaidan, nukun Xanen Ibun jaska bechipai keska jawen kushipawen akubainkanwen, nukun Epa Dios: “Peki”, akinan, man Cristonabunan.

### *Ikunwainbu kayabi jaskai jiwestikiaki, na janchadan*

<sup>18</sup> Beneyabuun, matu yununun ninkakanwen. Ikunwain man ma nukun Xanen Ibuki dasinibudan, matun benen jawadakidi matu jancha wai jawen jancha chibankin ninkasama axunkubainkanwen.

<sup>19</sup> Ainyanbuun, matudi yununun ninkakanwen. Matun ain bechipai jatuwen nuikin jatu ja akin bikawayamakubainkanwen.

<sup>20</sup> Bakebuun, matudi yununun ninkakanwen. Nukun Xanen Ibu benimawakinan, matun ibubun matu yusinkin nemai ninkakubainkanwen.

<sup>21</sup> Bakeyabuun, matudi yununun ninkakanwen. Matun bakebu tapinmakin jau matuki sinatayamanun bun yunuchakayamakin nemajaidaya-  
makubainkanwen.

<sup>22</sup> Esclavo dayadubuun, matudi yununun ninkakanwen. Matubunan, matun tsuma mai anuabu jatu duawakin matu uiainbu inun matu uianbumaken jaska bestiwakin jatu duawai shinanma jakia matun jointi pepawen jawada jatu axunkinan, nukun Xanen Ibu kushipaki mesekin jatu axunkubainkanwen. <sup>23</sup> Jawada daya tibi man jatu axuainan, chikishbetanan jatu axuanma nukun Xanen Ibu man duawai keska wakin jatu axunkubainkanwen, yudabu jatu uinmakin axuanmadan. <sup>24</sup> Ja inun, nukun Xanen Ibu Cristo matun yununika kayabitun matu yunua ninkakin man axunkin man benimawamisdan, ana matu manakukin ichapa matu binumakin jaska yubakani jiwekuian matu inanxanai man ma unaiin. <sup>25</sup> Jamen tsuabunda chakabuwamisdan, jatun chakabuwen Diosun jatu kupixanikiki, yuda betsa betsapabudan, ainbuabudan, junibudan, bakebudan, ibubudan, esclavo dayadudan, yununikabudan. Jaska waxanikiki, betsa binumamadan.

## 4

<sup>1</sup> Yununikabuun, matudi shinanmanun ninkakanwen. Nai anua matun Xanen Ibu yununika matudi man jayawen taexun matun esclavo dayadubu padanma jakia jatu duawakin piti inun tadi jatuki yaushiyamakubainkanwen.

### *Ikunwainbu jaskai jau jiwenunbun Pablón ana jatu yununikiaki, na janchadan*

<sup>2</sup> Man Cristo chibainbunan, jawada betsakidi man shinain Diosbe jan-chakinan, jawa chikishkin jeneama apakekanwen, jaskawen taexun Diosun matu axuan uinkin kenwain: “Peki”, ikunkainidan. <sup>3</sup> Jaska inun, nukukididi Dios nuku yukaxundiakanwen, jau nukun Xanen Ibu nuku medabewaya jakidi jawen kakape Cristokidi Diosun juneni xabakabi mae betsa betsapanu nun jatu yusinkin jatu unanmabaununbunan, na jaska jakidi ea nemakin bichikin akawanibu en niakididan. <sup>4</sup> Ja inun, jaska Diosun bechipaiai ean en jatu xabakabi Cristokidi unanmakin en jatu yusin kanun ea yukaxundikanwen.

<sup>5</sup> Jaskaken ikunwanbumabe man jiweadan, jatube medabenain pe jiwei unanepakin jatu duawadiakubainkanwen, Cristo man ikunwain jaska bestikidi janchakin jatu ikunwanmakinan. <sup>6</sup> Jaska inun, jatube janchai jancha duapa inun jancha pepa bestiwen janchakanwen, jaska yuda tibibun bika teneaibu jatu medabewakin jatu kemai janchai peidan.

### *Jatis jawen jenekin Pablón jatu kenexun yununikiaki, na janchadan*

<sup>7</sup> Nukubetan ikunwain nun jabe bechipainamemis Tíquico chintuanma nuku medabewakin nuku keskakin nukun Xanen Ibu dayaxunmistun ekidi kaka matu buxunkin yui kaikiki. <sup>8</sup> Jaskawen taexun matu anu en nichiaiin, nukukidi matuki chanikin jau matu benimawai kanunan, nun jaska jiweabukidi chanikinan. <sup>9</sup> Matun mae anuadi nukun betsa nun jabe bechipainamediamis chintuinsmadi Onésimo Tiquicobe kaikiki, jaska nenu Roma anuxun jaska shadabu nuku wabu nun jiweakidi ja dabe matuki chani bukanikikidan.

<sup>10</sup> Jaska inun, Aristarco ebe bichimabun jawen jancha matu bumadiakin yuikin: “Diosun jau matu duawakubainunwen”, matu waikiki. Bernabén chai Marcosin jabiaskadi jawen jancha matu bumadiaikiki. Marcoskidi en matu yuimaki. Jatianda matukidi bakin matu yusin kaya ikin pewatan duawaxankanwen. <sup>11</sup> Jesús jawen kena betsa Juston jawen jancha jabiaskadi matu bumaikiki. Jabu besti Israelin baban Dios dayaxunkin ea medabewakin duawakin ea shinan chankanwankanikiki. <sup>12</sup> Jaska inun, Jesucriston

tsuma betsa nukun jaibu Epafras matube jiwemisdan, matuwen nuikin matukidi shinankin Dios matu yukaxunkin jeneama ikunkanikiki, jau chakabuuma man jiwxun mestenan jaska Diosun bechipaai dasibi jaska shinain keska man axuin jiwekubainun bun matukidi shinainan. <sup>13</sup> Jaska nukun jaibu Epafras matu inun dasibi Laodicea maewan anuabu inun Hierápolis maewan anuabuwen nuijaidai en jawen jancha ninkamixun en matu yuiaii. <sup>14</sup> Juni danya Lucas nun jabe bechipainamemis inun Demasin jawen jancha matu bumadiakin yuikin: “Diosun jau matu shinan chankanwanunwen”, matu waikiki.

<sup>15</sup> Ja inun, nukun betsabu inun nukun puibu Laodicea maewan anuabu man ichamisdan, matu shinankin en jancha en matu bumaii. Ja dikabi nukun jaibu Ninfa inun jawen jiwe anu ichamisbube en janchadi en matu bumadiaii. <sup>16</sup> Na kene en matu bumai uinkin yuikin keyutan januxun Laodicea anu ichamisbudi jatu yunuxankanwen. Janua kene betsa Laodicea anu en jatudi bumai uintan matudi bemaibu matuna uiainbun jatunadi uinxankanwen. <sup>17</sup> Ja inun, Arquipo yuikin: “Nukun Xanen Ibu Jesucriston mia katuxun jawen daya mia yununi jawa kaneama jau pe dayaxunkunkainun”, ea yuixunxankanwen.

<sup>18</sup> Na kene keyukinan, en Pablon emebi en mekenen en jancha matu bumakin ma en keyuaii, jatun ea kenexunmistun akai mebintanan. Ea bichikin akawaxun ea nexayamabu ekidi shinankin jeneama Dios ea yukaxunkubainkanwen. Nukun Epa Diosun jau matu unanuma jiwemakin pe-wakin duwapakekubainunwen.

Jatiski, en janchadan.

Pablo

## TESALÓNICA ANUABU PABLON JA DUKUN JATU KENE BUMANIKIAKI 1 TESALONICENSES

*Pablon jatukidi shinanikiaki, na janchadan*

<sup>1</sup> En Pablon, en medabewanika Silvano inun Timoteobetan en matu kene bumai uindakanwen. Tesalónica mae anuxun man ikunwain nukun Epa Dios inun nukun Xanen Ibu Jesucristobe man ma dasia jatubeken Diosun jau matu duawakin unanuma matu jiwemakubainunwen.

*Tesalónica anuabun ikunwan pe jiweabuwen taexun Pablon jatukidi Dios kenwanikiaki, na janchadan*

<sup>2</sup> Matu dasibiwen taexun Dios kenwakin matu jakimama shinankin Dios nun matu yukaxunkubainaii. <sup>3</sup> Man eskai jiwea ikunwain Jesúski chiti itan, ikunwain betsabube medabenain bika tenebiai jawa chintuanma nukun Xanen Ibu Jesucristo man manaya nukun Epa Diosbe janchakin matu dayuixunkin matukidi shinankin nun jeneama ikunkainaii. <sup>4-5</sup> En betsabu inun en puibuun, matu anu kaxun Jesúsun kakape matu yusinkin nukun jancha bestiwenma Jesucristo datan akin nun matu amaimaki. Jakia Diosun kushipa matu uinmakin jawen Yushin Pepawen dami atimaska matu uinmakin ikunjaidawamakin jawen jancha pepa chanima kayabi keyutima unankin nun matu yusinmaki. Nuku ninkatan man ikunwainwen taexun janu Dios matuwen nuikin jawenabu matu wakatsis ikin matu katuni nun unaiin. Jaska matu anu nun pe jiweima inun jaska matu medabewa bestikin nun matu bikawama ikima matundi man unanjaidaii. <sup>6</sup> Chanima nuku nun ikai keskai inun nukun Xanen Ibu Jesús keskai matundi man nuku chibanyan matu ichakawakin matu nuitapawabiaibun Diosun Yushin Pepatun matu benimawakubainaya Diosun kakape man ikunwankubainimabuki. <sup>7</sup> Man jaskaya ja mai pakea dabe Macedonia inun Acaya anuxun Jesús ikunwanbaunaibun man ikai kaka ninkakin jaska Diosun nuku ji-wemakatsis ikai tapinkubaunimabuki. <sup>8</sup> Matun dukun ikunwankin nukun Xanen Ibun kaka pepa man chibankin jatu uinmaya Macedonia inun Acaya besti anuama jakia matumebidi Diosun jancha ma tapintan matundi man jatu yusianyan paai mae betsapa anuabun man jaska ikunwainbu jabun matu ninkakin keyubaunaibun nun ana jawa jatuki chanitidumaki, man ma jatu amayadan. <sup>9</sup> Ja inun, man jaskaimabukidi ja mae anuxun nukukidi chanikin chanima jaska man nuku duawaima chanimisbuki. Ja inun, damiwakin yushin itsa wabu man kenwanbiapauni ja jenetan Dios jiwea kayabi ikunwankin man duawakin taewaimaki. <sup>10</sup> Jaska bestikidi man shinanma jakia Diosun bake Jesús mawa ana bestenwani nai anua chintunkidan ana juxun nuku mekeaya jakia yudabu chakabumisbu Diosun jatu kupikin jau nuku meama iyanun, iwanan, unankin uinxanun ika man manakanaii.

## 2

*Tesalónica anua eskai Pablo jatube dayanikiaki, na janchadan*

<sup>1</sup> En betsabu inun en puibuun, matu anu yusin kai Jameen nun kama ikima man unaiin. <sup>2</sup> Ja inun, matu anu nun jikidi amaken Filipos anuxun nuku

ichakawakin nuku nuitkawaimabu man unandiaii. Nuku bika tenemabiai-bun Diosun nuku kushipa wakubaina jawen kakape nun matu yusinkubain-imaki. <sup>3</sup> Januxun matu yunukin yusinkin nun kaneama ikimaki. Ja inun, chakabuwakin nun matu jawa padanma idiaimaki. <sup>4</sup> Jakia Diosun nuku unanti watan yuikin: “Juni pepabuki”, itan shinankin jau jawen kakape nun yuikubainxanun nuku yununi nun matu yui janchakunkainaii. Diosun besti nukun juinti unanmiswen taexun Dios besti nun benimawakatsis ikaii, yudabu benimawatiwen nuiamadan. <sup>5</sup> Jaska wakin jancha jawendua bestiwen jau jawen man nuku kenwanunbun nun matu padanma ikima man unaiin. Ja inun, matu padantan pei binun, iwanan, nun matu yusianma ikima Diosun unandiaikiki. <sup>6</sup> Ja inun, Jesúsun kushipayakin nun matu yunutidubia matu inun yuda betsabu jau nuku xanen ibu wakin kenwanunbun nun jadi yunukin matu jancha wama ikimaki. <sup>7</sup> Jakia ewabun jawen bakebu pe mekekin pimamis keska wakin matube jiwxexun matuwen nuikin unanxubida yusinkin nun matu mextanmakubainimaki. <sup>8</sup> Jaska wakin matu bechipaikin Diosun kakape yusin benimai matuwen nuijaidai kaxakatsis iki jaska shinain en matu mawaxunkeanimaki. Jaskawen taea ana jabias matukidi shinankin matu medabewanun, iwanan, jamapai betsai nun matu axunkatsis ikaii.

<sup>9</sup> En betsabu inun en puibuun, Diosun kakape matu yusin kaxun matun piti pikin matu bika wakin nun matu chikish wakatsi ikama badidi inun meshu medan dayajaidai yumankin nukun dayawen taexun nukun piti nun bikubainima man unaiin.

<sup>10</sup> Jaska man ikunwainbube jiwea pepakunkainkin jawa kaneama nun matu jawa chakabuwama ikunkainima Epa Diosbetan man unaiin. <sup>11-12</sup> Nun matu eska wani man unandiaii. Bestibu tibi matu benimawakin nun matu pewakubainidan, jaska epabun jatun bakebun chakabuwai nemamis keska wakin man Dios jiwxexunkin jaska bechipaiai keska matudi man inunbun nun matu yunua matun chakabu unantan man jenekubainimaki. Jaska Diosun jawen mae kayabi pepa anu matu jiwmakatsi ikai ma bebunkidi matu kenani jaskakidi nun matu medabewakubainimaki.

<sup>13</sup> Jaska wakin Diosun kakape nun matu yusinma ninkakin junibun yusian keska man shinanma jakia Diosun jancha besti chibankin shinankin man ikunwanyan jawen janchawen taexun Diosun matu shinan betsai wamakubainimaki. Diosun matu jaska waimawen taexun nun matu Dios kenwanxunkubainaii. <sup>14</sup> Jamen betsadan, Jesúswen taea en betsabu inun en puibuun, Judea anuxun judiobun jawenabun Jesús ikunwainbu jatu ichakawabu Diosun bake Jesucristo ikunwain yumanibu keskai jabiaskadi wakin matunabundi matu ichakawabu matudi man nuitkawaimabuki. <sup>15-16</sup> Ja judiobudan, ja dukun jatun xenipabu betsabun Diosun jancha yuixunikabu betsabu u unuatian jatu tenankubidanixun januxun jabiabun bababundi nukun Xanen Ibu Jesús tenandianixun nukudi ichakawakatsis ikin nuku kainmakin jaska Diosun bechipaiai axuanma nuku putakubainimabuki. Januxun Diosun judiobumadi jatu shinankin jabudi mekekatsi janu jatu anu nuku yunuima nun matube janchaya judiobun nuku nemapaikin judiobu inun judiobuma jatube dasitan jatu nukuki sinatamakubainkanikiki. Jaska wakin jatun chakabu betsai betsapa ana matsankin ichawakubainaibuwen taexun samama jatu kupichakayamakatsi Diosun jatu manakaki.

### *Tesalónica anu Pablo ana bai kakatsi inikiaki, na janchadan*

<sup>17</sup> En betsabu inun en puibuun, matu anuxun nuku bika tenemabu nun juima uxe ichapama matu shinankin manui matu ana uin kanun, iwanan, Dios matu yukaxunkin nun matu shinankubainaii. <sup>18</sup> Jaskakunkaini nun

matuki ana bai kakatsi ikaya en Pablo en yubakabiakunkainaya Satanásan ea bextenun ixun nuku nemaimaki. <sup>19</sup> Nun jaskakunkainkin nun matu yusintanima shinan betsama ikunwan bestikin betsabu ikai keskama jatu binui man jawa chintuanmawen taea janu kupiaitian nukun Xanen Ibu Jesús ja nun manaka juaya nukun benima pae matuwen taexun tsuan nuku mebintiduma nun unaiin. Jaskai nun benimaya matuwen taexun Diosun nuku kenwanxanikiki. <sup>20</sup> Matuwen taexun Diosun jawen kushipawen nuku duawakin nuku benimawaikiki.

### 3

#### *Timoteon jau jatu uintanun Pablon yununikiaki, na janchadan*

<sup>1</sup> Matuwen nuijaidakin matukidi unankatsis ikin ana nun tenetidumawen taea Atenas maewan anuxun ea inun Silvano manakai jiweyuxun <sup>2</sup> nukun betsya Timoteo nukubetan Cristokidi kakape yusinmis matu anu nun nichinmaki, jau matu shinan chankanwankin jau matu ana kushipa wai kanunan. <sup>3</sup> Ja inun, jabun nuku ichakawabiaibun Diosun nuku jatube jiwemai man unainwen taea jamapai bika shadabu mei yumanbiai jawa dateyamakanwen. <sup>4</sup> Jaskaken Jesús ikunwandiabuman nuku ichakawaibu nun yumanxanaikidi matu yusin kaimaxun bebunkidi nun matu yuikubainimaki. Na eskatian jaska nun matu yuima keska uinkin man ma tenekin meaui. <sup>5</sup> Matukidia kaka ninkakatsis ibiai tsua yukatima matu shinain: “Satanásan jatu padan ma chintunshinabumenkain ika datei Jameen nun jatu yusinmamenkain”, ikin ean en ana manatiduma matu anu Timoteo en nichinmaki, jaskamen man ikunwankubainai jau nukuki chanikin nuku banabimayuxanunan.

<sup>6</sup> Jakia man ikunwain chintuanbuma inun man bechipainamei jeneama Tesalónica anua jaska kaka Timoteon ninkatanshinxun nuku yuia ninkai jaska nun matuwen nuiai keskadiai matundi nuku ana beisnun ika man nukukidi shinain matu uintani jushinxun nuku yuikin benimawashinaki. <sup>7</sup> Jaskaken en betsabu inun en puibuun, nuku bika tenemakin yumanwanbiaibun ja shinanma man Jesús ikunwain chintuanbumaken jaska matu ninkatan jawa ana matuwen dateama nun shinan chankaiin. <sup>8</sup> Jakia nukun Xanen Ibu ikunwain man chintuanmawen taea nun ana jawa punu nukama matuwen benimai nun jiweaui. <sup>9-10</sup> Janua nukubu matuki ana bai kaxun ana matu yusinkin kushipa wakin jaska nun matu yusin keyudiamat u yusin kakatsis ikin meshu medan inun badidi nun matu Dios yukaxunkubainai. Man jaskakin ikunwain chintuanbumawen taexun man nuku benimawaya jaska waxun matuwen taexun Dios nun kenwankin keyutidumaki.

#### *Pablo Diosbe janchakin dayuikubainikiaki, na janchadan*

<sup>11</sup> Jaskaken nukun Epa Dios inun nukun Xanen Ibu Jesúsun nuku medabewakin jau matu anu nuku nichinkin nuku yunuxanunbunwen, nun matu uin kanunan. <sup>12</sup> Ja inun, nukun Xanen Ibu jau matu ana ewawakin bechipainamemakin nui ichapa matu inankubainunwen. Matu jaska wa jayatan ikunwain betsabuwen nuikunkainai keskaidan. <sup>13</sup> Jaskawen taea nukun Xanen Ibu Jesúsun matu shinan mestenwankin matun jamapai chakabu bextenixun man jawenabu jawa chakabu matukidi metutidubuma man jiweken jatianda nukun Xanen Ibu jawen tsumabube ana juaitian nukun Epa Dios be bun man nia jau matu uinxanun jaska matukidi en shinaiin. Jaskakidan.

## 4

*Eskai jiwekin Dios benimawatidubu Pablon yununikiaki, na janchadan*

<sup>1-2</sup> En betsabu inun en puibuun, Jesúsun nuku yununi jawen yusian nun matu yusintanima man unainwen taexun kenewendi nun ana matu kenexunai uindakanwen. Jaska badi tibi Dios man benimawatidu nun matu yusinkubainima man akai keska wakin ana jabiasdi jeneama akubainx-ankanwen, iwanan, nun matu ana yunuaii. <sup>3</sup> Jaskaken Diosun matu pepa besti wanun, iwanan, matu yunukin: “Ainbu min ainmawen kemuama inun, juni min benemawen kemuama jaska ja dabe man jaya jatun ainbe besti jau chutanamekubainunbunwen”, iwanan, shinamiski, Diosunan. <sup>4-5</sup> Jaska inun, Dioskidi unanma inun ikunwanbuman ainbuai bu tibiwen kemukin chutabaunmisbu keska iyamakubainkanwen. Jakia Jesús ikunwain ainyankatsis ikin xabakabi Dios uinmai pe jiwenun ika jabe biakanantan nuitapawama jatun mabu mekei jau pe besti ikubainunbunwen, jatun ainbe menamei chutanameidan. <sup>6</sup> Januxun bebunkidi nemakin jaska nun matu yuima ana ninkaidakanwen. Tsuabunda juni betsa padankin jawen ain mekin jatu ichakawaibu Diosun jatu kupixanikiki. <sup>7</sup> Jakia nun jaska chakabui atimapakunkainmis Diosun bechipaismaki. Jaskawen taea nun pepa bestikubainunbun jawenabu wakin Diosun nuku katuniki. <sup>8</sup> Januxun tsuabunda na yusian danankin junin yusian dananma jakia Diosun jawen Yushin Pepa matu inanmis danankanikiki.

<sup>9-10</sup> Ja inun: “Jesús matubetan ikunwainbu jatube bechipainamei jatuwen nuikubainkanwen”, akin Diosun ibubis matu yusinkin yunuima tapin-maxun man akai Macedonia mai pakeanuxun ikunwain dasibibun man jatube jaskaiwen taexun jawa ana betsa maewama nui bechipainame chakayamakunkaini bextekeama ipakekanwen. Man jaskakunkainaiwen taexun ana jaskakidi nun matu kenexuntidumaki. <sup>11-12</sup> Jakia jaska nun matu yusinkin nun matu uinmatanima man nuitapaibukidi shinanma chikishama ea iki daketapama matun mekenen dayakunkainkin matun jamapai bikubainkin unanuma jiwekin jatu yuanmayamakanwen, man jaskaibu ikunwanbuman matukidi pe uinkin jawa chakabuuma jau shinanunbunan.

*Jesús ana juidan, eskakidanxanikiaki, na janchadan*

<sup>13</sup> En betsabu inun en puibuun, Jesús ikunwain betsa mawaya man punu nukayamaxanunbun matu yusinun ea ninkakanwen. Jesús ikunwain mawai jabun Jesús ikunwanma keskabumaki. Jaskawen taea kaxai bis ichakayamai: “Ana jiweamaki”, iwanan, shinankin yuiyamakubainkanwen. <sup>14</sup> Jakia nukudan, nun ana jaskakidi shinanmaki. Jesús mawa Diosun ana bestenwani nun ikunwaiin. Jaska wani ikunwain nukudi nun mawa Jesús bestenwani keska watan ja juaitiandi Diosun nukudi bestenwantan Jesúsbe nuku iyuxanai nun unaiin.

<sup>15</sup> Na eska matu yuikin jaska nukun Xanen Ibun nuku yusini matu yusinun ninkakanwen. Jesús ana juaya jaki nukui nun ikunwain jiweabu nuku dukun nun bebuama ixanaii. <sup>16</sup> Jakia Dios nai anua sai ikin jawen nai tsuma xanen ibu yunua jatun dasibibu ichawaya Diosun trompeta jawen nai tsuman chan chan akaya nai anua nukun mekenan Cristo butui xaba puchinin niken Cristo ikunwain mawanibu jabu dukun Diosun ana bestenwantan <sup>17</sup> nuku nun jiweabudi jatube Diosun nuku ainiaya nai kuin medan Jesúski nukutan nun jabe jiwepakexanaii, ikibi ikidan. <sup>18</sup> Jaskawen taea na yusian jancha ninkai ana jawa dateama shinan chankain jatube benimanamedikubainkanwen.

## 5

<sup>1-2</sup> En betsabu inun en puibuun, badi jawen jeneai anu nukun Xanen Ibu juxanai tsuabunda manama shinanma juni yumetsu meshu medan jawaida jumis keskai Jesús jawaidakidanxanai man ma unanyan jatianda juxanai nun ana jadidi yuikin matu kenexunamaki, man ma tapinkenan. <sup>3</sup> Jaskaken ana jawaki yudabu dateama yuikin: "Unanuma jiwei jawaki mesei dateama jiwekubainankanwen", ikubaini ana jawaki mesei dateabu-maken Jesús ana niti ikama jawaidakidan jatu kupixanikiki, ainbu bake kainun ika isin bedukutan ana maianma kainmis keskaidan. <sup>4</sup> Jamen en betsabu inun en puibuun, matudan, man ma unanepabuki, tsuanda kakape tapinkin ikunwankatsi ikabuma keskamadan. Jatianda nukun Xanen Ibu jui jaskakidanxanikidi ana matu yuinun ninkakanwen. Juni yumetsunun ika jawaida jatianda tsuan unanmaken jumis keskai nukun Xanen Ibu bebunkidi tsua yuiama jawaidakidan taxnixanikiki. Jaskaya jabun ikunwankatsi isbuma meshu medan jiweabu keska teku iki: "Jabaa!" ixankanikiki. Jakia jabun ikunwainbu jawa dateama ixankanikiki, nun ja manakamis juayadan. <sup>5</sup> Jaskawen taeadan, matudan, dasibibun Jesús man ikunwain man ma xabaki pesea keskabuki. Jakia nukubudan, nun meshu anua keskabumaki. <sup>6</sup> Nun jaskawen taeadan, yuda betsabu jawa unanma uxamisbu keskama chikishyamakubainankanwen. Jakia ibubis mekekin pe besti shinankin jaska Jesúsun mia bechipaiai keskai chibankin manakubainkanwen. <sup>7</sup> Jamen, ja meshu medan keska jiweabudan, uxabu inun paenmisbu keskabuki, jawada ixanai unanbuma inun jatiandi Cristo ana juxanai shinanbumadan. <sup>8</sup> Jakia nukubudan, nun ma meshua anua xabaki taxnia keskabu nun ikunwankin pewakubainmiswen taea nukun Xanen Ibu ana juxanai jawa jakimama manakubainankanwen. Nun jabubetan ikunwain betsabube duapai bechipainamei medabenankin nukun Epa Dios ja bestiki chiti ikubainankanwen. Nun jaskaibudan, romano soldadobun jawen yuda junenun, iwanan, mane tadi manankidia sawemis keskai jawaki dateama nun pe mekea jiwtidubuki. Jaskai jawa dateama nukun Xanen Ibu manakin jatun besti nuku mekexanai nun manaii. Jaskakin jau soldadobu tsuan jatu deteyamanun bun jatun buxka mekekin junekin mane maiti sawemisbu keskai nukudi dateama pe mekea nun jiwtidubuki. <sup>9-10</sup> Chanima nukuwen taea Jesucristo nuku mawaxuniwen taexun Diosun nuku jawen kupikatsi ikama nun jiweabu inun nun mawabu nukun Xanen Ibu Jesucristowen nuku meketan nuku jabe jiwemaxanai nun unaiin. <sup>11</sup> Jaskawen taea ana Jesús ikunwankubaini jeneama betsabube benimai kushipanamekubainkanwen, man ma ikunkainmis keskai jeneamadan.

*Jaskai ikunwainbun shinain jiwenunbun Pablon jatu yununikiaki, na janchadan*

<sup>12-13</sup> En betsabu inun en puibuun, matu medabewanikabun matu medabewakin nukun Xanen Ibun daya akin jaska man kaneaibu matu pewakin yusiainbu jatukidi pechiama jatu shinankin bechipaikin duawadiakubainkanwen, jatun daya pepawen taexunan. Ja inun, matubetan ikunwainbube unanuma jiwekubainkanwen. <sup>14</sup> En betsabu inun en puibuun, nun ana matu yunuai ninkaidakanwen. Dayama chikishaibu jatu yusin pewakin jatu ja akubainkanwen. Ja inun, jatunmebi jawada chakabuwatan kasmai ninkatan bextekei babuaibu jatu medabewakubaindiakanwen. Ja inun, betsabun dama ikunwain juinti xubu jeneama jatu medabewakubaindiakanwen. Ja inun, yudabu jiwe chakabu jaskaida jatuki sinatama unanxubida jatu tapinmakubainkanwen. <sup>15</sup> Ja inun, yuda betsan matu chak-

abuwaibu ana jatube manakunama man pepakatsis ikaidan, jaska chakabu juai tenetan pepakin ikunwain betsabube medabenankin man akai keska wakin mai jidabi anuabu yudabu axundiakin jatu medabewakubainkanwen. <sup>16</sup> Jaskakubaini benimai jeneyamakubainkanwen. <sup>17</sup> Jamapai tibikidi jawaida shinantan Diosbe janchakubainkanwen. <sup>18</sup> Jawada tibi man jaya inun man jayama jaska Diosun matu unainwen taexun ja besti kenwankubainkanwen, man jaskaibu Diosun matu bechipaikiki, man Jesucristo ikunwainbuwen taexunan. <sup>19</sup> Tsuabuda Diosun Yushin Pepatun medabewa jawen kushipawen dayaibu nematimaki. <sup>20</sup> Jaska inun, Yushin Pepatun Dios janchaxunika wakin yusinmai dananyamakubainkanwen. <sup>21</sup> Tsuabunda yuikin: “Diosun jancha en matu yusiaiin”, ikin jatu yusiaiinbu jaska Diosun jancha kayabi yusinmenkain unanti wakin ninkakubainkanwen. Diosun jancha yusin pe waya unantan ikunwankin ja yusian man chibantidubuki. <sup>22</sup> Jamapai chakabu shadabu danankubainkanwen, ninkamadan.

<sup>23</sup> Nukun Xanen Ibu Jesucristo juaitian dasibibu man tsua chakabuuma Dios jamebi unanuma jiweatun matu medibi pepajaidawakin matun jamapai chakabu putamakin matu mekekubainkatsi matun shinan inun matu yushin inun matun yuda jawa chakabuma jau matu pe bestiwakubainunwen. <sup>24</sup> Jaska wakin Diosun matu katunixun jenebainama matu pepawakin menexunxanikiki.

<sup>25</sup> En betsabu inun en puibuun, jau nukudi medabewanun nuku jakimama Dios nuku yukaxunkubainkanwen. <sup>26</sup> Ja inun, ikunwain beaibu matun betsakayabi keska wakin jatu ikin beyawakubainxankanwen, benimawakinan. <sup>27</sup> Jaskaken nukun Xanen Ibun ea kushipa waniwen taexun matu yununun ikunwainbu dasibibu ichati tibi anuxun na kene en matu bumakin yunuai xabakabi jatu yuixunkubainkanwen. <sup>28</sup> Man jatu jaska waya nukun Xanen Ibu Jesucriston jau matu dasibi duawakubainunwen.

Jatiski, en janchadan. *Pablo*

## TESALÓNICA ANUABU PABLON JA KACHU JATU KENE BUMANIKIAKI 2 TESALONICENSES

*Pablon jatukidi shinanikiaki, na janchadan*

<sup>1-2</sup> En Pablon, en medabewanika Silvano inun Timoteobetan en ana matu kene bumai windakanwen. Tesalónica maewan anuxun man ikunwainbu nukun Epa Dios inun nukun Xanen Ibu Jesucristobe man dasiken Diosun matu duawakin jawama unanuma jau matu jiwemakubainunwen.

*Jesucristo ikunwainbu Pablon jatu shinankin kenwankin Dios jatu yukax-unkubainikiaki, na janchadan*

<sup>3</sup> En betsabu inun en puibuun, chanima matun shinanen Jesús ikunjaidawai man ma yumei kushipai en matu unaiin. Jaskakin ana jeneama ikunwain betsabube kushipai nui jenenameyamakubainxankanwen. Man jaskaya matukidi shinankin Dios matu yukaxunkin matuwen nun Dios kenwankubainaii, jaska nuku yunuayadan. <sup>4</sup> Janua matu ichakawakin yumanwanbiaibun ikunwain kushipai man jawa chintuanma ikunkainaya jaska shinankin janu ikunwain ichamisbu tibi anuxun benimai nun matukidi chanii nun janchakunkainaii. <sup>5</sup> Bika tenei man jaskaya Dios kaneismatun yuda dasibibu unankin matun pepawen matu unanti watan matukidi pe shinanyan janu Dios xanen ibumis anu jabe man jiwenun matu jikimaxanai nun unaiin.

<sup>6-8</sup> Jamen jabun Diosun jancha tapinkin Dioskidi shinankatsi ikama inun Xanen Ibu Jesúsun jancha chibankatsi ikabuma jatu manakukin kupinun ika jui nai anua chi jede nakua Jesús jawen nai tsuma kushipabuya jabube taxnikidan jatu kupi juxanikiki. Na jaska bika tenemakin nuku nuitapawaibudan, jaska Diosun matu jatu bika tenemaidan, jawen dateyamakanwen. Jaska wakin jabun matu nuitapawamisbu jatu bextetan matu inun nuku ichakawamisbu binumakin nuku juindunkunmakin unanuma nuku jiemaxanikiki. <sup>9</sup> Jamen nuku jaska wamisbuwen taexun jabu kupikin nuitapawadiakin ikibi imakin jawen kushipa paewen benukin inun jawen chaxa pepa jawendua jatu uinmakatsi ikama ja bebunga chajaida jatu putaxanikiki. <sup>10</sup> Jaskaken jawada nukun Xanen Ibukidi nun matu yusin chanitanima man ikunwainwen taexun jatianda nukun Xanen Ibu janu juaitian dasibi mai jidabi anuxun nun ikunwanbaunaibun chanima uintan duawakin nun kenwanxankanaii.

<sup>11</sup> Jaskawen taea Diosbe janchakin matukidi yukakin nun jeneismaki. Diosun matu kenakin katunixun pepabu matu wakatsis ikaikidi matu yukaxunkinan, man ikunwainwen taexun jawen kushipawen jamapai pepa akin betsabube medabenamei man jiwekubainunbun en matu ea axunkubainaii. <sup>12</sup> Jaska en matukidi Dios yukaxunmiswen taexun matu uinkin nukun Xanen Ibu Jesús dasibibun kenwanxankanikiki. Man jaska waibu Jesúsun matu duawakin matu kenwandiananikiki, jaska nukun Epa Dios inun nukun Xanen Ibu Jesucriston nuku bechipaikin jaska shinankubainmisdan.

## 2

*Jesús ana juxanaikidi Pablon xabakabi jatu yusinikiaki, na janchadan*

<sup>1</sup> En betsabu inun en puibuun, badi jawen jenei keyuaitian dasibibun nuku ichawanun ika nukun Xanen Ibu Jesucristo nai anua ana chintunkidan

jua nun jabe ichaxankanaikidi matu yuinun ninkakanwen, <sup>2</sup> eska taxnixa-anaikidi bebunkidi nun matu ana xabakabi yusiainan. Tsuanda Yushin Pepatun yuia keska shinankin: “Nukun Xanen Ibu Jesús ma juaki”, ikin matu padainbu inun, yusian betsa tapintan: “Jesús june ma juimakiaki”, ikaibu inun, nukuki padana en kene keska buxun matu yuikin: “Pablo eska chanikiki, Jesús ma juimakiaki”, ikin man jaska tapisma ibiaimaken matu padankin yuia akeakeaibu ninkatan e iki juinti metexeketan matun shinan jawaida maewai jatuwen dateyamaxankanwen. <sup>3-5</sup> Ja inun, matube jiwxun jawada en matu yusintanimadan, man ma daki jakimai ikai matu ana yuinun ninkakanwen. Dios ikunwainbu ichapabun Dios danain chintuain-bun Jesús juxanai ma kemaya juni chakabu kushipa bebunkidi ja dukun jux-anikiki, ja juni chakabun ibudan, jau Diosun kupiti tenechakayamaxanun Diosun ma jaki tanaxun pewanidan. Ja Dioski sinatamistun Diosun yunuti inun jawen nemati danankin jamapai tibi kenwakin chibainbu nemanun, iwanan, jamapai dami shadabu kenwanmisbu jatu binukin maematan jamebi kein janua Templo Jerusalén anu tsauxun yuikin: “Eadan, en Dioski”, ixanikiki. Jaskawen taexun jau matu padanyamaxanunbun jatu jawa ninkamayamaxankanwen. <sup>6</sup> Ja juni chakabu jawen yuba idiamaken natian kainmayuama tsuanda nemayukubainai man unain. <sup>7</sup> Ja juni chakabu Satanásan kainmaxanaidan, ma june yubakai dayaikiki, yudabu padankin chakabu ewawaiidan. Jaskabiaya jatun nemakubainmisxun jenea janua ana nemamaken taxnixanikiki. <sup>8</sup> Janua ja juni chakabu taxniken nukun Xanen Ibu Jesús dasibi jawen chaxa kushipaya jukidan ja juni chakabun kushipa mebinkin paismawatan jawen jaxpawen xuun akin kupikin tenanxanikiki. <sup>9</sup> Ja juni chakabu jawen xanen ibu Satanásan kushipa wakin medabewaya dami atimaska betsa betsapa wakin yudabu padanxanikiki. <sup>10</sup> Jabun Diosun kakape Jesúswen mekekatsi iki bechipainameama dananankin chanima jan-cha danainbu ja juni chakabunan, chakabu atimapa betsa betsapawen jatu padanyan jaska uintan chibainbu <sup>11</sup> jaskawen taexun Diosun chani yushin jatu padanmaya jaska chani jancha kenwainbu <sup>12</sup> atimas janu kupiaitian ja jancha chanima danankin chakabu besti bechipaibu Diosun jatu jawen kupixanikiki.

*Jawenabu wanun, iwanan, bebunkidi Diosun jatu katunikiaki, na jan-chadan*

<sup>13</sup> En betsabu inun en puibuun, Dios matuwen nuikin matu bechipaikin bebunkidijaida matu katuniwen taexun chanima jawen paxati man bix-anai jawen Yushin Pepatun matu medabewai kai ma matukidi pewaniken chanima man ikunwanyan jaskawen taexun matu medibi waniki. Man jaskaken Dios nun matukidi pe kenwanxunkubainai. <sup>14</sup> Kakapekidi datan akin nun matu yusianyan Diosun matu ikunwanmaniki, jau nukun Xanen Ibu Jesucriston kushipaki dasitan man jawenabu ikunkainxanunbunan.

<sup>15</sup> Jaskawen taea en betsabu inun en puibuun, matu jaska wakin katuniken nukun yusian beya bena jadi matun mae anu kaxun ibubis nun matu yusintanima inun nukun kenewen nun matu yusiainan, jakimama chibankubainkanwen. <sup>16-17</sup> Januxun nukun Xanen Ibu Jesucristo jamebi inun nukun Epa Dios nukuwen nuikin bechipaikin nuku duawakin nuku shinan chankawan niti ikama nai anu nun jatube jiwxanai manakamakin nuku yubaniki. Janua mestenwantan matun juinti shinan chankawankin matu kushipa wai jeneama jamapai yuikin man akai pepas jau matu amakubainunbunwen.

## 3

*Nukun dayakidi Dios nuku yukaxunkubainkanwen, jatu wanikiaki, na janchadan*

<sup>1</sup> En betsabu inun en puibuun, nun ma matu kene keyuxunai uindakanwen. Jesúskidi kakape ninkaxun man shinan betsa waima keska wakin nanta manibaunabundi jabundi Jesúskidi kakape ninkatan jau jawaida shinan betsa watan Dios kenwandianunbun nun jatu yusinkubaunaya Diosbe janchakin kushipa nuku yukaxunkubainkanwen. <sup>2</sup> Ja inun, dasibibun Jesú ikunwanbumawen taexun yuda betsa chakabubu inun dakeisbuman chakabuwakubainkin nuku ichakawaibu jau nuku nemaxunun Dios nuku ea axunkanwen. <sup>3</sup> Jaska wakin Satanásan matu kanemakatsis ikaya nukun Xanen Ibu nuku jakimaismatun nuku xununbainama matu kushipa wakin mekekin chakabu matu binumakubainxanikiki. <sup>4</sup> Ja inun, nukun Xanen Ibube nun jabe dasitan matu yusintanima jawa jeneama chibankin man jabias akubainxanai jaskakidi nun matu ikunwaiin. <sup>5</sup> Epa Dios nukuwen nuimis keskai betsabube man nuinameaidan, jaska Criston bika tenei jawen kushipa babuama ini keskai matudi man babuyamanunbun jau nukun Xanen Ibun matu medabewakubainunwen.

*Chikishbu tapinmatikiaki, na janchadan*

<sup>6</sup> En betsabu inun en puibuun, nukun Xanen Ibu Jesucriston nuku yunumiswen taexun nun matudi yunuai, ninkakanwen. “Nukubetan Jesú ikunwankatsi ibiai tsuada nun yusiain chibanma inun beya bena nun matu yusinma danankin akabumadan, ana jatukidi shinanyamakubainkanwen”, jatu dakewakinan. <sup>7-8</sup> Jamen eadan, matube jiweyuxun jawa tidumakin matu daketapawama tsuabunda piti nun jamen pianma ikimaki. Jaskakin nukun jamapai ibubis bi badidi inun meshu medan dayachakayamai yumankin nun matu bikawama ikimaki. Matube jiweyuxun nun matu uinmaima keska ikubainkanwen, tsua jameen ea iki daketapamadan. <sup>9</sup> Ja inun, nun Jesúsun kushipayabun matu yusinkubainkin jawen taexun matun piti nun yukatidubia nukun piti inun nukun tadi jawen biti man nuku dibibiaken nun matu jawa yukama ikimaki. Jakia ibubis mekenen dayai jaska nun jiweyemis keskai matundi nuku chibain man jiwekubainxanunbun nun matu uinmaimaki. <sup>10</sup> Jaska matu yusin kainmaxun matu yunukin: “Tsuabuda dayakatsi ikama chikishaibudan, jau jatu pimayamadianunbunwen”, iwanan, nun matu yusinmaki. <sup>11</sup> Jakia matukidia chani juai nun ninkashinadan, jatididan, man chikish dayama jawawakatsi ikama kaka betsa betsapa besti ninkatan betsabu yui man yuananan bestikubainkaniki-aki. <sup>12</sup> Jaskaken nukun Xanen Ibu Jesucriston kushipawen nun matu yunuaii. Yudabu chikishbu yunukin tapinmakin: “Jaska besti jiweyemis jau tadi medibi jatun daya tapintan ana yuda betsabu xetukin yuanmama jau jatun piti inun jatun mabu jau ibubis bikubainunbunwen”, iwanan, matundi man jatu yununun nun matu yunudiaii.

<sup>13</sup> En betsabu inun en puibuun, jawada daya pepa aki man jawen jiweyemis akidan, punu nukai jin ikin jeneyamakanwen. <sup>14</sup> Ja inun, nukun jancha nun matu bumai jatidibun ninkakin tapinkatsi ikama jatun chakabu unain jau dakenunbun ana jatube mapuyamakubainkanwen. <sup>15</sup> Jakia jatuki sinatama min betsabube min ikai keskakin jatu jancha chakabuwama jatu yusinkin nema bestikubainkanwen.

<sup>16</sup> Nukun Xanen Ibun jamebi jawenabu unanuma jiweyemis jiwemakubainmistun matudi unanuma jiweyemis jiwemakin jawada badi tibi betsa betsapa man akai jau matu uindakubainunwen.

<sup>17</sup> Ea Pablon, en jancha matu bumakin jaska ibubis en mekenen kenekin en keyumis keska wakin en matu axuaiin, en tsumapan ana ea axuanmakenan. <sup>18</sup> Jaskaken nukun Xanen Ibu Jesucriston jau unanuma jawama matu duawakubainunwen.

Jatiski, en janchadan.

Pablo

## TIMOTEO PABLON JA DUKUN KENE BUMANIKIAKI 1 TIMOTEO

### *Pablon Timoteokidi shinanikiaki, na janchadan*

<sup>1</sup> Ea en Pabloden, Dios nukun mekenika inun Jesucristo jawen yubakani-wen nun jiwxanai nun manaitun Jesucriston kushipaya ea waxun ea yununibuki. <sup>2</sup> Timoteoon, en mia kene bumai windawe, min Jesucristo ikunwainwen taea min en bake kayabi keskakidan. Nukun Epa Dios inun nukun Xanen Ibu Jesucristo miwen nuikin jau mia unanuma jiwemakin pewakin duawapakekubainunbunwen.

### *Yusian pepadan, chakabube jusitimakiaki, na janchadan*

<sup>3</sup> Macedonia mai pakea anu kakin Efeso anuxun min jatu pewakin min jatu medabewayunun en mia bashibidanima keska jabias en mia ana yunuaii. Tsuabunda ja jatun yusinanbun jatun shinan medibis jau jatu yusinchakayamanunbun jatu nemakin pewawe. <sup>4</sup> Tsuabunda jatun xenipabu jiwenibu tanakubainaibu inun jatun xenipabun beya jawendua keska jatu yusin chakaibu jau ninkayamanunbunwen, ja miyuidan, jamenkidan. Jaska yuimisbube janchanamei jau jamenyamanunbunwen. Jaska Dio-sun bechipaiai jawa jatu amakin medabewatidubumaki. Jakia Jesucristo ikunwankin besti jaska Dios yubakani bechipaikin ikunwain besti man jiwtetidubuki.

<sup>5</sup> Na jaskakidi shinankin en mia yunuaidan, tsuabuda jatun juinti detsisma pepawen shinankin dakeama Jesucristo ikun kayabi waibu jau jatuwen nui nun jabube bechipainamekubainunbun jaskabu besti ikunwainbu chanima jatu yusinkubainwen. <sup>6</sup> Jaska tibi besti yui ja iki inun jamen jancha chakabu chibain yusian pepa chibanma kanekanikiki, jatun shinan jusitan benuidan. <sup>7</sup> Jabudan, yusian kayabi unanmabia Moisin keneniwen yusinanana-paikin jatunmebi yuibiai jabun ibubis ninka pewama inun yusin pewai keska shinain: “En pe jatu yusiaiin”, ikin yuimisbuki.

<sup>8</sup> Jaska Diosun shinankin Moisés kenemanidan, tsuabunda jaska jawen shinan chibankin nun akaidan, jaska pe nun unankanaii. <sup>9</sup> Jidabibun shinanankanwen, jaska nemati tibi yununi inun yunumisbu jayadan. Jaska tibi kenekinan, pepabukidi tanakin akabumaki. Jakia eskawen taexun anibu keyuismaki, jatun xanen ibu ninkabiakin jawen jancha chibainsbuma inun, chakabu tibi akin Dios sinatamamisbu inun, Dioski kaxekin jawen kenwan-tiki meseisbuma inun, jawen epa kasmai jawen ewa jaki pubenkin tenainbu inun, yuda betsaki sinatakin tenanmisbu inun, <sup>10</sup> chutabaunmisbu inun, juni dabe chutanamemisbu inun, ainbu dabe chutanameaibu inun, yuda betsabu yumetsuxun jawen pei bikatsi dayadu wakin inanmisbu inun, chani chakamisbu inun, jamen uianmabia yuda betsaki yubakatan padananmis-budan, jaskabunaki, jaska jabun yusian kayabi chibainsbumadan. <sup>11</sup> Na nemati tibi jayawen Diosun kaka pepa jawen bakekidi Dios duapajaidatun ea yusintan jaska en chanikunkaunun ea yununiki.

### *Pablowen nuikin Diosun katunikiaki, na janchadan*

<sup>12</sup> Nukun Xanen Ibu Jesucriston ekidi pe shinankin en chintuntiduma shinankin ea duawakin jawen daya ea yuniwen taexun chanima jatun ea kushipa wa en kenwankubainaii. <sup>13</sup> Ja dukunan, Jesucristokidi chak-abu yui jaki xechakakin ja ikunwainbu danankin en jatu ichakawayuniki.

Jaskati dabanan Jesucristo en ikunwandiamma jaska en shinain inun jaska en akubainai Dios en benimawai dabanan en ibiaya ja en kaneaiwen taea Dios ewen nuichakayamaniki. <sup>14</sup> Nukun Yavé Dios ja besti nuikipajaidakin ea duawa chakayamakin jawen shinanwen en shinan ea betsa wamatan Jesucristo en ichakawabiaya ja ikunwainbuwen ea jatuwen nultiwaniki, Jesucristowen taexunan.

<sup>15</sup> Na jaskadan, chanima kayabiki, tsuabunda ikunwantidubudan. Chanima Jesucristo mai anu taxnidan, chakabu wamisbu jau Diosun jatu kupyamaxanun jatun chakabu buatan jatu mekenun ika juniki. Jamen eanan, chakabu wakin yuda dasibibu en binujaidaniki. <sup>16</sup> Ea en jaskabiaken Dios ewen dabanan ikin ea kupikatsi ikama jau Jesucristo ewen nuikin ea medabewakin jin jin ikin jawaida shinanbauns aismadan, ea uinmani jaska tsuabunda ea shinankin ewen taexun jabundi ea uinkin Jesucristo ikunwankin jiwea kayabi bixankanikiki. <sup>17</sup> Janua Dios nun uintidumabia ja bestitun nuku mekei xanen ibujaidakunkaini niti ikama jiwestistun dasibi damiwanji jeneama jau dasibibun kenwankubainunbunwen. Jaskakidan.

<sup>18-19</sup> Timoteoon, ebetan Jesucristo dayaxuni min en bake keskaki. Ea ninkawe. Jesucristo ikunwain jaki dakeama chakabu nemakin chanima jancha min jatu yusinpakenun Diosun jatu yunua Jesucristo ikunwainbu yusinan mekenikabun mia katunibuki. Jabiaskadi shinankin eandi en mia yunuaii, min kaneama ixanai unainan. Jakia yuda betsabu jatiditun Jesucristo ikunwankin taewabianixun chakabu metan ma chintuanbuki, januxun kupixanai anu buidan. <sup>20</sup> Ja inun, Himeneo inun Alejandron jabiaskadi jatun jiweawen jatun yusian kanekin yusinchakaibu jau ja dabe ikunwainbube ana ichayamanunbun en jatu nemaimaki. Jabun shinain keska Satanásan jau jatu amanun en jatu jaska nemaimaki, ja Dioskidi chakabu yuiaibu ja ibubis keneaibun Diosun jatun shinan betsa watidu jau unanxanunbunan.

## 2

### *Diosbe janchatikidi yusinikiaki, na janchadan*

<sup>1</sup> Eska dukunkidi jatu yusinkubainwen. Yudabu betsa betsapabu Diosun jau jatu medabewakubainun Diosbe janchakin jatu yukaxunkin betsabukidi jatu ea axunkin janchakin jatukidi Dios kenwankubainkanwen. <sup>2</sup> Diosun yusian pepa chibain unanuma benimai jiweyukubainunbun xanen ibubu inun yununikabu jaska tibikidi jatu yukaxunkubainankanwen, jau Diosun nukukidi jatu pe shinannmanunan. <sup>3</sup> Jaska nun jatukidi shinankin jatu yukaxunaikan, jadan, peki, nukun mekenika Diosun jaska bechipaimiskenan. <sup>4</sup> Jatunan, jakidi jawen kakape chanima dasibibun unankin jau ikunwain mekexanunbun Diosun bechipaikiki. <sup>5</sup> Jaskawen taea eska Dios jawen shinan jayaki. Diosdan, bestichaiki. Janua nuku itsa jabe janchaxunmisdan, bestichaidiki, ja Jesucristodan, Dios nuku daewaxuni janchaxunmisdan. <sup>6</sup> Cristo tsuabunda ikunwainbu Diosun jatun chakabu buaxunxanaiwen taea Jesucristo jamebi mawakin jabun ikunwanxanaibu jatu mekeniki. Jaskaken na jabiatian Diosun yununi tsuabuda jakidi chanibauntidubuki.

<sup>7</sup> Jaskawen taexun Diosun ea katutan jawen kakape yuixunika ea wakin Jesucriston kushipaya ea watan judiobuma anu na yusian Jesucristokidi chanima en ja ikunwain en chanikauanun ea yununiki. Na jaska mia yuikinan, chani chakakin en mia yuiamaki.

### *Ainbun jatun yuda dauamisbukidi jatu nemanikiaki, na janchadan*

<sup>8</sup> Jaska inun, betsadan, janixunda ikunwainbun Dios kenwanun ika icha junibu jau mexantan Diosbe janchakubainunbunwen. Jaskai Diosbe janchai jaska bestiama jaska Diosun bechipaiai benimawai besti jiwei jawa tsuki sinatama tsua ja akama jau pe besti medibi jiwekin jatu uinmakubainunbunwen. <sup>9</sup> Ja inun, jabiaskadiai ainbuaiibun ikunwain mapuadian, jawenduaxun junibu kemumama inun jatun yudaki bachi jawen kemumati jatu shinainbu jau saweyamanunbunwen. Bu chunpia inun mane ichapa inun bachi kadujaida jaska bestiwen jau jawenduayamakubainunbunwen. <sup>10</sup> Jakia ainbuaiibun Dios ikunwain benimawakinan, jaska bechipaiai nixun dayaxunkin jatu medabewakin pepa besti aki jawen dawa itsai jau jawenduakubainunbunwen. <sup>11</sup> Januxun Diosun jancha yuiaibu anu buadan, jau pes bestixun yusiaiinbu jau jatu ninkakubainunbunwen. <sup>12-14</sup> Ja dukun damiwakin taewakinan, Adán Diosun damiwaniki. Ja kachu jawen ain Eva damiwadianiki. Adán Satanásan padanun, iwanan, yuiama jakia jawen ain Eva padankin ja dukun chakabuwamaniki. Jaskawen taexun xanen ibukin ainbuaiibun yunutiduma inun junibu yusintidubuma en jatu nemamiski, jau pesxun ninka bestikubainunbunan. <sup>15</sup> Jakia ainbuaiibun Jesucristo ikunwain pe jiwei betsabuwen nui duanamekin jaska Diosun bechipaiai axuin medibikin chibankubainaibudan, tsuanda bake bitan jatuwen nuikin pe yumewakubainmisbudan, Diosun ja ainbuaiibun mekekubainxanikiki.

### 3

<sup>1</sup> Na janchadan, chanima jabiaskaki.

#### *Jatun mekenikai uinikabuidan, eska itikiaki, na janchadan*

Jadatubunda Jesucristo ikunwainbu jatun mekenikakatsis ikidan, daya pepa akatsi ikaibudan, jaskadan, peki. <sup>2</sup> Na eska yunua daya bidan, jau eska tibi ikubainunbunwen. Duapa jakidi chakabu yuisbuma inun, ainyankatsi ikin ainbu bitan jeneisma betsawen kemuisma inun, jawen jancha kayabi binumakin kaneama pe shinankin akubainmisbu inun, jaki kaxeisbuma inun, bai mapuabu jatu itan jatu uxanmisbu inun, yusinanain pekunkainmisbu itidubuki. <sup>3</sup> Ja dikabi eska tibi meama shinanmisbudan, paeankidi shinainsbuma inun, detenamekatsi ikin shinainsbuma inun, mabu inun peiwen kemuisbuma inun, duapakatsis iki pepamisbu itidubuki. <sup>4</sup> Ja inun, jawen jiwe anu jatube jiweabu jatu meke pewaxun jatu pimakin pewamisbu inun jawen bakebu jau jaska jiwenunbun jatu yunua chibain jawa chakabu mekin tsua bikawaisbuma itidubuki. <sup>5</sup> Tsuanda jabe jiweabu jatu meke pewaismatunan, ikunwainbu Diosun enabu jaska waxun jatu pe meketidubumadiki. <sup>6</sup> Ja inun, mekenika katukin dama ikunwankin taewabainai jawaida uintan katuyamakubainwen. Jamen dama ikunwain man jaska katua: “Ea besti en pejaidaki”, iki keanyan Diosun Satanás putani keska wakin jaskadi wakin jatu putadiatiduki. <sup>7</sup> Ja inun, ikunwanbuman ja juni pepa jawen shinan unantan jakidi pe shinanmisbu besti uinkubainkin mekenika katutiki, Satanásan padankin jatu achia jawaida kanekin jau jatu uinmachayamaxanunan.

#### *Medabewanikabu katukinan eskabu atikiaki, na janchadan*

<sup>8</sup> Jabiaskadi wakin medabewanikabu katukinan, eskadi akubainkanwen. Junibun jakidi pe shinain jaki kaxeisbuma inun, jawada yubaka bestitan kaneisbuma inun, paeinsbuma inun, jatu bepadantaran pei inun jatun mabu ibubis binumatan ichawaisbuma jau ikubainunbunwen. <sup>9</sup> Ja inun, Diosun yununi jawen baken kakape chanima unanjaidai jaskawen jiwekainkin ikunwain jatun shinan pepaya jau ikubainunbunwen. <sup>10</sup> Ja dukun jatun

jiwea pemenkain ixun uinkubainkin jakidi jawa chakabu kaianmabumaken unantan medabewanika dayanika katutidubuki. <sup>11</sup> Jabiaskadi wakin ain-buaibudi medabewanika katukatsis ikinan, jakidi pe shinain jaki kaxeis-buma inun, jatun chani tuekin jatu ninkamaisma inun, patapai kaxeis-buma inun, dasibi jawen pepa jatu uinmakubainmisdan, jaska keskabu besti akubainkanwen, katukinan. <sup>12</sup> Medabewanika junidan, ainbu bitan bake watan jabetan yumewai jabe putanameisbuma inun, jawen jiwe anu jawen bakebu inun jatube jiweabu jatu meke pewaxun jatu pimakin pe-wamisbu jau jaska ikubain unbunwen. <sup>13</sup> Janua medabewanikabu pepakin Jesucristo dayaxunkinan, betsabu uinmai jawa chakabu amaken jabun ken-wantidubuki. Janua Jesucristo ikunwainwen taea benimai unanuma ji-wekubaintidubuki.

### *Chanimajanchaabakabi ja ikunwain eskatikiaki, na janchadan*

<sup>14</sup> En jawaida samama mia uin kakatsis ibiai jaskabia en mia kenex-unyuai. <sup>15</sup> En yane katiduma shinankinan, jaskai Dios jiweatun enabun chanima jancha Jesucristokidi jatun matu tsuma unankin chanima jancha besti shinain jawen nemakanain jaskai jiwei jau mekei penunbun jaskakidi min jatu yusinun bebunkidi en mia kene bumaii. <sup>16</sup> Dasibi Jesucristo nun ikunwainwen Diosun nuku duawai nun unan keyutidumabia chanima xabakabi jaska wani jaska shinain tsuabuda jaskakidi yui nun jawen ja itidubumaki. Jakia jawen bake ikunwankin Dios nun benimawatiduki. Eskaki, mia yuinun ninkawe:

Cristo juidan, junin yuda bitan taxniniki.

Cristodan, jawa chakabu jayama pepa bestiki, iwanan,

Diosun Yushin Pepatun jawen jiweakidi yuiniki.

Bestenkaina Diosun nai tsumabundi uindiakubainibuki.

Ja inun, nawa betsabu betsapa anuxun

Jesúsun tsumabun kakape jakidi yusinkuba unaibun

ichapabun ikunwain bun Diosun nai anu ana jawendi ainitan

xanen ibu wani nun unaiin.

## 4

### *Jesucristo ikunwain betsabu chintunxanaibukidi yusiankiaki, na janchadan*

<sup>1</sup> Jesucristo ana jua kemaya jaskai jabun ikunwain betsabu chintuin bebunkidi jaskanunbadiaibukidi Diosun Yushin Pepatun xabakabi nuku unanmai mia yuinun ninkawe. Jabun Jesucristo chibankin jenetan yushin chakabu padananainbu inun Satanásan tsumabun jatun yusian jabu anua juai ninkatan chibanxankanikiki. <sup>2</sup> Ja yudabu bepadamenikabu inun chanichakanikabun jabu jawaki dakeisbuma jabun jatun yusian chibanxankanikiki. <sup>3</sup> Ja junibun yusianan, ainyain inun beneyatikidi inun piti betsabu tibikidi piaibu nemamisbuki. Jakia Diosun piti shadabu damiwani tsuabunda jabun Cristo ikunwain bun chanima unankin Dios kenwantan pitidububiaken ja piti betsakidi jatu nemamisbu jabun mesewakin yusianbu ninkakin chibanxankanikiki. <sup>4</sup> Jamapai piti shadabu Diosun damiwatan: “Peki”, aniki. Jaskawen taexun jawada Diosun nuku inan bixun pikinan, dananma kenwantan jau pikubain unbunwen. <sup>5</sup> Jaska piti tibi Diosun jawen janchawen yuikin pewani shinankin jabe janchaxun nun piadan, ma dasibi nuku pewaxunkubainmiski.

**6** Na jaska jancha kayabi en mia yuiaidan, nukun betsabu inun nukun puibun ikunwainbu jabiaskadi jatu yusinkubainwen. Jaskakin jawen ikunwanti jancha min jaya inun yusian pepa min chibain ana jawen juinti kushipakunkaini Jesucriston tsuma pepa min ikunkainxanaii.

**7** Jakia jabu patapaibu inun ikunwanbuman miyui jawama yuiaibu ninkai jatu anu nashui ikama ikunkainwen. Jamen mia ikidan, jaska Diosun mia jiwemakatsis ikai pepai mimebi min shinanen mekei yudabu uinmai jiwekunkainwen. **8** Junin jawen yuda kushipa wai pebiaken Dios jiweakidi yubakani jancha unankin chibankin jawen juinti kushipa waidan, ja binua pejaidaki, natian nun jiwea inun chipu uatian Diosbe nun jiwxexanai nun manakaidan. **9** Ja jancha chanimaki, dasibibun ninkakin ikunwantidubudan. **10** Jaskawen taea dayakin Dios jiweatun yuda betsabu medabewakatsis ibiaya tsuabunda jawen bake Jesucristo ikunwainbu besti jatu mekekubainxanaiwen taea nun jabe jiwxexanai manakakin jabias jawen jancha nun yusianyan nuku ichakawabiabu jatu ikunwanmanun ika nun dayakunkainaii.

**11** Jabiaskadi en mia yuiai yunukin jatu yusinkubainwen. **12** Min bedunan juni ewadiamabiatun min jatu yusiain jau mia dananyamanun bun pe bestikunkainwen. Ja inun, min jancha pe taxnimakin duapai jatuwen nuikin Jesucriston yusian ikunjaidawakin min ikunwain jatu uinmawe, jau jaskadiakin yuda betsan ikunwantan jiwediakubainun bun ikunwainbu jatu yusinkubainwen. **13** Nenua en mia anu jikidiamaken nukun betsabu inun nukun puibu Éfeso anuxun ikunwainbu ichabu Diosun jancha jatu yuixunkin benimawakin jatun juinti kushipa wakin jatu pe besti yusinkin jeneyamawe. **14** Ja inun, min mae anuxun Jesucristonabu mekenikabun mia mamepixun Dios mia yukaxunabu jawen Yushin Pepa mia yunua mia kushipa wanidan, unanumas jamakidi janchama jaska Diosun mia medabewani jakidi besti janchai dayakunkainwen, kaneamadan.

**15** Jaskai mimebi ana unanepai shinan pepakunkaini dasibibun jau mia uinun bun daya betsabu akama min kushipa jidabiwen jatu yusinkubainwen.

**16** Mimebi pe mekekin uindawe, jaska betsabu min jatu yusiankidan. Dasibi shinan pe bestiwai chintunyamakunkainwen. Min jaskakunkainaya mia inun min jancha jabun ninkaibu jatube Diosun pewen mia manakuxanikiki, jiwe kayabimakinan.

## 5

### *Ikunwainbu betsabu betsapakidi medabewakin shinantikiaki, na janchadan*

**1** Kaneaibu pewakin jatu ja ayamakubainwen. Jakia anibu inun mestebun kaneaya min epa keska wakin jatu medabewakin jancha kushipawen jatu bekunyan akama jatu pewen shinanmakubainwen. Bedunan inun juni ewan kaneaya min betsabu keska wakin medabewakin jatu pewakubainwen. **2** Yuxabun kaneaya min ewa keska wakin jatu medabewakin pe-wakubainwen. Chipash inun ainbu ewandi kaneaya min puibu keska wakin medabewakin jatu pewakubainwen, jatuwen kemuamadan. Jaska wakin dasibibu jatu medabewakubainwen.

**3** Ainbu ewa beneyabiani ana bene jayabuman Jesucristo ikunwainbu chanima nuitapa kayabiaya jawenabu jayamaken Jesucristonabun duawakin jau jatu medabewakubainun bun wen. **4** Jakia beneyabiani nuitapaibu jatun bakebu inun jatun bababu jayadan, jabun dukun jau jatu medabewakin jawen tapinkubainun bun wen, jatunabu kayabibunan. Jaska jatunabu medabewakin jatuwen nuikinan, Dios benimawakin shinan

chankanwantidubuki. <sup>5</sup> Ainbu ewa beneyabianibun Jesucristo ikunwain jawenabu jayama Diosun jau jatu medabewanun jaska manakakin badidi inun meshu medan Dios kenwankin jabe janchakin jawen piti inun jawen mabukidi yukamisbuki. <sup>6</sup> Jakia ainbu ewa beneyabiani betsabun Diosun jancha shinanma patapakin jawada akatsi ikai amisbudan, jiwebia jawen yushin ma mawaki. Jaskawen taea Dios jatuki sinataikiki. <sup>7</sup> Jaskaken jau ikunwanbuman jatukidi chakabu yuiyamanun bun ikunwainbu yusinkin jau jatunabu medabewakubainun bun jatu yunukubainwen, jatu shinanmakinan. <sup>8</sup> Jaskaken tsuabunda jawenabuskidi shinankin jatuwen nuikin medabewama Jesucristo ikunwanbiai danankanikiki. Jatunabuwen nuikin medabewamawen taeidan, jabun ikunwanbuman shinan betsya waisma keska jabun ikunwanbiai shinan jayama nuima chakabuki.

<sup>9</sup> Jabun ikunwain yuxabu 60 badiya unudi kai beneyatan betsawen kemukin jeneama ipauni enauma ikunwainbun medabewatidudan, eska atiki. <sup>10</sup> Jatun bakebu ma pe yumewani inun, bai beaibu jatun jiwetan itan Jesucristonabu betsabu duawakin beya wakin jatun tae juchupaunibu natian jadi nuitapaya medabewakin pe besti dayakunkainiwen taexun Jesucristonabun ja pepabu besti jatukidi shinankin jau medabewakubainun bunwen. <sup>11</sup> Jaska inun, ainbuai bu beneyabia jawen benen jeneima kasmai mawaimaken yuxabudiamadan, jau ikunwainbun jaska shadabu jau jatu tanatan medabewayamakubainun bunwen, Jesucristo dayaxunkatsi yubakabiaima jakimatan juniwen kemui ana beneyakatsis itidubukidan. <sup>12</sup> Janua ana beneyama ikunwainbu medabewai jatube dayakatsi yubakabiaima ibubis shinan betsatan ja yubakaima ana shinanma kanei chakabuaya Dios jatuki sinatituduki. <sup>13</sup> Jaska inun, yuxabudiamma jatun piti inun jatun mabu inankin man jatu medabewaiwen taea jaska besti bi ana dayakatsi ikama jiwe tibi anu besti jikikunkauni chikish pikutidubuki. Ja chikish pikuimadan, jaska bestiamma jiwe betsya tibi anu tsauxun jatubetan chani yui inun betsabuki chanichakakin jaska chani yui beyatidubuki, jaskai chakabui pikuidan. <sup>14</sup> Ikunwanbuman jau nukuki kaxeyamanun bun ainbu beneyabiaima ma jawen bene mawa kasmai jenebainima yuxabudiabumadan, jau ana beneyakubainun bunwen. Jaskatan bake bitan jatun jiwe medanua pe dayakin jau jatu duawakubainun bunwen. <sup>15</sup> Uinwen. Jatidi ainbu yuxabudiamma beneyabiani ana beneumaken jatu medabewabiabu ana Jesucristo chibankatsi ikama Satanásan jaska bechipaiai chibainbu uinkin eska en mia yunuaii.

<sup>16</sup> Januxun yuxabu beneuma nuitapai enayakenan, jau jawenabun medabewakubainun bunwen, ikunwainbukidi shinankin jatu bika wamamadan. Jakia ikunwainbu ichaxun yuxabu betsabu enauma besti medabewatidubuki, jatun piti inun jatun mabu jawa jayamaken jatukidi shinankinan.

<sup>17-18</sup> Mekenikabukidi ana mia yuinun ninkawe. Moisin Diosun jancha kenekin: "Min jemaintin anuxun min ina awan jawen taewen min xekewan pema pema akin mia xemexunaya dispiwen xenexyamakanwen, jau dabukun pinunan", iwanan, yununiki. Jaska yuikinan: "Dayakapabu jau jatu pakakubainun bunwen", ani keska wakin mekenikabu tibi jabun matu yusianbudan, jadatuda bestitun Diosun jancha matu yusin jenekatsi ikama matu yusinkin matu medabewakubainaibuwen taexun matundi ja matun mekenika duawakin peiwen kasmai jawadawen medabewakin jawen jawada inankubainkanwen.

<sup>19</sup> Jaska inun, mekenikatun chakabu wakin kaneaikidi juni bestichai miki chanikin jakidi mia yuiai ninkayamayuwe. Jakia mekenikakidi jabias

chakabukidi dabe kasmai dabe inun bestitun mia yuiaibu: “¿Chanimenkain? ¿Chanimadaka?” ikin unanti watiki. <sup>20</sup> Januxun chakabu wakubainaibu pewanun itan Dioski jatu datemakin dasibibudi jau datedianunbun ichaxun ninkaibun pewakin jatu mesewakin xabakabi nemakubainwen.

<sup>21</sup> Natianan, Dios inun nukun Xanen Ibu Jesucristo inun jawen nai tsuma katuabun jabun ea ninkaibun en mia yunu kayabiae ea ninkawe. Min jaibuaibu kasmai yuda betsabu tsuanda jamapai mekin chakabu washinamenkain, chakabu wamamenkain, bebunkidi chakabu shinanma dasibibu jabias ma miki chaniaibun besti unanti watan jatu pe wakubainwen. <sup>22</sup> Ja dikabi jau tsuanda Diosun daya axunun katukatsis ikinan, jin jin, iwanan, uindiamma mamepixun jawaida Dios yukaxunyamawe. Jakia jawen chakabu unandiamma kanekin min jawaida katuken: “¿Jawen chakabudan, unanma ikimenkain?”, iwanan, mikidi shinantidubuki. Jaska juni betsan chakabu min pewaxuntidumadan, mimebi mekekin uindakubainwen.

<sup>23</sup> Min jatu babu min isinkunkainmiswen taexun ana unpax besti akama uva vino juxkeishtatan akubainwen, badi tibidan.

<sup>24</sup> Jaska inun, jatidi ikunwanbiakin yudabun bedubi chakabu wamisbuki. Betsabun june chakabu wadiamisbuki. Jaskaibu jatu uinbiamisbukan mian jawa unanma jawaida jatu katukin mamepiyamakubainwen, chipu jatun chakabu taxnitidukidan. <sup>25</sup> Jabiaskadi wakin medabenankin pepawaibu bebunkidi unanmisbuki. Jakia betsabun chakabuwakin june abiaya atimas tapindiamisbuki.

## 6

<sup>1</sup> Jamen betsadan, tsuada juni betsan esclavo dayadutunan, Jesucristo ikunwankin jau jatun tsuma duawakin ninkai jau jatukidi pe shinankubain-unbunwen, jatu jeneamadan. Jatu jaska uinmamaken Jesucristokidi nun jatu yusiain inun Diosun kena yuda betsabun yuqidubuki, “Janis jatu yusinkanidaka”, nuku wamakinan. <sup>2</sup> Ja inun, jatun tsumapan Jesucristo ikunwanyan jabetan ikunwambiaidan, jawen betska keskama jau jaki mesekubainunbunwen. Uatian imisbu keskama jau dayai pexunkin jatu binumakubainunbunwen, jatun tsumapan jatu dayaxunbiamisbu jabetan ikunwainan, betska nukipa keskaya jau jaki chiti ikubainunbunwen.

### *Jawada nun jayawen besti benimakunkaintikiaki, na janchadan*

Na jaska tibi yusinkin jatu tapinmakubainwen. <sup>3</sup> Tsuanda jatu yusinkatsis ikin jatun shinan betsajaida itimaskakidi jaska jatu yusianan, nukun Xanen Ibu Jesucriston nuku yusini keskama inun jaska jakidi shinankin nun jatu yusinmis keskama jatun shinanen besti kenkin yusinkatsis ikanikiki.

<sup>4</sup> Jawen taea besti kein unanmabia ja iki jaskakidi shinain jamebi jatun shinan jatu atimapu wamamisbuki. Eska tibi jatun shinan medanua taxnidan, jawada betsana ja jawena jaska jayama uin jaskai ja besti jaska jayamen iki sinataidan, yuananain betsabube danananainan, bechipainameama xeti ikama jatuki ja ikidan, <sup>5</sup> yuda betska betsapabube jatun yusian jancha kayabi unanbumabe kemanamei jeneisma inun jaska ikunwankin yusiaiwen taexun pei ichapa bitikidi shinankanikiki. Jatu uindakubainwen. <sup>6</sup> Jaskakidi nukubun nun jadidi shinankin ikunwainbudan, chanima kayabiki. Diosun jawen pepa tibi mabu keyumis keskama nuku inain inun nuku inanxanaiwen taea nun benimajaidakunkainai. Jaskaken natian jaska nun jaya bestiwen benimayunankanwen. <sup>7</sup> Na mai anu taxnidan, nun jawauma kainiki. Janua mawakainkin nun jawa buama idiaxanai. <sup>8</sup> Jaskawen taea Dios nun ikunwainbudan, tadi inun piti inun janu uxati jaya ja besti nun

jayadan, jaskawen besti benimakubainankanwen. <sup>9</sup> Jakia tsuabuda mabu inun pei bestiwen kemuaibudan, jabun jawa unanmawen taeadan, bidun tibi keska jatun kemu pae tibiwen jatu achi keyua jaska tibi taxniaiwen taea jawa shinanma: “En peaii”, i bestikin jamapai chakabu jawendua besti bechipai jawen jiwe chakai pikukunkaini jawen jiwea benui janu kupiaitian jawa pepa biama benuxankanikiki. <sup>10</sup> Pei inun mabudan, jatun kemuti pae chakabun jatu achia janu jayaki. Jaska mabu inun peiwen kemui Jesucristo ikunwainbu bestibu jas besti dayanun ika jaska bechipaiai jatun shinan pe jenetan ana Jesucristo ikunwain shinanma ma jakimawen taea janua jakidi jawen chakabu betsapa taxnibidankin jatu nuitapawamiski.

*Jesucristo chibankin jau pe besti yusinkubainun Pablon Timoteo yununika-  
ki, na janchadan*

<sup>11</sup> Jakia miadan, Diosun ma mia jawena wakin katuniwen taexun jawada chakabu betsapa bechitan danain ana jadi kayamawe. Min pe dayai jiwekatsi ikaidan, min daya bikabiaken Diosun mia unainwen taea ikunwain nui bechipainamei kushipai juinti kushiama babutan jatu uinmai jatube jiwekunkainwen. <sup>12</sup> Jaska min jiwea ikibi ika bibiatan min bennituduma Diosun mia inankatsi mia kenakin katuniwen taexun jaska min ikunwain min ma ichabu anua xabakabi chanini jatu unanmakubainwen, Jesucristo chibain chintuanma dasibi Diosun mia yunumis dateama shinankin akubainkinan. <sup>13</sup> Diosun dasibi damiwakin jiwea jatu inankin keyumis inun nukun Xanen Ibu Jesucriston jaska xabakabi juni dateama romano xanen ibu Poncio Pilatoki chanikin ma yuinitun natian nuku uiainbun mia medabewakin en mia yunuaii. <sup>14</sup> Na jaska tibi en mia yunuai jaska chibankin min jiwea pe mekexun kaneama mikidi pe jatu uinmaidakubainwen, janu nukun Xanen Ibu Jesucristo kushipai juaitian jau mikidi jawa chakabu tsuan yuiyamaxanunan. <sup>15</sup> Januxun Dios dasibi binu keyuatun jatun besti pepa meke keyua jatun yununika xanen ibubu dasibi inun xanen ibu bexmasbu dasibidi binu keyuatun janu nukun Xanen Ibu ana nuku anu taxnimakatsis ikin ma janu yubakani meneaya nichinxanikiki. <sup>16</sup> Ja ibubis mawatiduma inun, ja besti jiwemis xaba chaxakapa jiweaki tsua jadi jaki kematidumadan, tsuan uintiduma inun tsuan uinakama jiweaki. Jaskaken jawen kushipa pae nukaisma duawakin jau kenwanpakenunbunwen, niti ikamadan. Jaskakidan.

<sup>17</sup> Tsuanda ikunwain jawen pei inun jawen mabu ichapa jayabun shinain: “Natian en mabu en jayawen en jawen jiwei peaki”, ikin jau ana jaskakidi shinain jawen kenyamanunbun jatu yuiwe. Ja jaskakidi shinamisbudan, jatun mabu chapumiswen jatu mestenwantan jiwematidumaki. Jaskaken uatian imisbu jaska shinanma jakia natianan, Diosun nuku benimawakin jatun jamapai betsapa betsapa yaushiamma nuku inankubainmis jaska besti bi jau jiwekubainunbunwen. <sup>18</sup> Jaska inun, jatun jamapai mabu jaya betsabudi paxkaxunti shinankin jaska Diosun bechipaiai aki jau pepakubainunbun jatu yunudiawe. <sup>19</sup> Jaska wakubainmiswen taexun Dios jatuwen benimakin jatun duapa pepawen badi jawen jeneaitian Diosun jatu manakuxanai chanima jiwekuian kayabi bi jaki nukununbadikanikiki.

<sup>20-21</sup> Timoteoon, min shinan mekeidawe, jaska Jesucristoki min chiti ikawen taeadan. Jaskai betsabu tatimai unanepanun ika kemanamei ana Jesucristo ikunwanma jatun shinan medibi watan ma chintuanbuki. Jaskaken mianan, ja janchachakaibudan, jatun yusian chakabuwen padananain: “Nukun jancha unanepati kayabiki”, ikin yusian pepa bextenun ikaibu jamen jatu ninkayamakubainwen.

Nukun Xanen Ibun jau jatube mia duawakubainunwen.  
Jatiski, en janchadan.  
Pablo

## TIMOTEO PABLON JA KACHU KENE BUMANIKIAKI 2 TIMOTEO

### *Pablon Timoteokidi shinanikiaki, na janchadan*

<sup>1</sup> Ea en Pabloden, Diosun jaska shinainwen Jesucriston kushipaya ea wakinan, jawen yunuawen ea aniki. Jaska wakinan, jamen ea akama jakia jaska bebunkidi Dios yubakani jawen jiwea keyuisma ikibi ikakidi jaska shinankubainmis jaska jayawen taexun Jesucristo ea katumaniki. <sup>2</sup> Timoteoon, en mia kene bumai uindawe, min Jesucristo ikunwainwen taea min en bake kayabi keskakidan. Nukun Epa Dios inun nukun Xanen Ibu Jesucristo miwen nuikin jau mia unanuma jiwemakin pewakin duwapakekubainun-bunwen.

### *Pablon Timoteo paxkabidanimaxun Dios kenwanxunkubainikiaki, na janchadan*

<sup>3</sup> Punu nuka uinti nishma min bashikuimaken mia shinankin janu en Diosbe janchaitian badidi inun meshu tibi mia jakimama mikidi Dios kenwakin en mia yukaxunkubainmiski, ean Dios duawakinan. Jaska en shinan jawa chakabumakidi ea shinanmaya en akubainaii, jaska nukun xenipabun Dios ikunwankin apaunibu keskadi wakinan. <sup>4</sup> En mia paxkabidana min ewen nui kaxaya nenu juimaxun en mia shinan jeneamaki. Jaskawen taea ana miki nukutan en mia ana uin miwen en benimakatsis ikaii. <sup>5</sup> Ja dukun min chichi Loida inun min ewa Eunicen Jesucristo ikunwani chintuinsbuma keska jabias shinan miandi min ikunjaidawakin min shinan min betsa watiduma en unaiin.

### *Jesucristokidi yusin daketimakiaki, na janchadan*

<sup>6</sup> Jaskaken natian en mia yunukin yuaidan, ninkaidawe. Diosun jawen kushipa pepa jau mia inankin kayati wamanun mia mamepixun en mia yukaxuniki. Jabiaswen ana kushipai chi ketianbu ji imis keskai ana min kushipa babu wayamawe. <sup>7</sup> Diosun jawen Yushin nuku inankin yushin babu dateti nuku inanma iniki. Jakia jawen Yushin kushipa pepa inun jawen bechipai nuinameti inun jawen nukunmebi nun pepakin shinantidu nuku inaniki. <sup>8</sup> Mia jaska waxuniwen taea nukun Xanen Ibukidi yusin jakidi janchai jaki dakeyamakunkainwen. Ja dikabi, jawen taexundi nenu ea bichiabuwen taea ewendi taea ekidi janchaidi ewen dakeyamadiawe. Dateama eskakunkainwen. Diosun nuku kushipa wakubainmiswen taexun Jesucristo mekenankidi kakape nun jatu yusianyan nuku ichakawaibuwen taexun miadi bika tenemabiabu jatuwen dateama Diosun kushipayaxun yusinkin jeneyamawe.

<sup>9</sup> Eska Diosun bebunkidi shinanidan, jawada pepa nun amiswen taeama jakia jaska Diosun na mai anu jawa wadiamajaidabia bebunkidi jawen shinan duapawen taexun jawen janchawen jiwei nun jawenabu medibi pepakubainxanunbun nukun chakabuwen nuku kupikatsi ikama jaska yubakaniwen taexun tsuabunda Jesucristo ikunwainbu nuku katukin kennanixun natian nuku ma mekekubainikiki. <sup>10</sup> Januxun chanima Diosun jawen nuikipa nuku unanmakinan, jawen bake Jesucristo nukun mekenan-wankin mawawen dasibibu nun datemis jatun maemakin nuku binuxuniki. Ja kakape jakidi jiwea jancha yuikin datan ati shada ana juneama wakin xabakan taxnimakin xabakabi waniki.

<sup>11</sup> Jaskawen taexun Diosun ea katutan jawen bakekidi kaka pepa juidiobuma en jatu yusinkubaunun ea yunukin Jesúsun kushipaya ea wanixun ea yusinan waniki. <sup>12</sup> Ea jaska waniken Diosun jancha en yusinkubaunmiswen taexun ichakawakin ea bichibiabun en Jesús ikunwankin taewayea mekenitun badi jawen jeneaitian ea mekekubainxanai unain en dakeamaki. <sup>13</sup> Jesucristo nuku ixuniwen taea ikunwain bechipainamekin en mia yusinmis keska wakin jancha kayabi kayatapia yusinkin jeneyamawe. <sup>14</sup> Jaska wakin Jesúskidi yusian min tapini jau tsuan betsa wayamanun bun Diosun Yushin Pepa nukuki dasiatun mia medabewaya jawen kushipawen uindakubainwen.

<sup>15</sup> Jaska inun, min ma unaiin. Asia mai pakea anuabun Jesús ikunwainbu dasibi eki dakei eki pechitan ana ea medabewabumaki, Figelo inun Hermógenes dikabitunan. <sup>16-17</sup> Ea jaska wabiaibun nenu Roma anu en bikai jiwebiaken nukun jaibu Onesíforon Roma anu jikitushitan jawa juindukuanma ea bechinun ika ea benachakayamakin atimas ea bechimaki. En mane dispi chiwetameyawen en menexekeaki dakeama jawenchains ea medabewakin ea shinan chankanwanbidanbidanimaki. Ea jaska waimaken Diosundi jawenabuswen nuikin jau jatu medabewakubainunwen. <sup>18</sup> Éfeso anuxun Onesíforon nuku medabewakubaini min unanjaidaii. Badi jawen jeneaitian Diosun yudabu jatu unanti waitian nukun Xanen Ibun jau Onesíforo duawaxanunwen.

## 2

### *Soldado pepa keskatikiaki, na janchadan*

<sup>1</sup> Min en bake keska Jesucristoki dasia min jawen kushipa jayanun Diosun jawen pepa mia inanidan, jawen besti kushipakunkainwen. <sup>2</sup> Ichapabu en jatu yusinkubaunai min ninkakin tapinmixun akai keskadi min jatu tapinmaidan, ja junibu pe jiwekin ikunjaidawai chintuanma jatu uinmai duapakunkainkin yudabu yusinkin jatu medabewatidubu jatu katutan jau jabiaskadi yusinkubainun bun jatu yunukubainwen.

<sup>3</sup> Jamen mia ikidan, soldado keskai jiwe. Jaskakin en ikai keska jiwekin Jesucristo min ikunwanyan mia ichakawabiabu Jesucriston tsuma pepai nuitapabiai bika tenei jiwekunkainwen. <sup>4</sup> Uinwen. Chanima soldado unanepatun jawen xanen ibun yunua besti dayaxunkatsi jawa jamebi jawen shinanan bechipai atidumaki, jawen xanen ibu besti benimawanun ikadan. <sup>5</sup> Ja dikabi, jabiaskadiai, buda putanika beyuskin jawen yunuti inun jawen nemati chibanbuma jawen manakuti pepa jayatidumbumaki. <sup>6</sup> Ja inun, juni betsan yunu banaima jawen dayaxunikan mekexunmiswen taexun janu tsekatitian bai ibuan tsekakin jawena dukun biama ja dayaxunmis paxkaxunkin jawena dukun inantiki. <sup>7</sup> Na jaska tibikidi en mia yuiai shinankubainwen. Min jaska waya nukun Xanen Ibun mia medabewakin dasibi mia tapinmaxanikiki.

<sup>8</sup> Nukun xenipabu xanen ibu pepa Davidin baba Jesucristo mawa Diosun ana bestenwani kaka pepa datan akin en jatu yusinmis dan, jakimama shinaindakubainwen. <sup>9</sup> Jesucristokidi en yusinkubaunmiswen taexun ea ichakawabu tenekin en mea ii. Juni atimapa jawaki dateama chakabuwai bechitan amisbu keska wakin ea nemakin mane dispiwen ea menexabu keska wadiakin Diosun jancha kakape yuikin en datan amisdan, ja tsuan nemakin nexatidumbumaki. <sup>10</sup> Jaskaken tsuabuda Diosun katunibu Jesucristo ikunwain pepai jau jatun chakabuwen Diosun jatu kupiama jatu paxawakin

piskuma jau jawen kushipa ikibi ikanu jau janu jiwediamanunbun natian ea jiweyuxun en jatu bika tenexunuaii.

<sup>11</sup> Na jaska en mia yuiaidan, chanimajaidaki. Shinaindawe. Tsuabuda nun ma jabe mawani keska jabun nun shinainbudan, jabusdi nun jabe jiweyankanaii, niti ikamadan.

<sup>12</sup> Tsuabuda Cristowen taea nuitapabiai babuama kushipakin nun binukubainaibudan, chania janu xanen ibuai anu jabe nun xanen ibuxanaii. Jamen tsuabunda jakidi chani peama yui keyainsbumadan, jabiaskadi Cristo jatukidi Epa Dios chanikin jatuki dakediaxanikiki. <sup>13</sup> Jamen nukubu nun shinan betsaa betsapa wai chintunbiamisen jatunan, jawa shinan betsaa betsapa waisma ikunkainunbadikiki, jaskatan jamebi ibubis chani chakatidumadan.

*Pablon yusinmis keska wakin jau Timoteon adiakubainun yununikiaki, na janchadan*

<sup>14</sup> En mia yuiai keska shinankin betsabu jatu yusinkin tapinmaidakubainwen. Diosun ninka keyuaya yusian betsaa betsapakidi yui jau kemanameya manunbun jatu nemakubainwen, tsua jatu medabewatidubumakidan. Jaskaibu tsuanda jatu ninkai e ixankanikiki, Jesucristo ikunwanpaidan.

<sup>15</sup> Jamen mia ikidan, jin jin ikama min Dios dayaxunaidan, Diosun besuubi jawa bedabini min dakeama ixanaidan, chania jancha Jesucristokidi dasibi jatu yui pepakunkainwen. Min jaskamiswen taexun Diosun mia unanti wakin: “Juni dayakapakunkainkin min ea dayaxunmis peki”, iwanan, mia yuixanikiki. Shinaindakubainwen. <sup>16</sup> Tsuabunda janchawen besti jamapai bemakis pepakidi shinain kemanamei janchakin jaska bestikidi shinainbu tsuabunda jatu ninkai jatun yusianwen beyai xuxatidumai atimapai pikukubainkanikiki. <sup>17</sup> Jatun yusianan, isin chakabu taxni su ika ewakunkainmis keskaki. Jaska keskadi wakin jatun yusianwen yudabu yusinkin jatunabu chakabu pa wamakanikiki. Jatu uindakubainwen. Jaska keskai Himeneo inun Fileton jatu chibankin <sup>18</sup> chania jancha jenetan ma jamakidi jatun shinan benuabuki. Jabun jatu yusinkin yuikinan: “Ikunwainbu mawadan, ana bestenxanaidan, nun ma jayaki”, iki mapubaunkin jatu padankin Jesús ikunwain jatidi chintunmakanikiki. <sup>19</sup> Jatu jaska wabiabun ma medibi Diosun jawenabu kushipa wakin mestenwani jawa ana betsaa wama ixanai ma Diosun jancha kaneamakenenibu jayaki. Jaskaken: “Nukun Xanen Ibu jadatuda jawenabu ma unainkiki”, ja inun: “Tsuabunda nukun Xanen Ibu kenawen Diosbe janchakinan, jatun chakabu chitetan jau jenekubainunbunwen”, adiani kenenibu jayaki.

<sup>20</sup> Jaska inun, juni mabuyatun jiwe ewapa medan jawen mabu tibidan, oro inun plata jawendua besti jayamaki. Jakia ja dikabi ji mabu inun mai mabu pepa bexmas jayadiki. Ja mabu dabe jaska keska dabes jayamaki. Betsaa jawa jusiama jawen pepajaida besti atiki. Janua betsaa jawen jamapai wakin pepa bexmas dasibibun metidubu jayadiki. <sup>21</sup> Ja mabu pepa oro keskadan, tsuabunda chakabu jenetan jawen Xanen Ibu pepakin dayaxuni jawa chakabu jusikin ana meama ja besti pepaxunaiwen taexun jamapai daya pepa betsaa betsapa jawen Xanen Ibu Jesúsun yunutiduki.

<sup>22</sup> Jaskawen taexun bedunabu jamapai tibiwen kemumisbu keska jenetan janua ana jaska jiweama paxakunkainwen. Eska bestiwen jiweiti pepa benakubainwen, jawa chani chakama inun, Jesucristo ikunwain inun, nui bechipainamei inun, unanuma jiwei dasibu juinti xunpinbubetan nukun Xanen Ibu kenwankubainkanan. <sup>23</sup> Ja dikabi, unainsmapabu kemanamei

sinatanamemisbuwen taexun jatu ninkayamakubainwen. <sup>24</sup> Nukun Xanen Ibu dayaxunikabia nukun beyawen jamakidi janchawain detenameai keskai nun maputidubumaki. Jamen nuku ikidan, dasibibube pepaidan, dasibibu yusinti shadaidan, dasibibu jawada kaneaibu jawaida jin jin, iwanan, jatu chakabu wama jiwekunkaintiki. <sup>25</sup> Tsuabuda ninkaisbuma inun patapabu min jatu medabewakin pewakatsis ikaidan, juinti babutan jawa sinatama eska shinankin jatu unanmakubainwen, Diosun jawen chakabu unanma shinan betsa watan: “Jaskadan, chanimaki”, ikin jatun chakabu jenetidubu manakinan. <sup>26</sup> Min jaska waya jabu diablo Satanásan jatu beya wakin tsumawani jabun mia nemakubainshinabu bestean keskatan kainkainkin Jesucristokidi chanima jancha unantan ana chakabu wakatsi ikama jabun Satanás mepanmabantidubuki.

### 3

#### *Ma badi jawen jeneaitian yudabu jaskaxanaibu Pablon yuinikiaki, na janchadan*

<sup>1</sup> Janu Jesucristo ma ana jua kemaya bika betsa betsapa kainbidanxanaidan, min ma unain uindakubainxanwen. <sup>2</sup> Ja yudabu eska bestiwen jamebi kenkin jatun mabu inun jatun pei bestiwen kemui “Eadan, tsua ea keskamaki”, ikin Dioskidi jancha chakabukin jatun ibuan jancha ninkama inun, jawa pepa shinanma inun, Dios kenwainbuki meseama chakabuxankanikiki. <sup>3</sup> Yuda betsabu duawatikidi shinanma inun, jawa jatuki nuitimakidi shinanma inun, yuanananti besti shinain inun, jatun jiwea mekekin pewama puben besti shinankin jawada pepa Diosun bechipaimis danain jaki sinataxankanikiki. <sup>4</sup> Jaska inun, betsadan, yuda pepabu tsuabuda jatuki sinataibu jatun jatu unanmamis inun, jawada itidu bebunkidi shinanma jamapai amisbu inun, jamebi kenkin shinankin: “Yuda betsan atidumabikanen ean besti en atiduki”, iwanan, shinain inun, jawen kemu pae bestiwen shinain pe jiwenun ika Dios benakin shinanma idiaxankanikiki. <sup>5</sup> Jatun kexawen bemakis xabakabi Dios kenwanbiakin jawa jawen jiweawen pepakin uinmama Diosun kushipaki dakekin kenwan kayabiama dananxankanikiki.

Jaska keskabudan, jatube ketaxameama jatu dunkekubainwen. <sup>6</sup> Jamen betsabu ikidan, eskakanikiki. Jatubetan chani yui shadanun ika ainbuaibu jawa unanma chakabui jiwekin kemu betsa betsapa teneai anu jatun ji-wetan jikitan jatu yusinchakakin jatun tsumabu jatu wamisbuki. <sup>7</sup> Jabun jawadakidi tapinbiakubainkin jawa chanima jancha xabakabi ninka pe-watidubumaki. <sup>8</sup> Juni mukaya dabe Janes inun Jambrésin Moisin jancha bextenun ika inibu keskakin jabu padananainbu chanima janchadi nemanun ika ja junibu jatun shinan pema inun ikun kayabi wama jamakidi kanekanikiki. <sup>9</sup> Ja padananainbu unainsmapakin jancha kayabima jatu yusiaainbu dasibibun unantan ichapabu jatuki chiti ikama ixankanikiki. Jaska Moisés bextenun ika Janes inun Jambrés tatima ini keskai jabudi jaskaxankanikiki, bextekeidan.

#### *Jawen jenekin Pablo Timoteowen nuijaidakin yununikiaki, na janchadan*

<sup>10</sup> Mianan, ja padananainbu min jatu chibamaki. Jamen jaska yusiin en jiwemis keska min chibamiski, eska tibi ea chibainan. Jaska en shinanmis inun, jaska en ikunwanmis inun, jaska jawaida jin jin ikama en tenemis inun, en nui bechipainamemis inun, jamapai ekidi kainbidanai tenei en kushipamis inun, <sup>11</sup> jaska Antioquía anuxun inun, Iconio anuxun inun, Listra anuxun ea ichakawakin ea bika tenemakubidanyamabu min unain keskakin miadi bika tenemaibu min teneai ea keskakin min mekubainaiii.

Ea jaska tibi wabiaibun nukun Xanen Ibuan ea jatu mepamakubainyamaki.  
<sup>12</sup> Jamen chania tsuabunda Diosun jancha ikunwain pepakin Jesucristoki dasia jiwekatsis ikaibudan, jatu bika tenemakin jatu nuitapa waxankanikiki.  
<sup>13</sup> Jakia juni chakabu inun jabu padananainbudan, jatun jiwea pe buama piku bestixankanikiki, jatu padainbuwen inun ibubis padananainan.

<sup>14</sup> Jaskabiaibun miadan, Diosun jancha pepa mia yusianbu tapintan min ikunwani jabiaskas shinankin chibankubainwen. <sup>15</sup> Min bakeishta Dio- sun jancha pepa medibi mia yusinkin mia tapinmakin jawen besti paxati Jesucristokidi mia unanmabu ninkakin min ikunwanidan, shinaindawe. <sup>16</sup> Dasibi Diosun janchadan, junibun shinanma Diosun jatu shinanma jabun kenenibudan, jadan peki. Jawen yuda betsabu yusinti inun jawen jatu nemakin bexteti inun, jatu jawen pewati inun, jau jawen jiwei pebainunbun jawen jatu unanepa watiki. <sup>17</sup> Jaska yununiwen taexun jabu Diosun yunua jawen jancha yuixunikabu jawen janchawen unanepakin pepajaidakin Dios dayaxunkin pepa betsapa axuntidubuki.

## 4

<sup>1</sup> Epa Dios inun Jesucristo ja xanen ibujaidai jawen kushipawen juxun mawabu inun jiweabu unanti waxanaitun nuku xabakabi uiainbun en mia yunuchakayamai ea ninkaidawe. <sup>2</sup> Eska en mia shinanxunaidan, Diosun jancha jatu tapinmakin jawa jeneama badi tibi benuama akubainwen, janu ninkakatsis ikin ninka pewaibutian inun janu ninkakatsi ismabia inun janu bika teneaibutianan. Jaska wakin jatu ikunwanmakin jatun chakabu jatu jenemakin jatu benimawakin jatu yusiin jin jin ikama akubainwen. <sup>3</sup> Chipu badi betsation yudabu ichatan yusian kayabi ana ninkakatsi ikabuma ix- ankanikiki. Jakia jaska jabun ninkakin bechipai besti anun ikaibu jatun yusian pepamabiaken jawen benimanun ixun jawada jaska ninkakatsi ikaibu besti jatu yusinmanun ixun yusinan ichapabu jatu yusinmaxankanikiki,  
<sup>4</sup> Jesucristokidi chanima jancha jenei jaki pechitan miyui betsapawen besti yusiaiinbu chibankinan. <sup>5</sup> Jamen mia ikidan, dasibi min shinanen mekei pekin bika tenebiai Jesucristokidi kakape datan akin jatu yuikin daya pepa en mia yunubainai shinan betsawama jatu yusinkubainxanwen.

<sup>6</sup> Jamen eadan, natian ma en yuda Jesucristo inankin en mawaxunxanai ma kemaikiki. <sup>7</sup> Eadan, Jesucriston soldado pepa detenamekin jatu binumis keskakin jabun ea ichakawaibu en binuaii. Kushibainkin jatu maemakatsis imisbu keskakin jaska ewen Dios yubakani jawa chintuanma en ma ixuanki. Ikunwanixun jawen kakapekidi yusin bikabiakin en jawa jeneama ikunkainaii. <sup>8</sup> Natian en dayaxunkunkainmiswen taexun jaska jayanun ika en imis en maiti manakuti pepa Diosun ea mekexunkubainmis badi jawen jeneaitian jancha pewanika duapatun Jesucriston ea inanxanai en manaii. Jaska wakinan, ea besti inanma dasibi jabun Jesucristo ana chintunkidanxanai bechipaikin manaibudi jatu inanxanikiki.

### *Pablon jaibuai bun jaskawaibukidi Timoteo ki chanini kiaki, na janchadan*

<sup>9</sup> Jawa teai bika teneama jawaidakidan juxun ea uinyuwe. <sup>10</sup> Demas jawen jiweawen besti inun mabuwen kemukin ea jenebaini Tesalónica maewan anu kashianki. Crescente Galacia mai pakea anudi kadiashinaki. Tito Dalmacia mai pakea anudi kashianki. <sup>11</sup> Lucas besti nenu ebe jiweaki. Jukin Marcos benakin bechitan iwexanwen, mibetan nenuxun ea medabe- watidukidan. <sup>12</sup> Nukun jaibu Tíquico Éfeso anu en yunuyuaii. <sup>13</sup> Tróade anu nukun jaibu Carpon jiwe anu en matsi tadi en jenebidanyama inun en una

ichapa inun ja xunsa min ja jakimatiduma en una bichi sebi ewapa en bashibidanyama jukin ea keyu bexunxanwen.

<sup>14</sup> Mane mabu wanika Alejandron ea jadakidi shinantima kaya wakin ea ichakajaidawaimaki. Jaskawen taexun nukun Xanen Ibun jaska bechipaiai keskawen kupixanikiki. <sup>15</sup> Nun jatu Jesucristo kakape yusinmiskidi nuku jatu dananmaikiki. Jaskawen taexun miandi jakidi uindakubainwen.

<sup>16</sup> Jamen betsadan, ja dukun Roma xanen ibubu ninkamakin judiobun ea kunyan akaibun en chakabuma en jatu yuiaya tsuan kedabewai ea janchaxunama dakekin dasibi en jaibuaibun ea jenebainimabuki. Ea jaska wabiabainimabun jatun chakabuwen taexun jau Diosun jatu kupiyamaxanunwen. <sup>17</sup> En jaibuaibun ea jenebiabainabun jawen binuti Jesucristokidi jawen kaka pepa jawen paxatikidi en jatu yui keyuaya judiobuma dasibibun jau ninkanunbun nukun Xanen Ibun ea jeneama ea kushipa waxun jatu daewakin mese anua ea piskumaimaki, ea jaska nukun Xanen Ibun jatu binumakin inu keneya pintsi kexea keska anua ea binumakinan. <sup>18</sup> Chakabu dasibi nukun Xanen Ibun ea binumakubainkin janu xanen ibuai pepa jawendua nai anu ea paxawatan ea mekexanai en unaiin. Jaskaken niti ikama ja duawakin kenwanankanwen. Jaskakidan.

<sup>19</sup> Jaska inun, jadi jiweabu Prisca inun Áquila inun Onesíforon enabu: “¿Jaska pebumenkain?” ikin en jancha en jatu bumai ea jatu yuixunwen. <sup>20</sup> Corinto anu Erasto bashikuaya en juyamaki. Ja inun, Trófimon isin teneai Mileto anu en bashiyubidanyamaki. <sup>21</sup> Ui matsi inun niwe kushipa bediamaken manama jawaida juwe. “¿Jaska min pemen?” ixun Eubulo inun, Pudente inun, Lino inun, Claudian nenuxun dasibi ikunwainbubetan jatun jancha mia yunukanikiki. <sup>22</sup> Nukun Xanen Ibu Jesucristo mibe nixun jau mia medabewakubainunwen. Ja inun, Éfeso anuxun ikunwainbu dasibi Diosun jau matu duawakubainunwen.

Jatiski, en janchadan.

Pablo

## TITO PABLON KENE BUMANIKIAKI TITO

### *Pablón Titokidi shinanikiaki, na janchadan*

<sup>1</sup> Titoon, en mia kene bumai uindawe. Ea en Pabloden, Diosun jawen tsuma ea wakin Jesucriston kushipaya ea waniki. Jabiatundi ea yunukin tsuabunda jakidi chanima jancha nun jatu ikunwanmaxanai jabu Diosun katuni jabun jau tapinkin jau unanti wakubainwaxanunbun jaska besti chibantikidi en mia yuiaii. <sup>2</sup> Dios chanichakaismatun mai damiwadiama jawen janchawen jiweakidi yubakani jatun jiwea ikibi ika tsumatun jawa betsa wama ixanai nun manaii. <sup>3</sup> Natian janu ma menekin janu ati wani anu jawen bakekidi kakape nun unanxanunbun nukun Epa Dios mekenantun nuku unanmani jaska wanixun eki chiti ikaya jawen yunuawen jawen jancha en jatu tapinmakubainaii. <sup>4</sup> Titoon, chanima ebetan ikunwain min en bake kayabi keskaki. Nukun Xanen Ibu Jesucristo jawen Epa Diosbe miwen nuikin mia unanuma jiwemakin jau mia duawakubainunbunwen.

### *Jaska wakin mekenikabu katutikidi Tito yusinikiaki, na janchadan*

<sup>5</sup> Natukan Creta anua nun dayai taeima anuxun jatu medabewakin pe-wakin mae tibi anuxun ikunwainbu mekenikabu wakin min jatu katunun jaska shinankin mia yunutan en mia jenebidanimaki. <sup>6</sup> Mekenika katukinan, eska jiweabu jatu unankin uintan akubainwen. Tsuan jatukidi chakabu yuisma inun, ainyankatsi ikin ainbu bitan jeneisma betsawen kemuisma inun, jawen bakebu jabetan Jesucristo ikunwainbu jawen bakebu jawa metimakin jatu uinmai jatuki ja imaisbuma ja jawen bakebu juinti kushi sinatapaisbumaken min jatu katuxuntiduki. <sup>7</sup> Ja daya pepa ikatsi ikin jatu bebuxununbun min jatu katutidudan, bebukin Diosun enabu jatu mekemakatsi ikin jaska tibi Diosun bechipaiai akatsi ikaibu jatu katukin yunukinan, jatun jiwea jawa chakabu jayama pe besti ikubainaibu jatu akubainwen. Jatun shinan betsawen maewatidubuma akama inun, sina besu akama inun, paenkatsis imisbu inun, janchawen jatu bekunyan amisbu inun, jatu bepadantan jatun pei inun jatun mabu ibubis binumatan pei ichawamis jaskabu uintan katutimaki. <sup>8</sup> Eskabu min jatu atiduki. Ninkawe, bai mapuabu inun ikunwainbu beaibu jatu itan duawamisbu inun, jawada pepa besti ikaibu bechipaimisbu inun, jawada adiamama pe shinamisbu inun, jawada janchatan kanekatsi isbuma inun, duapai Dioski datemisbu inun, jatun jiwea pe mekekubainmisbudan. <sup>9</sup> Jaskamisbuwen taexun ikunwain betsabudi medabewakin jatu benimawakin yusian pepawen jatu ikunwan-makin jabun jamakidi shinan chakaibu jatu medabewatidubuki. Jatu jaska wakin Jesucristokidi chanima jancha nun jatu yusinmis ikunwankin betsawen tibi shinanma nukun yusian jau chibandiakubainunbunwen.

### *Yusinanain bepadamemisbukidi Tito shinanmanikiaki, na janchadan*

<sup>10</sup> Creta anuabu juinti kushi jancha ninkaisbuma midimabuki. Jabun ju-diobun beya chibain yusinan pepanikapaikin jatu padankin jancha kayabi-wen ikama jawen jaskatima kaya jatu yusinkin yudabu padankanikiki. <sup>11</sup> Jatu yusin pewabumabia jatun mabu bian shadanun ika peiwen kemukin jiwe anua yuda betsawenabuya jatu shinan betsawen wamakin jatu padanbi-abu jatu ninkakanikiki. Jaskawen taexun mekenikabun mibetan yusinkin jau jatu nemakubainunbunwen.

<sup>12</sup> Jatunabu betsa unanepatun jatukidi kenekin yuikin: “Creta anua enabudan, jabunan, jawada akamabia jamen kemutapai chani chakamisbu inun, puben bestibu inun, pikebu inun, jawa dayama chikishmisbuki”, anidan, <sup>13</sup> chanima jatukidi yuikin aniki. Jaskawen taexun jancha kushipawen Creta anuabu nemakin jatu xabakabi unanmakin jatu kunyan akubainkanwen. Man jatu jaska waya ana jamapai tibikidi ninkakin shinanma Jesucristokidi ikunwankin pe besti shinantidubuki, <sup>14</sup> judiobun beya miyui bechipaibiamisbu natian ana jaska shinanma danain ana yusian kayabiki pechitidubumakidan.

<sup>15</sup> Eskakidi min jatukidi shinankubainun mia yuinun ninkawe. Jawada uke medan shinan pepa tsuabuda jaya ja medanua shinan pepas kainmakin pepakidi shinanmisbuki. Jamen jabun Jesucristo ikunwanbumadan, uke medan pepa besti jayama shinan chakabudi jaya uinchakatidubuki, jatun juanti medanua chakabu jaya kainmaibudan. <sup>16</sup> Jaskawen taexun jabun yuikin: “Dios en ikunwaiin”, ibiakin jamapai chakabu betsa betsapa akin Diosun jaska bechipaimis akama dananmisbuki. Jabunan, eska tibi wakanan, jatuki sinatakin tsua bechipaima inun, juanti kushi sinadanwan jawa jatun shinan pepamawen taexun jawada pepa wakin Dios axuntidubumaki.

## 2

### *Jancha pewen yusinkin jatu medabewakin pewatikiaki, na janchadan*

<sup>1</sup> Mianan, jawada min jatu yuikatsis ikaidan, na en mia yuiai keska wakin jabias Diosun jancha kayabi pepawen jatu yusinkubainwen. <sup>2</sup> Juni ewabu jatu medabewakatsis ikin yusinkin, jau padanananma jancha kayabi besti yuikubainunbun, inun jatun jiwea pe jau mekenunbun, inun jau jatun shinan pe mekediakubainunbun inun, Jesucristokidi ninkatan jau chiban pewanunbun inun, nui jau bechipainamenunbun inun, jawada bika betsa betsapa mei jau kushipakin binukubainunbun jaskakidi jatu yuikubainwen.

<sup>3</sup> Ainbu ewabu jatu medabewakatsi yusinkin jabiaskadi jatu akubainwen. Jatun jiweawen pe jiwekin Dioskidi jau pe shinanunbun inun, jau ana yuanananyamanunbun inun, jau ana paenyamanunbun inun, jaska Diosun bechipaimis jawen jiweawendi jau dasibibu uinmakubainunbun jatu yuikubainwen.

<sup>4</sup> Jaska wakin chipash beneyabu yusinkin jau jawen bene bechipainunbun inun jau jawen bakebudi bechipaikin duawakubainunbun jatu unanmakin jatu yusinkubainwen. <sup>5</sup> Ja inun, jau tsua Diosun janchaki jancha chakabuyamanunbun jatu yusinkin jaska jatun shinan pe meketidubukidi inun, ibubis jatun yuda pe meketidubukidi inun, jatunabu inun jatun mabu tibi jiwe anu pe dayakin meketidubu inun, jawada pepabu bechipaitidubu inun, jatun benebe janchawen binunametidubuma chipashbu yusinkin min jatu unanmadiatiduki.

<sup>6</sup> Ja juni ewabu inun bedunanbu jau jatun shinan pe mekekubainunbun <sup>7</sup> miandi min jiweawen min ikai keskai dasibibu jau pepa idianunbun jatu yusinkinan, jawa tsua bepadananma inun, tatimama pe bestikin jatu ixunkin uinmakubainwen. <sup>8</sup> Tsuabuda nukun yusianki ja ikaibu jatu dake-wakin jau ana nukukidi jawa chakabu yuiyamanunbun jancha pekidi besti yui nemakanantikidi besti jatu yuikubainwen.

<sup>9</sup> Ja dikabi esclavo dayadubun jau jatun tsumapan jancha ninkatan jau chibankubainunbun jatu yusindiaxunkubainwen, jau duapakin jatun tsumabu benimawakin jatube jancha kemanameama inun <sup>10</sup> yumetsuama inun,

jau jawa jatu padanma dasibi jatu axunkubainunbunan. Jatu jaska wamakin nukun mekenan Diosun janchakidi dasibi pepa atikidi jatu uinmaxunkin jatun tsumabu min jatu bechipaimatiduki.

<sup>11</sup> Diosun yudabu mai jidabi anua jawen duapawen jawen paxati Jesucristo jatu unanmakin bitidubu inun bitudubuma jatu xabakabi taxnimaxuniki. <sup>12</sup> Jaska Dios nukuwen nuikin paxati nuku unanmakin yusiaianan, jawen chakabu atimapa tibi inun jawen kemuti tibi na mai anuxun nun amis jawen kushipa pepawen nun chitetidubuki, natian jiwea bena bestiwen jiwekatsis ikin jawa ana shinan chakabuwen shinanma pe besti akin jaska Diosun nuku jiwemakatsi ikai jawen pepati akidan. <sup>13</sup> Jaska jiwekunkainkin nukun Dios binua inun nukun mekenan pepa kushipa Jesucristo xanen ibujaidai ana nuku chintunxunkidanxanai manai nun benimaii. <sup>14</sup> Diosun nuku kupiaya jau nukun chakabuwen taea nun benuyamaxanun bun dasibi chakabu ana shinantima wakin Diosun nuku buaxunun, iwanan, Jesucristo yunua jamebi mawakin jawen jiwea nuku inain nuku mawaxuniki. Nuku jaska wakin jawenabu kayabi pepa nuku waniwen taexun ja besti jiwelexunkin nukun pepa uinmai dayaxunkubainankawanen.

<sup>15</sup> Jatu yusinkinan, kushipai mestenepatan na jancha en mia yusiaianwen jatu benimawakin nemakin jatu pewakubainwen, jau tsuan mia danankin ichakawayamanunan.

### 3

#### *Jesucristo ikunwain jaskai jiwekunkaintikiaki, na janchadan*

<sup>1</sup> Ikunwainbu jau eskakubainunbun en mia jatukidi shinanmai. Jabun mae yunuabu xanen ibubun jatu jawakidida yunuabu jatu ninkatan jau axunkubainunbunwen. Jawa chikishama jamapai tibi jatu yunuabu: "Jamaki", ikama jau axunkubainunbunwen. <sup>2</sup> Tsuakida jancha chakabukin jau yuiyamakubainunbunwen. Ja inun, duapa besti inun pepajaida bestikanan, jatuwen nuikin uinti babutan dasibibu jatu jaibuwakin jau jatu uinmakubainunbunwen.

<sup>3</sup> Nukudan, jabiaskadi jatu itsadi nukun shinan betsa wadiama jiwelexun Dios chiban pewama benua keska nixun jamapai betsa betsapa mei kemui chakabun dayadui nun mapupaunibuki. Jaskai jiwea chakabui betsa jawada jaya uin jaska jayatima jawen kemui jatuki sinatai inun bechipainameama jatu danain inun betsabube danananainan. <sup>4</sup> Jakia januxun nukun mekenan Dios dasibi mai anuabu nukuwen nuikin nuku bechipaikin jawen pepa nuku unanmaniki. <sup>5</sup> Nukubun jawa wakin nun pexunamabia jawen nui pepas jawa jusiamawen nuku mekekin piskumaniki, nukun chakabu chuka keska wakin, nuku ana kain bena wakin jawen jiwea bena nuku inaniki, jawen Yushin Pepawenan. <sup>6</sup> Nukun mekenan Jesucriston jawen pepa jawa yaushiamawen nuku mekekin piskumaniki, nukun chakabu chuka keska wakin, nuku ana kain bena wakin jawen jiwea bena nuku inaniki, jawen Yushin Pepawenan. <sup>7</sup> Nukunmebi nun Dios jawa pepa axuntidumabiaken duapa nukuwen nuikin nukun chakabu nuku buaxuntan jawen pepawen jawen jiwekuinti nun bixanai nun jawen manakanun jawen Yushin Pepa nukuki dasiwaniki.

<sup>8</sup> Na jaskakidi yusianan, chanima kayabiki. Jenekin betsa wama jakidi jatu yusinkubainwen, jabun Dios ikunwainbu duapai jau jawendi jamapai pepa akubainunbunan. Na jancha jaska tibiwenan, jaska jayatan dasibibube pepatidubuki. <sup>9</sup> Jakia Diosun Moisés yusinmaniwen taea jawen yunuti inun jawen nemati inun jatun xenipabukidi janchai judiobu sinatai kemanaamei tsua medabewatidumabia ja iki kunyan ikaibube jatube kemanamei jaskayamakunkainwen, mia ninkabumakenan.

<sup>10</sup> Tsuanda Jesucristo ikunwainbu jatu itimaska wakin jatu paxkakatsi ikaibu medabewanun, iwanan, kenatan min yuia ninkamaken ana ja kachu kenatan min yuia ninkamadiken januxun jau ana matube ichayamaxanun nematan jatu nichinwen. <sup>11</sup> Ja yudabunan, jamapai chakabu wakin jawen juinti medanxun ana Dios ninkabuma ibubis jamebi jatun chakabuwen Dios ma kupimaikiki.

*Tito dayaikidi kenekin keyunikiaki, na janchadan*

<sup>12</sup> Uian niwejaidaitian Nicópolis anu en jiweyuxanaii. Min dayai anu Artemas kasmai Tíquico en yunua mia anu kaya janu jawaidakidan Nicópolis anu eki nukui juxanwen. <sup>13</sup> Nukun jaibu Zenasin gobierno yunuti inun jawen nemati unanjaidai inun yusinan Apolos mia anu kai jikishina janua kaya jau bui nuitapayamanunbun ana jatun jamapai ikunwainbu jatu inanmakin jatu medabewamaxanwen, jau jaya butanunbunan. <sup>14</sup> Min jatu jaska wamaiwen taexun nukunabundi tapintidubuki, jatun jiweawen pe medabenameti shada jatu uinmakin Dios dayaxunaibu jatu medabewatidubuki, jatun jiwea pekidi jatu shinanmakinan.

<sup>15</sup> Dasibi nenu ebe ikabun jatun jancha mia bumakanikiki. Jadi mibe idiaibu anu nukun jaibu nukubetan ikunwainbu nuikin nun jatu bechipaiai nukun jancha nun jatu bumadiaii. Diosun jawen pepawen jau matu dasibi duawakubainunwen.

Jatiski, en janchadan.

Pablo

## FILEMÓN PABLON KENE BUMANIKIAKI FILEMÓN

### *Pablon Filemónkidi shinanikiaki, na janchadan*

<sup>1</sup> En Pablo Jesucristokidi kakape en yusinbaunai ea nemakin bextenun ixun ea bichikin akawanibu inun nukun betsa Timoteobetan min nukube dayamis nukun jaibu pepa Filemóon, en mia kenexun bumaii, <sup>2</sup> ja inun, jabu mibetan Jesucristo ikunwainbu min jiwe anu ichamisbu anudan, nukun pui Apia inun nukun betsa Arquipo, nukubetan Jesucristokidi kakape yusinkin bika tenemisbu anudan. <sup>3</sup> Man unanuma jiwekubainxanunbun jaskatan ibubis man jawa watidumabiaken Epa Dios inun nukun Xanen Ibu Jesucristo matuwen nuikin matu medabewakin jau matu duawakubainunbunwen.

### *Pablon Filemón kenwankin Dios yukaxunkubainikiaki, na janchadan*

<sup>4-5</sup> Nukun Xanen Ibu Jesucristo bechipaikin ikunwankin min chibankubainai inun dasibi jawenabu medibiwen nuikin min jatu duawamiskidi kakape ninkatan benimakin janu en Diosbe janchaitian mikidi shinankin en Dios en mia kenwanxunkubainmiski. <sup>6</sup> Mia jaska waxunkinan, nun jaska Jesucristo ikunwankin chibain keska miandi jaska shinankin jawen pepawen Diosun nuku dasibi duawamis min ninka pewanun en mia Dios yukaxunkubainmiski. <sup>7</sup> Jesucristowen en betsaan, min nuikipawen taea miwen taea benimai en shinan chankaiin, ikunwainbu Diosunabu medibi juinti shinan chankanwankin min jatu nuikipa wakubainmiswen taeandan.

### *Pablon Filemón jawen esclavo dayadu Onésimo ea axunikiaki, na janchadan*

<sup>8</sup> Jaskawen taexun ea en Criston kushipayabiatun en mia yunua en yunua chibankin min atidubia <sup>9</sup> jaskakidi en mia shinanma jakia nui nun jai-bunameaiwen taexun en mia ea akaii. Eadan, en ma mestebuaii. Jaskabiaken Jesucristo en dayaxunkunkainaiwen taexun natian ea bichikin akawaxun ea meneximabuki. <sup>10</sup> Jaskawen taexun mia daewakin mia anu Onésimo en nichiaiin, jau mia dayaxundi kanunan. Nenu ea meneximabu anu jiwxexun Onésimo Jesucristo ikunwanmakin en shinan betsa wamaimawen taea min dayadu esclavo en bake keskaki.

<sup>11</sup> Uatian min esclavo daya chakabui mia anua paxabiaima ikis nukubetan Jesucristo ikunwainwen taea ana jaskamaki. Nuku dabe medabewatiduki, nuku duawakinan. <sup>12</sup> Onésimo en bechipaijaidai mia anu en ana nichian kaikiki. Jaki dakeama min ea atidu shinankin jaska keska waxanwen. <sup>13</sup> Jesucriston kakapekidi datan akin en yusinkubaunpanan bichikin ea nemaimabu min ea jaska waxun medabewatidumaken miwen Onésimon ea medabejaidawakubaini yaushikin en nichinkatsi ikamabia <sup>14</sup> min ekidi shinankin yunuama ibianiken en mia jaskanwantidumaki. Min shinanen min ea yunu bestiai jaska ea bechipaikin min ea amaxuntiduki. <sup>15</sup> Chanima uatian jaskatanda Onésimon mia jeneyubidanima natian ana chintunkaina uatian min jabe imis keskama ma mibetan ikunwainwen taea min betsa kayabi keska ipakexanikiki, <sup>16</sup> ana min dayadu keskama min dayadu pepa binua min bechipaiai min betsa kayabi keskadan. Ean en bechipaichakayamabiaya mian bechipaikin min ea binumaxanimenkain. Dayadu esclavo besti jayama jakia dayadu binuan keskai mibetan Jesús ikunwainwen taea min betsa keska min jayaxanaii.

<sup>17</sup> Jaskawen taexun ebetan Jesús ikunwankin min ea jaibuwaniki. Jaska ekidi shinankin min ea duawai keska wakin ewen taexun Onésimo ana idixanwen. <sup>18</sup> Mia jaska wakin ichakawabidanimamenkain. Mia dibimatan paxaimamenkain. Jaskadada ikidanimadan, en pechiki netanwen, <sup>19</sup> en mia pakaxanaidan. En mia Jesús unanmaniwen taexun miandi min ea dibijaidaki. Jaskakidi ea shinanwen. Na mia kenexunkinan, en meken kayabiwen en Pablon en mia axuain. <sup>20</sup> En betsaañ, eskaki, shinanwen. Min ebetan Cristo ikunwainan, nukun Xanen Ibu benimawanun ika ana jakisnatama ewen nuikin Onésimo ea jaska waxunxanwen, ea juinti shinan chankanwankinan, jaska nun Criston betsawen taeadan.

<sup>21</sup> En jancha min ninkakin chibannmis unankin en mia kenexun bumaii, jaska en mia ea akai binukin min pepawaxanai shinankinan. <sup>22</sup> Ja inun, Diosbe janchakin man ea yukaxunaiwen taexun Diosun jawawama jau jatu ea nichinmaxanun ikunwankin en manaii, dateamadan. Jaska inun, matu uin ka janu en iki kaxanai anu en uxati ea pewaxunxanwen.

<sup>23</sup> Jesucristo ikunwain achixun ebe Epafras menexabu jawen janchadi mia bumaikiki. <sup>24</sup> Marcos inun, Aristarco inun, Demas inun, Lucasin ea medabewai dayamisbun jabiaskadi shinankin jatun jancha mia bumadiakanikiki.

<sup>25</sup> Nukun Xanen Ibu Jesucriston jawen pepawen jau matu duawakubain-unwen.

Jatiski, en janchadan.

Pablo

## JESÚSUN TSUMA BETSAN JESÚSUN ENABU HEBREONAWABU KENEXUNIKIAKI HEBREOS

*Natian Diosun jawen bakewen jawen jancha nuku unanmanikiaki, na janchadan*

<sup>1</sup> Jancha pepa en matu bumai uinkin ninkaidakanwen. Ja dukunan, nukun xenipabube Dios janchaidan, jawen jancha yuixunika tibiwen jawen jancha jatu yuimakin jawenchains jatu yusinkin betsa tibiwen taxnimakin jatu yuikubainiki. <sup>2</sup> Jaska wabiakubainkin jawen bake kushipa watan mai jidabi dasibi damiwamanixun dasibi ibu wamanixun natian jawen jenekin jawen juni bake janchamakin Epa Diosun jawen jancha nuku unanmaniki. Jaskakidi matu ana yusinun ninkakanwen. <sup>3</sup> Jawen Epan kushipaya chax-akapa jawendua keskadirun dasibi betsa betsapa damiwani jawen jancha kushipawen mekekubainmiski, jau jawa benuyamanunbunan. Ja inun, jawen Epa nuku daewaxuni mawakin nukun chakabu buatan jawen Epa kushipajaida dasibi binu keyuatun yusiudi tsaua nai anua ma jabe xanen ibukunkainikiaki.

*Diosun bake pepatun nai tsumabu binu keyunikiaki, na janchadan*

<sup>4</sup> Jau Jesúsun dasibibu yunu keyukubainxanun Diosun yuikin: “Nadan, en bakeki”, akin nai tsumabu dasibi jatun kushipa binumaniki, jawen kena tuxkutima inankinan. <sup>5</sup> Dios jawen bakekidi janchani matu yuinun ninkakanwen. Diosun jawen nai tsuma betsa yuikin:

“Min en bakeki”,  
akin betsa yuitaskama inikiaki. Jakia jawen bake bestikidi janchaidan, eskaniki:

“Min en bakedan,  
natian en jiwea mia inankin en mia yunuaii”,  
aniki. Ja inun, jawen nai tsumabukidi jaska yuiamabia jawen bakekidi yuikin:

“Eadan, en jatun epa ikunkainxanaii, jawenadan.  
Jadan, en bake ikunkainxanikiki, enadan”,  
Diosun adianiki. Jakia jawen nai tsumabu jawen bakebumawen taea jaska jatu yuitaskama iniki. <sup>6</sup> Kene betsa anuxun jawen bake bestichai nukun Juchi Kayabi Iyua yudabube jiwemaxanaikidi jatuki chanikin yuikin:

“Jau dasibi en nai tsumabun en bake duawakin kenwandiananunbunwen”, adianiki. <sup>7</sup> Jakia jawen nai tsumabukidi yuikin:

“En daya jau ea axununbun  
niwe bidenepa inun chi jede kushipa keska wakin  
en nai tsumabun jau daya betsa betsapa ea jabuan axunkubainxanunbun  
en jatu yununiki”,  
anikiaki. <sup>8</sup> Januxun jawen bakekidi yuikin:

“Diosuun, mia xanen ibuidan,  
min ea keska xanen ibui ikibi ipakexanaii,  
xanen ibui jawa chakabu jayamadan.

<sup>9</sup> Jawada pepa bechipaikin jamapai chakabu min dananmisdan,  
min jaskamiswen taexun ea en min mekenika Diosun en mia katuaki.  
Xeni maxu akin unanti wakin en miwen benimaiii,  
min jaibuaibu keskawama jatu mia binumakinan”,

aniki. <sup>10</sup> Ana jawen bake yuikin:  
 “Xanen Ibuun, jawa jayamajaidabiaken  
 mianan, damiwakin taewakin nai inun mai jidabi ibubis min damiwaniki.  
<sup>11</sup> Miadan, jawa betsama min ipakexanaii.  
 Jakia min dami wanidan, keyuxankanikiki, tadi chukai keskaidan.  
<sup>12</sup> Tadi katunkin akawamisbu keska wakin  
 dasibi tsuanda tadi pekatan betsawemis keska wakin  
 nai inun mai min ana bena waxanaii.  
 Jakia miadan, maei min betsatidumajaidaki,  
 min jiwea keyuisma min jayadan”,  
 aniki. <sup>13</sup> Januxun Diosun jawen nai tsumabu betsawemis keska wakin  
 iniki:  
 “Miki sinatakin mia danainbu kupikin  
 en jatu mia maemakin keyumadiama manai en yusiudi tsauyuwe”,  
 aki jawen bakekidi besti janchanikiaki, jawen nai tsumabukidi yuiamadan.  
<sup>14</sup> Ja inun, Diosun jawenabu kayabi jabun jiwea ikibi ika bitan nun pax-  
 axanaibu nuku yaushikin jawen nai tsumabun jau nuku mekekubainun-  
 bun Epa Diosun jatu yunukubainmiski. Dasibi Diosun nai tsumabudan,  
 yushinki, jabun Diosun daya axunmisbudan.

## 2

### *Jawen paxati kayabi danainan, meseikiaki, na janchadan*

<sup>1</sup> Diosun baken nai tsumabu binuatun jamebi jatu yusini jaskakidi jan-  
 cha nun ninkanidan, ana jakidi ninkajaidakubainankanwen, ja jenetan  
 bai betsawen nun buyamanunbunan. <sup>2</sup> Ja inun, jawen nai tsumabu jan-  
 chamakin uatian Diosun jawen jancha jawen nai tsumabuwen jatu yus-  
 inmapauniki. Ja Diosun yunuti inun jawen nemati kushipa jayanibudan,  
 tsuanda ninkakin chibanna chakabu waibu jawen taexun jawa kaneama  
 Diosun jatu kupikubainiki. <sup>3</sup> Uinwen. Ja dukun nukun Xanen Ibun jamebi  
 jawen paxati jakidi ibubis bebunkidi chani taeniki. Januxun nuku yubakin  
 tsuabunda jakidi ninkai chanima Diosun jancha nun unankubainibuki.  
 Nukubudan, jawen paxati ewapa chanima jubianiken mekei peama jiwe  
 kayabikatsi ikamadan, jaskatan ibubis nun paxatidubumaki.

### *Diosun bake nukun yuda keska iyuniaki, na janchadan*

<sup>4</sup> Ja inun, jawen Yushin Pepawen jawen e imakin unanmati damiwamakin  
 na yuba bena Jesúsun tsumabubetan Epa Diosun jatu mestenwanmaniki.  
 Jaska wanixun jawen shinanen nuku tibi jawen daya betsawemis  
 inanmiski, jaska shinain keska nuku tibi inankinan. <sup>5</sup> Bawaitian na mai  
 anu Diosun damiwani anu yudabu jiwebaunxanaibu anuxun jau Diosun  
 nai tsumabun yunuyamaxanunbun Diosun janu jatu yunuama iniki, na  
 jaskakidi nun janchaidan. <sup>6</sup> Jamen kene betsawemis anuxun Davidin xabakabi  
 wakin yuini matu yuinin ninkakanwen:

“Nun yudabu jawauma keskabiaken  
 jaska min nukuwen nuimis en shinanmiski.

<sup>7</sup> Min nai tsumabu jatu kushipa watan  
 yudabu jatu kushipa inankin min jatu bexmas wayuniki,  
 dasibi min damiwani  
 jatu ibuwamayukin jatu duawakinan.

<sup>8</sup> Jaskaken dasibi jau mekekubainxanunbun min jatu yununiki”,  
 aniki. Jaskabiaken mai jidabi damiwani jau jawen xanen ibuxanunbun  
 Epa Diosun jatu yuba keyubiani yudabun dasibi ibuwai xanen ibuaibu

nun uindiamaki. <sup>9</sup> Nai tsumabu kushipa keskama Jesús kushipa bexmas keska wayutan Diosun jawen nui nuku uinmakin Jesús taxnimatan jau dasibibuwen taea mawatan bestenun Diosun yunua jaska chibain nuitapatan mawatan binuniwen taea natian Jesús kushipajaida dasibibu binua jawen ibu dapi ma tsaua nun unaiin.

<sup>10</sup> Diosun dasibi damiwakinan, jawena aniki, jawen kushipawenan. Jaska bechipaiai keska dasibi jawen bakebu jawen kushipayadi jau jabe jiwanun bun jaska shinankin Diosun jawen bake Jesucristo nuitapawakin dasibi menemakin nukun mekenika nuku waxuniki. <sup>11</sup> Dasibun nun Dios bechipaikin chibainbudan, nukun Epa Dios medibitun nuku jawen bakebu wakin nuku medibi wamiski. Jaskawen taea jawen bake Jesucristo nukuki dakeama nuku kenakin: “En betsabuki”, ikin nukukidi yuimiski. <sup>12</sup> Diosun jancha yuixunikatun Diosun Mesías taxnimaxanaikidi yuikin:

“En betsabu inun en puibu anuxun

Dios mia kenwankin mikidi nawakin en jatu unanmakubainxanaii”, iniki. <sup>13</sup> Janua kene betsabu anuxun yuikin:

“Eandi min en Dios en mia ikunwankubainxanaii”, iwanan, ana yuikin:

“Jabu Diosun jawen bakebu ea inantan  
ea jatu mekemanibe en jatube nenuki”,  
iniki.

<sup>14</sup> Jatun ibubun jatu bake bikin jabias nami inun jimi jaya wamiski. Jaska keskadiai Jesús damidiatan taxninun ika yudabun nami inun jimi keska biniki. Jaska bitan jawen jatu tenanmis kushipa diablo Satanás jaya maemakin binuntan jatu mexpamanun ika jawen yudawen Jesús yudabu mawaxuniki. <sup>15</sup> Ja mawaiwen jatu jaska waxunkin jabu mawaki datei jiwekubainmisbu dasibi Jesúsun nun jabun ikunwainbu ana jawa mawaki datetima nuku waxuniki, bai chakabu pewakin akawakinan. <sup>16</sup> Jaskawen taea chanima nai tsumabu medabewanun ika juama jakia Abrahamnen Dios ikunwanpauni keska jawen bababu medabewanun ika Diosun bake juniki.

<sup>17</sup> Jawen betsabu inun jawen puibu keskatan jatun yuda bitan Dios dayaxuni ja bebunga jawenabu janchaxunika binua inun ika jawen yuda Dios inain mawai jawa chintuanma pepa duapa iniki, yudabu Dios jatuki sinatamis jatu medabewakin jatun chakabu buaxunun ikadan. <sup>18</sup> Januxun Diosun bake unanti wanun ixun Satanásan padanpanan Jesús ibubis yumankin binun keyuniwen taexun natian tsuabuda Satanásan padandiai Diosun baken nuku medabewadiatiduki.

### 3

#### *Moisés pepabiaken Jesúsun binuniikiaki, na janchadan*

<sup>1</sup> Nuku jaska wakubainaiwen taea en betsabu inun en puibuun, nun ikunwanxanun bun Diosun nuku kenakin katuniwen taea nun jawenabuki. Jaskaken Diosun jawen bake jawen kushipaya yununika wakin ja Diosbe nuku janchaxunika Xanen Ibu Jesucristo dasibi betsabu jatu binunidan, ja besti shinankubainkanwen. <sup>2</sup> Diosun nukun xenipabu xanen ibu Moisés jawada yunua kaneama chibankin Diosunabu mekekubainikiaki. Janua Jesúsdi katunixun jawen daya yunua Jesúsundi kaneama chibankin jawenabu kayabi nuku mekediakubainikiki, Moisés binukinan. <sup>3</sup> Jamen tsuanda jiwe bena pepawaken jawen jiwe kenwanbiakin jawen ibu ja jiwe binumakin kenjaidawadiamisbuki. Ja keska wakin Diosun Moisés kenwanbianiken jawen bake Jesúsun Moisés binuniken Diosun ja binumakin kenjaidawamiski. <sup>4</sup> Ja inun, junibun damiwakin jiwe inun mabu wabiamisbun

jatu binukin nai inun mai jidabi Diosun jawen bakebetan damiwaniwen taexun yudabu jatu binua nun unaiin. <sup>5</sup> Jamen dasibi Diosun ani chipu nun ninkaxanai Diosun enabu jawen jancha Moisin jatu yuixuni chibambianidan, jawen tsuma besti iniki. <sup>6</sup> Jakia Cristodan, chانيا jawen bake kayabitun Diosunabu mekei Diosbe jatu janchaxuni kaneismaki. Jaskaken Cristo ikunwankin chibankin shinan betsa wama nun mestenwantan benimakin nun manaibu Jesúsun nuku benu Bainama ixanikiki.

*Diosun enabudan, Dios anu juindukunti jayakiaki, na janchadan*

<sup>7</sup> Jaskawen taexun Diosun Yushin Pepatun jawen jancha yuixunai chani-mani matu ana shinanmakin yuinun ninkakanwen.

“Natian Diosun jancha matun man ninkaibudan,

<sup>8</sup> matun uinti kushiyamakanwen,

nukun xenipabun janu tsua jiweabumanuxun

Dios ninkama danankin unanti wamakin sinatamanibu keskakinan.

<sup>9</sup> Ja inun, janu tsua jiweabumanuxun

en kushipawen jatu e imakin

unanmati dami 40 año en jatu ima atanbidanai uinmabiakin

en jancha ninkama ea unanti wakin

matun xenipabun ea sinatamakubaunibuki.

<sup>10</sup> Ja yudabun ea jaska waibu jatuki sinatakin yuikin:

‘En shinan bechipaikin unanti wakatsi ikama danankin

jatun uinti pepadiabuman jatunmebi benui mapuabuki’, iki

<sup>11</sup> jaskawen taea jatukidi yubai:

‘En jatuki sinataiwen taea

janu mai pakea pepa en jatu yubabiani anu jau jikiyamaxanunbunwen’”,  
ika Dios yubakaniki.

<sup>12</sup> Jaskawen taea en betsabu inun en puibuun, matun uintinin chakabu shinankin ana ikunwanti kushiwama chintuntan Jamebi Jiwemis Dios jenebainkatsi ikama matu tibi ibubis mekekin shinan pewadikubainkanwen. <sup>13</sup> Jaskama matubudan, jaska Diosun jancha natian chaniaya natian besti matun shinan man jawaida pewatidubuki. Jaskawen taea manama benimadabe bestinankanwen, badi tibidan, jau tsuan taska betsa matu padanyamanunbun inun chakabun matu mextea chintuin matun uinti man kushiyamanunbunan. <sup>14</sup> Cristobe jiwekatsis ikin jawen kakape ninkatan nun ikunwankin taewanidan, betsa wama jabiaskas jakidi shi-nankubainankanwen.

<sup>15</sup> Diosun jancha jawen Yushinin matu yuikin:

“Natian Diosun jancha matun man ninkaidan,

matun uinti kushiyamakanwen,

matun xenipabu janu tsua jiweabumanuxun

Dios ninkama danankin unanti wakin sinatamanibu keskakinan”,

iniki.

<sup>16</sup> ¿Tsuabun animen, Diosun jui ninkabiatan chipu sinatamakinan? Jabu Moisin Egipto mai anua dasibi jatu paxawanibu jabun anibuki. Shinain-dakanwen. <sup>17</sup> ¿Tsuabuki inimen, 40 año Dios jatuki sinataidan? Janu tsua jiweabumanuxun Dios ninkama jatun chakabuwen jatu kupia mawaku-bidankin imanibuki. <sup>18</sup> Ja mae pepa Canaán anu Diosun jatu yubai jatukidi janchai: “En jatu janu jikimatan jatu juindukunmamaxanaidan, jabuan en jancha ninkama danainbudan, jabu jikiama ixankanikiki”, iniki. <sup>19</sup> Chanima Diosun jancha ikunwankin chibankatsi ikama jabu jikiabuma inibu jaska jatukidi nun unaiin.

## 4

<sup>1</sup> Ja jaskanibukidi natian nun yuikubainaide, jawen mae pepa jaska Dios yubakani janu juindukuin jikikatsi iki nun ikaibudan, jaska keskadiki. Uindakanwen. Betsabun matun shinan man betsa wamaken jaskawen taea man jikitidumadiki. <sup>2</sup> Chanimaki. Matun xenipabu jawen yubati jancha Diosun Moisés jatu yuimani keska wakin jawen kakape jancha juindukunti betsakidi Jesúsun jawen tsumabu unanmatan jatu nukudi yusinmani nun ninkadiakubainaii. Nun jatu keskatidumaki. Uindakubainankanwen. Jaskai nukun xenipabun jawen yuba jancha juindunkuntikidi ninkabiai ikunwanma inun jawa chibana ikubainaibuwen taexun jawen mai pepa yubani anu jau jikiyamaxanunbun jatu yubanitun jatu nemaniki. <sup>3</sup> Tsuabunda nun ikunwainbu Diosun juindukunti pepa anu nun jikitidubuki. Jakia tsuabuda nukubetan ikunwanbumadan, jawa jikitidubuma-jaidaki.

“En jatuki sinataiwen taea  
janu en juindukunti pepa en jatu yubabiani anu  
jau jikiyamaxanunbunwen”,  
ika Dios yubakakin yuini shinankanwen. Dios jaska yubakabiani mai jidabi damiwatanan, juindukunti pepa ma pewani jayaki, janu ikunwainbu nun jikitidubudan. <sup>4</sup> Jaska Dios dayani Moisin jawen jancha keneni séptimo diákidi yuikin:

“Dasibi damiwakin jawen daya keyutan  
séptimo día Dios juindukuniki”,  
jatu watan keneniki. <sup>5</sup> Kene betsa anu janu jawen juindukunti anu yudabu jikitidu kasmai jikitidumamenkain, jawa jawen jancha ninkaisbumawen taea jatuki sinatai yubakai:

“Janu en juindukunti pepa en jatu yubabiani anu jau jikiyamaxanunbunwen”,  
ika Dios janchaniki. <sup>6</sup> Jabu dukun nukun xenipabun jawen jancha pepa ninkabiatan danain mai pepa juindukunti anu jikiama inibuki. Jakia betsabu jikinibuki. Natian ja yubani janchadan, betsa wadiamaki. Jaskawen taea ja juindukunti pepa anu tsuabunda ikunwain nun jikixanaii. <sup>7</sup> Jakia jawen jancha danainbu yuini keska wakin Diosun yudabu shinan betsa wamakatsis ikin janu xaba betsa pewaitian jaska jancha taxnimanunbadiai pewakin ana janchaniki. Badi ichapa katan anunbadiaikidi bebunkidi nukun xenipabu xanen ibu David jakidi nawamakin yuimakin:

“Natian matun man Diosun jancha ninkaidan,  
matun juinti kushiyamakanwen”,  
akin janchamai ikunwanxanaibu dasibibukidi Dios jatu yubakaxuniki. <sup>8</sup> Ja inun, jawen jancha dananibun bakebu mai pepa anu Josué jatu iyuxun janu juindukunti kayabi jatu ibuwamaya janu juindukunti betsakidi Dios yubakai ana janchama ikeaniki. <sup>9</sup> Jaskawen taea jawen juindukunti pepa naiudi nun Dios ikunwainbu medibi nun jawenabu jikixanaibu jayayuaki-aki. <sup>10</sup> Ja inun, Diosun juindukunti pepa anu tsuabuda ma jikia ana dayama Diosbe juindukunpakexankanikiki, damiwakin keyutan Dios juindukuni keskaidan. <sup>11</sup> Jaskawen taea jawen juindukunti pepa anu jikixanun ika nukun medabenan Jesúchibain yumanbiai chintuntaskayamanankanwen, ja jabun jawen jancha ninkama nukun xenipabun dananibu keskakin jatu tanain jatu chibanyamanankanwen.

<sup>12</sup> Ja Diosun jancha kainkinan, paepa jiwea keskatun nukun shinan pe-wakin juni jawen nupe kenu dabeyatun juinti uke medan chapaxun uian keska wakin nukun shinan inun nukun yushin unanti wamiski. <sup>13</sup> Dasibi

Diosun jatu damiwanidan, unanti waya tsuan jani juntain junetidubumaki. Dasibi nukun akadan, jidabi nuku unanti waxanikiki, nukuki kenemis bepentan manakukin pewakinan.

*Jesús Diosbe nukun janchaxunika binua kayabikiaki, na janchadan*

<sup>14</sup> Diosun bake Jesús iwani ana jawendi naiudi kani jawen Epabe nuku janchaxunika binua nun ikunwainwen taexun nukun shinanwen mesten-wantan chibankin jeneyamakubainankanwen. <sup>15</sup> Jaska jiwea bika tenei nun yumankunkainmis keskai nukun Diosbe nuku janchaxunika binua na mai anua jiwedia nukun itsai jamapai tibi mei bika tenediae yumankunkainiki. Jaskabiai jawa chakabu mekin kaneama iniki. <sup>16</sup> Jaskaken jawada mei nun bika teneaitian jau nuku medabewanun Diosun kushipa shinankin jaki dateama ikunwain jaki chanikin ea akubainankanwen, jau nukun Epa Dios nuikipatun nukuwen dabanan ikin jawen duapawen nun nuitapai jau nuku medabewanunan.

## 5

<sup>1</sup> Jaska inun, jawenabu chakabukubainmisbuwen taea Dios jatuki sinatai jabuan jatu daewaxunkin medabewakin chaxuhan tesenxun jau jatu kua keyupakexunxanunbun dasibi Diosbe jawenabu janchaxunika xanen ibu tibi jünibu anua Diosun katumiski, Moisin betsa Aarón katuni keska wakinan. <sup>2</sup> Jamen yuda betsa imis keskai Diosbe judiobu janchaxunika xanen ibu tibitun ibubis mekei peama kanemisbuwen taea jaska shinain jatuwen nuidiatidubuki, unandiabuma inun chakabuwakin kaneaibuwenan. <sup>3</sup> Ja inun, jawen chakabuwen inun nukunabun chakabuwen taea Dios sinatai Diosbe nukunabu janchaxunika xanen ibu tibitun Diosun yununi chibankin Templo jemaintin anuxun yuinaka jatu menu keyuxunkin Dios jatu daewax-unpakemisbuki. <sup>4</sup> Ja inun, tsuanda ibubis eiskaun shinain: “Diosbe enabu janchaxunika xanen ibunun”, ika jamebi katukutidubumaki. Jakia Diosun Aarón katuni keska wakin tsuada katukatsis ikin duawakin jatun besti jatu kenakin katukubainmiski. <sup>5</sup> Jabiaskadi wakin Cristo ibubis katukui nuku janchaxunika binua ibubis ikama iniki. Jakia Diosun duawakin yuikin: “Min en bakedan, natian en jiwea mia inankin en mia yunuaii”, aniki. <sup>6</sup> Januxun jawen kene betsa anuxundi yuikin: “Miadan, minabu ebe janchaxunika niti ikama min ipakexanaii, Melquisedec ipauni keskaidan”, aniki.

<sup>7</sup> Ja inun, nenu mai anu yudabube Cristo jiweyua mawawen dateyamanun ika yumat sain iki kaxai jawen Epa Diosun medabewatidu shinain jabe janchakin jau jawen date yushin nemaxunun jawen kushipa ea aniki. Jawen Epan jancha ninkakin danainsmawen taexun Epa Diosun jaska wai ninkatan jawen date nemaxuniki. <sup>8</sup> Ja inun, Diosun bakebiatun jawada bika tenekin ninkakin chibanjaidanun itan jamapai shadabu jaska Diosun bechipaimis Criston ninkajaidai ixunkunkainiki. <sup>9</sup> Jaskai pepakunkaini jawen besti jiwekuian bi nun jawen paxatidubu nuku ixuin ja besti bai ikibi iniki, nun jabun ikunwankin chibanxanaibu nuku ixuinan. <sup>10</sup> Jawen bake jaska yubani keska watan Melquisedec keskadi wakin jawenabu Diosbe janchaxunika xanen ibu binua jau niti ikama ipakexanun Diosun ja uinkin katunixun yununiki.

*Jesús ikunwanbiatan jeneticakidi jatu yununikiaki, na janchadan*

<sup>11</sup> Jaskai Diosbe Jesús nuku janchaxunmiskidi ichapa en ana matu yuitidubia man unanxubida tapiainwen taea en matu yusiaiñ bikajaidaki. <sup>12</sup> Ja

inun, badi ichapa ikunwanbiakubaini man yusinanandiamaki. Jakia natian yusian betsa betsapa Dioskidi jau tsuabunda unanxubida matu metxtanmabainkin ana yusin pewanunbunwen. Jamen ja dukun jawaida bechipaikin ikunwankin man tapinibuki. Jakia natian man ma punu nukai babujaidaii. Janun piti kushipa pinun ika keskama man bakeishtan chuchu jenediama keskabuki.<sup>13</sup> Ja inun, bakeishtan chuchu besti amis keskabudan, tsuanda jaska nukun Xanen Ibun bechipaiai tapianma man kanekubainaii.<sup>14</sup> Jakia yuda ewabun piti kushipa pimisbu keskabun jabuan besti jawada pepa inun jawada chakabu unanti wakin Diosun jancha pepa unankin katutidubuki.

## 6

<sup>1</sup> Jaska tapinkubaini ewaidan, nun yuda ewa keska itidubukiaki. Jaska bebunkidi Cristokidi matu yusinkin taewanibu jaskakidi nun ana jawen-chains chintuanbidanbidankin nun matu yusintidumaki. Eska tibikididan, ikunwandiabuma jatu ikunwanmatikididan, jawada chakabu betsa betsapa aki jawen taea mawa kayabi anu bumisbu jatu putamakin yusiankididan, jaska wakin Dios chibankin ikunwantikididan,<sup>2</sup> jatu nashimakatsi jatu yusiankididan, jabun Cristo ikunwainbuki mapepixun jatu Dios yukaxuntikididan, mawabu ana bestenxanaibukididan, Diosun jatu unanti watan janu jatu bika tenemapakexanaikidi jaskas yusianwen besti nun matu yusintidumaki.<sup>3</sup> Jakia ikunwain jaska tibiwen nun ewakin nun anunbun Diosun nuku medabewaya jaskai Jesúski nun chiti ipakenunbun ana matu yuinun ninkakanwen.

<sup>4-6</sup> Tsuabuda Diosun jawenabu wakatsi jatu katuxun jawen Yushin Pepa jatu inankin jatu medabewamapakeaya jawen jancha pepa unain Jesús ana juaitian jaskasnunbadiai keskai jiwei taekin jabun Jesús ikunwankin chibantibai putai chintuntan jatunmebi ana shinan betsa watidubumaki. Jabu Diosun baken janchaki kaxekin danankin ana cruzki masta keska wakin jatunabudi Jesúski kaxemaibuwen taexun jatu yusinkin nukundi jatun shinan jatu betsa wamakin nun jatu pewatidumaki.<sup>7</sup> Ja inun, mai pepa anu ui imakin yudabun yunu banaimabu main yume pewai janu Diosun jatu manakumiski.<sup>8</sup> Jakia mai betsa anu Diosun ui imabia yudabun yunu banaimabu main yumewama chaka inun muxa bestiken ja mai chakabu Diosun danankin yupumixun jawen jenekin kuaxanikiki. Jesús ikunwankin jenetan Dios dayaxunchakaibudan, ja mai keskabuki.

<sup>9</sup> En betsabu inun en puibuun, jaskakidi en matu janchawabiaidan, matukidi en shinanan, bai pepaki nukutan man jawa chintuntidubuma man ma mestenwantan paxani en shinaiin.<sup>10</sup> Ja inun, Jesús ikunwainbu betsabu medabewai jatuwen nuikin bechipaikin man Dios bechipaikin Diosun jaska bechipaiai akin man benimawamiswen taexun jawa kanema matun pepadi jakimama matu duawakin matu jawa dananma idiaxanikiki, jaska natian man adiakubainaibuwenan.<sup>11</sup> Jaska matu tibitun shinankin man akaidan, betsabu uinmakin jeneama shinan chankankin jawada pepa man uinkatsis ikai jeneama menekin akubainkanwen, jaska Dios yubakani jeneama manakinan.<sup>12</sup> Ja inun, Jesús chibain chikishi jau man punu nukayamanunbun Jesús ikunwankubainkin jawen unanuma jiweti Dios yubakani bikubainaibu keska wakin jatu chibankin pepa besti wakubainkanwen, janu man mawaitianan.

*Dios yubakai jawen unantinani betsa waismakiaki, na janchadan*

<sup>13</sup> Januxun matun xenipabu Abraham Diosun yubakatsi ikin tsuan Diosun kushipa binua datan atiduma Dios ibubis datan ikin yubakakin<sup>14</sup> Abraham

yuikin: "Chanima ean mia pawakin min bababu ichapa mia waxunkin en mia duawakubainxanaii", aka <sup>15</sup> ninkatan jawen yubati jancha manai jin jin ikama ikunkainkin atimas Diosun yubani bi benimanikiaki.

<sup>16</sup> Ja inun, nukunabu yubakakatsi shinain: "Jawada en jatube yubakai en akamaken jadatuda kushipatun jau ea jaskada waxanunwen", iki tsuada kushipaki mesei yubakamisbuki. Janua jaskakidi yubakaimawen taea ana shinan betsakin ana tsuan yuba betsa wakin maewatidumaki, jawen taea jaa ikidan. <sup>17</sup> Dios jaska yubakan menexanai jawen yubakatidan, jawa mae-wama tsuabunda chanima ikunwankin xabakabi bixanaibu jatu inankatsi Dios jawen bakewen chanima axanai jakidi yubakaniki, mestenwainan. <sup>18</sup> Jaska Dios yubakamis yubanametan maewai chani chakaismawen taea jawen nukuwen nuixanai nun jaki iduxanunbun ja ikunwankin manakanakanwen, nuku axunxanikikidan, jawen taea yubakaniken. <sup>19</sup> Na jaska ikunwankin nun manakaibudan, nukun yushin nun ma mestenwanbuki, jawen xaxu tsumakin mai betanti xankama putakin mestenwankin mai pus amamisbu keska wakinan. Nukun shinan jaska mestenwanwen taea Jesúsun ma nuku pewaxuni anu jawa dateama nukun Dios medibi anu nun kematiduki. <sup>20</sup> Nai anu jaskai buaibu ja dukuntun bai wai nuku bai bepenxuni tsua bebui jikidiama ja nukun Diosbe janchaxunika binua ipakexanai Melquisedec dayapauni keska nuku ixuin kaniki.

## 7

### *Cristodan, Melquisedec jawenabu Diosbe janchaxunpauni keskakiaki, na janchadan*

<sup>1</sup> Melquisedeckidi ana matu yuinun ninkakanwen. Ja Melquisededan, Salem xanen ibu inun nukun Dios binuabe jawenabu janchaxunika inikiaki. Nukun xenipabu Abraham xanen ibu betsabube detenamekin jatu maematan jawada yumetsubainshinabu jatu detexun mebintankin beaya Salem mae xanen ibu Melquisedec kaikain jaki nukuxun Diosun Abraham jau duawapakexanun Melquisedecin Dios yukaxunikiaki. <sup>2</sup> Jaska waxunaya Abrahamnen jawenabu yunua nawabun mabu mebinshina paxkakin manchin meken dabeti wabu Melquisedec duawakin kenwankin mabu manchin bestichai Abrahamnen inankuinikiaki. Jamen betsadan, Melquisedec jawen kena maewadan, xanen ibu shinan pepaki. Ja inun, jawen kena betsaa Salem xanen ibu maewadan, jawenabu unanuma jiwetanika xanen ibuki. <sup>3</sup> Ja inun, betsadan, nukunabu Diosbe nuku janchaxunikakidi jatu unankin jatun epa inun jatun ewa inun jatun xenipabukidi unankin nun jatu tanakubainmiski. Jakia Melquisedec betsajaidakiaki, tsuan unanmadan. Jawenabukidi tsuan unanma inun jawen kaiankidi tsua jakidi janchaisma inun mawani tsuan unanmakiaki. Jakia Diosun bake keskai jawenabu Diosbe janchaxunika ipakediaikiaki, jeneamadan.

<sup>4</sup> Ja inun, Melquisedec xanen ibujaidakin nukun xenipabu Abraham xanen ibubia ja binuawen taexun nawa xanen ibubube detenamekin maematan jatun mabu bexun meken dabeti manchintan Abrahamnen Melquisedec paxkaxunkin manchin bestichai inankuinikidi ana matu yuinun ninkakanwen. <sup>5</sup> Ja dukun, Abrahamnen baba Levín bababu Diosbe nukunabu janchaxunikatun Moisin jatu yusini jancha chibankin dasibi jatunabu jabias Abrahamnen bababubia yuda betsabu anua jatu akawakin jabuan yunu manchianbu jabun dukun ja pití paxka taewaxunmisbuki,

manchin betsa Levín bababu inankinan. <sup>6</sup> Melquisedec Levín babamabitutun Abraham anua jawen mabu manchian betsa binikiaki. Ja inun, bet-sadan, Diosun Abraham duawakin ma yubabianiken Melquisedec xanen ibujaidatun nukun xenipabu Abraham bexmas medabewakin duawaniki-aki. <sup>7</sup> Tsuada kushipa bexmas jau Diosun duawanun betsan binuatun Dios yukaxunmisdan, jaska nun unaiin. <sup>8</sup> Uinkin shinankanwen. Levín bababun Dios dayaxunkin jawenabu Israelbun inankuin bixunbiakubainmisbudan, debukubidanmisbuki. Jamen Melquisedeckidi kenenibudan, jiwepeakeai-wen taea Abraham anua inankuin bikinan, Levín bababu binuniaki. <sup>9</sup> Na jaska yuikinan, Levín bababu jawenabu Diosbe janchaxunika iki kai shinankin Abrahamnen Melquisedec inani keska wakin natian amisbudan, jaska Melquisedec pakakin inankinan, Abrahamnen janubi ibubis pakaniki-aki, ja mabu manchin meken dabeti watan jatiubus bestichai inankinan. <sup>10</sup> Melquisedec Abraham kawanaiki nukuni keskadan, dasibi Abrahamnen bababu kaindiabumabiaken jawen yuda medanua jabuki nukuni keska nun shinantiduki. Chanima Melquisedecin jawen kushipawen Abraham inun Levín bababu binua iniki.

### *Diosbe jawenabu janchaxunika binua bena wanikiaki, na janchadan*

<sup>11</sup> Israelbu Diosun jatu jawen pepawayukatsi jawen yunuti inun jawen nemati jancha Moisés jatu inanmakin yununiaki. Jawen taexun Levín bababu Diosbe jawenabu janchaxunika wakin ja jancha chibankin jau jatu pewakubainxanunbun, iwanan, Diosun Moisés jabu katumanikiaki. Jatu jaska waniwen taexun jabuan jawa pewama kanekubaini jiwenibuki. Jaskawen taea juni betsa Diosbe nuku janchaxunika betsas Dio anua juniki. Jamen Aarónen bababun amis keskama jakia Melquisedec imis keskai Diosbe nukunabu janchaxunika bena jau ipakexanun jaska Diosun shin-anixun jawen yunuti maewanikiaki. <sup>12</sup> Janua Jesús Diosbe nuku janchaxu-nika yunukin nukunabu Diosbe nuku janchaxunikabu jatu binumakin jatu jamen waniki. Ja dikabi jawen yunuti inun jawen nemati jancha betsa wakin Diosun maewadianiki. <sup>13-14</sup> Nukun Xanen Ibukidi kenenibudan, Israelbu xukua betsa anua taxniniki, Levín bababu anuamadan. Ja xukua anua jawa Diosbe jawenabu janchaxunika jayadiama iniki. Jakia Judán bababu anua nukun Xanen Ibu Jesús taxnidan, dasibibun unankanikiki. Jamen Moisin Diosbe jawenabu janchaxunikabukidi kenekinan, Judán bababu anua kainxanaikidi jawa jatuki chaniama iniki.

<sup>15</sup> Jaska Diosbe nuku janchaxunikakidi Diosun jawen yusian maewanidan, chanima xabakabi nun unantidubuki, Diosbe nuku janchaxunika betsajaida Melquisedec keska nukun Xanen Ibu nuku waxunidan. <sup>16</sup> Jaska junibu jau nukunabu Diosbe janchaxunika binua ikunkainxanun Levín bababu anua katumisbu keska wakin ja jancha yununi chibankin nukun Xanen Ibu Diosun katuama iniki. Jakia jiwea kushipa jaya tsuan yamawatidumawen taea niti ikama nuku janchaxunpakeikiki. <sup>17</sup> Ja kaindiamabia jau jawenabu Diosbe janchaxunika ipakexanun jakidi kenenibudan, eska yuiaki:

“Miadan, minabu ebe janchaxunika niti ikama min ipakexanaii,  
Melquisedec ikunkaini keskaidan”,  
aniki. <sup>18</sup> Jabu dukun katuxun Diosun jawen janchayabi jatu yunubiani ja yunuti xeni babutun nun jaki chiti ibia nukun jiwea jawa nuku pepawatidu-maken Diosun nemakin bexteyuniki. Jaskawen taexun Jesús nuku janchax-unika taxnimatan jatun daya binumaniki. <sup>19</sup> Diosun Moisés yunua jawen jancha keneni chibantiai jatun nuku pepawatidumaken jawen xantukun

betsa yunukin nuku jawen yuba bena pejaida wakin ja chibain jaki dasitan Diosun enabu kayabibu nun jiwxanun bun nuku axuniki.

*Jawenabu ini keskama Diosbe ja nuku janchaxunika binua Jesús jiweakiaki, na janchadan*

<sup>20</sup> Ja inun, Jesús katukinan, Dios ibubis yubakakin betsa watimawakin mestenwankin Jesús katuniki, jau nuku janchaxunpakexanunan. Jakia Diosun jawa yubama yunukin Levín bababu katunikiaki, Diosbe jau nukunabu janchaxunika ikubainun bunan. <sup>21</sup> Jamen nukun Xanen Ibu katukinan, jawen yuba kanetima waniki. Jakidi tana yubakaikidi David jakidi janchakin kenekin:

“Diosun jawen bake katukin jakidi yuikin:

‘Miadan, ebe minabu janchaxunika min ipakexanaii, niti ikamadan’, akin yubakin Diosun ma yui janchaxu ana jawen shinan betsawama ixanikiki”,

akin nuku kenexuniki. <sup>22</sup> Ja dukun nuku yubani keskama Jesúswen jawen yubaka bena binumakin pepajaida waniki. <sup>23</sup> Ja inun, Moisin jancha chibain Diosbe nukunabu janchaxunikabu midimabu dayabiai betsawaska tsua jiwei ikibi ikama dasibibu mawakubainmisbuki. <sup>24</sup> Jakia Jesús ana mawatidumawen taea ja besti Diosbe nuku janchaxunkunkainaya betsawaska waxun jawen daya mebintidumaki. <sup>25</sup> Tsuabunda Jesús ikunwain jawen Epa Dioski dasia Diosun kupiti binui paxaibu jiwekuian inankin jatu medabewai Diosbe nuku janchaxunpakeikiki, jawa niti ikamadan.

<sup>26</sup> Janua Jesús Diosbe nuku janchaxunika binua nun jaska keskadiai ji-wetidu ja jawa chakabu jayama inun jawa detsis jayama medibi pepa besti jaska yudabu chakabukin Dios sinatamamisbuki keskama pepakin keyu jatu binutan naiudi pepajaidai jaudi nuku jiwei kaxuniki. <sup>27</sup> Ja nukunabu Diosbe nuku janchaxunikabu binuabunan, xaba tibi yuinaka betsawasanan jatu kuakin menu keyuxunmisbuki, ja dukun jatun chakabu dukun buatan ja kachu jatunabun chakabudi buaxunkinan. Jamen Jesúsdan, jatu keskamaki. Jatun nukun chakabu Dios buamai jawen jiwea yaushama cruz anua besti wai jawen jiweawen nuku mawaxunkin ana mawatimai ibubis Dios nuku daewaxuniki. <sup>28</sup> Ja inun, Diosun Moisés yusini jancha chibain pepakatsi ibiai Diosbe jatunabu janchaxunikabun kanemisbuki. Januxun Diosun jawen yunuti inun jawen nemati yunu keyunixun jawen bake yubakin katukin nukunabu Diosbe janchaxunika binua pepajaida jau ipakexanun jakidi yubakatan katuniki.

## 8

*Diosun Jesúswen yuba bena pejaida wanikiaki, na janchadan*

<sup>1</sup> Nun jaska jakidi janchaidan, nuku Diosbe janchaxunika binua nun ja shinan kaya waidan, nai anu jawen ibu Diosun tsauti yusiudi nuku tsauxunaki. <sup>2</sup> Janu Dios jiwea anua Diosbe nuku jabi janchaxunika kayabi jawen daya akidan, jaska jatu yusinmaniwen taexun jatun yusian nun ikunwaiin. Chanima Diosbe nuku janchaxunmistun jatu dasibi binutan januxun tsuan ana ichakawatima anu Diosbe xanen ibukin janu Dioski nukuti kayabi Diosun besti ani anuxun nuku inun jawen Epa Dios daewakin nuku jaibunamemaikiki, ana sinatamamadan, junibun Templo wama ini anuxunan. <sup>3</sup> Ja inun, Diosbe jawenabu janchaxunika tibidan, Diosun jatu katukubainmiski, jau jabun jatu medabewakin jawen Dios daewati yuinaka inankuiainbu jau jabun kuaxunkubainun bunan. Jakia Jesucristo nuku janchaxunika inun ikadan, jawen yudawen jawen jiwea yaushama jawen

Ibu Dios nuku daewaxunun ika nuku mawaxuniki. <sup>4</sup> Jamen nenu mai anuxun Diosun jancha Moisin yusini chibankin Diosbe nukunabu janchax-unikabun chaxuwan bake inun ina awa tesenxun kuakin ma jatu menu keyuxunkubainmisbuwen taeandan, nukun Xanen Ibu Jesúsdan, jania Diosbe nuku janchaxuntiduma ikeanaii. <sup>5</sup> Ja inun, jaska Mati Sinai anuxun Diosun nai anua tadi inun bichi jiwe dami Moisés uinmashina Moisin jatu amanun ikaya januxun Diosun Moisés ana yuikin:

“Uindawe. Jaska mati anuxun en mia uinmashina keska ja itsa jatu amaxan-wen”,

aniwen taexun Diosun Moisés uinmani ja kayabima ja itsa uinmani keska ja Israelbu jawenabu Diosbe janchaxunikabun chibankin akubainmisbuki.

<sup>6</sup> Jakia Cristo nuku janchaxunika kayabidan, ja jawen Epabe nuku janchax-unik nukukididi shinain nukuwen dabanan Dios jakidi yuba bena pejaida ana tsuan betsa watima waniki, jawen taexun jawa kanetima chanima yuba mestenwankinan.

*Ja dukun Diosun yubani yamawai kai ana bena yubaxanaikidi janchaniki-aki, na janchadan*

<sup>7</sup> Janua ja dukun yubani pepajaidaken jawen yubati jancha ja kachu Dio-sun ana yubama ikeaniki. <sup>8</sup> Jakia ja yudabu Diosun uian jawa jawen yunuti pe chibabumaken januxun jatukidi jawen yuixunika Diosun Jeremías yuikin:

“Diosun yuikin: Jawatianda Israelbu inun

Israelin bake betsa Judán bababube

en jatube yubakai benaxanaii.

<sup>9</sup> Na jaskakidi jatube yubakaidan,

ja baditian jatun xenipabu Egipto mai anu jiweabu  
en kushipawen en jatu tsekabidankin iweni keska  
ja shinanwen en jatu ani keska en wama ixanaii.

En jabu jatu yubani ea chibankin pewabumawen taexun  
en ma jatu jeneaki, iniki, Xanen Ibu Diosdan.

<sup>10</sup> Jamen janu jatiada Israelin bababukidi en ana jatukidi yubakaidan,  
eska en ixanaii.

Jatiada jaska en jatube yubakai benaidan,  
ana bemakis en jancha en jatu yunuamaki.

Janua janu jatuki dasikatsi jatun buxka anu en jancha mistukin  
jatun uinti bena watan en jancha jatuki kenea keska en waxanaii.

Januxun jabun mekenika Dios ea en ikaya  
jabu enabu bena medibi kayabi ikubainxankankikiki.

<sup>11</sup> Jatian en jatu jaska waken

en jatun mekenan Dios dasibibun unanxankankikiki,  
xanen ibujaidabu inun jawaumabundidan.

Dasibi jabun ma ibubis ea unan keyuaibun

tsuabunda jawen jaibuaibu inun jawen betsabu ekidi jatu shinanma ix-  
ankanikiki.

<sup>12</sup> Jatun chakabu jatu buaxuntan

en ana jaska jatukidi shinanma ikunkainxanaii”,

aka jawenabu yusintan Jeremíasin nukudi kenexuniki. <sup>13</sup> Janua jawen  
yubati jancha benakidi Diosun Jeremías jancha watan shinain: “Ja dukun en  
yubati jancha xeni en anidan, ana ikama ixanikiki”, ikin ana atimawakin  
shinankin: “Bena en yunuaya ja dukun en yununi xenikunkaini yamai  
kaikiki”, iwanan, Diosun shinaniki.

## 9

*Dios daewati pe bexmaskidi Diosun Moisés yunua jatu amayunikiaki, na janchadan*

<sup>1</sup> Jaska inun, Diosun Moisés ja dukun yubakin yunukinan, na mai anu ja jiwe medanxun jaska wakin Dios kenwankin daewakubaintidubu jatu amaniki, jaska wakubidanibu inun natian nuku axunmisbudan. <sup>2</sup> Janu jaki Dioski nukuti tadi jiwe wanibukidi ana matu shinanmanun ninkakanwen. Ja dukun tadi jiwe nakentan tadi puntenibu anudan, janu jawen mabu betsa ja dukun taeaki, jawen chi ketin inun jaki misi manchinti tapu medibi janu misi mania Dios kuaxunti jayaki, jawen kenadan: “Medibi dintuki”, anibukiaki. <sup>3</sup> Janua ja kachu tadiwen pakea betsa unudi ja xaba dintu bet-sadan, jawen kenadan: “Janu Dioski nukuti medibijaida dintuki”, anibukiaki. <sup>4</sup> Ja dintu medanan, jabianuxundi jakixun ininti kuati oro mane chi tapu jayaniki. Ja inun, jawen Diosun yubani jancha aduti bau medibijaida oro jaswen dasibi bepukin keyua jayanikiaki. Ja medan oro mane shumuki janu tsua jiweabumanuxun Diosun jatu inankin jatu pimapauni maná dudu inun, Aarónen mestenti dami jukuin juani ji inun, mishki tude sapa dabeki Diosun yunuti inun jawen nemati 10 jancha kenen i jati jayanikiaki. <sup>5</sup> Janua jawen unanmati aduti bau mamaki Diosun kushipa unanmati nai tsuma itsa dami dabe besun dabeten jawen peiwen jawen jatuhun nuiti bau beputi achimanibukiaki. Dios kenwanti mabukidi jatis en matu yusinyuaii.

<sup>6</sup> Januxun jawen Dios kenwanti mabu jaska pewatan Dios kenwain xaba tibi janu dukun medibi dintu besti anu Diosbe nukunabu janchaxunikabu jikipaunibukiaki, kenwankin Dios yuinaka menuxunkinan. <sup>7</sup> Jakia ja kachu medibijaida dintu anu año tibi xaba bestichaitian bestiwai Diosbe nukunabu janchaxunika xanen ibu binua besti jikikin ibubis kanediamiswen taexun yuinaka jimi buxun jawen nuiti bau beputiki jimi basha basha akin Dios daewayupaunibukiaki, jawen chakabu inun jawenabun chakabu Dios jakimawakin jau ana jatukidi jaska shinanyamakubainunan. <sup>8</sup> Na jaska wakubainibudan, natian Diosun Yushin Pepatun ja jaska wakubidanibu keska xabakanxun kenwankubidanibu nuku unanmaikiki. Jabiaskadiai ja bai chibain Dioski nukuti medibijaida anu tsua jikiama ipaunibuki, Jesucriston nuku bepenxundiamawen taeandan. <sup>9</sup> Ja inun, jawen Dioski nukuti tadi jiwe anuxun jawen daewati bexun inanbu jatu kuaxunkin keyubiaken tsuan shinan pewakin keyuama ipaunibuki. Jaska wakinan, jawen nun unantidubu apaunibuki. <sup>10</sup> Ja inun, jawen yubati jancha bena Diosun yuidama jaska wakin jau pixanunbun inun, jaska wakin jau nuxuxanunbun inun, jaskai pepai jau dachukixanunbun yusinkin jatun yuda bestikidi Diosun jatu yununi jawen jatu medabewayuniki. Jakia natian na jabias jancha chibankin tsuan ibubis jatun shinan mekekin pewatidubumaki.

*Dios daewati pejaida Cristo inikiaki, na janchadan*

<sup>11</sup> Jakia Cristo na mai anu ma iwaniki. Eskatian jadan, nukun Xanen Ibu Diosbe nuku janchaxunika binujaida jaska Diosun yuba bena nuku inaniwen nuku mekekubainikiki. Janu Cristo jikinidan, na mai anuxun junibun jiwe wani keska anu jikiama jakia jaskadada ma jadi Diosun pe-waxuni anu jikitan jadia nuku Diosbe janchaxuni jawa apaunibu keska wama jatu binua pejaida kaneisma nuku ixunkunkainikiki. <sup>12</sup> Cristo ma nuku jikixuntan, jatun nuku yuinaka jimiwen Dios daewaxunun ika ikama iniki. Jakia nukun chakabuwen taea nuku mawaxuni besti wai ana mawatimai jawen jimi jabakin jau Diosun nukun chakabu buaxuntan nuku kupiyamaxanun Dios be bun jikitan nuku daewaxuniki, jawen jiwe paketi

pe nuku waxunkinan. <sup>13</sup> Chanima Diosbe nukunabu janchaxunika dayakin ina awa bene inun chaxuwan jimi basha basha akin inun ina awa bake yuxan menua jawen mapu unpaxki mutsaxun ja mapu pae watan jatuki basha basha adiakin tsuabunda chakabu washina jawen chakabu tuxkuakin ana jawenabubetan tadi inun bichi jiwe inun chipu Templo anuxun ana Dios kenwantidu wakin jatu pewakubainkanikiki, bemakis besti wakinan. <sup>14</sup> Jaska wapaunibu pebia jaska binumakin Criston jawen jimi jabanidan, kushipa paejaidaki. Jaskaken Diosun Yushin niti ismatun medabewaya inankuinti jawa chakabu jayama keskakin Jesucristo ma ana bestenkin Dios nuku daewaxuniki. Mawai jawen jimi jabaniwen taea natian nukun shinan chakabun nuku kanemakin jawen nuku tenamis nukun buaxuntan nukun kupiti bitan jiwekuian nuku inankin pewaniki, Jamebi Jiwemis Dios besti duawai ja dayaxuni nun jiweunkubainxanunbunan.

*Natian Jesucristowen taea yuba bena nun jayakiaki, na janchadan*

<sup>15</sup> Tsuabuda Diosun jatu katunibu jabun jiwekuian ikibi ika bixanaibu Diosun jatu yubani jaska Jesucriston pewanun ika dasibibu mawaxuntan unudi Dioski inun yudabuki janchaxunikai dasitan, jaskatan Diosun yuba bena pewakin jawen taexun nukun chakabu nuku buaxuniki, ja dukun yubani jancha chibanma nun kanei nun chakabukubainmisbu nuku pewardan. <sup>16-17</sup> Jaska inun, jawen mabu paxkakin jawenabun jau ibu waxanunbun yuda mawadiama ibubis jawenabuki tanakin janchawen kasmai kenewen amisbuki. Jakia ja mawadiamaken jawen yubaka jancha chibankin jawen mabu ibu watidubumaki. Jakia ma mawaken jaska bebunkidi yubakaima ibu watidubuki. Jaska keskai Jesús nuku mawaxuntan ana besteniwen taea jaska Diosun nuku yubani nun ma jayaki. <sup>18</sup> Chanima Diosun ja dukun yubanidan, yuinaka ina tesean jimiwen jawen dukun jatu unanmati taewamakin jatu yununiki. <sup>19</sup> Jaska inun, Diosun yunuti jancha tibi inun jawen nemati jancha tibi Moisin jawenabu dasibi yusinxun jatu kenexuntan, chipu chaxuwan dati tashipa wa ni peiyabi tsumaxun ina awa bake jimi inun unpax nexua pukutantankin Diosun jancha una bashatan jawenabu basha basha akin <sup>20</sup> jatu yuikin: “Matu yuinun ninkakanwen. Na jancha en matu yuixuwen Diosun matu ma yubaxuki. Ja inun, na jimidán, jawen Diosun matu yubaxu shinamati jimiki”, atan <sup>21</sup> Moisin jatu jaska watan jabiaskadi wakin medibi wakin janu Dioski nukuti tadi jiwe inun jaki Dios kenwanti mabu dasibiki Moisin ina awa bake jimi basha basha akin keyuniaki. <sup>22</sup> Diosun Moisés jawen jancha yununiwen taeidan, mabu inun tsuabuda Diosuna wakin jatu medibi wakinan, jimi jabama jatun chakabu buatiduma inikiaki. Jakia Diosunabu medibi jatu wakinan, jatun chakabu buaxunkin jimi jabai bestiwen atiwakin yununiki, Moisinan. <sup>23</sup> Jaskawen taexun chanima jimiuma tsua medibi itidumawen taexun yuinaka midima detekubainpaunibuki, jatun chakabu ana Diosun shinantima wamakinan. Jakia jaska wakinan, jaska chipu Jesucriston nukun chakabu nuku buaxunxanai ja binumakin ja kayabima mawakin ja keska wakin akubainibuki.

*Jabun ikunwanxanaibun chakabu buanun ika Cristo nuku mawaxunikiaki, na janchadan*

<sup>24</sup> Janua janu Dioski nukuti tadi jiwe junibun na mai anuxun anibu anu Jesucristo jikiam, jakia nai anu janu Dioski nukuti kayabi anu jikinixun Dios be bunua natian nuku janchaxunkin Jesucriston nuku ea axuinkiki.

<sup>25</sup> Ja inun, Aarónen bababu Diosbe nukunabu janchaxunika xanen ibu binua año tibi dayaidan, jimi betsabu bui jikitan Dios inankin Dios uinmai janu medibijaida anu jikipaunibu keskai Criston jawen jimi buxun inankin basha

basha akubaintima iniki. <sup>26</sup> Cristo jaskatianidan, mai damiwakin taewaitian nukun chakabu buanun ika mawani nuku mawaxunpakei ikeanaii. Jakia badi jawen jeneaitian jaska Epa Dios jakidi yubakani natian jawen jancha chibankin nukun chakabu nuku buaxuni mawakin jawen yuda jawen ibu nuku inanxunkin nukun chakabu buaxunun ika Cristo bestiwai taxnitan mawaniki. <sup>27</sup> Yudabu dasibi besti wai mawamisken januxun chipu Diosun jatu unanti waxanikiki. <sup>28</sup> Ja inun, Cristo jaska keskadiai jawen jiweawen besti wai mawadiakin Dios nuku inanxunkin nun jabun ikunwanxanaibun ichapabun chakabu nuku buaxuniki. Chipu ana ja kachu Cristo juidan, ana chakabu pewatanun ika juama jakia nun jabun manaka bestiabu nuku paxa watan mekenun ika ana juxanikiki.

## 10

*Diosun Moisés jawen jancha yununidan, ana jawen jatu pewatidubumaki-aki, na janchadan*

<sup>1</sup> Janua Diosun jatu yubani Moisin jatu yusinpauni jawen yubati bena jaska jawen besu taxnimaxanai jawen bemakia unanmati besti iniki, jaskaida mawaida kushipa ja kayabimadan. Jaskaken Diosun jancha Moisin yusiniwenan, tsuabuda dasibi pepatidumawen taea badi tibi jabias daya chaxuwan bene inun ina awa bene tesenxun kuakin keyuxunpakebiakin Diosbe nukunabu janchaxunika xanen ibu binuatun nukunabun jatun shinan jatu betsa wamakin dasibi jatu pewakin keyuxuntidubuma iku-bidanibuki. <sup>2</sup> Chanima Diosun jancha kushipa jayatun jatun chakabu ma pewaken jabun shinan ibubis ma pe mekinan, ja yuinaka menukin Dios inankubainaibudan, jenekeanibuki. <sup>3</sup> Badi tibi chaxuwan inun ina awa tesenxun jatu kuaxunkin Diosbe nukunabu janchaxunika xanen ibu binuatun jatun chakabu ana jatu shinanmakubainmiski. <sup>4</sup> Jakia yuinaka mawa jimiwen jatun shinan chakabu pewakin jatu buaxuntidubumaki.

*Jesucristo mawakin Dios nuku ma daewaxunikiaki, na janchadan*

<sup>5</sup> Jaskaken Jesucristo mai anu dami taxnimaxun yudabu yusinkin tae-wakatsi jawen Epa Dios yuikin:

“Epaan, yuinaka inun xachi bimi dudu kuaibu besti min ana bechipaimaki.

Jaskaken min shinanwen en akubainxanun juni kuin yuda min ea inaniki.

<sup>6</sup> Ja inun, jatun chakabu buakatsi ikin inankuin buxun jatun chakabu buaxunkin jatu kuaxunaibu min ana jaska bechipaimaki.

<sup>7</sup> Jaskaken eska unantant jaska ekidi kenenibudan, min shinanen besti anun ika en ma taxniaki”,

aniki. <sup>8</sup> Ja dukunan, Diosun Moisés jatu yusinmani keska abiakin kaneaibuwen taexun Diosun jatun inankuin inun jatun chakabu buaxunkin jatu menu keyuxunbiakubainaibun Diosun ana bechipaima inun benimama ikunkainaya <sup>9</sup> Jesús juxun yuikin: “Jaska min shinanen besti anun ika en ma taxniaki”, ikin jawen Dios daewati xeni jawama wakin keyutan jawen Dios daewati bena jamebi jawen jiweawen nuku bena waxuniki.

<sup>10</sup> Janua Diosun shinan besti chibain bestiwai jawen yuda Dios inain nuku mawaxuntan ana besteniki, ana betsation mawatimaidan. Jaska wakin Jesucriston Diosunabu nuku wakin ma nuku medibi waniki.

<sup>11</sup> Jaska inun, jatun chakabu jatu buaxunun, iwanan, inankuin betsa betsapa Dios inankin jabias bestikima yuinaka kuai bikamisbuki, jaskawen

jatun chakabu tede akin keyutidubumabia Dioski nukuti Templo jemaintin anu dayakin badi tibi nukunabu Diosbe janchaxunikabun jabiawens daewati wakubainmisbuki. <sup>12</sup> Jamen Jesucristo ikidan, jabun nun ikunwanxanaibu nukun chakabu nuku buaxunun ika besti ja bestiwai cruzkia nuku mawaxuntan ana ipatimai bestentan jawen Ibu Diosun yusiudi januxun betsabu binuan besti natian ma tsauaki, janua nuku janchaxunkunkainxanaidan. <sup>13</sup> Jadixun tsuabunda Cristo danain jaki sinataibu Diosun jatu mae-mamakin jawauma jatu waxanai manayui Jesucristo tsauaki. <sup>14</sup> Jesucriston jawen jiwea besti wakin Dios inankin ma dasibi pejaidawai mawaniwen taea tsuabuda Diosun ma jatu pewani ma medibi jiwexunkanikiki. <sup>15</sup> Diosun Yushin Pepatun betsa watimawakin jawen yuixunika Jeremías yuikin yubai:

<sup>16</sup> “En Yavé Diosun jatu yuikin:

‘Janu jatiada Israelbukidi en ana jatukidi yubakaidan,  
eska en ixanaii.

Jatiada jaska en jatube yubakai benaidan,  
ana bemakis en jancha en jatu yunuamaki.

Janua janu jatuki dasikatsi jatun buxka anu en jancha mistukin  
jatun uinti bera watan en jancha en jatuki kenea keska waxanaii”,  
iwanan, ana ja janchakidi yuikin:

<sup>17</sup> “Jatun chakabu jatu buaxuntan

en ana jaska jatukidi shinanma ikunkainxanaii”,  
Yavé Diosun ea washinaki, aka Jeremíasin ninkatan nuku kenexunika.

<sup>18</sup> Ma nukun chakabu pewatan nuku buaxuniken ana tsuan jatun chakabu buanun ixun yuinaka ana tesenxun jau ana jamen yuinaka kuayamakubain-unbunwen.

### *Dios yubakaniki jaki dasi kakatsi chintuntimakiaki, na janchadan*

<sup>19</sup> En betsabu inun en puibuun, jaskawen taea Jesucristo nuku mawaxunkin jawen jimi jabawaniwen taeandan, natian jawa dateama Diosbe janchanun ika jawen dintu medibi anu jikiai keskatan nun jaki ma kematidubuki. <sup>20</sup> Ja medibi dintu anu janu besti wai jawenabu Diosbe janchaxunika besti jikibiakubainmisbun eskatian Jesúsun ja tadiwen bepunibu keska nuku bepenxunkinan, jawen yudawen mawakin ja medibi dintu bepunibu bepean keska waniki, jawen taea ja bai bera chibankin jawen kai nun Diosbe janchakubainxanunbun nuku axunkinan. <sup>21</sup> Natianan, nukun Diosbe nuku janchaxunika kayabi Dios bebun ma niaki. <sup>22</sup> Jaskawen taea nukudi Diosbe janchanun ika nukun shinan chakabun nuku mekemis ana mekemama unpaxwen chuki keskatan nuku uinti xunpintan chanima kayabi ikun kayabi wai Diosbe janchakubainankanwen. <sup>23</sup> Jabias mestenwantan shinan betsa betsapa wai chintuanma jaska nun ikunwankin yuiai besti manakakubainankanwen. Chanima Dios yubakanixun nuku axunxanikiki, kaneamadan. <sup>24</sup> Ja inun, nun jabun ikunwainbudan, medabenain bechipainamei pepai duanamekubainankanwen. <sup>25</sup> Ja inun, Diosun jancha tapin ichai jeneyamakubainankanwen, jaskai betsabu babui chintunkanikikidan. Jaskama betsabube medabenankatsis ikin jatu uinmakin jamakidi shinanbiabainaibun jatu beya wakin shinan chankanwankin jatu benimawakubainkanwen. Jatu jaska wakin ma Jesús ana jua kemai uinkat-sidan, shinan chankanjaidai jatube ichai jeneyamakubainkanwen.

<sup>26</sup> Ma Jesucristokidi unanti wakin chanima tapinbiatan jadatubunda jawa shinan betsa maewama ana nukunmebi chakabu mei atimapai uinti kushikin nun akaibudan, ana jawa betsawen Dios daewati nun jayama-jaidakiaki. <sup>27</sup> Chintuntan nun jawen jiwei kaidan, Dios jatuki sinatakin

jatu kupichakayamakin chi medan jatu menukin keyuxanai besti manakanikiki. Uindakanwen, mesekidan. <sup>28</sup> Nukun xenipabun Diosun Moisés yusian jancha ninkama chakabuwaibu dabe kasmai dabe inun besti jabias jakidi yui kaneabumaken jatu unanti watan jawa jatuwen nuiama kupikin tenanpaunibukiaki. Natian ja yununi mese jayayuaki. <sup>29</sup> Matubunan, shinankanwen. Tsuabun mexanimenkain, ja jawa jatuwen nuiama Diosun jatu kupichakayamaxanaidan. Jesucriston jimiwen jawen jatu yubani Diosun Yushinin jawen taexun jatu bechipaibia tsuabunda Diosun bakeki jamein jaki kaxekin jawen jimi jatu jabaxunbiani danankin ichakanikiki, jawen taea jabun ikunwainbu pepati wabianikenan. <sup>30</sup> Januxun Diosun jawen jancha yunui jamebi yubakai janchai: “Tsuanda matu chakabuwaya meyamaxankanwen. Emebi En Jiwemistun ja chakabuwaibu ean en jatu kupixanaii”, iniki. Ana betsa chani: “Yavé Diosun jawenabu unanti watan jatu manakuxanikiki”, adianiki. <sup>31</sup> Chania jawada tibi chakabui ikaibudan, mese bexmaski. Jamen Dios Jiweatun jatu kupiai tibi ixanaidan, mese mepakekubainxankanikiki, jau jaki besti datekubainunbunwen.

<sup>32</sup> Janu man Jesús ikunwankin taewaitian man ini shinankanwen. Jabun ikunwankatsi ikabuman matu bika tenemabiabu mestentan man binukubainyamaki. <sup>33</sup> Januxun jatidi matubi ichakin midimabun uiainbun bika betsa betsapawen matu memaibun janua betsabu ja nuitapaibube jatuki dasixun jen iyamai dateama man jatu medabewakubainibuki. <sup>34</sup> Jesúsunabu betsabu jatuki sinatakin bichiti jiwe medan jatu bichiabu nuitapaibuki man batantanaya matun mabu inun matun jiwe matu bianbun jawa yuiama benimakin matun jamapai jatu jenexunkin Dios kenwankin jawen mae pepa nai anu jawa chapuisma janu jiwei ikibi iki man kaxanai jaska man shinankubainyamaki. <sup>35</sup> Jaskawen taexun man ikunwainan, benuyamakanwen, man ma jaki chiti ika bika tenemiswen taexun matu ichapa manakuxanikiki. <sup>36</sup> Jamen matu akabumaki, bika tenemakinan. Jaska Dios yubakani jaska shinain keskawen matu akaibudan, dateama binui jawen mestenkubainkanwen. Man jaska tenekubainmisbuwen taexun jaska Dios yubakaniwen matu manakua chanima man uinxanaii. <sup>37</sup> Diosun jawen jancha yuixunika jancha wa jatu kenexunkin:

“En jaskakidi yubakaidan,  
jawa manakubidanama jawaida iki juxanikiki.

<sup>38</sup> Tsuabuda pepabunan,  
jaska en yubakai shinankin ikunwain jawen jiwxankanikiki.  
Jamen tsuabunda ja en yubakai ikunwankin  
mestenwankatsi ikama chintuainbudan,  
en ana jabuwen benimama ixanaii”,  
aka ninkaxun nuku kenexuniki. <sup>39</sup> Jaskaken betsabun Jesús chibain chintuainbu jabu Diosun kopiaya ea inun man ebetan Jesús ikunwain chintuanma nun chibankubainmisbudan, jawen paxai Diosbe nun jiwekunkainxanaii.

## 11

*Jaskakin jatun xenipabu ichapabun Diosun jancha ikunwanpaunibukiaki, na janchadan*

<sup>1</sup> Diosun yubakati jancha chanima ikunwankin jawa uindiamabia jamapai tibi pepawen Diosun nuku duawaxanai jayakatsi jawa shinan betsa wama mesten besti watan nun manakajaidakubaintidubuki. <sup>2</sup> Nukun xenipabu ichapabun Diosun yubakati jancha jaya ja ikunwankubainaibuwen taexun Diosun jatun shinan unantan jatukidi pe shinain benimakunkainiki.

<sup>3</sup> Jamen jawada nun uiain inun nun uintiduma dasibi mai inun nai anu damiwakinan, jawen jancha kushipawen besti Diosun damiwanidan, ikunwankin nun unankubainaii.

<sup>4</sup> Ja inun, Adánen juni bake dabe Diosun yunushina jawen jancha Abelin ikunwankin chibankin jawen Dios kenwanti chaxuwan tesenxun kuakin keyuxunbiaya jawen betsa Caínen Diosun yunua jancha chibanma jawen bai anua yunu besti kuaxunkin Dios kenwanpaibiaya Abelin kenwanti besti Diosun bechipaikin jawen jancha ikunwain unain: “Juni pepaki”, anikiaki. Ja inun, Abel mawabianiken jaska ikunwankin tates taewatan jenebaini jabiawendi nun ikunwankubainxanun Diosun jancha Abelkidikenenibu uinkin nun unandiakubainmiski.

<sup>5</sup> Ja inun, Henoc juni pepatun Diosun jancha ikunwankin chibankin jeneama Diosbe jaibunamekin Dios benimawakubainaya jawenabu uinmamabainkin jau mawayamanun Henoc Diosun nai anu aininikiaki. Jaska kenenibu nun uinmiski. <sup>6</sup> Ja inun, tsuabunda Diosun jancha ikunwanbumadan, jaskatan Dios benimawatidubumaki. Jakia tsuabunda Dios jiwea jaya inun jatun jatu manakuxanai benakin jau ikun besti wakubainunbunwen.

<sup>7</sup> Ja inun, nukun xenipabu Noén Dios ikunwanyan Diosun bebunkidi jaska waxanai idiamma uianmabia juni pepakin Diosun yunuti chibankin jawen jawenabu paxawakatsi nunuti ewapa wanikiaki. Jaska Dios ikunwainwen taexun Diosun mekekin jawen pewen manakukin paxawanikiaki. Jabias jancha ikunwankin chibainwen paxakin yudabu mai jidabi anuabu Noén jatu kupinikiaki.

<sup>8</sup> Ja inun, Abrahamnen Dios ikunwankin chibankubainaiwen taea Dios jabe jadia yubakakatsi ikin Diosun kena jawa jen iyamama ikunwainwen taea jawen mae jenei taxnikaini jani kai unanmabia ja mai pakea betsa anu Diosun inanxanai anu kanikiaki. <sup>9</sup> Diosun jaska yubaimawen taea jawen shinanen besti ikunwain ja mae anu chipu ibuwanunbadiai ja shinain nawa betsa keska jiweyuniaki. Jaska jiweidan, tadi puntebaunkin jiwe watan jiwea akeakeniki. Jabiaskadiai jawen bake Isaac inun jawen baba Jacob ja Diosun jatu yubani ibuwaxanun ika jiwediacubainibukiaki. <sup>10</sup> Diosun jawen dami jawa kaneismatun ma jatu mestenwanxuni anu jadi jatu jiwe maxanai maewan Abrahamnen shinain na mai anuxun dukun mana taewanikiaki.

<sup>11</sup> Ja inun, Abrahamnen ain kayabi Sara ma yuxabujaidakin bake bitidumbiaken Abrahamnen ikunwan besti ja dikabi ma ika kai mestebujaidabia Diosun medabewa bake wanikiaki, Dios jabe yubakaima padanma ja menexunxanai ikunwankubainyamawen taexunan. <sup>12</sup> Tsuan jaska watidumai Abraham anibujaidabiatun bake waima janua jawen bababu midimajaida bishiti inun ian kexa anu mashiti tsuan jati tanatiduma keska pajaidanibukiaki.

<sup>13</sup> Jamen ja yudabu jaska Diosun jatu yubani jadi jiwediamabia ikunwan besti mawanibukiaki. Jakia Diosun yubani bebunkidi jaidaxun ikunwankin besti shinain punu nukama manakakin jabun ibubis shinain: “Na nawan mai anu baii niuya keskakin Diosun mae pepa nai anua nun jadi kaxanai anu nun manakakunkainaii”, ikubainibukiaki. <sup>14</sup> Jabun jaska yuibiakin jatun mae kayabi bechidiama xabakabi ninkakin unanbiai jaskada dababen ja mae manaka bestikubainkanikiki. <sup>15</sup> Jaska jatun mae anua benibu pe dababen shinain ana jawendi chintunkeanibukiaki. <sup>16</sup> Jaskama ja mae pepajaida jawendua nun jaska uindiamma chakabuma nai anu Diosun jatu yubayama shinain jabianus jiweyunibukiaki. Jaskaken jabu katuni Diosun

ma jatun maewan pewaxuniwen taea Dios jatuki dakeama jatu shinain: "En jatun medabenan Yushinki", imiski.

<sup>17-18</sup> Ja inun, Abrahamnen Dios ikunwaniwen taexun Diosun jawen bake Isaackidi yubakin yuikin: "Isaacwen min bababu ichapa mia waxunx-anikiki", abianixun januxun *¿jaska ikun ea chibainmenkain?* ixun unanti wa jawen bake Isaac Abrahamnen Dios inankin kua keyuxunun, iwanan, jawa yaushi jawen nuiama jawen bake bestichai iyui kanikiaki. <sup>19</sup> Jaska Diosun axuan uinkin jawen kushipakidi Abrahamnen tapiniki, Diosun mawabu bestenwantidukidi tapinkinan. Jaskawen taexun jawen bake inankin Dios tenanxunbiai kaxun ana jawendi jawen bake jiwea chintunwanbidankin jawa wama ixu keska iwenikiaki. Jaska wakin Diosun kushipa jawen shinamati xabakabi jatu unanmaniki.

<sup>20</sup> Ja inun, Diosun jawenabu duawaxanai Isaacun ikunwankin jawen bake Jacob inun Esaú jancha pewen Dios jatu yukaxunikiaki.

<sup>21</sup> Ja inun, Jacobun Dios ikunwain ma mawa kemaxun jawen mestenti tsumatan Dios kenwankin jawen baba Josén juni bake dabe jancha pepawen jatu duawakin yukaxundianikiaki.

<sup>22</sup> Ja inun, Diosun Israelbu Egipto anua jatu taxnimabainunbadiai Josén ikunwain mawakin jawenabu jatu yuikin: "Nenua kainbainkinan, mai pakea pepa Diosun matu ibu wamaxanai anu en xau en bababun jau ea bununbadinunbunwen", akin jatu yununikiaki.

<sup>23</sup> Ja inun, Israelbu pajaidaibuwen taea Egiptonawa xanen ibu jatuwen datekin jatun juni bakebu kaian jau tenankubainunbun ixun jatu yunubiaimaken jawa dateama Moisin ibubun Dios ikunwankin jatun bake jawend-uaajida kaianwen nuikin uxe dabe inun besti juneyunibukiaki.

<sup>24</sup> Ja inun, Egiptonawa xanen ibu faraónen ainbu baken Moisés jene anu nunua nexetan ma yumewaimawen taea juni ewa Moisés jawen bake jatu wamakin jatu kenamakatsi ikama Dios ikunwainwen taea <sup>25</sup> Moisin katukinan, Egiptonawabun beya jatubetan mei benimai jatube chakabui jiwekatsi ikama jaska jawenabun bika teneaibube medabewai jatube nutapakatsi jaska shinankin katunikiaki. <sup>26</sup> Januxun Dios ikunwankin jawada Dios yubakani manakin Egiptonawabun mabu pepa betsa betsapa Moisés inainbuwen taea Mesías Cristo ja kenwanma xanen ibu wabu jawen kentidu unanbiai xanen ibun jiwe anua kainkaini Dios kenwain jatun medabenan Mesías Cristo jawenabubetan manakai bika tenei yumanbiai manakuti pepa Dios anua jawa benuama inanxanai Moisin jaska katunikiaki.

<sup>27</sup> Jaskaken Egiptonawabu xanen ibu jaki sintabiaya jawa jaki dateama Egipto mai pakea anua kainkainima Dios uintidumabia ikunjaidawakin shinan betsa wama ikunkainikiaki. <sup>28</sup> Ja inun, Diosun yunua ninkatan ikunwankin Moisin jawenabu Pascua besi jatu tates taewamakin misi xaxama inun chaxuwan bake nami xui jatu pimakin chaxuwan jimi jiwe tibi janu jikiti xui xexekaian jatu kepuxmakin keyukem Diosun nai tsuma debuwaniyatun Egiptonawan juni bake iyuabu dasibi jatu debuwabiakin Israelbu jawa meama dunkebainikiaki.

<sup>29</sup> Ja inun, Israelbu Egipto anua paxai bui Ianenwan Tashipa namakis paxkatan Diosun jatu bai wakin metu waxuna Diosun meketi kushipa ikunwain Israelbu pukei keyuaibun jakia Egiptonawabu jabias baiwen jatu chibanbaini pukediai jasai keyunibukiaki.

<sup>30</sup> Jaska inun, Israelbun Diosun yunua ninkatan katan katankin xaba metutitian jatu dunkebaunaibun Jericó mae mishki ewapabuwen kenebauenibu di iki keyuaya Dios ikunwankin Israelbun jatu detekin maemakin yamawanikiaki. <sup>31</sup> Ja inun, jabianuadi Rahab ainbu jininipabia Dioski mesekin Israelin baba dabe unantinain buabu jatu itan medabewashinawen taexun chakabukubainmisbu Jericó anu jabe jiweabu jatu yamawakin Israelbun Rahab tenanma inibukiaki.

<sup>32</sup> Matun xenipabun Dios ikunwankin Gedeón inun, Barac inun, Sansón inun, Jefté inun, David inun, Samuel inun, Diosun jancha yuixunika betsabun jaska wakubainibu ana en matu yuikatsi ibiakin jaska waxun en matu yui keyutidumaki. <sup>33</sup> Betsabun Dios ikunwankin xanen ibu betsabun mae mebinibukiaki. Betsabun Dios ikunwankin jatun mae anu xanen ibukin jatu pe jiwemakubainibukiaki. Betsabun Diosun yubaka jancha ikunwankin Diosun kushipa bitan jatuna wakubainibukiaki. Betsabu inu pubenbu anu yunukin jatu bichiabu Dios ikunwainwen taexun jawen kushipawen Diosun jatu nemaxuna jabu piama inikiaki. <sup>34</sup> Betsabu ichakawakin tenanun, iwanan, chi medan jatu putabu Dios ikunwankin jawen kushipawen chi nematan jawa menuama kainibukiaki. Betsabu nupe jawen detenameti bestiwen jatu detepananbun Dios ikunwainbuwen taea paxanibukiaki. Jaskaken juanti babubun ikunjaidawakin taewaibu Diosun jatu kushipa wakubainaya nawabun Diosun enabuki sinataibu detekatsis ikaibu maemakin jatu paxamanibukiaki. <sup>35</sup> Ja inun, betsadan, ainbu betsabun jatun bakebu mawa manukin Dios ikunjaidawaibu Diosun jatu bestenwanxunikiaki.

Jamen juni betsabun Diosun jancha chibankubainaibuwen taexun jatuki sinatakin jatu ichakawakin jaska jabun bechipai keska biama paxama jakia mawa ana bestentan jiwea pepa bixanai shinain mawakubainibukiaki. <sup>36</sup> Ja inun, betsabun Diosun jancha ikunwanmisbu nuitapawakin jatu kaxewakin betsabu kusha kusha akin betsabu mane dispiwen nexatan jatu bichimapauibukiaki. <sup>37</sup> Ja inun, betsadan, Dios ikunwainwen taexun betsabu mankanwen jatu tsaka tsaka akin jatu tenanpakeaibun betsabu jawen ji nisatiwen jatu mextekin nisanibukiaki. Dios jatu dananmakatsi ikin jampai shadabu bika jatu tenemakin jatun nupe chaipawen betsabu jatu detekin tenainbun betsabu ichakawakin jatu nuitapawabu paxai jamakidi kakin chaxuwan bichi tadi besti sawea yumanjaidakubainibukiaki, <sup>38</sup> jabu jaskanu jiwitidubumabia mae chakabu janu tsua jiwitidubumanu buni yuinaka keskai mati tenanman tanpe anu jiwekubaunidan. Jaskai yumankubainabun jabun jatu ichakawaibu jatu binujaidabiaken junibu chakabun jawa jatu kenwanma jatu danan bestikubainibukiaki.

<sup>39</sup> Jaskabia jabun Diosun yubani shinankin ikunwainbuwen taexun jawen yubaka jatu uinmadiamabia Dios jatuki pechiama jatu unanti watan jatuwen benimakunkainikiaki. <sup>40</sup> Diosun jatu jaska wakinan, jaska yubakani jabu bebunxun besti akatsi ikama nukubukididi shinankin janus nuku xuku watan jaska yubakani pejaida nuku inankatsi nuku jatube ichawaxanikiki, jiwekuian anu nuku jatube jiwemakinan.

## 12

### *Jawen bake ikunwainbu Diosun jatu pewamiskiaki, na janchadan*

<sup>1</sup> Jaskaken nukunabun jabu dukuntun Diosun yubaka jancha ikunwankin bika betsa betsapa jatu tenemakin memabu jabuan jatun shinan nuku uinmakubainixun natian nuku uinkanikiki. Shinanankanwen. Nuku jatun itimaska wai inun jamapai chakabu tibitun nuku bexetidu jenetan beamabainkin jawada pepa Diosun nuku yubamis ja shinain kushipai

dayaxunkin jeneyamakubainankanwen. <sup>2</sup> Cristo nuku ixuni jakidi dukun unankin shinankubainankanwen. Jabun nun ikunwainbu nun jaki chiti ikabu jatunan ma nuku pewaxunkubainikiki. Jaskawen taea Jesús cruzkia nuitapaidan, ja ichakawakin nuitapawaibu jawen dake shinanma nuku mawaxuniki. Jaskaidan, nuitapawabiabu mawakin binutan benima pae-payabi jawen Epan xanen ibu tsauti yusiudi jabe xanen ibui tsauxanai unain iniki.

<sup>3</sup> Ja inun, yudabu jatu medabewakin jatu uinmabia jabun ikunwankatsi ikama juni chakabubun Jesús ichakawabu yumanbiakin jawen Epan yunuti jancha Jesúsun jeneama ini jaska keska shinankubainkanwen, Jesús ikunwain punu nukai Diosun baiwen kabiai man bextekeyamakubainxanunbunan. <sup>4</sup> Ja inun, chakabu tibi binui man bika tenekubainai Jesús nuku ixuni keskai tsua man mawadiamaki. <sup>5-6</sup> Ja inun, nun jawen bakebu Diosun nuku yusini man jakimaii. Matun xenipabu xanen ibu unanepa Salomónen eska jawen bakebu yuikin:

“En bakebuun, jaska Dios matuwen nuikin  
matu pewamis matu yuinun ninkakanwen.

Diosun tsuabuda bechipaikin  
jawada bika tenemakin jatu kupimiski.  
Ja inun, tsuabuda Diosun jawenabu wakin  
jatun chakabu jatu unanmamiski,  
nun ana ayamaxanunbunan.

Jaskawen taexun jawada bikawen Diosun matu unanmai dananyamakanwen.

Ja dikabi, matu kunyan akaya  
punu nukadiayamakanwen”,

jatu jaska wapauni na jancha jakimayamakanwen, Diosun jabias matu ana yuiai keska shinankinan. <sup>7-8</sup> Ja inun, juni dasibibun jatun bakebu bechipaikin yusinkin jatu pewamiswen taexun: “En bakebu pewanun”, iwanan, jawada bika Diosun matu tenemakin matu pewaikiki, matu besti pewamadan, jakia ikunwainbu betsa betsapa jabiaskasdi jatu wakinan. Jamen bika tenemakin Diosun matu pewama man jawen bakema keska itiduki, bake ibuuma keskaidan. <sup>9</sup> Ja inun, nun juni ewadiama nukun ibubun nuku yusinkin nemajaidakin nuku tapinmakubainibuki. Jatun yusian bikabiaken tapinkin nun jatu bechipaikubainibuki. Jakia jaska nun wani binukin nukun Epa Dios nai anua bechipaikin natian jawen jancha ninkakubaini nun jabe jiwxanaii, jawa chakabuwen nuku kupiamadan. <sup>10</sup> Na mai anu nuku jiwmakin yumewakin nukun ibubun yusinkin bika tenemakin nuku bexmas pewayunibuki. Jakia nun Diosunabu medibi wakin nuku pewakin bika tenemakin Diosun shinanmis keska chanima nukundi nun shinankubainunbun Diosun nuku pewakubainmiski, nuku ja keskadi wanun ikadan. <sup>11</sup> Ja inun, chanima Diosun pewakin kupiai xuama mebiatan chipu jakimatan januxun jawen yusian pepa tapinkin jawen jiwea unanuma pe jiwekunkainai unantidubuki.

<sup>12</sup> Diosun pewati yusian bikabiaken ana mestein kushipakin ana Dios kenwain matun meken meshantan danti ixun kenwankin jeneyamakubainkanwen. <sup>13</sup> Ja inun, Jesús ikunwain jawawenda bika teneaibu punu nukai jau chintunyamanunbun jaska Diosun bechipaiai yusinkin bai kayabikidi jatu pe unanmakubainkanwen.

### *Diosun jancha danainan, mesejaidakiaki, na janchadan*

<sup>14</sup> Ja inun, tsuabuda dasibibube man unanuma jiwekatsis ikaidan, nuikipakin dasibi nukun Xanen Ibun yusian chibain pepa besti

jiwekubainkanwen. Jamen man pepai jiweismadan, jaskatan nukun Xanen Ibuki dasitan man jiwedidubumaki. <sup>15</sup> Tsuabuda Diosun inankuin pepa dananma jau jayai keyununbunwen. Jamen jaskama tsuada man juinti sinayadan, sika tacha paepa keskatun jatu daunkin akawakin yudabu man jatu dananmatiduki. Uindakubainkanwen. <sup>16</sup> Matunan, tsuada chutawen kemukin Diosun jawen pepa ma matuki tanabiani kaneyamakanwen. Jaskakin Esaún Dioskidi shinanma piti bestiwen kemukin shinankin jawen betsa maxkubiaken jawen piti pinun, iwanan, jaska iyuatun pepa bimis inaniki, jawena benukinan. <sup>17</sup> Jamen Esaún chipu jawen epa yuikin: “Min bake iyua besti eadan, jau Diosun ea duawaxanun Dios ea yukaxundiawe”, atushia jakia jawen bake maxku Jacobun jawen epa Isaac padan dama Dios yukaxunkin menetan jawen epan jaska waxun Esaú ana jawawen pewatima nemabia kaxajaidakin Esaún ana yukabia jawen epan jawen yuba jaska waxun ana maewaxuntima inikiaki, jaska matubun man unanain. Man chipu jaskadiatidubuki. Uindakubainkanwen.

<sup>18</sup> Nukunabu Israelbu chaimaxun uinibu keska ma jaskamaki. Jatukidi ana matu yuinun ninkakanwen. Jabunan, mati ketia jede ji ikai tsuan metiduma iniki. Ja inun, meshu medan inun niwe kushipa xunku ikai anu mapunibu keska man jaska keskamadiki. <sup>19</sup> Ja inun, trompeta chan ikai ninkama jawa Diosun jui kainyain ninkamadi inibuki. Jamen jabuan ja jui taxniai ninkakin jau ana janchayamanun nemakin ea anibuki. <sup>20</sup> Jaska Diosun xabakabi jatu yuia jawenabu Moisin nemakin: “Tsuada jawen mati anu paiken jau mawanun mankanwen tsaka tsaka akasmakin chachitiwen pupe akin jatu debuwakanwen, inabu inun yudabudan”, akin jatu yuiai ninkai jaska tenetidubuma inikiaki, ja yunuti mesewen taeandan. <sup>21</sup> Diosun jawen kushipa taxnima mesejaida uiainbun jabiaskadiai Moisin jatu yuikin: “Eadi datei en saki saki ikaii”, inikiaki.

<sup>22</sup> Matudan, nukun xenipabu na mai anua Dioski nukua datenibu keskama chanima kayabi Mati Sión inun Dios jiweatun maewan Jerusalén pepa chaxa chaxa ikai nai anu janu jawen nai tsumabu janu jaki dasia tsuan jati tanatiduma jabun Dios kenwainbu jaskabu anu man ma ikunwain jaki kemaki. <sup>23</sup> Jabu dukuntun Dios ikunwain jawen bake ikubainibu ma jatun kena nai anu jatu kenexun netani ja yudabu Dios jiwxuni pemisbu jatun yushin Dios dasibi pewanikatun ma jatu jawa chakabuma wayama Dios dapi ma jaki kemani mapuabu nun shinaein. <sup>24</sup> Ja dikabi Jesúsun jawen yuba bena nuku waxunkinan, mawai jawen jimi jabakin Abelin jimi binuniki, jawen taexun Diosun nukun chakabu nuku buaxunti wakinan. Jamen Abelin Jimidan, jawen taea Dios sinatai jawen yupukunaniki, tsuan chakabu buatimadan.

<sup>25</sup> Ja inun, Mati Sinaí anuxun Diosun jawen yunua jatu yuibia ninkama jawen kupiti paxama inibuki. Ijis nai anuxun Diosun jawen bakebetan nuku yusiaín jaskanibu keskakin nun ninkama nukudi nun jaskatan paxatidubumawen taexun jawada Diosun nuku unanmai jaki pechitan dananma uindakubainankanwen. <sup>26</sup> Ja inun, jatu yusaintian jawen juiven Dios jiwmistun mai pacha sakumatan chipu ana jatu yubakin: “Ana bestiwakin mai inun jawada nai anua dasibi en ana pacha sakumaxanaii, mai bestimadan”, jatu waimaken nuku kenexunibuki. <sup>27</sup> Jakidi yuikin: “Ana bestiwakin en axanaii”, inidan, ja mai damiwani anua jamapai tibi maewa akeaketan januxun jawada Diosun bechipai maewama jau bet-sama ipakexanunbun dasibi damiwani Diosun ana pacha sakumaya jawada Diosun mekekatsi ikama jamebi yamai keyuxanaidan, nun tapintidubuki. <sup>28</sup> Janu Dios xanen ibui jiwemis jawen xanen nuku janu jiwemaxanaidan,

jawa maeama iyanikiki. Jaskaken Dios pejaida wakin kenwankin shinan chankanwankin jaki mesekin jawada jaska bechipaiai keska benimawakin axunkubainankanwen. <sup>29</sup> Nukun Dios kushipadan, chi keskaki, dasibi yamawakin keyutidudan.

## 13

### *Jaskakin nun Dios shinan chankanwantidukiaki, na janchadan*

<sup>1</sup> Ma jawen jenea yusian kene en matu bumai uinkanwen. Jesús matubetan ikunwainbube nui jeneama jatube bechipainamei duanamepakekubainkanwen. <sup>2</sup> Jaska besti shinankin jamapai pepa jakimama matuki bai beaibu itan jatu duawakin pimakubainxankanwen. Jabiaskadi wakin ikunwainbu betsabun Diosun nai tsumabu jawa unanma jatu pimakin uxanpaunibukiaki.

<sup>3</sup> Ja inun, Jesús ikunwainbuwen taexun bichiti jiwe anu jatu bichiabu jatuwen pechiama jatuwen nuikin matu jabe bichiabu keska shinankin jatu medabewakubainxankanwen, jaskai nuitapaibu unankinan. Ja inun, jatu ichakawaibuwen nuikin jatu medabewakanwen, jabiaskadi matu waibu man metidu shinankinan.

<sup>4</sup> Ja inun, chutanamebaunmisbu inun beneyabia inun ainyanbia chakabui kemumisbu Diosun jatu unanti watan kupia akeakexanaiwen taea tsuanda ikunwain ainyantan betsawen ana kemuama ja besti uin jaska man bechipainamedabeai mekei jabe jiwekubainkanwen. Beneyatandi betsawen ana kemuamadi ja besti uin jaska man bechipainamedabeai mekei jabe jiwediakubainkanwen.

<sup>5</sup> Jaska inun, jawen mabu icha wanun ika peiwen kemuama jawada besti man jayawen benimakubainkanwen, Diosun nuku yubakin: “En matu putama inun en matu jenetaskama iyanaii”, iniwen taeandan. <sup>6</sup> Jaskaken ma nuku yubani jaska jaki chiti itan jawa dateama yuikin:

“Yavé Diosun ea medabewamiswen taea  
jamapai tibiwen tsuabunda chakabuwanun ixun  
ea amanun ikaibu  
‘En Xanen Ibum ea medabewaya en dateamaki’ ”,  
ikin jatu yuikubaintiki, dateamadan.

<sup>7</sup> Jaska inun, Diosun jancha Cristokidi jabun matu yusinkin matu pe mekekubainkin matu shinan betsa wamanibuki. Jaskawen taexun jabun Dios ikunwankin chibankubainibu jaska jatun jiwea pepa akin jenebainibu shinankin matundi ikunwandiai jabiaskadiai jiwediakubainkanwen.

<sup>8</sup> Ja inun, Jesucristodan, jawa maei betsaisma jabiaskaski, uatian inun, natian ikai inun, ipakexanaidan. <sup>9</sup> Jaskaken yusian betsa betsapa benawakin matu yusiainbu jatu jawa ninkayamakubainxankanwen. Jamen nun Dios shinankubainaibu nukuwen nuikin medabewakin nuku kushipa wamiski. Jakia jabu padananankin betsa kaya jatun beya pitikidi matu yusinkin bikawaiibu jatu ninkayamakanwen, piti beya betsakidi chibankin matun juinti tsuan ana kushipa watidumakidan.

<sup>10</sup> Ja inun, nukun chakabu buanun ika Jesús ma nuku mawaxuni nukubu nun jayabiaken tsuabunda judiobun xenipabun beya jenekatsi ikama yuinaka menukin jatun chakabu buanun ikaibudan, jamen akanikiki. Nukun medabenantun kushipa jayatidubumadiki. <sup>11</sup> Ja inun, Dios daewakin nukunabun chakabu jau Diosun buatan ana shinanyamanun Diosbe nukunabu janchaxunika xanen ibu binuatun yuinaka tesenxun jatun jimi medibijaida dintu anu buken janua jawen nami mae pekachuxun jawen yuda kuakin keyumisbuki. <sup>12</sup> Jabiaskadi wakin jawen jimiwen jawenabun

chakabu Dios buamaxunkin nuku medibi pepawanun ika mae pekachu anuadi Jesús nuku tenanxunabudi nuku mawaxuniki. <sup>13</sup> Jaskaken Jesús anibu keska wakin nukudi nuitapa wakin dakewaibu ja bai Jesúsun nuku tatesxunbaini chibankin judiobun beya ana shinanma nuitapabiai dakeama ikubainankanwen. <sup>14</sup> Jaska inun, na mai anu nun jiweyuadan, mae putatimai jas ibua jawen nui nun janus ipatidubumaki. Jakia Diosun maewan pepa ja yubani taxnimaxanai jaskawen nun jiwexanai shinan bestikin nun manakayuiai. <sup>15</sup> Jaskaken Jesucristo nuku mawaxuni shinankin jeneama nukun juiwen Dios kenwankubainankanwen. Jaska wakin nun Dios benimawatiduki, yuinaka kuapaunibu keska wakinan. <sup>16</sup> Ja inun, Dios shinan chankanwanun, iwanan, ana matun jamapaiwen nuiama pepakin ikunwain betsabuwen nuikin jatu medabewai jawada man jaya ichapa kasmai eskadabes paxkaxun yaushiamma jatu inankin jeneyamakubainkanwen, jaska wakin Dios shinan chankanwakinan. <sup>17</sup> Ja inun, matu yusinkin mekekubainaibu jatun yusian ninkatan jatuki chiti ikin chibankubainkanwen. Jaska matu putama jawa juindukanma mekekubainmisbu jabiaskadi Diosun unankin jatu manakumiski. Ja inun, jatun daya itimaska wama ninkajaidakin man jatu benimawakubaintidubuki. Jakia ninkama man jatu itimaska wakin man jawa tapinkin pewai kaintidubumaki.

<sup>18</sup> Ja inun, Jesúsun jancha yusinkin nun pe chibanmis unankin dasibi pe jiwekin nun jatu pe uinmakubainunbun Dios dayuikin nukukidi ea axunkubainkanwen. <sup>19</sup> Ja inun, matu anu en ana chintunkatsis ikaiwen taexun menan Dios ea yukaxundikanwen, matu anu en jawaida kaxanunan.

### *Diosun jau jatu duawakubainun yununikiaki, na janchadan*

<sup>20</sup> Nukun Xanen Ibu Jesúsun jimiwen Diosun yuba bena ikibi ika ma pewani jawen bake chaxuwan mekenika pepa keska nukun mekenan bestenwanitun unanuma jawen kushipawen nuku jiwemakubainkatsis ikikiki. <sup>21</sup> Diosun jaskakidi matu shinain yubakani jatun jau matu dasibi pewakubainunwen. Jabiaskadi wakin jaska bechipaiai keska wakin jau nuku amadiakubainunwen, Jesucristowen taexunan. Jaskaken nukun medabenan Cristo kenjaidawakubainankanwen. Jaskakidan.

<sup>22</sup> En betsabu inun en puibuun, en kene chaipamawen en matu medabewakin benimawakatsis ikai jawa eki sinatama shinan pewatan uindakubainkanwen. <sup>23</sup> Ja inun, nukun betsa Timoteo bichiti jiwe anua ma taxnimashinabu en matu unanmии. Jawaidakidan eki nukuaya jabe kaxun en matu bechimai kaxanaii.

<sup>24</sup> Ja inun, matu yusinkin matu mekekubainmisbu inun Diosunabu matubetan ikunwanmisbu dasibidi en jancha en matu bumaii. Ja inun, Italia mai pakea anuxun ikunwanmisbun jatun jancha matu bumadiakanikiki.

<sup>25</sup> Jaskaken Epa Diosun jau matu dasibi duawakubainunwen, jawen pepawenan.

Jatiski, en janchadan.

## SANTIAGON JATU KENE BUMANIKIAKI SANTIAGO

*Santiagon jatukidi shinanikiaki, na janchadan*

<sup>1</sup> Matu Israelin 12 juni bakebun jatun bababun man Jesucristo ikunwainbu mai jidabi anu man sa ini manibaunabu en Santiago, Dios inun nukun Xanen Ibu Jesucriston tsumapan en matu kene bumai uindakanwen.

*Jawen shinan Diosun nuku tapinmai jawen kushipakunkaintikiaki, na janchadan*

<sup>2</sup> En betsabu inun en puibuun, jawada bika betsapa man mekin tenebiai Diosun benimati man jayawen shinan chankankanwen. <sup>3</sup> Man ma unaiin, jaska man ikunwain matu unanti wakin matu bika tenemaibudan. Jaskawen taexun jaska matu nuitapa waibu keska tapinkin tenea akeakekin ana jawen kushipakin man tapin jawen ewakunkainaii. <sup>4</sup> Jawada man teneai jawen Diosun matu kushipa wakin matu ewa wanun, iwanan, matu shinan nukumakatsis ikai jawen kushipai man ana jawawen bika tenetidu-mai ja jawen Diosun matu unanti wai jayai keyudikubainkanwen.

<sup>5</sup> Tsuada jatidi man unanepadiamadan, Dios yukakubainkanwen. Jawen unanepadan, jatun matu inainkiki, jawa yaushiamadan. Man jaska Dioskidi shinankin dasibi jawada akatsis ikai matu axuntidu jayaki, jawen unanepa keyutiduma jaya inun jatun jawa matukidi chakabu shinankin metuis-madan. <sup>6</sup> Jaska Diosbe janchakin yukakinan, chanima ikun besti wakin akubainkanwen: “Ea inantidumenkain”, ikin shinan dabewama akinan. Jamen man shinan dabewen shinankin man ea akaidan, ianenwan niwen bechuduwankin tunkax abubumis keska wakin man akawaii. <sup>7</sup> Tsuabuda jaska keskakin jatun shinan betsya wa akeakekin yukamisbudan, jawada Dios anua bitidubumaki, <sup>8</sup> natian jatun jamapaikidi Dios yukabiatan jaskas ikunwankin shinanma pena betsatian ana jaskakidi yukashina ikunwankin mestenwamamadan.

<sup>9</sup> Jaska inun, ikunwain betsya mabu ichapa jayama tsuan jakidi shinains-mabia Jesucristo ikunwainwen taexun Diosun kenwanxanaiwen taea jau benima bestikunkainunwen. <sup>10</sup> Man ikunwain mabuyabuun, matun mabu bestiwen jawen kein man shinanyamanunbun Diosun matu ma yusin-mawen taea matudi benimadikanwen, matun mabu man jayabiadan, jadan, ni maxu jawen juayabis debumis keska man unainan. <sup>11</sup> Mabuya jiwe-biani eskaxankanikiki. Jakidi matu yuinun ninkakanwen. Ni jua tuea jawenduabiaken badi taxni kujaidakidankin jua jawendua pepabia benukin badin utsi wakin nidi amis keskai jaska keskadiai juni mabuwanyan jiwea mawai jawen mabu jawenduayabia jawen mabu inanananmis jabu benui yamanunbadikanikiki.

<sup>12</sup> Tsuabunda ikunwain bika betsapa betsapa tenebiai babuama binukubainmisbu Dios jatuwen benimakin jatu manakukin jaska jabun Dios bechipaimamisbu jaskabu jatuki Dios yubakai jiwekuian jatuki tanani jatu jawen manakuxanikiki, maiti sawemakin akawakinan. <sup>13</sup> Ja inun, chakabun Dios unanti watiduma inun jau nun chakabu wanun Diosun nuku yunutaskaismaki. Jaskawen taexun tsuabunda jatun shinanwen jawada kemu taxnia uin kanekatsis ikin yuikin: “Diosun unanti wakin ea kanemakatsis ikikiki”, iwanan, jau jaska ibubis shinain janchayamakubainunbunwen. <sup>14</sup> Diosun jaska yunuamabiaken ibubis jatun

shinanen chakabu shinankin jaska bechipaiai keska aki jaki nexei chakabu beyakubainmisbuki. <sup>15</sup> Na chakabudan, eskaki. Matu yuinun ninkakanwen. Tsuabunda jabun juinti medan jawada chakabu shinankin me taewatan: “Jawamaki”, ikin chakabu betsapa mekin mata wakubaini Diosbe ana jaibunameama jawen jancha ana chibankatsi ikama ikubainaibuwen taea niti ikama Diosbe jiweama mawai benuxankanikiki. <sup>16</sup> En betsabu inun en puibuun, en matuwen nuiaidan, jau ibubis man padanananyamanun bun matu xabakabi yuinun ninkakanwen. <sup>17</sup> Nukun Epa Diosun badi inun uxe inun bishi damiwanitun jawen shinan betsapa waisma inun jakidi jawa juneamawen taea jaska tibi jawa chakabuma pepa besti janua juai nuku inankubainikiki. <sup>18</sup> Ja inun, Diosun nuku jaska wakatsis ikin jawen kakape chanimawen nuku jiwea bena inaniki. Nuku dami waniwen taexun nukun dukun jawen bake ikunwankin nun taewani nun jayabuki.

*Diosun jancha chibain jaskai jiwtikiaki, na janchadan*

<sup>19</sup> En betsabu inun en puibuun, en matuwen nuiakididan, eskaki, shinaindakanwen. Jawada Diosun matu dasibi yusinkatsis ikai menan jawaida ninka peidawakubainkanwen. Jakia jawada yuii man janchakatsis ikai unanxubida jatu yuikanwen, jawa jatuki sinatamadan. <sup>20</sup> Jamen yuda betsaa ja aki sinatakinan, jaska Diosun bechipaiai keska aki man pepatidumaki. <sup>21</sup> Jaskawen taea matu dasibibun jaska Diosun atimapa danamis chakabu betsaa betsapa man jaya jenekin puta keyudikanwen. Man jaska waiwen taexun Diosun kakape matu yusianbu man ma ninkanidan, jawa dananya-makanwen. Ja Jesúsun janchadan, kushipa paepaki. Jatun matu paxa waxanikiki.

<sup>22</sup> Diosun jancha Cristokidi kakapedan, bemakis besti ninka bestiama jaska jancha man ninkai keska ja jancha ninkatan akubainkanwen. Jamen jaska man jancha chibanmadan, ninkabiai ibubis man padananan bestitidubuki. <sup>23</sup> Tsuanda Diosun jancha ninka bestimisdan, ja jancha chibain jaki meseamadan, yuda betsan jawen besu jawen beisitiwen <sup>24</sup> uinbiakin jawen besu jaskadada ibubis uinbiatan nasaukekaini jawaida jakimamiski, jaskadada uinxu shinanmadan. Jaska keskadiai Diosun jancha ninka bestitan jakimakubainkanikiki, jatun chakabu pewakatsi ikamadan. <sup>25</sup> Jamen tsuabunda Diosun jancha yununi ninka bestiama jakimakatsi ikama jaska chaniai chibain jatun chakabu jenei pepakubaintidubuki. Jaska bestiama jawen jiwekaini chintuanma jaska tibi Diosun janchan yunuai menei jaskai shinan chankankanikanikiki. <sup>26</sup> Jakia tsuabunda Dios jiwea kenwankin shinankin: “Dios ikunwain en jiwxunkunkainaii”, iwanan, shinanbiakin jawada atimapa shinanchakakin yui xeti itibia nemai xeti itidumawen jatun shinan pe mekeamawen taea ibubis padananankin kanekin Dios benimawatidumaki, Jesús ikunwain jamenkinan. <sup>27</sup> Jakia tsuabunda chanima Dios jiwea kenwan kayabikin nun akaibudan, nun eska itidubuki. Matu yuinun ninkaidakanwen. Nun pepa jawa chakabuma ikatsis ikaidan, nukun Epa Dios benimawakin eska uinmakubainkanwen. Bake ibuumabu inun, ainbauibu jatun bene ana jayabuma nuitapaibu jabuwen nuikin jabun jawada bixunkin jatu medabewakubainkanwen. Ja inun, jamapai yudabun akai chibain kemui idumapamayamakubainkanwen.

## 2

*Diosun jancha chibain medabenain eskatikiaki, na janchadan*

<sup>1</sup> En betsabu inun en puibuun, betsadan, nukun Xanen Ibu Jesucristo pepajaida man ikunwainwen taexun yuda tibiwen nuichakai betsaa katukin

betsa dananyamakubainkanwen. <sup>2-3</sup> Jaskawen taexun miyuiwen matu yuinun ninkakanwen. Xanen ibun mane oro meichikiti sawea inun, tadi jawenduajaida sawea matube ichanun itan matu anu jikiaya juni betsan yuikin: “Na tsauti bebunua peki tsauxun ninkayuwe”, iwanan, man jatu duawayu juni betsai nuitkai tadi chuka sawea matube ichanun itan matu anu jikidiaya juni betsan yuikin: “Main tsauxun ninkayuwe. Nikatsi iki min nixun ninkatiduki”, iwanan, <sup>4</sup> juni nuitkai dakewakin xanen ibu pe bestikidanai ikin man duawakubainmiski. Jaska katukin jaska Diosun matu amakatsis ikai man akama ikunkainaii, shinanchakakinan.

<sup>5</sup> En betsabu inun en puibuun, matuwen nuikin en matu bechipaiai en jancha ninkaidakanwen. Na mai anua tsuabuda nuitkaapai Diosun katua jabun Dios ikunwan kayabiaibu pepakanikiki. Janua chipu jaska jiwekunkainaiwen taexun niti akama nai anu jabe jiwemaxanai Dios yubakanixun dananma jatu bechipaimisxun jatu manakuxanikiki, nai anu jatu jiwemakinan. <sup>6</sup> Matubunan, shinankanwen, jabuwen datekin man jaska jatukidi shinainan. Ja yuda mabuwanyanbu man duawaidan, jabunan, matu ichakawamisbuki. Ja inun, jabiabundi matu achixun xadabainkin xanen ibubu matu inanmisbuki. <sup>7</sup> Jabunan, nukun Xanen Ibu Jesucriston matu katuni jakidi jawen kenawen man janchai jancha chakabuwen jakidi matu chitemisbuki. Matu jaska wamisbukidi shinankanwen. <sup>8</sup> Jaska Diosun jawen jancha yuixunikabu jatu kenemakin jatu yusinma akeakeni tibi binua Jesúsun ja kene ana jatu yusini matu ana yuinun ninkaidakanwen: “Mimebi min yuda min nuimis keskakin yuda betsabu tibiwen nuikubainkanwen”, iniwen taea jaska chibankubainkin jawada Diosun bechipaimis akin man chibankin akin pewaidan, jaskadan, peki. <sup>9</sup> Jakia jadatuda mabuya inun peiya besti jatukidi shinankin ja yuda betsabu mabuuma jawawen matu medabewatidubuma jatu shinankin kanekin Diosun yununi pewama matumebi Diosun kupiti man ichawai. <sup>10</sup> Tsuanda dasibi Diosun yusian chibankatsis ibiakin jakia yusian bestichai chibanma kanekin dasibi ja Diosun Moisés yununi inun nemani man ma jabiati chakabuwaki, matun yuda jawawen xuxati jayamaidan. <sup>11</sup> Ja inun, Diosun Moisés jawen yusian kenemakin yuikin: “Ainyanbia inun beneyabia betsabe chutanametimaki”, ani inun: “Matunmebi pubenkin yuda betsabu tenantimaki”, akin yuiniken janua man ainyan inun man beneya yuda betsabe min chutanameamadan, jaskai man peaii. Jamen jaskabiai juni betsabu tenantin Diosun yusianki meseama pata-pakin man kanekubainaii. <sup>12</sup> Tsuabunda Diosun yunuti inun jawen nemati Jesúswen jatu unanti wakatsi ma pewaniwen taexun jadakidida man janchai inun man jatu uinmakubainaian, chanima Jesúsun yunuti benawen ma matu taxnimakubainikiki. <sup>13</sup> Diosun nuku eska waxanikiki. Matu yuinun ninkakanwen. Tsuabuda nun jatuwen niusbuma Diosundi nuku unanti wai nuiama ixanikiki. Jamen tsuabuda nun jatuwen nuikubainmisbuden, janu kupikin unanti waitian jawa nuku ichakawama jatu binumakin nuku paxa wakin binumaxanikiki.

### *Jadatubunda ikunwan kayabi wai medabenain unantikiaki, na janchadan*

<sup>14</sup> En betsabu inun en puibuun, tsuabuda eska janchamisbuki. “En Dios jiwelexunkin pe chibankin en ikunwaiin”, ibiamisbu jakia jaska Diosun yununi axunkin benimawatidubumaki, jamen jawen jancha bestiwen yuidan, jawa jawen ikunwain kayabi xabakabi jawen jatu uinmakin axuanmabadian. Jaska Dios ikunwainkidi besti janchamisbuden, Dios anu mekei paxati jawen ikunwain jayamaki. <sup>15</sup> Shinankanwen. Eska ikunwain betsabu juni kasmai ainbu jadatuda nuitkai tadiuma inun pitiuma natian jawa jayama

jiweyuken <sup>16</sup> tsuanda tadi inun piti jatu inankin medabewayukatsi ikama jawa jatu medabewatikidi jawen shinanen medabenan besunmai jatun kexa bestiwen yuikin: "Tadi pe sawetan jawada piti man pikatsis ikai pikin yaniwatan unanuma jiwekunkainwen", iwanan, jancha pepa yuibiakin jaska jatu uinmakin axuanmabia matun jancha jamenki. <sup>17</sup> Jamen tsuada: "Dios en ikunwaiin", iwanan, kexa bestiwen yuaidan, jaska besti kainmaikiki, jaska Diosun bechipaiai xabakabi axunkin uinmamadan. Jawen akadan, mawa keskaki.

<sup>18</sup> Jaskai tsuanda ikunwan kayabi wadiamabe janchai eskai man unantinantidubuki. Matu yuinun ninkakanwen. Tsuabubeda janchakin yuikin: "Mianan, Cristo min ikunwanyan eanan, yuda betsabu en medabewakubainaii, ikin en yuiaiwen taexun jaska yuda betsabu en medabewai en pe jiwemis mia uinmakin jaska Cristo en ikunwain en mia uinmatiduki. En akaya jakia mian tsuada medabewama jaskada Cristo min ikunwain xabakabi min ea uinmatidumaki. Janchawens besti ikunwankin min jawada min ea uinmatidumaki", akin man jatu dakematiduki.

<sup>19</sup> Januxun matu betsandi shinankin yuikin: "Epa Dios ja besti kushipaken ja besti en ikunwaiin", ikin man pe shinankin yuiaii. Jaskabiaken yushin chakabubun jabiaskadi ikunwanbiai Dioski datei jawen yuda chuduin saki saki idiamisbuki, kupixanaiki dateidan. <sup>20</sup> Jaskaken Dios ikunwainan, ana unainsmapayamakanwen. Cristowen Dios man jamen ikunwan bestiaidan, jamenki. Jaskaken man kanemis jamenwanma unantan ana jameanma ikun kayabi wakin Cristowen Dios dayaxunkubainkanwen.

<sup>21</sup> Nukun xenipabu Abrahamkidi matu shinanmanun ninkaidakanwen. Jawen bake Isaac kainma ma bedunanken Diosun Abraham ikunwain unanti wakin yuikin: "Min juni bakedan, ja min bechipajaidai, min bake Isaac Mati Moriah anu iyuxun chi tapu watan jakixun ea inankin kuakin menuxanwen", aka iyuxun samama chachinun, iwanan, uinmakin akaya Diosun nemanikiaki. Jaska wakin jawen shinan pewen Dios benimawaya: "Ea ikunwain juni pepaki", aniki. <sup>22</sup> Jaska nukun xenipabu Abrahamnen Dios axunkin uinmai jawen akawen jaska ikunwain kayabi xabakabi wamaniki. <sup>23</sup> Jaska Abrahamnen Dios ninkaxun jawen jancha chibankin jawen bake yaushiama jawada Diosun yunuua axuniwen taexun Moisin jakidi kenekin yuikin: "Abrahamnen Diosun jancha ikunwaniwen taexun Diosun shinankin: 'Abraham juni pepaki'", aniki. Januxun ana Diosun yuikin: "Abrahamnan, en jaibuki", anikiaki.

<sup>24</sup> Jaskaken bemakis Dios ikunwan bestiama jakia Diosun yunuadi jadatubunda man axuainwen taexun Diosun matukidi: "Ma pe waniken jaska shinankin ikunwankin man uinmakin jawada axundiaidan, man ma pediki, ikunwan bestikin man akamadan", shinankin matun aka uindakubainkanwen. <sup>25</sup> Abraham keskai Rahab atiabiamis Dioski mesekin Israelbun xanen ibun tsuma unanepa unantinan dabnika Jericó maewan anu jikitan Rahabin jiwe anu jikiaibu jatu unanti watan Jericó maewan xanen ibuki chaniaibu jawen soldadobu jabu unantinantchaninika dabe jatu achimanun, iwanan, Rahabin jiwe anu jikiabu Rahabin jatu medabewakin soldadobu padanxunkin jawen jiwe anu adubiatan jatu yuikin: "Chania en jatu uinxuki. Jakia jadakidida ma bukanikiki. Jatu benatankanwen", atan bai betsawen jatu nichinkin medabewanikiaki. Rahabin jatu jaska waiwen taexun jawen akawen Diosun pepa wadianiki. <sup>26</sup> Ja inun, yuda yushinyanbia jawen yushin kainkainaya mawamiski. Jaska keskadiai ikunwan bestikin jaska Diosun yunuua chibankin dayaxunama jawen akadan, jamenki, jatun shinan pewama mawa keskadan.

## 3

*Nukun jancha paepa chi keskakiaki, na janchadan*

<sup>1</sup> En betsabu inun en puibuun, matuwen nuikin ana matu yusinun ninkakanwen. Jatida ichapa matumebi jatun yusinanun ika jawen kemuya-makanwen. Na jiwea nun unanmabia nun Dios dayaxunun ikaibudan, jaska tibi jatu medabewai nun janchakin jatu yusinbiamis jabiawen taexundi jawa kaneama Diosun nuku tibi unanti waxanikiki. <sup>2</sup> Dasibibunan, nun kanejaidamisbuki. Jaskakenan, tsuabunda jancha chakabu yui xechakakin kanekatsis ikama jawen yuda mekekin jamapai tibi shinankin jawen shinan meke pewatan jawen jiwea kayatapinbaintidubuki. <sup>3</sup> Ja inun, jaska keska wakin caballo nun mekebainmisbukidi matu yusinun ninkakanwen. Caballo jawen yuda jidabi mekemabainkatsi jau nuku ninkabainun jawen jaxpanu mane jankixkuntan jawen buxka buxkean akeakebainkin dasibi jawen yuda jidabi nun mekemabainmiski. <sup>4</sup> Ana jaska keskadi betsadan, xaxuwan ewapa niwewanen tuabiabainmisken janida bukin juni jatun bunikatun jadidi bukatsis ikin jawen buxkean akeakebainti jaiman keska chinetamea jatiumawen bukin kayatapian akeakebainmisbuki. <sup>5</sup> Jaska keskadi wai nukun janawenan, jamapai betsa betsapakidi nun jawen janchamiski, pepa inun chakabu jatu yuikin jatu shinan junekin jatu shinan pe wamakinan. Jaska keskadi wakin nun jatu eska watiduki. Bai ewapa chi deken pishtawen ketian ja bai ewapa menu keyukin tawakada abainmiski. <sup>6</sup> Nukun janchadan, chi keskadiki. Jaska keskawen tsukida shinanchaka pishtakin nun xechakai janchaidan, nun ja jatu dabankakin nuitapa watiduki. Jamapai jancha chakabu nun yuiaidan, paeki. Jaska shinain nun janchamiswenan, ibubis nukun jiwea bai menukin itsa wakin nun benumiski. Satanás chi anu kaxanaitun jatun matu shinanmamiski, matun jiwea pe kainai nakumakin chakabu wamakinan. <sup>7</sup> Ja inun, yuinaka ni medan jiweabu inun, peiyabu inun, nutawen mapumisbu inun, ianenwan medan yuinaka jiweabu nukuki nukuai bitan pubenbiaken dasibi daewakin unainsmapa watan yudabun beya wakin daewatidubuki. <sup>8</sup> Jakia tsuan nukun jancha nemakin ibubis mekekin pewatidumaki. Ja chakabu jaki mata jatun binua jaska waxun jancha pe yuitidumaki, ja chakabu ichapa pae matadan. <sup>9-10</sup> Ja inun, janchakin jabias janawen nukun Xanen Ibu Epa Dios pe yuikin kenwanbiatan yudabu ja itsa wakin dami wanidan, jabias kexawen jatuki xechakakin nun jatu yupumiski. En betsabu inun en puibuun, nun ana jaskatidumbumaki. Shinaindakubainkanwen. <sup>11</sup> Ja inun, jabias chachanua unpax paisma inun unpax muka jabaismaki. <sup>12</sup> Ja inun, higuera ji bimi ja besti bimimiski, xenan ikamadan. Ja inun, nishi betsa jawen bimi besti imiski, higuera ika-madan. Ja inun, ian batapanu unpax paisma nun bitidumaki. Nukun jancha jabias keskadi wakin jabias janawen jancha pepa inun jancha chakabu nun yuialma itishadaii. Jaskaken nukun jancha Dios mekematan Dios kenwain yudabuki ana xechakai ana jatuki en jen iyamakubainkanwen.

*Unanepa kayabidan, eskatikiaki, na janchadan*

<sup>13</sup> Eskai unanepa kayabi man jiwtidu matu yuinun ninkaidakanwen. Chanima matubu jatidibun Diosun jancha unanjaidakin man ninkajaidakubainaibunan, kaneama yudabu matun shinan pe jatu uinmai pe-jaida jiwekubainkanwen. Man jaska jiweabu jawada pe man akubainmis shinankin ana yuialma duapa bestikin jaska Diosun shinanwen babutan unanepajaidakin xabakabi yuda betsabu man jatu uinmatidubuki. <sup>14</sup> Jakia matubu betsa unanepakatsis ibiai yuda betsabu tibi jawada jaya min mia jaskatiduma shinain matun juintinin pubenkin jatu paxkanun ika xanen

ibunun ikin jaska Diosun bechipaimis chanima man jayamabia jaska bestiwen man kenkubainkanaii. <sup>15</sup> Jaskakin kanei ibubis unanepapaikin jaska Diosun shinain anua juai akama jakia jaska Dios ikunwanbuma inun Satanásan shinamis jaska keskadianun ika man ikaii, yuda betsabu tibi binunun, ikidan. <sup>16</sup> Janua matu anua tsuada unanepabiaya ja chibankatsi ikama jaki sinatai eadi jaskadianun ika shinain xanen ibunun ika man binunanain man jaskaibu tsuan matu pe meketimaken jamapai chakabu tibi mekin man akai jayaki. <sup>17</sup> Jakia jaska Dios anua juai jaya jawen unanepakin akidan, man eskatidubuki. Matun yuda man xanen ibubia matun shinanwen xanen ibukidi shinanma jatu binukatsi ikama pe besti ikunkaini xabakabi man jatu uinmatidubuki. Ja dikabi duapai inun, jatuwen nuikin betsabu janchai nemama ninkamis inun, daewanika inun, betsabuwen nui medabenan bestimis inun, bepadameama dasibi jatu medabewamis inun, chanima yui kayabimis inun, yudabu padainsma inun, Dios chibain chintuanma inun, pepas besti katui unanepabu man jiwtidubuki. <sup>18</sup> Jaska unanuma man jatu jiwtankubainai ja unanumawen taeadi yuda betsabu unanepadiakin xabakabi jatu uinmadiakin pe besti man jatu uinmakubaintidubuki.

## 4

### *Diosbe jaibunametan ana chintuntimakiaki, na janchadan*

<sup>1</sup> Man unain ikai janua jukin matu ja imakin janchawen janubi chitenamemakin matu detenamemaidan, jaska kainkinan, matun juinti medanua kemu chakabu taxnikin matu imaikeki. Man jaskakunkainaidan, shinankanwen. <sup>2</sup> Ja inun, jawada bikatsis iki kemubiakin man bitidumawen taea jawada yuda betsa jaya uin jawen man kemuai yuda betsaki sinatakin man tenankatsis ikaii. Ja inun, yuda betsa mabu jayaken putamatan bianun ika nui sina detenun ikasmai man ja ibestimiski. Jabiaskabiaken jawada Diosun matu inantidu yukakin man ea aismawen taexun Diosun jawa matu inanmaki. <sup>3</sup> Ja inun, jawadakidi Dios man yukamiski. Januxun man yukakin man ea abia jawa man bismaki, man jamakidi yukachakaiwen taexunan, jaskadan, jaska Diosun shinain keska akatsi ikama jaska matumebi jawen bepadamei ibubis benimai man jamen chakawakatsi ikin jakidi shinainan. <sup>4</sup> Jaskati kemain yudabun man ikunwankin pewabumaan, ¿jaskai Dios jaibu wabiatan matumebi jawada Diosun danain man akubainai? Jaskaken tsuabunda jawada Diosun bechipaima bechipaikin Dios danain ana jabe jaibunamekatsi ikabumaki, ana chintuntan jaki sinatamaidan. <sup>5</sup> Matu shinannmakatsi ikin Diosun jancha jakidi kenekin yuikin: “Diosun Yushin Pepa nuku medan jiwanemanitun nuku yaushikin mekekubainmiski”, iwanan, yuikin jamen jakidi keneama iniki. <sup>6</sup> Jakia jamapai tibi nun akaidan, jawen pepawen nuku medabewakin binumaikiki. Jaska jawen jancha yuixunikatun kenekin: “Tsuabunda yuikin: ‘Jamapai betsa betsapa emebi en atiduki’, ikin keainbuden, Diosun jatu bextemiski. Jamen tsuabuda babutan yuikin: ‘Diosun besti ea medabewaya jawada chakabu jawen pepawen besti en dainbaintiduki’, ikaibu duawakin jabu medabewakubainmiski”, iniki. <sup>7</sup> Jaskawen taexun Diosun medabewakin jau matu mekekubainun jaska bechipaiai axunkin chibankubainkanwen. Jaskai jen iyamakin diablo Satanásan matu chakabuwamakatsi ikaya: “Diosun ea mekeaya en mia ninkamaki. Tudi kadiwe”, man wakubainaya Diosun kushipaki datei Satanás paxaxanikiki. <sup>8</sup> Jaskaken tsuabunda Dios inun Satanás ja dabe chibankin man shinanchakaya matu yusinun ninkakanwen. Janun Dios shinan kayabikin jaibu kayabi wadikanwen, jadi

jau matube jaibunain dasinunan. Man jaskakubainaibudan, jaska nukun meken detsis mepanui nun yamamis keska wakin matun juintiwen man shinan chakabuwai jaki pechi jakimatan yamawadikanwen. Jaska wakin man Dios bechipaikin jaibu wakatsis ikaibu Diosun matu jaibu waxanikiki. <sup>9</sup> Ja inun, man jabe jaibunameama chakabuwakubainaibuun, ana pepeama matun chakabu unantan jawen kaxakatsi iki ana usain benimama juinti nishmai punu nukatan matun shinan inun matun juinti pewadikanwen. <sup>10</sup> Janua shinan betsai babutan nukun Xanen Ibu bebunxun yuikin: “Eanan, chakabu besti en akubainmiski. En chakabu ea buaxuntan ana shinanma ea mekekubainwen”, man akubainai duawakin Diosun jawena wakin matu kenwankin binumaxanikiki.

<sup>11</sup> En betsabu inun en puibuun, betsabun ikunwainbu betsabukidi jawada chakabu ninkatan yuda betsabu yuibaunkin man jabu yuaiin, jatukidi jaska-timabiakenan. Chanima Diosun nuku yusinkin: “Matunmebi man nuimis keskakin yuda betsa betsapa tibiwen nuikin jatu duawakubainkanwen”, iwanan, nuku yusiniki. Jaskaken tsuabunda ikunwain betsabu chitekin Diosun yusian chitediakin jadatuda yusian man bechipaimabia jawen besti jatu unanti wakin man jatu chitea akeakeaii, matun yunukin akawakinan. Jatu jaska wai man daki ana Diosun yusian chibankatsi ikama danain man jaki meseamaki, jawen yunutikidan, Diosun abiaxanayadan. <sup>12</sup> Ja inun, jawada nun anunbun Diosun jawen jancha nuku inankin yununiwen taexun ja bestitun yudabu kupia akeaketiduki, jatun pepawen inun jatun chakabuwenan. Jabiaskabiaken jawen janchawen yununi shinanma kanei matudan, jabun matu enawaibu jatu unanti wakin jatu chitenun ixun man kanekubainaii. Jatu jaska watimaki.

### *Tsuada yubakai kenbiatan meshukidi jaskadaxanai tsuan unanmakiaki, na janchadan*

<sup>13</sup> Eskakididi natian matu yusinun ninkakanwen. Jawada Diosun matu amakatsi ikai shinanma jawada matumebi man akatsi ikai akin tsuanda yuikin: “Ikis kasmai, meshukidi kasmai, jadakidida maewan betsanu kaxun jadixun badi jidabi mabu inananan akeakekaunkin pei ichapa bikin en icha watanxanaii”, iki man jamen yubakaii. <sup>14</sup> Meshukidi jawada kainkin mia itimaska watidu min unanmaki. Nukun jiweadian, basnun keskakidi nun shinantidubuki. Penama basnun bututan mayakabiaxu jawaida pua iki mainbainmis keskai natian man jiwebia meshukidi man mawatidu tsuan unanmadiki. <sup>15</sup> Jakia eskakin man shinan pewatiduki, matu yusinun ninkakanwen. Tsuanda shinankin yuikin: “Nukun Xanen Ibun ea mekexun jiwe mayuaya jawada jaska ea shinanmai en atiduki. Ea shinanmamaken en atidumaki”, ikin pe man shinankubaintidubuki. <sup>16</sup> Jamen jaskama matu ibubis janchai kenkin jawada Diosun matu amakatsis ikai shinanma jaska man akatsi ikai besti matumebi kenkin anun ibestikunkainaidan, chakabuki. <sup>17</sup> Jaskawen taexun tsuabunda jawada pepa Diosun bechipaimis unanbiakin man akamadan, chakabukin Dios man paxkaii.

## 5

### *Mabuwanbyu jaskaxanaibu bebunkidi jatu yuinikiaki, na janchadan*

<sup>1</sup> Mabuwanbyuun, jaska kainbidanaya mei kaxai sain iki man nuitapax-anaikidi matu yuinun ninkakanwen. <sup>2</sup> Natian mabu inun pei ichapa inun, tadi pepa man jayaki. Jakia matun pei yamaya matun tadi jawendua jawen masanen pikin pesa pesa akin keyudiaxanikiki. <sup>3</sup> Ja inun, matun oro pei jexe inun matun plata pei jexe ichapabiaken tsua medabewakin jatu inanma

man adu bestikubainmis pui ichai keyuxanikiki. Jesús ana judiamaken natian matun pei man icha wamiswen taea Jesús ana ma jua kemaya ja mane pui ichai jabai ja matuki chaniai keskaya jawen taexun Diosun chi keskawen matu yama waxanikiki. <sup>4</sup>Jaskaxanikiki. Ninkaidakanwen. Dayakapabu jatu dayamakin matun bai jatu udumakin jatu padankin jaska wakin man jatu bexpa bechimis yuiaibu nukun Epa Dios kushipajaidatun jatu ninkamiski. Ja inun, matun yunu matu tsekaxun manchinxunmisbun jaska man jatu pakama yui matuki ja ikaibu ninkadiamiski, Epa Diosunan. <sup>5</sup>Na mai anu yuda mabuwanyan jiweadan, matun man uintidubuki. Jatidibudan, eska bestiwen jiweabuki. Tadi jawendua sawea inun, mabu jawendua besti jaya jawen besti kemuaibudan, ina awa pi chakayama xuadanwan nia keska ma janu dete kemabu keska man jiweabuki. <sup>6</sup>Matunan, jadatubunda jawa matu chakabuwaibuma betsabu tenankin ichapabu man jatu ichakawamiski, jabun jawa matu nemakin yuiabumadan.

*Jawada bika tenebiai jin jin ikama tenetikiaki, na janchadan*

<sup>7</sup> En betsabu inun en puibuun, nukun Xanen Ibu ana juxanaya jin jin ikama tenetan manakakubainkanwen. Jaska keskadiakin bai wanikatun jawen yunu banaima unanxubida ewai kaniaya jawen yunu pikatsis ikin uikin mai mechawakin jau mai bepaki wayunun, iwanan, jin jin ikama manamiski. <sup>8</sup> Matubudi jin jin ikama tenetan manakaidan, chintuanma shinan mestenwankanwen, nukun Xanen Ibu jawaida juxanikikidan. Uindakubaikanwen.

<sup>9</sup> En betsabu inun en puibuun, Epa Diosun dasibibu jatu unanti waxanai ma jua kemaki. Jau matu jatube unanti watan kupiyamaxanun ana nukun betsabube ja iki chitenamedabeyamakubainkanwen. <sup>10</sup> En betsabu inun en puibuun, nukun xenipabun Diosun jancha yuixunikabun Diosun jancha xabakabi jatu yusin bika tenebiai jin jin ikama tenetan jiwepaunibukidi shinain jabiaskadiai jiwekubainkanwen. <sup>11</sup> Ja inun, chintuanbumawen taexun Diosun duawakin jatu kenwankubainiki. Nukubu nun shinan chankankatis iskaidan, jawada bika tenekin jaska besti meama jawen kushipakin binukin nun tenetidubuki, jaska nun bechipaiamabiadan. Jaska nukun xenipabu Job ini man ninkamiskidi xabakabi ana matu shinanmanun ninkakanwen. Jamapai bika tibi yudabun tenetidubu Jobun tenekubainaya jawen yuda chami keyuni inun jamapai bikajaida teneai Diosun nemama ibiaya Jobun Dios ikunwanpakekubaini chintuanma inikiaki. Jaska Jobun ikunjaidawai nukun Xanen Ibu Diosun jaskada watan jawen nuikin duawakin atimas jawen isin xuxawatan ana jawenabu inun jawen yuinaka debui keyuima ana jawenchains inan akeakebainikiaki, jawen shinan pepawen Dios Jobwen nuikinan, nukun Xanen Ibu nui chakama inun medabenan chakaismatun jawen nuikin axunkinan.

<sup>12</sup> En betsabu inun en puibuun, jawada jatu axunkatsis ikin jawen jatu mestenjaida wamanun ixun Dioskidi kasmai jamapai tibikidi janchai jabukidi yubakayamakubainkanwen. Jakia: “En akaii”, itan kaneama akubainkanwen. Jamen: “En akamaki”, iki yuidiatan adiayamakubainkanwen, man jaskakin kaneismawen taexun jau Diosun matu kupiyamaxanun.

*Diosbe janchatikidikiaki, na janchadan*

<sup>13</sup> Tsuabunda man jamapai bika betsa betsapa meaidan, Diosbe janchakin jawen kushipa yukakubainkanwen. Ja inun, tsuabuda juinti benimai shinan chankankin Dios kenwain jau jatun juiwen nawakubainunbunwen. <sup>14</sup>Jaska inun, tsuada ikunwain betsa isin teneaya jabun matu yusinkin mekenikabu

jatu kenakanwen, jabu bexun nukun Xanen Ibun kena kushipawen jadatuda xeniwen puxatan jau xuxawanun jau Dios jakidi yukaxunkubainunbunan. <sup>15</sup> Dios ikunjaidawai man jabe janchaxunaya ja isin teneai xuxa wakin nukun Xanen Ibun ana benikin jatu kushipa waxanikiki. Ja inun, ja isin teneaitun jawada Diosun nemani kanei chakabudiashina Diosun buaxuntan ana shinanma ixanikiki. <sup>16</sup> Jaskaken matun chakabu ana juneama jaska man kanekubainai ikunwain betsabube yuinamekin chanikin Dios ea akin jau matun chakabu buatan matun yuda xuxawanun yukakubainkanwen. Diosun mia unan keyuaya man jabe jaskai janchaidan, chanima tsuada yuda pepakidan, Diosun kushipa pae ichapa jayaki. <sup>17</sup> Ja inun, nukun xenipabu Elías nuku keskakidi ana shinanankanwen. Bika tenei Diosbe nun jaibunameai keskai chintuanma Elíasdi jiwekunkainikiaki. Jakia jawenabun Dios chibandumawen taexun Elíasin Dios yukakin yuikin: “Enabu min kushipa uinmakin ana ui jatu inanyamayukubainwen”, akin yukakin ui nesewaima badi dabe inun besti namakis ui ana imama inikiaki. <sup>18</sup> Januxun Dios ana yukaken jawen kushipa jatu uinmakin ui ana tuea janua yunu pakiwa ewai ana bimijaida jayakunkainikiaki.

*Ikunwanbiatan ja bai chanima jeneabu medabewatikiaki, na janchadan*

<sup>19</sup> En betsabu inun en puibuun, tsuada matumebi chakabui bai pepa jenetan man ma benukenan, jau ikunwain betsan mia medabewakin jau ana matu chintunwankubainunbunwen. <sup>20</sup> Shinanganwen, matu tibibun man jatu medabewakatsis ikaibudan, chintunkin jatun bai pepa benushinabu man jatu medabewaidan, chanima mawa kayabitidububiaken man jatu kainmakin paxa waii, Diosun jawen jatu kupiti ichapa jayabubiaken jatu Dios daewaxunkin buamaxunkinan.

Jatiski, en janchadan.

Santiago

## **PEDRON JA DUKUN JATU KENE BUMANIKIAKI 1 PEDRO**

### *Pedron jatukidi shinanikiaki, na janchadan*

<sup>1</sup> En Pedro Jesucriston kushipayatun en jancha en matu bumaii, man mae pakea tibi Ponto inun, Galacia inun, Capadocia inun, Asia inun, Bitinia anu man jiwebaunabu anudan. <sup>2</sup> Epa Diosun tsuabuda katukatsis ikin bebunkidi jaska shinain keska man ixanunbun jawen Yushin Pepawen matu pewanixun ma matu medibi waniki. Jaskawen taexun man chibankubainx-anunbun jawen jimiwen Epa Dios daewakin Jesucriston matun chakabu buaniki. Jawen taexun Epa Diosun jawen pepa ichapa yaushiamma matu inankin jau matu unanuma jiwemakubainunwen.

### *Ikunwainbu Diosun jatu kenwankin duawaxanikiaki, na janchadan*

<sup>3</sup> Nun jawen bakebus pepawen nuku kupia nun jabe jiwxanunbun nukun Xanen Ibu Jesucristo nukuwen nuijaidaya Diosun ana bestenwankin nuku bake kain bena keskati waniki, ja shinankin jiwea ikibi ika betsa ja manakai jiwti nuku inankinan. Jaskawen taexun nukun Xanen Ibu Jesucriston mekenika Dios, jawen Epadan, kenwandiakubainankanwen. <sup>4</sup> Nai anu jawa yamatiduma inun, meshu tsamtiduma inun, jawa chapui nidi itiduma Dios matuki tanatan jawada pepa aduni Jesucriston jawen manakukin matu inan akeakexanikiki, man jawen jiwxanunbunan. <sup>5</sup> Matun shinanwen man Diosun kakape ikunwankubainaiwen taea Diosun jawen kushipa paewen matu mekekubainkin jaska yubakani janu badi jawen jeneaitian jaska matu pewaxuni man unankubainmis ibubis janu jaki nukukin man uinxankanaii.

<sup>6</sup> Jaskawen taea natian bika betsa betsapa jawen matu unanti waibuwen jaskawen benimatinabiaken man jawen benimayutidubuki. <sup>7</sup> Janua xanen ibujaidai Jesucristo ana juxun matuwen benimakin jau matu kenwanxanun jaska oro mane tashipa chiwen pewakin jas wamisbu keska wakin: “Jaska man Jesús ikunwainbudi pewakin matun shinan man ma mesten matu uinun”, ixun jabun matu ichakawaibu Diosun jawen matu unanti waikiki. Jaska oro mane tashipa bikatsi imisbu keskakin Jesús ikunjaidawai chintuanma pepakin man jatu binuaiin.

<sup>8</sup> Jaska inun, Jesucristo uianma ibiani man bechipaijaidaii. Ja inun, natian uianma ibiani man ikunjaidawadiaii. Jaska benima pae man jaya jan-chawen besti ja benima pae tsuan jaska taxnimatidumaki. <sup>9</sup> Jaska Jesucristo shinankin man ikunwain Diosun kupitiwen yudabu kopiaya matun binui man paxaxanai man jadi shinaiin.

<sup>10-11</sup> Jaska wakin Diosun matu duawakin yuixanaijidi jawen jancha yuixunikabun Mesíaskidi bebunkidi ichakawabu nuitapatan jatu maemax-anaikidi Criston Yushinin jatu unanmaya Diosun jatu kenema jabun ibubis tapinun ixun benajaidakin shinain: “¿Tsuamen? ¿Jatian jaskaxanimenkain?” ikubainibukiaki. <sup>12</sup> Ja Mesíaskidi jatu chanimakin jau Diosun jancha yuixunikabun ibubis Diosun yusian ninkatan jakidi jatuna besti watidubuma Dio-sun jabu chipu jiwxanaijidi jau jabundi jakidi unanxanunbun, iwanan, jabu matu kenemaxuniki, matu medabewakinan. Mesías Cristokidi kakape matu unanmakatsi ikin jawen Yushin Pepa nai anua yunua januxun Jesúskidi yusinan betsabun jakidi datan akin matu unanmakubaunibuki. Na jabias kakape matu yusiajnbu Diosun nai tsumabundi ana tapinpai idiakanikiki.

<sup>13</sup> Jesucristo man ikunwainwen taea ana tatimama dasibi matun shinan

mestenwantan jaskaki chiti itan dateyamakubainkanwen. Jesucristo ana juxanai manakakin Diosun jawen pepawen matu duawaxanai ikunwankin jaskakidi besti manayukubainkanwen.

*Diosun ja jiwea keska na mai anu nun medibi pepaijiwexunyununbun nuku katunikiaki, na janchadan*

<sup>14</sup> Uatian Dios unandiamma chakabu bechipai man chakabupaunibuki. Jaskaken natian Diosun bakebui ana jaska man bechipaipauni keska jiweama bake mishtinbun jatun ibuan jancha ninkatan chibanmisbu keska jiwekubainkanwen. <sup>15</sup> Natian ana jaskama matun jiwea betsa watan medibi pepakubainkin bika tenekin jatu uinmakubainkanwen, jatun matu katuni medibi pepa jiwea keskadiaidan. <sup>16</sup> Diosun Moisés yuikin: “En medibi pepawen taea matudi medibidi pepakubaini jiwekubainkanwen”, ikai ninkatan keneniki.

<sup>17</sup> Jabiaskadi wakin yudabu betsa betsapa dasibi uinkin jatun shinan tibi inun jaska wamisbu tibi kaneama Diosun unanti waxanaiwen taexun Dios dayuikin: “Epaan, ea mekewe”, aki badi tibi matun jiweawen duawakin kenwain jaki mesekubainkanwen. <sup>18</sup> Jamen matu ikidan, matun xenipabun Dios unanma chakabu besti akin jatun matu medabewakin jiwemakin pewatiduma beyawanibu man jatu chibankin akubainidan, man unanjaidaii. Tsuan jaska matu meketidumajaidabiaken jawen matu kainmakan, jawada mabu chapumis oro inun plata mane keskawen matu akama <sup>19</sup> jamen jaskama chaxuhan bake pepa jawa chami jayama detexun menu keyukin Dios daewapaunibu keska wakin jawen bake Cristo mawakin jawen jimi pepajaida dasibi betsana binuawen Dios jawena nuku wati wamakin jawen daewati waniki. <sup>20</sup> Ja inun, nai inun mai damiwakin taewadiama Mesías Cristo yunununbadikatsi Dios bebunkidi yubakaniken janu ma badi jawen jeneaitian ma kemaya matu medabewanun ika Jesús taxnikiaki. <sup>21</sup> Jaskakidan Criston jawen Epan jancha matu unanmaiwen taexun man Dios ikunwanibuki. Jaska matu wabiaya tenanbu Diosun ana bestenwankin Xanen Ibu wani na jabiatian matun shinanwen jakidi ikunwankin Diosun jiwekuian matu inanxanai man jaki chiti ixun manakakubainaii.

<sup>22</sup> Man ma jaskawen taea natianan, Diosun kakape Jesúskidi ninkatan ja jancha chanima chibain man ma medibi pepabuki. Jaskakubainkinan, ikunwain betsabube bechipainame kayabikubainkanwen. Jaskakin matun uinti jawa chakabu jayama inun matun kushipa jidabiwen betsabu medabewai jatuwen nui bechipainamei jatube duanamepekanwen. <sup>23</sup> Man jaskakunkainxanun Diosun ana matu kain bena keska waniki, matun ibubu chutanamekin matu bawani keskama jakia Diosun jancha jiwea betsaisma jaya man ikunwankin shinan betsawaiwen taexunan, nukunabube dananananma man bechipainamekubainunbunan. <sup>24</sup> Jaska Diosun jancha betsawismakidi jawen jancha kenexunika Isaíasin yuikin:

“Yuda dasibi ni maxu keskabuki.

Ja inun, jawen jawenduai jawen pepamisbudan,  
ni maxu jawen sua keskabuki.

Badi betsatian ni maxu chushiaya jawen juadi utsitan nidi imiski.

<sup>25</sup> Jakia Yavé Diosun janchadan,  
betsai keyuisma ipakeai jayaki”,  
aniki. Na jabias jancha Jesúskidi kakape jakidi datan aki jawen yuinika betsabu matuki chanidianibuki.

## 2

*Jesúswen taexun Diosun jawenabu bena wanikiaki, na janchadan*

<sup>1</sup> Jaska inun, jamapai chakabu tibi man akeakemis inun, man padanananmis inun, man bepadamemis inun, tsuada jawada pepa jayaken man jaskatiduma shinain man jatuki sinatamis inun, jawada yuda betsa ikai uintan matunamabia jawen taea man yuananan akeakemis ana jaskakidi shinanma jenedikubainkanwen. <sup>2</sup> Bakeishta kain taea chuchu beya wamakin amabu jawen yumeti unanmis keskakin nukun Xanen Ibu Jesúsun yusian kayati wakin jawen juinti kushipanun ixun jawen jiwekuin paxati jancha tapin mestenkubainkanwen, <sup>3</sup> nukun Xanen Ibu Jesúsun matu mekemis jawen pepa unankin man ma unanti wawen taeadan.

<sup>4</sup> Jesús jiwe mestenwanti mishki keska junibun dananbianibun Diosun bechipaijaidakin katuni bestibu tibi ja mishki jiwea pepa jaibu wai jaki ketaxamekubaikanwen. <sup>5</sup> Man jaskakunkainaya man Jesús ikunwainbu dasibi mishki jiwe keska wakin jawen kenwanti kayabi matu wakubainikiki, jaskai duanamei man ma jaki dasiabudan. Matu dasibi man Diosbe janchaxunikabudan, man jawenabu medibiki. Jesucristo man ikunwainbuwen taexun jaska Diosun bechipaiai akin man Dios benimawakubainnai. <sup>6</sup> Jaskai kaikidi jawen yuixunika Isaías Diosun yuikin:

“Uian. Katuxun jawen jiwe mestenwanti mishki pepa keska xanen ibu kushipa Jerusalén anu en taxnimaxanaii.

Jawen jancha jabun ja ikunwainbu ean en jatu dakewama ixanaii”, aka ninkatankeneniki. <sup>7</sup> Na jaska keneni keska tsuabunda ma ja mishki kushipa ikunwainbu matudan, man ja bechipaijaidaii. Jamen tsuabunda ja mishki kushipa ja ikunwanma danankubainkanikiki, ja keneni keska wakinan:

“Mishki jiwe wanikabun ja mishki dananbiaibun jawen jiwe mestenwanti kayabi mishki pejaidaki, kushipadan”, aniki. <sup>8</sup> Ja dikabi Diosun na eskakidi Isaías yuikin:

“Jaki juti itan tin iti mishkiki, jawen jatu sinatamatidan”, ani keskadiai tsuabunda ja jancha jakidi kakape ninkatan chibankatsi ikama danain jaki juti itan jaki sinatai keskabu Diosun jabu kupixanikiki.

<sup>9</sup> Janua matudan, yuda xuku betsa matu katuniki. Ja inun, xanen ibu binua Diosbe janchaxunikabu matu dasibi wakin ikunwainbu medibi xukua betsa matu wakin Diosun ibu wakin bechipaikin jawenabu matu wadianiki. Jaskawen taexun jakidi jawen daya pejaida Dioskidi man chanikubaunxanunbun man meshu medan ika keskaxun chakabu wamisbu janua matu kenakin Criston xaba jawendua anu matu jikimakin jiwe makatsi matu taxnimani. <sup>10</sup> Ja inun, ja dukun Diosunama man inibuki. Jakia natian man ma Diosun enabuki. Ja dukun Dios matuwen nuiama ibiani na jabiatian matuwen Dios nuikiki.

*Dios kenwain pepakin jatu uinmatikiaki, na janchadan*

<sup>11</sup> En betsabu inun en puibuun, en matuwen nuikin yunuai ea ninkakanwen. Man chaika juima man ikunwanbumabe jiwea nashui ika keskabudan, ja yudabun jaska shinain jabun kemu paewen matun yushin achixun yabutan matu bika tenematidudan, jaska bechipaiana jenekubainkanwen.

<sup>12</sup> Jakia ikunwanbumabe man jiweadan, Dios kenwain jatu nashui ika jiwe xun pepakin jatu uinmakubainkanwen. Man jaskaiwen taea man yuda chakabu ikai dabanen shinankin matu yuanbiamissun matun pepa uinkin jabundi Jesucristo ikunwankin Dios kenwantidubuki, Diosun janu yudabu unanti wakin keyuxanaitianan.

*Xanen ibu tibi ninkatikiaki, na janchadan*

<sup>13</sup> Nukun Xanen Ibuwen taea na mai anu matun xanen ibubu jatu ninkakin chibankubainkanwen, ja dukun jatun mai pakea xanen ibu betsa binuatun yunu keyua <sup>14</sup> inun jabu xanen ibu bexmasbu xanen ibujaidatun jatu yunua chakabu waibu jatun yununikabu jatu kupimamis inun pepa akaibu jatun pewen kenwanmisbuden. <sup>15</sup> Eska Diosun matukidi bechipaikin shinainkiki. Man pe besti wai jatu uinmakubainkanwen, jabun matu yuainbu inun jancha unanmabia unainsmapai matukidi sinatai jancha chakabumisbu jau bextekei ana matukidi janchayamanunbunan.

<sup>16</sup> Ja inun, Diosun kupiti Jesúsun chanima ma matu binumaniki. Jaskawen taexun: “En ma kupiti jayamaki”, itan matumebi ana chakabu unanti wamanun ika ana jaska shinanyamakubainkanwen, ana Diosun kupidiki dateama jawen tsumabu pepa besti ikubainidan. <sup>17</sup> Dasibibun matu yunumisbu jatu ninkakin uinmakubainkanwen, matubetan ikunwainbube nuinamei inun Diosun kushipaki mesekin jawen jancha chibain inun romano xanen ibu binuatun jawen jancha ninkatan chibandiakinan.

*Jesús yumanı keskadiatikiaki, na janchadan*

<sup>18</sup> Jamen jabun man jatu dayaxunmisbuun, jaska matun xanen ibun yunuai dananma ninkatan axunkubainkanwen, matun xanen ibu duapa inun matun xanen ibu duapamadi axunkin uinmakinan. <sup>19</sup> Man Jesús ikunwainan, chanima ja dukun matun jiweadan, Jesúsunaki. Man jawa chakabu wamabiaken matun tsumapan matu bika betsa betsapa memabiaibun jawa yuiama tenetan jaska Diosun bechipaiai axuin jaskai mestentan jiwekubainkanwen. <sup>20</sup> Ja inun, man chakabuwaiwen taexun matun xanen ibun matu kupia yumain sinatama man pe bexmaski. Jakia Jesús ikunwain man pepaiwen taexun ja shinanma matun xanen ibun matu kupia yumain jawa yuiama man sinatamaken Dios matuwen shinan chankamiski. <sup>21</sup> Eskawen taexun Diosun matu katukin kenaniki. Man jawa bika tenediamaken Cristo dukun ja dukuntun matu bika tenexuniki, ja chibankin matundi man bika tenediamaken. <sup>22</sup> Shinankanwen, Cristodan, matu eskaxunikidan. Tsua betsa padantaskama inun jawada Diosun nemani inun yununi kanekin jawa chakabuwamajaida matu ixuniki. <sup>23</sup> Januxun Cristo ichabiabu jatu bebis kemanamei janchama iniki. Isin tenemabiabu jawen jatu dateti jancha kushipa taxnimama iniki. Jamen jaskama Diosun jatu unanti wakin chanima kaneismatun jau mekekubainun jawen jiwea jawen Epa Dios inankubainiki. <sup>24</sup> Cristo jamebi jawen yuda cruzki dunua mawakinan, nukun chakabu nuku buxuniki, nuku shinan betsa wamakin nun ana chakabu jusiyamaxanun nuku buaxunkinan. Janua jiwea bena nun ma jaya nun ma pepai jiwekunkainai. Cristo mawakin jau ana chakabun matu tsumayamaxanun matu mexpamaniki, yuda betsabu jatun isin teneai xuxawakinan. <sup>25</sup> Ja dukun na mai anu jiweadan, chaxuhan ibuuma benuabu keska man iki taenibuki. Jakia natian Cristo ikunwankin matun jiwea chakabu jenetan man ma Cristo chibanyan janua mekenika pepatun ma matu mekexun uinkiki.

### 3

*Ainyan inun beneyabu jaskai jiwtikiaki, na janchadan*

<sup>1</sup> Ainbu beneyabuun, matudi yuinun ninkaidakanwen. Matun benen matu yunuai ninkatan jabebis yununamei jen iyamama axunkubainkanwen. Jaskakin jatiditun matun benen Diosun jancha ikunwandiamma duawai man pepakunkainai matu uinkubainmiswen taexun janchawensma man

pepawamiswen matun bene bestibu Jesús man ikunwanmatiduki, <sup>2</sup> Dioski mesei pe jiwekin man jatu uinmakubainaiwen taexunan. <sup>3</sup> Jaska inun, eska bestiwen bemakis jawendua bestitan jatu uinmakatsis iki buxtiwen buexeketan usuntinin usuakeakei oro mane jawenduawen daua bachi kadujaida sawe bestitan jatu uinmai mapuyamakubainkanwen. <sup>4</sup> Jakia jaskai bemakis bestima matun juinti uke medan matun shinan duapa betsaisma jaska matun yushin ja pepa jawendua duapai juinti pepaya man kunday ismakenan, jaskawen jawenduati Diosun bechipaimisdan, keyuismaki. <sup>5</sup> Jabiaskadiai en xenipabu ainbu pepabun Dios ikunwankin jatun mabu jawendua saweawen jawenduama jakia jatun benen jancha ninkai jawenduapaunibukiaki. <sup>6</sup> Eska wakin Saran jawen bene Abraham xanen ibu wakin jawen jancha ninkatan chibanpaunikiaki. Matudan, tsuada man Saran bai tanakatsis ikaidan, jawen baba keskakinan, jawaki dateama pepa bestikin matun bene uinmakubainkanwen.

<sup>7</sup> Ja dikabi man juni ainyanbuun, matudi yuinun ninkakanwen. Matun ain matube jiwea jabebis ninkakanankubainkanwen. Jatun yuda kushipa bexmas man unaiin. Jaskabiaken Diosun jabe matu jiwekuian inanxanai keska jaska Diosun bechipaiai keska matun aindi jatu uinmakin duawadiakubainkanwen. Man jaskamiswen taexun Diosbe janchakin man yukai matu ninkakubainxanikiki. Jamen jaskama man jabe jiwechakaxun Dios yukaidan, matu jawa ninkama ixanikiki.

*Jesús ikunwan kayabi wadan, bikabiaken tenekubaintikiaki, na janchadan*

<sup>8</sup> Jaska tibi en matuki chanixudan, jaska bestiwen jiwekin Jesús ikunwainbu tibibube jabias shinanwantan jatuki dasia binunananma pepai babu keskatan keanma bechipainamekubainkanwen. <sup>9</sup> Ja inun, matu chakabuwabu jatubebis ana chakabuwama inun matu ichabu jatubebis ana manakunain ichakananma ikubainkanwen. Jakia matu duawakatsi Diosun matu katuniwen taexun matu ichakawabiaibun ja shinanma pepakidi besti jatu yuikubainkanwen, jau Diosun jatu medabewakin duawadiakubainunan. <sup>10</sup> Jaskakidi xanen ibu Davidin jatu yuikin:

“Tsuabuda na mai anu badi ichapa unanuma jiweyukatsi ikinan,  
jatun kexawen jancha chakabukin chani yuikatsi ikamadan,  
jatun jana jau mekekubainunbunwen.

<sup>11</sup> Jamapai chakabuki jadi kemama jaskai unanumakin  
pe besti benakin jaska jau chibankubainkanwen.

<sup>12</sup> Pepabu mekekubainkin jawada yukaibu medabewakatsi iki  
Dios paxtixun jatu ninkamiski.

Jakia jabun chakabuwaibu uin jatuki Dios sinatai jatukidi pechimiski”,  
jatu watan keneniki.

<sup>13</sup> Januxun man jawa chakabuwama pe besti ikubainaibu jaska watan tsuan matu jawawen taexun chakabuwatidumaki. <sup>14</sup> Jakia Jesús ikunwain jaska pepawen dayai man jiwebiaken matu ichakawabiabu man nuitapabiyaya Diosun matu duawakubainai shinain juintinin benimakubainkanwen, e iki jatuwen jawa dakeamadan. <sup>15</sup> Jamen Cristo matun Xanen Ibu axunkinan, matun jiwea inankin kenwankubainkanwen. Matun jiwea man ma pewaken tsuanda jaska man Cristokidi kakape ikunwain matu yukaibu man jatukidi pe xabakabi chanikin man jatu kematiduki, <sup>16</sup> babutan keanma jatu pewen jancha wakinan. Jawa matun jiweakidi shinain man bika teneamaken jaska man Cristo ikunwain shinan chakabuma matu unantan ja jabun jancha chakabuwen matu yuain jancha chakabumisbu ibubis jatun janchawen daketidubuki.

<sup>17</sup> Jamen man chakabuwaya matu kupiaibu matun chakabuwen taea tenekanwen. Jakia Jesús ikunwankin jawada pepa man abiaya jawen taexun matu ichakawaibu Diosun jatu nemama man yumainan, chakabu-maki. <sup>18</sup> Jakia Cristo pepabia nun chakabuwen taea nukuwen nui nukun chakabu buanun ika bestiwai ana mawatimai nuku mawaxuniki. Cristo jawa chakabuwamabia Dios yudabu mekemanun ika nukun chakabuwen nukuwen nuitapaniki. Jawen yuda babu mawabiaken jawen yudaya ana mawatidumai jawen yushin besteni jiwekunkainikiki. <sup>19</sup> Yushin ichapabu Diosun nichinkin bichini kini anu Jesúsun yushin jadi kaxun jatu jancha wakin jaska Satanás maematan jawen jiweakidi jatu yuitanikiaki. <sup>20</sup> Jamen nukun xenipabu Noén jawen nunuti waya jabias jabu yushin patapanibu nichindiamma jau Diosun jancha ninkanunbun jin jin, iwanan, jawaida jatu kupikatsi ikama Diosun jatu manayuaya jawen jancha dananibukiaki. Ja inun, ui jeneama jene ewa wakin yuda betsapabu jatun chakabuwen taexun ja jenewen jatu kupikin Diosun dasibi yamawanikiaki. Januxun yuda eskadabes 8 besti nunuti medan Diosun jatu kupima Noéwen besti paxai mekenibukiaki. <sup>21</sup> Januxun natian Jesús man ikunwanyan ja jenewen Diosun jatu kupini man shinanyan jabun matu nashimakin matun yuda detsis chukaibumaki. Jakia nukun chakabu Diosun buatan nukun shinan jau nuku pewaxunkubainun nuku imamisbuki. Jakia nukubu paxaidan, Jesucristo besteni ja besti chibankubaini nun ixankanaii. <sup>22</sup> Janua Jesús mawa ana bestean nai anu ka jawen Epa Diosun yusiudi tsaua Diosun nai tsumabu inun xanen ibu kushipa dasibibú Diosun Jesús yununi Jesús xanen ibukin dasibibú jatu mekekubainikiki.

## 4

<sup>1</sup> Na mai anua jawen yudawen Cristo nuitapai yumaní keskai ja ini keskadiakin matundi chibankubainkanwen, tsuanda jawen yudawen bika betsapabu chakabu tibi mebiai ja chakabu Criston binuni man maemadiatidubukidan. <sup>2</sup> Jatixun matun kemu na mai anuxun jenetan jatixunda matun jiweawen besti jaska Diosun shinankin bechipaiai matun jiweawen dayaxuni jiweyukanwen. <sup>3</sup> Jamen Dios man ikunwandiamma ja ikunwan-buma keska man idiapaunibuki. Jawada jakimatishada kemuti chibainan, ja inun, kemui ainbu tibibe menamei inun, piti midimawen kemutapai inun, nawai beyusi paein inun, dami yushin kenwain man chakabujaidai keyudianibuki. <sup>4</sup> Jakia natian ana ja jaskaibube ana jatube ketaxametan man ana jatube betsapai kemutapamaken man jatube ikin jatu uin-mapauni jabu matuki en jen ikin matu yuanmisbuki. <sup>5</sup> Natian ja jabu jaska jiwekubainmisbu Dios bebunua jaki chanixanaibu pewamissun janu badi jawen jeneaitian Diosun jiweabu inun mawabu jatu unanti watan jatu kupixanikiki. <sup>6</sup> Jatu jaska waxanaiwen taea tsuabuda jatun yudawen chakabu mawa keska jiwekin yudabun jatukidi uin janchabiamiswen taexun Diosun jatu unanti watan kupididibia jatun shinan betsapabu watan jatun yuda chakabubiaken yusinanamisbun Criston kakapekidi jatu yusianbu jatun yuda chakabubia shinan betsapabu watan jatun yushin Diosbe jiwitidubu jatu yusinbaunibuki.

### *Jesucristo dayaxuni medabenantikiaki, na janchadan*

<sup>7</sup> Janua na mai keyui ma kemaya ana tatimama matun shinanen pe mekei unanepai chanima kayabi Diosbe janchai jeneyamakubainkanwen. <sup>8</sup> Matu dasibidan, eska besti ikubainkanwen. Jawada man jatubetan kane-mis man nui ichapa jayadan, jawendi matun chakabu man buatiduwen

taea nuinamei inun bechipainame kayabikubainkanwen. <sup>9</sup> Tsuada nia matun jiwe anu mapekeiba jatuki dakekenain jancha chakabuwama jatube beyanamekubainkanwen. <sup>10</sup> Jaska Diosun matu kushipa inankin duawamis jawen dayakin pewakubainkanwen, jawen duapa kushipa tibi ma matu inani man jayawen taexun betsabu uinmai medabenainan. <sup>11</sup> Jaska inun, tsuanda yusinkatsis ikinan, Diosun matu yusinmis keska besti jau jatu yusinkubainunbunwen, ibubis jatun janchawen akamadan. Ja inun, tsuanda yuda betsabu medabewakatsis ikin jaska Diosun matu kushipa inanmis jatu uinmakin jau jatu medabewakubainunbunwen. Jawada betsabetsapawen medabenankin man akubaina aidan, jawen Dios jatu kenwanmakubainkanwen, Jesucristowen taexunan. Man jatu jaska wakubaina aidan, Jesucristo xanen ibumis dasibi kushipa pepa jawenaki, ikibi ini jawen kushipa paepa jeneismadan. Jaskakidan.

*Nun Cristo ikunwain nuku ichakawabu benimatiikiaki, na janchadan*

<sup>12</sup> En betsabu inun en puibuun, matuwen nuikin matu yuinun ninkakanwen. Dasibi ikunwainbunan, bika betsabu tibi nun tenekubainmisbuki. Ma matudi memaidan, ja bikawenan, jawen e iki jawen nuiama mestentan tenekubainkanwen. <sup>13</sup> Jaska matu memabiabu Cristo ani keska wakin jabiaskadianiwen taexun matu tenemadiakanikiki. Jaskawen taea Cristo xanen ibujaidai ana taxnikidan matu benimajaidawaxanai shinain natian jaskawen benimatinabiaken Cristowen taea benimayukubainkanwen. <sup>14</sup> Ja inun, man Cristokidi yusinkubainaibuwen taexun jaska bechipaiama tsuabuda matuki sinatai ja ikaibuwen taea man ma Diosun pepa jaya jawen benimakubainkanwen, Diosun Yushin Pepatun matu medanxun matu jenebainama jawen kushipa matu uinmakubainikikidan. <sup>15</sup> Matun yuda betsabetsapaidan, eskawen taea imisbuki, pubenbudan, yumetsubudan, ichakanikabudan, yuda betsabika waiwen taexun jatu yumanwanmisbuki. Jamen matu ikidan, man jatu keska jiweamabia matu yumanwainbudan, jaska peki. <sup>16</sup> Jaskawen taea man xabakabi Cristo chibainbu matu nuitapa wabiaibu jatuwen datei dakeama man Cristonabuwen taea jawen Dios kenwankubainkanwen.

<sup>17</sup> Jesucristo ikunwain nun jawenabuwen taexun natian bika betsabu tibi memakin nuku tenemakubainkanikiki. Jaska nun tenebiamisken Jesús ana juaya jabun Diosun kakape dananmisbuden, jabu Diosun kupiadan, ¿jaskadada Diosun jatu kupiaitian yumankin tenechakayamaxankani-menkain? <sup>18</sup> Nun Diosunabu bika betsabetsapa tenebiai paxai Jesúsbe jiwenun ika nun manaibun jabun chakabuwakin Diosun jancha danankin ninkaisbuma jatun chakabuwakin Diosun jatu kupiaitian jaskadada bika jatu tenemachakayamaxanikiki. <sup>19</sup> Januxun Diosun yunua jawen shinanen tsuabunda aki bika teneaibudan, jaskaibu peki. Januxun jawada pepa akinan, jau jeneyamakubainunbunwen. Jau matu mekekubainun matun jiwea Dios inankubainkanwen. Jatun nuku damiwanixun nuku jeneisma ikunkaikin nuku uinmaxanikiki.

## 5

*Mekenikabu jatu yusinikiaki, na janchadan*

<sup>1</sup> Nukun Xanen Ibu Cristo nuku yumanxunai en uiniwen taexun natian jabuan mae tibi anuxun Cristo ikunwainbu matu mekenikabu en matu jatu yusin pewakatsis ikai ea ninkakanwen. Eadi Cristo ikunwainbu en jatun mekenandiki, jabu keskadidan. Ja inun, Cristo xanen ibujaidai jukin jawen kushipa nuku uinmaya eadi en jatube benimachakayamaxanaiii.

<sup>2</sup> Diosun enabu chaxawan keska matube jiweabu Diosun matu yununi jatu mekeidakubainkanwen, man jaska pe shinankin jatu medabewakatsi ikaidan, jaska Diosun bechipaiai keska wakinan. Jatu yunu bestiama inun pei binun ika kemuama jakia shinan tibi wama pe bestiwen nuikin jatu pe mekekin axunkubainkanwen. <sup>3</sup> Ja inun, matudan, jabu matube ichamisbudan, man jatun ibumaki. Jaskawen taexun matun jiwea pepa jatu uinma bestikin chibankubainkanwen, jatube medabenankinan. <sup>4</sup> Janua mekenika kayabi Xanen Ibu Cristo juxun man jamapai binumishu kupiti pepawen matu manakukin maiti jawendua keska chaputima matu inanx-anikiki, Cristobe matu chaxakapawakinan.

### *Ikunwainbu chintuntimakidi yusinikiaki, na janchadan*

<sup>5</sup> Jabiaskadiakin jabuan man jatu chibainbuun, mekenikabun matu yusinkin yunumis ninkatan jatun jancha chibankubainkanwen. Dasibi man jabun ikunwainbudan, babutan keanma ninkakanankubainkanwen, eskawen taeandan. Diosun jancha yuixunikatun kenekin:

“Tsuabunda yuikin:

‘Jamapai betsa betsapa emebi en atiduki’, ikin keainbudan,  
Diosun jatu bextemiski.

Jamen tsuabuda babutan yuikin:

‘Diosun besti ea medabewaya  
jawada chakabu jawen pepawen besti en dainbaintiduki’,  
ikaibu duawakin jabu medabewakubainmiski”,  
iniki. <sup>6</sup> Chanima Diosun kushipawenan, matu axuntidu jayawen taea babutan keanma manakukubainkanwen. Janu akaitian Diosun matu duawakin xanen ibu wakin kenwanxanikiki. <sup>7</sup> Ja inun, jawada tibiwen man bika tenei teai niti imis tibi Dios inankubainkanwen, jatun matukidi shinainkikidan.

<sup>8</sup> Inu keneya pintsikin yuinaka achitan pinun ika benabauni pubein janx iki tekeden tekeden imis keskakin diablo Satanásan matu bepadanan matu maemanun ixun benakubaundiaikiki. Jaskawen taea ibubis pe mekekin jamapai chakabu ana meama janun bestentan uindakubainkanwen. <sup>9</sup> Man ikunwain mestentan Satanásan kemuti ana meama jenei jen iyamakubainkanwen, na jaska tibi man meaidan, matubetan ikunwainbu mai jidabi anuadi jabias keskadi tenediaibu shinaindakubainkanwen. <sup>10</sup> Ja dukunan, badi ichapama man nuitapayuiai. Diosun jaska matu memabiatan jabiatundi matu kushipa wakin paxkatima watan ja jawen mestenwantiwem matu pepa wakin keyuxanikiki. Jesucristobe nun jaki dasitan jiwea ikibi iki nun pepai kushipaxanunbun jabias Dios nuikipatun jawena wakatsi ikin nuku katuniki. <sup>11</sup> Ja nukun Dios xanen ibu kushipajaidan, jau jabiskas ikunkainunwen, niti ikamadan. Jaskakidan.

### *Pedro jatuwen nuinikiaki, na janchadan*

<sup>12</sup> Nukun betsa Silvano chintuinsma en yunua na en jancha eskadabes matu kenexunxu en matu anu bumai ninkakin uinxankanwen. Na jaska Cristo ikunwankin jawen matu nuimai man ikaidan, chanima Dios matuwen nuikin jawen pepa matu uinmaikiki. Jaskaken jawa chintuin niti ikama man ikubainunbun matu medabewakin kenexunkin en matu yusinxu inun en matu mestenwanxu jawen taexun Diosun pepa bikubainkanwen, ja nui pae man jayawen taeandan.

<sup>13</sup> Roma anuxun ikunwainbu Diosun jabu matube katuni inun Marcos en bake keskatun jatun jancha matu yunudiakanikiki.

<sup>14</sup> Jaska inun, Cristo chibainbu tibi jatuki nukutan jatu dananma jatube bechipainamekubainkanwen.

Cristo ikunwain man jawenabudan, jau Diosun unanuma matu jiwe-makubainunwen.

Jatiski, en janchadan.  
Pedro

## **PEDRON JA KACHU JATU KENE BUMANIKIAKI 2 PEDRO**

### *Pedron jatukidi shinanikiaki, na janchadan*

<sup>1</sup> En Simón Pedro Jesucriston tsuma jawen kushipaya ea waniki. Nukun mekenika Dios Jesucriston kaneisma nun ikunwainbu keska man nuku chibankin ikunwambiaibuwen taexun en matu kene bumai uindakanwen. <sup>2</sup> Dios inun nukun Xanen Ibu Jesús jaibuwakin man jatu unanjaidaya unanuma matu jiwemakin matu duawachakayamai bikubainkanwen.

### *Diosun katuabudan, ewatikiaki, na janchadan*

<sup>3</sup> Dios kushipa paepatun jaska jatun bechipaiai keska jawen jiwekin nun jakidi shinankubainunbun nuku inanki, Jesucristo nun ikunwanyan Diosun nuku kenatan jawen daya pepa nun jayaxanunbun jawen kushipa medibiwén nuku katukinan. <sup>4</sup> Na jaska tibi nuku amaidan, jaska bebunkidi Dios ibubis janchai jawen kushipajaidawen yubakani chanima betsa waisma jaska ikunwankin man shinan betsa watan man ma Diosun beya ibu wawen taea na mai anuxun chakabu kemu paewen ikaibuwen jatu binui man ma Diosunabu paxatidubuki.

<sup>5</sup> Jaskawen taea man ikunwain kushipakin eska tibiwen ana matsankin binumakubainkanwen. Jesucristo ikunwain matun shinanwen pe jiwekubainkanwen. Ana Diosun kakape ninka pejaidawatan <sup>6</sup> ibubis matun yudakidi shinan pewatan mekekubainkanwen. Jaskai man jin jin imis tapiin bextekubainkanwen. Jaskai Diosbe man jaibunamejaidai <sup>7</sup> matubetan ikunwainbube jaibunain beyanamei jaska tibiwen nuii jiwekubainkanwen.

<sup>8</sup> Man jaska tibi jaya man jawen ewaidan, chanima nukun Xanen Ibu Jesucristo unankin man jamen jaibuwamaki. Ja inun, matun jiweadian, jamenmadi ixanikiki. <sup>9</sup> Jakia tsuabuda jaskakubainabumadan, bekunman jawen jiwea jaskaxanai unantiduma keskabuki. Diosun jatun chakabu ma jatu buaxunbiani ana jabun shinankatsi ikama jakimatan Dioskidi ana shinanbumaki. <sup>10</sup> En betsabu inun en puibuun, Diosun matu kenaxun katutan jawena medibis matu wakatsis iniki. Man jawenabu jeneama ikatsis ikaibudan, chanima ikunwain man jaki nukukatsis ikai matun shinan mestentan ikubainkanwen. Jaska tibi en matu yunuai keskaidan, man jaskakubainaibudan, babui chakabuwen taea kanei man chintuanma ixankanaii. <sup>11</sup> Man jaskai jiwekubainaibu benimakin matu kenwanchakaya-makin jawen mae bena anu janu man jikinun jawen beputi matu bepenx-untan: “Nedi jiki bekanwen”, matu waxanikiki, janu nukun mekenan Xanen Ibu Jesucriston matu bichikinan, niti ikama man jabe jiwepakexanunbunan.

### *Diosun janchadan, jamenmakiaki, na janchadan*

<sup>12</sup> Ma bebunkidi chanima jancha matu yusianbu unankin man mesten-wani man jawen jiwea jaska dasibi matukidi shinankin eandi matu shinankatsi en jenekatsi ikamaki. <sup>13</sup> Natian en jiweyuadan, chanima jaska en shinamis na janchawen matu e imakin matun shinan en ana matu mestenwanmakatsis ikai ea ninkakanwen. <sup>14</sup> Nukun Xanen Ibu Jesucriston ma janu ea yuini ma en mawaxanaidan, ma kemaikiki. <sup>15</sup> Na eska matu axunkinan, ma en mawaimaken jaska shinankin Jesucristokidi yusian man ana shinankubainxanunbun en matuki xabakabi chaniaii.

<sup>16</sup> Nukun Xanen Ibu Jesucristo kushipajaidai ana juxanaikidi xabakabi matu yusinkin jawen bepadanti miyui jawendua nun matu yuiama iniki.

Jakia nukun Xanen Ibu kushipai chaxajaidai ibubis nukun beduwen uinixun matu padanma nun matu yuiniki. <sup>17</sup> Jawen Epa Diosun kenwankin kushipa wai nun uiyanan jaskabiamma Diosun jawen jui taxnimakin jawen bake pepa wakin jancha wakin yuikin: “Nadan, en bakeki. En bechipaijaidaii, en Katuadan”, ikai <sup>18</sup> jawen jui nai anua juai nukubun nun ninkaniki, nukun Xanen Ibu ja mati medibi anu jabe nun mapuabunan.

<sup>19</sup> Jaska wakin Diosun jancha yuixunikabu jawen bakekidi jatu kenemani janu xabakabi Diosun nuku unanmakin keyuniki. Jaska ja jakidi kenenibu chanimaki, shinaindakanwen. Jaskakidi man tapinkubaina aidan, matun jiwea man pewakubainai janu nukun Xanen Ibu juaitian dasibi matun jiwea matu betsajaida waxanikiki. <sup>20-21</sup> Jaskawen taea Diosun jancha yuixunikabudan, jatunmebi jatun shinanen janchataskama jakia Diosun jawen jancha jatu yuimaya Yushin Pepatun jatu medabewakubainikiaki. Jaskadan, chanimaki. Jaska wakin Diosun jatu yusinkin kenemaniwen taexun jaska Diosun jatu yusinmani keska wakin jatu yusindiakubainkanwen. Na jancha en matu yuiaidan, jakimayamakubainkanwen.

## 2

### *Yusinan padananamisbu eskaxankanikiaki, na janchadan*

<sup>1</sup> Israelbu en xenipabu anu Diosun jancha yuixunika machupa nashui ika jayanibuki. Jabiaskadiai matu anudi yusinan machupa matu nashui idia jayabuki. Jabu jatun jancha jawenduabia jatun shinan chakabuwen matu daunkin akawakanikiki, nukun Xanen Ibun ma nuku meketi pewabianiken jawen kushipa danain padananainbudan. Jaska matu yusinkin jusiaibu Diosun jawaida jatu kupixanikiki. <sup>2</sup> Jatun jiwea kemu pae jamapai chakabuwen ikaibu yuda ichapabun jatu chibain Jesucriston bai chanimabiaken jawen taea ikunwainbu yuain jancha chakabukanikiki. <sup>3</sup> Jabunan, matun pei ichapa binun ixun chani jancha yusinkin matu padankin ichakawaxankanikiki. Jaskanunbadiaiabu ma bebunkidi Diosun jatu kupini jawa betsa waismawen taexun tsuan Dios jatu daewaxuntidumawen taexun Diosun jatu kupikatsi manayuikiki.

<sup>4</sup> Jawen nai tsumabu jatiditun jawen jancha ninkabuma jatun chakabu Dios jakimakatsi ikama jakia mai kini keyatapa xankinjaida meshu medan janua paxatidubuma anu jatu putatan nexaxun jatu mekeyuniaki, chipu janu kupiaitian jatu unanti wakatsidan. <sup>5</sup> Ja dikabi Noé jiweatianan, ja mai ja dukun damiwani anu yudabu chakabubu kupinun, iwanan, jatun chakabu jakimakatsi ikama Diosun jene yunuxun jabu jasai keyuaibun Noé paxaxanun ika jawen jiwea chakabu buama Dioskidi besti chanikunkainkin jawen yudabu 7 besti jabube paxaya janua jabuan Noén jancha ninkakin Dios ninkaisbuma jatun chakabuwen jasai keyunibukiaki. <sup>6</sup> Natian tsuabunda jawen jancha ninkama chakabukubainaibu Diosun jatu kupixanai jau bebunkidi dasibi chakabumisbun Diosun eskaibu jatu kupini jau jakidi unanxanunbun mae dabe Sodoma nawabu inun Gomorra nawabu kupikin chiwen jatu menu keyukin Diosun jatu yamawakin mapu besti jatu wanikiaki. <sup>7-8</sup> Diosun jatu jaska waitian Sodoma anu Abrahamnen beden Lot nawabube jiwxexun jatun chakabuwen betsa betsapaibu jatube nashui ika jiwxexun badi tibi jaskaibu uin inun jabu ninkai jatun chakabuwen taea uinti nishma jaska waxun jatu medabewatimaken chutaname bestinun ika kemukin Lot bikawaibun jatu kuadiama Lot juni pepaken Diosun paxawanikiaki.

<sup>9</sup> Noé inun Lot Diosun paxawanixun tsuabuda jawenabu ikatsis ikin jatun jiwea Dios inanmisbudan, jawen taexun jawada bika tibi jatu memabiaibun

nukun Xanen Ibun unankin jatu chakabu binumadiakubaintiduki. Jamen jabu chakabumisbudan, janu badi jawen jeneaitian jatu unanti watan jatu kupixanai unandiaikiki. <sup>10</sup> Nukun Xanen Ibuau jatu kupikinan, jabu dasibibu jatun kemu pae jeneisbuma inun jawen kushipa danankubainaibu jatu axanikiki. Jabu yusinanaain padanananmisbudan, uinti kushitan tsua ninkaisma inun kenkin shinan betsa wakatsi ikabuma jawaki dateama jatun janchawen yushin chakabu jatun xanen ibuya jatu ichakin ja amisbuki. <sup>11</sup> Jakia Diosun nai tsumabu kushipa yununikabun jatu binunbaxun jatun kushipa uinmakin jatukidi yuikin Satanás jawen tsumabuya jatu chitekin ja aisbumakiaki, Dios janchaxunkinan.

<sup>12</sup> Ja junibu padanananmisbudan, jawa ninkati kayabi jayabumaki, yuinakapan shinanyan keskabudan. Yuinakadan, chanima jawen ninkatinins jiweabuki, tsuanda achixun detexun pimisbu inun pisbumadan. Ja padanananmisbu jaska keskabuki. Diosun bai kayatapiakidi unan pewamabia jakidi janchachakamisbuki. Jakia jaskabu mawaiidan, yuinaka deteabu imis keskaxankanikiki. <sup>13</sup> Jabuan dukun yuda betsabu nuitapawashina jabuwen taexun Diosun jatu manakukin kupia nuitapajaidadixankanikiki. Jabu padananankin jabun shinain xabakabi jamapai chakabu aki: “Nun benimakunkainaii”, iki jiwxun man ikunwainbu beyusai anu matu nashui itan matube benimawanun ika man jawen dakeai jabun matu jusimakin atimapa tibi wakin matu dabinwanmisbuki.

<sup>14</sup> Ja padanananmisbunan, jatun kemu paewenan, ainbu tibi ja bechipaiai kasmai ja ichakawa bestikatsis ikai jatu amisbudan, jaskawen taea jatun chakabu ichapa matak, jawa jenetidubumadan. Jatun kemu paewen ikunwain uinti babubu padankin jatu chakabuwamamisbuki. Jatu jaska wamamisbu jatun kemu pae jeneisbumadan, jabis ja junibu Diosun unantan jatu kupixanikiki. <sup>15</sup> Jaska Bosoran bake Balaam ini keskai jatu uinmachakai pepa ana chibaroma jaki pechitan kanei jatunmebi benukin ja padanananmisbun Diosun jancha ana ninkabumaki. Jamen Diosun jancha jatu yuixunbiamis Balaam peiwen kemukin Diosunabu yupukin chakabuwapanan <sup>16</sup> Diosun jancha shinanma kaneaya jawen burro janchaismabia junin janchawen yuimakin Balaam tatima ikaskaini kapanan jawen burron janchawen nemakin Diosun kunyan anikiaki.

<sup>17</sup> Ja yusinan padananmisbudan, unpax bana taxka jeneuma keska inun nai kuin niweya bebiai uiuma jawa cha akama keskabuki, jatun yusian jawa pepa jayamadan. Ja jabu jaskamisbudan, Diosun jatu kupia ikibi ika meidan, janu meshu ten ikijaidai anu jatu putaxanikiki. <sup>18</sup> Jawada janchakin yuiaibu jawendua kemutapabia jamenki. Jabun dama ikunwankin taewashina mestendiabuma ja chakabukidi yusinkin chanima jancha jatu jenemakanikiki, jatun yuda atimapa betsa betsapatikidi jatu yusinchakakinan. <sup>19</sup> Jabu chakabun jatu tsumawawen taea ja junibun jawa jatu nematidubumaki, ja ikunwankin taewaibun akaibudan. Nuku tibidan, jatun nuku mekeadian nun jawen tsumawen taea ja padanananmisbun tsumadan, chakabu bestiki, tsuan danankin jenetidumadan. <sup>20</sup> Ja dukun Nukun Xanen Ibu mekenan Jesucristo unantan jatun chakabu putakin pewabiani jabias chakabun ana jatu achixun yabuandan, bexmas ibiani ana chakabui pikujaidamisbuki. <sup>21</sup> Ja dukun Jesucristo chibanti unanma ikaibudan, mawaida chakabuma ikeankananaii. Jakia Diosun jancha medibi jatu yusianbu unantan ana chibankatsi ikama danankin jenei chakabui pikukubainmisbuki. <sup>22</sup> Ja pananananmisbu jaskakidi jatu yuini chanima jabiaskakanikiki. Uindakanwen. “Kaman janantan chintunkidan ana jawendi pimisbuki. Ja inun,

ina yawa pupusjaida dachukin xunpinwanbiabu ana chintunkain pupuski idumai ana jawen meweki pukumiski." Jaska en matu yuiai keskakanikiki, chakabui ana pikuidan.

### 3

#### *Nukun Xanen Ibu ana juxanikiaki, na janchadan*

<sup>1</sup> En betsabu inun en puibuun, matuwen nuikin ana en matu kenex-unaidan, eskawen taexun en matu axuiai. <sup>2</sup> Shinankanwen. Uatian Diosun jancha yuixunika medibibun yusinibu inun ja dikabi nukun Xanen Ibu mekenan jancha nuku yununi jabias jawen kushipayabun matu yusinkubainaibu jakimayamakubainkanwen.

<sup>3</sup> Na jaska dasibi en matuki chaniai man bebunkidi unantidubuki. Chanima janu badi jawen jenei ma kemaya yudabu jiwe chakaxun ibubis chakabu shinankin man ikunwainbu matuki kaxeit en jen ibiae <sup>4</sup> yuka ikin: "Cristo yubakai: 'En ana juxanaii', ikainidan, ¿jania? jaska man chanimisdan. Nukun ibubun ninkabaini ma mawanibuki. Jaskabia Diosun mai bawani anu nun ji-wea jabiaskas kaikiki", ikin matu yukakubainxankanikiki. <sup>5</sup> Bebunkidijaida iki taenitian Diosun nai inun mai jawen janchawen damiwakin taxnima ja dabe jenesbiaken nai inun mai paxkakin jene anua mai taxnimatan mekebianiken ja yudabun Dioskidi jawa shinankatsi isbumaki. <sup>6</sup> Ana badi ichapajaida kaken jabias jenewen mai jidabi achimakin jiweabu tenankin keyunikiaki. <sup>7</sup> Jakia nai inun mai natian jayayuadan, jabiaskadi wakatsi Diosun mekeyukubainikiki. Janu badi jawen jenei keyuaitian unanti wakin yuda chakabubu kupikatsi Diosun jawen janchawen yunukin nai inun mai chiwen yamawakin jabun Dios dananmisbu janu jatu benu keyuxanikiki.

<sup>8</sup> En betsabu inun en puibuun, eskakididi en matuwen nuiai shinankubainkanwen. Xaba tanakin badi tanadiai man jawen dabanan ikunkainmiski. Jakia Jesucriston jaska shinainsmaki. Xaba bestichai jawaida keyumis inun 1,000 badi kabiaya nukun Xanen Ibu jawen nuismaki. Ana jakimayamaxankanwen. <sup>9</sup> Janu Jesús juti wani ma binuaya jabun shinanchakai janchamisbudan, eskaki, shinankanwen. Nukun Xanen Ibudan, matuwen taeadan, jin jin ikamaki. Dasibibu Dioskidi shinan betsatan jau benui mawa kayabi iyamaxanunbun tenetan matu manakai ikunkainikiki.

<sup>10</sup> Jawatianda nukun Xanen Ibu juidan, tsuan ana jakidi shinanmaken yumetsu jua keskanunbadikiaki. Janua kanatun ichakayamai keskawen nai anu yamawakin jabun tsumabauna chi kushipajaidawen menukin mai jidabidi damiwani kupikin yamawaxanikiki.

<sup>11</sup> Jaska dasibi Diosun yamawaxanai man unainwen taea natian man jiweyuadan, jaska Diosun bechipaiai keska aki medibi pepai jiwepekekan-wen. <sup>12</sup> Janun jau Diosun yudabu kupiyunun manama jawaida jawen bakekidi kakape chanikin yuibaunkanwen, jau samama judinunan. Janu ana manama jukinan, nai chiwen menuaya ja jabuan tsuma chin menukin metexa nidi ixanikiaki. <sup>13</sup> Nukubunan, eska uinkatsi nun manakanaii. Nai inun mai bena Diosun ma nuku bebunkidi yubanidan, ja jaska taxnidan, kaneisbuma inun pepabuna besti ixanikiki.

<sup>14</sup> En betsabu inun en puibuun, en matuwen nui jeneama en matu yusinkubainai eskakidi shinankanwen. Jau dasibi man jawa detsisma inun jawa chakabu jayama inun unanuma man jiwe bestiken jau Jesucristo matuki nukuyuxanun en matu yusinxu shinain jakimama man-akubainxankanwen. <sup>15</sup> Shinaindakanwen. Nukun Xanen Ibu nukuwen nui jin jin ikama pewen nuku paxawakatsi nuku medabewaikiki. Jabiaskidi nukun betsa Pablon matu kenea akeakexunyamaki, Diosun medabewaya

unanepakinan. <sup>16</sup> Pablon kene betsa tibi anu yusian bikabiaken na jaska en matuki chaniai keska betsabun ninka pewama inun juinti babun ikunjaidawabuman Pablon jancha maewakin inun Diosun jancha kenenibu maewa akeakei ibubis jatunmebi chakabutan benuxankanikiki.

<sup>17</sup> En betsabu inun en puibuun, matuwen nuijaidakin ma bebunkidi jaskaxanaibu en ma matuki chanixuki. Mekeidakubainkanwen, man pebi-akainaya jau juni chakabun matu padankin jau matu chintunmayamaxa-nunbun mestenxankanwen. <sup>18</sup> Jakia nukun mekenan Xanen Ibu Jesucristo ana unankin beyajaidawai jawen nuiwen ewakubaikanwen. Jadan, dasi-bibun Jesús kenwakin jeneama jau apakenunbunwen. Jaskakidan.

Jatiski, en janchadan.

Pedro

## JUANEN JA DUKUN JATU KENE BUMANIKIAKI 1 JUAN

*Jancha kayabi jawen jiwei ikibi iti jayakiaki, na janchadan*

<sup>1</sup> En betsabu inun en puibuun, en matu kene bumai uindakanwen. Mai damiwadiama Cristo jiweni natian jiwea man ninkakubaina aidan, jaskadan, nukun dukun jawen daya tateskin taewabainai nukubun nun ninka tae-wabainiki. Januxun nukun beduwen daiskin mekin jatun nuku jiwekuin-mamis ja jancha jiwea jaya nun beiskubainiki. <sup>2</sup> Ja jiweadian, jamebi jawa juneama ikunkainai nukun uinixun jakidi xabakabi chanikin jawen kaka matukidi jiwea ikibi ika jaya nun matu yuikubainai. Jawen Epabe dasia nuku xabakabi uinmakubainai nukubun nun uinkubainiki. <sup>3</sup> Ja kakape nukubun uinkin nun ninkanidan, Epa Dios inun jawen bake Jesucristobe nun jatube dasia keskadiai matudi man nukube dasidianun bun nun matuki chanikunkainai. <sup>4</sup> Nukubun jaskas nun shinain man nukubetan ikun-wainbukidi ibubis shinan chankain nun benimachakayamakubainun bun na kaka pepa nun matu kenexunai.

*Jesucriston nukun chakabu buanixun Dios nuku daewaxunkubainikiaki, na janchadan*

<sup>5</sup> Dios dasibi xaba keska pepajaidaki, jawa padanananti chakabu jayamadan. Jesucriston na kaka pepa jaskakidi nuku yusiai nun ninkani januxun jabiasdi yusiin nun matuki chanikunkainai. <sup>6</sup> Jakia tsuanda yuikin: “Ma en Dioski dasiaki”, ibiakin chakabuwakubaini jiwea man padananan bestiaii, chanima xabakabi jatu uinmakin mawamaman dan. <sup>7</sup> Jakia tsuanda Diosun jancha ikunwantan chibain man pepai jiweabudan, Diosun xabaki man ma pesea keskabuki. Jaskawen taea nukubun ikunwainbu nun ma dasiabuki. Januxun chanima jawen bake Jesucristo nukuwen taea mawakin jawen jimi jabakin Dios nuku daewaxunkin ma nukun chakabu nuku bua keyuxuniki.

<sup>8</sup> Jamen tsuanda ikunwanbiakin jawen shinan kayabi unanma yuikin: “Eanan, en jawa chakabuwaismaki”, iki bemakis besti shinankin nukunmebi ibubis nun padanantiduki, jancha kayabi jayamadan. <sup>9</sup> Jakia jau nukun chakabu nuku buaxunun jawada mekin nun jatu meshu washinaki dateama Dios inun tsuabuda nun chakabuwashina jau ninkanun bun xabakabi nun jatuki chaniaya Dios pepa nukuwen nuikin nukun chakabu buatan ana shinanma nuku jakimawatiduki. <sup>10</sup> Jakia tsuanda yuikin: “En jawa chakabuwaismaki”, ikin Dios chani chakai dabanen yudabun jawen jancha ninka pewadiama jaska dasibibu nun chakabu jayabuwen taea nun jaska yuitidubumaki.

## 2

<sup>1</sup> En bake keskabuun, Diosun jancha chibankin man ana chakabuwaya-manun bun en matu kenexun bumai ninkakanwen. Man jaskabia tsuanda kanekin man chakabu meayadan, nukun janchaxunika Jesucristo jawen Epa be bun nia nun jayaki, jatun jawa kanenimatun nuku medabewaidan. <sup>2</sup> Nuku besti ixuanma jakia mai jidabi anu jiwebaunabun chakabudi buanun ika Jesucristo mawakin jawen Epa nuku daewaxuniki, chaxuwan menukin inankin daewapaunibu keskakinan.

*Ikunwainbu yunua benawen jawen jiwetikiaki, na janchadan*

<sup>3</sup> Ja Diosun yununi nun jabuan chibankubainaian, nukubun nun ma unanti watan mestenwanan, chanima nun ma janu jaki dasiabuki. <sup>4</sup> Jakia tsuanda yuikin: “Dios en ma unaiin”, ibiakin jawen yunua jancha chibamadan, ja juni chanichakaikiki, Diosun jancha chanima jaki jayamawen taeandan. <sup>5</sup> Jamen tsuada shinan betsatan Diosun jancha chibankin axunkayabiaidan, chanima kayabi jawen xabakabi Diosun nui jaya ja medanua taxnikiki. Jamen nukubu nun jaskadiaibudan, nun jakidi dasiabu nun ma unankanaii. <sup>6</sup> Ja inun, tsuanda yuikin: “Ma Dioski dasia en jiweaii”, ikidan, jaska Jesucristo jiwekunkaini keskai jau idiakubainunbunwen.

<sup>7</sup> En betsabu inun en puibuun, en matuwen nuikin ja dukun Jesucriston nuku yununi sera en betsabu wamaki. Jabias nukun betsabun matu yusiaibun man ninkakin taewanidan, jadan, man ma ninkaniki. Shinaindakanwen, man bechipainamekubainunbunan. <sup>8</sup> Jabiaskabiaken na yunua sera keska wakin ana matu shinanmakin en matu kenexunaii. Ja dukun Diosun nuku yunukin: “Minabube bechipainemekubainxankanwen”, iwanan, nuku yununiki. Jaskaken jaska Cristo nukuwen nuikin nuku bechipaimis unankin yunua sera taxniai keska wakin en ana matu shinanmai. Matun jiwea xeni man jenekubidani ma chanima xaba kayabiki man pesea keskabuki. Na man jaskai jiweadan, Criston yununi kayabiki.

<sup>9</sup> Tsuanda yuikin: “Cristo ikunwain ma en jawen xaba jayaki”, ibiai ikunwain betsabu danain jabe dakekenainan, jawen jiwea xeni jene keyudiama meshu medan jiwea keskayuaki. <sup>10</sup> Jakia tsuanda jawen jancha chibain ikunwain betsabube bechipainamemisdan, ana jawawen taea chintuain chakabun kanemakin achitidumaki. <sup>11</sup> Jamen tsuada ikunwainbube bechipainameama jatube danananain dakekenainan, jawen jiwea pemawen taea meshu medan nia jani kai unanma keskaki. Ja meshu medan niadan, jawen jiwea xenin jawen shinan bepu keyua bekun keska jiweaki.

<sup>12</sup> En bake keskabuun, Jesucriston jawen jiweawen nuku medabewaun ika taxnitan nuku mawaxuniwen taexun Epa Diosun matun chakabu buatan matu jaibuwani shinankin en matu kenexunaii. <sup>13</sup> Epabu inun ewabuun, Diosun mai damiwadiama jawen bake jabe jiwekunkaini man ma ikunwankin unainwen taexun en matu kene bumai. Bedunanbu inun chipashbuun, Diosun jancha chibajaidakin juintinin mestenwantan man yushin chakabu Satanás maemaiwen taexun en matu kene bumai.

<sup>14</sup> En bake keskabuun, man ma Dios unanyanan, en matu kenexunaii. Ja dikabi jawen bake jabe jiwekunkaini man ma ikunwankin unainwen taexun en matu kene bumai. Bedunanbu inun chipashbuun, juintinin mestentan man ma Diosun jancha ninkatan chintuanma chibankin jawen Satanás man ma maemawen taexun en matu kene bumai.

*Na mai anua mabuwen besti kemukin Dios benimawatidubumakiaki, na janchadan*

<sup>15</sup> Yudabu na mai anu jiwexun jaska bechipaikin chakabu akaibu danain ana jatube nashui itan ana bechipaiyamakubainkanwen. Jamen betsabun jatun jiwea inun jatun beya chakabu man bechipaikubainaian, Epa Dios man bechipaiamaki, danankinan. <sup>16</sup> Na mai anu yudabu jiwexun akin taxnimaibudan, beya chakabudan, Dios anua juamaki. Jaska juidan, yudabun jatun yuda atimapawati bestiwen kemui inun, jatun beduwen besti mabu uinkin jaska bechipaikin keska taxniai jawen besti kemui kein jiweabuki.

<sup>17</sup> Janua yudabun jaska shinankin abiamisbudan, jatun kemu paedan,

keyukunkainikiki. Jakia shinan betsa watan jaska Diosun bechipaimis aki jiwekubainaibudan, jabe jiwekuinxankanikiki, ikibi ikidan.

### *Cristoki sinatai taxnixanikiaki, na janchadan*

<sup>18</sup> En bake keskabuun, ma badi jawen jenei keyuikiki. Badi jawen jeneaitian juni xanen ibukin Jesucristo mebinun ika jaki sinatai jaki bepadamei juxanai man ninkanidan, na jabiatian ichapabu jaki sinatai ja keska ma taxniaibu man uiaiin. Jaskawen taexun ma badi jawen jenei ma kemai man unantidubuki. <sup>19</sup> Jabu taxnidan, nanteka beama jibia nuku anua iki taebainkanikiki. Nukube ichabiamisbu Jesucristo danain ana nukube ichama jaki sinatakanikiki. Jamen nukubetan ikunwainbunan, nuku paxkabainama itidubuki. Jakia nuku paxkabainaibu uinkin ikunwan kayabiabuma man xabakabi unantidubuki.

<sup>20</sup> Jesucristo medibitun jawenabu wakin ma matu paxkaniki, jawen Yushin Pepawenan. Jaska dasibitun man ma jakidi jawen jancha chanima man ma jayaken ana tsuan matu padantidumaki. <sup>21</sup> Januxun man jancha kayabi unanmawen taeama jakia jancha kayabi man unainwen taexun en matu kenexunaii. Cristo anua jancha chakabu taxniamaki. Jakia jancha kayabi besti janua taxnikunkainmiski. <sup>22</sup> Jakia ?tsuabu ikanimenkain, Cristoki chanichakai padananainan? Jabu padananankin jakidi janchakin yui: “Jesúsdan, Diosun Katua Mesíasmaki”, ikaibudan, ja junin jawen kushipa mebinun ika jaki bepadamekin jawen Epa inun jawen bakeki sinatakin jatuki dakekenanamemaikiki. <sup>23</sup> Jaska inun, tsuabuda Diosun bake danain jaki dakeidan, jawen Epa Dioskidi dakediaikiki. Ja inun, tsuabuda dakeyamakain jakidi janchai peii: “En Jesús ikunwaiin”, ikin jawen Epakidi xabakabi wadiaikiki.

<sup>24</sup> Jaskaken matunan, Diosun jancha man ninka taewanidan, matun juinti medan ja kaka pepa man mekeea matuki ma dasia janu jawen bake inun jawen Epabe man ma jatuki dasia jiwekunkaindixanaii. <sup>25</sup> Jaska Jesucriston ma nuku yubabaini nun ma jaya jawen taea jiwei ikibi ika nun ipaxanaii.

<sup>26</sup> Ja jabun matu padankatsis ikaibukidi en matu kenexunaii. <sup>27</sup> Jakia chanima Diosun Yushin Pepa Jesucriston matu inankin ma matu medibi wani jatun besti jawen yusian chanima jawa matu padanma yusinkin matu medabewakubainaya ja padanananmisbun jatun janchawen matu yusintidubu jayamaki. Jaskawen taea man ma Jesucristoki dasiabudan, jaska Diosun Yushin Pepatun besti matu yusiain betsa wakin jeneyamakubainkanwen.

<sup>28</sup> En bake keskabuun, natian Jesucristoki dasitan jeneyamakanwen, jaki chiti ikidan, janu ana nukuki nukui juaitian damapai nun jaki datei daketedubumakidan, ja bebunuadan.

### *Diosun bakebu jaskaibu nun unantidukiaki, na janchadan*

<sup>29</sup> Chanima Jesucristonan, jawa kaneama ini man unaiin. Jaskawen taea tsuabunda jawada Diosun bechipaiai akubainaibudan, pepabu Diosun bakebu man unantidubuki.

## 3

<sup>1</sup> Shinankanwen. Nukubudan, nukun Epa Diosun nuku bechipajaidakin nun jawen bakebu nuku kenaikiki. Jakia tsuabunda Dios unanbumawen taexun nun jawen bakebu nuku unanbumadiki. <sup>2</sup> En betsabu inun en puibuun, en matuwen nuiaidan, nun ma Diosun bakebuki. Chipu jaskadada nun ixanai natian nun unandiabumaki. Jakia nukun Xanen Ibu Jesucristo ana nukuki nukuitian janu jabe ja keskadi ikin janu jaskadada nuku wai nun uinxanaii. <sup>3</sup> Na jaska dasibi jakidi shinankin nun manaibudan,

nukun shinan chakabu jaki pechi nun pepa bestikatsis ikin nun benakanaii, Jesucristo pepani keskanun ikadan.

<sup>4</sup> Tsuabunda chakabu meaibudan, jabuan Diosun jancha chibankma danankin chakabu ewawakanikiki, jaska yunuti tibi jayabiaken chakabuwakin ja chibankmadan. <sup>5</sup> Yudabun chakabu buanun ika Jesucristo na mai anu taxnitan Diosun yunua kanei chakabuwama inidan, man unaiin. <sup>6</sup> Tsuabuda nun ma jaki dasiabudan, nun ma mestenwan ana jawa chakabuwakubainamaki. Jakia tsuabunda chakabuwakubainaidan, jabuan Jesús jaibuwakin unandiabuma ikubainkanikiki. <sup>7</sup> En bake keskabuun, jau tsuan matu padanyamanun en matu yuiai ninkakanwen. Jesucristo pepa ikunkaini keskakin tsuanda chibankin pepa akubainaidan, ja junidan, jawen shinan pepadiki. <sup>8</sup> Jakia tsuanda chakabu akubainaibudan, Satanás chibankin akanikiki. Bebunkidi Satanásan Dios ninkama jatun dukuntun jakidi chakabuwanixun jatun jatu amakubainikiki. Jaskawen taea Satanásan jaska jatu amakubainmis yamawakin keyunun ika Diosun bake taxniniki.

<sup>9</sup> Jadatuda nun ma Diosun bakebudan, nun ana chakabu mekubaintidubumaki, jawen jiwei shinan pepa ma nuku medan naneawen taeandan. Jaskawen taea nun Diosun bakebu nukunmebi nukun jiwea nun mekekubaintidubuki, ana chakabuwamadan. <sup>10</sup> Diosun bakebu inun Satanásan bakebu man unanti watidudan. Tsuanda pepa akubainama inun ikunwainbube bechipainameamadan, Diosunabumaki.

### *Betsabuwen nuikin jatu uinmatikiaki, na janchadan*

<sup>11</sup> Jesús man ikunwankin taewaya matu yusinkin: “Matubetan ikunwainbube nui jatube bechipainamekubainkanwen”, ika jancha man ninkanidan, jabiaskadi ana en matu shinanmai. <sup>12</sup> Adánen bake dabe inibukidi matu ana shinanmanun ninkakanwen. Caínen Satanásan shinan chibankin jawen betsa tenanikiaki. ¿Jaskadawen taexun animen? Caínen jawen jiwea pepamaken jawen betsan Diosun yunua aki pepaya jaki sinatakin tenanikiaki. Caínen jawen betsa Abel bechipaiama ini keskadiai nukubudan, jaskayamakubainankanwen.

<sup>13</sup> En betsabu inun en puibuun, jabun ikunwanbuman Diosun jancha ninkama matu danain matuki dakekenainbunan, jatu uin datei e iyamaxankanwen. <sup>14</sup> Uatian nun bechipainameamadan, nun mawa keska inibuki. Na jaska unankinan, natian nukun betsabube nun bechipainameaibudan, nun jiwea jayaki. Jakia jabu bechipainameabumadan, ma mawanibu keska jiweyuabuki. <sup>15</sup> Tsuada ikunwainbu betsawen nuiama dakekenamisdan, juni pubenki. Ja juni jaskabudan, jamebi jatun jiwekuian jayatiduma man unaiin. <sup>16</sup> Nun nui kayabi jaya nun tapintidudan, jaska Jesucristo nukuwen dabanan jawen jiwea nuku inani nun shinantidubuki. Jaskawen taea nukubundi nukun betsabu nun jatu bechipai kayabiai nun jatu uinmatidubuki. <sup>17</sup> Jakia tsuada mabujadayatun ikunwainbu betsawen nuitkaai bedu chankanzun jatu medabewakin jawa inainsmadan, jawa Diosun nui jayamaki. <sup>18</sup> En bake keskabuun, chanima Dios bechipaikin duawakinan, jancha bestiwen akama ikunwain betsabuwen nuii medabenankin jatu uinmakin axunkubainankanwen.

<sup>19</sup> Jamapai tibi kanebiakubaini nukunabube nun bechipainamemiswen taexun Diosun nukun chakabu nuku buaxuni nun unantidubuki. <sup>20</sup> Nun chakabu wakubainmis nuku unan keyubiaya Dios nun yuka nukun chakabu nuku buaxuntan ana shinanma unain ana punu nukayamakubainankanwen. <sup>21</sup> En betsabu inun en puibuun, matuwen nuikin en matu medabewaidan, nukun chakabu nun ma pewa ana jawawen taea Dioski nun

datetidubumaki. <sup>22</sup> Jaskawen taexun jawen jancha chibankin jaska bechipai-  
ai akin nun benimawakubainai unan keyuaya januxun jawada bikatsis  
ikin Dios nun yuka nuku axunxanikiki. <sup>23</sup> Jawen bake Jesucristo nun ikun-  
wanxanunbun inun nun bechipainamekubainunbun Diosun jawen yunuti  
yununiki. Jabias keskadi jawen baken nuku yunudianiki. <sup>24</sup> Tsuanda Diosun  
jancha nun chibainbudan, nun jaki dasia jiwea inun jadi nukuki dasidia  
jiwediaki. Ja inun, jawen Yushin Pepa nuku yunua nun biniwen taexun  
nukuki dasia jiwea nun unankanaii.

## 4

### *Jadatuda Diosun Yushin Pepa jaya unantikiaki, na janchadan*

<sup>1</sup> En betsabu inun en puibuun, matuwen nuikin na jaska taxnibidanaibukidi en matu yusinkatsis ikaii. Mai jidabi anu Diosun jancha yuixunikanikapai jabu chani chakaibudan, midima jayaki. “Eadi en Diosun jancha yuixunikaki”, ikaibudan, dasibi jatu ikunwanyamakanwen. Jakia jatu unanti wakinan, ¿chanima jabu Diosun Yushin jaya ikanimenkain? ¿jayamabia machupai ikanimenkain? Jatu uinkubainkanwen. <sup>2</sup> Jaskakidi janchaibu man unantidubudan, jabu Diosun Yushin Pepa jayadan, jabun ikunwankin yuikin: “Jesucristo taxnidan, yuda kayabi bitan kainiki”, ikaibu Diosun Yushin Pepa jaya man unantidubuki. <sup>3</sup> Jakia tsuanda Jesucristokidi unanmabia yuikin: “Yuda kayabiamma iniki”, ikaibudan, Diosun Yushin Pepa jayamaki. Ja junin Jesucristo xanen ibu mebinun ika jaki sinatai jaki bepadamei juxanai yushin jayaki. Jaskakidi ja yushin juxanai man ninkanidan, jadan, ma na mai anu yudabu anu kainma ma niaki.

<sup>4</sup> En bake keskabuun, man Diosunabudan, jawen Yushin Pepa kushipa man jayawen taexun Satanásan jatu medabewabiamisken ja padananainbu man jatu binu keyuaki. Satanás kushipabiaken Diosun Yushin Pepa ku-  
shipajaidatun ma binuaki, matu medabewakinan. <sup>5</sup> Ja yusinan padananain-  
budan, jatun yusianwen janchaidan, jatun beyakidi besti janchakanikiki.  
Tsuabuda jabu keskabundi jatu ninkakanikiki. <sup>6</sup> Jakia nukudan, nun Jesúsun kushipayabudan, nun Diosun bakebuki. Nun yusianyan jabun Dios unankin nuku ninkaibun jabun Dios unanbuman nuku ninkaisbumaki. Ja jaskabu-  
dan, jadatuda chanima Yushin Pepa jaya inun jadatuda padanan yushin jayabu nun unantidubuki.

### *Ikunwan kayabiai unantidan, bechipainamei beyanamei jatuki dasiakiaki, na janchadan*

<sup>7</sup> En betsabu inun en puibuun, nui pae Dios anua jumiski. Jaskawen taea tsuabuda nun jawen bakebui ikaibudan, Dios unankin jaibuwakanikiki. Jaskaken nukubu nui bechipainamekubainankanwen. <sup>8</sup> Dios nuikipabi-  
aken tsuanda ja bechipainamei shinanmadan, Dios unandiabumaki. <sup>9</sup> Jesús ikunwain jawen taea nun jiwea jayaxanunbun Diosun jawen bake bestichai yudabu anu yununiki, nukuwen nuikin nuku bechipaiai nuku uinmakinan. <sup>10</sup> Nuku bechipaiai jaska uinmakinan, nukun dukun nun Dios bechipaia-  
maki. Jakia nukuwen nuikin nuku bechipaikanan, jawen bake yununiki, jau ja mawakin daewaiwen nukun chakabu buatan ana shinanyamakubainxa-  
nunan.

<sup>11</sup> En betsabu inun en puibuun, en matuwen nuikunkainaidean, chanima nuku jaska wakin Diosun nuku bechipainikenan, nukubudi jabiaskadiai ikunwain betsabube nui bechipainamekubainankanwen. <sup>12</sup> Tsuan Dios uinpaunima inun uintidumabiaken nukubu nun bechipainameaidan, Dios nukuki dasia nukube jiweaki. Nukube dasiawen taea ja nui chanima

kayabi nun jayaki. <sup>13</sup> Nukubu nun Dioski dasia jiwea inun ja nukube dasia jiwea jawen nun unanti wakubainunbun jawen Yushin Pepa nuku inaniki. <sup>14</sup> Chanima Epa Diosun jawen bake jau yudabu mai jidabi anu jatu mekekubainxanun yununi nukubun uinixun nun xabakabi jakidi chanikunkainmiski. <sup>15</sup> Jamen tsuabunda yuikin: “Chanima Jesús Diosun bake kayabiki”, ikaibudan, Dioski dasia jiweabu inun Dios jatuki dasidiaki.

<sup>16</sup> Chanima Dios nun bechipaiaidan, ikunwankin nun ma Dios unankanaii. Diosdan, nuikipa bechipainamenikaki. Tsuada ja nui jaya jiweadan, Dioski dasia jiweaki, Diosdi jaki dasidiadan. <sup>17</sup> Jaskakunkaini chanima nun nui jayakunkainmisbudan, Diosun Jesucristo bechipaimis keska wakin nukudi jabiaskadi wakin nuku bechipaimiswen taea janu badi jawen jeneaitian Diosun jatu unanti waya nun jawa dateama ixanaii. <sup>18</sup> Janida janu nui jayadan, janu date jayamaki. Tsuada nui kayabi jayadan, ikunwainbuwen nui bechipainame kayabikin jawen date putamisbuki. Jamen betsa date jayadan, jawen kupiti shinamisbuki. Jaskawen taea tsuada datekepadan, nui kayabi pae jaki nukudiamaki.

<sup>19</sup> Diosun dukun nuku bechipaikin taewaniken jawen taea nukudi nun jatube bechipainametiduki. <sup>20</sup> Jadatuda ikunwain betsa jabe ikunwain jabe uinanfibai jabe bechipainameamadan, jabiaskadiai Dios nun uianmabedi bechipainametidumbumaki. Jaskawen taea tsuanda yuikin: “Dios en bechipaiaii”, ibiai samama ikunwainbu betsa danain jabe dakekenainan, ja juni chani chakaikiki. <sup>21</sup> Jesucriston nuku yunukinan, eska yuiniiki: “Tsuanda Dios bechipaikinan, matubetan ikunwainbudi jatuwen nuikin bechipaidiakubainkanwen”, nuku waniki.

## 5

### *Ja ikunwantidan, nui kayabi jayakiaki, na janchadan*

<sup>1</sup> Tsuabunda Jesús ikunwankin yuikin: “Chanima Jesús Diosun Mesíaski”, akin yuiaibudan, Diosun bakebuki. Ja inun, tsuanda Epa Dios bechipaiaidan, Diosun bake betsabudi bechipaidiaikiki. <sup>2</sup> Epa Dios bechipaikin jaska yununi nun chibainbudan, Diosun bakebu nun jatube bechipainameai nun unaiin. <sup>3</sup> Dios nun bechipaiaidan, jawen yunuti inun jawen nemati nun chibankubainnaii. Jawen yunuti chibainan, xankamama bikamaki. <sup>4</sup> Nun tsuabuda Diosun ma jawen bakebu nuku wa tsuabunda jatun jiwea chakabu chibankin Dios danainbu nun jatu maemaii. Nun Jesús ikunwainwen taexun jawen kushipayakin ja yudabun chakabu akaibu nun ma jatu binuaki. <sup>5</sup> Januxun: “Jesús Diosun bakeki”, akin tsuanda ikunwankin yuikinan, jabu bestitun Dios danainbu jatu binukanikiki.

<sup>6</sup> Jesucristo taxnikidan, eskakin dasibi jatu unanti wamakin kayatiwamaniki, ja dukun jenewen ikaibu anu jadi nashidan, janua dasibibun bedubidi cruzkia dunua jawen jimi jabakin jatu uinmakinan. Jenewen nashi bestiama jakia mawai jawen jimi jabakin jatu unanti wamaniki. Jaskanidan, Diosun Yushin Pepatunan, jamebi unainkiki. Jaska unain nukukia chanima chanimiski. <sup>7</sup> Ja Jesús jaskani jabu chaniaidan, eskaki. Jawen unanmati dabe inun besti chaniti jayaki, <sup>8</sup> Yushin Pepadan, jenewen nashinidan, mawai jimi jabanidan. Jabu dabe inun bestidan, jatun shinanan, jabiaskas shinan kanemaki. <sup>9</sup> Jawada kaka yudabun bexun yuiaibudan: “Chanimaki”, ixun nun jatu ninkamiski. Jamen Diosun ibubis jawen bake kayabikidi nukuki chanikin ja kaka taxnimidan, yudabun kaka yuimisbu keskama ja binua mestenepajaidaki. <sup>10</sup> Tsuanda Diosun bake ikunwainan, jamebi jawen juinti medan ja kaka jaya yuimakin xabakabi wamaikiki. Jakia tsuanda

Dios ikunwanmatunan: “Diosdan, chaniki”, ikin jatu shinanmamiski, ja chanichakakinan, Dios ibubis jawen bakekidi chanini ikunwanmadan. <sup>11</sup> Ja inun, Dios chanii: “Jiwea ikibi ika en matu inanxanaii”, inidan, ja jiweadan, jawen bake anu jayaki. <sup>12</sup> Ja inun, tsuanda Diosun bakeki ma dasikin ikunwainbudan, ja jiwea ikibi ika jayaki. Jamen tsuada Diosun bakeki dasikin ikunwanmadan, ja jiwekuian jayabumaki.

### *Nuijanchajawenjeneakiaki, na janchadan*

<sup>13</sup> Jesús Diosun bake man ikunwainbu na yusian en matu kenexunaii, Diosbe man jiwei ikibi ika man ma jaya man unanunbunan.

<sup>14</sup> Jaska Diosun shinain keska shinankin jawada nun yukai nuku ninkamis dateama nun unaiin. <sup>15</sup> Nun jabe janchakin yukai Diosun ma nuku ninkatan jawada nun ma yuka nuku inanxanai nun unaiin. <sup>16</sup> Ja inun, chakabu dabe jayaki. Ja chakabu dabedan, betsa Diosun buakatsis ikikiki. Bestichai buakatsi ikamadan, mawa kayabi anu katiduki, Jesús mawabiaxuni danankin chakabu wamisdan. Jaskawen taexun ikunwain betsan jawada chakabu Diosun bechipaiama ana akai uintan man medabewakatis ikaidan, jau Diosun kupiyamaxanun shinan pewamakin medabewakin matun betsa Dios yukaxunkanwen. Jamen betsandi jaska Diosun jawen chakabu buaxunkatsi ikama uinbiakin Diosbe janchaxunyamakanwen, jawen jiwea ma kupiti jayakidan. <sup>17</sup> Jawada chakabu tibi danankin Diosun bechipaismaki. Bechipaismabia betsa betsapa jatun jiwekuian benumakatis ikama jatu buaxunmiski.

<sup>18</sup> Tsuanda ikunwankin Dios jawen Epa wai ma jaki dasiadan, ana chakabu mekubaintiduma nun unaiin, Diosun bake Jesúsun mekekubainayadan. Ja dikabi Satanásan yunukin ikunwainbu kanematidumaki. <sup>19</sup> Satanásan mai jidabi anu jiweabu jatu padan keyuikiki. Jamen nukudan, nun Diosun bakebu nun unandiaii. <sup>20</sup> Diosun bake taxnitanan, jamen juama Dios mekenika kayabi nun unanxanunbun jawen unanepa nuku inanun ika juni nun unaiin. Nun ma ja chانيا kayabiki dasia jiweabudan, jadan, jawen bake Jesucristoki nun ikaki, jabias Dios mekenika kayabitun jiwei ikibi ika nuku inanmisdan.

<sup>21</sup> En bake keskabuun, yushin dami kenwanmisbu beyanu ja dapi buyamakubainkanwen.

Jatiski, en janchadan.

Juan

## JUANEN JA KACHU JATU KENE BUMANIKIAKI 2 JUAN

### *Juanen jatukidi shinanikiaki, na janchadan*

<sup>1</sup> Eadan, mekenikatun en matu jancha bumai uindakanwen. Diosun matu katua jawen jancha ninkai man ichamisbu en matu bechipaiaii, ean bestimadan. Jakia dasibi jabun Diosun kaka pepa chanima unankin ikunwainbun matu bechipaidiakanikiki. <sup>2</sup> Eskawen nun matu bechipaiaidan, ja jancha chanima nun jayatun jaska ja chanimatun nukun juinti medan nun mekeea jatun nuku shinanmakin nuku yuimapakeikiki. <sup>3</sup> Epa Dios inun jawen bake Jesucriston jatun pepawen jau matuwen dabanan ikin unanuma shinanmakin jawen jancha chanimawen inun jawen nuiti kayabi matu inankin jau matu jiwe makubainun bunwen.

### *Diosun jancha chibain bechipainamekiaki, na janchadan*

<sup>4</sup> Jaska Epa Diosun nuku yununi matubu jatiditun chibanjaidai matukidia beabu jatuki en nukua chanima jaska jancha chanimawen jiweaibu jatu uin en benimajaidaimaki. <sup>5</sup> En betsabu inun en puibuun, natian matuwen nuikin matukidi shinankin matu ea akin en matu yunuaii, nukun betsabube nuii nun bechipainamekubainun bunan. Na jaska en matu kenexunaidan, yunuti sera en matu axuanmaki. Jakia jabias Jesucriston nuku yusin taewani en matu ana shinanmakin axuaiin. <sup>6</sup> Diosun jawen jancha yunukan: “Nui bechipainamei besti jiwestiki”, anidan, ja jaska yununidan, ma bebunkidi man ninkaniki. Jaskawen taea nuikipai jiwekubainkanwen.

### *Yusinanain padananainbu unantikiaki, na janchadan*

<sup>7</sup> Yusinan ichapabu padananain mapuxun: “Jesucristo Dios anua taxnitanun ika nukun yuda bitan kaiyanma iniki”, ikin jabun ikunwanbuman jatu unanmakatsis ibiakin xabakabi jakidi chanikin yui pewabumaki. Ja jabun jaskakin yuiaibudan, ja juni yusinanbudan, jakidi padananankanikiki. Jaskabu anua junin Jesucristo xanen ibu mebinun ika jaki sinatai jaki bepadamei taxniaki. <sup>8</sup> Jesús ikunwankin jawen daya nun amiswen taexun jau matun pepawen Diosun matu manakuxanai man bixanai benukatsi ikamadan, chintuanma ja padananainbu jatu uindakubainkanwen.

<sup>9</sup> Tsuanda Criston yusian chibankin taewabiatan jawen yusian jawena medibis ana chichitan yusianan, Dios jayamaki. Jakia tsuanda Criston yusini ja jancha kushipa betsa wama jabias chibainan, Epa Dios inun jawen bakebe dasia jabe jiweaki. <sup>10</sup> En matu yuiai keskabu Jesúsun jancha kayabi matu pe yusianbuma jabun matu yusinun ika buaibudan, jabe janchanamearma inun matun jiwe anu jatu ikin mapemayamaxankanwen. <sup>11</sup> Tsuanda ja padananainbu jatube janchanamekin beyawakinan, jawen chakabu jabetan abainxankanikiki. Uindaxankanwen.

<sup>12</sup> Jancha ichapa en matu yuikatsis ibiakin en jati matu kenexunkatsi ikamaki. Jakia matuki bai ka en matube janchanamekatsis ikaii, beisinain nun benimanamexanun bunan.

<sup>13</sup> Nukubetan Jesús ikunwainbun Diosun jatu katuabu en jatube ichamisbun jatun jancha matu bumadiakanikiki jau man unanuma jiwenun bunan.

Jatiski, en janchadan.

Juan

## JUANEN ANA JA KACHU KENE BUMANIKIAKI 3 JUAN

### *Juanen Gayo kenwanikiaki, na janchadan*

<sup>1</sup> Min en jaibu pepa Gayo anu min jaibu mekenika Juanen chanima en mia bechipaijaidaitun kenexun en jancha en mia bumai uinxanwen.

<sup>2</sup> En betsaan, Jesús ikunwankin min shinan min ana kushipa wakubainai keskadiai jawa isin teneama min jiwei pekunkainun Diosbe janchakin min jiwea dasibikidi en mia yukaxunmiski, miwen nuikin mia bechipaikinan.

<sup>3</sup> Nukubetan Jesús ikunwain betsabu bea eki nukutan mikidi eki chanikin: “Gayon Jesúsun chanima jancha chibankin chintuanma jawen jiweaki”, ikin ea yuiabu ninkai en benimajaidashinaki. <sup>4</sup> Man en bake keskabu jabias shinanwen man chibain matukidi ninkai en shinan chankankunkainmis en benima pae tsuan ea mebintidumaki.

<sup>5</sup> En betsaan, miwen nuikin en yuiaidan, ikunwainbu betsabu dasibi shinan pewen min jatu medabewakubainmis keska wakin ana jatu binumakinan, jabu min jatu uinmachakayamaidan, chaikea yusinanantanun ika beaibu medabewakin beyawakin min jatu duawamis <sup>6</sup> nenu nun jiweabu anudi bea janu nun ichabu anuadi min jatuwen nuikin medabewamiskidi nukuki chanimisbuki. Jaskaken mia anua buaibu jatu nichinkin jatu medabewakin jau jawa yupama jaya butanunbun piti inun jawada min jaya jatu inanpakekubainwen, Diosun jaska bechipaimis akinan. <sup>7</sup> Jabunan, Jesucristokidi yusintanun ika buxun jaska jatun shinanen jabun ikunwambuma daketapawatidubumaki, jamapai shadabu jatu yukakinan. <sup>8</sup> Jau jatun jawada yupayamanunbun jaskawen taea nukuin nun jatube dayakin jabu nun medabewanun Criston nuku yununiki, jabuan Jesucristokidi chanima yusinbaunaibudan, jabu medabewati shada nuku wakinan.

### *Diótrefes inun Demetriokidikiaki, na janchadan*

<sup>9</sup> Uatian min mae anuxun ikunwain ichamisbu yunukin en jatu kene bumaimaki. Jakia Diótrefes nukun yunuti kushipa bechipaiama ibubis yunukatsis ikin nukun jancha ninkamakiaki. <sup>10</sup> Jaska bestiama, jatunan, nukukidi chakabu yuikin nuku yuankin nukuki kaxe chanichakamiskiaki. Ja inun, yusinan betsabun matu medabewanun ika matu anu buaibu matu beyawamamakin nemai inun tsuanda jatu beyawakatsis ikaibu nemakin jau jabe man ana ichayamanunbun matu nematan taxnimamiskiaki, xanen ibukinan. Jaskamisen ea kayabis matun mae anu kaxun kenatan jabe janchakin en chitexanaii.

<sup>11</sup> En betsaan, en miwen nuiaidan, beya chakabu chibanma beya pepa besti akubainwen. Tsuanda beya pepa akaibudan, Diosun enabuki. Jakia tsuanda beya chakabu akaidan, Dios unanbumaki.

<sup>12</sup> Dasibibun: “Jaska kaka taxnimakanwen”, ika en ikaidan, Demetrio bestikidia jancha taxnia en ninkaii, jawen kaka chanimadan. Jaska jakidi kaka kaianyan nukundi jakidi janchakin jabiaskadi nun shinaiin. Nuku nun padananain janchaisma min unaiin.

<sup>13</sup> Jancha ichapa en mia yuikatsi ibiakin en jati mia kenexunkatsi ikamaki.  
<sup>14</sup> Jakia samama mia anu ka uinanain en mibe janchai kaxanaii.

<sup>15</sup> Jau Diosun mia unanuma jiwemanunwen. Nenuxun nukun jaibuaibun jatun jancha mia bumakanikiki, min unanuma jiwenunan. Mia anuabu nukun jaibuaibu tibi en janchadi ea jatu banabimakin keyuxunxanwen.

3 Juan 15

487

3 Juan 15

Jatiski, en janchadan.  
Juan

## JUDASIN JATU KENE BUMANIKIAKI JUDAS

### *Judasin jatukidi shinanikiaki, na janchadan*

<sup>1</sup> Tsuabuda Epa Dios matuwen nuikin matu kenatan katuni man jabu Jesucriston matu tsumaxun mekekubainai en Santiagon betsa Judas Jesucriston tsumapan, en jancha en matu bumai uindakanwen, <sup>2</sup> Dios matuwen nuikin unanuma matu jiwemakin jau ana matu duajaidawakubainunwen.

### *Yusin padanananmisbu Diosun jatu kupixanikiaki, na janchadan*

<sup>3</sup> En betsabu inun en puibuun, matuwen nuikin jaska Jesucriston matu inun ea nuku paxawakatsi janchanikidi matu kenexunkatsi ibiakin ja akama eskaibukidi jatu uinkin jabukidi shinankin Diosun kakape nun matu Dio-sunabu wakin yusini jabun betsa wakin matu bika tenemakin inun yuda betsabu jau jatu padanyamadianunbun man jatu nemakubainun jaskakidi kenexun en matu bumai uindakanwen. <sup>4</sup> Ja inun, ja bebunkidi ja yudabukidi Diosun jawen jancha jatu kenemanj jabu padanananmisbu kupinunbadiai jabias yuini keska na jabiatian yudabu betsa betsapa june chakabu jayabia matube ichai unantinantan jatun chakabu jenekatsi ikama jabun shinanwen matu padankin yuikin: “Dios pepatunan, jawada chakabu man wabiaya matun chakabu buatan kupiama ixanikiki”, akin jamapai atimapa matu yusin jatun jiwea pewai bextekekatsi ikama Jesucristo besti nukun Xanen Ibubiaken jawen kushipa danankanikiki.

### *Diosun jatu unanti watan kupinunbadikiaki, na janchadan*

<sup>5</sup> Egipio anua Israelbu Diosun jatu taxnimabidani man unanbiaya jaskakidi man shinanunbun ana matu yuinun ninkakanwen. Ma jatu paxawabiaima Israelbu jabun Diosun jancha ikunwankatsi ikama danain-buwen taexun janu tsua jiweabumanuxun Yavé Diosun jatu kupikin ten-ankubidani man unaiin. <sup>6</sup> Ja dikabi Diosun jawen nai tsumabu nai anua jabu tibi ja mekei janu jau xanen ibununbun jatu yunubia jaska besti mekekatsi ikama jatun daya jenebidanaibu Diosun jatu nemakin janu meshujaida kainkaintidumanu jatu bichitan janu badi jawen jeneai anu jatu kupiaitian jabudi kupixanai jatu mekea mapuabuki. <sup>7</sup> Ja jawen nai tsumabu jatu axanai keskadi wakin nawabu Sodoma inun Gomorra maewan inun jatu dapi mae udama anu jiweabu chutawen kemukin junibu jabe junibe chutanameaibu Diosun jatu kupikin jawen yusian danainbu chi nukaismawen jatu kupix-anai keska wakin xabakabi Sodoma inun Gomorra jatu kupiniki, jabias nukubundi jatuwen taexun nun unanxanunbun jatu kupikinan.

<sup>8</sup> Jatu jaska wani shinanbiai ja padanananmisbun xabakabi shinain ji-weama yuikin: “Diosun ea jadi yusinkiki”, iki jatun shinan medibiswen janchai yudawen besti kemui chutanamekin Dios xanen ibuai ichakin danankin Diosun nai tsuma kushipabudi ja amisbuki. <sup>9</sup> Jakia Diosun nai tsuma xanen ibu Miguelin dasibi nai tsuma betsabu binujaida Satanásbe janchai Moisés mawa jawen yuda jadatutunda jawena watidu yaushi ja idabenamekin Miguelin jancha pepawen besti jancha wakin Satanás yuikin: “Yavé Diosun jau mia chitenunwen”, ibianiken <sup>10</sup> jawada unankin ninkabuma ja padanananmisbu yupukunankubainmisbuki. Jaska jatun shinanan, yuinakapan shinanyan keskabuki. Jatun shinan chakabuwen taeadan, jatunmebi jatun kupiti bikanikiki.

<sup>11</sup> Uian. Jabu ikidan, Caínen jawen betsa tenani keska ja chibankin chakabuwakanikiki. Jaska inun, juni betsa Balaam pei binun ika kemui ini keska diakin Diosun bai kayatapia benui yusinan betsabu padananain peiwen kemudiakanikiki. Jaska inun, juni betsa Corén Diosun yunua danain benuni keskai ja padanananmisbu jabu mawadiai pemaxankanikiki. <sup>12</sup> Jaska inun, man Jesús chibainbu ichatan duanamekin man piaibun ja padanananmisbu dakei jawa dateama matube nashui itan pike bestikin tsua duawama benimanikapaikin matu dakewamisbuki. Jabu mekenikabia ibubis besti jawen yuda shinainmekemisbuki. Jabun yusianan, nai kuin juxupa nuyabainaya ui juama mai mechawaisma keskai jabu janchajaidakin yudabu medabewakin kushipa waisbumadiki. Ja inun, janu ni bimiyamisbutian ji betsa betsapa bimibiamisken jabu janchanwainbu ninkakin jawen medabewati ji bimiuma xanashina betsea keskai padanananmisbun tsua medabewaisbumaki. <sup>13</sup> Ja inun, ianenwan niwen bechuduankin tunkax akin kexa anu bakux jenebainmis keskakin jabun chakabuwai padananankin dake pae xabakabi jenebainaibu dasibibun uintidubuki. Ja inun, bishi jawen bai ana tanabainama keskai ja padanananmisbu unanumas buaibu ana tsuan chibantidubumaki. Jaskawen taexun janu meshujaida Diosun jatu waxuni anu janu jatu nichintan kupijaidaxanikiki, niti akamadan.

<sup>14</sup> Ja dukun Adánwen pakea 7wen jawen baba Henoctian ja yudabu chakabukidi bebunkidi Dios janchaxunkin yuikin: “Uian. Yavé Dios juidan, jawen nai tsuma midima tsuan jati tanatidumaya juxun <sup>15</sup> yudabu dasibi jatu unanti wakin jabuan chakabu betsa betsapa amisbu inun jatun jancha pemawen Dioskidi yuimisbu Diosun jatu kupixanikiki”, ani <sup>16</sup> jabias keska menei jawada tibi bechipaiama ja iki yuain jawadawen ibubis jawenas benai benimanun ika jatun kemu pae besti chibain inun kein mia akaitun besu wakin dasibibu jatu binumakin maemaikiki, jatu kenwanmaidan.

### *Ikunwankin kaneibu nui paewan jatu medabewatikiaki, na janchadan*

<sup>17</sup> Jakia en betsabu inun en puibuun, en matuwen nuiaidan, nukun Xanen Ibu Jesucriston jawen kushipayabu jatu yunua jaska jabun matu yusini ana matu shinanmanun shinaindakanwen. <sup>18</sup> Jawen tsumabun matu yusinkin: “Chanimanu badi jawen jenei ma kemaya yudabu jiwe chakaxun ibubis chakabu shinankin matukidi kaxekenanxankanikiki”, jaska shinankin matu yuinibudan, <sup>19</sup> chanima na jabiatian ja yusinanana padananain kaxeke-nainbun Dios shinanma ibubis jatun kemuti shinan chibankin ikunwainbu tadi paxkakin Diosun Yushiunma wakin jatu akanikiki.

<sup>20</sup> En betsabu inun en puibuun, tsuabuda en matuwen nuiaidan, matu yuunun ninkakanwen. Ikunjaidawai ana kushipanamei jawen besti mestentan chintuanma medibi jiwxeyunyukin Diosun Yushin Pepatun matu shinankin yuimaya Diosbe janchai jawen kushipawen dayukubainkanwen. <sup>21</sup> Jaska inun, Dios matuwen nuimis inun matu putaisma unain Jesucristo janu juxanai man manaiwen taea nukun Xanen Ibu Jesucristo nukuwen dabanan ikin jiwekuian ikibi ika nuku inanxanikiki.

<sup>22</sup> Jesucristo ikunwanbiai teabu jatuwen nuikin medabewakubainkanwen, shinan dabeaibudan. <sup>23</sup> Man jabuwen nuikin medabewakatsis ikaidan, jatun kupiti ma kemawabu chi anu ma kemai keskabu menan jatu nexea keska wadikanwen. Betsabu jabun chakabu man bechipaiamabia matumebi meketan jatun jiwea beya jusiama dananbiakin jau Jesucristo ikunwanunbun jatu medabewakubainkanwen.

24-25 Nukun Epa Dios ja besti nukun medabenan yushin dasibi kushipa jayatun matu kushipa wakin matun shinan chakabun ana matu kane-matidu nemaxunkubainaya jawen bake xanen ibujaida juaya yuda dasibibu unankin jatu kupiaitian matudi ja bebun jawa chakabu man jayama jawen besuudi matu nichintan benima pae matu inanyan man benimajaidaxanaii. Jaskaken nukun Xanen Ibu Jesucristowen taexun Epa Dios duapa pepa inun, jatun besti kushipa binu keyua inun, yunuti kushipa pae jayajaida iki taeni inun natian jaya inun ipaxanai jaya kenwankubainankanwen, jeneamadan. Jaskakidan.

Jatiki, en janchadan.  
Judas

## JASKA INUNBADIOI JESUCRISTON JUAN UNANMANI JANCHAKIAKI APOCALIPSIS

*Najancha Juanen jatu kenexunikiaki, na janchadan*

<sup>1</sup> Ja dukun Diosun Jesucristo ixanai unanmaniki. Januxun eadi samama jawaida jaskaxanai ea en jawen tsuma Juan unanmakatsis ikin jawen nai tsuma Jesucriston yunua ea uinmashinaki, na jaska inunbadiai dasibi nun jawen tsumabun tapintan jatu yusinkubainxanun ea unanmakinan.

<sup>2</sup> Jaskawen taexun Diosun jancha inun, Jesucriston ea unanmashina en ninkashina inun, dasibi en uinshina jawa chanichakama en matu yui kayabiaii. En jancha chanima uinkin ninkaidakanwen.

<sup>3</sup> Tsuabunda na en jancha jatu yuiaibu inun jabun na jancha ninkatan: “Chanimaki”, ikin chibankubainxanaibudan, Diosun jabu benimawax-anikiki, jaska inunbadiai chanini ma jamapai taxni taeai uinan.

<sup>4</sup> Man Jesús chibainbu ja 7 yusinanain ichamisbu tibi Asia mai pakeanu-abuun, en Juanen, en matu kene bumai ninkaidakanwen. Ja ini inun, ikunkainai inun, ana juxanaitun, nukun Diosunan, jau matu duawakin jawen pepa matu inankin unanuma matu jiwemakubainunwen. Jabiaskadi wakin ja 7 yushin pepa jawen xanen ibu tsauti be bun mapuabu jau jabun jabiaskadi matu wanunbunwen. <sup>5</sup> Ja dikabi Jesucristo jawa chani chakaisma mawatan ja dukun besteni inun mai jidabi anu jabu xanen ibu betsapa binui jatun xanen ibumisdan, jau jatun matu unanuma jiwe madianunwen. Ja inun, nuku bechipai nukuwen nuikin nukun chakabuwen taea mawakin jawen jimi jabakin nuku buaxundianiki. <sup>6</sup> Na jabiatian jawen Epa Dios dayaxuni nuku jabe janchanika wakin jatun nuku xanen ibu keska waniki. Jaskawen taea dasibi jawenas kushipa jaya inun pepa jayaken niti ikama kenwankubainankanwen. Jaskakidan.

<sup>7</sup> Uian. Nai anua nukun Xanen Ibu nai kuinwen juai dasibibun uinxankanikiki.  
Ja dikabi jabun jatu tenanmanibu inun  
jabun dananmisbu mai jidabi anu manibaunabun  
uin datei kaxaxankanikiki.  
Jaskaxankanikiki, chanimadan.

<sup>8</sup> Janua mai jayadiama nukun Xanen Ibu Dios dasibi kushipajaida jiwea jaya inun, natian jiwekunkainai inun, ana juxanaitun ea yuikin: “Ea dukun en jiweni inun en jawen jenea debesekeaki”, ea waxuki.

*Jesúsun Juan betsawatan uinmanikiaki, na janchadan*

<sup>9</sup> Ea en matun betsawatan Juanan, matu keska Jesúski dasia Diosbe xanen ibuibe nia betsawatan tenei chintuanma Jesúsun kushipawen en binukubainaii. Ja inun, Diosun kakape yusinkin Jesúsun nuku mekekatsis ikai xabakabi en jatu yuikubainaiwen taexun na natukan jawen kena Patmos anu ea nichianbu <sup>10</sup> nukun Xanen Ibu janu besteni xaba domingo betsatian Dios en yushinki nukuxun ea betsawatan wa en ninkaya en pechiudixun jui kushipajaida trompeta mimawati keskawen <sup>11</sup> tsuanda ea yuikin:

“Jawada en mia uinmai unaki kenexun Asia mai pakea anu ja 7 yusinanain ichamisbu tibi anu bumaxanwen, Éfeso anu inun, Esmirna anu inun, Pérgamo anu inun, Tiatira anu inun, Sardes anu inun, Filadelfia anu inun, Laodicea anudan”, ea waya

<sup>12</sup> tsuan ea jancha wai dabanan uinun ika nasauketan uinkin jaki bin tsaanti 7 oro mane chanka daka tsaubauna uinkin <sup>13</sup> ja namakis juni kayabi keska nia en uinxuki. Jakidi matu yuinun ninkakanwen. Jawen tadi chaipa jupuxku anu kesua inun, jawen oro mane nanexeketi xuchi puchinin kesuaki. <sup>14</sup> Ja inun, jawen bu juxupajaida inun, jawen bedu chi jede chaxa keskaki. <sup>15</sup> Ja inun, jawen tae mane tashipa betsa jawen kena bronce chi medan napua chaxajaida keskaki. Ja inun, jawen jui jene didi ikai ninka keskaki. <sup>16</sup> Ja inun, jawen meken yusiudi 7 bishi tsuma inun, jawen jaxpanu nupe detenameti chaipajaida kenu dabeya tukuan jayaki. Ja inun, jawen besu badi keska chaxakin xabawaki.

<sup>17</sup> Jaska uin jawen tae naman mawa keskai tsistikain en tin ika daka jawen meken yusiudi ea mekin yuikin:

“Dateyamawe. Eadan, ea dukun en jiweni inun en jawen jenea debe-sekeaki. <sup>18</sup> Ea en jiwea en mawani natian ana en besteni niti ikama en jiwepeakea. Ja inun, jiwemati kushipa inun kupiti kushipadan, ea besti en jayaki. Janu mawai ikibi ixanaibu anudan, ean besti en yunutiduki. <sup>19</sup> Dasibi min uinxu inun, na jabiatian ikai inun, jaskadada inunbadiai unaki jatu kenexundiwe. <sup>20</sup> Ja jawada junea min uinxu xabakabi mia yusinun ninkawe. Ja 7 bishi en meken yusiudi en tsuma min uinxudan, ja 7 mae ichamisbu tibitun medabenan Dios yuixunikaki. Ja dikabi jaki bin tsaanti 7 oro mane chanka daka min uinxudan, ja 7 mae ikunwainbu ichamisbuki”, iwanan,

## 2

### *Éfeso anuabu dukun kene bumai chani taenikiaki, na janchadan*

<sup>1</sup> ana Jesúsun ea yuikin:

“Ja mae anu jatun Diosun jancha yuixunika Éfeso anua ichamisbu mekea na jancha en mia yuiai kenexundiwe: ‘Ja 7 bishi en meken yusiudi en tsuma inun jaki bin tsaanti 7 oro mane chanka daka namakis anu en nimistun na jancha en matu yuiai ninkaidakanwen. <sup>2</sup> Ea chibankin ea dayaxunkin bika tenei man chintuanbumaki. Ja inun, tsuabunda matu padanmisbun yuikin: Jesúsun kushipawen en jawen yununikaki. Ea ninkakanwen, ikaibu unantan jatu danankin <sup>3</sup> en jancha jeneama ea duawanun ika ewen taea nuitapabiai punu nukai chintuanma man chibankubainai en matu unaiin. <sup>4</sup> Jakia na bestiwen en matu chiteai ninkakanwen. Ja dukun ea ikunwankin taewakin man ea duajaidawakubaini keskama man ana jabias keska ea wamaki. <sup>5</sup> Jaskawen taexun jaska man ea duawakin taewani keska jani man benukainimamen, ana shinanjaidatan matun jointi pewakin shinan betsa watan ana Dios anu chintuntan ea chibankubainkanwen. Jamen man jaska betsa wamaken matu anu ana kaxun matu danankin matun oro mane chanka daka matu anua mebinkin en tsekaxanai. <sup>6</sup> Jamen ja padanananmis Nicolaus chibanmisbu en dananchakayamamis keska wakin matundi man jatu bechipaiabuma en unaiin. <sup>7</sup> Man pabinkiyabunan, Yushin Pepatun ja man ichamisbu matu yuiai ninkakanwen: Tsuabunda ea dananma jabun maemakin binumisbudan, mae pepa naiudi janu Dios jiwea anua jawen benimai jiwti ji bimi en matu pimaxanaii, niti ikamadan’, ikin”, ea waxu en matu kenexunaii.

### *Esmirna anuabu kene jatu bumanikiaki, na janchadan*

<sup>8</sup> Ana Jesúsun ea yuikin:

“Ja jatun Diosun jancha yuixunika Esmirna anu ichamisbu mekea anu na jancha en mia yuiai kenexundiwe:

‘Eadan, ea dukun en jiweni inun en jawen jenea debesekeaki. Mawabiatan en ana besteni en jiweatun en matu yuiai ninkakanwen. <sup>9</sup> Natian bika betsa betsapa tenei jawauma man nuitapaibu en unaiin. Jaskabia chanima matun manakuti ichapa nai anu matuki nun tana man jayaki. Ja inun, jabu matukidi jancha atimapa janchai inun ibubiskidi yui: En judioki, ibiai ikun kayabiwama jaska Satanásan bechipaiai besti chibanmisbu en jatu unandiaii. <sup>10</sup> Matu bika memaxanaibuwen taea dateyamakanwen. Eska wakin diablon bestibu matu jatu achimatan bichiti jiwe anu matu bichi-maxanikiki. Jaska wakin dasibi man ea ikunwainbu matu bika tenemaibu jawen matu unanti wa akeakexankanikiki. Jaskawen taea 10 día besti jaska matu tenemaibuwen taea chintunyamaxankanwen. Matu ichakawakin matu tenanbiaibun tenekubainxankanwen. Matu jaska waibuwen taexunan, eanan, matun manakuti inankinan, jiwea kayabi en matu inanxanaii. <sup>11</sup> Man pabinkiyabunan, Yushin Pepatun ja man ichamisbu matu yuiai ninkakanwen: Tsuabunda ea dananma jabun maemakin binumisbudan, ana jadia dabeki mawakin chi jede meama ixankanikiki”, ea waxu en matu kenexunaii.

### *Pérgamo anuabu kene jatu bumanikiaki, na janchadan*

<sup>12</sup> Ana Jesúsun en Juan ea yuikin:

“Jatun Diosun jancha yuinika Pérgamo anu ichamisbu mekea na jancha en mia yuiai kenexundiwe:

‘En mane nupe chaipajaida kenu dabeya jayatun en matu yuiai ninkakanwen. <sup>13</sup> Janu Satanás xanen ibui tsaua anu man jiweabu en unaiin. Ja inun, Antipas en jancha yuixunika chintuanma matun mae anuxun tenanbianibun ja shinain matudi chintuanma eki jawa dakeama yudabuki chanikin en yusian ikunwankin man chibankubainai en unandiaii. <sup>14</sup> Man jaskabia kanei eska tibi matu anu jayabu matu yuinun ninkakanwen. Ja man jabube ichabiamis jatidibun Balaamin yusini putabumaki. Israelbu jau Dioskidi chakabuxanunbun Balaamin nawa xanen ibu Balac yusinchakakin yuikin: Jatu beyusmakin yushin dami kenwanti betsa nami inanshinabu jatu pimaxanwen, ani inun matun bake chipashbe jatu chutanamemati jatu shinanmaxanwen, ani jaska jeneabumaki. <sup>15</sup> Ja dikabi jatiditun Pérgamo anuxun Nicolausin jatu yusinchakani chibankin putabumadiki. <sup>16</sup> Man jatidi jaskabia Dios man chibankatsis ikaidan, matun chakabu jenetan matun shinan betsa watan Dios anu bedikanwen. Tsuada jaskabumaken samama jatu anu kaxun jabun chakabuwaibu kupikin na en nupe chaipa en jaxpanu en tukuanwen en jatube detenamei kaxanaii. <sup>17</sup> Man pabinkiyabunan, Yushin Pepatun ja man ichamisbu matu yuiai ninkakanwen: Tsuabunda ea dananma jabun maemakin binumisbudan, pewen kupikin misi naiudia Diosun junemis en jatu pimaxanaii, nai anu unanuma ebe jatu jiwemakinan. Ja inun, kena bena nenkati juxupaki jatun kena nea en jatu inanxanaii. Ja jabun biaibun besti ja kena unanxankanikiki, tsua betsan unantidumadan”, ea waxu en matu kenexunaii.

### *Tiatira anuabu kene jatu bumanikiaki, na janchadan*

<sup>18</sup> Ana Jesúsun ea yuikin: “Jatun Diosun jancha yuinika Tiatira anu ichamisbu mekea na jancha en mia yuiai kenexundiwe: ‘En Diosun baken, na en bedu chi jede chaxa keska inun na en tae mane tashipa betsa jawen kena bronce denke denke aka chaxajaida keskayatun en matu yuiai ninkakanwen. <sup>19</sup> Jaska matun shinan pepa jayaxun ea chibain man jiwekunkainai en unaiin. Jaskaken nuinamekin ea ikunwain chintuanma ea chibankin ea duawanun, iwanan, jamapai betsa betsapa pepa man akin

taewani man binumai en unandiaii. <sup>20</sup> Man jaskabiai eska besti matu anu jayaki. Ja ainbu man Jezabel wamis jatun chakabuwaikidi man nemaisma ja bestikidi matu yuinun ninkakanwen. Ja Jezabelin matu padankin yuikin: Eandi Diosun jancha en yuimiski. Ea ninkakanwen, matu watan man en tsumabu bestibu matu ichawaxun yusinkin yuikin: Ainbu min ainmabe min chutanameadan, peki. Juni min benemabe min chutanameadan, pediki. Jamapaibe chutanameadan, pediki, akin pitikidi matu yuikin: Ja yushin dami betsa kenwanti nami inanmisbu man piadan, jawa chakabumaki, iwanan, matu padankin matu chakabuwamakubainmiski. <sup>21</sup> Jamen jau Jezabelin jawen chakabu jenekin jawen shinan betsa wanun ixun en manakabia shinan betsa wakatsi ikama jawen kemu chutanametikidi jenekatsi ikamaki. <sup>22</sup> Jaskaken kupikin en isin chakabu tenemaxanaii. Ja inun, ja ainbu Jezabel inun dasibibun ja chibain jabe chutanamei atimapamisbun en yusian danankin jamapai chakabuwen kemumisbu bikajaida en jatu tenemaxanaii, jabun jawen yusian dananbumadan. <sup>23</sup> Ja inun, ja ainbun jancha ninkamisbu tenankin en jatu yamawaxanaii. En jatu jaska waya dasibibun shinan inun jabun uinti en unanjaidamis jabun ea ikunwankin chibanmisbun chanima unanxankanikiki. Ja inun, jatidibun jaska jiwea bechipaimisbu unantan pepabu pepawen jatu kupikin chakabubu chakabuwen en jatu kupixanaii. <sup>24</sup> Jamen Tiatira anuxun ja ainbun yusian danankin Satanásan shinan junea jawen kushipawen dayanun ixun jatidibun man unankatsi ikabumadan, man peken matukidi en ana jancha jayamaki. <sup>25</sup> Jakia na besti matu yuinun ninkakanwen. Diosun yusian man jaya ja chibankin jenepakeyamaxankanwen, en ana juyuxanaidan. <sup>26</sup> Tsuabunda ea dananma chakabu maemakin binumisbudan, jawa jeneama jaska en bechipaiai apakemisbudan, janu en ana juai anu en jatu xanen ibu wakin kushipa waxanaii, jau nawa xukuabu mekenunbunan. <sup>27</sup> Jaska en Epan ea yunua en jabe xanen ibumis keska wakin xanen ibukin ea chibankubainmisbun jatu mekebiabu en jancha ninkaisbuma mane mestenti tsumaxun man jatu yamawaxanaii, jaska mai kenti wamistun jawen kenti chakabu pusamis keska wakinan. <sup>28</sup> Ja dikabi pena bishi chaxamis keska en matu inanxanaxaii. <sup>29</sup> Man pabinkiyabunan, Yushin Pepatun ja man ichamisbu matu yuiai ninkakanwen”, ea waxu en matu kenexunaii.

### 3

#### *Sardes anuabudi kene jatu bumanikiaki, na janchadan*

<sup>1</sup> Ana Jesúsun ea yuikin: “Jatun Diosun jancha yuinika Sardes anu ichamisbu mekea na jancha en mia yuiai kenexundiwe: ‘Ja 7 Diosun Yushin en jaya inun ja 7 bishi en tsumaxun en mekeatun en matu yuiai ninkakanwen. Jaska man jiwexun jatu kaka jawendua ninkamabiai uke medan man mawa keskabu en matu unaiin. <sup>2</sup> Janua jaska Diosun matu shinanmakin jawen jancha matu chibanmakatsis ikai chibankin man keyudiamajaida unankin matu yununun ninkakanwen. En jancha unanjaidabiakin man akin pewamaki. Ana chibanma man jakimakin man ma jeneaii, mawai keskaidan. Man tsuabuda jaskadan, uxä bestein keskatan matun uintinin shinan mestenwantan ana en Dios chibanjaidakubainkanwen. <sup>3</sup> Januxun Diosun jancha yusinanbun matu yusianbu man ninkani shinankanwen, shinan betsa watan ana chiban taewakinan. Jamen man ea ninkakatsi ikabumaken yumetsu june jumis keskai man ea manachakaya jatiada eadi june juxun en matu datetushixanaii. <sup>4</sup> Jabiaskabiaken jatidi Sardes anuabun jawa

chakabuwakin man kaneisbumaki, matun tadi detsis keska wamadan. Jabudan, ebetan tadi juxupa sawea ebe mapuxankanikiki, jaska jabu pepakin binumisbudan. <sup>5</sup> Tsuabunda ea dananma jabun maemakin binumisbudan, tadi juxupa sawexankanikiki. Ja dikabi jatun kena Diosun jiwemati una anua en tede akama ixanaii. Januxun en Epa inun jawen nai tsumabu be bun jatu nichintan en jabu jatu unanmaxanaii. <sup>6</sup> Man pabinkiyabunan, Yushin Pepatun ja man ichamisbu matu yuiai ninkakanwen' ", ea waxu en matu kenexunaii.

*Filadelfia anuabu kene jatu bumanikiaki, na janchadan*

<sup>7</sup> Ana Jesúsun ea yuikin: "Jatun Diosun jancha yuinika Filadelfia anu ichamisbu mekea na jancha en mia yuiai kenexundiwe: 'Ea en medibi inun en chanimajaida David kushipa ini keska binua jawen bepent shabi en jayaki. Tsuanda ja mae bepean tsuan beputiduma inun ja mae bepua tsuan bepentidumaki. Jaska mekeatun en matu yuiai. <sup>8</sup> Eanan, dasibi man akubainai en unaiin. Uinkanwen. Matu be bun matu anu beputi bepenmana keska jawa tsuan matu bepuntiduma en matu bepenxunaki. Jaskawen taea man chintuanma en jancha chibankin man kushipa midin jayabia eki dakeama jatu yuikin: En Jesúsunabuki, man imiski. <sup>9</sup> Ja inun, judiobu betsabu jaska Diosun bechipaiai akamabia janchawen besti yuikin: Nun judiobuki, ibiakin Satanás chibankin jaska bechipaiai axuin jiwemisbu judio kayabibumadan, en matu bechipaijaidamis jau unanun bun jatu babu watan matun tae naman en jatu danti imaxanai manayukanwen. <sup>10</sup> Ja inun, ichakanikatun mai jidabi anu dasibi maniabu jatu bika tenemakin ichakawayaya man Filadelfia anuabun en yusian jancha chibankin jawa man jeneismaken matu medabewakin jawa putama en matu kexekubainxanaii. <sup>11</sup> Ja inun, matun pepa jawen kupiti jau tsuan matu bianbainyamaxanun en yusian shinankin chibankin jeneyamakanwen, en samama ana chintunkidanxanaidan. <sup>12</sup> Tsuabunda ea dananma jabun maemakin binumisbudan, janu en Epa Diosun jiwe anu jawen chibu betsa keska tsuan betseketiduma keska en matu waxanaii. Janua man jani ana kainbainama inunbadiai. Jaska inun, en Epa Diosun kena matuki kenekin netankin jawen mae Jerusalén Bena ja mae nai anua butuxanai jawendi matuki kenekin netankin en kena benadi en matuki netanxanaii. <sup>13</sup> Man pabinkiyabunan, Yushin Pepatun ja man ichamisbu matu yuiai ninkakanwen' ", ea waxu en matu kenexunaii.

*Laodicea anuabu kene jatu bumanikiaki, na janchadan*

<sup>14</sup> Ana Jesúsun en Juan ea yuikin:

"Jatun Diosun jancha dayaxunika Laodicea anu ichamisbu mekea na jancha en mia yuiai kenexundiwe. 'Dasibi Diosun jakidi yuiai en Jabiaskaki, imistun mai jidabi inun nai jidabi damiwakin ewen Diosun ani chanima jancha besti chanii en kaneismatun en matu yuiai ninkakanwen. <sup>15</sup> Man ea chibanjaidama inun ea dananjaidakubainama man shinan bekaxnaibu en unaiin. Jaskatimaki. Tsuabunda ea chibankatsis ikin jau ea chibankayabinun bunwen. Jakia tsuabunda ea chibankatsis ikaburma danankin jau ea jene kayabinun bunwen. <sup>16</sup> Jamen tsuabuda ekidi shinan bekaxnadabe maniabuwen taexun janain keskakin en matu putaxanaii. <sup>17</sup> Jaska inun, matumebi shinankin yuikin: Mabu ichapa jaya pei ichapa jaya dasibi en jayaki, ikin man shinanbiakin en yusian shinankin man chibankumawen taea man ibubis nuitapai jawa jayama bekun tadiuma keska man jiwe kainai. <sup>18</sup> Jamen tsuabuda man pepakatsis ikaibu matu yusinun ninkakanwen. Dasibi pepa jas man jayakatsis ikaidan, oro chiwen kuakin jas wa man

bikatsis imis keskakin en yusian kayatapia ea anua bikanwen, jawen ke-mutapatidan. Ja inun, matun yuda man jawen dakeai junenun ixun tadi sawea keskakin matun chakabu ea buamanun ixun tadi juxupa ea anua bia keska wakin matun chakabu jenetan ea chibankubainkanwen. Ja inun, uin pewanun ika bedu daunwen ika keskakin en yusianwen matu kaya watidu ea anua bidiakanwen. <sup>19</sup> Ja inun, dasibi man enabuwén nuikin matu medabewa bestinun ixun jancha kushipawen matu ja akin en matu yusinx-uwen taexun en yusian ninkakin pewatan matun shinan betsa watan shinan chankanjaida bestikunkainkatsis ikidan, Dios anu bedikanwen. <sup>20</sup> Uian. Matu tibi jaibuwakatsis ikin matun beputi keska matun juinti anuxun ean en matu kenakin akawaii. Tsuanda en jui ninkatan ebe jaibunamekatsis ikin beputi keska matun juinti man ea bepenxuna matun jiwe anu jikitán en matubetan pikatsis ikaii. <sup>21</sup> Tsuabunda ea dananma jabun chakabu maemakin binumisbudan, jatu manakukin ea dapi tsauamakin en jatu xanen ibumaxanaii, jaska ean en binu keyuni en Epa dapi tsaua en jabe xanen ibuni keska wakinan. <sup>22</sup> Man pabinkiyabunan, Yushin Pepatun ja man ichamisbu matu yuiai ninkakanwen' ", ea waxu en matu kenexunaii.

## 4

### *Nai anuxun Dios kenwainbu Juanen uinikiaki, na janchadan*

<sup>1</sup> Jaska ninkashina inun jati uinxu naiudi besuxun beputi bepean uintan jui trompeta mimawati kushipa keskawen jawen dukun Jesús janchai en ninkashina ana jabianwendi ea jancha wakin yuikin: "Ea anu inayuwe, min inaken jaskadada ana betsa betsapa inunbadiai en mia uinmaidan", ea watan

<sup>2</sup> jawaida ea betsa watan en yushinki dasitan ea uinma nai anu inaxun en uinxu matu yuinun ninkakanwen. Jadi Xanen Ibu jaki tsautiki nukun Epa Dios tsaua en uinxuki. <sup>3</sup> Ja tsaua jawen yudadan, diamante keska kasmai rubí keska nenkati kadujaida chaxajaida bakamana bakamana ikaya jawen tsauti kesukauana namakis nawan bai tapia esmeralda nenkati nanketapa keska chaxa chaka ikikiki. <sup>4</sup> Janua Dios xanen ibu jaki tsauti anu 24 tsauti betsa janu sedebauna uinkin 24 mekenikabu jabu jaki tsauabu tadi juxupa sawea xanen ibun oro mane maiti maiabu en uianyan <sup>5</sup> Dios janu tsaua anua kana bakatan tin ikaini danka ikainaya Diosun besuudi jawen medabenan yushin <sup>7</sup> nanpadina bin dekua nichinbauna chaxa keskabuki. <sup>6</sup> Jaska inun, tsauti besuudi ianenwan bexnanjaida bakamanaya ja dapi jiweabu dabe inun dabe ja tsauti anu mapubauna jabun besuudi bedu sankan daka inun jatun pechiudi bedu pesankan dakabu <sup>7</sup> ja dukun inu ewapa betsa jawen yuda león keska ja kachu ina awa bake keska ja kachu betsa junin besuya keska ja kachu betsa tete ewapa nuyai keska <sup>8</sup> jatibu <sup>6</sup> punyan peiya jabun yuda jidabi jawen bedunati chaxa dakabun badidi inun meshu medan Dios kenwankin jabun jeneisbuman yuikin:

"Min pepajaidaki.

Min dasibi kushipa binuaki.

Mai jayadiama nukun Xanen Ibu Dios  
dasibi kushipajaida jiwea jaya inun,  
natian jiwekunkainai inun,  
ana min butuxanai nun unaiin", ikin

<sup>9</sup> Dios niti ikama jiwea ja dabe inun dabe jiweabun jamapai pepa jakidi shinankin jawen pepakidi yuikin kenwainbun <sup>10</sup> ja 24 mekenikabun ken-wandiakin danti ixun xanen ibujaidawakin jabun jatun oro mane maiti mabikitan inankin jawen tae naman manchintan yuikin:

**11** “Dasibi damiwakin  
min shinanwen jamapai dasibi min damiwani  
min nukun Xanen Ibu inun  
min nukun mekenika yushin Dioski.  
Jaskawen taexun mia besti kenwankin  
nun mia duawakubainaii”,  
akaibu uinkin en matu kenexunaii.

## 5

### *Chaxuwan baken una sebi keneya chudenikiaki, na janchadan*

**1** Januxun en ninkaya una sebi kene dabeya uke medan inun bemaki keneya 7 jawen tsamia tsuan june mekin bepentiduma inun chudediamma unantiwen tsami dakabidana Dios jawen tsautiki tsauxun jawen meken yusiudiawen tsuma en uiyanan **2** nai tsuma kushipatun uinbaunkin jui kushipawen jabu yukakin:

“Tsua pepa kushipajaidatun atidumen? ja una tsamia tibi daxnukin jatun chudeaidan”, jatu wa **3** jakia nai anu inun, mai anu inun, janu mawabun yushin maniabu anu tsua pepajaida jayamaken tsuan chudexun uintidumaken **4** chanima tsua pepa kushipa juxun chudexun uintidumawen taea nui en kaxajaidaya **5** mekenika betsan ea yuikin: “Kaxayamawe. Xanen ibu Davidin baba betsja ja Judán baba yuinaka dasibibun xanen ibu inu betsja jawen kena león nun dabimis pepa kushipajaidakin jaki sinataibu maemanitun ja unanti tsamia tibi jatun daxnu daxnu akin keyutan ja una chudetiduki. Manayuwe”, ea waya

**6** januxun Dios tsaua nashui ika namakis ja jiweabu dabe inun dabe mapubaunabu inun jabianudi ja 24 mekenikabu tsubaunabu anu ja namakis nashui ika chaxuwan bake jawen yuda chachinibu mawa keska nia 7 maxunyan inun 7 beduya en uinxuki. Chaxuwan bake jawen 7 bedudan, ja jawen yushinwen mai jidabi anu Diosun jatu yusinmakubainaidan, jaska en uinxuki. **7** Januxun chaxuwan bake ja Dios janu tsau anu kemaxun jawen meken yusiudi anua una sebi bitan tsumaken **8** janua benimajaidakin ja jiweabu dabe inun dabe inun ja 24 mekenikabun jatun mimawati betsja jawen kena arpa inun oro mane kencha ni pei ininti ja kuaxunti keska mata jaska jawenabu Diosbe janchamisbu tsumaxundi jabu dasibibun chaxuwan bake kenwain jaki danti itan **9** dasibibun nawati sera juiwen nawakin yuikin:

“Min pepajaidaki.  
Mawakin min jimiwen yuda xukuabu tibi anua inun,  
nawa tibi anua inun,  
jancha tibi anua inun,  
mai pakea tibi anua Epa Dios bixunkin jawenabu jatu wakin  
**10** Diosbe janchaxunikabu min ma jatu waniki.  
Diosbe janu xanen ibuxanaibu jatu wanixun  
mai anua jabu xanen ibuxankanikiki.  
Jaskaken mian besti Diosun una bixun min chudetiduki.  
Min pepajaidaki”, akaibun

**11** januxun ana uinkin en ninkaya ja jiweabu inun ja mekenikabu inun nai tsuma midimajaida Dios xanen ibu jaki tsauti dapi manibaunabun **12** jancha kushipawen jabun yuikin:

“Chaxuwan bake keska deteabu  
ana besteni pepa kayabidan,  
jatun besti bitiduki, kushipadan, pepa tibidan,

unanepajaidadan, xanen ibu kushipadan.

Duawai shinan chankain benimawakin nun ja kenwaiin”, ikaibun

<sup>13</sup> januxun ana en ninkaya ja dasibi Diosun damiwakin jatu jiwemani nai anuxun inun, mai anuxun, inun mawabu yushin bumisbu anuxun, inun ianenwan anuxundi jabun kenwandiakin yuikin:

“Ja Xanen Ibu jaki tsauti anu tsaua inun

chaxuwan bake jatu duawakin shinan chankanwankin

jawen benimawatiwen jau xanen ibujaida wakubainunbunwen, niti ika-madan”, ikaibun

<sup>14</sup> ja jiweabu dabe inun dabebun jabiaskadi shinankin kemakin:

“Jabiaskaki”, idiaibun ja 24 mekenikabu danti iki beti itan kenwandiaibun

## 6

### *Ja dukun 4 jawen unanti tsamia Jesucriston daxnukin taewanikaki, na janchadan*

<sup>1</sup> januxun Diosun chaxuwan baken jawen unanti ja dukun tsamia daxnuaya ja jiweabu dabe inun dabe betsan jawen jui tin ikainkainai keskai uinkin en ninkaya jatun yuikin: “Jewe”, akai

<sup>2</sup> en uiyanjanua caballo juxupaki tsuada kanunyan katsaua xanen ibun maiti betsa Diosun inan maia junibube detenamekin binumakin jatu maema akeakebaini kaken

<sup>3</sup> januxun Diosun chaxuwan baken jawen unanti tsamia ja segundo daxnuaya ja jiweabu betsan yuikin: “Jewe”, akai <sup>4</sup> en uiyanjanua caballo betsa tashipaki tsuada betsajaki tsaukainkin kushipa bibainkin jau mai jidabi anu tsuabuda ana unanuma jiweama janubi jau detenamebaununbun nupe chaipa inantan yunua kaya

<sup>5</sup> januxun Diosun chaxuwan baken jawen unanti ana ja tercero tsamia daxnuaya jiweabu betsan kenakin yuikin: “Jewe”, akai en uiyanjanua caballo betsa meshupa tsuada betsajawen xankama unanti tsuma jaki tsaua <sup>6</sup> ja jiweabu dabe inun dabe anua ja jancha kainmakinyuiai en ninkaya: “Piti yama tukantian xekiwan ja misi wati kilo bestichai jawen kadu xekamakin xaba bestichai daya pei wakubainwen. Ja inun, misi wati betsa cebada pe bexmas kilo dabe inun besti jawen kadu xekamakin xaba bestichai daya pei wakubainwen. Jakia piti xeni inun uva vino ana kadu wayamakubainwen”, aka kaya

<sup>7</sup> januxun Diosun chaxuwan baken jawen unanti ana ja cuarto tsamia daxnuaya jiweabu betsan yuikin: “Jewe”, akaya <sup>8</sup> en uiyanjanua caballo betsa pashin bexunaki tsuada betsajawen kena Mawamanika jaki katsaua inun janu mawabu bumisbu jabun xanen ibu jachun juai en uiyanjanua Diosun mai jidabi anuabu yudabu xukua tibi jabu anua paxka akeakekin ja dabe xanen ibu watan ja cuarta parte jatu inankin kushipa wakin yunukin nupewen jau detenamenunbun inun, buniwen jau tenanmanunbun inun, isin betsa betsapawen jau tenanmenunbun inun, yuinalka pubenbun jau jatu pimanunbun ja kushipa inan bibainaya

### *Ja quinto inun sexto jawen unanti tsamia Diosun chaxuwan baken dax-nukinaki, na janchadan*

<sup>9</sup> januxun Diosun chaxuwan baken jawen unanti ja quinto tsamia daxnuaya jabun Jesús ikunwankin Diosun jancha Jesúskidi yusinkubaini bika betsa betsapa tenebiai chintuanbuma jatu tenanbu chi tapu januxun Dios kenwankin inankuinti januxun kuamisbu anu ja naman ja pepabun yushin

datanbu en uiyanan <sup>10</sup> jabun jancha kushipawen yuikin: “Min nukun Xanen Ibu binu keyua medibi min chanima kayabiki. Jaskaken mai anuxun jabun nuku tenanibudan, ¿jatian min jatu unanti watan jatu nuku kupixunxanai?” akabu

<sup>11</sup> yushin datanbu Diosun jatu yuikin: “Matudan, juindukunyukanwen. Ikismaki. En tsumabu betsa matu keska ea dayaxunmis jabudi jau tenanyununbunwen. Jabun matu tenamis keskadiwakin en jatu kupixanai manayukanwen”, itan jabu tibi pepawen kupikin tadi juxupa chaipa jatu inankin sawemakin keyuaya

<sup>12</sup> januxun Diosun chaxuwan baken jawen unanti ja sexto tsamia daxnaya en uiyanan pacha sakujaidai badi nukai meshua tadi meshupa keska dakaken uxedi jimi keskai tashia dakaken <sup>13</sup> janua niwe bidenepeji bimi jushindiamma nidi amis keskai bishi tsekebidani mai anu nidi iake iakeaibun <sup>14</sup> janua nai yamakaini una sebiki ikaskainaya mati inun jene anu mai natukan maeakei xekekaunaya <sup>15</sup> janua mai jidabi anua xanen ibujaidabu inun, soladobu xanen ibubu inun, mabuwanyanbu inun, yuda kushipabu inun, dasibi jatun jatu dayaxunmisbu inun, yuda tsuan tsumama dasibi jatibu datei mai tanpe inun mishkipanwan mati janu junenun ika buxun <sup>16</sup> jaki junenun ixun mati inun mishkipanwanbu yuikin: “Janu kopi ma jua tsuan nematidumaki. Epa Dios jawen xanen ibun tsautiki tsaua inun jawen bake chaxuwan bake nukuki sinataiwen taea nuku junei nukuki di idikanwen. <sup>17</sup> Ma ja xaba janu Diosun jatu kupiaitian ma jua tsuan ana nematidumaki”, akeakeaibun

## 7

### *Diosun bebunkidi jawenabu katuni jawen nai tsumabun jabu unanti wanikiaki, na janchadan*

<sup>1</sup> ja binukainaya januxun ana uinkin nai tsuma dabe inun dabe mapua akeakeabu en uiyanan betsa badi juaikidi este anu nia betsa badi jikiaikidi oeste anu nia betsa norte anu nia betsa sur anu nia jabun niwe dasibi tsumaxun nemakin mai inun ianenwan inun ji mapua jau niwe janu xunku ikin jau ichakawayamayununbun <sup>2</sup> janua nai tsuma betsa badi juaikidia estekidia jukin nukun Epa Dios jiweatun jawenabu unanti waxunti jayatun jui kushipawen ja nai tsuma dabe inun dabe jabu kushipa mai inun ianenwan daunti jayabu jatu <sup>3</sup> yuikin: “Meyamayukanwen. Diosun tsumabu jabun betunkuki netankin jabu Diosunabu nun unanti wadiamaken mai inun ianenwan inun ji mapua ichakawakin daunyamayukanwen, Diosunabu jau mawayamayununbunan”, jatu wa

<sup>4</sup> jaska wakin 144,000 Israelin 12 juni bakebun bababu xukuabu Diosun jawenabu jawen betunkuki jawen unantiwen unanti wakin yuda betsa betsapabu katukin

<sup>5</sup> Judán bababu 12,000 jawenabu wakin unanti netankin

Rubénen bababu 12,000 jabiaskadi wakin

Gadin bababu 12,000 jabiaskadi wakin

<sup>6</sup> Aserín bababu 12,000 jabiaskadi wakin

Neftalín bababu 12,000 jabiaskadi wakin

Manasésin bababu 12,000 jabiaskadi wakin

<sup>7</sup> Simeónen bababu 12,000 jabiaskadi wakin

Levíñ bababu 12,000 jabiaskadi wakin

Isacarin bababu 12,000 jabiaskadi wakin

<sup>8</sup> Zabulónen bababu 12,000 jabiaskadi wakin

Josén bababu 12,000 jabiaskadi wakin  
 Benjamínen bababu 12,000 jabiaskas wakin  
 Diosun jatu unanti wakin katumai en ninkaxuki.

*Nai anuxun jati tsuan tanatidumabun tadi juxupa saweabukidi yuinikiaki, na janchadan*

<sup>9</sup> Januxun ana uinbaunkin yudawan jati tsuan tanatiduma en uinxu matu yuinun ninkakanwen. Nawabu mai pakea tibi anuabu inun, yuda betsa xukua tibi anuabu inun, dasibi jancha tibi anuabu inun, mae tibi anuabu Dios xanen ibu jaki tsauti inun chaxuwan baken besuudi jabu nixun tadi juxupa chaipa sawexun xenpan tsuma nixun <sup>10</sup> jui kushipawen jabun yuikin: “Nukun Epa Dios xanen ibu jaki tsauti anua inun jawen bake chaxuwan bake nukun meketidan, jabuanuaki”,

ikaibun <sup>11</sup> dasibi Diosun nai tsumabu inun, jabu jiwea dabe inun dabe inun, ja 24 mekenikabu jatibu xanen ibun tsauti anu mapubaunabu Diosun besuudi main beti ixun kenwankin <sup>12</sup> yuikin:

“Nukun Epa Dios unanepa Xanen Ibu kushipajaidaki.

Benimawakin jawenduawakin kenwankubainankanwen, niti ikamadan.

Jaskakidan”,

ikaibun

<sup>13</sup> januxun mekenika betsan ea yukakin: “Na tadi juxupa saweabudan, ¿tsuabumen? ¿Jania beabumen?” ea wa <sup>14</sup> kemakin: “Xanen ibuun, min mian unaii”, en wa januxun mekenikatun ana ea yuikin: “Chanimaki. Ichakawanikatun yuda dasibi mai jidabi anuabu bikawakin jatu nuitap-awaya yudabun jatun chakabu jenekin jabun tadi detsis keska chaxuwan baken jimiwen chukakin jabun detsis yamawakin jabun tadi juxu pe-jaidawabuki.”

<sup>15</sup> “Jesúsun jaska wakin na mapubaunabu jatu pepawa  
 Dios xanen ibu jaki tsauti anu manixun  
 meshu medan inun badidi Dios janu jiwe anuxun  
 duawakubainaibu Diosun jabu mekekubainxanikiki,  
 shinan chankainbudan.

<sup>16</sup> Jadia ana nuitapai buni unpax manui ikama inun,  
 badin ana jatu kuama inun,  
 xana bakakin ana jatu bikawama ixankanikiki.

<sup>17</sup> Ja inun, chaxuwan bake Dios xanen ibu jaki tsauti namakis niatun  
 unpax paisma pejaida chacha jene jawen jiwemati jaya anu jatu iyuxun amai  
 jatun mekenan ixanikiki.

Januxun ja kaxamisbu

Diosun jatun bedu beun jene dasibi taxka waxanikiki”, ea wa

## 8

*Jawen jenekin séptimo tsamini daxnunikiaki, na janchadan*

<sup>1</sup> januxun Diosun chaxuwan baken ja séptimo jawen unanti jawen jenekin tsamini daxnuaya janua Diosun mae anua dasibi media hora nishma dakatan binukainaya

<sup>2</sup> januxun ja 7 nai tsumabu Diosun besuudi mapuabu jabu tibi mimawati trompeta jatu inain en uiyanan <sup>3</sup> nai tsuma betsan oro mane kencha tsumatan Dios kenwankin jawen inankuinti janu janati tapu anu Dios xanen ibu jaki tsauti besuudi ka nia jabun Dios kenwainbun jancha duapa inintibe jusixun janu kenwanti tapu anu jau manchinun ni pei ininti pepa ja bechipaimis ichapa nai tsuman inan <sup>4</sup> bixun nai tsuman jawen mekenki

tsumaxun ja inti inun ja Dios yukamisbu chi deken matsistua menui jawen kuin inin pejaida inabainaya ikunwainbun jancha duapa Dios yukamisbu ja kuinyanbi jusia inadiaya <sup>5</sup> januxun nai tsuman oro kencha ana tsumaxun chi deken janu kenwanti tapu anua beakin mata waxun mai anu udenkin sa aka jadia kana baka baka itan tin ikainkaini pacha sakuaya

<sup>6</sup> januxun ja 7 nai tsumabu jabiatitundi trompeta jabun mimawati mawanun, iwanan, tsumabun

*Cuatro trompeta mawakin chan anibukiaki, na janchadan*

<sup>7</sup> ja nai tsuma betsa ja dukun primeron jawen trompeta chan akin taewaya mai pakea tibi anu nidi iake iakekaunkin badux ui inun chi ja dabe jimiyabi jusia Diosun puta mai pakea tibi anu kuakin ja pakea betsa anu kauankin ni inun ni maxu tercera parte kuakin basi nanke dakayabi dasibi kuaken

<sup>8</sup> januxun nai tsuma ja segundon jawen trompeta chan akaya tsuanda ianenwan jatiubukuns watan pake dabe inun besti jabiatibus waken mati ewapa menuai keska ianenwanu Diosun puta pukukin ianenwan pakea betsa jimiwaya <sup>9</sup> ja jabias pakea ianenwan medan jiweabu mawaibun ja pakea anu xaxuwani nexeabudi mushi mushi ikaya

<sup>10</sup> januxun nai tsuma ja terceron jawen trompeta chan akaya jene inun chacha mai pakea betsa tibi anu bishiwan jede ji iki bin dekua keska chaxajaida nai anua kauani tercera parte mai anu inun jene betsa anu inun chacha anu tin iki kauanaya <sup>11</sup> ja bishiwan jawen kena Muka mai anu tin ikin mai pakea tibi anu jene tercera parte unpax mukajaidawaken yuda ichapabun ja unpax aki mawaibun

<sup>12</sup> januxun nai tsuma ja cuarton jawen trompeta chan akaya tsuanda badi inun uxe inun bishi jabun chaxa kushipa jatiubukuns watan pake dabe inun besti jabiatibus waken nai tsuman pakea betsa ichakawakin xaba betsa tibi badi nukawakin meshu tibi uxe inun bishi nukawakubainaya

<sup>13</sup> januxun ana uinkin en ninkaya tete ewapa nai natukanu nuyakauankin junin jui kushipa keskawen yuikin: “Juaai, juaai, nai tsuma dabe inun bestitun jabun jatun trompeta jawaida chan akaya dasibi na mai anu jiweabu nuitkaapai yumanxankanikiki”, ikaya

## 9

*Quinto nai tsuman jawen trompeta mawakin chan anikiaki, na janchadan*

<sup>1</sup> januxun ja quinto nai tsuman jawen trompeta chan akaya bishi keska mai anu kauani tin ika en uianyan mai kini keyatapa xankinjaida janu yushin chakabu anu jawen bepent shabi ja bishi keska Diosun nai tsuman inankin <sup>2</sup> bishi keskatun jawen kini bepeanyan janua chi kuin midima bai ewapa kua keskai meshu tuenabainkin badi inun nun jawen juinsinamis meshu waya <sup>3</sup> kuin puebainai nakui shininwan midima mai anu pai butuabu nibu keska wakin Diosun jatu paepawakin pubenwankin <sup>4</sup> yunukin: “Mai anuxun basi piama jamapai miban shadabu piama ji piama yudabu jabun betunkuki Diosunabu jawen unanti netanbuma besti pikin jatu ichakawakubaintankanwen, <sup>5</sup> cinco uxe jatu isin tenemabiakin tsua tenanmadan”, jatu wa buxun yudabu ichakawakin nibu keskakin jatu pikin jatu isinjaida tenemakubainaibun

<sup>6</sup> ja jatu jaska waitian yuda midimabu isin tenei mawakatsis ibiai juinti xukubiai mawabuma ixankanikiki.

<sup>7</sup> Ja shinikidi matu yuinun ninkakanwen. Jabun yudadan, caballo jawen detenametanun ixun pewamisbu keska inun, xanen ibun oro mane maiti maia keska inun, jabun besu juni kuin besu keskaki. <sup>8</sup> Ja inun, jabun bu

ainbun bu keska inun jabun xeta inu puben leónen makuxpi chaipa keskaki. <sup>9</sup> Ja inun, jabun yuda achimati mane kushipajaida sawea inun jabun punyan peiwen nuyai caballo midimatun jawen tadanbaintiwen tadanbainkin detenameaibu iyui banabainaibu keskabuki. <sup>10</sup> Ja inun, jabun jina nibu jina keskawen yudabu pikin jatu chakabuwa uxe meken bestiti isin tenekubainxankanikiki. <sup>11</sup> Ja inun, shinin xanen ibudan, ja kini keyatapajaida jatun yunumis nai tsumaki. Jawen kena hebreo janchawen Abadónki. Ja inun, jawen kena griego janchawen Apoliónki. Ja inun, jancha kuinwen kenadan, Yamawanikaki.

<sup>12</sup> Janua ja dukun mesejaida atimapa keyukainaya janua dabe taxnidiamá jayayuaki.

*Sexto nai tsuman jawen trompeta mawakin chan anikiaki, na janchadan*

<sup>13</sup> Ana ja sexto nai tsuman jawen trompeta chan chan akai en ninkaya Diosun besuudi ja Dios kenwanti oro mane tapu anu ja dabe inun dabe dexun tibi jaki mani chimei chankan tsamia anua jui taxni janchakin <sup>14</sup> ja nai tsuma trompetaya yuikin: “Ja nai tsuma dabe inun dabe jenewan Éufrates dapi nexea pekatan jatu nichindiwe”, aka <sup>15</sup> jaska was ja nai tsuma dabe inun dabe jatu peka mai jidabi anu yuda tibi manibaunabu jau na jabia hora inun, día inun, uxe inun, año tercera parte jau jatu tenan atanunbun nai tsuma betsan ja nai tsumabu dabe inun dabe jatu nichian taxnibainaibun <sup>16</sup> jabun soldadobu caballoki katsaunabudan, 200.000.000ti yuikanxu jaskaxanaibu en matu kenexunaii.

<sup>17</sup> En nama keskatan jaska en uinxu inun jaska en ninkashina matu yuinun ninkakanwen. Juni tibitun jawen xuchi achimati mane tashipa chi keska inun, nanketapa jacinto keska, inun pashinipa azufre keska saweabun jabun caballo buxka inu león buxka keska jayabun jawen jaxpa anua chi inun, kuin inun, azufre pashinipa kui taxnibainaya <sup>18</sup> dabe inun besti pakea anu yudabu ja dabe inun besti isin chakabu ja caballo jaxpa anua kainkainkin chi inun, kuin inun, azufre kainkainkin jatu tenan keyuken <sup>19</sup> ja caballo jawen jina dunu keskaki, jawen jina inun, jawen dekin inun jawen xeta paepawen yudabu jatu chakabuwaidan.

<sup>20</sup> Jakia ja yuda texeabu isin chakabuwen jabu mawabuma jabun chakabuwakubainkin jeneama yushin chakabu kenwankin jeneabumadiki. Ja inun, yushin dami betsa oro mane inun, plata mane juxupa inun, bronce mane tashipa inun, mishki dami inun, ji dami ja dami betsa betsapabun uintiduma inun, ninkatiduma inun, maputiduma kenwankin jeneabumaki.

<sup>21</sup> Ja dikabi detenamei jeneabuma inun, yushin chakabun xuun itiwen daunanan jeneama inun, juni inun ainbu betsa betsapabube chutanamei jeneama inun, yumetsui jeneama chakabupakexanaibu en Juanen jaskaxanaibu en uinxuki.

## 10

*Una pishta sebi bepemana nai tsuman benikiaki, na janchadan*

<sup>1</sup> Janua nai tsuma kushipa betsa nai anua butuai en uinxu matu yuinun ninkakanwen. Jawen yuda nai kuinen yabua inun, jawen buxka nawan bai tapia keska inun, jawen besu badi keska chaxa inun, jawen bikedan chi deken keskaki. <sup>2</sup> Ja inun, una pishta sebi bepemana tsumabidana jawen tae chishabukuntan jawen tae yusiudi ianenwan bepaia inun jawen tae yusmaudi maiki paiaki. <sup>3</sup> Ja nai tsuma sai iki inu león pubein tekeden imis keskai jui kushipawen sai iken janua 7ki jui taxni tin ikainkaini keska en ninkashinaki. <sup>4</sup> Jawenchains 7ki denke iki betsa betsapai jancha ninkatan

jawen jancha kenenun ixun en pewaya naiudixundi jui betsawen tsuanda ea yuikin: “Ja jawenchains ja 7ki den iki betsapai min ninkabiaxudan, ja keneama junewe, tsua yuiyamadan”, ea waya

<sup>5</sup> janua ja nai tsuma ianenwan bepaia inun mai anu paia jawen meken yusiudi naiudi sanantan <sup>6</sup> ja jiweibi jiweni jiwea jatun nai wani inun mai wani inun ianenwan wani dasibi jabu jawen jiwebaunabu jakidi jancha betsapai watimakidi yuikin: “Badi jawen jeneidan, jatixun bestiki. <sup>7</sup> Ja 7 nai tsumabu jawen jenea séptimon jawen trompeta chan akaya Diosun tsumabu jawen jancha yuixunikabu jaska inunbadiaikidi Dios june yubakapauni ma jatixun besti menexanikiki”, ikaya

<sup>8</sup> ja jui nai anua taxniai en ninkashinatun ana ea yuikin: “Ja nai tsuma jawen tae betsapai ianenwan bepaia jawen tae uke betsapai maiki paitutuna pishta sebi bepemana tsumaki nukuxun mebinwen”, ea wa <sup>9</sup> kaxun yuikin: “Ja una pishta sebi bepemana min tsumadan, ea inanwen”, en aka ea yunukin: “Naki, pidiwe. Min pia min jana buna bata keska ibiatan min jatu mukajaidaikiki”, ea wa

<sup>10</sup> ja una sebi pishta nai tsuman tsuma mebintan en pia en jana buna bata keska batabiakaini en jatuki nanekin muka wabainaya <sup>11</sup> januxun nai tsumabun ana ea yuikin: “Diosun mia ana yunuaidan, mia yuinun ninkawe. Mae betsapai anu jiweabukidi inun, nawa mai pakea betsapakidi inun, jancha tibi janchaibukidi inun, xanen ibu kushipajaida betsapakidi jatun jancha bena xabakabi jatu kenexunkin jaska Diosun jatu jaska waxanai jatuki chanidiwe”, ea wa en ninkaxuki.

## 11

<sup>1</sup> Januxun jawen mestenti tanati tawa mexte nai tsuman ea inanxun yuikin: “Benikaini kaxun ja tanatiwen Dios kenwanti Templo Jerusalén anu tanatan tapu janu jawen inankuinti janamisbu tanatanwen. Januxun jatibun januxun jabun Dios kenwankubainmisbudi númerowen yudabudi tanadiawe. <sup>2</sup> Jakia jawen kenwanti Templo jemaintin Diosun nawabu ma jatu yunuima januxun jabun 42 uxé Dios danankin jawen mae pepa ichakawakubainxanaibu jemaintin anu tanayamawe. <sup>3</sup> Januxun ea Diosun en tsuma dabe en kushipa inankin en jatu yunua yudabuwen nuijaidakin bexa tadi sawetan 1,260 xaba en kakape yusin janchakubainxankanikiki”, ea waxu

<sup>4</sup> jatukidi matu yuinun ninkakanwen. Na Diosun jancha yuixunika dabedan, olivo ji dabe inun bin pejaida dabe keskabun mai dasibi jatun damiwani Ibu Diosun yunua anun ikaibudan, jawen besuudi nia keskabuki.

<sup>5</sup> Jabu dabe tsuabunda jatu danankin jatu chakabuwanun ikaibu ja jabu jaki sinataibu jatun jaxpawen jabuin xuun akin chi jede taxnimakin jatu kuakin tenanxankanikiki. <sup>6</sup> Ja inun, Diosun jawen kushipa jatu yunua jawen jancha yusinkubainkin jau ana ui iyamayunun nai beputidubuki. Ja inun, jabun jene dami wakin jimi watidubuki. Ja inun, jawatianda jatu dasibi tenemakatsis ikin jamapai isin inun jamapai betsapai shadabu mai anu jiweabu jatu bika tenema akeaketidubuki, Diosun kushipa jayabuwen taexunan.

<sup>7</sup> Jakia Diosun jancha kakape jatu yunua yusinkin keyuaibun jawada atimapu pubenepa mai kini keyatapajaida anua mapekekidan jatube achi-namekin jatu maemakin tenanyan <sup>8</sup> Jerusalén bai kaya namaki jabun yuda datanbu na jaskaidan, januxun jatun Xanen Ibu cruzki mastanibu anu ja maewan Jerusalén anu yuda jiweabun Diosun jancha danankin ninkaisbuma Sodoma inun Egipto anu jiwenibu keska ikubainaibu anu jatun yuda dakaken <sup>9</sup> xaba dabe inun besti namakis mae tibi anu jiweabu

inun, yuda betsa xukuabu tibi inun, jancha betsa betsapawen yuiaibu inun, mai pakea betsa betsapa anuabun ja mawa daka jau maiwayamanubun jatu yunuabuma <sup>10</sup> Diosun jancha yuikin jabun jatu ja akaibu ma mawabuwen taea midimabu mai anu jiweabu benimai shinan chankain jatun jaibuaibube jatun jamapai jamen inananainbun

<sup>11</sup> janua jaskabiaibun xaba dabe inun besti namakis ka jawen jancha yuixunikabu Diosun ana jatu bestenwan ana jiwei benidabebaunaibu dasibibun jatu uin date paepaibun <sup>12</sup> janua nai anua jui kushipawen Diosun jancha yuixunika dabe Diosun jatu kenakin: “Nedi inadi bekanwen”, jatu wa ninkatan nai kuinwen inaibu ja jaki sinatashinabun uiainbun <sup>13</sup> ja jaskabaini nesebainaibun pacha sakuaya ja mae décimo parte pake betsa di akaya 7,000 yudabu debuaibun dasibi yuda betsabu jabu jiweyuabu datejaidai damapaikin Dios nai jidabi xanen ibu kushipajaida ikunwanmabia kenwainbu jaskaxanaibu ninkakin en uinxuki.

<sup>14</sup> Janua ja segundo mesejaida atimapa keyukainaya janua ana betsa tercero taxnidiamma jawaida kaindiaikiki.

*Ja 7 nai tsumabu jawen jenea séptimo trompetayatun jawen trompeta chan anikiaki, na janchadan*

<sup>15</sup> Ja 7 nai tsumabu jawen jeneatun trompeta chan akai en ninkaya nai anua jui kushipawen jabun kenwankin yuikin:

“Nukun Xanen Ibu Dios inun  
jawen bake Mesías Cristo besti  
natian mai jidabi anu ja besti xanen ibukin  
jatu mekekubainxanikiki, niti ikamadan”,  
ikaibun <sup>16</sup> ja 24 mekenikabu Dios xanen ibun jaki tsauti dapi janu tsauabun  
jabun Dios kenwain jawen tae naman maiki danti iki beti ixun <sup>17</sup> yuikin:  
“Yavé Diosuun, min pejaidaki.

Mai jayadiama min jiwenidan,  
natian betsama jabias min jiweaki.  
Xanen ibu betsa yamawatan  
min kushipa min jayakunkainmiswen yuda dasibibu mekei  
mia besti min ma xanen ibui taeaii.  
Mia besti kushipa dasibi binu keyua min pepa nun mia kenwaiin.

<sup>18</sup> Ja dukun mai jidabi anuabun mia bechipalama  
mia danan paepawai miki sinatakubainimabuki  
Jakia miadi natian jatuki sinatadiai  
janu jatu kupinun ika min ma taxniaki.  
Januxun mawabu bestenwantan jatu unanti wakin  
min tsumabu min jancha yuixunikabu inun,  
minabu wakin medibi min jatu wani  
jabu dasibi xanen ibubu inun xanen ibubuman  
mia chibankin mia kenwankubainmisbu  
jabun pepawen min jatu manakuxanaii.  
Jakia jabun jawada mai anuxun pepa yamawakin  
mia chibankubainama mia dananmisbu  
jabun chakabuwen jatu unanti watan manakudiakin  
jabun chakabuwen miandi min jatu yamawai kaii”,  
akaibu en ninkaya

<sup>19</sup> januxun Templo nai anua bepenxun ja jiwe medanua Diosun nukun xenipabu yubani kene ji bauki adua jatu uinmaya kana baka baka iki tin ikainkainaya pacha sakuaya badux ui ewapabu nidi iki jaskai keyuxanai en uinxuki.

## 12

*Ainbuki yushibu xeanan pubenikiaki, na janchadan*

<sup>1</sup> Janua nai anua unanmati betsa taxnikidani ainbu jawen bachi badin chaxapan yabua inun, jawen tae uxen tachaxa inun, xanen ibun maiti 12 bishi nea maia <sup>2</sup> ja ainbu tuya bake kainun ika isinjaida mei bis ikai en uianyan

<sup>3</sup> janua jawen unanmati dami betsa nai anua taxnia yushibu xeanan tashipa jawen yuda kapetanwan yuda keska 7 buxkaya 10 maxunyan buxka tibiki xanen ibun maiti maia taxnitan <sup>4</sup> tsuanda bishi jatiubukuns watan pake dabe inun besti jabiatius waken pakea betsa yushibu xeanantun jawen jina bekun bekun akin bishi pakea betsa mai anu udentan ja yushibu xeanantun ainbu tuya bake kainun ikai ja dapi jawen besuudi nixun jawen bake kaia in achixun xeanun, iwanan, manaya <sup>5</sup> ja ainbu anua juni bake kaintan ewatan nawa betsa betsapa dasibi binukin jabun Dios ninkabuma jawa kaneama kupi jau xanen ibuxanun ja bakeishta kaian xeanantun xeanpanan iyukin jawen xanen ibun tsauti anu Diosun paxawakin ainiken <sup>6</sup> ainbu janu tsua jiweabumanu paxawakin mae betsa Diosun ainbu pewaxuni anuxun 1,260 xaba jadixun jau pimakubainxanunbun jadi yunua ainbu paxaken

<sup>7</sup> janua nai anua Diosun nai tsumabu xanen ibujaida Miguel jawen tsumabube inun yushibu xeanan jawen tsumabuyadi jatube detenameaibun <sup>8</sup> yushibu xeanantun maematidubumawen taexun nai anu ana jabube jiwestidubuma Miguelin jatu udenkin <sup>9</sup> ja yushibu dunuwan jiwei taeni xeanan chani ewan yuda dasibibu jatu padankubainmis nun Diablo Satanás wamis jawen tsumabube mai anu jatu maemakin nidi akabun

<sup>10</sup> janua jui kushipa nai anua kaia in en ninkaya yuikin:  
 “Nukun betsabu jabun ikunwainbu  
 badidi inun meshu medan Dios bebunxun  
 nuku jatu chitenkin yuanmis ma putabuki.  
 Pejaidaki. Natian Dios xanen ibuaya  
 jawen bake Mesías Cristo jabe xanen ibukin  
 jatun kushipajaidawen nuku mekekin taewakanikiki,  
 ja yaushikin ana tsua benutimadan.

<sup>11</sup> Jabu nukun betsabun Satanás maemakinan,  
 Jesús Diosun chaxuwan bake jabu mawaxunkin  
 jawen jimi jabaniwen taea inun  
 jawen kakape jancha chanikin  
 jawa dateama jatun jiwea benutiduma unankubainmisxun  
 jabu mawawen dateisbuman Satanás ma maemadiabuki.

<sup>12</sup> Jaskawen taea nai inun man janu jiweabuun, benimadikanwen.  
 Jakia man mai anu inun ianenwan anu jiweabuun, man peidakanwan.  
 Satanás pubenjaidatun badi ichapama besti matu ichakawatidu  
 shinain matu anu ma jadi butuaki”,  
 jatu wa

<sup>13</sup> januxun yushibu xeanan ma mai anu puta uintan ja juni baken ewa yushibu xeanantun ichakawakin nuitapawakin taewakubainaya <sup>14</sup> janu tsua jiweabumanu chai jadixun badi dabe inun besti namakis keska Diosun ainbu medabewakin pimakubainun, iwanan, tete ewapan punyan damiowatan Diosun ainbuki tsamian jawen nuyakaini janu jiwxexanai anu paxawaxanun ikaya <sup>15</sup> yushibu xeanan jaki sinatajaidakin jawen jaxpakan unpax tuea chada chada ikin jene ewabainkin jau ainbu nuntanbainun,

iwanan, aka <sup>16</sup> jakia main ainbu medabewakin ja yushibu xeanantun jene wa ja mai jaxpatan jene tsu akin keyuaya <sup>17</sup> jaskaya yushibu xeanan ainbuki ana sinatajaidakin ana jawawen jaska watima jawen bababu texebun Dio-sun jancha chibankin Jesús ikunwankubainaibu tenanun ika <sup>18</sup> ja yushibu xeanan ianenwan kexa janus kexea niken

13

*Jesucristo xanen ibuni mebinun ikai inun jawen janchaxunika padanananx-anaikidikiaki, na janchadan*

<sup>5</sup> januxun yushibu xeanantun yuinaka mese ja kushipa jaska tibiwen jau kushipanun yuikin: "Jamapai jancha atimapai Dioskidi xechakai 42 uxe kushipakunkainwen", aka <sup>6</sup> jaska yunua akin Dioskidi jancha chakabui jakidi jamapai betsa betsapa atimapai yui inun jawen kenwanti Templokidi inun nai anu jiweabu jawen janchawen jatu ichakubainaya <sup>7</sup> ja dikabi yushibu xeanan jau Dios chibankin Jesús ikunwainbube detenamei jau jatu maemanun kushipa inankin yunutan yuda betsa xukuabu tibi inun, mae tibi jiwebaunabu inun, jancha tibi yuiaibu inun, nawa mai pakea tibi anu jiwe-abu xanen ibukunkainwen, ikin jancha wakin meneken <sup>8</sup> ja yuinaka mese atimapai kenwankinan, jabu mai jidabi anu jiweabu tsuabuda bebunkidi Diosun mai dami wadiama jabun kena chaxuwan bake nuku mawaxunitun unaki keneama ini jabun besti duawakin kenwanxankananikiki.

<sup>9</sup> Tsuabuda man pabinkiyabunan, ninkakanwen:

<sup>10</sup> “Tsuada bichiti jiwe anu iyukatsi ikin bichiti jiwe anu jatu bichixankananikiki.

Januxun tsuada nupe chaipawen jatu tenankatsis ikin  
nupewen jatu debuwaxankanikiki”,  
jabun chanima Dios ikunwankin jabun jawa shinan betsa wama jatun  
kushipa jatu uinmaxankanikiki, ikunwain medibibunan.

*Yuinaka ewapa mese atimapajaida mai medanua ja kachu kainikiaki, na janchadan*

<sup>11</sup> Janua yuinaka ewapa mese atimapajaida betsai mai medanua taxnikidana en uinxu matu yuinun ninkakanwen. Chaxuwan bake maxun dabeya keska yushibu xeanan dunuwan taeya Satanáskidan padananain janchai <sup>12</sup> ja yuinaka mese atimapas betasadan, ja ja dukun tenanibubia ma jawen dete bunitun jawen kushipa dasibi jayatun ja bebunxun mai jidabi anu jiweabu ja ja dukun yuinaka mese atimapas jatu kenwanmakubainkin <sup>13</sup> januxun dami tsuan jaska atiduma yudabun bedubi kainmakin naiudia chi jede

pakeaya <sup>14</sup> jatu jaska waxun uinmakin ja yuinaka mese atimapja ja dukuntun besuudi jamapai atimaska akaiwen yudabu dasibi padankin ja kachukeatun yunukin yuikin: “Yuinaka mese atimapajaida ja tsuanda buxkaki chachini mawa ana besteni jiwea keska ja itsa damiwadikanwen”, jatu wa <sup>15</sup> ma damiwabun yuinaka ja kachukeatun ja ja dukun yuinaka mese kushipa inan ja damiwabu jiwemakin janchamaya jabun ja kenwanbuma jau jatu tenanun <sup>16</sup> januxun dasibibu jatidi xanen ibubu inun xanen ibubuma inun, jatidi mabuwanyanbu inun nuitapaibu inun, jatidi tsuanda tsumabu inun tsumaumabu yuinaka mese atimapja ja kachukeatun jawenabu unanti wakin betsabu jabun meken yuisiudi tuxkutimawen netankin betsabu jabun betunkuki netankin wabu <sup>17</sup> tsuabuda ja yuinaka mese atimapan kena inun jawen unanti número jayabumanan, jawa jabun jatun jamapai inantidubuma inun bitidubuma jatu wamaxanikiki.

<sup>18</sup> Jaskaken unanepajaidatun ninka pejaidawatan tanaidan, eskatiki. Matu yuinun ninkakanwen. Yuinaka ewapa mese atimapja jawen número 666dan, juni betsan jawen kena unanmati númeroki. Ja número unainan, bikajaidabia unanepatun besti tanatidubuki.

## 14

### *Nai anuxun nawati benawen kenwain nawanibukiaki, na janchadan*

<sup>1</sup> Januxun ana uinkin Diosun chaxuwan bake Sión mati anu ja yudabu 144,000 jabe mapuabu jatibu jawen kena inun jawen Epa Diosun kena ja dabetun kena jatun betunkuki kene nea jabe mapuabu en uinxu matu yuinun ninkakanwen. <sup>2</sup> Nai anua jui betskaia inun, yuda ichapabun jabun arpa mimawati mawaibu jui keskawen ja mapuxun <sup>3</sup> nawa bena nawaibu en ninkaxuki. Dios xanen ibu jaki tsauti besuudi inun ja jiweabu dabe inun dabebun besuudi inun, ja 24 mekenikabun besuudi jawen nawati benawen ja 144,000 jabu ja yudabu anua katukin Diosun jawenabu jatu wani nawaibu uinkin en ninkaxudan, jabun besti ja nawati bena unankanikiki, tsua betsan ja tapintidubumadan. <sup>4</sup> Ja nawakin Dios inun jawen bake chaxuwan besti duawakin kenwankubainunbun Diosun jabu ja dukun inankuin keska wakin jabu dukun katuniki. Jaska Dios inankuinmisbu keska wakin jabun jatun yuda Dios inun jawen bake inanbu jatu mekenibu jabun ainbu betsabu chutabaunabuma pepa besti Diosun chaxuwan bake janida kai anu jabu jachun buxankanikiki. <sup>5</sup> Jabudan, jabu anua tsuan chani bechitidubuma inun jawa chakabu jatukidi yuitidubumaki.

### *Nai tsumabu inun nukun Juchi Kayabi Iyuatun yudabu kupixankanikiaki, na janchadan*

<sup>6</sup> Janua ana betska taxniai en uiyanan nai tsuma betska nai natukanu nayakaunkin Diosun jancha kakape bunikatun mai anu jiwebaunabu nawan mai pakea tibi anu inun, yudabu xukuabu tibi anu inun, jancha tibiyabu anu inun, mae tibi anu jiwebaunabu jancha ikibi ika jatu yuinun ika <sup>7</sup> jui kushipawen yuikin: “Diosun nai inun mai inun ianenwan inun unpax chacha tibi damiwanitun yuda dasibi unanti watan na jabiatian jatu kupikin taewaikiki. Jaskaken menan jaki danti itan Dioski datekin kenwandikanwen”, ikainaya

<sup>8</sup> janua ja nai tsuma betska ja kachukeatun chibancainkin jui kushipawendi yuikin: “Babilonia maewan ken ewa ma yamaikiki. Babilonia anuabun

chakabujaidawakin chutawen kemukubainkin nawa betsa betsapabu dasibi jabiaskadi chakabu atimapa jatu wamakubainaibuwen taexun jabun maewan Babilonia Diosun kupikin ma yamawaki”, ikainaya

<sup>9</sup> janua nai tsuma betsan chibandiabainkin jui kushipawendi yuikin: “Tsuabunda yuinaka mese atimapa inun jawen dami kenwanun ika jabu jeen iyamama jatun betunkuki inun jatun mekenki jawen unanti man jatu netanmamisbudan, <sup>10</sup> Dios ma jawen sinata pae jatuki tanani jawen jatu kupijaidakin azufre pashinipawen jatu nuitkaawakin tsekeden imakin chiwen menukin jatu kupijaidaxanikiki, Diosun nai tsumabu inun chaxuwan bake bebunxunan. <sup>11</sup> Ja inun, tsuabunda yuinaka mese atimapa kenwankin jawen dami kenwandaibu jawenabu wakin jawen jatu unanti wai jatu nemama jatun kena jatu netanmamisbu badidi inun meshu medan jeneama ja kuinwen chi nukaismawen dunua nuyai badi tibi jawa juindukanma isin tene chakayamakubainxankanikiki”, ikainaya

<sup>12</sup> januxun jabun chanima Jesús ikunwankin jabun jawa shinan bet-sawama Diosun janchawen jiwekin jatun kushipa jatu uinmaxankanikiki, ikunwain medibibunan.

<sup>13</sup> Januxun nai anuxun jui betsaa taxnikin ea yunukin: “Na jancha kenediwe. Na jibia unudi pakea nukun Xanen Ibuki dasitan mawakubainx-anaibudan, Diosun jatu benimajaidawaxanikiki”, ikaya januxun Yushin Pepatundi ea yuikin:

“Jabiaskaki. Jabudan, jatun daya jenetan juindukun bestixankanikiki. Ja inun, jamapai shadabu Cristo axunkubainmisbuwen Diosun jatu manaku bestixanikiki”, ea wai ninkakin jaskaxanaibu en uinxuki.

<sup>14</sup> Janu ana betsaa kaiain uinkin nukun Juchi Kayabi Iyua nai juxupa kubuduki tsaua xanen ibun oro maiti maia inun jawen mekenwen beki machatu chaipa ewapa kenujaida tsuma en uinxuki. <sup>15</sup> Templo nai anua nai tsuma betsaa kainkidankin ja nai kubuduki tsaua yunukin jui kushipawendi yuikin: “Yudabu mai anu jiweabu yunu banaimabu keskadan, ma janu kania tsekatii keskaki. Janun min beki machatu chaipa min tsumawen xachiwan mextea keska wakin ichawaxun adudiwe”, aka <sup>16</sup> januxun ja nai kubuduki tsauatun jawen beki machatu chaipa bekunkin Diosunabu mai anuabu mextea keska wakin jatu ichawaxuki, mekekinan.

<sup>17</sup> Janua nai tsuma betsaa Templo nai anua beki machatu chaipa kenujaida tsuma kaindiakidanaya <sup>18</sup> janua nai tsuma betsaa chi dasibi yununika Dios kenwankin tapu janu jawen inankuinti janamisbu anua kainkidankin nai tsuman beki machatu chaipa tsuma jui kushipawen yunukin: “Yudabu chakabu uva bimi ma jushian keskaki. Kania tibi mextexun ichawadiwe”, akaya <sup>19</sup> janua Diosun nai tsuman jawen beki machatu chaipa tsumaxun yudabu uva bimi kania keska tibi mextexun jawen bimi jene biti tsiniti anu manchinxuki, jau jabuki sinatakin tsinikin akawakin jatun chakabuwen kupinunan. <sup>20</sup> Januxun mae benanta uva bimiki paikin jawen jene bimisbu keska wakin Diosun jabun jimi jabamakin bai mata keska wakin caballo jawen kui anu kesunbainkin 300 kilómetro jabamabainxanai en uinxuki.

## 15

*Yudabu jatu ichakawati 7 nai tsumabu jaya Juanen uinikiaki, na janchadan*

<sup>1</sup> Januxun jawen jatu unanmakin ichakawati mese 7 jawen jenea jaska nai anua kaiain ja uin e iti chakabujaidawen jaska nai tsumabun Diosun yudabu nuitkaawakin jatu ichakawaxanai 7 nai tsumabun kencha tibiki jawen jenea Dios sinatamis tsumabu en uiannyai

<sup>2</sup> janua ja dukun ianenwan bexnanjaida bishtu keska chiyabi jusia jayaki. Jaskadan, eskaki. Jabun ja yuinaka mese atimapajaida inun, jawen dami danankin kenwanbuma inun, jawenabu jawen unanti número kena danankin Diosun jancha chibankin Jesús ikunwankubainkin mae-mashinabu jabu ianenwan dapi mapuxun Diosun mimawati arpa jatu inan tsumabu en uinxuki. <sup>3</sup> Jabu nawakin Diosun tsuma Moisés inun Jesús chaxuwan bake ja dabetan nawatiwen Dios kenwankin nawakin yuikin:

“Dasibi jamapai dami ewapa tibi akin min jatu e imati anidan, min mia bestiki,

Yavé Dios kushipa dasibi binu keyuadan, mai jidabi yudabun min Xanen Ibudan.

Tsua padanma min shinan kayatapiawen chanima min nuku pe mekekubainmiski.

<sup>4</sup> Mia besti medibi jiwea min kaneisma unankin yudabu betsa betsapa dasibibun mia yui mesewai datebetanan duawakin mia kenwanxankanikiki,

min pepawen kaneama min akubainmiswen taexunan”, akaibun

<sup>5</sup> jaskaibu naiudi en uiyanan Diosun jiwe nai anu bepenmanakainaya Dios yubakatan Moisés jiwe wamani <sup>6</sup> ja medanua <sup>7</sup> nai tsumabun ja tibitun jawen jatu ichakawati tsuma kainbidanaibun jabun tадидан, juxupa chax-ajaida sawea inun oro nanexeketi xuchi puchinin kesua sawea mapuabu <sup>7</sup> ja jiweabu dabe inun dabe betsan ja <sup>7</sup> nai tsumabu tibi oro kenchaki Dios jiwei ikibi ini jiweatun jawen yudabu kupiti mata jatu inan akeakeaya <sup>8</sup> Dios kushipa duapajaida chi kuin keska jawen medibi dintu mata anua juikiki. Ja <sup>7</sup> nai tsumabu jabu tibitun ichakawatiwen yudabu ichakawakin keyudiabumaken Diosun Templo anu yane jikitidubumaki.

## 16

<sup>1</sup> Januxun en ana ninkaya nai anu Dios kenwanti Templo anua jui kushipawen <sup>7</sup> nai tsumabu tsuanda yunukin jatu yuikin: “Matun <sup>7</sup> kenchaki Dios sinatamis mata mesejaida mai anu buxun jiweabuki jatu juka akeaked-itankanwen”, jatu wa

*Diosun jawen jatu kupiti <sup>7</sup> nai tsumabun kencha mata juka akeakekubainaibu uinikiaki, na janchadan*

<sup>2</sup> nai tsuma betsa ja dukun kaxun jawen kenchaki Dios sinatamis mata mai anu jukaya ja yudabu mai anu jiweabu jabu ja yuinaka mese atimapajabun unantiyabu inun jawen dami kenwanmisbu jabun yudaki chami isin atimapajabun isinjaida jatu tenemaya

<sup>3</sup> janua nai tsuma ja segundo kaxun jawen kenchaki Dios sinatamis mata ianenwanu jukaya juni puben jatuki sinatakin jatu chachia mawai jimi jabamis keskai jene pisiwa jene medan jiweabu dasibi mawaibun

<sup>4</sup> janua nai tsuma ja tercero kaxun jawen kenchaki Dios sinatamis mata jene kayabi dasibi inun chacha dasibi anu jukaya jene dami jimi keyuaya

<sup>5</sup> nai tsuma jene jatunmekemistun Dios yuikin:

“Mai jayadiama min jiweni inun

natiandi Dios medibi jiwmistun jawa kaneama  
jabis jatu unanti wakin min amisdan, min mia besti nun unaaiin.

<sup>6</sup> Min jancha yuixunikabu inun

Jesús chibainbu ichakawakin  
jabun jimi jabawakin tenankubainmisbu  
jabudi jatu kupikin jimi min jatu amaii.

Jaska menun ika imisbudan, jau jaskanunbunwen”, akaya

<sup>7</sup> januxun Dios kenwakin tapu janu jawen inankuinti janamisbu anuxun tsuanda yuikin: “Xanen Ibu Épa Dios dasibi binuatuun, januki. Dasibi kushipayakin kaneisma yudabu unanti watan chanima min shinan kayat-apiawen mian besti min jatu kupiaii. Min pejaidaki”, akaya

<sup>8</sup> janua nai tsuma ja cuarto kaxun jawen kenchaki Dios sinatamis mata badi anu jukakin badi kushipa wa ja badin kushipa bitan yudabu menuaya

<sup>9</sup> jawen kupiti tibi Diosun yunukin jatu tenemaiwen taexun ja kujaidaiwen menubiakin jaska shadabu mebiai Dioski xechakakin kenwanun ixun shinan betsa wabumaki.

<sup>10</sup> Janua nai tsuma ja quinto kaxun jawen kenchaki Dios sinatamis mata yuinaka mese atimapajaida jaki tsauti anu juka jawen mae meshuaya yudabu ana jawawen jaskatima isin tenei jatun jana buxtebainbaina manibia <sup>11</sup> jabun isin chakabu tibi mebiai inun chami tenebiai jabun jiwea chakabu jenekatsi ikama Dios nai anu jiwea jaki xechakai jancha chakabu yui jeneabumaki.

<sup>12</sup> Janua nai tsuma ja sexto kaxun jawen kenchaki Dios sinatamis mata jenewan Éufrates anu jukaya jau xanen ibubu badi juaikidia jau jawen benunbun bai tapinxuni jene netsuaya

<sup>13</sup> januxun yuinaka mese atimapaja jaxpa anua inun, yushibu xeanan jaxpa anua inun, juni betsan padan jancha yusinmis jaxpa anua jabu tibi anua yushin chakabu jeu keska kaiain en uinxuki. <sup>14</sup> Ja yushin tibidan, jawen yushin chakabuwen dayakin dami atimaska betsapajatu waxunkin xanen ibubu dasibi mai jidabi anua jatu taxnibidan jatun soldadobuya detenamemanun, iwanan, jatu icha waken januxun Dios kushipa binuatin janu akaitian jatu maemakin yamawaxanikiki.

<sup>15</sup> Jaskai en uiyanan Jesús chani: “Uian. Ea ana matu anu kaidan, en yumetsu kai keskakainxanaii, tsuan jaska ana shinanmakenan. Jabu man benimaxanaibudan, uxä keskama bestenxun min jiwea min tadi min meke pewa keska ixankanwen, jawa min tadi pekatan nia keskamadan, matun yuda tadiuma nia jawen man daketidu keska iyamakanxunan”, ea waya

<sup>16</sup> januxun yushin chakabu jeu keskabu buxun jau Diosbe detenamenunbun jawen hebreo janchawen Harmagedón mae anu xanen ibubu dasibi jatu ichawabu

<sup>17</sup> janua ja nai tsumabu jawen jenea ja séptimo kaxun jawen kenchaki Dios sinatamis mata jawen juinsinaibu anu niwe anu jukaya janua Dios xanen ibu jaki tsauti jawen jiwe anua jancha kushipa kainkin yuikin: “Ma jatis besti en keyuxuki”, ikaya

<sup>18</sup> janua kana baka baka itan tin ikainkaini mai taka aki mai pacha sakui yudabu mai anu jiweabu: “Jaskakunkidanai nun meismaki”, iki mesejaidai-bun <sup>19</sup> dasibi yudabun maewan Diosun tekekin keyukin ja maewan Babilonia kushipajaidabia jawen chakabu shinain jaki sinatajaidakin pakea dabe inun besti waxun jatu kupijaidakin <sup>20</sup> dasibi natukan tibi yamawadiakin mati dasibi yamawakin <sup>21</sup> jaska waya naiudia badux ui itamama betsap 40 kilo yudabuki nidi imaya badux ui mesejaidawen taea yudabu Dioski xechakaxanaibu ninkakin en uinxuki.

## 17

*Maewan betsap 7 ainbu jininipa keska Diosun kupixanikiaki, na janchadan*

<sup>1</sup> Januxun ja 7 nai tsumabu betsan 7 kenchaki Dios sinatamis mata tsuma juxun ea yuikin: “Nedi juwe, ainbu jininipa jenewan nemaki tsaua en kupiai en mia uinmaidan. <sup>2</sup> Mai jidabi anu xanen ibubu jawen kemui jabe

chutanamei keskai ma jabe beyabuki. Jaska inun, yudabudi mai jidabi anuabudi Dios kayabi ikunwanma jamen yushin betsap aikunwain jawen kemui chutai keskai jabun kemu paewen paean keskabuki. Uinwen”, iwanan,

<sup>3</sup> janua ja nai tsuma ja en yushinki nukuxun nama keskawen ea uinmaitun janu tsua jiweabuma anu ea iyua jadixun uinkin ainbu betsap yuinaka mese atimapajaida tashipaki katsaumea en uinxuki. Ja yuinakadan, 7 buxkaya inun 10 maxunyan inun Dioski xechakati kena jaki yabukuaki. <sup>4</sup> Ja inun, ja ainbudan, tadi tashipa uxna duakabi inun tashipajaida sawea inun, jawen jawenduai daukin oro mane inun, nenkati mane jawendua kadujaida sawea inun, chudi mane perla juxupa kadujaidadi saweatun jamapai pepa danain jawen atimapamis kenchaki tsuma jaya <sup>5</sup> inun, jawen betunkuki jawen junea kena kenea: “Babilonia maewan mesejaida ea en jatun ibu jininipaki. Ea anu ainbu jininipa dasibi inun jamapai shadabu mai jidabi anuxun pepa danankin chakabuwamisbu jiweabuki”, ika netanki. <sup>6</sup> Jaska inun, Jesúz chibankin jawen jancha yusinmisbu midimabu ja ainbu jininipa itsa mae-wan Babilonia anuabun jatu tenanxun jabun jimi akai keska paean jaskai uinkin shinain e iki teku itan en pes niken <sup>7</sup> nai tsuman ea yuikin: “¿Jaskai e iki min jawen dateai? Ja ainbu inun ja yuinaka atimapamisbu 7 buxkaya inun 10 maxunyan ainbu jaki tsaua ja dabekidi junea xabakabi mia yuinun ninkawe.

<sup>8</sup> Yuinaka mese atimapajaida min uinxudan, bebunkidi jiwebiani natian ana jiwea jayamabia jaskabia ana jawen jenei Dios kupimakin keyumayui kini keyatapa xankinjaida anua mapekei taxnia Diosun yamawaxanikiki. Jaskakidanai mai damiwaitian tsuabuda Diosbe jiwekuinxanaibu unaki Dio-sun jabun kena netanma ini yuinaka mese atimapajaida mawabiani ana un unuatian jiwea mapekea jabun uinkin yui: ‘Jabaa! ¿Jawamen?’ ixankanikiki.

<sup>9</sup> Ja yuinaka mese atimapajaidakidi unanepa bestibun shinankin unantidubuki. Jawen 7 buxka unantidan, 7 mati Roma anuki, jaki ainbu tsaua unantidan. Ja dikabi jawen 7 buxkadan, 7 xanen ibu jawen unantidiki. <sup>10</sup> Ja inun, 5 xanen ibu ma mawanibuki. Jakia betsap natian xanen ibuikiki. Ja inun, betsap xanen ibunun ika judiamaki. Janua ja jawen jenea xanen ibui juadan, jatixuinda badi ichapa xanen ibuama ixanikiki. <sup>11</sup> Ja inun, ja yuinaka mese atimapajaida ja xanen ibu 7 betsap ibiani ja dukun jiwebiani natian ana jayamabia ana jiwea ja octavo xanen ibu ixanikiki. Jakia atimas ja yuinaka mese atimapajaida jawen jenekin Diosun kupikin yamawaxanikiki, niti akamadan.

<sup>12</sup> Ja inun, ja 10 maxun min uinxudan, 10 xanen ibubu betsaki. Jabu xanen ibui taediabumabiaken yuinaka mese atimapamisbu xanen ibukin jawen kushipa jatu yunutan uxa eskadabes ja 10 jabe xanen ibumaxanikiki. <sup>13</sup> Ja inun, ja 10 xanen ibunan, jabe xanen ibukin yuinaka mese atimapamisbu xanen ibukin medabewakin jawen yunuti chibankin <sup>14</sup> chaxuwan bakebe detenamexankanikiki. Jakia chaxuwan bake Jesucristo dasibi xanen ibubu inun dasibi yununikabu binukin keyumiswen taexun jabu Diosun katuxun jatu kenani chintuainsbumabetan ja 10 xanen ibubu maemaxankanikiki, nukun Xanen Ibu Jesucristobetanan”, ea watan

<sup>15</sup> ja dikabi nai tsuman ana betsap ea yuikin: “Ja jenewan namaki ainbu jininipa tsaua min uinxudan, ja mae tibi anu jiwebaunabu inun, yuda tibibu inun, jancha betsap betsapa yuiaibu inun, mai pakea ichapaki. <sup>16</sup> Ja inun, ja 10 maxun xanen ibubu inun ja yuinaka mese atimapajaidatun ja ainbu jininipa ichakawakin jawen kushipa danankin jamapai jawendua jaya yamawakin ana jawen nuiama jenekin nuitapawakin jawen nami pikin keyutan jawen

xau kuaxankanikiki. <sup>17</sup> Ja inun, ja 10 xanen ibubunan, ja yuinaka mese med-abewakin jabun kushipa inankin jabun jawen yunua chibankatsis ikin jaska Diosun jatu jaska wamakatsis ikai jatun jointi medan jatu shinanmaya jaska yubakani menemakin Diosun jatu amakubainxanikiki. <sup>18</sup> Ja inun, ja ainbu jininipa min uinxudan, ja maewanki, xanen ibu kushipa tibi yunumisdan”, ea waxuki.

## 18

### *Diosun Babilonia maewan yamawaxanai uinikiaki, na janchadan*

<sup>1</sup> Ea jaska watanaya nai tsuma betsa nai anua butukidankin kushipajaida jaya jawen chaxawen mai chaxawakin <sup>2</sup> jancha kushipawen sai ikin yuikin: “Babilonia maewan ken ewa ana jawama

jawen kushipa ma bextekeaki.

Janu Satanásan tsumabu inun,

jatun yushin chakabubu inun,

peiyabun pisi pimisbu inun,

yuinaka atimapá piama nun dananmis ma jabu jawen jiwekanikiki.

<sup>3</sup> Ja inun, mai pakea tibi anua bea

jawen jamapai tibi kemu pae jawenduawen kemui

jabe chutanamei keskaibu inun,

xanen ibu kushipa betsa betsapa tibidi chai jiwea

midimabun Babiloniabe atiai keskai jabe yubakamisbuki.

Ja inun, ja mabu inanananmisbu mai jidabi anuadi bea

janua mabuwanyain jabun mabu inankin pei midima bimisbuki”,

ikaya

<sup>4</sup> janua jui betsa nai anua taxnikin yuikin:

“Enabuun, ja maewan anua taxnidibainkanwen,

jau jabun chakabu akaibube man jusiama inun

jau Diosun atimapawen jatu kupikin

matu dikabis jau matu kupiyamaxanunan”, iwanan,

<sup>5</sup> “Jabun chakabudan, jamapai ichawakin maspuwakubainkin nai anu mati  
aka keska waibu

Juneama ma xabakabi Diosun jatun chakabu betsa betsapa uinkiki.

<sup>6-7</sup> Jaskawen taexun Babilonia ainbu keskakin

ibubis daui jamapai mabu pepa shadabu bi kenkin yuikin:

‘Tsuabuda ebe detenamekin ea maematidumaki.

Ja inun, jawawenda dabanan en kaxama ixanaii.

Jakia dasibi pepa shadabu jaya xanen ibu ainbu keska en jiweaki’,

imiswen taexun jawen chakabuwen inun jatu chakabuwamiswen taexun

dabeki kupikin ja maewan ainbu keska jabias keska wakin

kupichakayamakanwen, nuitapawakinan.

Babilonia maewan anuabun yuda betsabu kemumakin kenwanmamiswen  
taexun

ichakawakin jabiaskadi wakin jatu nuitapawa chakayamadiakanwen,

jau ana betsa betsapa bikajaida tenenunbunan.

‘Jakia dasibi pepa shadabu jaya xanen ibu ainbu keska en jiweaki’,

imiswen taexun jawen chakabuwen inun jatu chakabuwamiswen taexun

dabeki kupikin ja maewan ainbu keska jabias keska wakin

kupichakayamakanwen, nuitapawakinan.

<sup>8</sup> Jabun chakabuwakubainmisbuwen taexun

nukun Xanen Ibu Dios kushipajaidatun ja maewan ainbu jininipa keska  
kupikin

jabias xabatian yuda ichapa tenankin  
betsabu bika tenemakin inun  
buni tenemakin maewan kuaxanikiki. Manayukanwen”, iwanan,

<sup>9</sup> ana nai tsumapan ea yuikin: “Maewan kuaya chi kuin tuyabainai xanen ibu betsabu betsapabu jawen jamapaiwen kemui jabe chutanamei itsai kemui jabe jawen jawenduamisbu chakabu jatubetan akubainmisbun uin jawen nui sain iki kaxachakayamakin <sup>10</sup> ja keska tenekatsis ikama datei chai mapubaunxun yuikin:

‘Yuu, yuu. Babilonia min maewan ewapa kushipabiaken  
jawaida Diosun kupikin mia yamawaxuki.’

<sup>11-13</sup> Oro mane inun, plata mane inun, nenkati jawendua kadujaida inun, chudi mane juxupa bemisbu ana tsuan biama ixankanikiki. Ja inun, tima tadi pepajaida inun, chaxa tadi betsabu uxna duakabi betsabu tashipa bemisbu inun, ji ininipa mabu inun, elefante makuxpi itsa jawen mabu inun, ji pepa mabu kadu betsabu betsapa bemisbu inun, bronce mane inun, hierro mane inun, epa juxupa pejaida mabu bemisbu ana tsuan biama ixankanikiki. Ja inun, betsabun canela jawen piti nis pejaidawati inun, piti nis wati betsabu betsapa inun, ininti betsabu betsapa bemisbu inun, uva vino inun, piti xeni pepa inun, xekiwan dudu pepa bemisbu ana tsuan biama ixankanikiki. Ja inun, ina awa inun, chaxuwan inun, caballo inun, jawen tadanbainti inun, yuda betsabu jau tsuanda tsuma wanun bibidan jatu inanmisbu ana tsuan biama ixankanikiki. Jaskaken inanananmisbu mai jidabi anu Babilonia maewanwen taea kaxachakayamai jawen taea sain ixankanikiki, ana janixun jatun mabu jadi buxun inantimawen taeandan, akin yuixankanikiki”, iwanan,

<sup>14</sup> jabun maewan ana yuikin:  
“Babilonia anuabuun, jamapai bimi shadabu man jawen kemujaidamis  
inun  
man bechipaimis man ana jayamaki.  
Dasibi jawen mabu jawendua tibi inun  
mabu kadu tibi ma benui keyuaki.”

<sup>15</sup> Janua jamapai pepa shadabu inananankin pei ichapa bikubainshinabu ja maewan anuma nanta mapua ana inananantidubuma uin inun jatu kupiaiwen taea jatuwen datei nui kaxai sain ikin <sup>16</sup> yuikin:

“Aitaa. Aitiin. Maewan kushipa ja ainbu jawendua keska  
janu jiweabun tima tadi pepajaida saweakin  
tadi uxna duakabi inun tashipa saweakin  
jawen daui oro mane inun, chudi mane juxupa inun,  
nenkati pepa mane kadujaida sawebiabu

<sup>17</sup> ¿jatun mabuwan jawaida jaskaxumen?”  
ikaibun

jabun xaxuwan yunumisbu inun, jabun xaxuwan tuenbainkin buxken buxken abainmisbu inun, xaxuwanwen bumisbu inun, ianenwan anu dayamisbu nanta mapubaunxun <sup>18</sup> maewan kuaya chi kuin tuyabainai uin sai sai ikin yuikin: “Aitaa. Aitiin. Maewan betsabu ana jaska keska jayanakamaki”, iwanan, <sup>19</sup> jatun beya chibain mai mishpu kudu maputukui kaxai sain ikin bis ikin yuikin:

“Aitaa. Aitiin. Dasibi xaxuwanyanbu Babilonia anu kaxun  
jatun mabu pepa jawendua inananantan  
pei midima bibidan bibidanaibu ja maewan ma jawaida yamaxuki”, akin  
yuixankanikiki, ea waya

**20** jaskaya jui betsa kain chanii:

“Nai anuabu inun, man Diosunabu medibibu inun,  
man jawen jancha yuixunikabu inun,  
man Jesúsun kushipayabudan,  
Diosun na maewan chakabujaida kupikin  
matuwen dabanan xunská sinatakin axanaiwen taea matudan,  
benimai shinan chankankubainxankanwen”, ikai ninkatan en matu kenex-  
unaii.

**21** Januxun nai tsuma betsa kushipajaidatun jawen deneti mishkipawan  
binibainkin ianenwan anu udenkin pukuxun yuikin:

“Na mishkipawan ianenwanu en pukuxu keska  
ja maewan Babilonia tsuan ana uintiduma ipakexanikiki.

**22** Ana benimakin arpa mimawati mawaibu inun,  
tepe dewe shadabu mawaibu inun,  
trompeta mimawati mawaibu inun,  
mimawati betsa betsapa mawaibu matun maewan anuxun  
ana jawa mimawabuma ixankanikiki.

Ja inun, jamapai mabu betsa betsapa wamisbu  
matun maewan anu ana jaska tibi daya jayama idiaxankanikiki.  
Ja inun, piti pepawai mishki denetiwen dayaibu  
jawan jui denke ikai tsuan ana ninkabuma idiaxankanikiki.

**23** Ja inun, junin ainbu ainwankin  
jawen jaibuaibu beyusmaya benimai chikishtapamisbu  
tsuan ana ninkama idiaxankanikiki.  
Ja inun, matun mabu inanananika kushipabun  
mai jidabi anu jatu paxkaxunmis inun  
jabianuxundi mai pakea tibi anua beaibu  
mukayakin jatu padanmisbuwen taea  
matun maewan anu tsua ana jayamaken  
ana tsuan bin chaxawakin dekuabuma idiaxankanikiki”,  
jatu jaska waxanai uinmakin ana ea yuikin:

**24** “Ja mae Babilonia anuxun Diosun jancha yuixunikabu inun ikunwainbu  
betsabun Jesú chibainbu inun yuda betsabu jatu tenankin jabun jimi jaba  
wamisbuwen taexun na maewan jaki sinatakin Diosun kupikin yamawax-  
anikiki”, ea wa

## 19

**1** januxun en ninkaya nai anua tsuada midimabun yuikin:  
“Aleluya! Nukun mekenika Dios nun kenwaiin.

Duapa kushipajaidatun nun jawenabu nuku mekepakexanikiki.

**2** Ja inun, yuda dasibibu unanxun kaneama kupimiswen taexun  
maewan ainbu jininipa keskatun yudabu dasibi chakabuwamakubainai ma  
kupikiki.

Ja inun, ainbu jininipa keskatun Diosun tsumabu tenankubainmiswen  
taexun

Diosun jawen maewan jaki sinata paepakin yamawaikiki”, itan

**3** januxun jabun ana yuikin:

“Aleluya! Dios pepajaidaki.

Ja maewan kuin inai juxu puepakexanikiki”,  
ikaibun

**4** jaskaibun ja 24 mekenikabu inun ja jiweabu dabe inun dabetun Dios  
jaki tsautiki tsaua naman danti iki maiki beti ixun kenwankin yuikin: “Jau

jaskanunwen. Aleluya! Chanima Epa Dios pepajaidaki”, ikaibun <sup>5</sup> en ninkaya ja Dios tsaua namanua jui betsaa taxnidiakin yuikin:

“Man Diosun tsumabuun, mai jidabi anua betsabu  
man xanen ibubu inun betsabu man xanen ibubuman  
Diosun kushipaki mesekein duawai pepakin kenwankubainkanwen”,  
ikaibu uinkin ninkatan en matu kenexunaii.

*Diosun chaxuwan bakebetan ikunwainbun jabetan pixankanikiaki, na jan-chadan*

<sup>6</sup> Januxun en ninkaya yuda midimabu janchai jene didi ikai keskawen inun tin ikainkainai keskawen yuikin:

“Aleluya! Nukun Epa Dios kushipajaida dasibi binu keyua  
ja bestitun nuku dasibi mekei ma xanen ibui taeikiki.  
Pejaidaki. Kenwanankanwen.

<sup>7</sup> Ainbu jawen bene juabe jiwenun, iwanan,

jawen jamapai pewakin akawai

Jesúsunabu jabe jiwekatsis ikanikiki.

Ja jaskadan, Jesucristo chaxuwan baken

jawenabu niti akama jabe jiwemaxanikiki.

Jaskaken benimai shinan chankain tse ikin

Dios kenwanankanwen.

<sup>8</sup> Tima tadi juxupa chaxakapa pejaida

ja Diosunabu medibi jabun jatun shinanwen kaneama chiban pewamisbun  
jau sawenunbun, iwanan,

jatun jiwea medibi unanmati ja tadi ma jatu inan saweabuki”,  
ikaibu en ninkaxuki.

<sup>9</sup> Januxun nai tsuman ana ea yuikin: “Diosun jancha kayabi en mia yuiai  
ninkatan kenediwe, eskadan. Chaxuwan bake keskatun jawenabu nai anu  
jabe jiwemanun, iwanan, jatu ichawaxun jabetan pidan, benimachakaya-  
maxankanikiki”, ea jaska yuiaya

<sup>10</sup> kenwanun ika jawen tae naman en danti itanaya ea nemakin yuikin:  
“Eki jaskayamawe. Mia inun Diosunabu betsabun Jesucristo chibankin  
jawen jancha yusinmisbu keska eandi Diosun jancha bunika en jawen  
tsumadiki. Jaskaken ea kenwanma Dios besti kenwanwen”, ea waxuki.

Jaskadan, tsuabuda Jesúskidi kakape Yushin Pepatun xabakabi jatu shi-  
nanmaya jabu yusinanbu jakidi chanikin banabimabaunmisbuki.

*Caballo juxupaki katsauntan chakabubu kipi kanikiaki, na janchadan*

<sup>11</sup> Janua nai bepeanyan xanen ibu jawen kena Chanima Jancha Kaneisma  
caballo juxupaki katsauna en uinxu matu yuinun ninkakanwen. Xanen Ibu  
pepatun yudabu unanti wai jatube detenamenun inun ikaidan, <sup>12</sup> jawen  
bedu chaxadan, chi jede keskaki. Ja inun, xanen ibu kushipajaidaiwen taea  
Xanen Ibun maiti ichapa maia jayaki. Ja inun, jawen junea kena ja bestitun  
unain ja kena jaska jaki neaki. <sup>13</sup> Ja inun, jawen tadi saweadan, jimiki pukua  
saweaki. Ja inun, jawen kena betsadan, Diosun Jancha Kayabiki. <sup>14</sup> Ja inun,  
jawen soldadobu nai anua tima tadi juxupa pejaida jawa detsisma saweadi  
caballo juxupabuki katsaumea jachun kainbainkin jatun Xanen Ibu chiban-  
bainkanikiki. <sup>15</sup> Ja Xanen Ibu kaidan, xanen ibu yununika mane kushatia  
inun jawen jaxpa anu nupe chaipa kenujaida kaian tukunwan jawen jabun  
Dios ninkaisbuma mai jidabi anuabube jatube detenamei kaidan, jaskawen  
taea ja Xanen Ibu kayabistun jamebi ja jatuki Dios sinatai jatu uinmakin  
jaska uva vino tsinikin pema pema amisbu keska wakin Dios kushipa binu  
keyuaturun jawen puben pae jatu memai kaikiki. <sup>16</sup> Ja inun, jawen kena

mestenepa Dasibi Xanen Ibubu Inun Dasibi Yununikabu Binukin keyuaki, ika jawen tadi chaipaki inun jawen kishi kateki ja dabeki jawen kena neaki.

### *Jesúski jabu jaki sinataibu jatu maemanikiaki, na janchadan*

<sup>17</sup> Januxun en uiyanan nai tsuma betsa badi medan nixun dasibi jabu peiyabun pisi pimisbu nai natukanu nuyabaunmisbu jatu kenakin jui kushipawen yuikin: “Nenu bei ned ichai bekanwen, jau Diosun matu pimanunan. <sup>18</sup> Jabube Xanen Ibu detenamekin maema jabun namidan, xanen ibubun nami inun, soldadobu jabu xanen ibubun nami inun, jamapai juni kushipabun nami inun, caballo nami inun, dasibi caballoki katsaunabun nami inun, junibun tsumabun nami inun, tsuan tsumabuman nami inun, jamapai yuda betsa betsapabun Dios ninkaisbuma Jesúsun jatu maema jabun nami pikaxunan”, ikai en ninkaxuki.

<sup>19</sup> Januxun ana en uiyanan yuinaka mese atimapajaida inun, xanen ibubu mai jidabi anua inun, jatun soldadobu icha ja caballo juxupaki katsaua jawen soladobuya jatube detenamenun ika icha maniabun <sup>20</sup> ja padan jancha yuixunikatun yuinaka mesen besuudi atimaska betsa betsapa tsuan atiduma wakin jabu yuinaka mese atimapajaidatun kena jabu jen iyamama inun jawen dami kenwanmisbu jatu padanmiswen taexun padan jancha yuixunika Xanen Ibu binuatun tsumabun achikin yuinaka mese atimapajaida jabe achitan ninkaibu janu ian azufre pashinipa menui jede ji ji ikai anu ja dabe jatu putabu <sup>21</sup> caballoki katsaunxun jawen nupe chaipa jawen jaxpanu tukuanwen dasibi yuda betsabu Jesúsun jatu detekin keyuken peiyabun dasibibu jabun nami pi xuku dakakin yani waibu en uinxuki.

## 20

### *1,000 año Jesucristo xanen ibuxanikiaki, na janchadan*

<sup>1</sup> Januxun en ana uiyanan nai tsuma betsa nai anua butukidankin ja kini keyatapa xankinjaida jawen bepenti shabi inun mane dispi chiwetameya ewapa tsuma en uinxu matu yuinun ninkakanwen. <sup>2</sup> Ja nai tsuma jukidanan, yushibu xeanan ja dukun dunutan padananain taeni jawen kena dabe Diablo inun Satanásdan, achixun mane dispiwen nexatan 1,000 año <sup>3</sup> kini keyatapajaida anu udenxun jawen beputiwen bepukin mestenjaidawatan jawen unantiwen beputiki tsaminkin unanti watan 1,000 año bichitan janu mekekubainxanikiki, jau ana mai jidabi maniabu jatu padanyamanunan. Jakia ja 1,000 año keyukainaya jau ana jatu jaskadawanun jawa wama kainmatan ana jatixuinda badi Satanás yunuama ixanikiki.

<sup>4</sup> Januxun jabun jatu unanti waxanai jaki tsauxun unanti wati jabun jatun kushipa biaibu en uinxuki. Ja dikabi Diosun yusian chibankin chintuanma Jesúskidi yusinkubainaibu jabun buxka texteabu jatun yushin en uinxuki. Jabu ikidan, ja yuinaka mese atimapajaida inun, jawen dami kenwanbuma inun, yuinaka mese atimapajaidatun enabu unanti jabun betunkuki inun jatun meken pechiki jatun kene netanmakin amama ikubainimabuki. Jaskawen taea ana bestein benibaun 1,000 año Cristobe xanen ibuxankanikiki. Jaskaibu en uinxuki, <sup>5</sup> jabu dukun mawakubidanpaunibu bestein taeidan. Janua 1,000 año keyui maekainaya ja mawanibu betsabudi bestendiaxankanikiki. <sup>6</sup> Ja inun, Diosun jawenabu wakin medibi wanixun jabu dukun bestenwanan, benimajaidaxankanikiki. Jabudan, ana jawa jatun kushipa mawa dabeki jayamajaida ixankanikiki. Jaskawen taea Dios inun Cristo dayaxuni janchaxuni besti jabe xanen ibui 1,000 año jabe xanen ibuxankanikiki.

<sup>7</sup> Januxun ja 1,000 año binukainaya mai kini keyatapajaida anua jawen nai tsuma Satanás Diosun mistumanixun kainma <sup>8</sup> taxnitan nawabu dasibi mai jidabi anu jiwebaunabu anua tibi jatu padankin ja mae Gog inun Magog anua jawenabu soldadobu ichapawakin ianenwan kexanua mashiti wakin jabube detenameti ichawaxanikiki.

<sup>9</sup> Mai jidabi anua bui Diosunabu jatu manakai ichabu inun ja maewan Diosun bechipaijaidai ja dabe kexei beabu anu Diosun nai anua chi jede jatu anu puta jatu kuakin yamawatan <sup>10</sup> janu ja ian janu azufre pashinipa menui jede ji ji ikai anu yuinaka mese atimapajaida inun padan jancha yuixunika nai tsumabun udenibu anu Satanásdi udean jadia badidi inun meshu medan niti akama Diosun jatu isin tenemachakayamaxanikiki, jawa juindukunti jayama niti ikama akiba akinan.

*Jawen jenekin mawanibu nukun Xanen Ibun jatu unanti waxanikiaki, na janchadan*

<sup>11</sup> Januxun Xanen Ibu jaki tsauti juxupa jawenduajaida nukun Xanen Ibu jaki tsaua en uinxuki. Tsauken badi inun, uxe inun, bishi inun, mai keyu tsekebaini nishmai yamakainaya <sup>12</sup> janua dasibi xanen ibubu inun xanen ibubuma mawani ana bestentan Xanen Ibun besuudi mapuabun jawada betsa betsapa akubainibu Diosun jaki kenemis una ichapa bepentan janua una betsa tsuabunda Dios chibankin Jesús ikunwain niti ikama Diosbe ji-wekuinxanaibu jabun kena Diosun jaki kenediakubainmis una betsa jawen jiwemati kene bependiaxun ja jabu jiwxexun jaska wamisbu jatukidi ja unaki kenekubainmisxun dasibi mawanibu ana bestean mapuabu jabis jatu yuikin jatu unanti wakeakeaya <sup>13</sup> ianenwan batapa anua mawanibu inun janu mawabu bumisbu anua mawanibu jabu Diosun bestenwantan ichawaxun jaskadada jiwekubainibu jabu tibi unanti wakin pepabu inun chakabubu jatu kupiaya <sup>14</sup> jatun jatu mawamanika inun janu mawabu bumisbu anu ja ian janu menui jede ji ji ikai anu jau dabeki mawakin menununbun jatu udean <sup>15</sup> tsuabunda Dios chibankin Jesús ikunwanbuma jabun kena Diosun jaki kenemis una anu jabun kena jayama ja ian janu menui jede ji ji ikai anu ma jatu puta keyuabuki.

## 21

*Jerusalén bena Juanen uinikiaki, na janchadan*

<sup>1</sup> Ja jaskaibutian jabu dukun badi inun, uxe inun, bishi inun, mai damiwani bepemanai xabakainaya ianenwan batapadi jayamaya jabiatiandi ana uinkin nai bena inun mai bena taxnidiai en uindiashinaki.

<sup>2</sup> Januxun ana betsa taxnikidanai uinkin ainbun juni benewanun, iwanan, jawen beneki nukui kanun ika jawenduai keskamis Jerusalén maewan bena ma dasibi iduya pepaya Diosun nai anua buteaya <sup>3</sup> xanen ibu jaki tsauti anuxun jui kushipawen yuiai en ninkaya: “Uian. Na maedan, jaki, ja medan yudabube Dios jiwepakexanaidan. Jawen jatube jiweidan, jawenabubes ixanikiki. Dios ja besti jabun mekenika ixanikiki. <sup>4</sup> Jaskawen taea jabu kaxamisbu jatun beun taxka watan ana mawa jayama inun, ana sain ikama inun, kaxa jayama inun, isin jayama dasibi jaska Diosun jawen bika jiweti wani bextekin ana ja jayama waki”, ikaya

<sup>5</sup> janua xanen ibu jaki tsauti anuxun nukun Xanen Ibun ea yuikin: “Chanimá jancha shinan kaya en mia yuiai kenediwe, eskadan. Uian. Eanan, dasibi en bena wakin keyuaii”, itan

<sup>6</sup> ana ea yuikin: “Dasibi jaskaxanai en yuinidad, ma en akin keyuaki. Ea dukun en ini inun niti ikama en jiwepakexanaii. Tsuabunda unpax

akatsis ikin manuaibu keska ea anu beaibu en jatu jiwea inanxanaii, jawa jatu pakamamadan. <sup>7</sup> Ja inun, tsuabunda ea dananma jabun maemakin binumisbudan, ea en jatun mekenika Dios ikaya jabu en bakebu na mae bena anu jawa benuama ebe jiwei ikibi ipakexankanikiki. <sup>8</sup> Jakia jameen ekidi janchabiai eki dakemis inun, eki pechia jawa shinainsbuma inun, yuda betsabe dananananmisbu inun, yuda betsabe tenanmisbu inun, chutanamebaunmisbu inun, mukayakin Satanásan kushipa yukamisbu inun, yushin dami betsabe kenwanmisbu inun, chani chakabaunmisbu jabu dasibi en kupia janu buidan, ja ian janu azufre menui jede ji ji ikai anu ja dabeki mawa mexankanikiki”, ea wa en matu kenexunaii.

<sup>9</sup> Januxun 7 nai tsumabun ja 7 Diosun yudabu jawen jenea kupiti mese kencha betsa mata tsuma eki nukuxun ea yuikin: “Chaxawan baken ainyanxanai yusinkin mia kayatiwamanun nedixun uinyuwe”, iwanan, <sup>10</sup> ja nai tsuma en yushinki nukuxun nama keskawen mati keyatapa anu en yushin ea iyuxun Jerusalén maewan pepajaida medibi Diosun nai anua buteai ea uinmashina matu yuinun ninkakanwen. <sup>11</sup> Jawen maewan chaxadan, Diosun xabawaki. Nenkati betsa diamante kadujaida bexnan bishtu keska bakamanai chaxamai en uinxuki. <sup>12</sup> Jawen kene keyatapa kushipawen dakenbauna inun, jawen jikit xui beputiya 12 jayaki. Ja inun, ja jikit xui tibi anu nai tsuma betsan kexea inun jikit xui mamaki tibi Israelin 12 bababu xukua tibitun jabun jatun kena betsa tibi kene jayaki. <sup>13</sup> Ja inun, badi juaikidi esteudi jikit xui dabe inun besti jaya inun, norteudi jabiatidi jaya inun, surkidi jabiatidi jaya inun badi jikiaikidi oesteudi jabiatidi jayadiki. <sup>14</sup> Ja inun, jawen kene keyatapa jawen kushipa wati 12 mishkipawan jawen mestenwankin tsamabauna keneyaki. Ja inun, chaxawan baken 12 tsuma kushipayabun kena tibi mishkipawan tibiki nea jayaki, jatun kenadan.

<sup>15</sup> Janua ja nai tuman ea jancha waitun maewan inun jawen jikit xui inun jawen kene kauana tananun, iwanan, jawen tanati tawa keska oro tsumaxun <sup>16</sup> jawen tanaxuki. Maewan jawen chaipa inun jawen jaxpa inun jawen keyatapa jawa binuama jabiatrixunbus 2,200 kilómetro iakea jayaki. <sup>17</sup> Januxun kene jawen jaxpadi tanaxuki. Junibun tanamis keska wakin nai tuman ja tanatiwen kene jawen kextu 64 metro tanaxuki.

<sup>18</sup> Jawen kenekidi matu yuinun ninkakanwen. Ja dukun mae jidabi oro keska dasibi tashipa chaxajaidaki. Ja inun, jawen kenedan, jaspe nenkati nanketapa bexnan kadujaida kenekauana jayaki. <sup>19</sup> Ja inun, mishkipawan jabuki kene tsamabaunabu nenkati kadujaida tibiwen dauyaki. Mishkipawan ja dukun diamante nenkati bexnanjaida jayaki. Ja segundo zafiro nenkati nanketapa jayaki. Mishkipawan ja tercero ágata nenkati nanketapa kudupa jusia shiwaya jayaki. Ja cuarto esmeralda nenkati nanke kudupa jayaki. <sup>20</sup> Ja quinto ónice nenkati juxupa inun tashipa bexmas jusia shiwaya jayaki. Ja sexto rubí nenkati tashi bexmas jayaki. Ja séptimo crisólito nenkati pashinipa kudupa jayaki. Mishkipawan ja octavo berilo nenkati ankunepa jayaki. Ja noveno topacio nenkati pashinipa jayaki. Ja décimo crisoprasta nenkati ankunepa bexmas jayaki. Ja undécimo jacinto nenkati nanke bexmas jayaki. Ja 12 mishkipawan jawen jenea ja duodécimo amatista nenkati minanepa jayaki. <sup>21</sup> Ja inun, ja 12 beputi tibidan, perla chudi mane ewapajaidabuki. Ja inun, maewan jawen niti bai kayadan, bexnanjaida oro jas bixtu keska bakamanaikiki.

<sup>22</sup> Ja inun, Diosun maewan bena jidabi anuxun Epa Dios Xanen Ibu binu keyua inun jawen bake chaxawan jabu kenwankubainmisbuwen taea jawen kenwanti jiwe jayama en uianma ixuki. <sup>23</sup> Ja inun, ja maewan anudan,

Epa Dios jawen kushipawen chaxajaidamis inun chaxuwan bake bin keskai chaxai ji imisken ana badi inun uxe jawen chaxa ana jabu jayamaki. <sup>24</sup> Jaska inun, nawabu dasibi ja maewan anu mapuidan, bin chaxa keskawen mapuxankanikiki. Ja inun, xanen ibu Diosunabu mai jidabi anuabun jatun mabu pepa Dios inanxankanikiki. <sup>25</sup> Ja inun, jawen beputidan, xaba ikibi ikawen taea bepenmanaibi bepenmanaki, jawa ana yame jayamawen taeadan. <sup>26</sup> Ja inun, beputi xui anu jikikin nawa betsa betsapa shadabun Dios kenwankin dasibi jawen jawendua jayabu inanun ika jikixankanikiki. <sup>27</sup> Jaskabiaken tsuabuda atimapamisbu inun, jawada Diosun dananmis amisbu inun, jabu chani chakamisbu jabu jadi jikitaskama ixankanikiki. Jakia jamen jabu jikidan, tsuabunda kena chaxuwan baken jiwe kuian una medan Diosun netani jabu besti Diosun mae bena anu jikixankanikiki.

## 22

<sup>1</sup> Januxun xanen ibu jaki tsauti Dios inun chaxuwan bake jaki tsauabu anua jene jiwekuian jaya kauana bexnan pejaida bixtu keska nai tsuman ea uinmaxuki. <sup>2</sup> Jaska ja bai kaya namakis jene kexa uke dabebi jawen jiwevati ji mapubaina en uinxuki. Jawen bimi betsa betsapa uxe tibi betsa maei bimimisbuki, jau Diosunabun pipakexanunbunan. Ja inun, jabia ji peiwen yudabun jamapai betsa betsapa tenekubainaibu jawen peiwen xuxatidubuki. <sup>3</sup> Ja inun, Diosun mae anu jawa yupukunanti jayamaki. Ja inun, xanen ibu jaki tsauti anua Dios inun jawen bake chaxuwan bake tsauabun ja mae medanxun Diosunabun jabun jatu kenwankubainxankanikiki. <sup>4</sup> Jadia Diosbe beisinan dabexankanikiki, Diosun kena jatun betunkuki nea jayadan. <sup>5</sup> Jadi jiweabu anu ana yame jayama inun janu jiwevun nukun Xanen Ibu Dios jatu jiwevakin jatu xabawaxunken jabu jabe xanen ibui jeneama ipapakexankanikiki. Jaskawen taea ana badin chaxa inun binman chaxa jayama ixankanikiki.

### *Jesús ana juxanai ma kemaikiaki, na janchadan*

<sup>6</sup> Januxun nai tsuman ea ana yuikin: “Chanimax jancha en mia yuiai ninkawe. Nukun Xanen Ibu Diosun jawen jancha yuixunikabu jawen jancha jatu yunumistun jaskadada samama ixanai jau jawen tsumabun yusinxanun, iwanan, en jawen nai tsuma jawen jancha eadi yunuxuki, en mia tapinmanunan. Diosun chanimax jancha tibi yubakatan axanai en mia uinmaxu en mia yuiai ninkatan ikunwandiwe”, ea waya

<sup>7</sup> Jesúundi ea yuikin: “Uian. En samama ana kaxanaii. Jaskaken na jancha jaskadada inunbadiaikidi chaniai kenekin min una waidan, tsuabunda ikunwankin chibanaxanaibudan, Diosun jatu benimawaxanikiki. Manayuwe”, ea waxuki.

<sup>8</sup> En Juanen dasibi na jancha ninkakin na betsa betsapa uinkin keyui benimai juinti shinan chankain nai tsuman ea uinmakubainxu kenwanun ika jawen tae naman en danti ikaya <sup>9</sup> ea nemakin yuikin: “Jaskayamawe. Mia keska eadi en Diosun tsumaki. Min betsabu Diosun jancha yuixunikabu betsa inun dasibibun na jancha kenekin min una wai jabun chibanaxanaibu keska eadi en jatu keskaki. Dios besti kenwanwen”, ea watan

<sup>10</sup> nai tsuman ana ea yuikin: “Dasibi en mia uinmaxu jaska inunbadikiki. Jaskawen taexun na Diosun jancha juneama na min una wai ma badi keyui kemai jawen unanxankanikiki. Ana juneama xabakabi jaska tibi kainkunkaini menekunkainxanikiki. <sup>11</sup> Jaska inun, tsuada chakabui jiweadan, jatu bexteyamawe, jau jabiaska chakabu chibain jiwenunbunan.

Ja inun, tsuada atimapa jiweadan, jau jawen atimapa chibain jiwepakenunbunwen. Ja inun, tsuada pepai jiwekatsis ikidan, jau pepa besti wakubainbunwen. Ja inun, tsuada medibi Diosunabuidan, jaska Diosun bechipaiai keska jau ikubainunbunwen”, ea waya

<sup>12</sup> Jesúsun ana ea yuikin: “Uian. En samama ana kaxanaii. Kakinan, jatun manakuti tibi en jatu buxunxanaii, jaska tibi jiwemisbu keska jatu inain kaidan. <sup>13</sup> Ea dukun en taxnini inun en jawen jenea debesekeaki. Ja inun, eadan, ea dukun en ini niti ikama en jawen jeneaki. Ja inun, ea dukun en ini niti ikama en jiwepakexanaii”, ea waxuki.

<sup>14</sup> Uinwen. Tsuabuda benimati jayadan, jatun tadi patsa keska wakin jabun shinan kayabiwen Jesúsun ikunwankin chakabu Dios buamakubainmisbu jawen mae bena anu jikitan jabu besti pekin jawen benimai jiwei ji bimi pikubainxankanikiki. <sup>15</sup> Jamen betsabudan, Dios danankin jamapai chakabuwamisbu inun, mukayakin Satanásan kushipa yukamisbu inun, chutanamebaunmisbu inun, yuda betsa tenamisbu inun, yushin dami betsa kenwanmisbu inun, dasibi jamapai tibi bechipaibaunmisbu inun, chani chakamisbu jabu jaskamisbu besti bashikuxankanikiki, jabu Diosun mae pepa anu jikiamadan.

<sup>16</sup> Januxun Jesúsun ana ea yuikin: “Eadan, Davidin baba inun pena bishi chaxajaidamis keskatun en Jesúsun en mia yuiai ninkawe. Diosunabu ichamisbu betsa betsapa anu jaska en uiain min jatu pewakin e imaxanun, iwanan, en nai tsuma en mia anu yunua jaska dasibi mia uinmaxuki, jau en jancha min jatu bumaxanunan”, ea waya

<sup>17</sup> janua nun Chaxuwanen ainen jabun nun ikunwainbunan, Yushin Pepabetan Jesúsun yuikin: “Judiwe!” nun ikaya tsuabunda nuku ninkakin: “Jau judinunwen!” jau idianunbunwen. Ja inun, tsuabuda unpax manui keskakin Dios benakin Jesúsun chibankatsis ikin jau ikunwanunbunwen. Jaska watan jawen unpax jiwemati jaya jau aki benunbunwen, jawa pakamadan.

<sup>18</sup> Na jancha dasibi Diosun ea bebunkidi uinmaxu ninkatan en matu yuiai ninkaidakanwen. Na dasibi jancha Diosun ea yuixuyabi padananankin tsuabunda ibubis jatun jancha kenekin ana unakia kene chichikin ewa watan yuikin: “Nadan, dasibi Diosun janchaki, chanimadan”, itidubu bebunkidi en matu mesewaii. Tsuabunda jaska waxanaibu jatu kupikin ja ichakawati betsa betsapa ea yusinxuwen Diosun ana kupiti betswen jatu kupixanikiki. <sup>19</sup> Ja inun, tsuabunda na jancha Diosun ea yuixu en una waxukia ja unakia jancha betsa tede akaibuwen taexun Diosun jawen benimai jiwei ji bimi jaki tanabiayama jatu mebintan jawen mae pepa anu na unaki ea kenemaxu keska wakin Diosun jatu jikimama ixanikiki.

<sup>20</sup> Na jancha jatun ea pewamaitun yuikin:

“Chanima en samama ana kaxanaii”, ikaki.

Jabiaskaki. Nukun Xanen Ibu Jesucristoon, menan jawaida judiwe, nun mia shinainan.

<sup>21</sup> Nukun Xanen Ibu Jesucriston jau matu dasibi jawen pepawen duawakubainxanunwen.

Ea uinmakubidanxu en jancha chanimadan, jatiski.

Juan